


Mussau-Emira Bible



Portions of the Holy Bible in the Mussau-Emira Language of
Papua New Guinea

**Mussau-Emira Bible
Portions of the Holy Bible in the Mussau-Emira Language of
Papua New Guinea
Sampela hap Buk Baibel long tokples Mussau-Emira long Niugini**

copyright © 2006, 2008, 2013, 2016, 2018 Wycliffe Bible Translators, Inc.

Language: Mussau-Emira

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-09

PDF generated using Haiiola and XeLaTeX on 25 Nov 2022 from source files dated 30 Nov 2021

9cadc943-c245-5983-a663-5b2655bf0449

Contents

Matiu	1
Mak	67
Luk	109
Jon	177
Apostolo	226
Rom	287
1 Korint	316
2 Korint	343
Galaisia	361
Ipises	370
Pilipae	379
Kolosae	386
1 Tesalonika	392
2 Tesalonika	398
1 Timoti	402
2 Timoti	409
Taetas	415
Pilimon	419
Hibru	421
Jeimis	442
1 Pita	449
2 Pita	457
1 Jon	462
2 Jon	469
3 Jon	471
Jiud	473
Niaulia ngaotu	476

Masi kiukiu Matiu ghe pitiela **Inangari emuemua**

Matiu kateva ta kasangaulu ghalua (12) disaepolo, mene kateae ararina ta Livae. Matiu ghe tiuala tani piti tuvuna atoa Iesu, aitiutiua Abraham, me ghe mae sio ta Deivit, me tee ekiukiuaa lutulutuaane Iesu. Ghe pitila oroieili voto Iesu ghe apasungaala ta taumattu ngatoa, me ghe polala tale ghalimae mutungi inangari: Iesu ghe aippooaala tale motouru (sapta 5-7), niloeloe ta disaepolo atoa (sapta 10), kiukiu niaimatoonga tale aririmangalina ateva epona liu (sapta 13), vaalua disaepolo atoa aue la toka (sapta 18), me maemaeaane Iesu (sapta 24-25). Matiu ghe kaarasila tani apasunga vaalua Iesu ghe akoronnala inangari tani aulia ngamuemua tale propete atoa.

Tani kila amuemua

Tuvuna atoa me lutulutuaane Iesu 1:1–2:23

Jon tau ngai asuu ia ghe aimonomonosiaala salana Iesu 3:1–4:16

Iesu ghe uungula eGalilii me voto kalakalangina eGalilii 4:17–16:20

Inangari eaaitiutiui 4:17–25

Iesu ghe aippooaala tale motouru 5:1–7:29

Kasina mirikol Iesu ghe gheleila 8:1–9:34

Disaepolo atoa laghe uungula 9:35–11:1

Vaalua taumattu ghe tarala uunguaane Iesu 11:2–12:50

Iesu ghe apasungaala tale kiukiu niaimatoonga 13:1–53

Vaalua taumattu ghe nongola inangarina Iesu 13:54–16:20

Iesu ghe apasungaala ta disaepolo atoa 16:21–18:35

Iesu ghe uungula eJiudia 19:1–25:46

Iesu ghe saela eJerusalem 19:1–20:34

Iesu ghe kopi ssola eJerusalem 21:1–22

Iesu me namu ngatoa ta alraeli etoa 21:23–23:39

Iesu ghe auliaala voto auena elutu 24:1–25:46

Matemateaane me tottotuaane Iesu 26:1–28:20

Nau Iesu ghe tokatoka eJerusalem 26:1–46

Laghe kunela Iesu me laghe gheleila niaisakei etana 26:47–27:26

Laghe avukala saela Iesu tale aikotoo 27:27–56

Laghe kaiala Iesu me ghe totula tale nimate 27:57–28:20

Tuvuna atoa Iesu Karisto

(Luk 3:23–38)

¹ Lo ateva oia vuku eaauliaa tuvuna atoa Iesu Karisto. Iesu tuvuna ia Deivit. Me Deivit tuvuna ia Abraham.

² Abraham tamane ia Aisiki,

me Aisiki tamane ia Jekop,

me Jekop tamane ia Jiuda me tuena atoa me nengane atoa,

³ me Jiuda tamairarue ia Peres me Sera, kinairarua ta Tamar,

me Peres tamane ia Hesron,

me Hesron tamane ia Ram,

4 me Ram tamane ia Aminadab,
 me Aminadab tamane ia Nason,
 me Nason tamane ia Salmon,
 5 me Salmon tamane ia Boas, kinna ta Reiab,
 me Boas tamane ia Obet, kinna ta Rutu,
 me Obet tamane ia Jesi,
 6 me Jesi tamane ia King Deivit,
 me Deivit tamane ia Solomon,
 kinna Solomon manna akasina ia Uraea,
 7 me Solomon tamane ia Rehoboam,
 me Rehoboam tamane ia Abia,
 me Abia tamane ia Eisa,
 8 me Eisa tamane ia Jehosapat,
 me Jehosapat tamane ia Jehoram,
 me Jehoram tamane ia Usaea,
 9 me Usaea tamane ia Jotam,
 me Jotam tamane ia Eihas,
 me Eihas tamane ia Hesikaea,
 10 me Hesikaea tamane ia Manase,
 me Manase tamane ia Eimon,
 me Eimon tamane ia Josaea,
 11 me Josaea tamane ia Jehoiasin* me nengane atoa. Isaa o nau
 laghe soallotila aIsraeli etoa me laghe siola eBabilon.
 12 Ghe mene tiuaala nau eteva laghe siola eBabilon:
 Jehoiasin tamane ia Sealtiel,
 me Sealtiel tamane ia Serubabel,
 13 me Serubabel tamane ia Abiut,
 me Abiut tamane ia Eliakim,
 me Eliakim tamane ia Eisor,
 14 me Eisor tamane ia Sadok,
 me Sadok tamane ia Akim,
 me Akim tamane ia Eliut,
 15 me Eliut tamane ia Eleasar,
 me Eleasar tamane ia Matan,
 me Matan tamane ia Jekop,
 16 me Jekop tamane ia Josep, manna ia Meri, ta ngetana Meri Iesu
 ghe lutula, la aseasea va Mesaea ia.
 17 Liuna avalua o me tuvuna atoa Abraham ghe tiuaala me ghe
 mae sio ta Deivit erooroo kasangaulu ghaata (14) vituu. Me ghe
 tiuaala ta Deivit me ghe ghaala nau eteva laghe siola eBabilon erooroo
 kasangaulu ghaata (14) vituu. Me ghe mene tiuaala nau laghe siola
 eBabilon me ghe ghaala nau ta Mesaea erooroo mene kasangaulu
 ghaata (14) vituu.

*Lutulutuaane Iesu Karisto
(Luk 2:1-7)*

18 Kiukiuna Iesu Karisto nau eteva ghe lutula, isaa avalua toko. Kinna
 ta Meri, laghe uela va aue eghaa Josep me emanna ia, me karika lalu
 ghe aso aitauaa me laghe tarala va tale sarasarakaniaane Spirit Manga
 ateva me Meri ghe kkaaila aliki eteva. 19 Josep ghulughuluena ia, ghe

1:5: Rutu 4:13-17. 1:6: 2 Sam 12:24. 1:11: 2 Ki 22-24; 2 Kro 36:10; Jer 27:20. * 1:11:
 Tale inangari nge Grik, *Jekonia*, mene kateae ararina Jehoiasin. 1:12: Esra 3:2. 1:18: Luk
 1:27, 35.

nongola va Meri ang ghe suusunuku, ghe tam annala tani ghelei epalata Meri ta mataira taumattu ngatoa, liuna avalua o me ghe nnaala va enim ruu einao inangari etingiu etairarua.

²⁰ Nau eteva Josep ghe annangaili llo, arovaeaata ta kapuna ensolo ateva Vau eteva ghe mae sio etana tale niasoasopoi eteae. Me ghe auliaala etana va, “Josep io tuvuna io Deivit, urau mene matautu tani ghaa Meri va evausenimi ia. Unongo, ia o aliki eteva ekakkaaia ta kovana, Spirit Manga ateva ghe taue lao sio etana. ²¹ Aliko eteva aue elutu etana, taita ia, me ukolo ararina ateaet Iesu, poli ia aue easaangi kapuna taumattu ngatoa[†] tale kaluira ssavoto.”

²² Isaa akapa llo Vau eteva ghe auliaala ta propete ateva emua arau ang ghele kaurekatila, ghe uela va, ²³ “Am nongola, kateva vause karika ghe aso tee teva taita aue esunuku me emolena aliki eteva taita ia, me aue la kolo ararina ateaet Immanuel” — malloeana va “God etokatoka teeita.”

²⁴ Nau eteva Josep ghe anguula, ghe gheleila voto kapuna ensolo ateva Vau eteva ghe auliaala etana, me ghe ghaala vause ateva. ²⁵ Me karika ghe aso tee iela lamosina ta ghe molenaala aliki eteva, taita ia. Me ghe kolola ararina ateaet Iesu.

2

Tau ngalomasaanga atoa laghe mae sio tani tara Iesu

¹ Meri ghe molenaala Iesu eBetlehem nge Jiudia nau ta King Herot. Iesu ang ghe lutula me emulina tau ngalomasaanga atoa, tale pai nge sinaka esae laghe mae sio ejerusalem ² me laghe aaikolomaa see va, “Eaa ia aliki eteva ghe lutula, kapuira Kingi ia ajiu etoa? Ami ghe tarala kattona ateva tale pai nge sinaka esae ativilau, me ami mae sio tani kkaueinia.”

³ Nau eteva King Herot ghe nongola isaa o inangari ghe annangailiila, me tee ila akapa taumattu nge Jerusalem atoa, ila tee laghe anna ngatingina. ⁴ Vara me ghe kolola namu ngatoa tana pristi me tau ngalomasaanga atoa tale inangari nipaopao kapuira ila taumattu ngatoa, laghe mae sio tani velu eitauaa, me ghe kolomilala va eaa Mesaea ngateva aue elaa lutu. ⁵ Me laghe liula etana va, “Aue elutu eBetlehem nge Jiudia. Poli propete ateva ghe pitila inangari isaa avalua toko,

⁶ “Me io Betlehem tale kosa nge Jiuda,

karika tani ghaunaaili ararim ateaet tale isaa akapaaili masaliki nge Jiuda,

ta poli ta getam aue taumattu ngateva namuu ia aue etingina.

Me ia aue eaitoiaa kapughu aIsraeli etoa.”

⁷ Herot ghe nongola isaa o inangari me ghe suu eisuliaala inangari ta tau ngalomasaanga nge sinaka esae atoa va la laa taraia. Nau eteva laghe lao sio, ghe kolomi emasinailala va, “Elovisa am ghe tani tarala katto ateva ghe kaurekatila?” ⁸ Vara me ghe sungilala va, “Am lao sio eBetlehem, me am laa pae aotu va eaa ang ghele lutula ia o aliki eteva. Nau eteva am tani taraia am mene mae auliaa etaghi, me aghi tee alaa kkaueinia.”

1:21: Luk 1:31; 2:21. [†] **1:21:** Tale inangari nge Hibru, Iesu malloeana va “Iaue easaangi”. Iaue ararina ateaet God tale Pokane ateva Inangari niapirooa ngaitauaa. Utara Eksodis 3:14-22.

1:23: Ais 7:14. **1:25:** Luk 2:21. **2:2:** Nam 24:17. **2:6:** Maeka 5:2; Jon 7:42.

⁹⁻¹⁰ Nau laghe ruula tani nongo inangarina Kingi, laghe kasula. Laghe laolao me laghe mene tarala katto ateva, laghe taraiela esinaka esae. Nau eteva laghe mene tarala katto ateva laghe masimasieiliila. Ia o katto ateva ghe muemueinila elaolao me ghe tokala epona kona aliki eteva ghe asoaso. ¹¹ Tau ngalomasaanga atoa laghe kupi ssola tale ale ateva, me laghe tarala aliki eteva me kinna ta Meri. Laghe tturru siola me laghe lkaueiniela, me laghe otilla uneira aikaai, me laghe kapela golo, frankinsens,* me murr† tani taula etana. ¹² God ghe auliaala kieira tale niasoasopoi va la rau mene lao nongina Herot etokatoka, me laghe lao ppae sio tale katikirighi salana me laghe lao sio tanganueira.

Josep, Meri me aliki eteva laghe siola elijip

¹³ Laghe kasula, me kapuna ensolo ateva Vau eteva ghe rekataala ta Josep, tale niasoasopoi eteae. Ensolo ateva ghe uela etana va, “Totula, me ughaa aliki eteva me kinna, me amatolu kasu parasi sio elijip. Am sio toka elijip, aue aghauliaa etam va elovisa am mene kiri sae. Poli Herot epaepae aliki eteva tani uvi ematea.”

¹⁴ Josep ghe totula me ghe ghaala aliki eteva me kinna, me eleivoo arau laghe siola elijip. ¹⁵ Josep ghe tokala elijip me ghe ghaala nau eteva Herot ghe matela. Isaa o voto ghe lutula tani akaurekatil llo Vau eteva ghe auliaala ta propete ateva emua arau. Ghe uela va, “Natughu taita ateva ghe tokatoka elijip, me aghe mene kolo veluela elijip.”

King Herot ghe auliaala va la uvi emate aliki taita atoa

¹⁶ Nau eteva Herot ghe kilala va tau ngalomasaanga atoa laghe kameala me karika laghe mene kiriaa lao sio, ghe sessai emateala, me ghe uela va la uvi emate isaa akapaaili natu ngaliki taita eBetlehem me llo masaliki etokatoka akalakalaa, aliki aneira ninamanama etitiuaa ta ghaluae me esiosio aloi, poli tau ngalomasaanga atoa laghe uela va laghe tarala katto ateva ghe kaurekatila ghaluae ninamanama ang ghe lange sio. ¹⁷ Llo propete Jerimaea ghe auliaala ang ghele tani kauerekatila, ghe uela va,

¹⁸ “Laghe nongola lingi ngalo ateva eRama.

Laghe ngangngala me laghe ale amate,
Resol ghe ngangngala natuna atoa.

Karika ghe aloanna righi airuui ngalo,
poli ila akapa natuna atoa ngila ghe matela.”

Josep me Meri lalu ghe kiri saela eNasareti

¹⁹ Nau Herot ghe matela, ensolo ateva ghe rekatala ta Josep tale niasoasopoi eteae elijip ²⁰ me ghe auliaala etana va, “Ughaa aliki eteva me kinna me amatolu mene sae eIsrael. Ta lo atoa laghe aaloanna tani uvi emate aliki eteva angila ghe mate akapala.”

²¹ Josep ghe totula me ghe ghaala aliki eteva me kinna me laghe saela eIsrael. ²² Vara me Josep ghe nongola va ouna ateva King ta Arkelaus ghe ghaala liuna ateva tamana ta Herot ejidua me ghe matautula tani lao. Vara me God ghe auliaala kieni tale niasoasopoi eteae va erau mene toka ejidua, me ghe saela eGalilii. ²³ Ghe lao sio tani toka tale

2:11: Sams 72:10-15; Ais 60:6. * **2:11:** frankinsens frankinsens masi voto aighelei aiaavusuvusuena. † **2:11:** murr voto la raarariaa tale taumattu matena. **2:15:** Osea 11:1. **2:18:** Jer 31:15; Aitiutiu 35:19. **2:23:** Ais 11:1; 53:2; Luk 2:39; Jon 1:45.

masaliki eteae laghe aseasea va eNasareti. Isaa o llo propete atoa laghe auliaala ghe tani kaurekatila va, “La aseasea va aNasareti ia.”

3

*Jon tau ngai aasuu ia
(Mak 1:1-8; Luk 3:1-9, 15-17; Jon 1:19-28)*

¹ Tale isaa o nau Jon tau ngai aasuu ia ghe mae sio me ghe tokatoka tale voto karika righi taumattu etana ejjudia. Ghe poppoaa tale taumattu ngatoa. ² Ghe ue va, “Am nna ngaioghioghiaa poli ararimangali ngepona liu eteva ange aakalakalaa.” ³ Ia o taumattu ngateva ta Jon, God ghe aulieiniela ta propet Aisaea va,

“Tale voto ateva karika righi taumattu etokatoka etana, lingi ngalo taumattu ngateva ekolokolo, eue va,
‘Am aimonomonosiaa salane atikirighi Vau eteva,
am ghelei eghulughuluenalaa akapa salane.’”

⁴ Unna aiaasae Jon laghe gheleila tale uu kamolo, me ghe ai-iriaa paisi eteae viliki vulumakao ia. Ghe namanama toto me iruena nge tapaa tuvui. ⁵ Tale isaa o nau taumattu nge Jerusalem me isaa akapa ejjudia me taumattu ghe tokatoka kalakalaa tale ateo atea eJodan laghe mae sio ta Jon. ⁶ Laghe aaulia ngaotu kaluira ssavoto me ghe aasuula tale ateo atea eJodan.

⁷ Jon ghe taatara va orioeili Paresi me Sadiusi etoa laghe mae sio va easuula. Vara me ghe uela etaira va, “Am nongina va natura iem katu ngatoa! See euela etaimim va am ilou vuli sessaiaane Vau eteva ange anna tani lutu etaimim? ⁸ Am kuneaa righi ueimim tani apasunga va ngam ghe vella kaluimim ssavoto. ⁹ Am rau mene ue va, ‘Ami tuvuna amami Abraham.’ Poli aghaauliaa etaimim va God erooroo tani ghelei isaa o atu etuvuna Abraham. ¹⁰ Kulum ateva aimonomonosiaanna ia tani tue akatuu ai, me isaa o ai karika ekuukuneaa masi uene aue la tue me la sau velu sae tale kuraa atea.

¹¹ “Aghi aghaasuem tale manu tani apasunga va ngam ghe nna ngaioghioghiaala. Me taumattu ngateva auena emae, ia sarasarakaniaane elaulau sarasarakaniaaghi, karika masi taumattu ngieghi tani sau unna aikasukasu. Ia aue eaasuem tale Spirit Manga ateva me tale kuraa atea. ¹² Ia emaema arova taumattu ngateva eposoposo unna pokonateva aisaraki uiti, tani pola uiti me kou uiti. Me eatoka aitauua uiti tale ale ngai atoka uiti eteva, me aue evelu sae kou uiti tale kuraa atea karika erooroo tani pala.”

*Jon ghe asuula Iesu
(Mak 1:9-11; Luk 3:21-22)*

¹³ Tale isaa o nau Iesu ghe kasula eGalilii me ghe mae sio eJodan va Jon easuua. ¹⁴ Jon ghe gheeghelei rungainia tani ue va, “Emaamasina arova io uasueeghi, vaalua me umae sio etaghi?”

¹⁵ Iesu ghe liula etana va, “Masina. Ghaine ughelei nongina aghauliaa. Tale isaa o salana, ita ghelei isaa akapaaili voto God ealoanna va ita ghelei.” Liuna avalua o me Jon ghe aimulisi teela inangarina Iesu.

¹⁶ Nau Jon ghe asuula Iesu, Iesu ghe laa sae tingina epona, me epona

3:2: Mat 4:17; Mak 1:15. **3:3:** Ais 40:3. **3:4:** 2 Ki 1:8. **3:7:** Mat 12:34; 23:33. **3:9:**
Jon 8:33, 39; Rom 4:12. **3:10:** Mat 7:19; Luk 13:6-9. **3:11:** Jon 1:26-27, 33; Apos 1:5. **3:16:**
Jon 1:32.

liu ghe otiela me ghe tarala Spiriti eteva kanna ia God ghe sio mae nongina ghila ateva valusu ia, me ghe toka saoaala etana. ¹⁷ Me epona liu kateva lingi ngalo ghe ue va, “Ia o natughu eteva aghaailousieinia, me masimasiaaghi ta getana namungaili.”

4

Satana ghe tootoongaala Iesu (Mak 1:12-13; Luk 4:1-13)

¹ Tale isaa o nau Spiriti eteva ghe ssoaala Iesu tale voto ateva karika righi taumattu etana va namu ngateva ta raroai etoa etootoongainia. ² Iesu ghe naela ghe roola ghaatingaulu (40) llaa me ghaatingaulu voo, me airuuruu tale isaa o nau, ghe maloola. ³ Vara me saikame ateva ghe mae sio tani rekataa etana, me ghe uela etana va, “Arova koronna va Natuna io God, uauliaa tale atu o me ekoli me everete.”

⁴ Iesu ghe liula me ghe uela va, “Uru ngai Manga ateva eue va, ‘Karika taumattu ngatoa va la maamaulue nonga tale inana, karika, ta nau la aimulisi tee isaa akapaaili inangarina God aue la maulue.’”

⁵ Ghe aulia ngavaluela o, me namu ngateva ta raroai etoa ghe mene laoainie sio tale masaliki taatara atee manga ia.* Me ghe saeainiela tale pungani ale manga ateva, ⁶ me ghe uela etana va, “Arova koronna va Natuna io God, ulove velu sio, poli Uru ngai Manga ateva eauliaa va, ‘Aue esuu kapuna ensolo atoa

aue la sau evukalaio
me karika aue utaghua kekem tale atu.’”

⁷ Iesu ghe uela etana va, “Uru ngai Manga ateva emene ue va, ‘Urau mene tootoonga Vau eteva kapum Goto ia.’”

⁸ Namu ngateva ta raroai etoa ghe mene ghaiae saela tale motouru eteva iaaili epona, me ghe apasungaala patunganua namu ngakapa atoa tale kosa ateva oia, me masi voto atoa etaira. ⁹ Me ghe uela ta Iesu va, “Aue atau aatu isaa akapaaili voto angu tarala, arova ussuuiaa me ukkaueinieghi.”

¹⁰ Iesu ghe uela etana va, “Vellaio Satana, ta poli Uru ngai Manga ateva eauliaa va, ‘Ukkauaa Vau eteva kapum Goto ia, me uaimulisi teeia nonga.’”

¹¹ Me namu ngateva ta raroai etoa ghe kasu vuliela, vara me ensolo atoa laghe mae sio tani sausia.

Iesu ghe tiuala tani uungu (Mak 1:14-15; Luk 4:14-15)

¹² Nau eteva Iesu ghe nongola va Jon ie tale ale mata voovoo, ghe oghi lao sio eGalilii. ¹³ Ghe kasu vulila eNasareti me ghe lao sio tani toka eKapenium tale ateo talia ngateae tale kosaira ararimangali elua ta Sebulon me Naptalae. ¹⁴ Iesu ghe gheleila isaa o voto tani akauerekati inangari propet Aisaea ghe auliaala,

¹⁵ “Taumattu tale kosa nge Sebulon me Naptalae,

kosa etokatoka tale salana atikirighi elaa ghoa elamana, me kosa tale pai kativilau tale ateo ateeae ejordan,

3:17: Sams 2:7; Ais 42:1; Mat 12:18; 17:5; Luk 9:35. **4:1:** Hib 2:18; 4:15. **4:2:** Eks 34:28.

4:4: Diut 8:3. * **4:5:** masaliki taatara atee manga ia Mallooeana va Jerusalem. **4:6:** Sams 91:11-12. **4:7:** Diut 6:16. **4:10:** Diut 6:13. **4:12:** Mat 14:3; Mak 6:17; Luk 3:19-20.

4:15: Ais 9:1-2.

Galilii kosaira ia taumattu ngeleka atoa.

¹⁶ Isaa o taumattu etokatoka tale saurrom ateva
ngila ghe tarala paka mallanga ateva,

lo atoa la tokatoka tale saurrom masau ta Vau ngepona ateva[†]
mallanga ateva ang ghe llaala etaira.”

¹⁷ Tale isaa o nau Iesu ghe tiuaala tani ppooaa, ghe ue va, “Am nna
ngaioghioghiaa, poli ararimangali eteva epona liu ange aakalakalaa.”

*Iesu ghe kolola disaepolo ghaata
(Mak 1:16-20; Luk 5:1-11)*

¹⁸ Iesu ghe kasukasu elaolao tale sama ateo talia ngateae eGalilii, me
ghe tarala tue me nenga alua, Saemon la kolokoloa va Pita etana, me
nengane ta Andru. Lalu ghe lukuluku ta tau ngelamana ilalua. ¹⁹ Me
ghe uela ta ngetairarua va, “Amalu mae usieghi me aue agheleiemalua
me amalu tau ngai luku taumattu.” ²⁰ Me arovaeaata ta lalu ghe velu
elokoila uvena me lalu ghe usiela.

²¹ Iesu ghe mene kasu tee lao sio me ghe mene tarala mene ghalua
tue me nenga, Jon me Jeimis, natuna ilalua Sebedi, lalu ghe tokatoka
tee tamairarua ta Sebedi, laghe anuunumi uneira uvena epona tale
paanaka ateva, me Iesu ghe kololalue. ²² Karika lalu ghe aitoila ta
lalu ghe kkure vulula paanaka ateva me tamairarua me lalu ghe usiela.

*Iesu ghe poppooaa me ghe gheeghelei emasina taumattu ngatoa
(Luk 6:17-19)*

²³ Iesu ghe kasukasu ekapa see eGalilii, me ghe aapasunga tale aleira
ale nivelu eitauaa me ghe poppooaa masi kiukiuna ararimangali eteva,
me ghe gheeghelei emasina isaa akapa asease sessa atoa. ²⁴ Kiukiuna
Iesu ghe lao akapa seela tale provinsi eteva eSiria, me taumattu ngatoa
laghe maemaea asease tau sessa atoa, lo atoa ghe anoanongi ila, me
lo atoa raroai etoa laghe kupilala, me lo atoa laghe oo, me lo atoa
karakanna ila, me Iesu ghe ghelei emasinailala. ²⁵ Oroi ila taumattu
nge Galilii etoa me taumattu tale Kasangauluae Masaliki Taatara, me
aJerusalem atoa, me Ajiudia ngatoa me lo atoa tale pai kativilau tale
ateo ateae ejordan, laghe usiusie see.

5

Iesu ghe aippooaa tale motouru

¹ Nau eteva Iesu ghe tarala taumattu ngatoa laghe oroieili ila, ghe
saela tale motouru eteva, me ghe toka siola, me kapuna disaepolo atoa
laghe mae sio etana. ² Me ghe tiuaala tani apasunga etaira va,

Niarangise

(Luk 6:20-23)

³ “Aue emasinaaili ta lo atoa la kilakila va masi uunguaane ateva God
karika ia etaira me la aloannaaili tani ghaaia,
ta ararimangali ngepona liu eteva aue anueira ia.

⁴ Aue emasinaaili ta lo atoa la ghaalousiusi,
ta God aue airuui ngalo ia ta ngetaira.

⁵ Aue emasinaaili ta lo atoa la siosioaa nannaairaa,

[†] **4:16:** Tale inangari nge Grik, voto ateva tootoo nimate. **4:17:** Mat 3:2; 19:27. **4:23:**
Mat 9:35; Mak 1:39; Apos 10:38. **4:24:** Mak 6:55. **4:25:** Mak 3:7-8. **5:3:** Ais 57:15.
5:4: Ais 61:2-3; Aotu 7:17. **5:5:** Sams 37:11.

poli kosa akapa ateva aue kaluira ia.

6 Aue emasinaaili ta lo atoa la ghaaloannaaili ghulughuluena, nong-inaili lo ateva emaamaloo ealoannaaili tani namanama, me ekaakangngata tani ropi,

ta God aue eghelei eroorooaa aloannaaira.

7 Aue emasinaaili ta lo atoa la aalousiusi tee mene katoa,
ta God aue ealousiusi teela.

8 Aue emasinaaili ta lo atoa urunguitaniira raarangisana,
ta aue la tara God.

9 Aue emasinaaili ta lo atoa la ghaalokoi luei,
ta God aue easela va natuna ila God.

10 Aue emasinaaili ta lo atoa la ghaaghhaa mmarakana mausi masi
gheegheleiaaira,
ta ararimangali ngepona liu eteva aue anueira ia.

11 "Aue emasinaaili etaimim arova taumattu ngatoa la pilosiem, me la
ghelei saasakiaa teeiem, me la ghaikameaa teeiem, poli ararighi eteae.

12 Voto sesa laghe tani gheeghelei tee propete atoa emua arau, isaa
oia la mene gheeghelei teeiem. Am masimasi etingina, ta aipoliim
namungaili isaa epona liu.

Uela me mallanga ateva (Mak 9:50; Luk 14:34-35)

13 "Am uela am tale kosa ateva oia, me arova namina ateva uela ateva
ekapa, o vaalua aue ita mene gheleia me emene tue namina? Ta ia o
ange kapala maamasikaniaane. Taumattu ngatoa aue la nim sau velua
me la sakieinia tale kosa ateva.

14 "Am mallanga am tale kosa ateva. Masaliki taatara ataeetokatoka
epona tale motouru, karika erooroo tani aisulia. **15** Me tee taumattu ngatoa
karika la ghaarokoti kuraaira lam ataeae va la ghaatoka pakeainia
tale keru. Ta la ghaatokae sae tale aitiitinginane, ta etaute lao
mallanga tale taumattu ngatoa tale ale ateva. **16** Ia avalua o me, am
apasunga mallangiimim tale taumattu ngatoa, me aue la tara masi
gheeleiaaimim, me aue la tau sae ararina ataeet Tamaimim epona liu.

Inangarina nipaopao God

17 "Am rau mene annaa va aghe mae sio tani ghaa velu inangari
nipaopao me inangariira propete atoa. Karika! Aghe tam mae sio
tani ghaa velu, ta aghe mae sio tani ghelei eroorooa. **18** Aghaaulia
ngakoronna etaimim va elomarase me kosa ateva oia aue ekapa, me
aue karika teva mata nginangari ghaunaaili tale inangari nipaopao
aue ekapa, karika, lomasina ta llo God ghe auliaala tale inangari
nipaopao etani lutu ekapa. **19** Arova see ia taumattu ngateva etam
aimulisi tee tuku kateva tale inangari nipaopao me eapasunga ta mene
katoa tana taumattu tani tam aimulisi tee, karika aue enamuu tale
ararimangali ngepona liu eteva, me lo ateva eaimulisi tee, ia ararina
ateae aue enamuu tale ararimangali ngepona liu eteva. **20** Aghaauliaa
etaimim va, arova gheegheleiaaimim ghulughuluena etam lau masi
gheegheleiaaira Paresi etoa me tau ngai aapasunga ngatoa tale inangari
nipaopao, karika aue am sso tale ararimangali ngepona liu eteva.

5:6: Ais 55:1-2. **5:10:** 1 Pita 3:14. **5:11:** 1 Pita 4:14. **5:12:** 2 Kro 36:16; Apos 7:52.

5:14: Jon 8:12; 9:5. **5:15:** Mak 4:21; Luk 8:16; 11:33. **5:16:** Ips 5:8-9; 1 Pita 2:12. **5:17:**
Rom 3:31. **5:18:** Luk 16:17; 21:33. **5:19:** Jms 2:10.

Salana tani ghelei eghulughuluena inangari

21 “Ngam ghe nongo vella va laghe auliaala ta lo atoa emua arau va, ‘Am rau mene aiuvi emate. Me arova lo ateva eaiuvii emate aue elaa ghaisakei.’ 22 Me aghi aghaauliaa etaimim va, lo ateva esessaia ta nengane ateva, aue eaisakei, me see eue ta nengane va, ‘Alo kapakapa ateva,’ aue elaa ghaisakei ta kansolo atoa, me lo ateva eue ta nengane va, ‘Tau veevee ateva’ aue kuraa ateae eataia eGehenna.

23 “Liuna avalua o me arova angu maemaeaa kalum aighelei masi aiaavusuvusuena, me uannaa lao mua kapum ateva ghe annaa va ughe ghelei saasakiaala etana, 24 uatoka sio mua kalum aighelei masi aiaavusuvusuena me ulaa taraia me amalu mene sama aitauaa, me auena umae ghelei masi aiaavusuvusuena sae ta God.

25 “Arova aissanim ateva ange laolao tani aulieinio ta tau ngai ghelei niaisakei eteva, ulaa tara parasia, me uauliaa etana va ualoanna va amalu kkaluaa llo voto amalu ghe gheleila karika masina, ta erau laa aulieinio ta tau ngai ghelei niaisakei eteva va elaa tauo ta polisi eteva, va elaa ghatokaio sso tale ale mata voovoo. 26 Aghaaulia ngakoronna etam va karika aue ukupi ghoa tale ale mata voovoo lomosina ta utau ekapa lao viliki veu la ghase va utau lao.

Nilai sari

27 “Ngam ghe nongo vella va laghe auliaala va, ‘Karika umene lai sari.’ 28 Me aghi aghaauliaa etaimim va, arova see ange tara ssaila vause ateva me ange annaa saasakiaala etana, ia ange lai sari teeila tale urunguitanina ateva. 29 Arova matam muenna ativilau eghaaghahaio lao tale ssavoto, uvaliki velua me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim elao eGehenna. 30 Me arova nimam muenna atelange ange gheleila va angu lao sio tale ssavoto, usai kotooia me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim elao eGehenna.

Niairatii tale taita me vause

(Mat 19:9; Mak 10:11-12; Luk 16:18)

31 “Ngam ghe nongo vella va, ‘Arova taita ateva ange ratila vausenna ateva, eghelei tikirighi unna uru ngai tani apasunga va ange ratirati vause ateva me eta lao ta vause ateva.’ 32 Me aghi aghaauliaa etaimim va arova taita ateva enim rati vause ateva tale kasina ppae asease voto me karika tale uunguua nialai salosaloaa see, ia o taita ateva eghelei vause ateva aue eaikune taita, me lo ateva taita emene lai ta vause ateva o ange lai sarila.

Inangari nialokoi

33 “Ngam ghe nongo vella va laghe auliaala ta lo atoa emua arau va, ‘Am rau mene kamekame nau ngam gheleila inangari nialokoi, me nau ngam gheleila inangari nialokoi ta Vau palepale ateva, utani aimulisi tee llo uaauliaa.’ 34 Me aghi aghaauliaa etaimim, am rau mene auliaa sae inangari nialokoi, karika epona liu tee, poli aitokatokane ateva o God, 35 me tale kosa ateva oia, poli God eaatingina saoaa kkena etana, me

5:21: Eks 20:13; Diut 5:17. 5:22: 1 Jon 3:15. 5:23: Mak 11:25. 5:27: Eks 20:14; Diut 5:18. 5:29: Mat 18:9; Mak 9:47. 5:30: Mat 18:8; Mak 9:43. 5:31: Diut 24:1-4; Mak 10:4. 5:32: 1 Ko 7:10-11. 5:33: Diut 23:21; Lev 19:12; Nam 30:2. 5:34: Ais 66:1; Jms 5:12; Mat 23:22. 5:35: Sams 48:2; Ais 66:1.

am rau mene auliaa sae inangari nialokoi tee eJerusalem, ta kinatama masalikina ia Kingi eteva iaaili epona. ³⁶ Urau mene auliaa inangari nialokoi tale urum ateva, ta karika urooroo tani ghelei katikirighi uu ngurum va eusousoana me evoovongiena. ³⁷ Am nim ue va ‘ue’ o ‘karika’, me karika am mene auliaa sae inangari nialokoi. Llo am nim mene auliaa, kanna sesa taumattu ngateva.

*Am rau mene ailiuaa voto sesa
(Luk 6:29-30)*

³⁸ “Ngam ghe nongo vella va laghe auliaala va, ‘Arova ughelei saasakiaa matana taumattu ngateva, eroo tani ghelei saasakiaa tee matam, me arova utumari kotoo ngalungaluna, eroo tani tumari kotoo tee ngalungalum.’ ³⁹ Me aghi aghauliaa etaimim va am rau mene liu voto sesa ngila ghelei teeiemla, arova ngila posalala bbam muenna ativilau, umene kirio me la mene posala mene kativilau. ⁴⁰ Arova taumattu ngateva ange laoainio sio tale niaiskei me eue tale niaiskei va upolia tale unem sioto ateva, masina utau tee lao aiaasae ngeleka ateva. ⁴¹ Me arova la ue etam va usunuki ghinna me ukasuaa tale kateva kilomita, masina usunuki me ukasuaa lao ta ghalua kilomita. ⁴² Utu lao voto tale lo ateva eloooloo, me urau mene aroo tale taumattu eanna tani ghaa voto pei niliu auena.

*Uailousiaa tau ngai ssateem atoa
(Luk 6:27-28, 32-36)*

⁴³ “Ngam ghe nongo vella va laghe auliaala va, ‘Uaielousiaa taumattu ngateva kalakalangina ia etam me ussa tee aissateem ateva.’ ⁴⁴ Me aghi aghauliaa etaimim va am ailousiaa aissaniimim atoa, me am looloo sae va God aue esausi lo atoa la gheelei saasakieinam. ⁴⁵ Arova am ghelei evalua o, aue natuna am Tamaimim ateva etokatoka epona liu, ta ia egheeghelei sinaka esaesae tale taumattu sesa me masina, me egheeghelei vaoo ateva ekaakatuu tale ghulughuluena atoa me tale tam ghulughuluena atoa. ⁴⁶ Arova am ailousiaa lo atoa la aailousieinam, saa aipolipoli aue am ghaa? Tau ngai ghaa takis atoa la gheelei evalua tee o. ⁴⁷ Me arova am ue va, ‘Elue talaua,’ nonga ta kapuimim atoa, am nim gheelei nongina katoa la gheelei. Tau ngeleka tee atoa la gheelei evalua o! ⁴⁸ Am ghulughuluenaaili nongina Tamaimim ateva epona liu ghulughuluenaaili ia.

6

Vaalua tani aiparruuuii

¹ “Am tani nanna ngamasina nau eteva am anna tani apasunga masi uunguaaimim ta mataira taumattu ngatoa va la tara. Arova am gheeghelei evalua o, karika aue am ghaa aipolipoli ta Tamaimim ateva etokatoka epona liu.

² “Liuna evalua o me nau eteva angu tautau lao voto ta lo atoa karika righi peiira, urau mene gheelei nongina usimaghluua atoa, la saasama me la gheeghelei tale ale nivelu eitauaa me tale salana, va la taraila me la asaesae arariira. Aghaulia ngakoronna etaimim va, ila o taumattu ngatoa angila ghe ghaala arau aipoliira. ³ Me io, nau eteva uparruu lo

ateva karika righi peina, ugheelei eisulia.* ⁴ Unem niaiparruuui unim ghelei eisulia, Tamam ateva etaatara voto ugheelei eisulia, me ia aue etau aatu aipolipoli etam.”

*Nilooloo sae
(Luk 11:2-4)*

⁵ “Me nau am aloanna tani looloo sae, am rau mene ghelei nongina usimaghala atoa. La ghalaannaaili tani looloo sae tale ale nivelu eitaua ngatoa me tale aighoughou tale salana va taumattu ngatoa la taraila. Aghaaulia ngakoronna etaimim va, ila o taumattu ngatoa angila ghe ghaala arau aipoliira. ⁶ Me io, nau eteva ualoanna tani looloo sae, ukupi sso tale alem atiulu, me ukavati atamana ateae me io nonga ulooloo sae ta Tamam, me Tamam etaatara llo ugheeghelei eisulia aue etau aatu aipolim. ⁷ Me nau eteva am looloo sae, am rau mene auliaa oroieili inangari karika malloeana nongina tau ngeleka atoa. La annaa va arova la auliaa oroieili inangari aue kapuira goto atoa la nongola. ⁸ Am rau mene usi gheegheeliaira, poli Tamaimim ateva ekilakila akasina llo voto am aloanna me am nim aaimuli tani kolomia. ⁹ Liuna avalua o me am looloo sae avalue toko va:

“Tamaimami epona liu
usausiemami tani oneoneaa ararim ateae va manga ia,
¹⁰ ami aloanna va ararimangalim ateva emae,
me tale kosa ateva oia ami ghelei aloannaam
nongina epona liu.

¹¹ Utai rooroaa mae aneimami inana tale lo ateva oia nau.

¹² Ukkaluaa gheeleiaamami sesa,
nongina ami kakkaluaa lo atoa gheeleiaaira sesa etaimami.

¹³ Urau mene tau veluemami va ami lao tale nitootoonga,
me uakekkeliemami tale sesa taumattu ngateva.”[†]

¹⁴ Poli arova am kkaluaa kaluira ssavoto lo atoa la gheelei teeiem, aue Tamaimim epona liu aue ekkaluaa kaluimim tana ssavoto. ¹⁵ Me arova am tam kkaluaa kaluira ssavoto taumattu ngatoa, aue Tamaimim ateva karika aue ekkaluaa kaluimim tana ssavoto.”

Ninae

¹⁶ “Nau angam naela, am rau mene ghelei taataraimim va esesaaili nongina usimaghala atoa la gheeghelei. Nau la naenae, la ghalaanna va taumattu ngatoa la kilaila, liuna avalua o me karika la gheelei eraarangisanaila. Aghaaulia ngakoronna etaimim, ila o taumattu ngatoa angila ghe ghaala arau aipoliira. ¹⁷ Me io, nau unaenae usile urum ateva me upora matam ¹⁸ me karika aue taumattu ngatoa la tara kilaio va unaenae, ta Tamam ateva etaatara voto ita tam taatara eaaisulia, ie nonga aue ekila, me etau aatu aipolim.”

*Uunguaa nighaa aitauaa ghinna
(Luk 12:33-34)*

* **6:3:** Tale inangari nge Grik, urau mene ghelei va nimam uaise atelange ekila va sa ateva nimam muenna atelange egheeleeia. **6:5:** Mat 23:5; Luk 18:10-14. **6:7:** 1 Ki 18:26-29.

6:8: Mat 6:32. **6:10:** Luk 22:42. **6:12:** Mat 6:14-15; 18:21-35. **6:13:** Luk 22:40; Jms 1:13; Jon 17:15; 2 Tes 3:3; 2 Tim 4:18. **† 6:13:** Kasina uru ngai laghe pitila, laghe mene uela va, ta poli ararimangali, sarasarakanma me nitau sae isaa etam nau ekapa atoa, koronna. **6:14:** Mak 11:25-26. **6:16:** Ais 58:5-9.

¹⁹ “Am rau mene ghaa aitauaa peiimim tale kosa ateva oia. Aue ane ateva enama ghinna me tee aue erroso me tau niainao atoa tee aue la rruti ale me la ainao. ²⁰ Ta am atoka aitauaa peiimim epona liu, me aue karika ane ateva enama me tee karika aue erroso, me tau niainao atoa karika aue la rruti ale me la ainao. ²¹ Ta poli voto ateva peim etokatoka etana, aue urunguitanim tee ateva etoka etana.

Matam — lam tale vilikim
(Luk 11:34-36)

²² “Matam alua mallanga ilalua tale vilikim. Arova matam va masina, vilikim akapaaili aue epasu tale mallanga ateva. ²³ Me arova matam va sesa, aue vilikim akapaaili aue saurrom. Liuna avalua o me arova mallanga ateva etam va saurromromiena ia, aue saurrom ateva enamungaili.

Karika urooroo tani uungu ta ghalua vau
(Luk 16:13)

²⁴ “Karika teva taumattu erooroo tani uunguu ta ghalua vau, ta aue tani ssa tee kateva me aue emasiaa kateva, me aue enongo usilaa kateva me eliu vilina ta mene kateva. Karika urooroo tani uungu ta God me viliki veu.

Urau mene ghelei nannaam va esio euu
(Luk 12:22-34)

²⁵ “Liuna avalua o me aghaauliaa etaimim va, am rau mene annangaili maamauluaaimim va sa ateva aue am namaia, me am ropia, me am rau mene annangaili vilikiimim va sa ateva am asaeaa. Karika am kilakila va maulue ateva namuu ia ta matane God, me inana isaa euu, me vilikiimim isaa epona, me aiaasae isaa euu? ²⁶ Am tara ghila atoa la looloo. Karika la pasapasa utana me karika la mukemuke atoka, ta Tamaimim ateva epona liu eangiinginila. Karika am kilakila va Tamaimim ateva, nannaane etaimim elaulau aitaraane tale ghila atoa? ²⁷ Me arova utoka annaa nonga sa ateva aue elutu tale maamauluaam, isaa o voto aue etau aatu maulue me umene toka tau lao?

²⁸ “Vaalu me am annangaili aiaasae? Am tara palaoa ngatoa la piipinosa, karika la uungu me karika la gheeghelei kalioira. ²⁹ Aghaauliaa etaimim va molumoluaane Solomon masinaaili, me karika ta palaoa ngatoa, la laulau molumoluaane Solomon. ³⁰ God eaamolumolu evalua o rarrasa atoa, la piipinosa ghaine, me nimanaa la taula sae tale kura atae. Am rooroo tani aikaaiiaa va aue eaamolumolu evalueiem tee o, uneimim niaikaaiaa ghaunaaili. ³¹ Liuna avalua o me am rau mene annangaili va, ‘Sa ateva aue ami namaia?’ me ‘Sa ateva aue ami ropia?’ me ‘Aue ami asae sa ateva?’ ³² Tau ngeleka atoa la iilou paepae isaa o voto, Tamaimim ateva epona liu ekilakila isaa o voto am tuutukuna etana. ³³ Mata ngemua ateva voto am ghelelia, am pae mua ararimangalina ateva God me gheegheeliaane ghulughuluena tale maamauluaaimim, me ia aue etau aatu isaa o voto etaimim. ³⁴ Liuna avalua o me am rau mene annaa nimanaa, poli maamaataniaa nimanaa epei nimanaa. Me kateva kateva nau, rooroona ia tale maate.

6:19: Jms 5:1-3. **6:20:** Mat 19:21; Luk 18:22. **6:25:** Plp 4:6; 1 Tim 6:6-8; 1 Pita 5:7.

6:26: Mat 10:29-31; Luk 12:6-7. **6:29:** 1 Ki 10:4-7; 2 Kro 9:3-6. **6:32:** Mat 6:8. **6:33:**

1 Ki 3:11-14; Sams 37:4, 25; Rom 14:17.

Niaisakei
(Luk 6:37-38, 41-42)

¹ “Am rau mene ue va katoa nonga taumattu la gheelei ssavoto, ta God erau auliaa teeiem va am tee am gheelei ssavoto. ² Poli God aue eghelei niaisakei etaimim nongina am gheelei niaisakei ta katoa, me saa ase voto am gheelei ta mene kateva, God aue eghelei tee etaimim.

³ “Vaalua me utaatara nonga tuku vongovongo arighi ta matana kapum ateva me karika uannaa tuku palanga ateva ta matam? ⁴ Vaalua me uue ta kapum ateva va, ‘Mae sio me aghaa velu tuku vongovongo arighi ta matam,’ me nau etoa tuku palanga ateva etokatoka ta matam? ⁵ Usimaghalue io! Ta ughaa velu ekasina mua tuku palanga ateva ta matam, me aue utaatara amasina nau eteva ualoanna tani ghaa velu tuku vongovongo arighi ta matana kapum ateva.

⁶ “Am rau mene ghaa voto manga va am tau lao ta paua atoa, ta aue la kirila me la ametiem me la namaiem. Me tee am rau mene velu sio uneimim pel ta mosu etoa, ta aue la asa saasakiaa.

Ukolomi, upae me umirimiri
(Luk 11:9-13)

⁷ “Am kolomi me aue etaau aatu; me am pae me aue am tara; me am mirimiri me atamana ateeae aue eotia. ⁸ Lo atoa la kookolomi, la ghaaghaa, me lo atoa la paepae, la taatara, me atamana eotioti ta lo atoa la mirimiri.

⁹ “See etaimim tamatama atoa, arova teva natum eloooloo teva tuku verete, aue utau lao teva atu? ¹⁰ Me arova eloooloo teva kko, aue utau lao teva katuu? ¹¹ Me gheegheleiaaimim sesa, me am kilakila tani tau lao masi voto ta natuimim atoa, am annaa va ghaisa ooroiaa voto Tamaimim ateva etokatoka epona liu etautau lao ta lo atoa la kookolomia? ¹² Tale isaa akapaili voto, am ghelei lao ta katoa, llo am aloanna va la ghelei mae etaimim. Isaa o llo isaa tale inangari nipaopao me tale propete.

Ghauna arighi atamana
(Luk 13:24)

¹³ “Am kopi sso tale ghauna arighi atamana. Atamana ateeae namuu ia me salana atikirighi namuu ia elao lao tale voto sesa, me oroi taumattu la kupikupi sso etana. ¹⁴ Me atamana tani ghaa maulue ateva ghauna ia me salane atikirighi masukasukaleaili ia tani usilainia, me karika oroi ila lo atoa la uusilainia.”

Ai eteae me uene
(Luk 6:43-44)

¹⁵ “Am paniem nonga tale propete kamekame atoa. Gheeleiaaira eleka masina nongina sipsipi etoa, me nannaiaira elome la nannaa sesa tani ghelei saasakieinam nongina sesa paua ngetapaa tuvui etoa. ¹⁶ Tale ueira aue am kilaila. Karika teva taumattu elaa paapariki ue ngai tale uasa karasa me ue uasa tale ai rorroana. ¹⁷ Tale ie nonga o salana atikirighi, masi ngai eteae ekuukuneaa masi uene, me sesa ngai eteae ekuukuneaa sesa uene. ¹⁸ Masi ngai eteae karika erooroo tani kuneaa

7:1: Rom 2:1; 1 Ko 4:5; Jms 4:11-12. **7:2:** Mak 4:24. **7:7:** Mak 11:24; Jon 14:13; 15:7; 16:23-24. **7:8:** 1 Jon 3:22; 5:14-15. **7:11:** Jms 1:17. **7:12:** Mat 22:39-40; Luk 6:31; Rom 13:8-10. **7:15:** Mat 24:24; Apos 20:29; 2 Pita 2:1. **7:16:** Gal 5:19-22; Jms 3:12.

sesa ue ngai, me sesa ngai eteae karika erooroo tani kuneaa masi ue ngai,¹⁹ ta isaa akapaaili ai karika ekuukuneaa masi uene la tuetuea katuu me la veluvelu sae tale kuraa.²⁰ Am roo tani tara kila va see ila propete kamekame atoa tale gheeleiaaira, nongina am kilakila ai eteae tale uenenna.

*Karika akilakiaiem
(Luk 13:25-27)*

²¹ “Karika isaa akapa taumattu la aseaseaghi va, ‘Vau eteva,’ aue la kupi sso tale ararimangali ngepona liu eteva, karika. Ta lo atoa nonga la aimulisi tee gheeleiaane Tamaghi etokatoka epona liu aue la kupi sso tale ararimangali ngepona liu eteva.²² Oroi ila lo atoa aue la mae etaghi tale airuuruu eteva nau, aue la ue etaghi va, ‘Vau eteva, Vau eteva, karika va ami ghe aauliaa inangarina God tale ararim atea, me ami ghe tiutiu velu raroai etoa tale ararim atea, me ami ghe gheelei oroieili voto atoa sarasarakana ila laghe lutululu tale ararim atea?’²³ Me aue aliu etaira va, ‘Karika akilakilaiem. Am kasu emasalikaala, tau nighelei ssavoto am!’”

*Ghalua ase nighelei ale
(Luk 6:47-49)*

²⁴ “See ila lo atoa la nonganongo inangarighi me la uusilaa, ila nongina taumattu ngateva alomasaanga ia, ghe atulula alena ateva epona tale atu.²⁵ Nau eteva vaoo ateva ghe sio mae, me ateo ghe akalala, me kuukuu eteva ghe lutula, laghe tongue poila ale ateva, ale ateva karika ghe katuula, poli ie tale atu korokorongana.²⁶ Me see ila lo atoa la nonganongo inangarighi me karika la uusilaa, ila nongina alo kapakapa ateva tana taumattu ghe atulula alena ateva tale rira.²⁷ Nau eteva vaoo ateva ghe sio mae, me ateo ghe akalala, me kuukuu eteva ghe mae sio, laghe gheleila ale ateva ghe katuula, me namungaili kaakatungaane.”

²⁸ Nau eteva Iesu ghe ruula tani auliaa isaa o voto, taumattu ngatoa laghe soghiaala llo ghe apasungaala,²⁹ poli karika ghe aippooaa nongina tau ngai aapasunga ngatoa tale inangari nipaopao, ta nongina taumattu ngateva matuutulienia ia.

8

*Iesu ghe ghelei emasinala tasussukku eteva
(Mak 1:40-45; Luk 5:12-16)*

¹ Nau Iesu ghe kkureaala tale motouru eteva, taumattu ngatoa oroieili ila laghe usiela.² Me taumattu ngateva, tasussukuna ia, ghe mae sio ta Iesu, me ghe suuiala ta liue kkena Iesu me ghe uela va, “Vau eteva, arova ualoanna, urooroo tani ghelei eraarangisanaieghi ta mata God.”

³ Iesu ghe ssuaala nimane me ghe tulielu, me ghe uela etana va, “Aghaloanna; angu raarangisana.” Me gharavaea nonga ta ghe raarangisanala.⁴ Me Iesu ghe uela etana va, “Urau mene auliaa ta teva voto elutula etam. Ulao me ulaa ghasungainio ta pristi eteva, me ughelei aiaavusuvusuena tani apasunga va vilikim ange

raarangisanala, nongina Moses ghe auliaala. Me taumattu ngatoa aue la kila va angu raarangisanala.”

Iesu ghe ghelei emasinala kapuna tau ngai nonganongo anna ateva kateva namuu nge Rom

⁵ Nau eteva Iesu ghe ssola tale masaliki eteae eKapenium, kateva namuu ghe aaitoiaa kateva ai (100) tau ngai uvii ghe mae sio tani kolomia. ⁶ Ghe ue va, “Vau eteva, kapughu tau ngai nonganongo anna ateva ange karakanna alokoila elo ale, karika erooroo tani kasukasu, me vilikina atoa la mammarikana atingina.”

⁷ Iesu ghe uela etana va, “Aghi aue alaa ghelei emasinaia.”

⁸ Namu ngateva ghe liula etana va, “Vau eteva, karika masina ieghi va umae tanganueghi. Unim aippooaa me kapughu tau ngai nonganongo anna ateva emasina. ⁹ Aghi tee auungu ta namu ngatoa, me aghaaitoiaa katoa tani tau ngai uvii. Nau eteva aue ta kateva va, ‘Lao sio,’ elaolao, me aue ta kateva va, ‘Mae sio,’ emaemae. Me aghaauliaa ta kapughu tau ngai nonganongo anna ateva va, ‘Gheleila voto toko,’ egheeghele.”

¹⁰ Nau eteva Iesu ghe nongola isaa o voto, ghe soghiaala me ghe uela ta lo atoa laghe usiusia va, “Aghaaulia ngakoronna etaimim va karika aghe tara poi teva taumattu elsrail kanna niaakaiaa namuu nongina lo ateva oia taumattu. ¹¹ Aghaauliaa etaimim va oroi ila lo atoa aue la mae akapa see tale kosa ateva oia, tani toka tee Abraham, Aisiki me Jekop tani namanama, tale ararimangali ngepona liu eteva. ¹² Me lo atoa aIsraeli ila laghe annaa va aue la kupi sso tale ararimangali eteva, me karika, ta aue la vella ghoa tale kinatama saurrom ateva, me aue la ghoa toka ngangngala me la aingeresia ngalungaluira.”

¹³ Me Iesu ghe uela ta namu ngateva oia va, “Lao sio elo ale, voto aue elutu nongina angu aikaiaala.” Me gharavaea ta tau ngai nonganongo anna ateva ghe masinala.

Iesu ghe ghelei emasinala oroi taumattu

(Mak 1:29-34; Luk 4:38-41)

¹⁴ Nau eteva Iesu ghe rekatala tanganue Pita, ghe tarala alumuna vause ateva Pita ghe asoaso tale komo, me vilikina ghe aanas a me matana ghe valavalanga. ¹⁵ Iesu ghe posola nimane, me mata valavalanga ateva ghe kapala, me ghe totu saela me ghe kaisila anna inana.

¹⁶ Nau sinaka ateva ang ghe suusuu me oroieili ila lo atoa raroai etoa laghe tokatoka etaira, laghe maeainila sio etana va eghelei emasinala, ghe nim aippooaa me raroai etoa laghe kupikupi ghoa, me ghe gheeghelei emasina tee tau sessa akapa atoa. ¹⁷ Isaa o voto ghe akauerekatila llo voto propete Aisaea ghe auliaala,

“Ia ghe ghaala kaluita saghuighuina,
me ghe saula kaluita sessa.”

Nitootoonga aue emae etam nau eteva uaimulisi tee Iesu
(Luk 9:57-62)

¹⁸ Nau eteva Iesu ghe tarala taumattu ngatoa angila ghe ooroieili, ghe uela ta kapuna atoa va, “Ita kasu, ita lao ta pai kativilau.” ¹⁹ Angila ghe aloanna tani kasu, me tau ngai aapasunga ateva tale inangari nipaopao

ghe mae sio, me ghe uela etana va, “Tisa, aghaloanna tani usio nongina eaa ulao.”

²⁰ Vara me Iesu ghe uela etana va, “Paua atoa aleira tale pake valienga, me ghila atoa aleira manee, me Natuna ateva Taumattu ngateva karika teva alena tani aso.”

²¹ Mene kateva tana kapuna disaepolo ghe uela etana va, “Vau eteva, tau velueghila me alaa kaiaa mua tamaghi.”

²² Iesu ghe uela etana va, “Usieghila me ratila lo atoa matena ila la kaiaa matena atoa.”

Ttasi kuukuu eteva ghe kapala

(Mak 4:35-41; Luk 8:22-25)

²³ Iesu ghe aikaaila tale paanaka ateva me kapuna disaepolo atoa laghe usiela, me laghe tiu ghoala. ²⁴ Elome tale ateo talia ngateae, paka kuukuu ttasi eteva ghe lutula. Paka kotoo atoa laghe aasuu kaakaai tale paanaka ateva, me Iesu ghe asekanue alokoila. ²⁵ Disaepolo atoa laghe anguniela, me laghe ue etana va, “Vau eteva, sausiemamila! Angita vuuvuluu!”

²⁶ Iesu ghe liula inangariira, me ghe uela etaira va, “Vaaluua me am maamatautu, ghaunaaili aikaiaaimim?” Ghe tingina saela me ghe paola kuukuu ttasi eteva tale ateo talia ngateae, me kinatama luei eteva ghe asola.

²⁷ Taumattu ngatoa tale paanaka ateva, laghe soghiaala me laghe ue va, “Saa taumattu ia taumattu ngateva oia, ta ttasi eteva me paamanu eteva la nonganongo usilainia?”

Iesu ghe ghelei emasinala tau raroai elua

(Mak 5:1-20; Luk 8:26-39)

²⁸ Nau eteva Iesu ghe laa rekata sio tale pai kativilau, tale kosaira aGadara* ngatoa, me ghe sousoula taumattu ngalua lalu ghe kasula tale liu niaikkaiaa, raroai etoa laghe tokatoka etairarua. Taumattu ngatoa karika laghe laolao akalakalaa etairarua poli lalu ghe aaiuvii. ²⁹ Lalu ghe aaore me lalu ghe ue va, “Sa ateva ualoannai etaimami, Natuna ateva God? Vaaluua me umae sio tani ghelei saasakieinamami me karika ghe ghaa nau?”

³⁰ Mala masau nongina laghe tiitingina, tinaua mosu etingiu ghe tingina namanama. ³¹ Raroai etoa laghe kolomi esarasaranakanala Iesu va, “Arova utiu veluemami, usuu tauemami lao ta mosu etoa.”

³² Me ghe uela etaira va, “Am lao sio.” Laghe kupi vulu ghoala taumattu ngalua me laghe laa sae kupi sso ta mosu etoa. Me tinaua atingiu ghe ttiroula, me laghe ilou velu siola tale vallae me laghe aoso velu siola tapaa manu me ghe arropi ematelala. ³³ Lo atoa laghe aitaraa mosu etoa laghe iloula, me laghe lao sio tale masaliki eteae, me laghe kiukiuaa ngakapala kiukiuirarua. ³⁴ Nau eteva taumattu ngatoa tale ia o masaliki taatara atea laghe nongola kiukiui, ila akapa laghe mae sio tani sou Iesu me laghe aulia ngasarasarakanala ta Iesu va karika emene toka tale masalikiira atea.

8:20: 2 Ko 8:9. **8:21:** 1 Ki 19:20. **8:24:** Sams 4:8. **8:26:** Mat 14:31; Sams 89:9. * **8:28:** aGadara Kasina uru ngai laghe pitila, laghe ue va aGergesa, kasina laghe ue va aGeresa. **8:29:** Mak 1:24; Luk 4:41.

9

*Iesu ghe ghelei emasinala
taumattu ngateva karakanna ia
(Mak 5:1-20; Luk 8:26-39)*

¹ Iesu ghe aikaai ghoala tale paanaka ateva, me laghe lao sio tale pai kativilau, me laghe rekatala tale masalikina atae. ² Katoa taumattu laghe maeaa sio taumattu ngateva karakanna ia, me ghe asoaso tale komo atiulu. Nau eteva Iesu ghe tarala uneira niaikaaiaa, me ghe uela etana va “Urau mene annaa, natughu, kalum ssavoto ange kapala.”

³ Katoa tana tau ngai aapasunga tale inangari nipaopao laghe tingina nannaa me laghe aippooaa elome etaira va, “Ierai oia ange ghaala liuna ateva God.”

⁴ Iesu ghe kilala nannaaira me ghe uela va, “Vaalua me ninannaa sesa etokatoka tale urunguitaniim? ⁵ Eaa teva voto malumina tani auliaa, tani ue va, ‘Kalum ssavoto ange kapala,’ o tani ue va, ‘Tingina saela me ukasu?’ ⁶ Me aghaaloanna va am tara kila, va Natuna ateva Taumattu ngateva matuutulienaa teeia tani kkaluaa ssavoto tale kosa ateva.” Me ghe uela ta taumattu ngateva karakanna ia va, “Tingina saela, me usau komom, me ulao tanganuem.” ⁷ Me ia o taumattu ngateva ghe tingina saela me ghe lao sio tanganuena. ⁸ Nau eteva taumattu ngatoa laghe tarala isaa o voto, laghe soghiaala me laghe tau saela God, poli ghe tau lao sio matuutulienaa tale taumattu ngatoa.

*Iesu ghe kolola Matiu
(Mak 2:13-17; Luk 5:27-32)*

⁹ Nau Iesu ghe kasukasu elaoalao me ghe tarala taumattu ngateva ararina atae ta Matiu, ghe tokatoka tale natu ngale arighi aighaa takis ia me Iesu ghe uela etana va, “Mae usieghi,” me Matiu ghe tingina saela me ghe usiela.

¹⁰ Nau eteva Iesu ghe namanama tanganue Matiu, oroeili tau ngai ghaa takis atoa me tau ssavoto atoa laghe mae sio tani namanama teeia, me kapuna disaepolo atoa. ¹¹ Nau eteva Paresi etoa laghe tarala isaa o voto, laghe kookolomi kapuna disaepolo atoa Iesu va, “Vaalua me kapuimim tisa ngateva enamanama tee tau ngai ghaa takis atoa me tau ssavoto atoa?”

¹² Nau Iesu ghe nongola, ghe uela va, “Karika va lo atoa masina ila la anna va dokta etaraila, ta lo atoa nonga isikinna ila. ¹³ Me am lao me am laa pae aotu vaalua malloeana nau Uru ngai Manga ateva eue va, ‘Aghi aghaaloanna va am alousiusi tee mene kateva me karika va tani ghelei niaiaavusuvusuena,’ poli karika aghe mae sio tani kolo ghulughuluena atoa ta aghe mae sio tani kolo tau ssavoto atoa.”

*Laghe kookolomi Iesu tale ninae atae
(Mak 2:18-27; Luk 5:33-39)*

¹⁴ Vara me kapuna disaepolo atoa Jon laghe mae sio me laghe kolomila Iesu va, “Vaalua me ami me Paresi etoa ami naenae, me kapum disaepolo atoa karika?”

¹⁵ Iesu ghe liula me ghe uela va, “Kapuna atoa taumattu ngateva ange anna tani lai karika la aalousiusi nau eteva etokatoka teeila. Nau eteva aue emae me la ghaa velu taita ateva, ia o nau eteva aue la vira nae.”

¹⁶ “Karika teva eghaaghaa tuku ouna ateva kalio va evabbai pokane ateva aiaasae, ta tuku ouna ateva kalio aue emene ghelei mara ateva tale pokane ateva aiaasae emara anamuu. ¹⁷ Karika teva taumattu etottoli ouna uaeni tale pokane ateva aikaai uaeni. Arova eghelei evalua o, aue ouna uaeni eghelei polaki aikaai uaeni eteva pokane ia, me uaeni eteva aue ekaoa me aikaai uaeni eteva aue esesa. Ta la tottoli ouna uaeni tale ouna ateva aikaai uaeni ta ilalua akapa aue lalu masina.”

*Vause arighi matena ia me vause ateva isikinna ia
(Mak 5:21-43; Luk 8:40-56)*

¹⁸ Nau eteva Iesu ghe aaippooaa nonga me kateva namuu ghe mae sio me ghe suuiala emua etana, me ghe uela va, “Natughu vause arighi ghaviri nonga oia ematela. Mae sio me ulaa saoaa nimam etana me emene sakesake.” ¹⁹ Iesu ghe tingina saela me ghe usiela tee me kapuna disaepolo atoa.

²⁰⁻²¹ Vara me vause ateva rae ateva ghe iloueiniela tale kasangaulu ghaluae (12) ninamanama, ghe nannaa va, “Arova aghele nim poso unna aiaasae ngeleka ateva koti aue aghele masina.” Me ghe lao sio emuli ta Iesu me ghe posola euu tale sama unna aiaasae ngeleka ateva.

²² Iesu ghe kiriela me ghe taraiela me ghe uela etana va, “Urau mene matautu, natughu. Tale unem niaakaiaa etaghi angu masinala.” Tale ia o nau eteva vause ateva o ghe masinala.

²³ Nau eteva Iesu ghe kupi ssola tale alena ateva namu ngateva, ghe tarala lo atoa laghe vuuvuu flut atoa me taumattu ngatoa laghe aalousiusi etingina. ²⁴ Me ghe uela etaira va, “Am kupi ghoala. Vause arighi karika matena ia ta enim aseasekanua,” me laghe tiuala tani kangainia. ²⁵ Nau eteva taumattu ngatoa laghe kupi ghoala eleka, Iesu ghe kupi ssola me ghe kune siola nimane vause arighi, me ghe totula. ²⁶ Kiukiuna vause arighi oia ghe kasu ekapa seela tale masaliki tale ia o distriki eteva.

Iesu ghe ghelei emasinala mata salusalu elua me paavoo ateva

²⁷ Nau eteva Iesu ghe mene kasukasu elaolao, mata salusalu elua lalu ghe usiela, me lalu ghe kolokolo. Lalu ghe ue va, “Io Natuna io Deivit, ualousiusi teeiengalua.”

²⁸ Nau eteva ghe kupi ssola tale ale ateva, mata salusalu elua lalu ghe usiela. Me Iesu ghe kolomilaluela va, “Amalu aikaiaa va arooroo tani ghelei emasinaiemalua?”

Lalu ghe liula me lalu ghe uela va, “Ue, vau eteva.”

²⁹ Vara me ghe posola matairarua, me ghe uela va, “Tale uneimalua niaakaiaa, aue amalu taatara.” ³⁰ Me matairarua ghe mene taatarala. Iesu ghe aulia ngakorokoronganala etairarua va, “Karika amalu mene laa kiukiuaa see isaa o voto.” ³¹ Nau eteva lalu ghe kupi ghoala, lalu ghe kiukiueinie seela tale masaliki etoa.

³² Nau eteva angilalu ghe kasukasu, me laghe mene maeaa sio taumattu ngateva raroai eteva ghe kupiela me karika ghe rooroo tani sama. ³³ Me nau eteva raroai eteva ghe kupi vulture ghoala, taumattu ngateva paavoo ia ghe samala. Taumattu ngatoa laghe tarala isaa o

voto me laghe soghiaala, me laghe ue va, “Karika righi voto avalua o ghe lutu eIsrael.”

³⁴ Paresi etoa laghe ue va, “Enim tiutiu velu raroai etoa tale sarasarakaniaane kapuira namu ngateva raroai etoa.”

Tau ngai uungu etoa malaki ila

³⁵ Jesu ghe kasu ekapa seela tale masaliki taatara atoa me tale lutu ghauna masaliki. Ghe aapasunga tale aleira ale nivelu eitauaa me ghe poppooa ngaotu masi kiukiu tale ararimangali ngepona liu eteva me ghe gheeghelei emasina isaa akapa asease sessa atoa. ³⁶ Nau ghe tarala taumattu ngatoa, ghe alousiusi teeilala poli nannaaira maateaili me karika teva taumattu tani sausila me ila nongina sipsipi etoa karika teva aitoiira. ³⁷ Me ghe uela ta kapuna disaepolo atoa va, “Utana ateva ang ghele matuela, me tau ngai uungu etoa karika oroi ila. ³⁸ Liuna avalua o, am kolomi sae Vau tale tau ngai mukemuke atoa va emene sungi toa tau ngai mukemuke tani lao tale utana atingiu matuenna ia.”

10

*Iesu ghe suula kasangaulu ghalua disaepolo tani laa uungu
(Mak 3:13-19; Luk 6:12-16)*

¹ Jesu ghe kolo aitauaala kapuna disaepolo kasangaulu ghalua (12), me ghe tau lao sio matuutuliena tani tiu velu raroai etoa me tani ghelei emasina isaa akapa asease sessa atoa.

² Arariira toko kasangaulu ghalua (12) apostolo: Aitiutiui eteva ta Saemon (la kolokoloa va Pita) me nengane ta Andru, me Jeimis natuna ia Sebedi, me nengane ta Jon. ³ Me Pilip me Batolomiu, Tomas me Matiu tau ngai ghaa takis ia, me Jeimis natuna ia Alpeas, me Tadias, ⁴ me Saemon laghe aseala va Selot ia, me Jiudas Iskariot (ia auena ghe tau lao Iesu ta nimaira tau ngai ssateena atoa).

*Iesu ghe auliaala inangari tani aimuli tee
(Mak 6:7-13; Luk 9:1-6)*

⁵ Jesu ghe suula isaa oia kasangaulu ghalua, me ghe tau lao sio inangari niloeloe etaira va, “Nau eteva am kasu, am rau mene lao ta tau ngeleka ngatoa, me am rau mene sso tale masalikiira aSameria ngatoa.

⁶ Ta am lao ta aIsraeli etoa, ila nongina sipsipi etoa laghe rauela. ⁷ Nau am lao am ppooa ngavalua toko va, ‘Ararimangali ngepona liu eteva ange aakalakalaa.’ ⁸ Am ghelei emasina tau sessa atoa, me am totu matena atoa, me am ghelei eraarangisana tasussukuna atoa, me am tiu velu raroai etoa. Isaa o sarasarakan, aghe nim tau aatu sio, am nim mene taula, me karika am mene ghaa aipolipoli. ⁹ Nau eteva am kasu, am rau mene annaa tani ghaa righi viliki veu, golo me silva me kopa.

¹⁰ Am rau mene ghaa aikakkaai tale lo ateva o nikasu, me am rau mene ghaa ghalua aiaasae me aikasukasu, me aikkatulu. Poli emaamasina va tau ngai uungu eteva eghaaghaa anna inana ta lo atoa euungu etaira.

¹¹ “Arova ngam rekataala tale kateae masaliki, am pae lo ateva taumattu aue emasimasi tani aikoloainam, me am toka teeia, lamosina ta am kasu vuli ia o masaliki eteae. ¹² Nau eteva ngila aloannala va

9:34: Mat 12:24; Mak 3:22; Luk 11:15. **9:35:** Mat 4:23; Mak 1:39. **9:36:** Sek 10:2; Nam

27:17; 1 Ki 22:17; Mat 14:14; Mak 6:34. **9:37:** Luk 10:2. **10:1:** Mak 6:7; Luk 9:1. **10:6:**

Jer 50:6. **10:7:** Mat 3:2; 4:17; Luk 10:9, 11. **10:9:** Luk 10:4. **10:10:** Luk 10:7; 1 Ko 9:14.

10:12: Luk 10:5-6.

am toka teeila, am ue va, ‘Luei aue etoka etaimim.’ ¹³ Arova am kupi sso tale aleira masi taumattu ngatoa, am alokoi luei etaira, me arova karika, am mene ghaa oghi niarangise me luei etaira. ¹⁴ Arova toa la tam ghaaiem me la tam aloanna tani nongo usilaa inangariimim, am rariaa velu au kosa ateva ta kkeimim nau am kasu vuli ia o ale ateva o masaliki eteae. ¹⁵ Aghaaulia ngakoronna etaimim va, aue nau niaisakei eteva, God aue eapasunga maomaona nimmarikana tale masaliki eteae eSodom me eGomorra, me sesaaili tale ia o masaliki eteae. ¹⁶ Am nongo! Asungisungiem nongina sipsipi etoa elome tale sesa paua ngetapaa tuvui etoa, liuna avalua o me am anguu taatara nongina katu ngateva, me am nongina tee ghila ateva valusu ia karika egheelei righi sesa.

Sesa nau aue emae
(Mak 13:9-13; Luk 21:12-17)

¹⁷ “Am tani taatara amasina poli taumattu ngatoa aue la kuneiem me la laoainam tale aleira ale nivelu eitauaa me la uetaiem. ¹⁸ Poli mausighi me aue la laoainam ta gavana ngatoa me kingi etoa, me ia o aue emasi nauimim tani aulia ngaotueghi etaira me ta tau ngeleka ngatoa. ¹⁹ Nau eteva la kuneiem, am rau mene annaa va sa ateva aue am aulieinia me vaalua aue am aippooaa. Ta God aue etau aatu inangari aue am auliaa. ²⁰ Ta karika va am aue am aippooaa ta aue Spirit Manga ateva kapuna ia Tamaimim ateva aue etau aatu inangari aue am auliaa.

²¹ “Taumattu ngatoa aue la tau velu tueira me nengaira atoa ta lo atoa aue la uvi ematela, me tamatama atoa aue la ghelei evalua tee o ta natuira atoa. Aliko etoa tee aue la ssa tee tamaira me kinaira atoa, me aue la uvi ematela. ²² Taumattu ngakapa atoa aue la ssa teeiem poli ararighi eteae. Me see etingina akorokorongan tale unna niaikaiaa tale airuuruu, maamauluaane aue esaanga. ²³ Arova la ghelei teeiem tale kateae masaliki, am kasu vulia me am mene lao ppae tale kateae masaliki. Aghaaulia ngakoronna va karika aue am ruu masaliki ekapa eIsrael me Natuna ateva Taumattu ngateva emae.

²⁴ “Tau ngai ghaa alomasaanga ateva karika namuu ia ta kapuna tau ngai aapasunga ngateva, me tee tau ngai nonganongo anna ateva karika namuu ia ta vauna ateva. ²⁵ Tau ngai ghaa alomasaanga ateva erooroo va enongina tau ngai aapasunga ateva, me tau ngai nonganongo anna ateva erooroo va enongina vauna ateva. Arova la aseaghi va aghi Belsibul, namuu ta raroai etoa, aue la tau tee sesa arari etaimim.

Tani matauta nonga God
(Luk 12:2-7)

²⁶ “Ia avalua o me am rau mene matautainila. Karika righi voto am aaituttua va aue etam otu, isaa akapa voto pei niaisia, aue la kila. ²⁷ Sa ateva aghaaulieinia eleivoo, am aulieinia ellaa me sa ateva aghaulia ngaghunaie sso ta talingaimim, am sae tingina tale pungani ngale atoa me am auliaa. ²⁸ Am rau mene matauta lo atoa la anna tani uvi emateam, ta aue la nim turungi vilikiimim me karika aue la uvi emate maamauluaaimim. Ta am matauta nonga

10:14: Luk 10:10-12; Apos 13:51. **10:15:** Mat 11:24; Jiud 7. **10:16:** Luk 10:3; Rom 16:19.

10:17: Mak 13:9-11; Luk 12:11-12; 21:12-15. **10:20:** Jon 14:26. **10:21:** Maeka 7:6; Mat 10:35; Mak 13:12; Luk 21:16. **10:24:** Luk 6:40; Jon 13:16; 15:20. **10:25:** Mat 9:34; 12:24; Mak 3:22; Luk 11:15. **10:26:** Mak 4:22; Luk 8:17. **10:28:** Jms 4:12; Rom 8:31.

lo ateva erooroo tani turungi ekapa vilikiimim me maamauluaaimim eGehenna.²⁹ Ghaluepai natu ghila la polipoli tale maketi tale kativilau nonga viliki veu me arova aloannaane God va karika teva emene mate, karika teva erooroo tani mate.³⁰ Tee me isaa akapaaili uu nguruimim, God ekilakila va ghaisa akapa.³¹ Ia avalua o me urau mene matautu ta maamauluaam namungaili ta matane God, elaulau ghila atoa.

³² “See eaulia ngaotu tale taumattu ngatoa tale kosa ateva oia va kapughu ia, aghi tee aue aghaulia ngaotu ta Tamaghi epona liu va ia kapughu ia.³³ Arova lo ateva uauliaa ta katoa va karika ukilakilaieghi, aue aghauliaa tee ta Tamaghi epona liu va karika akilakilaio.

Karika aghe maeaa sio luei

(Luk 12:51-53; 14:26-27)

³⁴ “Am rau mene annaa va aghe maeaa sio luei tale kosa ateva oia, karika aghe maeaa sio luei ta aghe maeaa sio baenata ateva.³⁵ Aghe mae sio tani ghelei va

“taita ateva essa tee tamana ateva,

me vause ateva essa tee kinna ateva

me vause ateva essa tee alumuna vause ateva.

³⁶ Tau ngaissanira atoa karika aue la laa kasu emasau ta aue la tani kasu etoka elome tale paa ngaleira aitauua.”

³⁷ “Lo ateva taumattu eaaielousiaa nonga tamane me kinna me natuna taita atoa me natuna vause atoa, me karika eaaielousieinaghi, karika emaamasina va kapughu disaepolo ia.³⁸ Me lo ateva karika eaalonaa tani sunuki unna aikotoo ateva me eaimuli teeieghi, karika emaamasina va kapughu disaepolo ia.³⁹ Arova teva easaangi maa-mauluaana, aue eraua, me arova eraua ta mausighi aue eghaa maulue ateva.

Aipolipoli

(Mak 9:41)

⁴⁰ “See eghaaghiaiem eghaaghiaieghi, me see eghaaghiaieghi, eghaaghia lo ateva ghe sungieghila.⁴¹ See eaikoloaa propete ateva poli propete ia aue eghaa aipolipoli nongina propete ateva eghaaghia. Me see eaikoloaa tau ghulughuluena ateva poli tau ghulughuluena ateva kapuna ia God, aue eghaa aipolipolina tau ghulughuluena ateva.⁴² Me arova see etara teva tale isaa oia disaepolo taumattu ngatoa la taatara aloila sio euu, me earopiropi teva ta poli kapughu disaepolo ia, aghaaulia ngakoronna va aue eghaa aipolipoli.”

11

*Jon tau ngai aasuu ia ghe suula
disaepolo atoa tani laa tara Iesu*

(Luk 7:18-35)

¹ Nau Iesu ghe ruula tani apasunga taula voto ta kapuna kasangaulu ghalua (12) disaepolo, ghe kasu vulila ia o voto ateva me ghe mene lao sio tani ppooaa me apasunga tale masaliki taatara atoa eGalilii.

² Nau eteva Jon ghe tokatoka tale ale mata voovoo me ghe nongola voto Mesaea ngateva ghe gheelei, me ghe suula kapuna disaepolo atoa

10:31: Mat 6:26. **10:33:** Mak 8:38; Luk 9:26; 2 Tim 2:12. **10:35:** Maeka 7:6. **10:38:** Mat 16:24-25; Mak 8:34-35; Luk 9:23-24; 17:33; Jon 12:25. **10:40:** Mak 9:37; Luk 10:16; Jon 13:20.

³ tani laa kolomi Iesu va, “Io ia o taumattu ngateva God ghe uela va aue emae, o aue ami toi mene teva?”

⁴ Iesu ghe liula me ghe uela va, “Am oghi lao sio me am laa ghauliaa ta Jon voto am tarala me am nongola. ⁵ Mata salusaluna atoa mataira eotila me vereverenna atoa la kasukasula, me lo atoa tasussukuna ila la raarangisanala, me talinga volongo atoa la mene nonganongola, me matena atoa la totula, me llo taumattu karika peina la nongola masi kiukiu. ⁶ Me aue emasinaaili ta taumattu ngateva, unna niaiesoaa karika ekaakatuu vulueghi.”

⁷ Nau kapuna disaepolo atoa Jon laghe kasula, me Iesu ang ghe auliaa Jon ta taumattu ngatoa. Ghe ue etaira va, “Sa ateva am ghe lao sio tani taraia tale voto ateva karika righi taumattu etana? Pitpiti eteva ghe kuukueinia? ⁸ Arova karika, tani sa ateva am ghe lao sio tani taraia? Teva taumattu ghe molumolu tale masi ghinna? Karika, ta lo atoa la aasae masi ghinna la tokatoka tanganue king. ⁹ Tani sa ateva am ghe kasueiniela? Propete ateva? Ue, aghaauliaa etaimim va am ghe tarala propete ateva me emene laulau mene katoa propete. ¹⁰ Ia o taumattu ngateva, Uru ngai Manga ateva ghe auliainiela nau ghe uela va,

“Tarala, aue asuu aikasuaa inangarighi eteva emuemueinio,

me ia aue eaimonomonosiaa ngamuemue alokoi salam.”

¹¹ Aghaaulia ngakoronna etaimim va elome ta lo atoa laghe lutula tale kosa ateva oia, karika teva erooroo ta Jon ia o tau ngai aasuu ia. Me lo ateva karika teae ararina, me iaaili euu tale ararimangali ngepona liu eteva, elaulau Jon. ¹² Ghe tiuala ta nauna Jon tau ngai aasuu ia me ang ghe mae sio ta nauita ghaine, sesa taumattu ngatoa la korokorongana tani sari ararimangali ngepona liu eteva tale nim aloaloannaaira. ¹³ Propete akapa atoa me inangari nipaopao laghe aulia ngaotula inangarina God ghe mae ghaa sio nau ta Jon. ¹⁴ Me arova am aiesoaa inangariira, Jon Elaija ta getana ia o laghe aulia ngamuemua alokoielia va aue emae. ¹⁵ Lo ateva talingane manee tani nongo, aue enongo.

¹⁶ “Sa ateva voto arooroo tani auliaa me eaimatoonga taumattu tale lo ateva oia vituu? Ila nonginaaili aliki etoa la tokatoka tale liu nianamisi, katoa la ue lao ta mene lutu katoa va,

¹⁷ “ ‘Ami ghe vuuvuu kkinari nilai eteae etaimim,

me karika am ghe lokuloku;

ami ghe ueei kkinari tani kkinariaa matena atoa,

me karika am ghe aalousiusi.’

¹⁸ Nau Jon ghe mae sio me karika ghe namanama me ghe tam ropiropi, laghe ue teeia va, ‘Raroai eteva ghe tokatoka etana.’ ¹⁹ Me Natuna ateva Taumattu ngateva ghe mae sio me ghe namanama me ghe ropiropi, laghe ue teeia va, ‘Tau ninamanama ia, me tau niropi sesa manu ia, kapuira ia aighaa takis atoa me tau ssavoto atoa.’ Me masi ninannaa kanna God eaapasunga va koronna ia tale maamauluaaira lo atoa la aaimuli teeia.”

*Alousiusi ta llo taumattu karika
la nanna ngaioghioghiaa*

(Luk 10:13-15)

20 Iesu ghe sama anamuu teela llo masaliki taatara ghe gheleila oroiannaaili mirikol poli taumattuna karika ghe nna ngaioghioghia. 21 “Aue esesaaili ta ngetam, Korasin, me aue esesaaili ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa aue laghe molu tale ghinna nialousiusi me au kura, tani apasunga va ngila ghe oghi vulula sesa gheegheleiaaira. 22 Aue emaomaona nimmarikana ta eTaer me eSaedon tale nau niaisakei eteva, me am karika. 23 Me io, Kapenium? Uannaa va aue usae epona liu? Karika, io aue usioaili euu. Arova isaa o mirikol laghe gheleila etam va laghe gheleila eSodom, isaa oia nau Sodom ie tokatoka. 24 Aghaauliaa etam va nau eteva God aue eghelei niaisakei, voto Sodom eghaa aue emala masina me io aue sesaaili.”

*Niainoana ta Iesu
(Luk 10:21-22)*

25 Ia o nau eteva Iesu ghe uela va, “Atautauo sae Tamaghi, Vau ngepona liu io me kosa ateva, poli ughe aisuliaala isaa o voto tale lo atoa nannaaira masina me lo atoa alomasaangaaili ila me ughe aulia ngaotula ta lutu ngaliki etoa. 26 Ue Tamaghi, ugheelei isaa o voto tani aimuli tee masi aaloannaam.

27 “Isaa akapa voto Tamaghi ghe atokala ta nimaghi, me karika teva ekilakila Natuna ta Tamana nonga. Me karika teva ekilakila Tamaghi ta Natuna nonga, me lo atoa Natuna ghe apasungaala Tamane etaira tale aloaloannaane.

28 “Am mae etaghi, lo atoa ngam maamangoo poli am sausau llo maate, me aue atau aatu niainoana etaimim. 29 Am aimuli teeieeghi me am ghaa alomasaanga etaghi me am uungu etaghi nongina vulumakao ateva euungu ta vauna ateva, poli aghi saghuighuina gheeleiaaghi me asiosiuua nannaaghi me maamaulueaimim aue eghaa niainoana. 30 Poli gheeleiaaghi karika masukasukale me llo aue atau aatu karika maate.”

12

*Vau tale nau manga ateva
(Mak 2:23-28; Luk 6:1-5)*

1 Nau eteva o Iesu ghe kasu longotila tale utani uiti etingiu, tale nau manga ateva, kapuna disaepolo atoa laghe maamaloo, liuna avalua o me laghe ghaala kasina tani uiti me laghe tiuala tani gholu. 2 Nau Paresi etoa laghe tarailala laghe uela etana va, “Tarala! Kapum disaepolo atoa la gheelei voto karika masina tani ghelei tale nau manga ateva.”

3 Iesu ghe liula me ghe uela etaira va, “Koti karika am ghe ritila llo Deivit me kapuna atoa laghe gheleila nau laghe maamaloo? 4 Vaalua ghe ssola, ia me kapuna atoa, tale alena ateva God me laghe ghaala verete laghe amangala, pristi etoa nonga la rooroo tani nama, me laghe namala. 5 Me karika am ghe ritila tale inangari nipaopao eue va karika sesa arongona ta pristi etoa la uungu tale ale manga ateva ta nau manga ateva tani ghelei aiaavusuvusuena? 6 Aghaauliaa etaimim va lo ateva

11:21: Ais 23:1-18; Esik 26:1-21; 27:1-36; 28:1-26; Joel 3:4-8; Eimos 1:9-10; Sek 9:2-4. **11:23:** Ais 14:13-15; Aitiutiu 19:24-28. **11:24:** Mat 10:15; Luk 10:12. **11:25:** 1 Ko 1:26-29. **11:27:** Mat 28:18; Jon 3:35; 17:2; 1:18; 10:15. **11:28:** Jer 31:25. **11:30:** 1 Jon 5:3. **12:1:** Diut 23:25. **12:2:** Eks 20:10. **12:3:** 1 Sam 21:1-6. **12:4:** Lev 24:5-9. **12:5:** Nam 28:9-10. **12:6:** Mat 12:41-42.

matuutulienia uunguaane, me enaanamuu vulu ale manga ateva ia oia tale ale manga ateva.⁷ Karika am ghe kilala malloeana isaa o inangari va, ‘Aghi aghaaloanna va am aloususi tee mene kateva me karika va tani ghelei niaiaavusuvusuena.’ Liuna avalua o me am ghe nim uela va sesa ila lo atoa karika righi sesa etaira.⁸ Poli Natuna ateva Taumattu ngateva Vau ia tale nau manga ateva.”

*Iesu ghe ghelei emasinala taumattu
ngateva katelange nimane matena ia
ta nau manga*

(Mak 3:1-6; Luk 6:6-11)

⁹ Iesu ghe kasu vulila ia o masaliki eteae me ghe mene lao sio tale kateae masaliki me ghe kupi ssola tale aleira ale nivelu eitaua ngateva.¹⁰ Taumattu ngateva, katelange nimane matena ia, ghe tokatoka me laghe kolomila Iesu va, “Uneita inangari nipaopao eue va masina tani ghelei emasina ta nau manga ateva?” Poli laghe paepae salana tani laoaa Iesu tale niaisakei.

¹¹ Me Iesu ghe uela etaira va, “Arova teva etaimim teva kienia sipsipi ghele katuu velu sio tale teva liu ta nau manga ateva, karika aue ugheli laa ghaiae sio?¹² God aloaloannaane tale taumattu elaulau sipsipi eteva! Liuna avalua o me masina tani ghelei masi voto ta nau manga ateva.”

¹³ Me ghe uela ta ia o taumattu ngateva va, “Korosila nimam atelange.” Me ghe korosiela me nimane atelange ghe masinala nongina mene katelange.¹⁴ Paresi etoa laghe kasula tani laa loe salana vaalua tani uvi emate Iesu.

Kapuna tau ngai nonganongo anna ateva God

¹⁵ Iesu ghe kilala sa ateva Paresi etoa laghe aloanna tani gheleia. Liuna avalua o me ghe kasu vulila ia o masaliki eteae. Oroienaili taumattu ghe usiela me ghe ghelei emasinailala tale aneira isiki.¹⁶ Iesu ghe aaulia ngakorokorongana ta ngetaira va la rau mene laa ghaotu va ia see.¹⁷ Voto o ghe gheleila inangarina propete ateva Aisaea ghe kaurekatila, ghe uela va,

¹⁸ “Ia oia kapughu tau ngai nonganongo anna ateva, aghi aghe suitoon-gainiela,

me aghaaielousiangailiia, me nannaaghi emaamasinaaili ta polina; me aue aghatoka kalughu Spiriti eteva etana.

Me aue eaulia ngaotu voto ghulughuluena tale patunganue akapa atoa.

¹⁹ Karika aue eaissakeana me esama anamungaili ta tummatavanga.

²⁰ Aue eghelei voto masina tale taumattu saghuighuiena, me karika aue eghelei saasakiaa ta lo atoa karika sarasarakana ila. Aue eghelei isaa o voto lomosina ta llo masina eapala llo sesa.

²¹ Patunganua akapa atoa aue la ghatoka tuutuliira tale ararina ateeae.”

Laghe ue va Iesu ghe uungu tee Belsibul

(Mak 3:20-30; Luk 11:14-23; 12:10)

²² Laghe maearaa sio taumattu ngateva raroai eteva ghe tokatoka etana me tee mata salusalu ia me paavoo ia. Iesu ghe ghelei emasinaiela me

12:7: Osea 6:6; Mat 9:13. **12:10:** Luk 14:3. **12:11:** Luk 14:5. **12:14:** Jon 5:16.

12:16: Mat 8:4; Mak 3:12. **12:18:** Ais 42:1-4; Mat 3:17.

ghe samala me ghe taatarala. ²³ Me taumattu ngatoa laghe soghiaala voto ghe gheleila me laghe aikolomieinila va, “Koti taumattu ngateva oia natuna ia Deivit, va?”

²⁴ Nau Paresi etoa laghe nongola laghe uela va, “Tale sarasarakanianaane Belsibul, kapuira namu ngateva raroai etoa, me egheelei isaa o voto tani tiu velu raroai tale taumattu.”

²⁵ Iesu ghe kilala nannaaira me ghe uela etaira va, “Arova masaliki eteae eaipola, karika aue etoka amasina, me lo atea masaliki taatara o ale eaaipola karika erooroo tani tingina akorokorongana. ²⁶ Arova Satana emene tiutiu velu Satana, aue eaipola, o vaalua ararimangalina ateva aue etingina? ²⁷ Me arova atiutiu velu raroai tale ararina atea Belsibul, kapuim atoa tani taumattu laghe tiutiu velu raroai tale ararina atea see? Ila aue la ghele auliaa va inangari am auliaa kamen. ²⁸ Me arova atiutiu velu raroai tale Spiriti eteva kanna ia God, eaapasunga va ararimangalina ateva God ang ghe mae sio ta ngetaimim.

²⁹ “Vaalua aue ughaa peina sarasarakanataeva taumattu tanganuena? Arova ughele iria mua, aue ughele roo tani ghaa peina.

³⁰ “Lo ateva karika kapughu ia, tau ngai ssateeghi ia, me lo ateva karika esaasausieghi tani atoka aitauaa, ia etani aatoka apolapola. ³¹ Liuna avalua o me aghaauliaa etaimim va God aue ekkaluua isaa akapa ssavoto me inangari taumattu eauliaa saasakiaa, me lo ateva eauliaa saasakiaa tale Spiriti eteva, God karika aue ekkaluua. ³² Lo ateva eauliaa saasakiaa tee Natuna ateva Taumattu ngateva, God aue ekkaluua kanna ssavoto, me lo ateva taumattu eauliaa saasakiaa tee Spirit Manga ateva, God karika aue ekkaluua, tale nau oia me nau ngemuli.

*Sesa ngai eteae ekuukuneaa uene sesa
(Luk 6:43-45)*

³³ “Arova uue va ai eteae masina ia, utani ue tee va uenena masina. Me arova uue va ai eteae sesa ia, utani ue tee va uenena sesa. Poli ai eteae la kilakila maamasinaane me sesaane tale uenena. ³⁴ Am nongina natuira iem katu ngatoa, vaalua aue am auliaa masi voto nau eteva sesa taumattu ngam? Taumattu ngateva epoppoaa voto ekasukasu tale urunguitanina ateva. ³⁵ Masi taumattu ngateva etautau mae masi voto ekaakaai elome etana, me sesa taumattu ngateva etautau mae sesa voto ekaakaai elome etana. ³⁶ Aghaauliaa etaimim va tale nau niaiskei eteva, taumattu ngatoa aue la ghauliaa ta God asease inangari laghe nim poppooaa. ³⁷ Poli tale inangarim God aue ekoloo va masi taumattu io o sesa taumattu io.”

*Paresi etoa laghe kokkolomi Iesu va egheelei righi niaimatoonga
(Mak 8:11-12; Luk 11:29-32)*

³⁸ Me Paresi etoa me tau ngai aapasunga tale inangari nipaopao atoa laghe uela ta Iesu va, “Tisa, ami anna tani tara righi niaimatoonga ughelei.”

³⁹ Iesu ghe liula me ghe uela etaira va, “Sesa taumattu ngam me karika am uusilaa aloannaane God, me am anna tani tara niaimatoonga. Saa ghe lutu teela propete ateva ta Jona, ie nonga o niaimatootoongana

ateva ue elutu. ⁴⁰ Nongina Jona ghe asola elome tale kova kko ateva kotolu llaa me kotolu voo, Natuna tee ateva Taumattu ngateva ue easo tale urunguitani kosa ateva kotolu llaa me kotolu voo. ⁴¹ Aue taumattu nge Ninive atoa la tingina tale niaisakei eitauua teeiem, me la ue va sesa am, poli aNinive atoa laghe nna ngaioghioghiaala, nau Jona ghe poppoaa etaira, me ia oia, lo ateva namuu ia ta Jona ange toka teeiemla. ⁴² Tale nau niaisakei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasaueiliila tani mae nongo alomasaanganiaane Solomon, me lo ateva taumattu namuu ia ta Solomon ange toka teeiemla.

*Nau sesa spiriti eteva emene kiikiriaa mae
(Luk 11:24-26)*

⁴³ “Nau eteva sesa spiriti eteva ekupikupi ghoa tale taumattu ngateva, ekasukasu tale voto mallangona tani pae niainoana me nau etam tara ⁴⁴ eue va, ‘Amene kiri lao tale ale ateva aghe kasu vuliela.’ Nau elaa reerekata me etaatara va ale ateva karika toa etana me kaakalaa ngaraarangisana ia me elome masina tani toka etana. ⁴⁵ Me emene kasu, tani laa kolo ghaitu (7) sesa spiriti gheeleiaaira mene sesaaili. Me la kupi sso, me la sso tokatoka tale ale ateva. Gheeleiaane aue esesaaili, aue elau isaa akasina. Lo ateva oia vituu aue eghelei evalua o.”

*Kinna me nengane atoa Iesu
(Mak 3:31-35; Luk 8:19-21)*

⁴⁶ Nau Iesu ghe samasama tee taumattu ngatoa, kinna me nengane atoa laghe tiitingina eleka, laghe aloanna tani sama teeia. ⁴⁷ Kateva taumattu ghe auliaala etana va, “Kinam me nengam taita atoa eleka, la ghanna tani sama teeio.”

⁴⁸ Iesu ghe liula me ghe uela etana va, “See ia kinaghi me see ila nengaghi etoa?” ⁴⁹ Ghe suisui lao kapuna disaepolo atoa me ghe ue va, “Kinaghi me nengaghi etoa o. ⁵⁰ Lo ateva egheelei aloannaane Tamaghi epona liu, nengaghi ia me kapughu vause ia me kinaghi ia.”

13

*Kiukiu niaimatoonga tale
tau ngai pasa katu ue ngai eteva
(Mak 4:1-20; Luk 8:4-15)*

¹ Ia nonga o nau eteva me Iesu ghe kupi ghoala tale ale ateva me ghe lao sio tani toka tale sama ateo talia ngateae. ² Oroiannaaili taumattu ghe mae sio ta getana, mausina avalua o me ghe saesaela tale paanaka ateva me ghe tokala etana me taumattu ngatoa laghe tiitingina elo samarra. ³ Ghe ppooala oroiannaaili voto tale kiukiu niaimatoonga. Ghe uela va, “Am nongola! Tau ngai pasa katu ue ngai eteva ghe kasula tani pasa aina katu ue ngai. ⁴ Nau eteva ghe kaokaoaala katu ue ngai, kasina ghe katuula tapaa salana me ghila atoa laghe mae sio tani nama. ⁵ Kasina ghe katuula tale voto ateva sakolo ia, karika oroi kosa me arovaeaata nonga ta ghe pinosala, poli karika lluse ia. ⁶ Me nau sinaka ateva ghe saela ghe sinaki ematelala. Laghe matela poli oane karika ghe sio liula ta euu atu ia. ⁷ Kasina katu ue ngai ghe katuula

elome tale uasa karasa. Laghe pinosala me uasa karasa ateva ghe kavili ematelala.⁸ Me kasina katu ue ngai ghe katuula tale masi kosa me laghe kuneaala ueira, kasina ghe kuneaala kateva ai (100), kasina ghe kuneaala ghaonomongaulu (60), me kasina kotolungaulu (30).⁹ Lo ateva talingane manee tani nongo, aue enongo.”

¹⁰ Disaepolo atoa laghe mae sio ta Iesu me laghe kolomiela va, “Vaalua me upoppoaa kiukiu niaimatoonga ta taumattu ngatoa?”

¹¹ Iesu ghe liula me ghe uela etaira va, “Alomasaanga tale voto eaaisulia tale ararimangali ngepona liu eteva, God ghe tau aatu etaimim, me ila karika.¹² See righi voto etana, aue God emene taula me aue eghaa oroi voto, me lo ateva karika righi voto etana aue eghaa velu righi lutu voto etana.¹³ Liuna avalua o me aghaauliaa voto etaira tale kiukiu niaimatoonga:

“Arongona ta la taatara me karika aue la tara kila,

me arongona ta la nonganongo me karika aue la nongo me aloira emasaanga.

¹⁴ Ta ngetaira me llo Aisaea ghe aulia ngamuemua alokoila aue ekau-rekati. Ghe uela va,

“‘Aue am nongo me karika aue am kila;

 aue am tara me karika aue am alomasaanga tee.

¹⁵ Urunguitaniira aue ekorokorongana,

 me talingaira aue evolovolongina tani nongo,

 me laghe akou rungaala mataira va karika la mene taatara.

Ta la rau tara nonga ta mataira,

 me la nongo ta talingaira,

 va la kila ta urunguitaniira,

me la kiri mae va aghelei emasinaila.’

¹⁶ Me am, niarangise etaimim, poli mataimim etaatara me talingaimim enonganongo.¹⁷ Aghaaulia ngakoronna etaimim va oroi ila propete atoa me taumattu ghulughuluena laghe aloannaaili tani tara voto am taatara ghaine, me karika laghe tarala, me tani nongo voto am nonganongo ghaine, me karika laghe nongola.

¹⁸ “Am nongo malloeanina kiukiu niaimatoongana ateae ta tau ngai pasa katu ue ngai eteva:¹⁹ Arova lo ateva enonganongo inangarina ararimangali eteva epona liu me alona etam maamasaangania, sesa taumattu ngateva eghaaghaa velu voto tau ngai pasa katu ue ngai eteva epasapasa tale urungutanina ateva. Nongina katu ue ngai ghe katuula tapaa salana.²⁰ Me llo katu ue ngai ghe katuula tale voto ateva sakolo ia, nongina taumattu ngateva enonganongo inangari me arovaeaata ta eghaaghaa me emasimasi etingina.²¹ Me poli karika righi oane, karika etiitingina liu nau eteva sesa nau me niauvii elutululu teeia mausi inangarina God, me arovaeaata ta ekaakatuu.²² Me llo katu ue ngai ghe katuula elome tale uasa karasa nongina taumattu ngateva enonganongo inangari me enannangaili voto kamena tale kosa ateva oia me ealoannaaili va isaa oia voto aue egheleia va etue peipeiena, me ekakkaluua inangari tale ararimangali eteva. Liuna avalua o me karika righi uene.²³ Me llo katu ue ngai ghe katuula tale masi kosa nongina taumattu ngateva enonganongo inangari me alona emaamasaanga

13:12: Mat 25:29; Mak 4:25; Luk 8:18; 19:26. **13:14:** Ais 6:9-10; Jon 12:40; Apos 28:26-27.

13:16: Luk 10:23-24. **13:22:** Luk 12:16-21; 1 Tim 6:9-10, 17.

ekuukuneaa uene, kasina kateva ai (100), kasina ghaonomongaulu (60), me kasina kotolungaulu (30) oroaane elaulau llo laghe pasa akasinala.”

Kiukiu niaimatoonga eauliaa ssa tuvui eteva

²⁴ Iesu ghe mene auliaala kateae kiukiu niaimatoonga. Ghe uela va, “Ararimangali ngepona liu eteva nongina taumattu ngateva ghe pasala katu ue ngai masina tale utana atingiu. ²⁵ Me vara taumattu ngakapa atoa laghe lao sio tani asekanua, me tau ngai ssateena ateva ghe mae sio tani pasa ssa tuvui eteva elome tale katu uit, me ghe kasula. ²⁶ Nau eteva katu uit ghe pinosala me ghe kuneaala uenenna, ssa tuvui tee ateva ghe pinosa teeilala.

²⁷ “Me kapuna tau ngai nonganongo anna atoa laghe lao sio me laghe uela ta tau ngumane va, ‘Vau eteva, ami annaa va ughe vella nonga katu uit tale umam utana atingiu, me vaalua ssa tuvui eteva ghe pinosala?’

²⁸ “Ghe liula me ghe uela va, ‘Tau ngai ssateeghi eteva ghe kaokaoaala.’

“Me tau ngai nonganongo anna atoa laghe kolomiela va, ‘Uanna va ami laa muke velu?’

²⁹ “Ghe uela va, ‘Karika. Am rau mukemuke velu ssa tuvui etoa, va am muke velu tee uit. ³⁰ Am tau vellaluela me lalu sae aitauua me elaa ghaa nau nisai uit. Ia o nau eteva aue aghauliaa ta lo atoa la sai uit tani ghaa akasina ssa tuvui etoa me la iri eitaueinila me pei nitungiaa me la ghaa aitauua uit me aue la laa ghatoka tale aleghi ale nginana ateva.’”

Kiukiu niaimatoonga ateeae tale

katu ue ngai erighi (mastet)

(Mak 4:30-32; Luk 13:18-19)

³¹ Ghe mene auliaala kateae kiukiu niaimatoonga. Ghe uela va, “Ararimangali ngepona liu eteva nongina katu ue ngai erighi la kolokoloa va mastet, taumattu ngateva ghe ghaaiela, me ghe lao sio tani pasaia tapaa ngutana. ³² Arongona ta ghaunaaili ia tale isaa akapaaili katu ue ngai me nau epiipinosa, enaanamuu vulu ekapa isaa akapa ai laghe pasala eutana. Me ia oia ai eteae ghila atoa la looloo la mae tokatoka tale laangina.”

Kiukiu niaimatoonga tale isti eteva

(Luk 13:20-21)

³³ Me ghe mene auliaala kateae kiukiu niaimatoonga. Ghe uela va, “Ararimangali ngepona liu eteva nonginaaili isti eteva vause ateva ghe ghaaiela me ghe ghelei eitauua teela palaoa oroieili lomosi ta palaoa ngateva ghe rrangala.”

³⁴ Iesu ghe aauliaa isaa akapa o voto ta taumattu ngatoa tale kiukiu niaimatoonga. Karika ghe aaulia ngamasalika teva voto ta ghe aauliaa nonga tale kiukiu niaimatoonga. ³⁵ Mausina avalua o me llo propete ateva ghe auliaala ghe kaurekatila. Ghe uela va,

“Aghi aghauliaa kiukiu niaimatoonga etaimim.

Me aue akiukiuaa voto aisulianna ghe tiuala emua arau nau God ghe gheleila kosa ateva oia.”

Malloeana kiukiu niaimatoonga tale ssa tuvui eteva

³⁶ Nau ghe kasu vulila taumattu ngatoa, ghe ssola tale ale ateva. Me kapuna disaepolo atoa laghe lao sio etana me laghe uela etana va,

“Uaulia ngamasina etaimami malloeana kiukiu niaimatoonga ngateeta ssa tuvui eteva me utana atingiu.”

³⁷ Ghe liula me ghe uela etaira va, “Natuna ateva Taumattu ngateeva ia o lo ateva ghe kaokaoaala masi ue ngai. ³⁸ Me paa ngutana atingiu eaaimatoonga kosa ateva, me masi ue ngai eaaimatoonga lo atoa natuna ila ararimangali eteva. Me ssa tuvui eteva eaimatoonga natuna atoa sesa taumattu ngateva. ³⁹ Me Satana tau ngai ssateena ateva God ghe pasala ssa tuvui eteva. Me nau nissai uit eaaimatoonga airuuruu tale kosa ateva me tau ngai sai uiti etoa, la aaimatoonga ensolo atoa.

⁴⁰ “Nongina laghe muke vella ssa tuvui eteva me laghe tungie saela tale kuraa, airuuruu tale kosa ateva aue ia avalua o. ⁴¹ Natuna ateva Taumattu ngateva aue esuu kapuna ensolo atoa me aue la muke velu tale ararimangalina ateva voto akapa sesa etiitiuaa ssavoto me lo atoa la gheelei voto sesa. ⁴² Aue la sau vella sai tale paka kura atae ataataaili ia me aue niaingalaaii me niaingeresa ngalungalu elutu. ⁴³ Me ghulughuluena atoa taumattu aue la llaa nongina sinaka ateva tale ararimangalina ateva Tamaira ateva. Lo ateva talingane manee tani nongo, aue enongo.”

Kiukiu niaimatoonga tale masi voto laghe kaila

⁴⁴ “Ararimangali ngepona liu eteva nonginaaili aikaai viliki veu eteva laghe kaieiniela tale paa ngutana atae. Nau eteva taumattu ngateva ghe taraiela ghe mene aisulieiniela me tale masimasiaane ghe aitaua ngakapala peina me laghe polila, me ghe polila ia o paa ngutana atae.

⁴⁵ “Me tee ararimangali ngepona liu eteva nonginaaili tau bisnisi eteva ghe paepae pel tani poli. ⁴⁶ Nau eteva ghe tarala lo ateva pel masinaaili ia ghe lao sio, ghe aitaua ngakapala peina me laghe polila, me ghe polila ia o pel ateva.

Kiukiu niaimatoonga tale uvena atae

⁴⁷ “Ararimangali ngepona liu eteva nonginaaili uvena atae laghe velue siola tale ateo talia ngateae me ghe ghaala asease kko atoa. ⁴⁸ Nau eteva ghe pasula, tau luku etoa laghe aea ssola elae me laghe toka siola me laghe ghaala masi kko, laghe kaaila tale keru, me laghe sau vella llo sesa. ⁴⁹ Airuuruu tale kosa ateva aue ia avalue ia o, aue ensolo atoa la mae pola sesa atoa ta ghulughuluena atoa taumattu, ⁵⁰ aue la sau vella sai tale paka kura atae ataataaili ia me aue niaingalaaii me niaingeresa ngalungalu elutu.”

⁵¹ Iesu ghe kolomilala va, “Aloimim ange masaangala isaa o voto?”

Me laghe uela va, “Ue.”

⁵² Me ghe uela etaira va, “Liuna avalua o me isaa akapa tau ngai aapasunga tale inangari nipaopao laghe disaepolola tale ararimangali ngepona liu eteva nonginaaili taumattu ngateva eghaaghaa ouna me pokane masi voto tale rum atiulu la ghatoka masi voto etana tale alena ateva.”

Propete ateva la tam oneoneainia

(Mak 6:1-6; Luk 4:16-30)

⁵³ Nau eteva Iesu ghe ruula tani auliaa isaa o kiukiu niaimatoonga me ghe kasu vulila ia o voto ateva. ⁵⁴ Ghe lao sio tale masalikina tunga atae

me ghe tiuaala tani apasunga ta taumattu ngatoa tale aleira ale nivelu eitauaa. Me laghe soghiaala voto ghe aauliaa me ghe gheelei, me laghe kookolomi va, “Ia oia taumattu ngateva eaa ghe ghaala alomasaanga me sarasarakana tani ghelei mirikolo? ⁵⁵ Ita kilakila va natuna ia tau ngai atulu ale ateva ia oia taumattu ngateva, me ararina atae kinna ta Meri me nengana atoa ta Jeimis, Josep me Saemon me Jiuda. ⁵⁶ Me kapuna vause akapa atoa la tokatoka teeita. Me arova eaa ghe ghaala isaa o voto?” ⁵⁷ Me ang ghe sessaila etana.

Me Iesu ghe uela etaira va, “Propete ateva la oneoneainia tale kasina ppae masaliki, me tale masalikina tunga atae me tanganuena, karika.”

⁵⁸ Karika ghe gheleila righi oroi mirikolo tale ia o masaliki eteae poli karika laghe aikaiaa etana.

14

*Herot ghe annaa va Jon tau
ngai aasuu ia ta Iesu*

(Mak 6:14-29; Luk 9:7-9)

¹ Isaa o nau, gavana ngateva Herot ghe nongonongo kiukiuna Iesu. ² Me ghe uela ta kapuna tau ngai uungu etoa va, “Ia oka taumattu ngateva Jon tau ngai aasuu ia etana ghe mene totula tale nimate! Liuna avalua o me sarasarakanaaili ia tani ghelei mirikolo.”

³ Poli emua akasina, Herot ghe suula inangari me laghe poso atokala Jon me ghe iriela me ghe atokaie ssola tale ale mata voovoo poli Herodias, vausenna ia tuena ta Pilip. ⁴ Poli Jon ghe ue ta Herot va, “Karika masina ta ughe lai sariela.” ⁵ Herot ghe anna tani uvi ematea me poli ghe maamatauta taumattu ngatoa ta ila laghe ue va Jon propete ia, liuna avalua o me karika ghe roola tani uvi ematea.

⁶ Nau eteva ghe rekatala tani nnaa nau eteva Herot ghe lutula etana, natuna vause ateva Herodias ghe ssiuaala ta mataira Herot me kapuna atoa, me Herot ghe masimasiangailiela, ⁷ me ghe auliaala inangari nialokoi me ghe aulia ngakoronnaailila etana va aue etaula saa voto aue ekolomi. ⁸ Me kinna ghe auliaa tau lao sio ninanna ngateva me ghe uela va, “Ghaine arau aghaloanna uruna ateva Jon tau ngai aasuu ia tale tivilau terei.” ⁹ King ghe alousiusila, me poli ghe gheleila inangari nialokoi eteva ta mataira namu ngatoa, ghe auliaala va la taula llo ghe kolomila. ¹⁰ Me ghe suula soldia ngatoa me laghe sai pulela alona atiulu Jon tale ale mata voovoo. ¹¹ Laghe sau lao sio uruna ateva Jon tale terei etivilau me ghe taue lao sio ta aliki vause ateva. Ghe ghaaiela me ghe laoainie sio ta kinna. ¹² Kapuna disaepolo atoa Jon laghe mae sio tani ghaa vaulanna ateva Jon me laghe lao sio tani kaieinia. Me laghe lao sio tani auliaa ta Iesu.

*Iesu ghe anginila ghalima airari (5,000) taumattu
(Mak 6:30-44; Luk 9:10-17; Jon 6:1-14)*

¹³ Iesu ghe nongola isaa o voto ghe lutula me ia nonga me disaepolo atoa laghe aikaaila tale paanaka ateva tani lao tale vaara. Nau eteva taumattu ngatoa laghe nongola, laghe kasu vulila masalikiira me laghe kasuaala tani laa ghaimuli teeia. ¹⁴ Nau Iesu ghe ssola elae, ghe

tarala oroieili taumattu ngatoa. Ghe alousiusi teeilala me ghe ghelei emasinailala tale aneira isiki.

¹⁵ Auena sinaka ateva ghe suu me disaepolo atoa laghe lao sio etana me laghe uela va, "Voto ateva oia vurunganna ia, me ange aitarrauui. Sungi vella taumattu ngatoa me la lao tale masaliki taumattu etana me la laa poli righi aneira inana."

¹⁶ Iesu ghe liula me ghe uela va, "La rooroo tani toka. Am taula righi inana, me la nama."

¹⁷ Disaepolo atoa laghe uela va, "Ami posoposo ghalima nonga verete me ghalua kko."

¹⁸ Iesu ghe uela va, "Am maeaa sio etaghi." ¹⁹ Me ghe auliaala ta taumattu ngatoa va la toka sio tale rarrasa me ghe ghaala verete ghalima me kko alua, me ghe taatara saela epona liu me ghe kaili emasina saela, me ghe pirila, me ghe tau lao sio ta disaepolo atoa me ila laghe lao sio tani aikoita ta taumattu ngatoa. ²⁰ Laghe namanamala me ghe ssoilala, me disaepolo atoa laghe kaai esokosokoala kasangaulu ghaluae (12) laka tale tapiri nginana ghe oghila. ²¹ Lo atoa laghe namanamala ghe roola ghalima airari (5,000) taita, karika iraira tee vause me aliki etoa.

Iesu ghe kasula epona tale paamanu eteva

(Mak 6:45-52; Jon 6:15-21)

²² Gheania nonga ta Iesu ghe auliaala va kapuna disaepolo atoa laghe aikaai tale paanaka ateva, me laghe muemue lao ta pai kativilau me ia ghe sungi velu mua taumattu ngatoa. ²³ Vara ghe sungi vellala, me ie nonga ghe saela tale motouru tani looloo sae. Ie nonga, me ghe aitarrauuiila. ²⁴ Paanaka ateva ang ghe mala masau ghoala me kotoo atoa angila ghe uviuvia poli laghe sousou kuukuu eteva.

²⁵ Elopai me Iesu ghe laa ghoa rekata etaira ghe kasukasu epona tale paamanu eteva. ²⁶ Nau eteva disaepolo atoa laghe taraiela ta ghe kasukasu epona tale paamanu ghe moi saasakieinilala me laghe ue va, "Raroai ia!" Me laghe aaipiia poli laghe maamatautu.

²⁷ Me gheania nonga ta Iesu ghe sama teeilala, me ghe uela va, "Am rau mene annaa, ta aghi oia. Am rau mene matautu."

²⁸ Me Pita ghe uela ta Iesu va, "Vau eteva! Arova koronna va io Iesu, uauliaa mae etaghi me akasu mae etam epona tale paamanu."

²⁹ Iesu ghe uela va, "Kkure sio mae."

Me Pita ghe kkure vulula paanaka ateva me ang ghe kasukasu elao lao ta Iesu epona tale paamanu. ³⁰ Me vara ghe tarala kotoo ateva me ang ghe maamatautu me ang ghe lullusu me ang ghe kolokolo, ghe ue va, "Vau eteva, asaangieghila!"

³¹ Gheania nonga ta Iesu ghe ssuuaala nimane me ghe kunela Pita me ghe uela va, "Ghaunaaili unem niaikaaiaa. Vaalua me eghaaghala u nannaam?"

³² Me nau eteva lalu ghe saesaela tale paanaka ateva me kuukuu eteva ghe kapala. ³³ Me lo atoa tale paanaka ateva laghe kkaueiniela, me laghe ue va, "Koronnaaili va Natuna io God."

Iesu ghe ghelei emasinala tau sessa atoa eGenesaret

(Mak 6:53-56)

³⁴ Laghe ose longotila me laghe kautula tale distriki eteva eGenesaret.
³⁵ Nau eteva taumattu ngatoa tale ia o masaliki eteae laghe tara kilala Iesu, laghe suula inangari ta mene katoa masaliki me taumattu ghe maeaa sio kapuira tau sessa etana. ³⁶ Me laghe tani kookolomi ekorokorongana ia va etau velu tau sessa atoa me la nim poso sama ghinnanina. Lo atoa laghe posoposo sama ghinnanina Iesu laghe maamasina.

15

*Voto raarangisana me voto karika raarangisana
(Mak 7:1-23)*

¹ Katoa Paresi me tau ngai aapasunga tale inangari nipaopao, laghe kasula eJerusalem me laghe mae sio ta Iesu tani kolomia va, ² “Mausi saa me kapum disaepolo atoa karika la ghaaimuli tee voto tuvuita atoa laghe apasungaala etaita va ita gheelei? Karika la porapora nimaira nau la namanama.”

³ Iesu ghe liula me ghe uela va, “Me vaalua me karika am aaimuli usi tee inangari nipaopao kanna God me am aaimuli usi tee voto tuvuimim atoa laghe apasungaala va am gheelei? ⁴ Poli God ghe uela va, ‘Am oneoneaa tamaimim me kinaimim,’ me, ‘Lo ateva ekaakasikienam tamana o kinna aue la uvi ematea.’ ⁵ Me am auliaa va arova kateva righi peina erooroo tani sausi tamana o kinna, me eue etairarua va, ‘Peighi tani sausiemalua ngagheleila inangari nialokoi tani taula ta Vau palepale,’ ⁶ am aapasunga va ia o taumattu ngateva karika erooroo tani oneoneaa tamana o kinna. Tale isaa o ase salana am gheelei inangarina God enim peepeisaane, ta am aaimuli usi tee aauliaairaa tuvuimim atoa. ⁷ Am usimaghala am! Propet Aisaea ghe aulia ngakoronnala nau ghe aulia ngamuemua alokoila gheeleiaaimim, ghe uela va:

⁸ “Isaa oia taumattu la nim oneoneainaghi ta paaira
me urunguitaniira masaeili etaghi.

⁹ Karika righi malloeananeuneira nikkauaa
poli la ghaapasunga llo nim kaluira taumattu ngatoa nonginaaili va
kanna God.”

¹⁰ Iesu ghe kolola taumattu ngatoa me ghe uela etaira va, “Am nongo me aloimim emasaanga! ¹¹ Saa llo voto ekupikupi sso elome tale paa taumattu ngateva, karika egheleia va etam raarangisana, ta saa llo voto epoppoaa ekupikupi ghoa tale paane ateva egheleia etam raarangisana.”

¹² Vara me disaepolo atoa laghe mae sio tani auliaa ta Iesu va, “Ukilakila va Paresi etoa esessaila tale inangari uauliaala?”

¹³ Iesu ghe liula me ghe uela va, “Isaa akapaaili voto eutana Tamaghi epona liu karika ghe pasala, aue emuke akapaaili. ¹⁴ Am rau mene annaa isaa o ase taumattu! Ila nongina mata salusalu, la ghaloanna tani apasunga salana ta katoa, me arova mata salusalu eteva ekatulaa mene kateva mata salusalu, ilalua akapa aue lalu kupi tale liu.”

¹⁵ Vara me Pita ghe uela va, “Erooroo va uauliaa malloeanina isaa o inangari?”

¹⁶ Iesu ghe liula me ghe uela va, “Vaalua? Am tee aloimim karika ghe masaanga? ¹⁷ Karika am kilakila? Saa llo voto ekupikupi sso tale

paa taumattu, esiosio tale kova taumattu, me emene kupikupi ghoa nau taumattu ngateva elaa tiutiu. ¹⁸ Me saa llo voto ekupikupi ghoa tale paa taumattu, ekasukasu tale urunguita, isaa o voto egheeghelei taumattu ngateva etam raarangisana. ¹⁹ Tale isaa akapa voto urunguita ateva eaalutu sesa ninanna, tani aiuvi emate, tani lai sari katoa maneeira, tani lai saasaloaa, niainao, inangari kamena me niauliaa saasakiaa. ²⁰ Isaa o voto egheeghelei taumattu ngateva etam raarangisana, me tani namanama me karika upora nimam, isaa o llo karika eghelei taumattu ngateva etam raarangisana.”

Unna niaikaiaa vauseni nge Keinan ateva

(Mak 7:24-30)

²¹ Jesu ghe kasu vulila lo ataeae o masaliki me ghe lao sio tale llo masaliki kalakalangina eTaer me eSaedon. ²² Vauseni nge Keinan ateva, ghe tokatoka tale ia o pai etivilau, ghe mae sio ta Iesu, me ghe sama ana-muula va, “Vau eteva, Natuna io Deivit, ualousiusi teeieghi! Natughu vause ateva raroai eteva etokatoka etana me egheelei saasakieinia.”

²³ Jesu karika poi ghe nim aaiaueinia. Kapuna disaepolo atoa laghe lao sio me laghe aauliaa etana va, “Sungi aoghiela! Eusiusita me egheelei kinatama mangalia ateva!”

²⁴ Jesu ghe liula me ghe uela va, “God ghe sungieghila nonga tani mae sausi lo atoa aIsraeli ang ghe raulala.”

²⁵ Vara me vause ateva ghe mae sio ghe suuiala ta liue kkena Iesu, me ghe uela va, “Sausieghila, Vau eteva!”

²⁶ Jesu ghe liula me ghe uela va, “Karika masina tani tau lao aneira inana aliki etoa ta paua atoa.”*

²⁷ Vause ateva ghe liula me ghe uela va, “Koronnaaili, Vau eteva. Me paua tee atoa la namanama aneira vorovoro nginana vauira atoa ekaakatuu tale uneira tevoo.”

²⁸ Jesu ghe liula me ghe uela etana va, “Vause ateva, niaikaiaa etam namungaili! Saa llo voto ualoanna va elutu etam, aue elutu.” Ia arau o nau eteva, natuna vause ateva ghe masinala.

Iesu ghe ghelei emasinala oroieili tau sessa atoa

²⁹ Jesu ghe kasu vulila voto ateva o, me ghe lao akalakalangina sio tale ateo talia ngateae eGalilii. Ghe saela tale motouru eteva me ghe toka siola. ³⁰ Oroieili ila taumattu ngatoa laghe mae sio etana, laghe maeaa sio lo atoa kasukasuaaira sesa, mata salusalu, riu makeakeana, paavoo me oroieili ila tau sessa atoa, laghe atokailala tale liue kkena Iesu, me ghe ghelei emasinailala. ³¹ Taumattu ngatoa laghe annangailila nau laghe tarala paavoo atoa laghe samala, lo atoa riuira makeakeana laghe korosilala, lo atoa kasukasuaaira sesa laghe masinala, me mata salusalu etoa ghe otila mataira. Me laghe tau saela kapuira Goto ateva aIsraeli etoa.

Iesu ghe anginila ghaata airari (4,000) taita

(Mak 8:1-10)

15:24: Mat 10:6. * **15:26:** paua atoa Ajiu etoa laghe annaa va ila muennaaili ila ta lo atoa karika va ajiu ila, me laghe kololala va ueili paua ila. Iesu ghe aimulisi tee auliaaira. Nau ghe auliaa, karika va ghe sessaia. Ghe nim anna tani toooonga aikaiaane vause ateva, karika va tani ghelei saasakiaa nannaane. **15:31:** Mak 7:37.

³² Iesu ghe kolola kapuna disaepolo atoa, me ghe uela va, “Aghaalou-siusi tee taumattu ngatoa, ta laghe toka aitauaa teeieghila kotolu nau, me ghaine karika righi inana va la nama. Karika aghaloanna tani suu vella me maloona ila, la rau taatarruu elaolao va la katuu etapaa salana.”

³³ Disaepolo atoa laghe kolomiela va, “Eaa ita ghele laa ghaa righi inana ghelei oroeili tale voto ateva oio vurunganna ia, me ita anginila taumattu ngatoa oio oroienaa ili?”

³⁴ Iesu ghe kolomila va, “Ghaisa akapa verete am uunusi?”

Me laghe liula me laghe uela va, “Ghaitu (7) verete me lutu kko ghauna.”

³⁵ Me Iesu ghe auliaala ta taumattu ngatoa va la toka sio tale kosa.

³⁶ Vara me ghe ghaala ghaitu verete me kko, me ghe kaili emasina saela, ghe pirila, me ghe taula ta kapuna disaepolo atoa, me disaepolo atoa laghe tau lao sio ta taumattu ngatoa. ³⁷ Ila akapa laghe namanamala me laghe tuvula. Vara me disaepolo atoa laghe kaai aitauaala tapiri ngingana ghe oghila, ghe roola ghaituae (7) laka. ³⁸ Ila akapa taita atoa laghe namanamala, ghe roola ghaata airari (4,000), karika laghe ioila vause atoa me aliki etoa. ³⁹ Vara me Iesu ghe suu vella taumattu ngatoa, me ghe aikaaila tale paanaka ateva, me ghe lao sio tale masaliki etoa kalakalangina ila tale distriki eteva eMagadan.

16

*Laghe tani anna tara teva niaimatoongana
(Mak 8:11-13; Luk 12:24-56)*

¹ Paresi etoa me Sadiusi etoa laghe lao sio ta Iesu, me laghe kolomiela va eapasunga teva niaimatoongana ngepona liu. Laghe auliaa llo tani nim tootoongainia.

² Ghe liula me ghe uela va, “Nau ange elo alai am ue va, ‘Aue masi nau poli karaane ateva eraeraeana,’ ³ me elue talaua am ue va, ‘Ghaine ettasi poli karaane ateva ange raeraeanala me ange aavoo.’ Am taatara kila kookoo ngateva me karika am taatara kila niaimatoonga tale nau. ⁴ Sesa taumattu ngam me karika am uusilaa aloannaane God, am anna tani tara niaimatoonga. Saa ghe lutu teela Jona, ie nonga o niaimatootoongana ateva aue elutu.” Vara me Iesu ghe kasu vulilala me ghe lao ppae sio.

*Uneira isti Paresi me Sadiusi etoa
(Mak 8:14-21)*

⁵ Nau laghe lao sio ta pai kativilau tale ateo talia ngateae me disaepolo atoa laghe tarala va laghe aikkaluaala verete. ⁶ Iesu ghe uela etaira va, “Am aikinikinitaa tani tara amasina uneira isti Paresi me Sadiusi etoa.”

⁷ Laghe aikolomieinila tani ue va, “Koti eaauliaa llo oia poli karika ita ghaala righi verete.”

⁸ Iesu ghe kilala sa ateva laghe aissakeana teeia me ghe uela etaira va, “Uneimim niaikaiaa ghaunaaili, vaalua me am aissakeana va poli karika righi verete? ⁹ Vaalua, aloimim karika ghe masaanga? Karika am annaa ghalima verete ghe roola ta ghalima airari (5,000) me ghaisae keru am ghe kaaila? ¹⁰ Me karika am annaa ghaitu verete ghe roola

ta ghaata airari (4,000) taumattu me ghe roola ghaisae laka am ghe kaaila? ¹¹ Vaalua, me karika am kilakila va karika va aghauliaa verete? Am aikinikinitaa tani tara amasina uneira isti Paresi me Sadiusi etoa.” ¹² Vara me laghe vira mene kilala va ghe aauliaa llo Paresi me Sadiusi etoa laghe aapasunga, me karika va la taatara amasina tale isti la ghelei tale verete.

Pita ghe auliaala va Iesu see ia

(Mak 8:27-30; Luk 9:18-21)

¹³ Nau Iesu ghe lao sio tale voto ateva kalakalangina ia eSiisaria Pilipae, ghe kolomila kapuna disaepolo atoa va, “Taumattu ngatoa la ue va see ta Natuna ateva Taumattu ngateva?”

¹⁴ Laghe liula me laghe uela va, “Katoa la ue va Jon tau ngai aasuu ia, me katoa la ue va Elaija, me katoa la ue va Jerimaea o mene katoa tani propete.”

¹⁵ Me ghe kolomilala va, “Me am, am ue va aghi see?”

¹⁶ Saemon Pita ghe liula me ghe uela va, “Io Mesaea io, Natuna io God ateva tokatoka liu ia.”

¹⁷ Iesu ghe liula me ghe uela va, “Niarangise etam Saemon natuna io Jona, poli karika teva taumattu eauliaa tau aatu llo ona ta Tamaghi etokatoka epona liu. ¹⁸ Me aghauliaa etam va io Pita, me tale ia o atu eteva* aue aghatulu aleghi ale manga ateva etana, me atamana ateeae tale voto ateva aleira ia matena atoa karika erooroo tani apalaia. ¹⁹ Aue atau aatu kii eteva tale ararimangali ngepona liu eteva; saa llo ugheelei runga tale kosa ateva, aue la ghelei runga tee epona liu, me llo utautau velu tale kosa ateva aue la tau velu tee epona liu.” ²⁰ Me ghe paola kapuna disaepolo atoa va la rau mene laa ghauliaa see va ia Mesaea ia.

Iesu ghe auliaala va aue emate

(Mak 8:31-9:1; Luk 9:22-27)

²¹ Isaa o nau Iesu ghe tiuaala tani aulia ngamasalika ta kapuna disaepolo atoa va aue etani sae eJerusalem me aue esae ghaa oroeili mmarikana, ta namu ngatoa, me namu ngatoa ta pristi etoa me tau ngai aapasunga ngatoa tale inangari nipaopao, me aue la uvi ematea, me aue kotonna ateva nau, emene totu.

²² Pita ghe koloala me lalu ghe laa tingina ppae sio, me ghe tiuaala tani kisoia, ghe ue va, “Karika, Vau eteva! Isaa o voto karika erooroo tani lutu ta ngetam.”

²³ Iesu ghe kiriela me ghe uela ta Pita va, “Kasu vulieghila, Satana! Ugheelei rungarunga salaghi. Nannaam karika eannaa voto kannna God ta voto kaluira taumattu ngatoa.”

²⁴ Vara me Iesu ghe uela ta kapuna disaepolo atoa va, “Lo ateva eanna tani usieghi, etani sioaa nannaane me erau mene nnainia nonga me esunuki unna aikotoo ateva, me eaimuli teeieghi. ²⁵ Poli see eanna tani asaangi maamauluaane aue eraua, me lo ateva maamauluaane eraua ta poli mausighi aue emene ghaa. ²⁶ Saa righi masi voto aue elutu arova taumattu ngateva ghele ghaa voto akapaaili tale kosa ateva me ghele rau maamauluaane? O sa ateva aue ghele tauela tani

16:14: Mat 14:1-2; Mak 6:14-15; Luk 9:7-8. **16:16:** Jon 6:69. **16:17:** Gal 1:15-16. **16:18:**

Jon 1:42; Ips 2:20. * **16:18:** Tale inangari nge Grik, Pita la ue va Petros, malloeanina ta “atu”.

16:19: Mat 18:18; Jon 20:23. **16:24:** Mat 10:38; Luk 14:27. **16:25:** Mat 10:39; Luk 17:33; Jon 12:25. **16:26:** Mat 4:8-9.

aikolikolieinia tani mene ghaa maamauluaane? ²⁷ Poli Natuna ateva Taumattu ngateva aue emae tee mallangina ateva Tamane me kapuna ensolo atoa me aue etaula aipoliira kateva kateva taumattu tale voto laghe gheleila. ²⁸ Aghaaulia ngakoronna etaimim va katoa oia am tiitingina, karika aue am mate me aue am tara Natuna ateva Taumattu ngateva emae tee ararimangalina ateva.”

17

*Vilikina Iesu ghe mene isaa ppaela
(Mak 9:2-13; Luk 9:28-36)*

¹ Ghaonomo (6) nau ghe lange sio me Iesu ghe kolola Pita, Jeimis me Jon nengana Jeimis, me ila nonga laghe saela tale motouru eteva saesaenaaili ia. ² Tale ia o voto ateva taataraane Iesu ghe aikolikoliaala emua ta mataira. Matana ghe lallaa arova sinaka ateva, me ghinnanina ghe usola arova mallanga ateva. ³ Vara me Moses me Elaija lalu ghe kaurekatila me lalu ghe tluaala tani sama tee Iesu.

⁴ Me Pita ghe uela ta Iesu va, “Vau eteva, masinaaili ta ita sae mae oia. Arova uanna, aue aghelei kotolu ale paapali, kateva alem ia, me kateva alena ia Moses, me kateva Elaija.”

⁵ Pita ghe aippooaa nonga me kookoo ngateva mallanginaaili ia ghe akoulala me lingi ngalo ateva elome tale kookoo ngateva ghe uela va, “Ia o natughu eteva aghaailousieinia, me masimasiaaghi ta ngetana namungaili. Am nongoa.”

⁶ Nau eteva disaepolo atoa laghe nongola, laghe aso siola tapaa kosa, mataira ghe tau siola euu. Me laghe matautu etinginala. ⁷ Iesu ghe lao sio me ghe posolala me ghe uela etaira va, “Am totula. Am rau mene matautu.” ⁸ Nau eteva laghe atangaro saela, karika laghe tarala righi taumattu ta laghe tarala nonga Iesu.

⁹ Nau laghe mae siosio tale motouru, me Iesu ghe ttoieinilala va la rau mene auliaa ta mene teva saa llo laghe tarala lomosina ta Natuna ateva Taumattu ngateva etotu tale nimate.

¹⁰ Me disaepolo atoa laghe kolomiela va, “Vaalua me tau ngai aapasunga tale inangari nipaopao la ue va Elaija aue etani muemue mae?”

¹¹ Iesu ghe liula me ghe uela va, “Elaija aue emae akasina tani ghelei emasina akapa voto. ¹² Me aghaauliaa etaimim va Elaija ghe mae sio me karika laghe tara kilaiela, me laghe ghelei teeielia isaa akapa voto laghe anna tani ghelei etana. Tale ie nonga o salana atikirighi Natuna ateva Taumattu ngateva aue eghaa nimmarikana ta nimaira.” ¹³ Me nannaairia disaepolo atoa ghe vira mene masalikela tani kila va ghe auliaa Jon tau ngai aasuu ia etaira.

*Taita arighi raroai eteva ghe tokatoka etana ghe masinala
(Mak 9:14-29; Luk 9:37-43)*

¹⁴ Nau laghe rekatala nongina taumattu ngatoa, taita ateva ghe lao sio tani tara Iesu me ghe suuiaala emua ta Iesu. ¹⁵ Me ghe uela va, “Vau eteva, ualousiusi tee natughu taita arighi, poli eoo me egheeelia esessaaili me oroiaata ta ekaakatuu velu sae tale kuraa me tale manu

16:27: Mat 25:31; Sams 62:12; Nitoka 24:12; Rom 2:6; Aotu 22:12. **17:2:** 2 Pita 1:16-18.

17:5: Sams 2:7; Ais 42:1; Mat 3:17; Mak 1:11; Luk 3:22; Diut 18:15. **17:10:** Mal 4:5. **17:12:** Mat 11:14. **17:13:** Luk 1:17.

tee. ¹⁶ Amaeainie sio ta kapum disaepolo atoa me karika la roola tani ghelei emasinaia.”

¹⁷ Me Iesu ghe liula me ghe uela va, “Am lo ateva oia vituu, karika righi uneimim niaiesoaa, nannaaimim me gheeleiaaimim karika ghulughuluena. Ghaisaataue atoka aitauaa teeiem? Me aue ghaisaataue atoitem va am aiesoaa? Am ghaa mae sio aliki eteva etaghi.” ¹⁸ Iesu ghe paola raroai eteva, me ghe kasu vulila aliki eteva me ia arau o nau eteva, aliki eteva ghe masinala.

¹⁹ Me disaepolo atoa laghe lao sio tani tara Iesu nau ie nonga me laghe kolomiela va, “Vaalua me ami karika ami roola tani tiu velu raroai eteva?”

²⁰⁻²¹ Iesu ghe liula me ghe uela va, “Poli uneim niaikaiaa ghau-naaili. Aghaaulia ngakoronna etaimim va, arova uneimim niaikaiaa naanamungaane nongina katu ue ngai erighi ghaunaaili ia (mastet), am roroao tani ue ta motouru eteva o va, ‘Kasula ona me umene lao teke,’ aue ghele kasu. Aue am roroao tani ghelei voto akapa.”*

*Aiaaghaluene Iesu ghe uela va
aue emene totu*

(Mak 9:30-32; Luk 9:43-45)

²² Nau eteva laghe mae aitauaa sio eGalilii me Iesu ghe uela etaira va, “Natuna ateva Taumattu ngateva aue la tauela ta nimaira taumattu ngatoa. ²³ Aue la uvi ematea me vara aiaakotonna ateva nau me aue emene totu.” Nau disaepolo atoa laghe nongola laghealousiusila.

Iesu ghe taula takis moni pei tale ale manga ateva

²⁴ Vara me Iesu me kapuna disaepolo atoa laghe laa rekata sio eKapenium, me lo atoa taumattu laghe ghaaghaa takis moni pei tale ale manga ateva laghe uela ta Pita va, “Kapuimim tisa ngateva eveluvelu takis tale ale manga ateva?”

²⁵ Me Pita ghe uela va, “Ue, eveluvelu.”

Me Pita ghe kupi ssola tale ale ateva, me Iesu ghe sama akasinala tani ue ta Pita va, “Saemon, uannaa va kingi etoa tale kosa ateva oia la ghaaghaa takis tale ase voto atoa ta see atoa, ta kapuira atoa o ta mene katoa ppae?”

²⁶ Me Pita ghe uela va, “La ghaaghaa takis ta mene katoa ppae.”

Me Iesu ghe uela etana va, “Mausina avalua o me kapuira atoa la tam tautaula takis. ²⁷ Ta rau gheleila va esessaila etaita, siola tale ateo talia ngateae me uvelu ghoa unem airrekatieteae. Me nau urrekati aitiutiueteva kko, uoti paane ateva, me aue ughaa viliki veu etivilau. Ughaaia me ulaa tauela etaira aipoli kaluitalua takis.”

18

*See aue enamuu?
(Mak 9:33-37; Luk 9:46-48)*

¹ Isaa o nau disaepolo atoa laghe lao sio ta Iesu me laghe kolomiela va, “See atoa namuu ila tale ararimangali ngepona liu eteva?”

17:19: Mat 10:1. **17:20-21:** Mat 21:21; Mak 11:23; Luk 17:6; 1 Ko 13:2. * **17:20-21:** Kasina uru ngai laghe pitila, laghe piti teela, 21 Isaa o ase voto karika erooroo tani lutu arova karika ita tam nae me ita tam pure. **17:22:** Mat 16:21. **17:24:** Eks 30:13; 38:26. **18:1:** Luk 22:24.

² Iesu ghe kolola aliki erighi me ghe atinginaiela elome etaira. ³ Me ghe uela va, "Aghaulia ngakoronna etaimim va am aikolikoliaa me am nongina lutu ngaliki etoa, arova karika, karika aue am kupi sso tale ararimangali ngepona liu eteva. ⁴ Liuna avalua o me lo ateva esioaa nannaane nongina aliki eteva o, namuu ia tale ararimangali ngepona liu eteva.

⁵ "Me see emasimasi tani ghaa lutu ngaliki etoa poli ararighi eteae eghaaghaa teeieghi. ⁶ Arova aliki erighi eaaiesoaa etaghi, me teva taumattu eghelei unna niaakaiaa ekatuu, ghele masinaaili ta arova la ghele iri teva paka ngatu ta ngalona, me la ghele ghoa allusia elo malionge.

⁷ "Aue esesaaili ta taumattu tale kosa ateva mausi voto la gheelei me katoa tani taumattu uneira niaakaiaa ekaakatuu. Isaa o voto aue elutu me aue esesaaili ta lo ateva taumattu egheelei voto o elutulutu. ⁸ Arova nimam o kekem egheeleio me ukaakatuu tani ghelei voto sesa, usai kotoo me usau velu. Aue masina arova ughaa maulue me katelange kekem me nimam karika ia, me karika masina arova nimam me kekem masina me aue la sau veluo sae tale kura ateaetokatoka liu ia. ⁹ Me arova teva matam egheeleio me ukaakatuu tani ghelei voto sesa, uvaliki velua me usau velu, masina tani ghaa maulue ta kateva nonga matam, me karika masina arova matam akapa alua me la sau veluo sae tale kuraa ateaeteghenna.

*Kiukiu niaimatoonga ateaetale
sipsipi eteva ghe rauela*

(Luk 15:3-7)

¹⁰⁻¹¹ "Karika am mene tara aliki etoa va peisaane ila. Aghauliaa etaimim va kapuira ensolo atoa la laa reerekataa ta matane Tamaghi epona liu.*

¹² "Vaalua am annaa? Arova teva taumattu kiena sipsipi erooroo kateva ai (100) me kateva ghele tiu ppae, am annaa va karika aue ghele kasu vuli ghasiongaulu ghasio (99) tale voto saesaena me ghele kasu tani laa pae lo ateva ghe tiu ppaela? ¹³ Arova ghele taraia, aghaulia ngakoronna etaimim va masimasiaane tale ia o sipsipi eteva namungaili me tale lo ghasiongaulu ghasio (99) karika laghe tiu ppaela. ¹⁴ Tale ia nonga o salana atikirighi Tamaim ateva[†] epona liu karika eanna va teva ta lutu ngaliki etoa eraua.

*Vaalua tani sausi tuem o nengam ateva egheelei voto sesa ta ngetam
(Luk 17:3)*

¹⁵ "Arova teva tuem o nengam egheelei teeio righi voto sesa, ulaa taraia me uauliaa voto sesa egheleila etam elome etaimalua nonga. Arova enongo usilainio, angu sausiela tani ghaa oghia. ¹⁶ Arova etam nongo usilainio, ughaa kateva o ghalua tani mene laa taraia me la rooroo tani auliaa va voto o koronna. ¹⁷ Arova etam nongo usilainila, am auliaa tale ale manga, me arova etam nongo usilaa tee ale manga, am tau velua, me enim toka nongina tau ngeleka ateva o tau ngai ghaa takis.

18:3: Mat 19:14; Mak 10:15; Luk 18:17. **18:5:** Mat 10:40; Luk 10:16; Jon 13:20. **18:8:** Mat 5:29-30. **18:10-11:** Hib 1:14; Luk 19:10. * **18:10-11:** Kasina uru ngai laghe pitila, laghe pitila 11 Poli Natuna ateva Taumattu ngateva ghe sio mae tani asaangi taumattu ghe rauela. Utara Luk 19:10. † **18:14:** Kasina uru ngai laghe pitila, laghe pitila Tamaghi eteva. **18:15:** Luk 17:3; Gal 6:1. **18:16:** Diut 19:15; Jon 8:17.

18 “Aghaaulia ngakoronna etaimim va voto llo am gheelei runga tale kosa ateva, aue la gheelei runga tee epona liu, me llo am tautau velu tale kosa ateva aue la tau velu tee epona liu.

19 “Amene aauliaa etaimim va arova lo alua taumattu tale kosa ateva lalu mae aitauaa tale kateva nonga ninannaa me lalu kolomieghi tale righi voto aue Tamaghi epona liu aue ghele taula. 20 Poli arova ghalua o kotolu la maemae aitauaa tale ararighi eteae, aghi atokatoka aitauaa teeila.”

Kiukiu niaimatoonga atea sesa tau ngai uungu eteva

21 Me Pita ghe mae sio ta Iesu me ghe kolomiela va, “Vau eteva, aue ghaisaata akkaluaata voto sesa ateva tueghi o nengaghi ghele gheelei etaghi, aue esae ta ghaituaata (7)?”

22 Iesu ghe liula me ghe uela va, “Aghaauliaa etam va karika va ghaituaata nonga, ta ghaitungauluaata me mene ghaitu (77).‡

23 “Liuna avalua o me ararimangali ngepona liu eteva nonginaaili kateva king ghe aloanna tani ghelel eghulughuluena uneira dinao kapuna tau ngai nonganongo anna atoa. 24 Nau ghe tiuala, laghe maeaa sio ia o taumattu ngateva unna kinatama dinao ateva. 25 Poli karika ghe rooroo tani liu, vauna ateva ghe uela va la laa taua me la polia, ia me vausenna ateva me natuna atoa me peina akapa atoa, tani liu unna dinao ateva.

26 “Ia o tau ngai nonganongo anna ateva ghe suuaala patu kkena emua etana me ghe annala va vauna ateva ealousiusi teeia me aue eliu ekapa voto. 27 Vauna ateva ghe alousiusi teeielia me ghe uela va vulla tani liu unna dinao, me ghe tau veluela me ghe kasula.

28 “Nau ghe kasula, ghe lao sio me ghe tarala kateva kapuna lalu ghe uungu eitauaa ghe dinaola etana ta kateva ai (100) silva koen. Ghe poso atokaiela me ang ghe aloanna tani kii pule alona atiulu. Me ghe ue etana va, ‘Utani liu kalum dinao ateva.’

29 “Kapuna ateva lalu ghe uungu eitauaa ghe suuaala patu kkena emua etana me ghe anna va ghe alousiusi teeia me aue ghe liu unna dinao ateva.

30 “Me kapuna ateva ghe ratila, ghe tani atoka ssola taumattu ngateva tale ale mata voovoo lamosina ta ghe tani liula kanna dinao ateva. 31 Nau mene katoa tani tau ngai nonganongo anna laghe tara isaa o voto ghe lutula, nannaairia karika ghe masinala. Liuna avalua o me laghe aulia ngakapala voto ghe lutula ta vauira ateva.

32 “Me vauna ateva ghe mene koloala ia o tau ngai nonganongo anna ateva me ghe uela etana va, ‘Io sesa taumattu io. Aghe ghiaa velu ekapala kalum dinao poli ughe ue va aghalousiusi teeio. 33 Vaalua me karika ughe mene alousiusi teela mene lo ateva kapum amalu ghe uungu eitauaa nongina aghe gheleila etam?’ 34 Vauna ateva ghe sessaiela me ghe auliaala me lo atoa la ghaaitoiaa ale mata voovoo ateva va laghe ghelel teeia voto mmarakana lmosina ta etani liu ekapa kanna dinao.

35 “Tamaghi epona liu egheelei evalua o etaimim, arova am tam kkaluaata kateva tueimim me nengaimim tale urunguitaniimim.”

18:18: Mat 16:19; Jon 20:23. **18:19:** Mak 11:24; Jon 15:7. **18:22:** Luk 17:4. ‡ **18:22:** ghaitungauluaata me mene ghaitu (77) o ghaitungauluaata ghaitu (70 × 7). § **18:24:** Tale inangari nge Grik, kasangaulu airari (10,000) talent. Kateva talent erooroo 6,000 silva koen (denarius), me kateva silva koen aipolina kateva nau. **18:34:** Mat 5:25-26. **18:35:** Mat 6:15; Mak 11:25; Ips 4:32; Kol 3:13.

19

Tani airatii (Mak 10:1-12)

¹ Nau eteva Iesu ghe ruula tani auliaa isaa o voto, ghe kasu vulila eGalili me ghe lao sio tale distriki eteva ejitudia ta pai kativilau ejordan.

² Oroiannaaili taumattu ghe usiusia me ghe ghelei emasinalala tale ia o voto ateva.

³ Katoa Paresi laghe mae sio etana tani tootoongainia tale kateva nikokolomi. Laghe uela etana va, “Uneita inangari nipaopao eue va masina arova taita ateva erooroo tani rati vausenna ateva tale aloaloannaane?”

⁴ Ghe liula me ghe uela va, “Karika am ghe ritila va tale aitiutiu tale voto akapaili lo ateva ghe gheleila voto ‘ghe gheleila taita me vause?’
⁵ Me God ghe uela va, ‘Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva, me ilalua aue lalu kateva nonga tale vilikiirarua.’
⁶ Karika va emene ghaaghalue ilalua, ta ekaakateva nonga ilalua. Liuna avalua o me llo God eaatoka aitauaa, karika teva taumattu emene pola.”

⁷ Me laghe kolomiela va, “Me vaalua me Moses ghe pitila va taita ateva erooroo tani taula uru ngai niairatii ta vausenna ateva, me esungi velua?”

⁸ Iesu ghe liula me ghe uela va, “Moses ghe uela va am rooroo tani rati vauseniimim poli urunguitaniimim korokoronganaaili, me aitiutiu tale voto akapaili karika isaa avalua o.
⁹ Aghaauliaa kieimim va lo ateva erati vausenna ateva nau karika tale uunguaa nialai salosaloa see, me emene ghaa mene teva vause, ange lai sarila.”

¹⁰ Disaepolo atoa laghe uela etana va, “Arova ia avalua o, aue emasina arova taita ateva erau mene lai.”

¹¹ Iesu ghe liula me ghe uela va, “Karika va taumattu ngakapa aue eghaa isaa oia inangari, ta llo nonga atoa God ghe akorokoronganailala tani ghaa isaa oia inangari.
¹² Poli katoa, nau laghe lutula laghe lutu saasakiaala me karika la rooroo tani lai. Me katoa taumattu laghe kaatilala, me katoa la tam anna tani lai poli la ghanna tani ghelei uunguaane ararimangali ngepona liu eteva. Lo ateva erooroo tani ghaa isaa oia inangari aue eghaa.”

Natu aliki etoa me Iesu (Mak 10:13-16; Luk 18:15-17)

¹³ Me laghe maearaa sio lutu ngaliki etoa ta Iesu va esaoaa nimane etaira me epure etaira. Disaepolo atoa laghe kisokiso lo atoa laghe maeainila sio.

¹⁴ Me Iesu ghe uela va, “Am tau velu lutu ngaliki etoa, me la mae etaghi. Am rau mene ghelei rungainila poli ararimangali ngepona liu eteva kaluira ia lo atoa nongina ila o lutu ngaliki etoa.”
¹⁵ Ghe saoaala nimane etaira me ghe kasu vulila lo ateae o masaliki.

Aliko taita ateva tue peipeiena ia (Mak 10:17-31; Luk 18:18-30)

¹⁶ Vara me kateva taita ghe mae sio ta Iesu me ghe kolomila Iesu va, “Tisa, saa arighi masi voto aue aghelei me aghaa maulue ateva tokatoka liu ia?”

17 Jesu ghe liula me ghe uela va, “Vaalua me ukokkolomi voto masina etaghi? Nim kateva nonga masina ia. Arova uanna tani ghaa maulue, unongo usilaa inangari nipaopao.”

18 Me taita ateva ghe kolomila Iesu va, “Sa ateva inangari nipaopao?”

Iesu ghe liula me ghe uela va, “Urau mene aiuvi emate, urau mene lai sari, urau mene ainao, urau mene kamekame tale niaisakei,¹⁹ uoneoneaa tamam me kinam, me uaielousiaa taumattu ngateva kalakalangina ia etam nongina uaaielousieinio.”

20 Me aliki taita ateva ghe uela va, “Isaa akapa voto ona ngaghe gheleila. Mene sa ateva voto karika aghe ghelei?”

21 Iesu ghe liula etana me ghe uela va, “Arova uanna tani ghulughuluenaaili, ulao me ulaa tau peim me la poli me ughaa viliki veu me utau lao ta lo atoa karika righi peiira, me aue utau peipeiena epona liu. Me umae usieghi.”

22 Nau eteva aliki taita ateva ghe nongo avaluela o, ghe alousiusila me ghe kasula, poli oroiannaaili peina.

23 Me Iesu ghe uela ta kapuna disaepolo atoa va, “Aghaaulia ngakoronna etaimim va aanasaili ta tue peipeiena atoa tani kupi sso tale ararimangali ngepona liu eteva.²⁴ Me aghaauliaa etaimim va marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale ararimangalina ateva God.”

25 Disaepolo atoa laghe soghiaa saasakiaa teela isaa o inangari me laghe kolomila va, “Me see nonga erooroo tani saanga?”

26 Iesu ghe taatara lao sio etaira me ghe uela va, “Ta taumattu ngatoa, karika la rooroo tani ghelei isaa o voto, me ta God, erooroo tani ghelei isaa akapa voto.”

27 Pita ghe liula me ghe uela va, “Ami ghe kasu vuli ekapala voto tani mae usio! Saa nonga ateva aue ami ghaaia?”

28 Iesu ghe uela etaira va, “Aghaaulia ngakoronna etaimim va, nau voto emene aikolikoliaa nau Natuna ateva Taumattu ngateva etoka tale masi aitokatokane ateva king, lo atoa am aaimuli teeieghi aue am toka tale kasangaulu ghalua (12) aitokatoka uneira namu ngatoa. Me aue am ghelei niaisakei tale kasangaulu ghalua ararimangali nge Israel.²⁹ Me lo atoa laghe kasu vulila tanganueira, o tueira me nengaira atoa o tamaira me kinaira me natura atoa o umaira paa ngutana ta poli ararighi eteae, aue la ghaa ailiuliu tale isaa o voto elau kateva ai (100), me aue la ghaa tee maulue ateva tokatoka liu ia.³⁰ Me oroi ila taumattu ngatoa matuutulienia ila aue la sioaili euu, me see ila lo atoa arariira euu aue la matuutulienia.”

20

Kiukiu niaimatoonga ateae tale tau ngai uungu

¹ Iesu ghe mene kiukiu tee lao sio va, “Aghaaulia ngavalua o poli ararimangali ngepona liu eteva nongina kateva tau kosa. Elue talaua poopooa, ghe lao sio tani kolo tau ngai uungu etoa va la uungu tale umana utani uaeni.² Ila oia tau ngai uungu etoa laghe masimasila tani

19:17: Lev 18:5; Luk 10:28. **19:18:** Eks 20:13-16; Diut 5:17-20. **19:19:** Eks 20:12; Lev 19:18. **19:26:** Job 42:2. **19:28:** Mat 25:31; Luk 22:30; Aotu 3:21. **19:30:** Mat 20:16; Luk 13:30.

ghaa kateva kateva silva koen* tale lo ateva o nau, me namu ngateva ghe sungilala tani laa uungu tale umana utani uaeni etingiu.

³ “Elue talaua ta 9 kilok, namu ngateva ghe lao sio, me ghe tarala taumattu ngatoa laghe aaitokaa see nongina laghe veluvelu eitauaa.

⁴ Me eghe uela etaira va, ‘Am tee am rooroo tani laa uungu tale utani uaeni etingiu, me aue apoliem tale sa ateva ghulughuluena ia.’ ⁵ Me laghe kasula.

“Elo sinaka ta 12 kilok, me mene elo alai ta 3 kilok, namu ngateva ghe mene lao sio tani mene gheleila llo eghe ghelei. ⁶ Elo alai ta 5 kilok, ghe lao sio me ghe tarala kasina taumattu ghe aaitokaa see, me ghe kolomilala va, ‘Vaalua me ia oia nau eteva am nim tokala etana?’

⁷ “Me laghe uela va, ‘Karika teva taumattu etau mae sio righi niuungu etaimami.’

“Ghe uela etaira va, ‘Am tee am laa uungu tale utani uaeni etingiu.’†

⁸ “Elo alai ta 6 kilok me tau kosa ateva ghe auliaala ta kapuna tau ngai toitoi eteva va, ‘Kolola tau ngai uungu etoa me utau lao aipoliira. Utau lao aipoliira kateva kateva, utiuaa ta lo atoa laghe airuuruula tani mae uungu, me elaa ruu ta lo atoa laghe aitiutiula tani mae uungu.’

⁹ “Lo atoa taumattu laghe tiuuala ta 5 kilok elo alai laghe mae sio me laghe ghaala kateva kateva silva koen. ¹⁰ Me nau eteva lo atoa laghe tiuua ngakasinala laghe mae sio, laghe nnaala va laghe ghaa oroi viliki veu, me karika, ila tee laghe ghaala kateva kateva silva koen. ¹¹ Laghe tarala viliki veu laghe ghaala me ghe sessailala ta tau kosa ateva, me laghe tiuuala tani aulilieinia, laghe ue va, ¹² ‘Ta lo atoa la airuuruula tani uungu, la uungula nonga kateva aoa, me upolilala nongina upoliemamila. Ami gheleila kinatama niuungu eteva, ta ami tiuuala arau elue talaua poopoo me sinaka ateva ange sinaki emateamamila.’

¹³ “Tau kosa ateva ghe nongola inangariira me eghe liu evaluela toko ta kateva kapuna tau ngai uungu va, ‘Kapughu, karika agheleila teva voto sesa etam. Karika ughe asokoi teeieghila va aue ughaa kateva silva koen? ¹⁴ Ghaala aipolim me ukasu. Aghi aghe auliaala va la poli evalueiem o lo atoa laghe airuuruula tani uungu, tale aloannaaghi. ¹⁵ Koti karika erooroo va aghaimuli tee aloannaaghi tani aikoita uneghi viliki veu, va? Arova aghanna tani ghelei masi niuungu tale taumattu ateva oia, vaalua me esessaio?’”

¹⁶ Iesu ghe uela ta kapuna disaepolo atoa va, “Isaa avalua o me oroi ila taumattu ngatoa matuutuliena ila aue la sioaili euu, me see ila lo atoa arariira euu aue la matuutuliena.”

Aiaakotonna Iesu ghe uela va aue emate me emene totu

(Mak 10:32-34; Luk 18:31-34)

¹⁷ Iesu ghe kasula me ghe laa saesae ejerusalem. Me nau eteva laghe laa saesae, Iesu ghe kolo apalluula nonga kapuna kasangaulu ghalua (12) disaepolo, me ghe auliaala etaira va, ¹⁸ “Am nongo, ita laa saesae ejerusalem, me aue la tau lao Natuna ateva Taumattu ngateva ta nimaira namu ngatoa tale pristi etoa me tau ngai aapasunga tale inangari nipaopao atoa, me aue la ghelei niaisakei etana, me la tingina

* **20:2:** silva koen Silva koen (denarius) aipolina kateva nau. † **20:7:** Kasina uru ngai laghe pitila, laghe mene uela va, me aue apoli emasinaiem. **20:8:** Lev 19:13; Diut 24:15. **20:16:** Mat 19:30; Mak 10:31. **20:18:** Mat 16:21; 17:22-23.

aitauaa tani uvi ematea. ¹⁹ Aue la taue lao ta taumattu ngeleka atoa, me aue la kusiaa teeia, la uetaia, me la avukalaia tale aikotoo. Emuli tale kotolu nau, aue etotu.”

*Jeimis me Jon lalu ghe anna tani namuu
(Mak 10:35-45)*

²⁰ Emulina, kinairarua ateva natuna alua Sebedi me natuna alua lotolu ghe mae sio ta Iesu. Me kinairarua ghe suuiaala me ghe uela va ealoanna kateva voto ta Iesu.

²¹ Me Iesu ghe uela va, “Sa ateva uaaloannaia?”

Me vause ateva oia ghe uela va, “Aghaloanna va uue va ilalua oia natughu elua, lalu toka kalakalangina tale ararimangalim eteva, kateva tale pai muenna ativilau, me kateva tale pai uaise ativilau.”

²² Iesu ghe nongola isaa oia inangari me ghe liula tani ue va, “Karika amalu kilakila amasina llo amalu kookolomi. Amalu rooroo tani ropi tale ia o kapa ateva nimmarikana etana aue aropi etana?”

Me lalu ghe uela va, “Ue, angalu rooroo.”

²³ Iesu ghe uela etairarua va, “Koronna, aue amalu ropi tale uneghi kapa ateva, me tani toka tale pai muenna o uaise ativilau, aghi karika uunguaaghi tani tau aatu. Isaa o voto uneira isaa o taumattu Tamaghi ang ghe aimonomonosiaa tau lao sio.”

²⁴ Nau eteva kasangaulu (10) disaepolo laghe nongola isaa o inangari tue me nenga alua lalu ghe kolomila Iesu, eghe sessailala. ²⁵ Iesu ghe kolo aitaueinilala me ghe uela etaira va, “Am kilakila, isaa o tau ngai toitoi tale tau ngeleka atoa, la gheelei taumattu enim uungu aanasa etaira. Me lo atoa matuutuliena ila, la gheelei saasakiaa ta taumattu ngatoa. ²⁶ Isaa o ase gheeleiaira erau mene toka elome etaimim, karika. Lo ateva taumattu eaaloanna tani namuu elome etaimim, esio euu me eghelei nongina tau ngai nonganongo anna atoa. ²⁷ Me lo ateva taumattu ealoanna tani muemueinam, etani kapuimim tau ngai uungu. ²⁸ Nongina Natuna ateva Taumattu ngateva ghe tam sio mae va la uungu etana, karika, ta ghe sio mae tani uungu etaira me tani taula maamauluaane tani ghaa oghi oroi taita me vause.”

*Iesu ghe ghelei emasinala
mata salusalu elua*

(Mak 10:46-52; Luk 18:35-43)

²⁹ Iesu me kapuna disaepolo atoa laghe kasu vulila masaliki taatara atae eJeriko, me oroeili taumattu ghe mene usiela. ³⁰ Me ghalua taumattu lalu ghe tokatoka tale sama salana atikirighi, mata salusalu ilalua. Me nau eteva lalu ghe nongola va Iesu ekasukasu emaema, me namuu ta lalu ghe kolokoloa va, “Vau eteva, io Natuna io Deivit, ualousiusi teeiengalua!”

³¹ Nau eteva taumattu ngatoa laghe nongolalue lalu ghe kolokolo, taumattu ngatoa laghe paopao rungainilalua va, “Amalu rau mene sama.” Me ilalu ghe kolokolo anamuva va, “Vau eteva, Natuna ateva Deivit, ualousiusi teeiengalua!”

³² Iesu ghe tinginala, ghe kololalue me ghe uela va, “Saa llo amalu aloanna va aghelei etaimalua?”

³³ Lalu ghe uela etana va, “Vau eteva, angalu aloanna va uoti matangalua.”

³⁴ Iesu ghe alousiusi teeilalueala, ghe posola matairarua, me arovaeaata matairarua ghe taatarala, me lalu ghe usiela.

21

*Iesu ghe kupi ssola eJerusalem
arova kingi eteva*

(Mak 11:1-11; Luk 19:28-38; Jon 12:12-19)

¹ Nau eteva ngila ghe aakalakala ejerusalem me ngila ghe rekatala tale masaliki eteva eBetpeis tale motouru eteva eOliv, me Iesu ghe suula ghalua tani kapuna disaepolo. ² Ghe uela etairarua va, “Amalu muemuela me amalu lao tale masaliki eteae ngeita taraie lao sio me arovaea ta aue amalu tara donki eteva me natuna ateva la iiri etinginailalueala. Amalu pulakailalua, me amalu maeainalua etaghi. ³ Arova teva ekolomiemalua, amalu ue etana va, ‘Vau eteva eanna tani ghelei uunguaane etairarua me aue arovaearaa nonga ta etau velulalua.’”

⁴ Isaa o voto ghe lutula tani ghelei inangarina propete ateva ghe kaurekatila, ⁵ ghe uela va:

“Auliaala ta masaliki taatara ateae eSaeon,

‘Am tara kapuimim kingi eteva emaemae etaimim,
esiosioaili euu me eiilou tale donki,

lo ateva donki aliki taita ia.’”

⁶ Disaepolo alua lalu ghe kasula tani ghelei voto Iesu ghe auliaala etairarua. ⁷ Lalu ghe maeaa sio donki eteva kinna ia me natuna ateva, me lalu ghe alokoi saela uneirarua aiaasae ngeleka etairarua, me Iesu ghe laa sae toka etairarua. ⁸ Oroianaaaili taumattu laghe lullu velu uneira aiaasae ngeleka me laghe pulepule alokoi tapaa salana, me katoa laghe saisai laa ngai me laghe aalokoi sio tapaa salana. ⁹ Lo atoa taumattu laghe muemueainia me lo atoa laghe aimuli etana laghe ovaova tani ue va,

“Tau sae ararina ateae Natuna ateva Deivit!”

“Niarangise aue etoka ta lo ateva emaemae tale ararina ateae Vau eteva!”

“Tau sae ararina ateae God iaaili epona!”

¹⁰ Nau eteva Iesu ghe kupi ssola eJerusalem, taumattu ngakapa ejerusalem ghe soghieiniela, me laghe aikolomieinila va, “See okae?”

¹¹ Me lo atoa laghe kasukasu teeia laghe ue va, “Iesu oke, propete ia me aNasareti ia eGalilii.”

Iesu tale ale manga

(Mak 11:15-19; Luk 19:45-48; Jon 2:13-22)

¹² Iesu ghe kupi ssola nongina ale ngeleka atiulu tale ale manga ateva me ghe sungi vella lo atoa laghe aaitauaa me laghe poppoli. Ghe sau etakila uneira tevoo atoa lo atoa laghe aikolikoliaa viliki veu me uneira aitokatoka lo atoa laghe aaitauaa ghila valusu va la poli. ¹³ Ghe uela etaira va, “Laghe pitila tale Uru ngai Manga ateva va, ‘Aleghi ale manga ateva la ghaseasea va ale ailooloo sae ia.’ Me am ngam eleiela arova ‘aleira ale niaisulia ia tau niainao atoa.’”

¹⁴ Mata salusalu etoa me tangorengorena atoa laghe mae sio tani tarai tale ale ngeleka atiulu tale ale manga ateva, me ghe ghelei emasinalala. ¹⁵ Namuu ta pristi etoa me tau ngai aapasunga atoa tale inangari nipaopao laghe tarala masi voto ghe ghelei me vaalua aliki etoa laghe aore tale ale ngeleka atiulu tale ale manga ateva tani ue va, "Tau sae ararina ateeae Natuna ateva Deivit," me ghe sessai etinginailala.

¹⁶ Me laghe kolomila Iesu va, "Unonganongo llo aliki etoa la ghauiliaa?"

Iesu ghe liula me ghe uela va, "Ue. Me koti karika am ghe ritila inangari laghe piti elokoila laghe uela va,
"Ughe aimonomonosiaala lutu ngaliki etoa
va aue la tau sae ararim ateeae."

¹⁷ Ghe kasu vulilala me ghe kupi ghoala tale masaliki taatara ateeae me ia o voo ngateva ghe tokala tale masaliki eteva eBetani.

Iesu ghe kasikienaaai eteae (fig)
(Mak 11:12-14, 20-24)

¹⁸ Elue talaua poopooa ghe mene laa soso tale masaliki taatara ateeae me ang ghe maamaloo. ¹⁹ Me ghe tarala fig ateeae ghe tiitingina tale sama salana atikirighi me ghe lao akalakalangina sio etana me karika righi uenena, nim uruena ia, me ghe uela ta fig ateeae va, "Karika aue umene kuneaa righi uem." Me arovaearaa ta fig ateeae ghe mmatela.

²⁰ Nau eteva disaepolo atoa laghe tarala isaa o voto laghe soghiaala me laghe kokkolomi va, "Vaalua me arovaearaa nonga ta emmatela?"

²¹ Iesu ghe liula me ghe uela etaira va, "Aghaulia ngakoronna etaimim va arova am aikaiaia me karika nannaaimim eghaaghala, karika aue am ghele ghelei nonga voto nongina llo elutula tale fig ateeae, ta am rooroo tani ue ta ia o motouru eteva va ekasu me eghoa katuu elamana me aue ghele ghelei. ²² Arova am aiesoaa, aue am ghaa saa ase voto aue am kokkolomi tale nilooloo sae."

Nikokkolomi tale matuutulienaaane Iesu
(Mak 11:27-33; Luk 20:1-8)

²³ Iesu ghe kupi ssola tale ale ngeleka atiulu tale ale manga ateva, me nau ghe tiuaala tani apasunga, namu ngatoa ta pristi etoa me lo atoa laghe naanamuu ta taumattu ngatoa laghe mae sio etana, me laghe kolomiela va, "See ghe tau aatu sio matuutulienaa etam, me see ghe sungiola tani mae ghelei isaa oia voto?"

²⁴ Iesu ghe liula me ghe uela etaira va, "Akolomiem mua tale kateva nikokkolomi, me arova am liu ia o nikokkolomi eteva, aue aghauliaa va see ghe tau mae sio matuutulienaa etaghi. ²⁵ Ia Jon ghe asuu taumattu, see ghe tau lao sio matuutulienaa etana, taumattu ngatoa, o God?"

Me laghe tiuaala tani aissakea elome etaira. Laghe ue va, "Arova ita ue va, 'God,' aue eue teeita va, 'Me vaalua me karika am ghe aaiesoaa etana?' ²⁶ Me arova ita ue va, 'Ta nim taumattu,' ita maamatauta taumattu ngatoa poli ila akapa la ue va Jon propete ia."

²⁷ Liuna avalua o laghe liula me laghe uela ta Iesu va, "Karika ami kilakila."

Me Iesu ghe uela etaira va, "Aghi tee, karika aue aghauliaa etaimim va see ghe tau mae sio matuutulienaa etaghi.

Kiukiu niaimatoonga ateaetue me nenga alua

²⁸ “Vaalua am annaa tale kiukiu eteae toko? Kateva taumattu natuna taita alua ghe lao sio ta mua ateva, me ghe uela va, ‘Natughu, laa uungu tale utani uaeni.’

²⁹ “Me mua ateva ghe uela etana va, ‘Karika aue alao,’ vara me ghe nnaa aioghioghiaala me ghe lao sio.

³⁰ “Me tamairarua ghe mene auliaala isaa o inangari ta mene aiaaghalauna ateva aliki. Ia o lo ateva aliki ghe liula me ghe uela va, ‘Ue, namu ngateva, aue alao,’ me karika ghe lao sio.

³¹ “See ta ngetairarua ghe gheleila llo tamairarua ghe aloanna?”

Laghe liula me laghe uela va, “Aitiutiuteteva.”

Me Iesu ghe uela etaira va, “Aghaaulia ngakoronna etaimim va aighaa takis atoa, me vause ngetapaa salana atoa ngeila muemueinam sso tale ararimangalina ateva God. ³² Poli Jon ghe mae sio etaimim tani apasunga salana ghulughuluena, me karika am ghe aiesoaa llo ghe auliaala, nim aighaa takis nonga atoa me vause ngetapaa salana atoa laghe aiesoaa. Me am ghe taatara poi voto me karika am ghe nanna ngaioghioghiaa me am ghe aiesoaa etana.

Kiukiu niaimatoonga tale sesa tau ngeutana atoa laghe aitaraa utani uaeni etingiu

(Mak 12:1-12; Luk 20:9-19)

³³ “Am mene nongo kateae kiukiu niaimatoonga. Kateva taumattu ghe pasala utani uaeni etingiu tale kosane ateva, me ghe iri taliaala valavala ateaetue me ghe kaila aiposooa uaeni eteva, me ghe atulula atiketike ateva, me ghe tauetue lao sio ta katoa tau ngeutana tani aitarainia, me ghe kasu emasaula. ³⁴ Nau utana atingiu ghe massola, ghe suula kapuna tau ngai nongonongo anna atoa tani laa ghaa righi uenenna utani uaeni etingiu.

³⁵ “Lo atoa laghe aitaraa utana atingiu laghe kune atokailala: laghe paru emaamatela kateva, me laghe uvi ematela kateva, me aiaakotonna ateva laghe osaiela. ³⁶ Me ghe mene suu tau lao sio mene katoa tani kapuna tau ngai nongonongo anna etaira, oroiaaira elaulau lo atoa laghe lao akasina sio. Tau ngai toi utana atingiu laghe ghelei teeilala voto nongina lo atoa laghe muemueainilala. ³⁷ Airuuruu ghe suula natuna ateva tani lao etaira, poli ghe ue va, ‘Aue la oneoneaa natughu eteva.’

³⁸ “Me nau tau ngai toi utana atingiu laghe tarala natuna ateva, laghe sama aitaauaala elome etaira va, ‘Lo ateva aue eghaa utana atingiu okae. Ita laa uvi ematea me ita ghaa voto aue peina.’ ³⁹ Mausina avalua o me laghe ghaiela me laghe sau velue ghoala eleka tale utani uaeni etingiu me laghe uvi emateala.

⁴⁰ “Liuna avalua o me lo ateva umana ia utani uaeni etingiu nau erekata, sa ateva aue egheleia ta lo atoa laghe aitaraia.”

⁴¹ Laghe liula me laghe uela va, “Aue eghelei voto sesaaili tale ila o sesa taumattu ngatoa, me aue emene taula utani uaeni etingiu ta mene katoa ppae lo atoa aue la taula uaeni etana nau la pariki.”

⁴² Iesu ghe uela etaira va, “Koti am ghe ritila tale Uru ngai Manga ateva, eue va,

“‘Atu eteva tau ngai atulu ale atoa laghe ratiela
ghe aitiutiula tale atu ekapa atoa tani suei ale ateva.
Vau eteva ghe gheleila isaa o voto,
me taataraane masinaaili ta mataita.’

⁴³ “Liuna avalua o me aghaauliaa etaimim va ararimangali eteva epona liu aue God eghaa velua etaimim me emene tauela ta lo atoa taumattu aue la nongo usilainia. ⁴⁴ Lo ateva aue ekatuu saoaa tale ia o atu eteva aue etakotokoto, me arova atu eteva ekatuu saoaa etana aue etaputuputu.”

⁴⁵ Nau eteva namu ngatoa ta pristi etoa me Paresi etoa laghe nongola ta Iesu ghe auliaala ia o kiukiu niaimatoongana ateae, laghe kilala va ghe aauliaa teeila. ⁴⁶ Laghe paepae tikirighi salana tani kuneia, me laghe maamatauta taumattu ngatoa poli ila laghe ue va Iesu propete ia.

22

Kiukiu niaimatoongana ateae tale ninamanama ateae tale nilai eteae (Luk 14:15-24)

¹ Iesu ghe mene poppoaa etaira tale kiukiu niaimatoonga, ghe ue va, ² “Ararimangali ngepona liu eteva nonginaaili kingi eteva ghe aimonomonosiaala ninamanama ateae tale nilai eteae ta natuna. ³ Ghe suula kapuna tau ngai nonganongo anna atoa tani laa ghauliaa ta kolokolona atoa tale ia o ninamanama ateae va la mae, me karika laghe annala tani mae.

⁴ “Me ghe mene suula katoa tani kapuna tau ngai nonganongo anna. Ghe uela etaira va, ‘Am laa ue ta kolokolona atoa va: Ngaghai monomonosiaala inana. Kieghi vulumakao atoa taita ila, me morona atoa natu vulumakao ngila uvila me pasila me isaa akapa voto ange aimonomonosiaala. La mae tale ninamanama ateae tale nilai eteae.’

⁵ “Me karika laghe anna tani nongo me laghe aitiuaala. Kateva ghe lao sio ta ngumane, me kateva ghe lao sio tani ghelei voto aue eghaa viliki veu etana. ⁶ Me mene katoa laghe poso atokala kapuna tau ngai nonganongo anna atoa king me laghe ghelei teeilala voto karika masina, me laghe ubi ematelala. ⁷ King ghe sessaiela, me ghe suula kapuna tau ngai uvii etoa laghe lao sio tani tturu tau ngai uvii emate atoa, me laghe suluila masaliki taatarairaa ateae.

⁸ “Me ghe uela ta kapuna tau ngai nonganongo anna atoa va, ‘Ninamanama ateae tale nilai eteae ange aimonomonosiaala, me lo atoa aghe uela va la mae karika masina ila tani mae. ⁹ Am lao sio tapaa salana me am kolo sa ateva taumattu am rooroo tani tara.’ ¹⁰ Liuna avalua o me tau ngai nonganongo anna atoa laghe lao sio tapaa salana me laghe kolola saa taumattu laghe roola tani tara, sesa me masina, me ale ngai namanama atiulu ghe pasula tale taumattu.

¹¹ “Me vara kingi eteva ghe kupi ssola tani tara taumattu ghe mae sio me ghe tarala kateva taumattu, karika ghe aasae koloso nilai eteae. ¹² Me ghe kolomiela va, ‘Kapughu, vaalua ukupi sso mae nau karika uaasae teva koloso nilai?’ Me taumattu ngateva karika ghe samala.

¹³ “Me king ghe auliaala ta tau ngai uungu etoa va, ‘Am irila kkena me nimane, me am sau velue ghoa eleka tale aavoona me eghoa toka ngangngala me aingeresia ngalunggaluna.’

¹⁴ “Poli oroi la kolokolo me malaki llo la suisuitoonga.”

*Tani tau lao takis ta Siisa
(Mak 12:13-17; Luk 20:20-26)*

¹⁵ Vara me Paresi etoa laghe kasula tani laa ghaimonomonosiaa salana vaalua tani ghaa Iesu tale inangarina. ¹⁶ Laghe suula kapuira disaepolo atoa, me kapuna tee atoa Herot tani lao etana. Laghe uela etana va, “Tisa, io nau ekapa atoa uaauliaa nonga voto koronna me voto uaapasunga tale salane God, koronna ia, karika unannangaili saa llo taumattu ngatoa la annaa, me karika utaatara taumattu tale naanamungaane me uunguaane. ¹⁷ Auliaala etaimami io vaalua nannaam. Vaalua? Masina tani tau lao takis ta Siisa?”

¹⁸ Iesu ghe kilakila voto laghe ailoeaala karika masina, me ghe uela etaira va, “Am usimaghalua am, vaalua me am aloanna tani tootoongainaghi? ¹⁹ Am apasungaala viliki veu etivilau etaghi am tautau ta Siisa.” Me laghe maeaa sio viliki veu etivilau ta ngetana. ²⁰ Me ghe kolomilala va, “See tootoona ateva me ararina atae o?”

²¹ Laghe liula me laghe uela va, “Siisa.”

Me ghe uela etaira va, “Am taula llo voto kanna Siisa ta Siisa, me voto kanna God ta God.”

²² Laghe soghiaala isaa o inangari laghe nongola, liuna avalua o me laghe kasu vuliela.

*Nikokkolomi tale nilai nau nimene totu tale nimate
(Mak 12:18-27; Luk 20:27-40)*

²³ Tale ie nonga o nau eteva, Sadiusi etoa, karika la ghaaiesoaa tale nitotu tale nimate, laghe mae sio tee uneira nikokkolomi eteva. ²⁴ Laghe uela va, “Tisa, Moses ghe pitila etaimami va, arova taita ateva lailai ia emate me karika righi natuna, nengane aue eghaa vause ateva eraue vuluela, tani alutu natuna tuena. ²⁵ Ghaitu (7) tue me nenga laghe tokatoka teeiemami. Aitiutiu eteva ghe laila, me ghe matela. Me, poli karika righi natuna, nengane ghe mene ghaala vausenna ateva. ²⁶ Ase voto ateva o ghe mene lutula ta aiaaghluene ateva taita me kotonna ateva, me ghe laa sio ruu tale aiaaghaituna ateva. ²⁷ Airuuruu me vause ateva ghe matela. ²⁸ Nau nitotu tale nimate, see aue evausenna ia ta ila o tue me nenga ghaitu, poli ila akapa laghe laila etana?”

²⁹ Iesu ghe liula me ghe uela etaira va, “Nannaaimim karika ghulughuluena, poli karika am kilakila Uru ngai Manga ateva me sarasarakaniaane God. ³⁰ Nau nitotu tale nimate, taumattu karika aue elai; aue la nongina ensolo atoa epona liu. ³¹ Me tale tottotuaaira lo atoa matena ila, karika am ghe ritila voto llo God ghe auliaala etaimim? ³² ‘Aghi kapuira Goto ieghi Abraham, Aisiki me Jekop.’ Karika va kapuira Goto ia matena atoa ta kapuira Goto ia lo atoa maulue ila.”

³³ Nau taumattu ngatoa laghe nongola laghe soghiaala llo ghe aapa-sunga.

*Mata ngemua ateva inangari nipaopao
(Mak 12:28-34; Luk 10:25-28)*

³⁴ Paresi etoa laghe velu eitauaala nau laghe nongola va inangarina Iesu ghe ghelei epaavoola Sadiusi etoa. ³⁵ Kateva etaira, muennaaili ia tale inangari nipaopao, ghe toongiela tale ie toko nikokkolomi eteva.

36 Ghe uela va, “Tisa, sa ateva inangari tale isaa o inangari nipaopao namuu?”

37 Jesu ghe liula me ghe uela va, “Uaielousiaa Vaum ateva kapum Goto ia tale urunguitanim me tale maamauluaam me tale nannaam.”

38 Aitiutiu eteva o, me namuu ia tale isaa akapa inangari nipaopao.

39 Me aiaaghuluene ateva, nongina aitiutiu eteva, ‘Uaielousiaa taumattu ngateva kalakalangina ia etam, nongina uaaielousieinio.’ **40** Isaa akapa inangari nipaopao me lo inangari propete atoa laghe auliaala, etani laolao aitauaa tee ilalua o inangari nipaopao alua.”

See tuvuna ia Mesaea?

(Mak 12:35-37; Luk 20:41-44)

41 Tale ie nonga o nau eteva Paresi etoa laghe velu eitauaala me Iesu ghe kolomilala va, **42** “Vaalua am annaa ta Mesaea ngateva? See tuvuna ia?”

Laghe liula me laghe uela va, “Tuvuna ia Deivit.”

43 Me ghe uela etaira va, “Me vaalua me Deivit, Spiriti eteva ghe tokala etana, me ghe kolola ia o taumattu ngateva va Vau ia? Ghe uela va,

44 “Vau ngepona ateva ghe uela ta kapughu vau eteva va,

“Toka siola tale pai muenna ativilau,

lomose ta aghatoka sio lo atoa la sessa teeio euu,

me uatingina saoaa kkem etaira.”

45 Arova Deivit ghe kolokoloa va ‘Kapuna vau eteva,’ vaalua me ghe mene nim tuvuna ia?” **46** Karika teva ghe liula tani mene auliaa righi inangari. Ghe tiuaala o, karika teva ghe mene anna tani kolomia tale mene righi nikokkolomi.

23

Aue esesaaili ta tau ngai aapasunga ngatoa tale inangari nipaopao me Paresi etoa

(Mak 12:38-40; Luk 11:37-52; 20:45-47)

1 Vara me Iesu ghe uela ta taumattu ngatoa me kapuna disaepolo atoa va, **2** “Tau ngai aapasunga ngatoa tale inangari nipaopao me Paresi etoa la tokatoka tale unna aitokatoka ateva Moses. **3** Liuna avalua o me am nongo usilaa me am ghelei ekapa voto la aauliaa etaimim, me am rau mene aimuli tee gheeleiaaira, poli voto la ghaauliaa karika la gheelei. **4** Inangariira aanasailili tale taumattu ngatoa tani aimuli tee, nongina la aatoka sae voto maamatana karika kaakaai me iriiri emasina, ta pappaira taumattu ngatoa, me karika la aaloanna tani sausi tani sau.

5 “Isaa akapaaili voto la gheelei va taumattu ngatoa la taraila. La gheelei enamuu uneira lutu ngaikaai me la pitipiti inangarina ateva God me la kaakaai sio etana, me kalio atiulu la aakou uruira etana, euu tale aighoughou ghaata, la aavukala voto ghaata la kolokolo va tassel, tani apasunga va ila tau ngai kkauua ila. **6** La ghaaloannaaili va taumattu ngatoa la oneoneainila, me la ghaaloannaaili tani toka tale uneira aitokatoka namu ngatoa elome tale ale nivelu eitauaa, me nongina namu ngatoa la namanama. **7** La aloanna va taumattu ngatoa la soula tale masi inangari nongina oroi taumattu etokatoka me la asela va Rabae.

22:37: Diut 6:5. **22:39:** Lev 19:18; Mat 7:12. **22:40:** Rom 13:10; Gal 5:14. **22:42:** Jon 7:42. **22:44:** Sams 110:1; Mat 26:64. **23:3:** Mal 2:7-8. **23:5:** Mat 6:1; Eks 13:9; Diut 6:8; Nam 15:38-39.

8 "Me la rau mene aseam va Rabae, poli kateva nonga vauimim ateva,* me am tue me nenga am. 9 Me am rau mene ase teva taumattu tale kosa ateva oia va tamaimi ia, poli kateva nonga Tamaim ateva ia epona liu. 10 Me la rau mene aseam va tau ngai aapasunga iem, poli kateva nonga tau ngai aapasunga ngateva, ia Mesaea ia. 11 Me lo ateva namuu ia elome etaimim, ia kapuimim tau ngai nongonongo anna ia. 12 Lo ateva taumattu eaaloanna tani saeaa ararina atae, ararina ataeue esio euu, me lo ateva taumattu esioaa nannaane euu, ae ararina ataees esae epona.

13-14 "Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Karika am roo tani tau velu katoa taumattu tani sso tale ararimangali ngepona liu eteva me am, karika am kupikupi sso.†

15 "Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am kasukasu ekapa see elae me elamana tani ghelei kateva taumattu ejiu, me nau angam ghaaiela, am gheeleia va etau ngai uungu ta raroai eteva, me sesa uunguaane elaulau uunguaaimim.

16 "Aue esesaaili etaimim, tau ngai katula ngatoa mata salusalu iem! Am ue va, 'Arova teva eauliaa inangarina tani ue va, "Koronnaaili tale ale manga ateva," isaa o inangari karika righi malloeanina, me arova teva eauliaa inangarina tani ue va, "Koronnaaili tale golo tale ale manga ateva," etani ghelei nongina eauliaa.' 17 Am mata salusalu iem me alokapakapa am! Sa ateva namuu ia: golo, o ale manga ateva, eaamanga golo? 18 Me am ue tee va, 'Arova teva eauliaa inangarina tani ue va, "Koronnaaili tale liu nighelei aiaavusuvusuena," isaa o inangari karika righi malloeanina, me marova teva eauliaa inangarina tani ue va, "Koronnaaili tale isaa o voto epona tale liu nighelei aiaavusuvusuena," etani ghelei nongina eauliaa.' 19 Am mata salusaluna am! Sa ateva namuu ia: voto epona la maemaeaa tani ghelei aiaavusuvusuena, o liu nighelei aiaavusuvusuena ateva eaamanga voto o? 20 Liuna avalua o me lo ateva eauliaa inangari tani ue va, 'Koronnaaili tale liu nighelei aiaavusuvusuena me voto akapa etokatoka epona etana. 21 Me lo ateva eauliaa inangari tani ue va, 'Koronnaaili tale ale manga ateva,' eaulia ngakoronna ta ale manga ateva me ta God, poli God etokatoka tale ale manga ateva. 22 Me lo ateva eue va, 'Koronnaaili epona liu,' eaulia ngakoronna tale unna aitokatoka ateva God me lo ateva etokatoka etana.

23 "Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am tani gheelei emasinaaili aiaasokolo tale uneimim lutu voto ghaunaaili am ghaaghhaa eutana, me karika am uusilaa maamasinaane inangari nipaopao nongina voto ghulughuluena me nialousiusi me uungua niaikaaiaa. Isaa

* **23:8:** Kasina uru ngai laghe pitila, laghe mene uela va, ia Mesaea ia. **23:11:** Mat 20:26; Mak 9:35; Luk 22:26. **23:12:** Job 22:29; Nitoka 29:23; Luk 14:11; 18:14. † **23:13-14:** Kasina uru ngai laghe pitila, laghe uela va, 14 Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am ghaaghhaa aitautauaa peiira vause raue vulu etoa, me am kamekame tani ghelei aluseaili nilooloo sae. Nau eteva am lao tale niaiskei, ae am ghaa namungaili nimmarikana. Utara Mak 12:40; Luk 20:47. **23:16:** Mat 15:14. **23:22:** Ais 66:1; Mat 5:34. **23:23:** Lev 27:30; Maeka 6:8.

o voto am roo tani ghelei me karika am mene kkaluaa isaa o voto ghaunaaili. ²⁴ Alousiusi etaimim, tau ngai katula ngatoa mata salusalu iem! Me am nongina taumattu ngateva ghe anna tani ghaa velu looloo arighi tale ropina manu, me ghe tam taatara kamolo ateva tale ropina manu, me ghe ropi teeila.

²⁵ “Aue esesaaili etaimim, tau ngai aapasunga ngatoa tale inangari nipaopao me Paresi etoa, usimaghala am! Am gheelei eraarangisana eleka tale kapa ateva me pelete ativilau, me elome pasu ia tale nikuruetu me nitam nanna ngamasina. ²⁶ Paresi etoa am mata salusalu iem! Am gheelei eraarangisana akasina elome tale kapa ateva me pelete ativilau, me auena eleka emene raarangisana tee.

²⁷ “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Am nonginaaili liu niaikkaia ngateva la porapora araarangisanaailila eleka me taataraane masinaaili ia, me elome, pasueili ia tale riu taumattu matena me voto atoa karika raarangisana ila. ²⁸ Tale ia o salana atikirighi, eleka etaimim am aapasunga ta taumattu ngatoa va ghulughuluena am, me karika poi, ta elome etaimim pasueili ia tale usimaghala me sesa voto.

²⁹ “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Am, am atuutulu liu niaikkaiaa uneira propete atoa me am aamolumolu atu niaimatoonga uneira ghulughuluena atoa, ³⁰ me am ue va, ‘Marova ita ghe tokatoka emua arau nau ta tuvuuta atoa, karika aue ita ghe usi tani uvi emate propete atoa.’ ³¹ Am aaulia ngakoronna va tuvuim atoa laghe uvi ematela propete atoa, me am tee am uusilaa uunguaaira tuvuim atoa. ³² Gheleila am me am laa ruu emasina sa ateva tuvuim atoa laghe tueiniela!

³³ “Otuena am me natuira am otuena atoa! Vaalua aue am kasu vuli sessaiaane God tale nau niaisakei eteae? ³⁴ Liuna avalua o me aue asuu propete atoa, me tau ngalomasaanga, me tau ngai aapasunga ngatoa. Katoa etaira aue am uvi ematela me am avukalaila sae tale aikotoo, me katoa aue am uetaila tale aleimim ale nivelu eitauaa, me katoa aue am laa paela see tale masaliki taatara atoa. ³⁵ Liuna avalua o me aue am ghaa sesa ngaipolipoli tale taumattu ghulughuluena tale kosa ateva am ghe uvi ematela. Etiitiuaa ta ghulughuluena ateva taumattu Eibol me eruuruu ta Sekaraea natuna ia Barakaea, ia o am ghe uvi emateala elome tale ale manga ateva me tale liu nighelei aiaavusuvusuena ateva. ³⁶ Aghaaulia ngakoronna va sesa ngaipolipolina isaa oia voto aue elutu tale lo ateva oia vituu.

³⁷ “Jerusalem, Jerusalem! Ughe uvi ematela propete atoa, ughe osala tau ngai kasuaa inangarina atoa God tale atu! Ghaisaata aghaloanna tani atoka aitaueinam kapughu taumattu ngatoa, nongina kina paolo ateva eaakou natuna atoa tale kaekaena, me karika am aaloanna! ³⁸ Liuna avalua o, me am nongola! God aue ekasu vuli alena ale manga ateva, me masalikiimim taatara ateae aue taunganua. ³⁹ Poli aghaauliaa etaimim va karika aue am mene taraiieghi, lomosi ta nau eteva aue emae, me aue am ue va, ‘Niarangise ta lo ateva emaemae tale ararina ateae Vau eteva.’ ”

24

*Aimatootoongana tale airuuruu tale nau
(Mak 13:1-31; Luk 21:7-33)*

¹ Iesu ghe kopi ghoala tale ale manga ateva me ang ghe kasukasu me kapuna disaepolo atoa laghe mae sio etana. Laghe anna tani apasunga ale atoa tale ale manga ateva. ² Iesu ghe kolomilala va, “Am taatara isaa oia ale? Koronnaaili aghaauliaa etaimim va karika teva atu aue etoka saoaa ta mene kateva. Aue taumattu ngatoa la puli reerekata isaa akapaaili oia voto.” ³ Nau Iesu ghe toka siola tale motouru eteva eOliv me kapuna disaepolo atoa laghe mae sio tani kolomi einaoa va, “Auliaala etaimami, lovisaa isaa oia voto elutu me saa righi aimatoonga aue elutu tani apasunga maemaeaam me airuuruu tale kosa ateva?”

⁴ Iesu ghe liula me ghe uela va, “Am paniem teva taumattu erau kameam. ⁵ Poli oroi taumattu aue la mae tale ararighi eteae me la ue va, ‘Aghi Mesaea ieghi,’ me aue la kame oroi taumattu. ⁶ Aue am nongo niaiuvii me kiukiuna me am rau mene matauta isaa o voto, poli isaa o voto aue elutu me airuuruu tale kosa ateva auena emae. ⁷ Patunganua atoa aue la ghaiuvieinila me ararimangali etoa aue la ghaiuvieinila tee. Nimaloo atoa me rukeruke aue la lutu tale kasina patunganua tale kosa ateva. ⁸ Isaa o voto aue enim aitiutiui tale nimmarikana, nongina mmarikeana egħaagħhaa kinna ateva aliki eteva nau elutulutu.

⁹ “Me aue la kuneiem me la tauem lao tani għaa nimmarikana me aue la uvi emateam. Ila akpa patunganua atoa aue la ssa teeiem poli ararighi eteae. ¹⁰ Tale ia o nau eteva, oroieili taumattu ngatoa aue la ogħi vulu uneira niaikaiaa, me aue la aissa elome etaira, me aue la aitaueinila lao ta tau ngai ssateeira atoa. ¹¹ Me oroieili propete kamekame atoa aue la kaurekati me aue la kame oroieili taumattu. ¹² Poli ssavoto ateva aue enamungaili me niaielousi eteva tale oroi taumattu aue ekapa. ¹³ Me see etingina akorokorongana tale unna niaikaiaa tale airuuruu, maamauluaane aue esaanga. ¹⁴ Me ia oia masi kiukiu eteva tale ararimangali eteva epona liu, aue la ppooa ngakapaie see tale kosa ateva va taumattu ngakapa atoa aue la nongoa, vara me airuuruu tale kosa ateva evira mae.”

¹⁵ Iesu ghe mene auliaa tee lao sio va, “Kasina nau aue am tara voto propet Deniol ghe auliaala, va voto sesaaili aue elutu elome tale ale manga ateva, me egħelei taumattu ngatoa la kasu vulia me ale manga ateva aue enim toka (lo ateva taumattu aue eriti aue alona aue masaanga). ¹⁶ Nau am tara isaa o voto elutu, lo atoa elome ejjudia am ilou sae tale motouru. ¹⁷ Lo ateva taumattu etokatoka eleka* tale ale ateva, erau mene kopi sso va esso għaa righi ghinnanina tanganuena. ¹⁸ Karika mene teva taumattu eutana emene ogħi lao tanganuena tani laa għaa unna aiaasae ngeleka. ¹⁹ Aloususi ta lo atoa la suusunuku me lo atoa la sussu tale isaa o nau! ²⁰ Am looloo sae va am rau mene ilou vuli niaiuvii eteae tale nau kkaili o tale nau manga ateva. ²¹ Tale isaa o nau taumattu ngatoa aue la għaa nimmarikana namungaili, aue elau nongina emua arau tale aitiutiui tale kosa ateva me nau ghaine, me auena karika aue mene righi voto avalua o elutu. ²² Me marova

24:2: Luk 19:44. **24:5:** Mat 24:23-24; 1 Jon 2:18. **24:9:** Mat 10:22. **24:11:** Mat 24:5, 24; 1 Jon 4:1. **24:13:** Mat 10:22. **24:14:** Mat 28:19. **24:15:** Den 9:27; 11:31; 12:11.

24:17: Luk 17:31. **24:17:** Tale inangari nge Grik, eue va etokatoka epona tale pungani ale ateva. **24:21:** Den 12:1.

God karika ghe nnaala tani atukuna isaa o nau, karika teva ue ghele saanga. Me poli enannangaili isaa o taumattu ghe suoongaala, sesa nau ue etukuna.²³ Tale isaa o nau, arova teva eue etaimim va, ‘Tarala! Mesaea ngateva toko,’ o, ‘Ie teke,’ am rou mene aikaaiaa.²⁴ Ta poli katoa taumattu ue la mae me ue la kame va, ‘Aghi Mesaea ngateva’ mene katoa ue la kame va, ‘Aghi propete ieghi,’ ue la mae la ghelei aimatootoongana me voto tani apasunga sarasarakaniaira tani kame taumattu Vau palepale ghe suoongaala, kotiva isaa o voto ue eroo.²⁵ Am nongola, llo oia ngaghe aulia ngamuemue alokoila etaimim, me auena elutu.

²⁶ “Liuna avalua o me arova la ue etaimim va, ‘Ie teke tale voto ateva karika righi taumattu etana,’ karika am mene lao. Me marova la ue va, ‘Ie toko elome tale ale atiulu,’ am rau mene aiesoaa.²⁷ Poli nongina ravaravaia ateva eramerame aloi lao ta sinaka esae me sinaka esuu, ue enongina maemaeaane Natuna ateva Taumattu ngateva.²⁸ Kona eaa taumattu matena easoaso, taotaokko atoa la veluelu eitauaa.

²⁹ “Nongina Uru ngai Manga ateva eue va, ‘Nau isaa o sesa nau elange, arovaengaili ta

“ “sinaka ateva ue esaurrom
me ulana ateva karika ue emallanga
me katto atoa ue la katuu
me voto atoa korokorongana ila elomarase ue la ghaisiisia.” ”

³⁰ “Tale ia o nau eteva aimatootoongane Natuna ateva Taumattu ngateva ekauerekati elomarase. Patunganua akapa atoa tale kosa ateva ue la alousiusi, nau la tara Natuna ateva Taumattu ngateva ue emae tale urukookoo elomarase, tee sarasarakaniaane me kinatama mallangina ateva.³¹ Me tauue ateva ue eaangari enamungaili, me ue esuu kapuna ensolo atoa tani laa kolo aitauaa taumattu ngatoa, ghe suuilala va kapuna ila tale isaa akapanaaili patunganua tale kosa ateva.

³² “Am rooroo tani ghaa alomasaanga tale kiukiu niaimatoonga tale fig ateeae. Nau eteva am tara ai eteae ange tulutulu, am kila va masi nau tale sinaka ateva ange kalakalaala.³³ Liuna avalua o, nau am tara isaa o voto, ue am kila va ange kalakalanginala, tapaa ngatamana.³⁴ Aghaaulia ngakoronna ta lo ateva oia vituu va karika poi ue ekapa me isaa o voto ue elutu.³⁵ Elomarase me kosa ateva oia ue ekapa me inangularghi karika poi ue ekapa.

*Karika teva ekilakila nau
isaa o voto ue elutu*
(Mak 13:32-37; Luk 17:26-30, 34-36)

³⁶ “Me karika teva taumattu ekilakila ia o nau eteva me aoa ngateva tee, tee me ensolo atoa epona liu me Natuna,[†] ta Tamaghi nonga.³⁷ Nongina ta nau Noa, ue emene nongina maemaeaane Natuna ateva Taumattu ngateva.³⁸ Tale isaa o nau auena manu ghagga ateva ghe mae, taumattu ngatoa laghe namanama me laghe ropiropi me taita me vause atoa laghe lailai me ghe ghaala nau eteva Noa ghe kupi ssola tale anua ateva.³⁹ Me karika laghe kilakila sa ateva ue ghe lutu, lomosi

24:23: Mat 24:5. **24:24:** Diut 13:1-3; 2 Tes 2:8-9; Aotu 13:13-14. **24:26:** Luk 17:23-24.

24:27: Mat 24:37-39. **24:28:** Luk 17:37. **24:29:** Ais 13:10; 34:4; Esik 32:7; Joel 2:10, 31;

2 Pita 3:10; Aotu 6:12-13. **24:30:** Sek 12:10; Aotu 1:7; Den 7:13. **24:31:** 1 Ko 15:52; 1 Tes

4:16. **24:34:** Mat 16:28. **24:35:** Mat 5:18. **24:36:** Apos 1:7; 1 Tes 5:1-2. **† 24:36:**

Kasina uru ngai laghe pitila, karika laghe pitila me Natuna. **24:37:** Aitiuti 6:5-8. **24:39:**

Aitiuti 7:21-23.

ta manu ghagga ateva ghe mae sio, me ghe gga vellala. Isaa o voto aue nonginaaili maemaeaane Natuna ateva Taumattu ngateva.⁴⁰ Taita alua aue lalu uungu eutana: kateva aue la ghaaia me kateva aue la rati etokaia.⁴¹ Ghalua vause aue lalu moomonnaa ngaputuputu katu uiti tani ghelei palaoa: kateva aue la ghaaia, me kateva la rati etokaia.

⁴² “Liuna avalua o, me am anguu taatara ta poli karika am kilakila nauna ateva Vauimim ateva aue emae etana.⁴³ Am kila llo toko va, marova taumattu ngateva ekila va tau niainao ateva aue emae ainao tale alena ateva, aue etoka anguenguu me karika aue eta velu alena ateva va tau niainao ateva errutia me ekupi sso.⁴⁴ Liuna avalua o me am tee, am aimonomonosiaa poli Natuna ateva Taumattu ngateva aue emae tale ia o nau eteva karika am nannaa va aue emae etana.

⁴⁵ “Lo ateva tau ngai uungu egheelei emasina uunguaane me alo-masaanga ia tani aitaraa voto, vauna ateva erooro tani atokaia tanganuena tani aitaraa kapuna tau ngai uungu etoa me tani taula aneira inana tale nau nighaa inana.⁴⁶ Niarangise aue etoka tale lo ateva tau ngai nongonongo anna, vauna ateva etara va egheelei isaa o niuungu, nau eteva ekiriaa mae.⁴⁷ Aghaaulia ngakoronna etaimim va aue eatokaia va eaitaraa ngakapaaili peina.⁴⁸ Me arova tau ngai nongonongo anna ateva uunguaane sesa, aue eue ta urunguitanina ateva va, ‘Vaughu eteva karika aue emae parasi,’⁴⁹ me etiuua tani namanama me tani ropi sesa manu tee katoa, me etiuua tani uvi kapuna tau ngai uungu etoa la uungu eitauua teeia.⁵⁰ Ia o tau ngai nongonongo anna ateva kapuna vau eteva aue emae tale ia o nau eteva ennaa va karika aue emae etana.⁵¹ Nau eteva emae, aue esai putuputua me eatoka teeie lao ta usiemaghala atoa. Aue la ngala me la aingeresa ngalungaluiria.

25

Kiukiu niaimatoongana ateae ta kasangaulu aliki vause

¹ “Tale nau eteva o ararimangali ngepona liu eteva aue nongina kasangaulu aliki vause. Laghe ghaala kuraaira lam me laghe lao sio tani sou taita ateva elai.² Ghalima etaira alokapakapa me ghalima alomasaanga.³ Alokapakapa atoa laghe saula kuraaira lam me laghe tam ghaa teela mene righi oeli.⁴ Alomasaanga nonga atoa laghe ghaala uneira oeli laghe kaola tale uneira aikaa oeli me laghe sau teela kuraaira lam.⁵ Taita ateva elai ghe tam rekataa parasila me laghe mangoola. Liuna avalua o me laghe asekanuela me laghe llusula.

⁶ “Elo matuua voo me laghe aaore me laghe ue va, ‘Lo ateva elai ange reerekata! Am kupi ghoa mae me am ghoa soua!’

⁷ “Me aliki vause atoa laghe totula me laghe kanukanuaala kuraaira lam.⁸ Alokapakapa atoa laghe uela ta alomasaanga atoa va, ‘Am tau mae sio righi uneimim oeli etaimami ta kuraaimami lam ange palapala.’

⁹ “Laghe liula me laghe uela va, ‘Karika ami rooroo poli erau tam roo etaita. Am lao sio ta lo atoa ita polipoli etaira me am laa poli righi uneimim.’

¹⁰ “Nau laghe kasukasu elao lao tapaa salana, me taita ateva elai ghe rekataala. Llo ghalima aliki vause laghe aimanomanosiaala, laghe kupi

eitauaa teeie ssola tale ninamanama ataeae tale nilai eteae, me laghe kavatila atamana ataeae.

¹¹ “Vara me ghalima aliki vause laghe mene rekataala me ngila ghe kolokolo laghe ue va, ‘Namu ngateva, namu ngateva, otila atamana ataeae me ami kupi sso.’

¹² “Ghe liula me ghe uela va, ‘Aghaaulia ngakoronna etaimim va karika akilakilaiem.’”

¹³ Me Iesu ghe uela va, “Liuna avalua o me am tani anguu taatara poli karika am kilakila nau eteva me aoa ngateva.

Kiukiu niaimatoongana ataeae ta tau ngai nonganongo anna atoa laghe ghaala viliki veu

(Luk 19:11-27)

¹⁴ “Ararimangali eteva epona liu aue mene nongina taita ateva ghe anna tani kasu me auena emene kiri mae, me ghe kolola kapuna tau ngai nonganongo anna atoa me ghe taula peina etaira. ¹⁵ Kateva ghe taula ghalima airari (5,000) gol koen me kateva ghalua airari (2,000) me mene kateva ghe taula kateva airari (1,000). Ghe tau rooroaa lao sio tale uunguaa kateva kateva erooroo tani ghelei me ghe kasula. ¹⁶ Lo ateva tau ngai nonganongo anna ghe ghaala ghalima airari arovaeaa ta ghe kasula tani uungu tale unna tani viliki veu me ghe mene ghaala ghalima airari. ¹⁷ Me lo tee ateva tau ngai nonganongo anna ghe ghaala ghalua airari, ghe mene ghaala ghalua airari. ¹⁸ Me lo ateva tau ngai nonganongo anna ghe ghaala kateva airari ghe lao sio me ghe laa kai sio liu eteva tapaa kosa me ghe aisuliaala unna viliki veu vauna ateva.

¹⁹ “Oroi nau ghe lange sio me vauira ateva tau ngai nonganongo anna atoa ghe rekatala me ghe anna tani tara llo laghe gheleila tale viliki veu ghe tau lao sio etaira. ²⁰ Lo ateva tau ngai nonganongo anna ghe ghaala ghalima airari ghe lao tee sio mene ghalima ghe uunguaala, me ghe uela va, ‘Vau eteva! Ughe tau mae sio ghalima airari, me tarala, aghe uunguaala mene ghalima airari.’

²¹ “Vauna ateva ghe liula me ghe uela va, ‘Amasimasieinio, poli ugheelei emasina uunguaam. Poli ughe ghelei emasinala llo niuungu pisike, aue aghatokaio me uitaraa oroi voto. Mae sio me umasimasi eitauaa teeieghi.’

²² “Lo tee ateva tau ngai nonganongo anna ghe ghaala ghalua airari, ie tee ghe lao sio me ghe uela va, ‘Vau eteva! Ughe tau mae sio ghalua airari me tarala, aghe ghaala mene ghalua.’

²³ “Vauna ateva ghe liula me ghe uela va, ‘Amasimasieinio, poli ugheelei emasina uunguaam. Poli ughe ghelei emasinala llo niuungu pisike, aue aghatokaio me uitaraa oroi voto. Mae sio me umae masimasi eitauaa teeieghi.’

²⁴ “Vara me lo ateva tau ngai nonganongo anna ghe ghaala kateva airari ghe lao sio me ghe uela va, ‘Vau eteva, akilakila va io tau nisessaieili io, umukemuke voto utam pasapasa me ughaaghia uiti karika ughe uungu aanasala etana. ²⁵ Liuna avalua o me aghe matautula, me aghe lao sio tani kai me aghe aisuliaala unem viliki veu tapaa kosa. Tarala peim isaa toko.’

²⁶ "Vauna ateva ghe liula me ghe uela va, 'Io sesa tau ngai nongonongo anna io me mangoona io! Ukilakila poi va, amukemuke voto atam pasapasa me aghaaghaa uiti karika aghe uungu aanasala etana. ²⁷ Ughe roola tani laa ghalokoi uneghi viliki veu, tale ale aialokoi viliki veu, me nau eteva aghe rekata, aue aghe mene ghaa me tee righi laghe mene saoaa sae.

²⁸ "Liuna avalua o me am ghaala kateva airari etana me am tau lao ta lo ateva unna kasangaulu airari (10,000). ²⁹ Poli see righi voto etana, aue God emene taula me aue eghaa oroi voto, me lo ateva karika righi voto etana, saa righi lutu voto etana, aue eghaa velu ekapa etana. ³⁰ Am sau velu ghoala mangoona ateva tau ngai nongonongo anna eleka. Aue la vella ghoa tale kinatama saurrom ateva, me aue la ghoa toka ngangngala me la aingeresia ngalungaluira.'

Sipsipi etoa me meemee atoa

³¹ "Nau Natuna ateva Taumattu ngateva emae tale mallangina ateva tee me kapuna ensolo atoa,* aue etoka tale aitokatokane ateva king eaapasunga matuutulienaaane. ³² Taumattu ngakapa atoa tale patunganua akapa atoa tale kosa ateva oia aue la mae velu eitauaa etana me aue epolaila nongina aitoi sipsipi eteva epolapola sipsipi etoa me meemee atoa. ³³ Aue eatingina sipsipi etoa ta pai muenna ativilau me meemee atoa ta pai uaise ativilau.

³⁴ "Me king aue eue ta lo atoa tale pai muenna ativilau va, 'Am mae sio, Tamaghi ghe arangiseiemla. Ta ararimangali eteva ange kaakaluimi ia, tale nau eteva ghe tiuala emua arau nau God ghe gheleila kosa ateva oia. ³⁵ Poli nau aghe maamaloo am ghe tautau mae inana etaghi, me nau aghe anna tani ropi am ghe aaropiropieghi, nau ouna aghi tale masalikiimim am ghe ghaaieghi lao tanganueimim. ³⁶ Nau karika ghinnanighi am ghe tautau mae ghinna etaghi. Nau aghe iisiki am ghe aaitarainaghi, aghe tokatoka tale ale mata voovoo am ghe mae taatarraighi.'

³⁷ "Me ghulughuluena atoa taumattu aue la kolomia va, 'Vau ngepona, lovisaa ami ghe taraiola ta ughe maamaloo me ami ghe anginiola, me ughe anna tani ropi me ami ghe tau aatu me ughe ropila? ³⁸ Lovisaa ouna io tale masalikiimami me ami ghe ghaaio lao sio tanganuemami, o karika ghinnanim me ami ghe tau aatu ghinna? ³⁹ Me lovisaa ami ghe taraiola ughe iisiki me ughe tokatoka tale ale mata voovoo me ami ghe atu taatarao?'

⁴⁰ "Me king aue eliu me eue etaira va, 'Aghaaulia ngakoronna etaimim va, saa voto am ghe gheelei tee kateva nengaghi aliki mela ia, am ghe gheelei etaghi.'

⁴¹ "Me aue eue ta lo atoa tale pai uaise ativilau va, 'Am kasu emasalikaala etaghi, nikasikiena etaimim, me ngam laolao tale kura ateae tokatoka liu ia God ghe aimanomanosieiniela ta Satana me kapuna ensolo atoa. ⁴² Poli aghe maamaloo karika am ghe tautau mae inana etaghi, me nau aghe anna tani ropi karika am ghe aaropiropieghi. ⁴³ Ouna ieghi tale masalikiimim, karika am ghe aaikoloainaghi. Karika

25:29: Mat 13:12; Mak 4:25; Luk 8:18. **25:30:** Mat 8:12; Luk 13:28. **25:31:** Mat 16:27;

19:28. * **25:31:** ensolo atoa Katoa uru ngai laghe pitila, laghe pitila ensolo manga atoa.

25:32: Esik 34:17; Aotu 20:11-13. **25:35:** Ais 58:7. **25:40:** Nitoka 19:17; Mat 10:42; Mak 9:41. **25:41:** Mat 7:23.

ghinnanighi, karika am ghe tautau mae righi ghinnanighi. Aghe iisiki me aghe tokatoka tale ale mata voovoo karika am ghe aaitarainaghi.’

⁴⁴ “Aue la kolomi va, ‘Vau ngepona, lovisaa ami ghe taraiola ughe maamaloo me ughe anna tani ropi me ouna io tale masalikiimami? Me lovisaa karika ghinnanim me ughe iisiki me ughe tokatoka tale ale mata voovoo me karika ami ghe sausiola?’

⁴⁵ “Aue eliu etaira va, ‘Aghaaulia ngakoronna etaimim va, nau karika am ghe gheelei ta kateva nengaghi aliki mela ia, isaa o voto, am ghe tam gheelei etaghi.’

⁴⁶ “Me aue la lao tale sesa nimmarikana ateva tokatoka liu ia me ghulughuluena atoa aue la lao tale maulue ateva tokatoka liu ia.”

26

Laghe aailoeaa Iesu tani uvi ematea

(Mak 14:1-2; Luk 22:1-2; Jon 11:45-53)

¹ Nau eteva Iesu ghe ruula tani apasunga isaa akapa o voto, me ghe uela ta kapuna disaepolo atoa va, ² “Am kilakila va kasi ghalua nau me Pasova ngateva etiuaa, me Natuna ateva Taumattu ngateva aue la tau lao me esae vukala tale aikotoo.”

³ Me namu ngatoa tale pristi etoa me namu ngatoa la muemua taumattu ngatoa laghe velu eitauaala tale alena ateva Kaeapas, namuu ia ta pristi ekapa atoa, ⁴ tani ailloeaa vaalua la kune aisulia Iesu me la uvi ematea. ⁵ Me laghe mae sio nonga ta kateva ninannaa va la rau mene ghelelai isaa o voto nau Pasova poli teae niaiuvii erau lutu.

Vause ateva ghe kaola oeli ta Iesu eBetani

(Mak 14:3-9; Jon 12:1-8)

⁶ Nau Iesu ghe tokala eBetani tanganue Saemon taita ateva emua arau anna tasussuku eteva, ⁷ laghe namanama me vause ateva ghe kupi sso mae tee masi aikakkaai eteva laghe gheleielala tale atu eteva alabasta ia, ghe kaakaai llo masi ngusungusuaane me aipolina namungaili me ghe kaola ta uruna ateva Iesu.

⁸ Disaepolo atoa ghe sessailala nau laghe tarala llo ghe lutula me laghe ue va, “Eghelei elaelaeaala voto ita rooroo tani ghaa viliki veu etana. ⁹ Ghe roola va ghe tauela me aue laghe polia tale viliki veu oroi me isaa o viliki veu, laghe roo tani laa tau lao ta lo atoa karika tue peipeiena ila.”

¹⁰ Iesu ghe kilala nannaairaa, me ghe liula me ghe uela va, “Vaalua me esessaiem etana nau egheleila masi voto etaghi? ¹¹ Aue lo atoa karika tue peipeiena ila la toka teeiem nau ekapa atoa, me aghi karika oroi nau aue atoka teeiem. ¹² Ekaola voto masi ngusungusuaane etaghi tani aimanomanosieinaghi tale nau niaikkaia. ¹³ Aghaaulia ngakoronna va eaa aue la ppooaa isaa o masi kiukiu tale kosa ateva, aue la ghauliaa tee masi gheeleiaane vause ateva oia, tani nnainia.”

Judas ghe uela va aue etau lao Iesu

(Mak 14:10-11; Luk 22:3-6)

¹⁴ Me kateva ta kasangaulu ghalua (12) disaepolo, la kolokoloa va Jiudas Iskariot, ghe lao sio ta namu ngatoa ta pristi etoa, ¹⁵ me ghe kolomilala va, “Aue am ghele polieghi ta ghaisa arova aghelle tau aatu

Iesu etaimim?" Me laghe tau lao sio kotolungaulu (30) viliki veu. ¹⁶ Ghe tiuaala tale ia o nau eteva, Jiudas ghe tiuaala tani tara teva masi nau ae etauela etaira.

Iesu ghe namanama teela disaepolo atoa

(Mak 14:12-21; Luk 22:7-14, 21-23; Jon 13:21-30)

¹⁷ Tale aitiutiu eteva nau tale nivelu eitauaa tale verete karika righi isti etana, disaepolo atoa laghe lao sio ta Iesu me laghe kolomiela va, "Uanna va eaa aloi ami laa ghaimonomonosiaa ninamanama ataeae ta Pasova?"

¹⁸ Ghe uela etaira va, "Nau eteva am kupi sso tale masaliki taatara ataeae, ae am tara taumattu ngateva. Am ue etana va, 'Tisa euela va: Nauna ange rekatala me eanna tani nama Pasova ngateva tee kapuna disaepolo atoa tangantuem.' " ¹⁹ Liuna avalua o me disaepolo atoa laghe gheleila voto nongina Iesu ghe auliaala, me laghe aipanipaniaala inana tale Pasova ngateva.

²⁰ Vara elo alai me Iesu ghe toka tee siola kasangaulu ghalua (12) kapuna disaepolo tale tevoo ainamanama ateva. ²¹ Laghe namanama me Iesu ghe uela etaira va, "Aghaaulia ngakoronna etaimim va kateva etaimim aeue etaueghi lao ta tau ngai ssateeghi etoa."

²² Nau disaepolo atoa laghe nongola, laghe alousiusieiliila me kateva kateva ghe kookolomia va, "Vau eteva, koti aghi, no?"

²³ Ghe liula me ghe uela va, "Kateva etaimim ita namanama aitauaa, ia ae etaueghi lao ta tau ngai ssateeghi etoa. ²⁴ Poli Natuna ateva Taumattu ngateva ae elao nongina Uru ngai Manga ateva eaauliaa va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula."

²⁵ Jiudas, lo ateva taumattu ae ghe tau lao Iesu, ie tee ghe kolomila ghe uela va, "Koti aghi, no, va Rabae?"

Me Iesu ghe uela etana va, "Inangari isaa ona angu auliaala."

Iesu ghe tau lao sio verete me uaeni ta kapuna disaepolo atoa

(Mak 14:22-26; Luk 22:15-20; 1 Ko 11:23-25)

²⁶ Laghe namanama me Iesu ghe ghaala verete ateva, me ghe kokkolomi saela ta God tani arangiseia, me ghe piriela me ghe taue lao sio ta disaepolo atoa, me ghe uela etaira va, "Am ghaala me am nama. Isaa oia verete malataughu."

²⁷ Me ghe mene ghaala kapa uaeni eteva me ghe mene kaili emasina saela ta God me ghe tau lao sio etaira me ghe uela va, "Am akapa am ropi etana, ²⁸ poli uaeni eteva oia raeghi ia tani ghelei ouna inangari niaippooa ngaitauaa. Raeghi eteva ae eakalaat aoro taumattu ngatoa, tani kkaluaa sesa gheeleiaaira. ²⁹ Aghaauliaa etaimim va karika ae amene ropi righi uaeni lomosi ta ae amene ropi ouna uaeni teeiem tale ararimangalina ateva Tamaghi."

³⁰ Me laghe ueila kkinari eteae me laghe kupi ghoala tale masaliki taatara ataeae me laghe saela tale motouru eteva eOliv.

Iesu ghe aulia ngamuemua alokoila llo Pita ae eghelei

(Mak 14:27-31; Luk 22:31-34; Jon 13:36-38)

31 Jesu ghe uela etaira va, "Ghaine eleivoo am akapaaili aue am ilou vulieghi, poli Uru ngai Manga ateva eue va,
"Aue auvi emate tau ngai toi sipsipi eteva
me aue sipsipi etoa la ilou reerekataa."

32 Me nau atotu tale nimate aue amuemu lao eGalilii me aue am laa taraiieghi okae."

33 Pita ghe aulia ngaotula va, "Arova ila akapa la ilou vulio, aghi karika poi arooroo tani ilou vulio."

34 Jesu ghe liula me ghe uela va, "Pita, llo koronna isaa avalua toko va, ia o voo ngateva auena paolo ateva taita eaangari, aue uue akasina kotoluata va karika ukilakilaieghi."

35 Me Pita ghe aasarasarakanana tani ue va, "Karika poi arooroo tani ue va karika akilakilaio! Arova umate aghi tee aue amate teeio." Ila akapa disaepolo atoa laghe aulia ngavalua o ta Iesu.

Iesu ghe looloo sae eGetsemeni

(Mak 14:32-42; Luk 22:39-46)

36 Me Iesu ghe ghaala kapuna disaepolo atoa me laghe lao sio tale voto ateva la kolokoloa va eGetsemeni, me ghe uela etaira va, "Am toka oia me aghi aue amene kasu tee lao tani laa looloo sae." 37 Ghe kolola Pita me natuna alua Sebedi me ghe tiuala tani alousiusieili, me ang ghe ateateaa saasakiaa. 38 Me ghe uela etairotolu va, "Maamauluaaghi ange sessaaili tee nialousiusi eteva, me egheleieghi arova amate. Am toka oia me am anguu taatara teeieghi."

39 Ghe kasu tee lao sio me ghe tturru siola tapaa kosa matane ghe tau siola me ghe tiuala tani looloo sae. Ghe ue va, "Tamaghi, arova erooroo uakekkeliieghi tale ia oia kapa nimmarikana ateva ange aanna tani ghiaieghi. Me karika umene ghelei tale aloaloannaaghi ta ugheli tale aloannaam."

40 Ghe kiria lao sio ta disaepolo kotolu me ghe tarailotolla ta lotolu ghe aseasekanua me ghe uela ta Pita va, "Karika erooroo va am nim anguu taatara teeieghi ta kateva nonga aoa? 41 Am anguu taatara me am looloo sae ta God va karika am mene katuu tale nitootoonga. Nannaaimim eanna tani ghelei voto, me vilikiimim mangoona."

42 Ghe kasu vulilala me ghe mene lao sio tani looloo sae, ghe ue va, "Tamaghi, arova ia oia kapa nimmarikana ateva etam kkelieghi me aropia, aue aghelei aloaloannaam."

43 Vara ghe mene kiria mae sio etairotolu me ghe mene saopilotolla ta latolu ghe aseesekanua, poli matairoto ghe maamaateaili. 44 Me ghe mene lao sio tani looloo sae aiaakotonna. Ghe aauliaa inangari ang ghe auliaala mua.

45 Ghe mene kiria lao sio ta disaepolo atoa me ghe uela etaira va, "Am aseasekanua me am kaakaarasi tani ainoana, va? Am tarala! Nau ange rekatala va Natuna ateva Taumattu ngateva ngila tautauela ta nimaira sesa taumattu ngatoa. 46 Amotolu totula me ita kasu! Lo ateva etautaueghi lao ta tau ngai ssateeghi etoa ange reerekata."

Laghe kunela Iesu

(Mak 14:43-50; Luk 22:47-53; Jon 18:3-12)

⁴⁷ Nau ghe auliaala llo me Jiudas, kateva ta kasangaulu ghalua (12) disaepolo, ghe rekata teela taumattu ngatoa oroiannaaili ila me laghe posoposo baenata me tuku ngai. Namu ngatoa ta pristi etoa me namu ngatoa laghe sungilala. ⁴⁸ Lo ateva ghe tauue lao sio etaira ghe auliaa tau lao sio niaimatoongana ateva aue egheleia. Ghe uela va, “Lo ateva taumattu angusua, ia o lo ateva am kuneia.” ⁴⁹ Liuna avalua o me Jiudas he lao sio ta Iesu me ghe uela va, “Rabae!” me ghe ngusuela.

⁵⁰ Me Iesu ghe uela etana va, “Kapughu, gheleila voto umae sio tani ghelei.”

Laghe kunela Iesu me laghe poso atinginaiela. ⁵¹ Kateva taumattu ghe tiitingina tee Iesu ghe ghaala baenata ateva me ghe sai patela talingane ativilau kateva kapuna tau ngai nonganongo anna namu ngateva ta pristi etoa.

⁵² Me Iesu ghe uela etana va, “Kaaila baenata ateva, poli lo atoa la aaiuvii tale baenata, aue la uvila tale baenata ateva. ⁵³ Karika ukilakila va arooroo tani kolomi sae Tamaghi tani tau sio oroienaailli ensolo atoa me arovaeeaa nonga ta aue ghele sungila? ⁵⁴ Me arova aghele ghelei, vaalua aue voto Uru ngai Manga ateva ghe auliaala aue ghele lutu ekoronna?”

⁵⁵ Me Iesu ghe uela ta taumattu ngatoa va, “Am annaa vara aghi tau ngai uvii me sari ghinna ieghi va am sau mae sio baenata me tuku ngai tani kuneieghi? Vaalua me karika am ghe kunekeiegħi nau aghe aapasunga nau ekapa atoa tale ale manga ateva? ⁵⁶ Isaa o voto ghe lutulutu tani rooaa inangariira propete atoa laghe piti elokoila tale Uru ngai Manga ateva.” Tale ia o nau eteva, disaepolo akapa atoa laghe kasu vuliela me laghe iloula.

Iesu ghe tinginala emua ta kansolo atoa

(Mak 14:53-65; Luk 22:54-55, 63-71; Jon 18:13-14, 19-24)

⁵⁷ Me taumattu ngatoa laghe kunela Iesu me laghe laoainie sio tanganue Kaeapas namuu ia ta pristi etoa, nongina tau ngai aapasunga ngatoa tale inangari nipaopao me namu ngatoa laghe velu eitauaala. ⁵⁸ Vara me Pita ghe aaimuli me karika ghe kalakalaa. Ghe kipi ssola tale valavalta atuae ghe taataliaa alena ateva namu ngateva tale pristi etoa me ghe toka tee siola tau ngai toitoi etoa. Ghe toitoi tani tara va sa ateva aue ghe lutu ta Iesu.

⁵⁹ Namu ngatoa ta pristi etoa, me kansolo akapa atoa, laghe paepae righi taumattu aue laghe aikamea righi voto tee Iesu me laghe uvi ematea. ⁶⁰ Oroi taumattu laghe ghaala tani auliaa tee Iesu tale inangari kamena, me kansolo atoa karika laghe tara poila righi voto laghe aauliaa tee Iesu me laghe roo tani uvi ematea.

Vara me ghalua taumattu lalu ghe mae sio. ⁶¹ Lalu ghe uela va, “Taumattu ngateva oia ghe uela va, ‘Arooroo tani rruti alena ale manga ateva God me aue aghatulua ta kotolu nonga nau.’”

⁶² Namu ngateva ta pristi etoa ghe tingina saela me ghe uela ta Iesu va, “Karika aue uliu inangariira? Vaalua tale inangari la ghaauliaa teeio?”

⁶³ Me Iesu ghe nim maamatuaa tingina.

Me namu ngateva ta pristi etoa ghe uela etana va, “Tale ararina atae God tokatoka liu ia, aghanna va uauliaa etaimami va koronna va io Mesaea, Natuna io God?”

⁶⁴ Iesu ghe liula me ghe uela va, “Ue, nongina angu auliaala. Aue am tara Natuna ateva Taumattu ngateva ta etoka sio tale pai muenna ativilau ta lo ateva sarasarakana ia, me esio tale karaane epona liu.”

⁶⁵ Vara me namu ngateva ta pristi etoa ghe rasila ghinnanina tani apasunga va ghe tam aloannala tani nongo, me ghe uela va, “Ange ghaala liuna ateva God! Karika ita mene aloanna mene righi taumattu tani auliaa mene righi inangariira poli ngam nongola voto ange auliaala.

⁶⁶ Vaalua am annaa?”

Laghe liula me laghe uela va, “Ange gheleila voto sesa erooroo va emate.”

⁶⁷ Me laghe tiuala tani kanusuiaa matane Iesu me laghe tuutumaria me katoa laghe pooposalaia. ⁶⁸ Me laghe ue etana va, “Poli Mesaea io, uauliaa inangarina God va see ange posalaiola.”

Pita ghe uela va etam kilakila Iesu

(Mak 14:66-72; Luk 22:56-62; Jon 18:15-18, 25-27)

⁶⁹ Pita ghe tokatoka elome tale valavala atae ghe taataliaa alena ateva namu ngateva ta pristi etoa, me kapuna vause tau ngai nonganongo anna ateva ghe lao sio etana me ghe uela va, “Io tee ughe kasukasu tee Iesu aGalilii ia.”

⁷⁰ Me ta mataira akapa, Pita ghe liula me ghe uela va, “Karika akilakila isaa ona inangari uaauliaa.”

⁷¹ Me ghe kupi ghoala tale atamana atae tale valavala atae me mene kateva vause tau ngai nonganongo anna ia ghe taraiela me ghe uela ta taumattu ngatoa va, “Ia oia taumattu ngateva ghe kasukasu tee Iesu aNasareti ia.”

⁷² Me Pita ghe mene uela va, “Karika!” Me ghe uela va, “Koronnaaili ta epona liu va karika akilakila ia ona taumattu ngateva.”

⁷³ Vara karika masau me lo atoa laghe tiitingina akalakalangina teeia laghe uela etana va, “Koronnaaili va io kateva etaira, poli samasamaam arova aGalilii eteva.”

⁷⁴ Me Pita ghe uela va, “Koronnaaili ta God va karika akilakila ia ona taumattu ngateva!”

Vara me paolo ateva taita ia ghe aangulara. ⁷⁵ Arovaea ta Pita ghe annaala inangarina Iesu ghe uela va, “Auena paolo ateva taita ia eaangari, aue uue akasina kotoluaata va karika ukilakilaeeghi.” Pita ghe kupi ghoala me ghe ngala alousiusieiliila.

27

Laghe laoaa sio Iesu ta Paelat

(Mak 15:1; Luk 23:1-2; Jon 18:28-32)

¹ Elue talaua poopooa namu ngakapa atoa ta pristi etoa me namu ngatoa laghe mae sio nonga tale kateva ninannaa va la uvi emate Iesu.

² Laghe iriela me laghe kasueiniela tani laoainia ta Paelat gavanaa ia.

Jiudas ghe nauela

(Apos 1:18-19)

³ Nau Jiudas, ia o taumattu ngateva ghe tau lao sio Iesu ta tau ngai ssateena atoa, ghe tarala va aue la uvi emate Iesu, ghe maateailiila ta nannaane me ghe mene laoaa sio viliki veu erooroo kotolungaulu (30) silva koen namu ngatoa ta pristi etoa me namu ngatoa laghe tau lao sio etana. ⁴ Ghe uela va, “Ngagheleila voto karika masina tani tau lao taumattu ngateva karika righi kanna ssavoto va la uvi ematea.”

Laghe liula me laghe uela va, “Ami saa etana? Uunguaam ona.”

⁵ Jiudas ghe sau velu elokoi siola viliki veu tale ale manga ateva me ghe kasula tani laa naua.

⁶ Namu ngatoa ta pristi etoa laghe ghaa siola viliki veu me laghe uela va, “Uneita loo eue va karika masina tani alokoi sso tale ale viliki veu, poli viliki veu rae llo oia.” ⁷ Liuna avalua o me laghe mae sio tale kateva ninannaa va, tale isaa o viliki veu aue la poli tuku kosa ateva kaluira ia lo atoa laghe gheelei sospena tale kosa me aue liu niaikkaiaira ia ativuu etoa. ⁸ Liuna avalua o me tale isaa oia nau la aseasea va kosa tale rae ia. ⁹ Me llo voto propete Jerimaea ghe auliaala ghe kaurekatila, ghe uela va, “Laghe ghaala kotolungaulu silva koen, aipolipoli eteva taumattu nge Israeli etoa laghe aseala etana va la polia, ¹⁰ me tale isaa o viliki veu laghe polila tuku kosa ateva laghe gheelei sospena kosa etana, nongina Vau ngepona ateva ghe auliaala etaghi.”

Iesu ghe tinginala emua ta Paelat

(Mak 15:2-15; Luk 23:3-5, 13-25; Jon 18:33-19:16)

¹¹ Vara me Iesu ghe tinginala emua ta Paelat gavana ia me ghe kolomiela va, “Io kingi io ta ajiu etoa?”

Iesu ghe liula me ghe uela va, “Ue, nongina uaauliaa.”

¹² Nau eteva namu ngatoa ta pristi etoa me namu ngatoa laghe aauliaa teeia inangari emua ta matane Paelat, karika poi Iesu ghe liula. ¹³ Me Paelat ghe kolomiela va, “Karika unonganongo inangari la ghaauliaa teeio?” ¹⁴ Me karika poi Iesu ghe liula teva tuku inangari laghe aauliaa teeia. Me gavana ghe soghiaala isaa o voto ghe tarala etana.

¹⁵ Kateva voto gavana ghe gheelei nonga nau tale nivelu eitaua ngateae ta Pasova, ghe tautau velu lo ateva taumattu tale ale mata voovoo taumattu ngatoa laghe anna va etau velua. ¹⁶ Isaa o nau kateva taumattu, taumattu ngakapa atoa laghe kilakilaia va sesa taumattu ia, ghe tokatoka tale ale mata voovoo, ararina ateaet Barabas.* ¹⁷ Nau taumattu ngatoa laghe mae sio tani velu eitauaa, Paelat ghe kolomilala va, “Am alona va atau velu see me emene atu etaimim: Barabas o Iesu la kolokoloa va Mesaea etana?” ¹⁸ Poli Paelat ghe kilakila va laghe tam nannaa tee Iesu righi masina, liuna avalua o me laghe maeainie sio etana.

¹⁹ Paelat ghe tokatoka tale aitokatoka ateva aighelei niaisakei ia, me vausenna ateva ghe suula inangari va, “Urau mene ghelei righi voto tale taumattu ngateva ona karika righi gheeleiiaane sesa. Poli ia me ngaghaala orioili mmarikana tale maamauluaaghi nau aghasoasoipoila eleivoo.”

²⁰ Namu ngatoa ta pristi etoa me namu ngatoa laghe paapasali taumattu ngatoa va etau velu Barabas me euvi emate Iesu.

27:5: Apos 1:18-19; Mat 26:14-15. **27:9:** Sek 11:12-13. **27:12:** Ais 53:7. * **27:16:** Kasina uru ngai laghe pitila, laghe pitila va Iesu Barabas. **27:18:** Jon 11:47-48; 12:19.

21 Gavana ghe kolomilala va, “See etairarua am anna va atau velua me emene atu etaimim?”

Laghe liula me laghe uela va, “Barabas.”

22 Me Paelat ghe kolomilala va, “O sa ateva agheleia ta Iesu la aseasea va Mesaea ia?”

Ila akapa laghe liula me laghe uela va, “Uavukalaie sae tale aikotoo.”

23 Me Paelat ghe kolomilala va, “Poli sa ateva voto sesa ghe gheleila?”

Vara me laghe tiuala tani sama anamungaili va, “Uavukalaie sae tale aikotoo.”

24 Nau Paelat ghe tarala va karika ang ghe rooroo tani ghelei righi llo, me niaikkaluii eteae ang ghe tiitiuua, ghe ghaala manu me ghe porala nimane emua ta taumattu ngatoa me ghe uela va, “Karika righi inangarighi tale raena ateva taumattu ngateva oia. Sa ateva elutu etana uunguaaimim.”

25 Taumattu ngatoa laghe liula me laghe ue va, “Utau velu rangane ateva etoka etaimami me natuimami etoa.”

26 Me ghe tau vella Barabas ghe mene lao sio etaira me Iesu laghe uetaielia mua me ghe tauve lao sio va la laa ghavukalaie sae tale aikotoo.

Soldia ngatoa laghe aanamisaa Iesu

(Mak 15:16-20; Jon 19:2-3)

27 Me kapuna soldia ngatoa gavana laghe ghaala Iesu me laghe ssoainiela tanganuena Gavana ngateva, me laghe kolo akapala soldia ngatoa me laghe tomuela. 28 Laghe ghaa vella ghinnanina me laghe asae taula aiaasae ateva raeraeana ia, 29 me laghe ghaala uasa rorroana me laghe navitaala kou nguru eteva me laghe atokiae saela ta uruna. Me laghe atinginala ai eteae ta nimane muenna atelange, me laghe suusuua emua etana me laghe piipilosia tani ue etana va, “Ei, kapuira kingi eteva ajiu etoa!” 30 Laghe kaakanusuia me laghe ghaala ai eteae ta nimane me laghe paruparu uruna ateva. 31 Nau laghe ruula tani anamisainia, laghe ghaa vella aiaasae ateva etana me laghe mene asae taula ghinnanina me laghe kasueiniela tani laa avukalaie sae tale aikotoo.

Laghe avukala saela Iesu tale aikotoo

(Mak 15:21-32; Luk 23:26-43; Jon 19:17-27)

32 Nau laghe laa ghoa eleka, laghe soula taumattu ngateva atala nge Saerini ia, ararina atea ta Saemon, me laghe aeala me laghe sungiela va esau aikotoo ateva. 33 Laghe rekatala tale voto ateva ararina atea ta Golgota, malloeana va Voto ateva arova Riu uru taumattu ngateva.

34 Tale ia o voto ateva laghe tau lao sio uaeni ta Iesu va eropi. Laghe kao aitauaa teela voto kaakaalina, me nau Iesu ghe tootoongaala, ghe tam annala tani ropi. 35 Nau laghe avukalaie saela tale aikotoo me laghe tiuala tani anamisi tani aikoita ghinnanina. 36 Me laghe toka siola tale ia o voto ateva tani toi etokaia va ghe tani mate. 37 Epona nongina uruna ateva laghe pitila me laghe avukalala inangari laghe laoainie sio tale niaisakei etana eue va, “Ia oia Iesu, kapuira kingi ia ajiu etoa.”

38 Taita alua lalu ghe aaiuvii me lalu ghe ghaaghhaa peiira taumattu ngatoa, lalu tee laghe avukala teeilalue saela, kateva ta pai muenna ativilau me kateva ta pai uaise ativilau. 39 Me taumattu ngatoa laghe

kasukasu tapaa salana, laghe aauliaa teeia inangari karika masina. Laghe ringaringa uruira,⁴⁰ me laghe ue va, “Io urooroo tani rruti ale manga ateva me umene atulua ta kotolu nonga nau, asaangiola me ukkure sio tale aikotoo ateva, arova Natuna io God.”

⁴¹ Namu ngatoa ta pristi etoa me tau ngai aapasunga ngatoa tale inangari nipaopao me namu ngatoa, ila tee laghe aauliaa teeia inangari. ⁴² Laghe ue va, “Eghe asaangila katoa, me karika erooroo tani asaangia! Ia kapuira kingi ia alsraeli etoa! Am tau veluela me ekkure sio tale aikotoo ateva me aue ami aiesoaa etana. ⁴³ Ghe aatoka tuutulina ta God. Tau veluela me ghaine God easaangia arova eaannaia, poli ghe ue va, ‘Aghi Natuna aghi God.’” ⁴⁴ Tale ie nonga o salana atikirighi tau niainao tee alua laghe avukala teeilalue saela tale aikotoo, lalu ghe aauliaa teeia inangari.

Matemateaane Iesu

(Mak 15:33-34; Luk 23:44-49; Jon 19:28-30)

⁴⁵ Ghe tiuaala ta pai ngelo sinaka[†] me saurrom ateva ghe akoula kosa ateva, ghe roola kotolu aoa. ⁴⁶ Gharighi ghe 3 kilok[‡] me Iesu ghe ngala anamungailiila me ghe uela va, “*Eli, Eli, lama sabaktani?*” mallooeana va, “Kapughu Goto ateva, kapughu Goto ateva, vaalua me angu tau velueghila?”

⁴⁷ Nau katoa ta lo atoa laghe tiitingina akalakalangina laghe nongola, laghe uela va, “Ekolokolo Elaija.”

⁴⁸ Arovaea ta kateva ghe iloula tani laa ghaa tuku spans ateva me ghe asuuela tale uaeni kaakaalina me ghe apasapasaiela tale ai eteae me ghe taue saela va Iesu ghe mmua. ⁴⁹ Mene katoa laghe ue va, “Tau veluela me ie nonga evukala, me ita tara arova Elaija aue emae asaangia.”

⁵⁰ Me nau eteva Iesu ghe mene aore namungailiila me ghe tau vella maamauluuaane.

⁵¹ Tale ia o nau eteva, kalio atiulu ghe vuuvukala tale ale manga ateva ghe tarriila me ghe ghaluevilaula, ghe laa sae tiuaa epona me ghe laa sio ruu euu. Me kosa ateva ghe aisiisiaala me atu etoa laghe tapolapolakala. ⁵² Liengani niaikkaia ngatoa ghe ottilala me oroi ila taumattu ngatoa manga ila laghe matela laghe totula me laghe mene mauluela, ⁵³ me laghe totu vulula liengani niaikkaiaa me vara Iesu ghe totula tale nimate me laghe aotuotula ta oroieili ila taumattu ngatoa tale masaliki taatara ateeae manga ia.

⁵⁴ Nau lo ateva tau ngai uvii ghe aaitoiaa kateva ai (100) tau ngai uvii me lo atoa laghe toitoi evukala Iesu, laghe tarala rukeruke ateva me isaa akapa voto ghe lutula, laghe matautu etinginala me laghe uela va, “Koronna taumattu ngateva oia Natuna ia God.”

⁵⁵ Oroi ila vause atoa laghe tiitingina amasau me laghe taatara. Laghe usilaa Iesu eGalilii tani aisausieinia. ⁵⁶ Elome ta ila o vause atoa, Meri aMakdala ia me Meri kinairarue ia Jeimis me Josep[§] me kinairarua ateva natuna alua Sebedi.

Kaakaiiaane Iesu

(Mak 15:42-47; Luk 23:50-56; Jon 19:38-42)

27:40: Mat 26:61; Jon 2:19. **27:43:** Sams 22:8. [†] **27:45:** pai ngelo sinaka Tale inangari

nge Grik, ghaonomina (6) ateva aoa. **27:46:** Sams 22:1. [‡] **27:46:** 3 kilok Tale inangari nge Grik, ta aiaaghasiona (9) ateva aoa. **27:48:** Sams 69:21. **27:51:** Eks 26:31-33; Hib

10:19-20. **27:55:** Luk 8:2-3. [§] **27:56:** Tale inangari nge Grik, Joses.

57 Ghe elo alaila me taumattu ngateva, tue peipeiena ia, ararina atae ta Josep me tanganuena tale masaliki taatara atae eArimatia, ghe rekatala, ie tee kapuna disaepolo ia Iesu. 58 Ghe lao sio ta Paelat me ghe kolomila Iesu etana. Me Paelat ghe uela va la tau lao Iesu etana. 59 Josep ghe ghaala Iesu me ghe sumuela tale masi kalio raarangisana. 60 Me ghe alokoiola tale unna liengani niaikkaia ngateae, ghe kaie ssola elome tale vallae. Ghe atakirila kinatama atu eteva tani tingina airungaa liengani niaikkaia ngateae, me ghe kasula. 61 Meri aMakdala ia me mene kateva Meri lalu ghe tokatoka tale kativilau pai nongina liengani niaikkaia ngateae.

Lo atoa laghe aitoiaa liengani niaikkaia ngateae

62 Vara mene kateva nau, nau manga ia, me namu ngatoa ta pristi etoa me Paresi etoa laghe lao sio ta Paelat. 63 Me laghe uela etana va, “Namu ngateva, ami nannaa ia o tau nikamekame ateva nau maulue ia ghe ue va, ‘Vara kotolu nau elange me aue amene totu.’ 64 Liuna avalua o me uaulia ngasarasarakanā me la tani ghelei ekorokorongana lienga niaikkaia ngateae lomosi ta kotolu nau elange, poli kapuna disaepolo atoa la rau laa ghainaoa me la laa ue ta taumattu ngatoa va ange totula tale nimate. Lo ateva o nikamekame aue sesaaili tale lo akasina ateva nikamekame.”

65 Paelat ghe liula me ghe uela va, “Am ghaala tau ngaitoitai etoa me am laa ghelei ekorokorongana liengani niaikkaia ngateae nongina vaalua am kilakila.” 66 Liuna avalua o me laghe lao sio me laghe ghelei ekorokoronganala liengani niaikkaia ngateae me laghe atokala aimatootoongana ateva tale atu eteva va arova teva eghaa velua, aue la kila, me laghe atinginala tau ngaitoitai etoa tani aitoieinia.

28

Iesu ghe mene totula

(Mak 16:1-8; Luk 24:1-12; Jon 20:1-10)

1 Nau eteva nau manga ateva ghe ruula, me elue talaua poopooa tale aitiutiu eteva tana nau, Meri aMakdala ia me mene kateva Meri lalu ghe lao sio tani taatara tale liengani niaikkaia ngateae.

2 Paka rukeruke ateva ghe lutula nongina lalu ghe tiitingina ta kapuna ensolo ateva Vau palepale ghe sio mae epona liu me ghe atakiri vella atu eteva ghe gheelei runga liengani niaikkaia ngateae me ghe tokala epona tale atu eteva. 3 Mallanga ateva ta vilikina tani nonginaaili ravaravaia ateva me unna aiaasae usousoanaaili nongina karaane ateva. 4 Lo atoa laghe aitoiaa liu niaikkaia ngateva laghe matautu saasakiaala, laghe reterete me laghe katu ngalokoi siola tapaa kosa tani nonginaaili matena atoa taumattu laghe asoaso.

5 Vara me ensolo ateva ghe uela ta vause atoa va, “Am rau mene matautu. Akilakila va am aloanna tani tara Iesu, ia o ghe matela tale aikotoo. 6 Karika ia oia. Ange totula nongina ghe auliaala. Am lange sso tara nongina laghe alokoiola. 7 Gharovaeaata ta am kasu me am laa auliaa ta kapuna disaepolo atoa va ange totula tale nimate, me aue am taraia eGalilii, ta ange muemue lao sio okae.”

⁸ Vause atoa laghe matautula me laghe pasula tale nimasimasi. Gharovaea ta laghe kasu vulila liengani niaikkaia ngateae me laghe masimasi etinginala tani laa ghauliaa kieira disaepolo atoa. ⁹ Nau eteva laghe laolao, Iesu ghe sousoulala me ghe uela etaira va, “Elue talaua.” Me laghe mae akalakalaa sio tale liue kkena Iesu me laghe posoposo kkena me laghe kkaueiniela. ¹⁰ Me Iesu ghe uela etaira va, “Am rau mene matautu. Am laa ghauliaa ta tueghi me nengaghi etoa va la lao eGalilii me ae la laa taraieghi okae.”

Inangariira lo atoa laghe toitoi liengani niaikkaia ngateae

¹¹ Nau eteva vause atoa laghe kasukasu elaelao tau ngai uvii etoa laghe aaitoiaa liengani niaikkaia ngateae laghe ssola tale masaliki taatara ateae me laghe aulia ngakapaailiila voto ghe lutula ta namu ngatoa ta pristi etoa. ¹² Nau eteva namu ngatoa ta pristi etoa laghe nongola, laghe kolo aitauuala namu ngatoa me laghe aippooa ngaitauuala tani ghelei righi salana va la poli tau ngai uvii etoa tale namuu viliki veu, me la nim usilaa nongina vaalua ae ila la ghauliaa. ¹³ Laghe uela ta tau ngai uvii etoa va, “Am ue va, ‘Kapuna disaepolo atoa Iesu la mae sio tani ainao Iesu eleivoo nau eteva ami ghe aseasekanua.’” ¹⁴ Me arova gavana ngateva enongo va am ue va am ghe asekanuela me laghe ainaola Iesu, am rau mene annaa. Aue ami aippooaa teeia me karika aue am ghaa righi maamatana etana.” ¹⁵ Tau ngai uvii etoa laghe ghaala viliki veu me laghe auliaala voto laghe uela va la ghauliaa, me ia o kiukiu eteae ghe kasu ekapa seela ta ajiu etoa tale ia o nau eteva.

*Kinatama niuungu eteva Iesu
ghe taue lao sio ta disaepolo atoa*

(Mak 16:14-18; Luk 24:36-49; Jon 20:19-23; Apos 1:6-8)

¹⁶ Vara me kasangaulu me kateva (11) disaepolo laghe lao sio eGalilii me laghe saela tale motouru eteva nongina ghe auliaala etaira va aue la laa taraietana. ¹⁷ Nau eteva laghe taraiela laghe kkaueiniela, me katoa etaira laghe tam aikaiaala va laghe tarala Iesu. ¹⁸ Vara me Iesu ghe mae sio etaira, me ghe uela etaira va, “Ngaghele ghaala nimatuutuliena akapa epona liu me tale kosa eteva oia. ¹⁹ Liuna avalua o me am kasu me am mene ghaa righi disaepolo tale patunganua akapa atoa me am asuula tale ararina ateae Tamaghi me ta Natuna me tale Spirit Manga. ²⁰ Me am apasunga etaira tani nongo usilaa isaa akapaaili voto aghe auliaala etaimim me aue atoka teeiem tale nau ekapa atoa elaa ghaa airuuruu tale kosa eteva.”

Masi kiukiu Mak ghe pitiela **Inangari emuemua**

Masi kiukiuna Iesu Mak ghe pitiela ekiukiuaa uunguaane Iesu, matemateaane me tottotuaane tale nimate. Vuku eteva ta Mak tukuna ia ta mene kotolu vuku masi kiukiu etana (Matiu, Luk me Jon), me ghe pitila oroi voto Iesu ghe gheleila tale llo voto ghe aapasunga. Matiu, Luk me Jon laghe pitila mene kasina voto oroi Iesu ghe aapasungaala. Mak eauliaa oroi niuungu sarasarakanana Iesu ghe gheleila tani ghelei emasina tau sessa atoa, me sungi velu raroai, me tani kkaluaa ssavoto. Mak eaauliaa va sarasarakaniaane Iesu isaa epona ta Satana me Iesu erooro tani asaangi taumattu.

Masi kiukiu ta Mak, Jon Mak ghe pitila. Ia karika va kateva ta kasangaulu ghalua (12) kapuna disaepolo Iesu. Ia ghe uungu tee Pol me Banabas. Tau ngalomasaanga atoa emua arau laghe uela va ghe kilala oroi kiukiu ta Pita eRom, me isaa oia ghe pitila.

Tani kila amuemua

Inangarina Jon tau ngai aasuu ia *1:1-8*

Niasuu me nitootoonga ta Iesu *1:9-13*

Iesu eGalilii *1:14-9:50*

Iesu ghe lao sio eGalilii me ghe saela eJerusalem *10:1-52*

Unna nitootoonga me nimate Iesu tale airuuruu eteva uiki *11:1-15:47*

Iesu ghe totula tale nimate *16:1-8*

Iesu ghe otuotula ta kapuna disaepolo atoa *16:9-20*

Jon tau ngai aasuu ia ghe poppoaa

(*Mat 3:1-12; Luk 3:1-9, 15-17; Jon 1:19-28*)

¹ Aitiutiu tale masi kiukiuna Iesu Karisto, natuna ia God. ² Isaa oia masi kiukiu nongina propret Aisaea ghe pitila:

“Nongola, aue asuu aikasuaa inangarighi eteva,

ia aue emuemueinio.

Ia aue eaimonomonosiaa salam atikirighi.”

³ “Tale voto ateva karika righi taumattu ghe tokatoka etana, kateva lingi ngalo taumattu ekolokolo, eue va,

‘Am aimonomonosiaala salane atikirighi Vau palepale. Am ghelei eghulughuluena akapa salane.’”

⁴ Jon, ia o taumattu ngateva uunguaane tani asuu taumattu, eghe lao sio tale voto ateva karika righi taumattu etana, me ghe poppoaa ta taumattu ngatoa va la nna ngaioghioghiaa, me la ghaa niasuu, me God aue ekkaluaa kaluira ssavoto. ⁵ Ila akapa ejidua, me taumattu ngakapa atoa eJerusalem, laghe lao sio tani nongo Jon. Laghe aaulia ngaotu kaluira ssavoto, me Jon ghe asuulala tale ateo ateeae eJodan. ⁶ Jon ghe aasae ghinnanina laghe gheleila tale uu kamolo, me ghe ai-iriaa paisi eteae viliki vulumakao ia. Ghe namanama toto me iruena nge tapaa tuvui. ⁷ Eghe aaulia ngaotu va, “Kateva taumattu aue emae emuli ta

ngetaghi, ia sarasarakaniaane elaulau sarasarakaniaaghi. Karika masi taumattu ngieghi va asuuiaa patu kkeghi, me apulaka oasa enaghinaghi unna aikasukasu. ⁸ Aghi aghaasuuem tale manu, me ia aue easuuem tale Spirit Manga ateva.”

Jon gheasuula Iesu

(Mat 3:13-17; Luk 3:21-22)

⁹ Tale isaa o nau Iesu ghe kasula eNasareti eGalilii, me ghe lao sio, me Jon ghe asuuela eJodan. ¹⁰ Nau eteva Iesu ghe lau sae mae tale paamanu eteva, eghe tarala epona liu ghe otiela, me Spiriti eteva nongina ghila ateva valusu ia ghe sio mae ta ngetana. ¹¹ Epona liu kateva lingi ngalo ghe uela va, “Io natughu io, aghailousiangailio, me masimasiaaghi ta ngetam namungaili.”

Satana ghe tootoongaala Iesu

(Mat 4:1-11; Luk 4:1-13)

¹² Katengaata ta Spiriti eteva ghe suula Iesu ghe ssola tale voto ateva karika righi taumattu ta ngetana. ¹³ Iesu ghe tokala ghaatingaulu (40) nau, me Satana ghe mae sio tani tootoongainia. Eghe tokatoka tee ghaata kkena nge tapaa tuvui etoa, me ensolo atoa laghe sio mae tani sausia.

Iesu ghetiuuala tani ppooodaa masi kiukiu

(Mat 4:12-17; Luk 4:14-15)

¹⁴ Nau eteva laghe atoka ssola Jon tale ale mata voovoo, Iesu ghe lao sio eGalilii, me ghe tiuaala tani ppooodaa masi kiukiuna God. ¹⁵ Eghe ue va, “Nau eteva God ghe aulieiniela ange rekatala, me ararimangalina ateva God ange kalakalanginala. Am nna ngaioghioghiaa, me am aikaaiia masi kiukiu.”

Iesu ghe kolola disaepolo ghaata

(Mat 4:18-22; Luk 5:1-11)

¹⁶ Iesu ghe kasukasu elaoao tale sama ateo talia ngateae eGalilii, me ghe tarala Saemon me nengana ta Andru. Lalu ghe lukuluku, poli tau ngelamana ilalua. ¹⁷ Iesu ghe uela ta ngetairarua va, “Amalu mae usieghi, me aue agheleiemalua me amalu tau ngai luku taumattu.” ¹⁸ Arovaeaata ta lalu ghe velu elokoila uneirarua uvena me lalu ghe usiela.

¹⁹ Iesu ghe mene kasu tau lao sio, me ghe tarala mene ghalua, Jeimis me nengana ta Jon, natuna ilalua Sebedi. Lalu ghe tokatoka tale olimoirarua paanaka ateva, me lalu ghe aaimonomonosiaa uneirarua uvena. ²⁰ Nau Iesu ghe tarailaluelu me ghe kololalue, me lalu ghe tingina vulu saela tamairarua tale paanaka ateva tee tau ngai uungu etoa, me lalu ghe usiela.

Iesu ghe ghelei emasinala taita ateva

raroai eteva etana

(Luk 4:31-37)

²¹ Laghe lao sio tale masaliki eteae eKapenium. Ta nau manga ateva, Iesu ghe ssola tale ale nivelu eitaua ngateva, me ghe aapasunga inangarina God ta taumattu ngatoa. ²² Nau eteva laghe nongola inangarina, laghe soghiaala, poli karika ghe aippooaa nongina tau ngai etoa,

1:11: Sams 2:7; Ais 42:1; Mat 12:18; Mak 9:7.

1:15: Mat 3:2. **1:22:** Mat 7:28-29.

1:13: Sams 91:11-13.

1:14: Mak 6:17.

aapasunga ngatoa tale inangari nipaopao, ta nongina taumattu ngateva matuutulienia ia.

²³ Elome tale ale nivelu eitaua ngateva, kateva taumattu raroai eteva ghe tokatoka etana. Ghe sama anamungailila me ghe uela va, ²⁴ “Iesu aNasareti io, umae sio tani ghelei sa ateva etaimami? Vara ughelei saasakieinamami? Akilakilaio, io manga io kapuna io God.” ²⁵ Iesu ghe uela ta raroai eteva va, “Umatua atoka, me ukupi vutive ghoa.” ²⁶ Me raroai eteva ghe soghesogheainiela, me ghe aore anamungailila, me ghe kupi vulu ghoa mae taumattu ngateva. ²⁷ Taumattu ngatoa laghe soghiaala voto ateva o ghe lutula, me laghe tiuaala tani aippooaa elome ta ngetaira. Laghe ue va, “Sa ateva ange lutula? Taumattu ngateva oia ange auliaala ouna niapasunga, me nongina taumattu ngateva matuutulienia aippooaane. Nau eaippooaa tee, raroai etoa la nonganongoa.” ²⁸ Arovaeaataaili ta kiukiuna voto Iesu ghe gheleila ghe kasu ekapa seela eGalilii.

Iesu ghe ghelei emasinala oroi taumattu

(Mat 8:14-17; Luk 4:38-41)

²⁹ Arovaeaata ta Iesu me taumattu ngatoa laghe kupi ghoa mae tale ale nivelu eitaua ngateva, me laghe lao sio tanganue Saemon me Andru, tee Jeimis me Jon. ³⁰ Alumuna vause ateva Saemon ghe iisiki, ghe asoaso tale komo poli vilikina ghe aanasa me matana ghe valavalanga. Vara me laghe auliaala ta Iesu va alumuna Saemon eiisiki. ³¹ Iesu ghe lao sio me ghe kunela nimane atelange, me ghe totu etokaiela. Aanasa ateva ghe kapala, me ia o vause ateva ghe kaisila aneira inana.

³² Ang ghe aitarrauui poli sinaka ateva ang ghe suula, me taumattu ngatoa laghe maeaa sio ta Iesu lo akapa atoa tau sessa ila me tee taumattu raroai etoa laghe tokatoka ta ngetaira. ³³ Taumattu ngakapa atoa tale masaliki eteae laghe velu eitauaala tale paa ngatamana ateae tale ale ateva. ³⁴ Iesu ghe ghelei emasinala oroi tau sessa atoa, me ghe tiu vella oroi raroai etoa. Raroai etoa laghe kilakilaia, liuna avalua o me ghe pao rungainilala va karika la mene sama.

Iesu ghe poppooaa

(Luk 4:42-44)

³⁵ Elue talaua poopooa Iesu ghe ghue totula, me ghe kasu vulila masaliki eteae, me ghe ssola tale kateva voto karika righi taumattu etana, me ghe tiuaala tani looloo sae. ³⁶ Saemon me kapuna atoa laghe aimulila tani laa paea. ³⁷ Nau laghe taraiela me laghe uela va, “Taumattu ngakapaaili etoa la paepaeo!”

³⁸ Iesu ghe liula me ghe uela va, “Ita lao tale mene kasina masaliki kalakalangina. Aghaloanna tani laa ppooaa tee etaira, poli mausina avalua o me aghe mae sio.” ³⁹ Eghe kasu ekapa seela tale masaliki eGalilii me ghe poppooaa tale aleira ale nivelu eitauaa, me ghe tiutiu velu raroai etoa ta taumattu ngatoa.

*Iesu ghe ghelei emasinala
tau tasussukuna ateva*

(Mat 8:1-4; Luk 5:12-16)

⁴⁰ Kateva taita tau tasussukuna ia ghe mae sio ta Iesu, me namungaili ta ghe kolomila Iesu. Taita ateva oia ghe suuiala ta liue kkena Iesu, me ghe uela va, “Marova ualoanna, uroo tani ghelei eraarangisanaieghi ta matane God.”

⁴¹ Iesu ghe alousiusi teeielaa, me ghe saoaa saela nimane ate-lange etana me ghe uela va, “Aghaloanna. Angu raarangisanala!”

⁴² Katengaata ta tasussuku eteva ghe kapala, me taita ateva ghe masinala.

⁴³ Iesu ghe sungiela va ekasu parasi, me eghe aulia ngasarasarakanala va, ⁴⁴ “Urau mene auliaa voto elutula etam. Ulao me ulaa ghapasun-gainio ta pristi eteva, me ughelei aiaavusuvusuena tani apasunga va vilikim ange raarangisanala, nongina Moses ghe auliaala. Me taumattu ngatoa aue la kila va angu raarangisanala.” ⁴⁵ Me nau taita ateva ghe kupi ghoala eghe auliaala ta taumattu ngatoa sa ateva ghe lutula etana. Ghe kiukiuaa ngakapa seela tale masaliki ghe lao sio etana. Liuna avalua o me Iesu karika ghe mene laolao tale tummatavanga, ta ghe nim tokatoka tale voto atoa karika righi taumattu etaira, me taumattu ngatoa tale isaa akapa masaliki laghe mae taataraia.

2

*Iesu ghe ghelei emasinala taumattu ngateva karakanna ia
(Mat 9:1-8; Luk 5:17-26)*

¹ Kasina nau ghe lange sio me Iesu ghe mene lao sio tale masalikina atuae eKapenium, me taumattu ngatoa laghe nongola va etokatoka elome tale ale ateva. ² Taumattu ngatoa laghe pasula tale ale ateva, eghe ghoala arau etapaa ngatamana, me Iesu ghe poppoaa inangariina God.

³ Katoa taumattu laghe maeara sio kateva taita, karakanna ia, ta Iesu. Ghaata etaira laghe saue mae sio. ⁴ Pasueili ale ateva, me karika laghe rooroo tani laoaa ngakalakalaa tau sessa ateva ta Iesu. Liuna avalua o me laghe saula tau sessa ateva, me laghe saeainiela tale pungani ngale ateva, Iesu ghe tokatoka elome etana. Laghe ghaa vella kasina aiaakou tale pungani ngale ateva, me laghe tau siola tau sessa ateva tale komona atuae elome tale ale ateva. ⁵ Iesu ghe tarala uneira niaikaiaia va namuu, me ghe uela ta tau sessa ateva va, “Natughu, kalum ssavoto ange kapala.”

⁶ Katoa tani tau ngai aapasunga tale inangari nipaopao laghe tokatoka elome tale ale ateva laghe nongola, me laghe aannaa va, ⁷ “Vaalua me eaippooa ngavalua o? Ange ghaala liuna ateva God! Karika teva erooroo tani kkaluaa ssavoto, ta God nongal!”

⁸ Arovaeaata ta Iesu ghe kilala tale urunguitanina ateva, me ghe uela etaira va, “Vaalua me am nanna ngavalua o elome etaimim? ⁹ Sa ateva voto malumina tani auliaa ta taumattu ngateva karakanna ia? Tani ue va, ‘Kalum ssavoto ange kapala’ o tani ue va, ‘Tingina saela, me usau komom me ukasu?’ ¹⁰ Me aghaloanna va am tara kila, va Natuna ateva Taumattu ngateva matuutulienaa teeia tani kkaluaa ssavoto tale kosa ateva...” Vara me Iesu ghe taatara lao sio tale taumattu ngateva karakanna ia, me ghe uela va, ¹¹ “Aghaauliaa ta ngetam va tingina saela, me usau komom, me ulao tanganuem.” ¹² Taumattu ngateva ghe tingina saela, me ghe saula komona, me ghe kasula. Ila akapa taumattu ngatoa

laghe tarala sa ateva ghe lutula, laghe soghiaala, me laghe tau saela ararina atae God, me laghe uela va, "Emua arau karika ami ghe taatara righi voto avalua oia, karikaaili!"

*Iesu ghe kolola Livae
(Mat 9:9-13; Luk 5:27-32)*

¹³ Iesu ghe kupi ghoala tale ale ateva, me ghe kasukasu elaoao elosamarra tale kinatama ateo talia ngateae. Orieili taumattu ngatoa laghe mene mae sio tani nongoa nau ghe aapasunga voto. ¹⁴ Eghe kasukasu elaoao me ghe tarala Livae, natuna Alpeas, ghe tokatoka tale natu ngale arighi aighaa takis ia, me Iesu ghe uela etana va, "Mae usieghi." Ghe tingina saela, me ghe usila Iesu.

¹⁵ Nau Iesu ghe namanama tanganue Livae, oroi ila taumattu ngatoa aighaa takis ila, me tau ssavoto atoa, laghe lao sio tani namanama tee Iesu me kapuna disaepolo atoa, poli oroi ila lo atoa laghe usiusia. ¹⁶ Katoa tana taumattu tau ngai aapasunga ila tale inangari nipaopao, me taumattu tale Paresi ila, laghe tarala Iesu ghe namanama tee tau ngai ghelei ssavoto atoa me tau ngai ghaa takis atoa. Laghe uela ta kapuna disaepolo atoa va, "Vaalua me enamanama tee tau ngai ghaa takis me tau ssavoto atoa?"

¹⁷ Iesu ghe nongola inangariira me ghe uela ta tau ngai aapasunga ngatoa va, "Lo atoa masina ila karika la ghaloanna niaisausi. Tau sessa nonga atoa la laa taatara dokta. Karika aghe sio mae tani kolo ghulughuluena atoa taumattu. Aghe sio mae tani kolo tau ssavoto atoa."

*Inangarina Iesu me gheeleiaira ajiu etoa karika elaoao aitauaa
(Mat 9:14-17; Luk 5:33-39)*

¹⁸ Kateva nau kapuna disaepolo atoa Jon me kapuira tee atoa disaepolo Paresi etoa laghe naenae. Katoa tana taumattu laghe mae sio ta Iesu, me laghe kolomila va, "Vaalua me kapuna disaepolo atoa Jon me kapuira disaepolo tee atoa Paresi etoa la naenae, me kapum atoa disaepolo karika?"

¹⁹ Iesu ghe uela va, "Vaalua kapuna atoa taumattu ngateva ange anna tani lai la ghele nae? Karika la rooroo, nau taita ateva ange aloanna tani lai me etokatoka tee kapuna atoa, karika la naenae. ²⁰ Nau eteva aue emae me la ghaa velu taita ateva, ia o nau eteva aue la nae.

²¹ "Karika teva egħaagħhaa tuku ouna ateva kalio, me evabbai teva tuku pokane aiaasae. Marova egħelei me nau eporaia, tuku ouna ateva aue egħauna, me egħelei mara ateva emene namuu. ²² Me karika teva taumattu etottoli kaai ouna uaeni tale pokane ateva aikaai. Marova egħelei evalua o, aue ouna uaeni egħelei polaki aikaai manu eteva, me aue ilalua akpa uaeni eteva me aikaaina ateva aue lalu peisaane. Karika, la kaokao ouna uaeni tale ouna aikaai."

*Vau tale nau manga ateva
(Mat 12:1-8; Luk 6:1-5)*

²³ Kateva nau manga, Iesu ghe kasu valaala tale utana atingiu, utani uiti ia. Kapuna disaepolo atoa laghe kasukasu eitauaa teeia, me laghe għaala kasina tani uiti me laghe namala. ²⁴ Paresi etoa laghe uela ta Iesu va, "Tarala, vaalua me la għeeli voto o, inangari nipaopao eue va karika masina tani għelei tale nau manga ateva?"

²⁵ Iesu ghe liula inangariira me ghe uela va, “Vaalua, karika am ghe ritila kiukiuna atae Deivit ghe gheleila, nau ia me kapuna atoa laghe maloola? ²⁶ Nau ta Abiata, namuu ia tale pristi etoa, Deivit ghe kupi ssola tale alena ateva God, me ghe namala verete laghe amangala, pristi etoa nonga la rooroo tani nama, me ghe taula kasina ta kapuna atoa.”

²⁷ Iesu ghe mene auliaa tee lao sio va, “God ghe gheleila nau manga ateva mausi taumattu ngatoa, karika God ghe gheleila taumattu ngatoa mausi nau manga ateva. ²⁸ Liuna avalua o me Natuna ateva Taumattu ngateva ia tee Vau ia tale nau manga ateva.”

3

*Iesu ghe ghelei emasinala taumattu ngateva tale nau manga ateva
(Mat 12:9-14; Luk 6:6-11)*

¹ Iesu ghe mene kupi ssola tale kateva ale nivelu eitauaa, me kateva taita ghe tokatoka, katelange nimane matena ia. ² Katoa tau ngai ssateena Iesu mataira ghe laolao nonga ta Iesu va, Iesu aue eghelei emasinaia tale nau manga ateva, o karika. Laghe annaa va marova eghelei emasinaia, aue la laoaa Iesu tale niaisakei. ³ Iesu ghe uela ta taita ateva nimane atelange matena ia va, “Tingina saela, me umae toko.”

⁴ Me Iesu ghe kolomilala va, “Vaalua, tale inangari nipaopao, ita rooroo tani ghelei masi niuungu ta nau manga ateva, o tani ghelei sesa niuungu? Ita rooroo tani sausi mene kateva taumattu me erooroo tani toka amasina, o ita uvi ematea?” Tau ngai ssateena atoa Iesu karika laghe liu poila inangarina Iesu.

⁵ Iesu ghe aitaraa seela ta taumattu ngatoa me ghe sessaiela. Eghe tarala va karika righi niaielousi tale urunguitaniira, liuna avalua o me karika ghe masinala ta ngetana. Eghe uela ta taita ateva va, “Korosila nimam atelange.” Taita ateva ghe korosila nimane atelange, me ghe masinala. ⁶ Nau Paresi etoa laghe tarala voto o ghe lutula, laghe kupi ghoala, me laghe lao sio tani tara kapuna atoa Herot. Laghe ailoeuala salana vaalua la rooroo tani uvi ematea Iesu.

Oroieili taumattu ngatoa laghe aimuli teela Iesu

⁷ Iesu me kapuna disaepolo atoa laghe kasu vulila voto ateva o, me laghe lao sio tale ateo talia ngateae eGalilii. Tana taumattu ngatoa laghe aimuli teeielia. Taumattu tale distriki eteva eGalilii, ejjudia, ⁸ eJerusalem, distriki eteva eIdumea, me pai kativilau tale ateo atae eJodan, me tale patunganue masau eTaer me Saedon, laghe nongola voto Iesu ghe gheleila, me oroieili taumattu laghe mene mae sio ta Iesu.

⁹ Iesu ghe uela ta kapuna disaepolo atoa va, “Am aimonomonosiaala teva paanaka, poli oroieili taumattu ngatoa aue la mae, me aue la ghaisiriki tani mae taraieghi.” ¹⁰ Poli ang ghe ghelei emasinala oroieili tau sessa atoa, liuna avalua o me oroi tau sessa atoa laghe aloanna tani mae akalakalaa me tani poso Iesu. ¹¹ Nau ekapa atoa lo atoa raroai etoa laghe tokatoka ta ngetaira laghe taatara Iesu, laghe tuuturru ta liue kkena me laghe samasama atingina me laghe ue va, “Io natuna io God.” ¹² Iesu ghe aulia ngakorokorongana ta ngetaira va la rau mene aotu va ia see.

*Iesu ghe kolola kasangaulu ghalua apostolo
(Mat 10:1-4; Luk 6:12-16)*

¹³ Iesu ghe saela tale motouru. Eghe kolola lo atoa ghe aaloannaailiila, me laghe mae sio ta ngetana. ¹⁴ Eghe suietoongaala kasangaulu ghalua (12) taumattu va ila la toka aitauaa teeia, me ghe aselala va apostolo ila. Aue esungila tani ppooa ngakapa see inangarina ateva God, ¹⁵ me aue etau lao sarasarakanan tani suu velu raroai etoa. ¹⁶ Eghe kolola kasangaulu ghalua: Saemon ta kateva, Iesu ghe aseala va Pita etana; ¹⁷ eghe kolo teela Jeimis me Jon, natuna ilalua Sebedi (eghe asela arariirarua aluae ta Boaneges, malloeanina va “taumattu nongina palapalanga ateva eaangari”); ¹⁸ eghe kolo teela Andru, Pilip, Batolomiu, Matiu, Tomas, Jeimis natuna ia Alpeas, Tadias, Saemon laghe aseala va Selot ia, ¹⁹ me Jiudas Iskariot, ia auena ghe tau lao Iesu ta nimaira tau ngai ssateena atoa.

*Iesu me Belsibul
(Mat 12:22-32; Luk 11:14-23; 12:10)*

²⁰ Iesu eghe lao sio tale ale ateva eghe tokatoka etana, me poli tana taumattu ngatoa laghe mene mae sio tani velu eitauaa, Iesu me kapuna disaepolo atoa karika righi nauira tani namanama. ²¹ Kapuna atoa Iesu laghe nongola voto eghe poppoaa me ghe gheelei, me laghe mae sio tani kune velua, ta laghe ue va, “Ang ghe veevenala.”

²² Katoa tau ngai aapasunga tale inangari nipaopao laghe kasula eJerusalem me laghe ue va, “Belsibul ange kupiela. Etiutiu velu raroai etoa tale sarasarakaniaane Belsibul, ia namuu ia tale raroai etoa.”

²³ Iesu ghe kolo aitauuinilala me ghe auliaala kateae kiukiu niaimatoonga. Eghe uela va, “Vaalua, Satana erooroo tani sungi velu Satana? ²⁴ Marova taumattu tale kateva patunganua la tam tingina aitauaa, me niaiuvi eteae elutu, karika aue la korokorongana. ²⁵ Marova taumattu tale ale ateva la tam tingina aitauaa me niaiuvi elutu, karika aue la korokorongana. ²⁶ Me marova Satana essa tee kapuna atoa aue ghalue ila, me eghalua atoka ila, karika aue la korokorongana. Aue la ruu ekilanga. ²⁷ Karika teva taumattu erooroo tani kupi sso tanganue taumattu ngateva sarasarakanan ia me eghaa peina. Marova ealoanna, eiri etoka tau ngalena ateva, me evira ghaa peina. ²⁸ Aghaulia ngakoronna etaimim va God aue ekkaluua isaa akapa ssavoto me sesa nginangari taumattu eaauliaa saasakiaa tee God. ²⁹ Me marova taumattu eauliaa saasakiaa tale Spirit Manga ateva, God karika aue ekkaluua isaa oia me auena. Ia oia lo ateva ssavoto aue etoka ta ngetana nau ekapa atoa.” ³⁰ Iesu ghe auliaala poli laghe ue va, “Raroai eteva etokatoka etana.”

*Kinna Iesu me kapuna atoa
(Mat 12:46-50; Luk 8:19-21)*

³¹ Kinna Iesu me nengane taita atoa laghe rekatala, me laghe nim suula inangari va eghoa taraila. ³² Orioieili taumattu ngatoa laghe tokatoka talieinia, me laghe uela ta ngetana va, “Kinam me nengam taita atoa me vause atoa eleka la paepaeo.”

³³ Iesu ghe liula me ghe uela va, “See ia kinaghi me see ila kapughu taita atoa?” ³⁴ Eghe aitaraa seela tale taumattu ghe taatalia ngatokaia,

me ghe uela va, "Taumattu oia kinaghi me nengaghi ila! ³⁵ See eaimuli tee nannaane Tamaghi, ia nengaghi taita ia me nengaghi vause ia me kinaghi ia."

4

*Kiukiu niaimatoonga tale tau ngai pasa
katu ue ngai eteva*

(Mat 13:1-9; Luk 8:4-8)

¹ Kateva nau Iesu ghe mene tiuaala tani apasunga tale sama ateo talia ngateae, me tana taumattu ngatoa laghe mae sio tani mene velu eitauaa. Poli oroieili taumattu, Iesu ghe saesaala tale paanaka ateva, me ghe vukala ghoala elamana, me ghe toka siola, me taumattu ngatoa laghe tinginala elosamarra. ² Iesu ghe aapasunga oroieili voto tale kiukiu niaimatoonga. Ghe ue ta ngetaira va, ³ "Am nongola! Tau ngai pasa katu ue ngai eteva ghe lao sio tani pasa aina katu ue ngai. ⁴ Nau eteva ghe kaokaoaala katu ue ngai, kasina ghe katuula tapaa salana, me ghila atoa laghe namala. ⁵ Kasina tana katu ue ngai ghe katuula tale voto ateva sakolo ia, karika oroi kosa, gharovaeaata ta ghe pinosala, poli karika lluse ia. ⁶ Nau eteva sinaka ateva ghe saela, eghe sinaki ematela, poli oane karika ghe sio liula ta eeu atu ia. ⁷ Kasina ghe katuula tale voto ateva uasa karasa atoa ta ngetana. Nau laghe pinosala, uasa karasa atoa laghe kavililala, karika laghe kunela. ⁸ Kasina katu ue ngai ghe katuula tale masi kosa. Nau laghe pinosala laghe kuneaala ueneira, kasina ghe kuneaala kotolungaulu (30), kasina ghaonomongaulu (60), me kasina kateva ai (100)." ⁹ Vara me ghe uela va, "Lo ateva talingane manee tani nongo, aue enongo!"

*Mausina kiukiu niaimatoonga
(Mat 13:10-17; Luk 8:9-10)*

¹⁰ Nau eteva Iesu nonga, me kasangaulu ghalua kapuna disaepolo, me mene katoa tana taumattu laghe tokatoka, me laghe kolomila Iesu tale malloeana kiukiu niaimatoonga. ¹¹ Iesu ghe liula me ghe uela va, "God ang ghe apasungaala etaimim voto eaaisulia tale ararimangalina ateva God, me tale taumattu ngeleka, isaa akapa voto aghaauliaa tale kiukiu niaimatoonga. ¹² Liuna avalua o me inangari tale Uru ngai Manga ateva aue elutu ekoronna, poli,

" 'aue la tara me karika aue la tara kila,
aue la nongo me karika aloira aue emasaanga,
la rau aikolikolliaa, me God ekkaluuaa kaluira ssavoto.' "

*Iesu ghe auliaala malloeana kiukiu niaimatoonga ateae
(Mat 13:18-23; Luk 8:11-15)*

¹³ Vara me Iesu ghe uela va, "Karika aloimim ange masaangaala kiukiu niaimatoonga atea? Vaalua aue aloimim emasaanga mene kasina kiukiu niaimatoonga? ¹⁴ Tau ngai pasa katu ue ngai eteva ghe pasala inangari eteva. ¹⁵ Kasina taumattu nongina katu ue ngai ghe katuula tale salana atikirighi. Nau la nonganongo inangarina ateva God, katengaata ta Satana emae ghaaghhaa velu isaa o inangari. ¹⁶ Me katoa tana taumattu nongina katu ue ngai ghe katuula tale voto ateva sakolo ia. La nonganongo me la ghaaghhaa me la masimasi. ¹⁷ Me

nongina ai erighi ghauna oane karika esiosio liu, la masimasi nau eteva la nonganongo ta aitiutiu, va nau eteva la ghaagħha maamatana mausi inangarina ateva God, la kaakatuu. ¹⁸ Lo tana katu ue ngai ghe katuula elome tale uasa karasa eaimatoonga taumattu la nonganongo inangarina God, ¹⁹ me nanna aira namungaili tale voto tale kosa ateva, nongina aloanna aira tani għha viliki veu me mene kasina voto. Isaa o voto tale kosa ateva ekaakavili ekatuu inangarina ateva God me karika epiipinosa va emene kuneaa righi ueneira. ²⁰ Me llo katu ue ngai ghe katuula tale masi kosa, eaimatoonga taumattu la nonganongo inangarina ateva God me la aiesoaa ta ngetana, me la kuukuneaa masi uene, kasina kotolungaulu, kasina għaonomongaulu me kasina kateva ai.”

*Taumattu ngatoa karika la paapakeaa
lam atae*
(Luk 8:16-18)

²¹ Vara me Iesu ghe kolomilala va, “Vaalua! Nau eteva am għaagħha lam atae, am aatoka pakeainia tale aikaai eteva me tale aisalo, o am aatokaie sae tale aitiitinginane ateva? ²² Voto ghaine eaaisulia auena eotu tale tummatavanga, me isaa akpa voto taumattu egħeelei eisulia, auena eotu. ²³ Lo ateva talingane manee tani nongo, aue enongo!”

²⁴ Jesu ghe mene auliaa tee lao sio va, “Inangari angam nongola, am nnaa parasi. Arova am għelei emasina tale taumattu, Vau palepale aue emene liu ta ngetaimim, me aue emene saoaa sae mene righi. ²⁵ See righi voto etana, aue God emene taula, me lo ateva karika righi voto etana aue eghħa velu righi lutu voto etana.”

Kiukiu niāimatoonga tale katu uiti
²⁶ Jesu ghe mene auliaa tee lao sio va, “Ararimangalina ateva God nongina taumattu ngateva ghe lao sio tani velu katu uiti tale utana atingiu, ²⁷ vara eleivoo taumattu ngateva ghe aseasekanua, me ellaa ghe laa għelei mene kasina uunguaane, me katu uiti għe pinosala, me għe namuula, me taumattu ngateva karika għe kilala vaalua għe pinosala me għe namuula. ²⁸ Kosa ateva nonga għe apinosala — me emulina lagħe kunela. Aitiut vulena ateva, vara me aikouna ateva, emulina għe kuneala uene. ²⁹ Nau eteva utana atingiu għe matuennala, taumattu ngateva għe lao sio tani sai uiti.”

*Kiukiu niāimatoonga tale
katu ue ngai erighi (mastet)*
(Mat 13:31-32; Luk 13:18-19)

³⁰ Jesu ghe mene auliaala va, “Aue ita kolomi va, ‘Ararimangalina ateva God vaalue ia? Vaalua aue ita aimatoongainia?” ³¹ Ia nongina katu ue ngai erighi la kolokoloa va mastet. Nau eteva la pasapasaia tapaa kosa, għaunaaili ia. ³² Nau la pasapasaia epiipinosa me enaana-mungaili, karika nongina mene kasina katu ue ngai tale utana ateva. Laangina atoa namungaili ila, ghila atoa la roroo tani laa toka palluu.”

*Iesu ghe aulia ngaotula inangarina
tale kiukiu niaimatoonga*
(Mat 13:34-35)

³³ Nau eteva Iesu ghe aaulia ngaotu inangarina tale taumattu ngatoa, ghe aauliaa tale kiukiu niaimatoonga ghe rooroo tale nongonongoaaira taumattu ngatoa. ³⁴ Karika ghe aaulia ngamasalika teva voto ta ghe aauliaa nonga tale kiukiu niaimatoonga. Nau eteva ia nonga me kapuna disaepolo atoa, me ghe auliaala malloeanina isaa o kiukiu niaimatoonga.

*Iesu ghe aippooaala me paka ttasi eteva
ghe kapala*

(Mat 8:23-27; Luk 8:22-25)

³⁵ Elo alai tale ia o nau eteva, Iesu ghe uela ta kapuna disaepolo atoa va, “Ita lao tale pai kativilau tale ateo talia ngateae.” ³⁶ Laghe kasu vulila taumattu ngatoa, me laghe saesaela tale paanaka ateva Iesu ang ghe saesae atokala etana, me laghe tiu ghoala. Mene kasina tana paanaka tee laghe tiu ghoa aitauua teeilala. ³⁷ Vara me paka ttasi eteva ghe tiuaala, me kotoo atoa laghe tiuaala tani sae tale paanaka ateva, me manu eteva ang ghe pasupasu tale paanaka ateva. ³⁸ Iesu ghe aseasekanua emuli tale paanaka ateva, ghe panukanala tale pilo ateva. Vara me laghe anguniela me laghe uela va, “Tisa, ghaisa ngarighi ita vuluu, me koti karika unannaa maamauluuaaita va ita rau mate?”

³⁹ Iesu ghe anguula, me ghe paola ttasi eteva, me ghe uela ta kotoo atoa va, “Am matua avukalala!” me ttasi eteva ghe ruula, me luei eteva ghe asola. ⁴⁰ Vara me ghe kolomila kapuna disaepolo atoa va, “Vaalua me am maamatautu? Karika am ghe aikaaiiaa?”

⁴¹ Laghe matautu saasakiaala, me laghe toka aikolomieinila va, “Saa taumattu ia taumattu ngateva oia, ta kotoo atoa me kuukuu eteva ngila nongo usilainiela?”

5

*Iesu ghe ghelei emasinala taumattu ngateva raroai etoa etana
(Mat 8:28-34; Luk 8:26-39)*

¹ Iesu me kapuna disaepolo atoa laghe laa rekata sio tale pai kativilau tale ateo talia ngateae, tanganueira aGeresa* ngatoa. ² Nau eteva ghe kkurela tale paanaka ateva, arovaeaata ta kateva taumattu raroai eteva ghe tokatoka etana ghe mae sio tani sou Iesu. Taita ateva oia ghe kupi ghoa mae tale voto ateva liu niaikkaiaa ia. ³ Eghe tokatoka tale isaa o voto, me karika teva taumattu ghe rooroo tani iri etokaia, me karika laghe rooroo tani iri etokaia tee tale sene. ⁴ Oroiaata laghe gheelei runga poi nimana me kekena tale sene, me ghe gheelei epatepate poli sarasarakanaili ia. Karika teva taumattu ghe rooroo tani poso atokaia. ⁵ Nau ekapaaili tale voo me llaa eghe tokatoka tale voto ateva liu niaikkaiaa ia me tale motouru. Eghe ovaova atingina, me eghe saisai ririi vilikina tale atu matakerengana.

⁶ Nau eghe tara amasau lao sio Iesu, eghe iloula tani laa sousou Iesu, me ghe suuiaala ta liue kkena Iesu. ⁷ Me namuu ta ghe samala me ghe uela va, “Iesu io natuna io God iaaili epona, sa ateva ualoanna

* **5:1:** aGeresa Kasina uru ngai laghe pitila, laghe uela va, aGadara, me kasina laghe uela va, aGergesa. **5:7:** Mak 1:24.

tani gheleia etaghi? Aghaaulia ngakoronna tale ararina atae God va, karika umene ghelei saasakieinieghi.”⁸ Poli Iesu ang ghe uela etana va, “Raroai eteva, kipi vulu ghoa mae taumattu ngateva.”

⁹ Vara me Iesu ghe kolomiela va, “See ararim atae?”

Me ghe uela va, “Ararighi eteae ta Lijen, poli karika va aghi nonga, ta oroi iemami.”¹⁰ Ghaisaata arau ghe kolomi esarasarakanala Iesu va erau mene tiu vella va la kasu vuli ia o voto ateva.

¹¹ Karika masau tale tuku saesaena ateva tinaua mosu etingiu ghe tingina namanama. ¹² Raroai etoa laghe kolomi esarasarakanala Iesu va, “Usungi veluemami sae tale mosu etoa, me ami sae kipi etaira.” ¹³ Iesu ghe tau vella raroai etoa laghe kipi vulu ghoa mae taita ateva, me laghe laa sae kipi sso tale mosu etoa. Katengaata ta tinaua atingiu ghe ttiroula, me laghe laa ghoa aoso velu sio tale vallae. Laghe katuu velu siola tale ateo talia ngateae, me laghe matela. Tinaua atingiu eghe arropi ematelala ghe roola ghalua airari (2,000).

¹⁴ Lo atoa laghe aaitaraa mosu etoa laghe iloula. Laghe lao sio elo ale me tapaa ngutana, me laghe kiukiuuala voto ghe lutula ta mene katoa taumattu, me taumattu ngatoa laghe mae sio tani tara voto ghe lutula. ¹⁵ Laghe rekatala ta Iesu me laghe tarala taumattu ngateva emua arau oroieili raroai etoa laghe tokatoka etana. Me ia oia, eghe aaitiitii, me nannaane masina me eghe tokatoka. Laghe taraiela, me laghe matautula. ¹⁶ Taumattu ngatoa laghe tarala voto Iesu ghe gheleila, me laghe kiukiuuala taita ateva raroai etoa etana me Iesu ghe ghelei emasinaiela me voto ghe lutula tale tinaua mosu etingiu. ¹⁷ Nau eteva laghe nongola kiukiu, ila akapa laghe aulia ngasarasarakanala ta Iesu va karika emene toka tale masalikiira atae, ta elao ppae tale kasina masaliki.

¹⁸ Nau Iesu ang ghe saesae tale paanaka ateva, taita ateva Iesu ghe tiu vella raroai etoa etana ghe kolomi esarasarakanala Iesu va, “Aghaloanna tani usio.”¹⁹ Iesu karika ghe annala. Ghe uela etana va, “Lao sio tangantuem me ta kapum atoa. Ulaa ghauliaa voto Vau eteva ghe gheleila tani sausio, me alousiusiaane etam.”²⁰ Taita ateva ghe lao sio tangantuena, me ghe tiuaala tani auliaa inangari me voto Iesu ghe gheleila etana tale Kasangauluae Masaliki Taatara. Taumattu ngakapa atoa laghe nongola, me laghe soghiaala isaa o voto.

*Iesu ghe ghelei emasinala aliki vause arighi me vause namu ngateva
(Mat 9:18-26; Luk 8:40-56)*

²¹ Nau Iesu ghe mene lao sio tale pai kativilau tale ateo talia ngateae, oroi taumattu ngatoa laghe mene aimuli teeiela, nau ghe tokatoka elosamarra. ²² Kateva namuu tale ale nivelu eitaua ngateva, ararina atae ta Jaeras, ghe mae sio me ghe suuiala ta liue kkena Iesu,²³ me ghe kolomi esarasarakanala Iesu va, “Natughu vause arighi gharighi tau emate. Aghaloannaaili va umae saoaa nimam etana, me aue emasina me emene toka.”²⁴ Me Iesu ghe usiela.

Oroieili taumattu ngatoa laghe usiusi Iesu, me laghe tomtomua. ²⁵ Kateva vause ie tee elome tale taumattu o, rae ateva eghe iiloueinia ghe roola kasangaulu ghaluae (12) ninamanama. ²⁶ Nau etoa ghe laa taatara dokta ngatoa. Laghe tootoonga tani sausia, me karika, ta laghe nim tautau lao oroi mmarikana. Unna viliki veu ghe nim kapakapa tani pae niaisausi, me karika ghe maamasina, me ang ghe nim sessaaili.

²⁷ Nau eghe nongola kiukiuna Iesu, eghe mae sio tani paea, me ie tee eghe tiitingina elome tale taumattu ngatoa pasueili ila me laghe tomtom Iesu. Eghe lao akalakalangina sio emuli ta Iesu, me ghe posola unna aiaasae ngeleka ateva Iesu,²⁸ poli eghe annaala va, “Marova anim poso unna aiaasae ngeleka ateva, aue amasina.”²⁹ Katengaata ta rae ateva ghe iiloueinia ghe ruula, me ghe ateateaala va ghe masinala.

³⁰ Katengaata ta Iesu ghe ateateaala va kasina tani sarasarakaniaane tani ghelei emasina taumattu ghe kasula etana. Liuna avalua o me ghe kiriela me ghe uela va, “See eposola uneghi aiaasae ngeleka ateva?”

³¹ Kapuna disaepolo atoa laghe uela va, “Karika utaatara tana taumattu ngatoa la tomtomuo? Vaalua me ukookolomi va see eposola unem aiaasae ngeleka ateva?”

³² Iesu ghe kiriela me ghe aitaraa see va see ghe posoala. ³³ Me vause ateva ghe kilala voto ghe lutula etana, me ang ghe maamatautu, me ang ghe reterete. Eghe mae sio me ghe suuiaala ta liue kkena Iesu, me ghe aulia ngakapala voto ghe lutula etana. ³⁴ Iesu ghe uela etana va, “Natughu, tale unem niaikaaiaa etaghi angu masinala. Kasula, me urau mene annaa poli anem isiki eteva ange kapala.”

³⁵ Iesu ghe aippooaa nonga me taumattu ngatoa, kapuna ila namu ngateva tale ale nivelu eitaaua ngateva, laghe rekatala. Laghe auliaala ta Jaeras va, “Natum ange matela. Vaalua me uanna tani ghelei Tisa va eainongieinia tani lao tanganuem?”

³⁶ Iesu karika ghe nongo usilaala. Eghe uela ta namu ngateva va, “Urau mene matautu. Uaikaaiaa nonga.”

³⁷ Pita, Jeimis me Jon, nengana Jeimis, ilotolu nonga lotolu ghe lao aitauaa teeie sio tanganue Jaeras, me eghe uela ta mene katoa taumattu va la rau mene usia. ³⁸ Laghe laa rekata sio tanganue namu ngateva, me Iesu ghe nongola niaingalaaii eteae, me ghe tarala taumattu ngatoa laghe ngangngala anamungaili. ³⁹ Eghe kipi ssola me ghe uela etaira va, “Vaalua me am ghelei niaingalaaii eteae, me am ngangngala atingina? Aliki eteva oia karika va ematela. Enim asesekanua.” ⁴⁰ Laghe rrila me laghe kangaala Iesu.

Eghe rrila me ghe sungi velu ekapaila ghoala eleka, me ghe kolola nonga kinna me tamane vause arighi me kapuna disaepolo kotolu, me laghe kipi ssola tale rum atiulu aliki eteva eghe asoaso etana.

⁴¹ Eghe kune siola nimane aliki eteva me ghe uela va, “*Talita kum!*” (malloeanina va, “Aliko vause arighi, aghauliaa etam va totula!”)

⁴² Katengaata ta aliki vause arighi ghe totu saela, me ghe kasukasula. Nau laghe tarala voto o ghe lutula, laghe soghiaala. Aliki vause arighi oia anna ninamanama kasangaulu ghaluae (12). ⁴³ Iesu ghe aulia ngasarasarakanala etaira va karika la mene laa auliaa see voto o ghe lutula. Eghe uela va la tau lao righi inana, me aliki vause arighi enama.

6

*ANasareti etoa laghe liula viliira ta Iesu
(Mat 13:53-58; Luk 4:16-30)*

¹ Iesu ghe kasu vulila masaliki eteae o, me ghe lao sio tale masalikina tuunga ateae. Kapuna disaepolo atoa laghe aimuli teeielia. ² Vara

nau manga ateva, me ghe tiuaala tani apasunga voto tale taumattu ngatoa tale ale nivelu eitaua ngateva. Orieili taumattu laghe nongola inangari, me laghe mene ounala tani nongo, me laghe uela va, "Ia oia taumattu ngateva, eaa ghe ghaala inangari oia? Vaalua ghe ghaala ase alomasaanga ateva oia? Me vaalua me egheelei tee mirikolo sarasarakanaili? ³ Nim tau ngai atulu ale ia, nenge? Natuna ia Meri tue me nenga ila me Jeimis, Josep,* Jiuda me Saemon. Kapuna vause atoa la tokatoka teeita." Laghe aaulia ngavalua o poli ghe sessaila etana.

⁴ Iesu ghe uela etaira va, "Propete ateva ararina ateae tale isaa akapa masaliki. Me tale masalikina tuunga ateae, me elome tale mangalina atoa, me tale alena tuunga ateva, karika teae ararina." ⁵ Karika ghe rooroo tani ghelei righi mirikolo okae. Eghe nim saoala nimane tale taumattu karika oroi, me ghe ghelei emasinailala. ⁶ Eghe soghiaala uneira niaikaaiia ta ngetana karika namuu.

*Iesu ghe tau lao sio niuungu ta 12 disaepolo
(Mat 10:1, 5-15; Luk 9:1-6)*

Me ghe lao ppae sio tale kasina masaliki tani apasunga. ⁷ Me ghe kolo aitauaala kasangaulu ghalua (12) disaepolo, me ghe sungilala ghalua ghalua. Ghe tau lao sio matuutulienia tani tiu velu raroai ta taumattu ngatoa.

⁸ Me ghe uela etaira va, "Am ghaa aikkatuluimim me am rau mene ghaa mene righi voto. Am rau mene ghaa righi inana, aikakkaai me righi viliki veu tale aikaai viliki veu. ⁹ Am asae aikasukasu, me karika am mene ghaa ghalua aiaasae. ¹⁰ Arova am rekata tale kateae masaliki, me am toka tale lo ateva ale, am toka o, lomasina ta am kasu vuli lo ateae o masaliki. ¹¹ Me arova teae masaliki etam ghaaiem, me karika la ghadoanna tani nongo inangriimim, am kasu. Me nau eteva ngam aloanna tani kasu, am rariaa velu au kosa ta kekeimim, me aue la kila va voto la gheelei karika masina."

¹² Disaepolo atoa laghe kasula tani ppooaa tale taumattu ngatoa va la nna ngaioghioghiaa. ¹³ Laghe tiutu velu raroai, me laghe raarariaa oeli tale tau sessa atoa, me laghe gheelei emasinaila.

*Herot ghe nongola kiukiuna Iesu
(Mat 14:1-12; Luk 9:7-9)*

¹⁴ King Herot ghe nongola kiukiun tale isaa o niuungu poli taumattu ngakapa atoa laghe kiukiua see Iesu, me katoa laghe uela va, "Jon tau ngai aasuu eteva ange totula tale nimate, liuna avalua o me sarasarakania tani ghelei mirikolo."

¹⁵ Me katoa taumattu laghe ue va, "Ia Elaija."

Mene katoa laghe ue va, "Ia propete ia, nongina mene katoa propete emua arau."

¹⁶ Nau Herot ghe nongola ghe uela va, "Jon, ia o aghe sai pulela alona atiulu, ange mene sakesakela!"

Matemateaane Jon tau ngai aasuu eteva

¹⁷ Ia Herot ghe suula inangari me laghe poso atokala Jon. Laghe iriela me laghe atokaiela tale ale mata voovoo mausi Herodias, vausenna ateva tuena ta Pilip, ghe mene lai sariela. ¹⁸ Poli Jon ghe uela ta Herot

* **6:3:** Josep Tale inangari nge Grik, Joses. **6:4:** Jon 4:44. **6:8:** Luk 10:4-11. **6:11:** Apos 13:51. **6:13:** Jms 5:14. **6:14:** Mat 16:14; Mak 8:28; Luk 9:19-20. **6:18:** Lev 18:16.

va, "Inangari nipaopao ateva eue va karika masina ta ughe mene lai sarila vausenna ateva tuem." ¹⁹ Herodias ghe sessaieiliela ta Jon, me ghe aloannaailila tani uvi ematea, me karika ghe rooroo. ²⁰ Herot ghe kaakaarasi tani aitaraa Jon, poli ghe maamatautangaililia ta ghe kilakila va Jon ghulughuluena ia me manga ia. Nau ghe nonganongo ta ghe aaippooaa, ghe nannangaili me nannaane ghe maamaate,[†] me ghe aloannaaili tani nongo.

²¹ Masi nau eteva ghe rekatala ta Herodias nau Herot ghe gheleila kinatama ninamanama ataeae tani nnaa nau eteva Herot ghe lutula etana. Ghe gheleila ninamanama ataeae ta namu ngatoa la uungu ta gavman, namuu ta soldia ngatoa, me namu nge Galilii etoa. ²² Laghe toka namanama, me natuna aliki vause ateva Herodias ghe kipi ssola tani ssiuuuaa. Herot me lo atoa laghe namanama laghe masimasiangaililia nissiuua ngateae.

Herot ghe uela ta aliki vause ateva o va, "Sa ateva voto arova ukolomia etaghi, aue atau aatu." ²³ Herot ghe auliaala inangari nialokoi va, "Sa ateva voto arova ukolomi aue atau aatu. Arova uue va atau aatu kativilau tale peighi, aue atau aatu."

²⁴ Aliki vause ateva ghe kipi ghoala, me ghe lao sio tani kolomi kinna va, "Sa ateva voto asso kolomi king etana?"

Kinna ghe uela va, "Usso ue va, 'Aghaloanna uruna ateva Jon tau ngai aasuu eteva.'"

²⁵ Arovaeaata ta aliki vause ateva ghe kiri ssola ta king me ghe uela va, "Ghaine arau aghaloanna uruna ateva Jon tau ngai aasuu ia tale tivilau terei."

²⁶ King ghe nongola me ghe alousiusieiliila. Me poli ang ghe gheleila inangari nialokoi, me karika ghe aloanna tani palata ta mata namu ngatoa, karika ghe roola tani nongo vulu inangarina natuna Herodias. ²⁷ King karika ghe aitoila. Ghe suula soldia ngateva tani laa ghaa uruna ateva Jon. Soldia ngateva ghe lao sio tale ale mata voovoo me ghe sai pulela alona atiulu Jon. ²⁸ Ghe sau mae sio uruna ateva Jon tale terei etivilau me ghe taue lao sio ta aliki vause ateva. Me aliki vause ateva ghe laoainie sio ta kinna. ²⁹ Kapuna disaepolo atoa Jon laghe nongola isaa o voto Herot ghe gheleila ta Jon. Laghe lao sio tani ghaa vaulanna ateva Jon, me laghe lao sio tani kaieinia.

Iesu ghe anginila 5,000 taumattu

(Mat 14:13-21; Luk 9:10-17; Jon 6:1-14)

³⁰ Apostolo atoa laghe oghi mae sio, me laghe toka teela Iesu. Laghe kiukiuaala voto laghe gheleila me inangari laghe auliaala ta taumattu ngatoa. ³¹ Iesu me kapuna apostolo atoa karika righi nauira tani namanama, poli oroiieili taumattu ngatoa laghe mae taatara Iesu me laghe mene kasukasu. Liuna avalua o me Iesu ghe uela etaira va, "Ita lao ta pai kativilau karika righi taumattu etana, me am laa ghainoana."

³² Ila nonga laghe kasula tale olimoira paanaka ateva tani lao tale vaara. ³³ Taumattu ngatoa laghe tarailala ta laghe tiu ghoala, me laghe kilailala. Me oroi taumattu tale kateae kateae masaliki laghe kilala voto ateva laghe laolao etana, me laghe kasu emuemuela tani lao. ³⁴ Nau Iesu ghe ssola elae, ghe tarala oroiieili taumattu ngatoa. Ghe alousiusi

[†] **6:20:** ghe nannangaili me nannaane ghe maamaate Kasina uru ngai laghe pitila, laghe uela va, ghe gheelei oroi voto. **6:30:** Luk 10:17. **6:34:** Nam 27:17; Mat 9:36.

teeilala, poli ila nongina sipsipi etoa karika teva aitoiira, me ghe tiuaala tani apasunga oroi voto etaira.

³⁵ Nau sinaka ateva ang ghe suusuu, kapuna disaepolo atoa laghe lao sio ta ngetana, me laghe uela va, “Ange voovoo, me voto ateva oia nim vaara ia. ³⁶ Sungi vellala me la lao tale righi masaliki kalakalangina, me la laa poli righi inana me la nama.”

³⁷ Iesu ghe liula me ghe uela va, “Am taula righi inana, me la nama.”

Laghe uela va, “Ualoanna va ami laa poliaa velu ghalua ai silva koen[‡] tani poli inana tani anginila?”

³⁸ Iesu ghe uela etaira va, “Ghaisa verete? Am laa tara.”

Nau laghe lao sio, laghe tarala verete ghalima me tee kko alua.

³⁹ Iesu ghe uela ta taumattu ngakapa atoa va, “Am laa toka sio tale rarrasa, me am toka tale uela.” ⁴⁰ Laghe tokala katoa kateva ai (100), me katoa ghalimangaulu (50). ⁴¹ Emulina Iesu ghe ghaala verete ghalima me kko alua, me ghe taatara saela epona liu me ghe kaili emasina saela, me ghe pirila, me ghe tiuaala tani taula ta kapuna disaepolo atoa va la taula. Me ghe koita teela kko alua. ⁴² Ila akapa ghe ssoilala nau laghe namanamala. ⁴³ Emulina kapuna disaepolo atoa laghe kaai esokosokoiaala tapiri verete me tapiri kko. Laghe kaaila laka erooroo kasangaulu ghaluae (12). ⁴⁴ Taita atoa laghe namala verete ghe roola ghalima airari (5,000).

Iesu ghe kasula epona tale paamanu

(Mat 14:22-33; Jon 6:15-21)

⁴⁵ Arovaeata ta Iesu ghe auliaala va kapuna disaepolo atoa laghe aikaaila tale paanaka ateva, me la muemue lao eBetsaida ta pai kativilau, me ia etoka me esungi velu mua taumattu ngatoa. ⁴⁶ Vara ghe suu vella taumattu ngatoa, me ghe saela tale motouru tani looloo sare.

⁴⁷ Nau ang ghe voola, paanaka ateva ang ghe rekatala elome tale ateo talia ngateae, me Iesu nonga elae. ⁴⁸ Ghe taatara va disaepolo atoa laghe oseose poi, me kuukuu eteva ghe aaoghila. Auena ghe pai, me Iesu ang ghe soosokotila. Ghe kasukasu epona tale paamanu eteva, me ang ghe anna tani laula. ⁴⁹ Nau disaepolo atoa laghe tarala Iesu ghe kasukasu epona tale paamanu eteva, laghe annaa va raroaina ia teva taumattu, me angeila ghe aaipiia, ⁵⁰ poli ila akapa laghe taraiela me laghe matautueiliila.

Arovaeata ta Iesu ghe sama teeilala, me ghe uela va, “Am rau mene annaa, ta aghi oia. Am rau mene matautu.” ⁵¹ Me ghe aikaai teeilala, me kuukuu eteva ghe kapala, me disaepolo atoa laghe soghiaa saasakiaala ia o voto ateva ghe lutula. ⁵² Ta poli nannaaira karika marekate tani annaa me tani kila amasina mallooeana verete.

Iesu ghe ghelei emasinala oroi tau sessa eGenesaret

(Mat 14:34-36)

⁵³ Iesu me kapuna disaepolo atoa laghe ose longotila me laghe kautuula tale distriki eteva eGenesaret, me laghe rekati evukalala olimoira paanaka ateva. ⁵⁴ Nau eteva laghe kkurela tale olimoira paanaka ateva, taumattu ngatoa laghe tara kilala Iesu, ⁵⁵ me laghe ilou

^{6:35:} Mak 8:1-9. ^{‡ 6:37:} silva koen Silva koen ativilau (denarius) erooroo aipolina kateva nau. ^{6:46:} Luk 5:16. ^{6:49:} Luk 24:37. ^{6:51:} Mak 4:39.

ekapa seela eGenesaret tani laa ghauliaa ta mene katoa va Iesu ange rekataala. Me tau sessa atoa, laghe sausau teeila me komoira tani laoainila kona laghe nongonongo nongina eaa Iesu ghe tokatoka.⁵⁶ Nau Iesu ghe laolao tale masaliki pisike me namuu masaliki me tale voto karika oroi masaliki etana, tau sessa atoa laghe aalokoila tale maketi, me laghe kookolomi esarasarakana Iesu, va erooroo va la poso sama ghinnanina, me lo atoa laghe posoposoa laghe maamasina.

7

Voto tuvuira atoa laghe apasungaala

(Mat 15:1-20)

¹ Paresi etoa me katoa tana tau ngai aapasunga tale inangari nipaopao, laghe kasula ejerusalem, laghe lao sio me laghe tomla Iesu. ² Laghe tarala va katoa tana disaepolo kapuna ila Iesu, karika laghe porala nimaira, me laghe tam uusilaa salana tani ghelei me la raarangisana. ³ (Poli Paresi etoa me ila akapa ajiu etoa laghe aimulisi tee voto tuvuira atoa laghe apasungaala, laghe tam rooroo tani namanama arova la tam pora amasina nimaira. ⁴ Inana laghe polipoli tale maketi, karika la rooroo tani nama, ta laghe vira porapora me laghe namanama. Laghe aaimuli tee mene kasina ase salana nongina vaalua tani pora airopi manu, me aiaku manu, me aituu inana.*)

⁵ Paresi etoa me tau ngai aapasunga tale inangari nipaopao laghe kolomila Iesu va, “Vaalua me kapum disaepolo atoa la tam aimuli usi tee voto tuvuita atoa laghe apasungaala etaita va ita gheelei, me la nim namanama me karika la porapora nimaira?”

⁶ Iesu ghe liula etaira me ghe uela va, “Koronnaaili voto Aisaea ghe auliaala nau ghe aulia ngamuemua alokoila gheleiaaimim, am usimaghala am. Nongina Uru ngai Manga ateva eaauliaa, eue va,

“Isaa oia taumattu la nim oneoneainaghi ta paaira
me urunguitaniira masaeili etaghi.

⁷ Karika righi malloeana, uneira nikkauaa
poli la ghapasunga llo nim kaluira taumattu ngatoa nonginaaili va
kanna God.”

⁸ Iesu ghe uela etaira va, “Am tam aaimuli tee inangari nipaopao kanna God, ta am nongonongo uusilaa voto taumattu ngatoa laghe nim apasungala.

⁹ “Muennaaili iem tani rati inangari nipaopao kanna God, me am anna tani aimuli usi tee voto am, am gheeghelei. ¹⁰ Moses ghe uela va, ‘Am oneoneaa kinaimim me tamaimim,’ me ‘Lo ateva ekaakasikiena tamana o kinna aue la uvi ematea.’ ¹¹ Me am, am ue va taumattu ngateva erooroo tani aulia ngavalua toko ta kinna me tamana va, ‘Peighi tani sausi malua ngagheleila inangari nialokoi tani taula ta God.’ ¹² Arova ange aulia ngavaluelo o, am gheeghelei rungainia va erau mene sausi tamana me kinna. ¹³ Tale isaa o salana, am gheelei inangarina God enim peepeisaane, ta am aaimulisi tee aauliaaira tuvuimim atoa. Orioeli mene kasina asease voto am gheelei.”

Sa ateva etani gheelei taumattu ngateva me karika eraarangisana

7:2: Luk 11:38. **7:4:** Mat 23:25. * **7:4:** Kasina uru ngai laghe pitila, laghe mene uela va, me tevoo. **7:6:** Ais 29:13. **7:10:** Eks 20:12; 21:17; Diut 5:16.

¹⁴ Iesu ghe mene kolo aitauaala taumattu ngatoa me ghe uela etaira va, “Am nongoaghi, me aloimim emasaanga. ¹⁵⁻¹⁶ Karika va voto ekasukasu eleka me esosso tale taumattu ngateva va egheeleia etam raarangisana. Saa llo ekupikupi ghoa, isaa o voto egheelei taumattu ngateva etam raarangisana.”†

¹⁷ Nau ghe kasu vulila taumattu ngatoa me ghe lao sio elo ale, me kapuna disaepolo atoa laghe lao sio tani kolomia tale isaa o kiukiu niamatoonga. ¹⁸ Iesu ghe uela etaira va, “Am tee karika am kilakila sa ateva aghaaulieinia? Karika righi voto ekasukasu eleka me esosso tale taumattu ngateva egheeleia va etam raarangisana. ¹⁹ Poli voto o, karika esosso tale urunguitanina ateva ta esiosio ta kovane, me elaa kupikupi velu ghoa nau eteva elaa tiutiu.” (Tale isaa o inangari, Iesu ghe uela va isaa akapa inana raarangisana.)

²⁰ Me ghe mene uela va, “Saa llo voto ekupikupi ghoa tale taumattu ngateva, isaa o voto egheeleia etam raarangisana. ²¹ Elome tale urunguitani taumattu, voto sesa ekasukasu etana. Tani nnaa saasakiaa, me nnilai salosalooa see, me tani ainao, me tani aiuvi emate, ²² tani lai sari kateva manna ateva, me tani ssaii, me mene kasina tani voto sesa. Me tani kamekame, me ninanna ngakorokorongana tani ghelei ssavoto marova ghaata kkena atoa, me tani kiiuaa kateva, me tani auliaa saasakiaa tee kateva, me tani tau sae ninannaa, me tani ghelei voto arova alo kapakapa ateva. ²³ Isaa o voto ekasukasu elome tale taumattu ngateva, liuna avalua o me egheeleia etam raarangisana.”

*Vauseni nge Poenisia ngateva unna niaikaiaa
(Mat 15:21-28)*

²⁴ Iesu ghe kasu vulila masaliki eteae me ghe lao sio tale kateae masaliki kalakalangina ia eTaer,‡ me ghe ssola elome tale kateva ale, me karika eghe aloanna va teva eghe kilaia, me karika ghe roola tani aisulia. ²⁵ Arovaeaata ta vause ateva, natuna ateva raroai eteva ghe tokatoka etana, ghe nongola va Iesu ange rekatala, me eghe ailului lao sio me ghe suuialla ta liue kkena Iesu. ²⁶ Vause ateva karika ajiu ia, me ghe lutula ePoenisia elome tale patunganua ateva eSiria, ghe kookolomi esarasarakana Iesu tani tiu velu raroai eteva ta natuna aliki vause ateva.

²⁷ Iesu ghe uela etana va, “Ami tau ekasina lao inana ta aliki etoa, karika masina tani tau lao aneira inana aliki etoa ta paua atoa.”§

²⁸ Vause ateva ghe liula, me ghe uela va, “Koronna, vau eteva. Me paua atoa tee la namanama aneira vorovoro niginana aliki etoa tale pake tevoo.”

²⁹ Me Iesu ghe uela etana va, “Ta poli angu aulia ngavaluela o, lao sio tanganuem me ulaa tara natum, ta raroai eteva ange kasu vuliela.”

³⁰ Vause ateva ghe lao sio tanganuena, me ghe tara alokoila natuna tale komona atiulu, me raroai eteva ang ghe kasu vuliela.

7:15-16: Apos 10:14-15. † **7:15-16:** Kasina uru ngai laghe pitila, laghe uela va, 16 Lo ateva talingane manee tani nongo, aue enongo! ‡ **7:24:** Kasina uru ngai laghe pitila, laghe mene uela va, me eSaedon. § **7:27:** paua atoa Ajiu etoa laghe anna va ila muennaa ilila ta lo atoa karika va ajiu ila, me laghe kololala va ueili paua ila. Iesu ghe aaimulisi tee auliaaira. Nau ghe auliaa, karika va ghe sessaia. Ghe nim anna tani tootoonga aikaiaane vause ateva, karika va tani ghelei saasakiaa nannaane.

Iesu ghe otile talingana taumattu ngateva me samasamaane ghe masinala

³¹ Iesu ghe kasu vulila masaliki taatara atae eTaer me ghe saela eSaedon, me ghe kasu tee lao sio tale Kasangauluae Masaliki Taatara. Emulina ghe lao sio tale ateo talia ngateae eGalilii. ³² Taumattu ngatoa laghe maeaa sio tau sessa ateva ta Iesu, talingana volovolongina me tee paavoo ia, me laghe kolomila Iesu tani saoaa nimana atelange tale taumattu ngateva.

³³ Iesu ghe kolola taumattu ngateva elome ta taumattu ngatoa, me lalu ghe kasu vulilala, me Iesu ghe siki laala vuuvuu nimana alua ta talingane aluelange. Iesu ghe mene kanusuila vuuvuu nimana alua me ghe posola ramuramuti paana ateva. ³⁴ Iesu ghe taatara saela epona liu, me ghe ainoana anamuula, me ghe uela ta taumattu ngateva va, “*Eppatal!*” (mallooeana va “Talingana eoti!”). ³⁵ Katengaata ta talingana taumattu ngateva ghe otile, me ghe sama amasinala.

³⁶ Iesu ghe paopao poila va, “Am rau mene kkai laa see,” me karika, ta laghe kakkai laa see. ³⁷ Taumattu ngatoa laghe soghia ngatinginala mirikolo ateva, me laghe uela va, “Ia oia taumattu ngateva, voto akapa egheelei, masinaaili. Ia nonga ghe gheleila taumattu talingana volovolongina laghe nonganongola me paavoo atoa laghe samala.”

8

*Iesu ghe anginila 4,000 taumattu
(Mat 15:32-39)*

¹ Isaa o nau orioannaaili taumattu ghe velu eitauaala, me karika righi inana tani nama. Me Iesu ghe kolola kapuna disaepolo atoa me ghe uela etaira va, ² “Aloghu eusiusi taumattu oia, poli ngeila ghe toka teeieghila kotolu nau, me karika righi aneira inana tani nama. ³ Arova maloona ila me asungila va la lao tanganueira, aue la taatarruu elao lao ta poli katoa laghe kasu emasaeilili.”

⁴ Me kapuna disaepolo atoa laghe liula me laghe uela va, “Voto ateva oia karika righi taumattu etana. Eaa aue ita laa ghaa verete me ita angini isaa oia taumattu?”

⁵ Iesu ghe kolomilala va, “Ghaisa verete am uunusi?”

Me laghe uela va, “Ghaitu (7).”

⁶ Me ghe uela ta taumattu ngatoa va la toka sio tapaa kosa. Me ghe ghaala verete ghaitu me ghe kaili emasina saela, me ghe pirila, me ghe tau lao sio ta kapuna disaepolo atoa va la laa ghaikoita, me laghe lao sio tani aikoita. ⁷ Me aneira lutu pisi tee paapakala karika oroi, ghe arangisela me ghe uela ta kapuna disaepolo atoa va la laa ghaikoita.

⁸ Taumattu ngatoa laghe namanamala me ghe ssoilala, me laghe kaaila ghaituae laka tale llo tapiri nginana laghe nama vulula. ⁹ Ghe roola ghaata airari (4,000) taumattu. Me ghe sungi vellala, ¹⁰ me katengaata ta ia me kapuna disaepolo atoa laghe aikaaila tale paanaka ateva, me laghe lao sio tale distriki eteva eDalmanuta.

*Paresi etoa laghe aloannala tani tara teva niaimatootoonga
(Mat 16:1-4)*

¹¹ Paresi etoa laghe lao sio ta Iesu, me laghe kolomiela va eapasunga teva niaimatootoongana ngepona liu. Laghe aauliaa llo tani nim tootoongainia. ¹² Iesu ghe ateateaala maamatana me ghe uela va, “Vaalua me taumattu ghaine atoa am aloanna tani tara niaimatootoongana? Aghaaulia ngakoronna etaimim va karika aue am tara poi teva.” ¹³ Ghe kasu vulilala me ghe mene ghoala tale olimoira paanaka ateva, tani lao ta pai kativilau tale ateo talia ngateae.

*Uneira isti Paresi etoa me Herot
(Mat 16:5-12)*

¹⁴ Disaepolo atoa laghe aikkaluuala me karika laghe saula verete. Kateva nonga ia lo ateva ghe kaakaaia tale paanaka ateva. ¹⁵ Iesu ghe aulia ngasarasarakanala etaira va, “Am aikinikinitaa! Me am taatara amasina tale uneira isti Paresi etoa me Herot.”

¹⁶ Laghe tiuaala tani aippooaa elome etaira va, “Koti eaauliaa llo oia ta karika ita ghaala righi verete.”

¹⁷ Iesu ghe kilala sa ateva laghe aulieinia, me ghe kolomilala va, “Vaalua me am aauliaa va karika righi verete? Karika am ghe kila? Nannaaaimim karika ghe oti? ¹⁸ Mataimim karika etaatara? Talingaimim karika enonganongo? Karika am nannaa? ¹⁹ Nau eteva aghe pirila ghalima (5) verete tale ghalima airari (5,000) taumattu, ghaisae laka tapiri verete am ghe kaaila?”

“Kasangaulu ghalua (12),” laghe liula.

²⁰ Me ghe mene uela va, “Me nau eteva aghe pirila ghatiu (7) verete tale ghaata airari (4,000) taumattu, ghaisae laka am ghe kaaila tapiri verete etana?”

“Ghatiu,” laghe liula.

²¹ Me ghe kolomilala va, “Karika am ghe kila poi?”

Iesu ghe ghelei emasinala mata salusalu eteva eBetsaida

²² Iesu me kapuna disaepolo atoa laghe laa rekata sio eBetsaida. Taumattu ngatoa laghe maeaa sio mata salusalu eteva ta Iesu va ghe posoa me ghe masina. ²³ Iesu ghe kunela nimana atelange, me lalu ghe kasu tee tau lao sio. Iesu ghe kanusuila matana alua me ghe saoaala nimane etana, me ghe kolomiela va, “Utaatara teva voto, o karika?”

²⁴ Taumattu ngateva ghe taatarala me ghe uela va, “Ataatara taumattu ngatoa arova ai etoa la kasukasu.”

²⁵ Iesu ghe mene posola matana taumattu ngateva me ghe taatarala, me ghe masinala me ghe tara amasinala voto atoa. ²⁶ Iesu ghe sungi velue lao sio tanganuena, me ghe uela etana va, “Urau mene lao tapaa masaliki.”

Pita ghe auliaala va Iesu see ia

(Mat 16:13-20; Luk 9:18-21)

²⁷ Iesu me kapuna disaepolo atoa laghe saela tale kasina masaliki taatara kalakalangina eSiisaria Pilipae. Tapaa salana me Iesu ghe kolomila kapuna disaepolo atoa va, “Taumattu ngatoa la ue va aghi see?”

²⁸ Me laghe liula etana me laghe uela va, “Katoa taumattu la ue va io Jon tau ngai aasuu eteva; kasina eue va io Elaija; me mene katoa la ue va io kateva propete.”

²⁹Iesu ghe mene kolomilala va, “Me am vaalua? Am uue va aghi see?”
Pita ghe liula etana va, “Io Mesaea io.”

³⁰Iesu ghe paolala va karika la mene laa kkaila va ia see.

*Iesu ghe auliaala mammrikanaane me matemateaane
(Mat 16:21-28; Luk 9:22-27)*

³¹Me Iesu ghe tiuaala tani tau lao alomasaanga ta kapuna disaepolo atoa, ghe ue va, “Natuna ateva Taumattu ngateva aue etani ghaa oroieili mmarikeana. Namu ngatoa, me namu ngatoa ta pristi etoa, me tau ngai aapasunga ngatoa tale inangari nipaopao, aue la ratia. Aue la uvi ematea, me kotolu nau elange me aue etotu tale nimate.” ³²Ghe ghelei emasalikangailila etaira, me Pita ghe koloala me lalu ghe laa tingina ppae sio me ghe tiuaala tani kisoia.

³³Me Iesu ghe kirielia me ghe taatara lao sio ta kapuna disaepolo atoa, me ghe tiuaala tani kiso Pita. Ghe uela va, “Kasu vulieghila, Satana! Nannaam karika eannaa voto kannna God, ta voto kaluira taumattu ngatoa.”

³⁴Me Iesu ghe kolola oroi taumattu me kapuna disaepolo atoa tani mae etana. Ghe auliaala etaira va, “Marova teva ealoanna tani usieghi, etani sioaa nannaane, me esunuki unna aikotoo ateva, me eaimuli etaghi. ³⁵Me lo ateva ealoanna tani asaangi maamauluuaane aue eraua, me lo ateva earau maamauluuaane ta poli mausighi, me tee tale masi kiukiu, aue esaanga. ³⁶Marova taumattu ngateva eghaa voto akapaaili tale kosa ateva me maamauluuaane ekapa, vaalua isaa o voto aue esausia? Koti karika. ³⁷Sa ateva taumattu ngateva aue etaue lao tani ghaa oghi maamauluuaane? ³⁸Vituu eteva oia karika la uusilaa aloannaane God, me la gheeghelei ssavoto, me lo ateva taumattu tale lo ateva oia vituu epalatainaghi me inangarighi, aue Natuna ateva Taumattu ngateva aue epalatainia nau aue esio tee mallangina ateva Tamane me kapuna ensolo atoa manga ila.

9

¹“Aghaaulia ngakoronna etaimim va katoa etaimim oia am tiitingina, karika aue am mate me aue am tara ararimangalina ateva God emae tee sarasarakaniaane.”

*Taataraane Iesu ghe aikolikoliaala
(Mat 17:1-13; Luk 9:28-36)*

²Ghaonomo (6) nau ghe lange sio me Iesu ghe kolola Pita, Jeimis me Jon, me ilaata nonga laata ghe saela tale motouru eteva saesaenaaili ia. Taataraane Iesu ghe aikolikoliaala ta matairotolu, ³me ghinnanina ghe mallangala me ghe usousoanaailila, karika poi teva taumattu tale kosa ateva erooroo tani pora kalio va ghe uso avalua o. ⁴Me lotolu ghe tarala Elaija me Moses lalu ghe kauerektila me lalu ghe tiuaala tani sama tee Iesu.

⁵Pita ghe uela ta Iesu va, “Tisa, masinaaili ta ita tokatoka oia. Angatolu ghelel kotolu ale paapali — kateva alem ia, me kateva alena ia Moses, me kateva Elaija.” ⁶(Pita me kapuna alua lotolu ghe matautu saasakiaala, me ghe tam kilala va sa arighi voto tani auliaa.)

⁷ Me karaane ateva ghe mae sio, me tootoona ateva ghe akoulala, me lingi ngalo ateva elome tale karaane ateva ghe uela va, “Natughu eteva oia, aghaailousiangaililia. Am nongoa.”

⁸ Arovaeeata ta vara lotolu ghe mene taatara, me lotolu ghe luula mene ghalua. Lotolu ghe aaitaraa, me lotolu ghe tara nongala Iesu.

⁹ Nau laghe mae siosio tale motouru, Iesu ghe ttoieinilotolla va la rau mene auliaa ta toa saa llo laghe tarala lomosi ta Natuna ateva Taumattu ngateva etotu tale nimate. ¹⁰ Lotolu ghe nongo usilaala voto ghe ppooala ta ngetairatolu, me vara lotolu nonga me ngilotolu ghe aikolomieinilotolu va vaalua me euela va etotu tale nimate.

¹¹ Me disaepolo kotolu lotolu ghe kolomila Iesu va, “Vaalua me tau ngai aapasunga ngatoa tale inangari nipaopao la ue va Elaija aue etani muemue mae?”

¹² Iesu ghe liula me ghe uela va, “Elaija aue emae amuemue tani ghelei emasina akapa voto. Me vaalua me Uru ngai Manga ateva eue tee va Natuna ateva Taumattu ngateva ae eghaa oroi voto sesa me aue la ratia? ¹³ Aghaauliaa etaimim va Elaija ang ghe mae sio, me taumattu ngatoa ngeila ghe ghelei ekapala saa llo voto laghe anna tani ghelei etana, nongina Uru ngai Manga ateva eaauliaa.”

Iesu ghe ghelei emasinala taita arighi

(Mat 17:14-20; Luk 9:37-43)

¹⁴ Nau laata ghe sio mae tani mene tara katoa disaepolo, laghe tarala oroieili taumattu laghe tomtomla, me tau ngai aapasunga ngatoa tale inangari nipaopao laghe aissakeana teeila tale inangari. ¹⁵ Nau taumattu ngatoa laghe tarala Iesu, ila akapa laghe soghieiniela, me laghe iloula tani laa soua.

¹⁶ Iesu ghe kolomilala va “Sa ateva am aaissakeana teeia?”

¹⁷ Kateva elome tale uta taumattu ngatoa ghe liula me ghe uela va, “Tisa, amaeaa sio natughu eteva etam, poli raroai eteva etokatoka ta ngetana egheeleia karika esamasama. ¹⁸ Nau epoopotainia me usouso paane eghooa me eaaingeresa ngalungaluna me ekakkarakeana. Akolomila kapum disaepolo atoa va la suu velu raroai eteva etana, me karika la roola.”

¹⁹ Iesu ghe liula me ghe uela ta taumattu ngatoa va, “Am lo atoa oia taumattu, karika righi uneimim niaikaaiaa, ghaisaa ta aue atoka teeiem? Me aue ghaisaata ta aue atoiem va am aiesoaa? Am maeaa sio aliki eteva etaghi.”

²⁰ Laghe maeaa sio aliki eteva ta Iesu, me nau raroai eteva ghe tarala Iesu ghe gheleila me aliki eteva ghe tiuaala tani oo, me ghe ghelei ekatungiela, me ghe tiuaala tani vilieinia tapaa kosa, me usouso paane ghe ghooa ta paane.

²¹ Iesu ghe kolomila tamane aliki eteva va, “Lovisaa isaa oia voto ghe tiuaala etana?”

Tamane ghe liula me ghe uela va, “Nau aliki aarau. ²² Oroiaata raroai eteva eanna tani uvi ematea. Egheeleia ekaakatu saoaa tale kura, me tale manu va earropia. Ualousiusi teeengalua, me usausiengalua arova urooroo.”

²³ Iesu ghe liula me ghe uela va, “Vaalua me uue va, ‘Arova urooroo?’ Poli lo ateva eaaikaaiaa, erooroo tani ghelei ekapa voto.”

²⁴ Arovaeaata ta tamane aliki eteva ghe sama anamuula me ghe uela va, “Aghaaikaiaia; me uasarasarakanan uneghi niaikaiaia.”

²⁵ Nau Iesu ghe tarala va taumattu ngatoa ngeila ghe maemae akalakalanginaaili etana, me ghe paola raroai eteva; ghe uela va, “Raroai volovolongina me paavoo ateva, aghauliaa etam va kupi vulu ghoa mae aliki eteva, me auena urau mene laa kupie sso.”

²⁶ Raroai eteva ghe piila me ghe gheleila aliki eteva ang ghe oo, me ghe kupi vulse ghoala. Aliko eteva taataraane nonginaaili va ghe matela, oroi taumattu laghe taraiela laghe annaa va ang ghe matela. ²⁷ Iesu ghe kunela nimane atelange me ghe sausielo tani tingina, me ghe tinginala.

²⁸ Nau Iesu me kapuna disaepolo atoa laghe lao sio elo ale me ila nonga laghe tokatoka, me ngeila ghe kookolomi Iesu va, “Vaalua me ami karika ami roola tani tiu velu raroai eteva?”

²⁹ Iesu ghe liula me ghe uela va, “Nikokkolomi sae* nonga ateva erooroo tani tiu velu ia o ase lo ateva raroai. Karika mene tikirighi salana.”

Aiaaghaluene Iesu ghe uela va aue emene totu

(Mat 17:22-23; Luk 9:43-45)

³⁰ Laghe kasu vulila masaliki eteae o, me laghe lao tee sio eGalilii, me karika ghe mene anna va teva taumattu ghe kilaia, ³¹ poli ghe poppopaa tani apasunga ta kapuna disaepolo atoa, me ghe ue etaira va, “Natuna ateva Taumattu ngateva ngeila tautauela ta nimaira taumattu ngatoa, me aue la uvi ematea, me vara kotolu nau elange me aue emene totu.” ³² Karika aloira ghe masaangaala llo ghe auliaala, me laghe maamatautu tani kolomia.

Tani see namuu ia?

(Mat 18:1-5; Luk 9:46-48)

³³ Iesu me kapuna disaepolo atoa laghe lao sio eKapenium. Laghe kupi ssola tale ale ateva me Iesu ang ghe kookolomi va, “Sa ateva am aissakeana teeia tapaa salana?” ³⁴ Karika laghe aisauaala, poli nau laghe maemae tapaa salana, laghe aissakeana va tani see etaira namuu ia.

³⁵ Iesu ghe toka siola me ghe kolo aitauaala kapuna disaepolo atoa me ghe uela va, “See eanna va emuemue, etani gheleia eairuuruu, me etaun ngai uungu ta mene katoa.”

³⁶ Me ghe ghaala aliki erighi me ghe atinginaiela elome etaira, me ghe vaghuiela, me ghe uela etaira va, ³⁷ “See eannainaghi me eaikoloa aliki etoa, eaaikoloainaghi, me lo ateva taumattu eaikoloainaghi, karika va eaaikoloainaghi nonga, ta eaikoloa tee Tamaghi ghe sungieghila tani sio.”

See karika aissaniita ia, kapuita ia

(Luk 9:49-50)

³⁸ Jon ghe uela va, “Tisa! Ami tarala taumattu ngateva etiutiu velu raroai eteva tale ararim atea, me ami paoala va eruu poli karika va ita me ia.”

³⁹ Iesu ghe uela etaira va, “Am rau mene paoa, poli lo ateva taumattu eghelei mirikol tale ararighi eteae karika aue ailuilui tani auliaa

9:26: Mak 1:26. * **9:29:** Kasina uru ngai laghe pitila, laghe uela va, Nikokkolomi sae me ninae. **9:30:** Jon 7:1. **9:31:** Mak 8:31; 10:32-34. **9:32:** Luk 9:45. **9:35:** Luk 22:24-26; Mat 20:25-27; Mak 10:43-44. **9:37:** Mat 10:40.

teeieghi righi voto sesa, ⁴⁰ poli see karika aissaniita ia, kapuita ia.
⁴¹ Aghaaulia ngakoronna etaimim va lo ateva taumattu etaau aatu righi manu tale ararighi eteae va uropi, poli io kapuna io Karisto, aue eghaa airopolina.

Nitootoonga tani ghelei ssavoto

(Mat 18:6-9; Luk 17:1-2)

⁴² “Arova aliki erighi eaiesoaa etaghi, me teva taumattu egheelei unna niaikaaiaa ekatuu, ghele masinaaili ta arova la ghele iri teva paka ngatu ta ngalona, me la ghele ghoa allusia elo malionge. ⁴³⁻⁴⁴ Arova nimam atelange egheleio me ukaakatuu tani ghelei voto sesa, usai kotooia, poli aue emasina ta ngetam arova nimam atelange takotoona me usso tale maulue ateva. Me aue esesaaili arova nimam atelange etokatoka me angu laolao tale Gehenna tale kura ateae karika epalapala.[†] ⁴⁵⁻⁴⁶ Arova kekem atelange egheleio me ukaakatuu tani ghelei voto sesa, usai kotooia, poli aue emasina ta ngetam arova kekem atelange takotoona me ughaa maulue ateva, me esesaaili arova kekem atelange masina me angu laolao tale Gehenna tale kura ateae karika epalapala.[‡] ⁴⁷ Me arova teva matam egheleio me ughelei voto sesa, uvaliki velua. Emaamasina arova ukupi sso tale ararimangalina ateva God tee kateva nonga matam, me esesaaili arova matam akapa alua lalu tokatoka me la sau veluo sae tale kura ateae eGehenna, ⁴⁸ tale ia o voto ateva,

“ ‘ttoliti etoa karika la matemate
 me kura ateae karika epalapala.’

⁴⁹ Taumattu ngakapa kura ateae aue gheleila la raarangisana.

⁵⁰ “Uela ateva masina ia, me arova namina ateva ekapa, vaalua emene ghelei me aue emene tue namina? Karika erooroo. Am, am toka arova masi uela ateva tani toka amasina, me luei easo elome etaimim me mene katoa taumattu.”

10

Tani airatii

(Mat 19:1-12)

¹ Iesu ghe kasu vulila masaliki eteae, me ghe lao sio tale kativilau tale ateo ateae ejodan, me tale distriki eteva ejudia. Oroi taita me vause laghe mae sio tani velu eitauaa ta Iesu. Me Iesu ghe aapasunga inangarina God ta ngetaira, nongina ghe gheelei nau etoa. ² Katoa Paresi laghe mae sio tani tootoonga Iesu tale nikokkolomi eteva va, “Uneita inangari nipaopao eue va masina arova taita ateva erati vausenna ateva, o karika?”

³ Iesu ghe liula me ghe uela va, “Saa inangari nipaopao Moses ghe tau aatu sio etaimim?”

⁴ Me laghe uela va, “Moses ghe pitila va taita ateva erooroo tani piti uru ngai niairatii, me etaue lao ta vausenna ateva, me esungi velua.”

⁵ Iesu ghe uela etaira va, “Moses ghe pitila llo inangari nipaopao etaimim poli urunguitaniimim korokoronganaaili. ⁶ Emua arau nau ta

9:40: Mat 12:30; Luk 11:23. **9:41:** Mat 10:42. **9:43-44:** Mat 5:30. [†] **9:43-44:** Kasina uru ngai laghe pitila, laghe uela va, 44 tale ia o voto ateva, ‘ttoliti etoa karika la matemate, me kura ateae karika epalapala.’ [‡] **9:45-46:** Kasina uru ngai laghe pitila, laghe uela va, 46 tale ia o voto ateva, ‘ttoliti etoa karika la matemate, me kura ateae karika epalapala.’ **9:47:** Mat 5:29. **9:48:** Ais 66:24. **9:50:** Mat 5:13; Luk 14:34. **10:4:** Diut 24:1-4; Mat 5:31. **10:6:** Aitiuti 1:27; 5:2.

God ghe gheleila kosa ateva, ‘God ghe gheleila taita me vause.’⁷ ‘Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva,⁸ me ilalua aue lalu kateva nonga tale vilikiirarua.’ God ghe uela va karika va ghalue ilalua ta kateva nonga ilalua.⁹ Liuna avalua o me voto God eaatoka aitauaa, karika mene teva taumattu emene pola.”

¹⁰ Nau eteva Iesu me disaepolo atoa laghe kiri lao sio elo ale, me disaepolo atoa ngila ghe mene kookolomi Iesu tale isaa o inangari.¹¹ Me Iesu ghe uela etaira va, “Arova taita ateva ngeratila vausenna ateva me emene lai ppae ta kateva vause, elailai salosaloaa, ta enim ghaagħhaa mene kateva vause, me vausenna tuunga ateva ie etokatoka.¹² Vause tee ateva arova erati taitanna ateva me elaa lai ta kateva ppae taita ia, ia tee elailai sari, ta enim ghaagħhaa taita ateva me taitanna tuunga ateva ie etokatoka.”

*Natu aliki etoa me Iesu
(Mat 10:13-15; Luk 18:15-17)*

¹³ Katoa vause me taita laghe maearia sio lutu ngaliki etoa ta Iesu va esaoaa nimane etaira, me disaepolo atoa laghe paopaoa. ¹⁴ Me nau eteva Iesu ghe tarailala, karika ghe masimasiaala kapuna disaepolo atoa me ghe uela va, “Am maeainila sio etagħi. Am rau mene tiu velu natu aliki etoa tani mae etagħi, ta ararimangalina ateva God tangueira ia ase taumattu ngatħo nongina natu aliki etoa.¹⁵ Agħaaulia ngakoronna etaimim va arova see karika eghħaq ararimangalina ateva God nongina aliki etoa, karikaaili va aue elao tale ararimangalina ateva God.”¹⁶ Me Iesu ghe sausau aliki etoa me ghe saasaoaa nimane etaira me ghe aarangiseila.

*Tue peipeiena ateva
(Mat 19:16-30; Luk 18:18-30)*

¹⁷ Nau Iesu ghe mene kasukasu elao lao tapaa salana, taumattu ngateva ghe iloula emuli etana me ghe suuiaala ta liue kkena Iesu, me ghe uela va, “Masi tisa ngateva, vaalua agħelei me aghħaq maulue ateva etokatoka liu?”

¹⁸ Iesu ghe liula me ghe uela etana va, “Vaalua me ukolokoloagħi va masina iegħi? Karika teva masina ia ta God nonga.¹⁹ Ukilakila inangari nipaopao, va karika umene aiuvi emate, karika umene lai sari, karika umene aināo, karika umene kamekame tale niaisakej, karika umene aikamea tani għaqqa voto, me uoneoneaa tamam me kinam.”

²⁰ Me ghe liula me ghe uela va, “Tisa, isaa ona inangari nipaopao ngagħe usilaala nau aliki taita aghqi.”

²¹ Iesu ghe tara usiusiela me ghe aielousieiniela, me ghe uela etana va, “Kasina ateva voto karika ugħe għe-leiela. Lao sio me ulaa tau lao ghinnan im la poli, me ulaa tau lao viliki veu ta lo atoa karika righi ghinnaniira, me aue utau peipeiena epona liu, me umae aimuli etagħi.”

²² Me taumattu ngateva oia nannaane għe katungailiila tale isaa o inangari, me għe alousijsila me għe kasula, poli tue peipeiena ia.

²³ Me Iesu għe aitaraala me għe uela ta kapuna disaepolo atoa va, “Tue peipeiena atoa aue aanasaaili etaira tani sso tale ararimangalina ateva God.”

²⁴ Me disaepolo atoa laghe soghiaala tani nongo inangarina Iesu. Iesu ghe mene ppooaa tee tau lao sio va, “Aliko etoa, tani sso tale ararimangalina ateva God, aanasa ia. ²⁵ Marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale ararimangalina ateva God.”

²⁶ Mausina avalua o me disaepolo atoa laghe soghiaa saasakiaa teeila inangarina Iesu me ngila ghe aaikolomieinila va, “Arova isaa avalua o, see nonga erooroo tani saanga?”

²⁷ Iesu ghe pasiaala matane etaira me ghe uela va, “Ta taumattu ngatoa, karika la rooroo, me ta God la rooroo, poli God erooroo tani ghelei ekapa voto.”

²⁸ Me Pita ghe tiuaala tani auliaa ta Iesu va, “Utara, ami ghe kasu vuli ekapannaailiila voto, me ami ghe aimuli teeiola.”

²⁹ Me Iesu ghe uela va, “Aghaaaulia ngakoronna etaimim va see ia taumattu ngateva eamuemueieghi me uunguuaa masi kiukiu me ghe kasu vulila tanganuena, tuena atoa, nengana atoa, kinna me tamane me natuna atoa me umane utana, ³⁰ aue eghaa sae ta kateva ai (100). God aue etau lao oroi voto etana. Nau ta etokatoka tale kosa ateva oia, voto aue eghaa aue eoroieili, me aue elau voto llo peina ghe kasu vulila, aue eghaa oroi ale me tuena me nengana me kinna me natuna me umana utana. Katoa taumattu aue la ghelei voto sesa etana, me emulina aue eghaa maulue ateva etokatoka liu. ³¹ Me oroi ila taumattu ngatoa matuutulieniila aue la sioaili euu, me see ila lo atoa arariira euu aue la matuutulieniila.”

Iesu ghe auliaala va aue emate me emene totu

(Mat 20:17-19; Luk 18:31-34)

³² Iesu me kapuna disaepolo atoa laghe mene kasukasu elao lao eJerusalem. Iesu ghe muemueainila me kapuna disaepolo atoa laghe soosoghiaa voto laghe taatara ta Iesu. Taumattu ngatoa laghe aaimuli usi tee Iesu me kapuna disaepolo atoa laghe maamatautu. Iesu ghe mene kolola kasangaulu ghalua (12) kapuna disaepolo, me ghe mene aulia ngaotula voto aue elutu ta maamauluaane. ³³ Ghe uela va, “Am nongo! Nau eteva ngita laa soso eJerusalem aue la tau lao Natuna ateva Taumattu ngateva ta nimaira namu ngatoa ta pristi etoa me tau ngai aapasunga tale inangari nipaopao atoa, me aue la ghelei niaiskei etana, me la tingina aitauua tale niaiskei eteae va la uvi ematea. La ruu o, me la tau lao ta nimaira mene katoa ppae karika va ajiu ila. ³⁴ Me ila o katoa ppae taumattu aue la ghauliaa inangari niattara etana, la kanusueinia, me la uetaia, me la uvi ematea. Emate me vara aiaakotonna ateva nau, aue etotu.”

Jeimis me Jon lalu ghe aloanna tani namuu

(Mat 20:20-28)

³⁵ Jeimis me Jon, natuna ilalua Sebedi, lalu ghe mae sio ta Iesu me lalu ghe kolomiela va, “Tisa, angalu aloanna tani kolomio tale kateva voto, me angalu aloanna va ughelei ia o voto ateva etaingalua.”

³⁶ Me Iesu ghe kolomilaluela va, “Sa ateva amalu aloannaia va agheleia etaimalua?”

³⁷ Me lalu ghe uela etana va, “Nau eteva ukingi, kateva etaingalua etoka tale pai muenna ativilau, me kateva tale pai uaise ativilau.”

³⁸ Vara me Iesu ghe uela etairarua va, “Karika amalu tani kilakila amasina llo voto amalu kookolomieghi etana. Koti karika amalu rooroo tani ropi tale kapa ateva nimmarikana anga ghaainasiaa tani ropia? Me tani suu tale lo ateva nisuu anga ghaainasiaa tani suu etana?”

³⁹ Me lalu ghe uela ta Iesu va, “Angalu roro.”

Me Iesu ghe uela va, “Koronna. Kapa ateva anga ghaainasiaa tani ropia, aue amalu ropi tee etana, me nisuu eteva anga ghaainasiaa tani suu etana aue amalu suu etana. ⁴⁰ Me see ia lo ateva aue etoka tale pai muenna ativilau me tale pai uaise ativilau, karika uunguaaghi tani tau aatu; karika. Llo o aitokatoka God ang ghe aimonomonosiaala va uneira ila taumattu ngatoa God aue sui toongainila.”

⁴¹ Nau eteva disaepolo kasangaulu (10) laghe nongola inangari Jeimis me Jon, eghe sessailala etairarua. ⁴² Me Iesu ghe kolo aitaueinilala me ghe uela etaira va, “Am kilakila va lo atoa arariira atae va namuu ila ta tau ngeleka atoa, ila la gheelei taumattu enim uungu aanasa etaira. Me lo atoa matuutuliena ila, la gheelei saasakiaa etaira. ⁴³ Isaa o ase gheeleiaira erau mene toka elome etaimim, karika. Lo ateva taumattu ealoanna tani namuu elome etaimim, esio euu me eghelel nongina tau ngai nonganongo anna atoa. ⁴⁴ Me see ia lo ateva ealoanna tani muemue etaimim, ia aue ekapuimim tau ngai uungu ia. ⁴⁵ Mausina avalua o, me Natuna ateva Taumattu ngateva karika ghe sio mae va taumattu ngatoa la uungu etana, karika. Ghe sio mae tani uungu etaira, me tani tau lao maamauluane, tani ghaa oghi oroi taita me vause.”

Iesu ghe ghelei emasinala mata salusalu eteva

(Mat 20:29-34; Luk 18:35-43)

⁴⁶ Iesu me kapuna disaepolo atoa laghe rekatala ejeriko, laghe aso taula, me ngila ghe anna tani mene kasu ejeriko. Ia me kapuna disaepolo atoa me taumattu ngatoa oroieili ila laghe usiusia. Me Batimease, natuna ia Timease, ghe tokatoka tale sama salana atikirighi. Mata salusalu ia me uunguaane tani loo viliki veu tale taumattu ngatoa. ⁴⁷ Me eghe nongola va Iesu aNasareti ia ange rekatala, me ghe taila tani ovaova atingina va, “Iesu, natuna ia Deivit, ualousiusi teeieghi!”

⁴⁸ Oroi ila taumattu ngatoa laghe kisokisoia me laghe ue etana va, “Urau mene sama.” Me eghe mene ovaova anamungaili va, “Natuna ateva Deivit, ualousiusi teeieghi!”

⁴⁹ Me Iesu ghe tinginala, me ghe uela va, “Am kolo taue mae.”

Me laghe uela etana va, “Umasimasi, tingina saela, ange kolokoloo tani lao etana.” ⁵⁰ Vara me ghe uei vella unna aiaasae ngeleka ateva, me ghe tingina parasi saela me ghe lao sio ta Iesu.

⁵¹ Me Iesu ghe kolomiela va, “Sa ateva ualoannaia va agheleia etam?”

Me mata salusalu eteva ghe uela va, “Vau eteva! Aghaloanna tani taatara.”

⁵² Me Iesu ghe uela etana va, “Kasula, ta unem niaikaaiaa ngeghelei emasinalola.” Me arovaeaata ta matane alua ghe otla o, me ghe usila Iesu tapaa salana.

11

*Iesu ghe ssola eJerusalem
(Mat 21:1-11; Luk 19:28-40; Jon 12:12-19)*

¹ Nau eteva laghe mae akalakalangina sio eJerusalem, me eBetpeis me eBetani, masaliki eluae tale motouru eteva eOliv, Iesu ghe suula kapuna disaepolo alua, ² me ghe uela va, “Amalu lao tale masaliki eteae ita taataraie ia o. Nau amalu rekata etana, amalu tara atingina natu donki eteva naunau etingina ia karika teva taumattu ghe sae toka me ghe ilou etana. Amalu pulakaia me amalu maeainia. ³ Arova teva taumattu eue etaimalua va, ‘Vaalua me amalu ghaaghaaia?’ amalu ue va, ‘Vau eteva ealoannaaililia me auena emene oghieinie mae.’”

⁴ Me lalu ghe lao sio lalu ghe laa tara atingina sio natu donki eteva tapaa ngatamana tale ale ateva, tapaa salana, me lalu ghe pulakaiela. ⁵ Katoa laghe tiitingina laghe uela etairarua va, “Vaalua me amalu puupulaka donki eteva?” ⁶ Me lalu ghe auliaala saa llo Iesu ghe auliaala etairarua, me laghe tau vellalue la me lalu ghe kasula. ⁷ Lalu ghe laoainie sio ta Iesu. Lalu ghe alokoi saela uneirarua aiaasae ngeleka etana me Iesu ghe laa sae toka etana. ⁸ Me orioeili ila lo atoa laghe tiuaala tani llu velu uneira aiaasae ngeleka epona tale salana atikirighi. Mene katoa laghe laa saisai laa ootou, me laghe veluelu epona tale salana atikirighi. ⁹ Lo atoa laghe kasukasu emua me lo atoa laghe usiusia laghe ovaova tani ue va,

“Tau sae ararina atea God!

God aue earangise lo ateva emaemaelome tale ararina atea Vau ngepona ateva!”

¹⁰ “Niarangise tale ararimangalina ateva tuvuita ateva ta Deivit aue emae!”

“Tau sae ararina atea God iaaili epona!”

¹¹ Iesu ghe ssola eJerusalem, me ghe kupi ssola tale ale manga ateva, me ghe aaitaraa see tale voto atoa. Me ia o ang ghe elo alaila me Iesu ghe kiri lao sio eBetani tee me kapuna kasangaulu ghalua (12) disaepolo.

*Iesu ghe kasikienala fig atea
(Mat 21:18-19)*

¹² Elue talaua, laghe kasu vulila eBetani, me Iesu ang ghe maamaloo.

¹³ Eghe taatara amasau lao sio me ghe tarala fig atea uruenaaili ia. Me ghe lao sio tani taraia va arova righi uene. Me nau eteva ghe laa rekataa sio, ghe tarala va uruna nonga, poli karika ghe ghaa nauna tani kune.

¹⁴ Vara me Iesu ghe uela tale ai eteae va, “Karika teva aue emene nama righi uem!” Me kapuna disaepolo atoa laghe nongoala.

*Iesu ghe kupi ssola tale ale manga ateva
(Mat 21:12-17; Luk 19:45-48; Jon 2:13-22)*

¹⁵ Nau eteva laghe rekatala eJerusalem, Iesu ghe ssola tale ale manga ateva, me ghe tiuaala tani sungi veluelu lo atoa laghe aaitauaa me laghe poppoli. Eghe sau etakila tevoo atoa uneira ila lo atoa laghe aakolikoliaa viliki veu, me aitokatoka uneira lo atoa laghe aaitaraa valusu, ¹⁶ me karika poi ghe aalonva toa la sau longoti righi peiira eleka nongina ale manga ateva. ¹⁷ Vara me eghe tiuaala tani apasunga

tale taumattu ngatoa. “Karika am ghe kilala llo laghe pitila tale Uru ngai Manga ateva, ghe uela va,

“‘Aleghi ale manga ateva aue la ghasea va

ale ailoololo sae ia tale taumattu ngakapa atoa tale anua akapa atoa’?

Me am, ngam gheeleiela ‘nongina va aleira ale niaisulia ia tau niainao atoal’”

¹⁸ Namu ngatoa ta pristi etoa me tau ngai aapasunga ngatoa tale inangari nipaopao laghe nongola voto oia, me ngila ghe paepae righi salana tani uvi emate Iesu, me laghe maamatautainia, ta poli taumattu ngakapa atoa laghe oouna tee inangarina.

¹⁹ Elo alai tale ia o nau eteva, Iesu me kapuna disaepolo atoa laghe kasu vulila* masaliki taatara ataeae.

*Taumattu eaiesoa ngakoronna me ekokkolomi sae aue eghaa voto
(Mat 21:20-22)*

²⁰ Elue talaua poopooa, Iesu me kapuna disaepolo atoa laghe kاسکسوا elao, me laghe tarala fig ataeae ta ang ghe mmatela. Oane me ia akapaaili ai etaeae ghe mmatela. ²¹ Pita ghe mene nnaa lao sio sa ateva Iesu ghe ppooainiela tale ai etaeae. Ghe uela va, “Tisa, tarala, fig ataeae ughele kasikienainiela ange mmatela!”

²² Iesu ghe liula etaira me ghe uela va, “Am aiesoaa ta God.

²³ Aghaulia ngakoronna etaimim va, see arova eue tale motouru eteva o va, ‘Ukasu me ughoa katuu elamana,’ isaa o voto aue elutu etana, arova eaiesoaa tale urunguitanina ateva me karika eghaaghala nannaane, voto o aue elutu. ²⁴ Liuna avalua o me aghauliaa etaimim va, sa ateva am kolomia tale uneimim nilooloo sae, me am aiesoaa va angam ghaala, aue am ghaa me aue kaluimim. ²⁵⁻²⁶ Me nau am tingina me am looloo sae, am kkaluaa sesa katoa la gheelei etaimim, me Tamaimim ateva epona liu aue ekkalueea tee gheeleiaaimim sesa.”†

*Nikokkolomi tale matuutulienaane Iesu
(Mat 21:23-27; Luk 20:1-8)*

²⁷ Laghe kiriaa mae sio eJerusalem, me vara Iesu ghe kasukasu elome tale ale ngeleka etiulu tale ale manga ateva, me namuu ta pristi etoa me tau ngai aapasunga ngatoa tale inangari nipaopao me namu ngatoa laghe mae sio ta ngetana. ²⁸ Me laghe uela etana va, “See ghe tau aatu sio matuutuliena etam, me see ghe sungiola tani mae ghelei isaa oia voto?”

²⁹ Me Iesu ghe uela etaira va, “Akolomiem mua tale kateva nikokkolomi, me arova am liu emasinaia, aue aghauliaa etaimim va see ghe tau mae sio matuutuliena etaghi. ³⁰ Am liu etaghi va see ghe tau lao sio matuutuliena ta Jon me ghe aasuu taumattu: Vau ngepona ateva o nim taumattu?”

³¹ Me ngeila ghe tingina aissakea va sa ateva la ghaulieinia etana, “Arova ita ue va, ‘Vau ngepona ateva,’ aue eue va, ‘Me vaalua me karika am ghe aaikaaiaa ta Jon?’ ³² Me arova ita ue va, ‘Nim taumattu’...”

11:18: Mak 14:1. * **11:19:** Iesu me kapuna disaepolo atoa laghe kasu vulila Kasina uru ngai laghe pitila, laghe uela va, Iesu ghe kasu vulila. **11:23:** Mat 17:20. **11:24:** Mat 7:7.

11:25-26: Mat 6:14-15. † **11:25-26:** Kasina uru ngai laghe pitila, laghe uela va, 26 Marova am tam kkaluea, Tamaimim ateva epona liu karika aue ekkalueea tee eleiaaimim sesa. Utara Matiu 6:15.

(Laghe maamatauta taumattu ngatoa, poli taumattu ngakapa atoa laghe annaa va Jon propete ia.)

³³ Liuna avalua o laghe liula me laghe uela ta Iesu va, “Karika ami kilakila.”

Me Iesu ghe uela etaira va, “Aghi tee, karika aue aghauliaa etaimim va see ghe tau mae sio matuutulienaa etaghi.”

12

Kiukiu niaimatoonga tale sesa tau ngeutana atoa laghe aaitaraa utani uaeni etingiu

(Mat 21:33-46; Luk 20:9-19)

¹ Iesu ghe tiuaala tani aippooaa tee taumattu ngatoa tale kiukiu niaimatoongana atoa va, “Kateva taumattu ghe pasala utani uaeni etingiu, me ghe iri taliaala valavala atea, me ghe kaila aimonaa uaeni eteva, me ghe atulula aitiketike ateva. Vara me ghe taue lao sio ta katoa tau ngeutana tani aitarainia, me ghe kasu emasaula. ² Nau eteva utana atingiu ghe matuela, ghe suula kateva kapuna tau ngai uungu tani laa tara lo atoa laghe aaitaraa utana atingiu me aue ghe ghaa righi ue uaeni. ³ Lo atoa laghe aaitaraa utana atingiu laghe llotiela, me laghe uvi saasakieiniela, me laghe sungi veluela, me karika ghe ghaala righi ue uaeni. ⁴ Vara me ghe mene suula mene kateva kapuna tau ngai uungu tani mene lao etaira. Laghe mene lloti etokaiela, me laghe paru rrila uruna ateva, me laghe apalataiela. ⁵ Ghe mene suula mene kateva, lo ateva o tau ngai uungu laghe uvi emateala. Orioileili ila lo atoa ghe mene sungilala kateva kateva ghe laolao; katoa laghe nim uvilala, me katoa laghe uvi ematelala.

⁶ “Kateva nonga ia taumattu ghe tokala, natuna ia ghe tani aaielousieinia, ghe airuuruula tani sungia ta ghe ue va, ‘Aue la oneoneaa natughu eteva.’

⁷ “Nau eteva lo atoa laghe aaitaraa utana atingiu laghe taraiela, laghe aippooa ngaitauaala elome etaira va, ‘Taumattu ngateva okae aue eghaa akapa llo oia. Ita uvi ematea, me ita ghaa utana atingiu me ekaluita ia.’ ⁸ Laghe llotiela, me laghe uvi emateala, me laghe sau velue ghoala eleka tale utana atingiu.

⁹ “Sa ateva taumattu ngateva, umana ia utana atingiu, aue egheleia? Aue emae evui ematela me emene tau lao utana atingiu ta katoa ppae.

¹⁰ Koti karika am ghe ritila tale Uru ngai Manga ateva? Eue va,

“Atu eteva tau ngai atulu ale atoa laghe ratiela

ghe aitiutiula tale atu ekapa atoa tani suei ale ateva;

¹¹ Vau palepale ghe gheleila isaa o voto

me taataraane masinaaili ta mataita:”

¹² Namu ngatoa laghe nongola me laghe kilala va Iesu ghe aauliaa teeila tale kiukiu niaimatoonga. Laghe aloanna tani kuneia, me laghe nim maamatauta taumattu ngatoa, me laghe tau veluela, me laghe kasula.

Tani tau lao takis ta Siisa

(Mat 22:15-22; Luk 20:20-26)

¹³ Laghe suula katoa tana Paresi me katoa tana kapuna Herot tani laa ghareaa Iesu va ghe ppoaa righi inangarina, me laghe ghaaia me laghe

laa ghatinginaia tale niaisakei.¹⁴ Nau laghe lao sio, laghe uela va, “Tisa, io nau ekapa atoa uaauliaa nonga voto koronna. Karika unannangaili saa llo taumattu ngatoa la annaa, me karika utaatara taumattu tale naanamungaaira me uunguaaira, me uaapasunga ngakoronna salane God. Vaalua? Masina tani taula takis ta Siisa? Ita taula, o karika ita mene taula?”

¹⁵ Me ia ghe kilakilaaili va usimaghalue ila, me ghe uela etaira va, “Vaalua me am tootoongainaghi? Ghaa mae tivilau viliki veu me atara.”¹⁶ Laghe tau lao sio viliki veu etivilau etana me ghe uela etaira va, “See tootoona ateva me ararina atae o?”

Me laghe uela va, “Siisa.”

¹⁷ Me Iesu ghe liula me ghe uela etaira va, “Am taula voto kanna Siisa ta Siisa, me voto kanna God ta God.”

Me laghe soghiaala tani nongo llo ghe auliaala.

Maulue ateva tale kosa ateva auena emae
(Mat 22:23-33; Luk 20:27-40)

¹⁸ Sadiusi etoa, karika la ghaaiesoaa tale nitotu tale nimate, katoa etaira laghe mae sio ta Iesu me laghe uela etana va,¹⁹ “Tisa! Moses ghe piti elokoila va arova taita ateva lailai ia emate me karika righi natuna, nengane ateva ae eghaa vausenna ateva ang ghe raue vuluela, me ae natuirarua aitiutiu eteva aliki, la nnainia va natuna ia tuena.²⁰ Tue me nenga ghaitu (7). Aitiutiu eteva ghe laila, me karika righi natuna me ghe matela.²¹ Ghaluene ateva ghe ghaala vausenna ateva tuena, ghe raue vuluela. Me ie tee ghe mene matela nau karika righi natuna. Ase voto ateva o ghe mene lutula ta aiaakotonna ateva aliki.²² Tue me nenga ghaitu laghe ghaala vause ateva, me karika righi natuira me laghe matela, me vause ateva ghe mate aruula.²³ Nau nitotu tale nimate, see ae evausenna ia vause ateva o, poli ila akapa laghe laila etana?”

²⁴ Iesu ghe liula me ghe uela va, “Nannaaimim karika ghulughuluena, poli karika am kilakila Uru ngai Manga ateva me sarasarakaniaane God.

²⁵ Nau God ae etotu taumattu matena, taita atoa me vause atoa karika ae la lai; ae la nongina ensolo atoa epona liu.²⁶ Me tale nitotu ta taumattu matena, karika am ghe ritila tale unna vuku eteva Moses, tale kiukiu natu ai erighi, God ghe uela va, ‘Aghi kapuna Goto ieghi Abraham, Aisiki me Jekop.’²⁷ God karika va kapuira Goto ia lo atoa taumattu matena ila, ta kapuira Goto ia lo atoa maulue ila. Am Sadiusi etoa, inangariimim nim kamena.”

Mata ngemua ateva inangari nipaopao
(Mat 22:34-40; Luk 10:25-28)

²⁸ Tau ngai aapasinga ngateva tale inangari nipaopao ghe usila tani nongo nau eteva Sadiusi etoa laghe sama teela Iesu. Ghe nongola va Iesu ghe liu emasinaailila inangariira Sadiusi etoa. Liuna avalua o me ghe kolomila Iesu tale nikokkolomi eteva va, “Sa ateva inangari nipaopao mata ngemua ia me namuu ia tale isaa akapa inangari nipaopao?”

²⁹ Iesu ghe liula me ghe uela va, “Mata ngemua ateva voto va, Israeli etoa, am nongo, Vau palepale ateva kapuimim ia, ia nonga

vau tuungi ia. ³⁰ Uaielousiaa Vaum ateva kapum Goto ia tale urunguitanim ateva, me tale maamauluam, me tale nannaam, me tale sarasarakaniaam akapa.’ ³¹ Me aiaaghaluena ateva inangari nipaopao eue va, ‘Uaielousiaa taumattu ngateva kalakalangina ia etam, nongina uaaielousieinio.’ Inangari nipaopao alua o, namuu ilalua tale isaa akapa inangari nipaopao.”

³² Me tau ngai aapasunga ngateva tale inangari nipaopao ghe uela va, “Masinaaili, tisa. Koronna llo inangari nguauliaala va Vau eteva epona liu ia nonga Vau palepale ia, karika mene teva nongina ia. ³³ Me ita aielousiaa Vau ngepona liu eteva tale urunguitaniita, me tale nannaaita, me tale sarasarakaniaaita, me ita aielousiaa taumattu ngatoa kalakalangina ila etaita, nongina ita aaieldousieinita. Poli masina tani aimuli tee inangari nipaopao alua o, me tani ghelei asease aiaavusuvusuena.”

³⁴ Iesu ghe nongo kilala alomasaanganiaane taumattu ngateva o, me ghe uela etana va, “Io karika masau io tale ararimangalina ateva God.” Ghe ruu evaluela o me ila akapa laghe matautula tani kolomi Iesu tale mene righi nikokkolomi.

See tuyuna ia Mesaea?
(Mat 22:41-46; Luk 20:41-44)

³⁵ Iesu ghe tokatoka elome tale ale manga ateva me ghe aapasunga voto ta taumattu ngatoa. Ghe ue va, “Vaalua me tau ngai aapasunga ngatoa tale inangari nipaopao la uue va Mesaea tuyuna ia Deivit? ³⁶ Me Spirit Manga ateva ghe tokala ta Deivit, me Deivit ghe uela va,

“Vau eteva ghe uela ta kapughu vau eteva va,

“Toka siola tale pai muenna ativilau
lomose ta aghatoka sio lo atoa la sessa teeio euu,
me uatingina saoaa kkem etaira.”’

³⁷ Deivit ghe uela va Mesaea vauna ia. Vaalua me ghele mene tuyuna ia?”

Oroiannaaili taumattu laghe nonganongoa me laghe maamasiangaili llo ghe aauliaa.

*Tau ngai aapasunga atoa tale
inangari nipaopao*

(Mat 23:1-36; Luk 20:45-47)

³⁸ Nau Iesu ghe mene aapasunga, ghe uela va, “Am taatara amasina tale gheegheleiaira, tau ngai aapasunga ngatoa tale inangari nipaopao. La ghaloanna nonga tani asae masih ghinna nongina namu ngatoa, me tani ghaa niioneoneaa tale tummatavanga. ³⁹ Me ila la ghaloanna tani toka tale masih aitokatoka uneira namu ngatoa tale ale nivelu eitaua ngatoa, me tale ninamanama atoa. ⁴⁰ Tisa ngatoa la kamekame vause atoa raue vulu ila me la ghainao peiira, me la ghitaratarainila tani ghelei aluse nilooloo sae atoa. Nau niaisakei, aue la ghaa nimmarikana namungaili.”

Kanna oping vase raue vulu eteva
(Luk 21:1-4)

⁴¹ Iesu ghe ssola tale ale manga ateva me ghe toka siola ta pai kativilau tale voto ateva la kaakaai viliki veu, me ghe taatara taumattu ngatoa

laghe kaakaai kaluira viliki veu. Oroi tau peipeiena atoa laghe kaakaai oroieili kaluira viliki veu. ⁴² Vara me vause rauve vulu eteva, karika tau peipeiena ia, ghe kaaila tapiri viliki veu eluevilau.

⁴³ Iesu ghe kolola kapuna disaepolo atoa me ghe uela etaira va, "Aghaaulia ngakoronna etaimim va ia o vause ateva ange kaaila oroi viliki veu tale aikaai viliki veu eteva, me katoa la kaaila malaki. ⁴⁴ Ta ila akapaaili, la kaaila kasina nonga uneira viliki veu, me oroi isaa elo ale, me ia o vause ateva etau ekapa lao sio unna viliki veu tale aikaai viliki veu eteva, karika righi viliki veu tani mene poli righi peina."

13

Aue la tturuu ale manga ateva

(Mat 24:1-2; Luk 21:5-6)

¹ Nau Iesu ghe kupi ghoala tale ale manga ateva, kateva tana kapuna disaepolo ghe uela etana va, "Tisa, tarala masi atu etoa namungaili ila, me masi ale atoa."

² Iesu ghe liula me ghe uela va, "Utaatara kinatama ale okae? Karika teva atu aue etoka saoaa ta mene kateva. Aue taumattu ngatoa la puli reerekata isaa akapaaili oia voto."

Iesu ghe aulia ngaotula sesa nau aue emae

(Mat 24:3-14; Luk 21:7-19)

³ Nau eteva Iesu ghe nim tokatoka poi sio tale motouru eteva eOliv tale pai kativilau tale ale manga ateva, me Pita, Jeimis, Jon me Andru laghe mae sio tani kolomi einaoa, ⁴ laghe uela va, "Auliaala etaimami, isaa o voto lovisaa elutu? Me sa aimatootoongana aue elutu, me auena voto o emae?"

⁵ Iesu ghe uela etaira va, "Am paniem, teva taumattu erau kameam. ⁶ Oroi ila lo atoa aue la mae tale ararighi eteae, me aue la ue va, 'Aghi oia Mesaea ngateva,' me aue la kame oroieili taumattu ngatoa. ⁷ Me nau am nongo niauvii me kiukiuna, am rau mene matautu. Isaa o voto aue elutu, me airuuruu tale kosa ateva karika ghe mae. ⁸ Patunganua atoa aue la ghaiuvieinila; me ararimangali etoa aue la ghaiuvieinila tee. Aue rukeruke atoa la ruke kasina voto tale kosa ateva me maloo atoa aue la lutu tee. Isaa o voto aue enim aitiutiui tale nimmarikana, nongina mmarikeka eghaaghaa kinna ateva aliki eteva nau elutulutu.

⁹ "Am oia am anguu taatara, ta isaa toko voto aue elutu. Am aue la kuneiem me la laoainiem tale liu niaiskei. Aue la mae la uviem tale ale nivelu eitauaa, me aue la ghatinginaiem emua ta gavana ngatoa me kingi etoa poli ararighi eteae, me aue am rooroo tani auliaa masi kiukiuntee etaira. ¹⁰ Me mata ngemua ateva voto, masi kiukiun oia etani lao akapa see tale patunganua akapa atoa. ¹¹ Nau eteva la kuneiem me la laoainiem tale liu niaiskei, karika am mene matautu, me am annaa va sa ateva aue am aulieinia; ia o nau eteva, am ppooaa voto God aue etau aatu tale nannaaimim. Poli inangari am ppooaa karika va inangariim; ta inangarina Spirit Manga ateva.

¹² "Taumattu ngatoa aue la tau velu tueira me nengaira atoa ta lo atoa aue la uvi ematela, me tamaira atoa aue la ghelei tee ta natuira atoa. Aliki etoa tee aue la ssa tee tamaira me kinaira atoa, me aue la uvi ematela. ¹³ Taumattu ngakapa atoa aue la ssa teeiem poli ararighi eteae.

Me see etingina akorokorongana tale unna niaikaaiiaa tale airuuruu, maamauluuaane aue esaanga.

*Voto sesaaili aue emae
(Mat 24:15-28; Luk 21:20-24)*

¹⁴ “Nau am tara voto sesaaili elutu tale voto karika liuna tani lutu me eghelei taumattu ngatoa la kasu me ale manga ateva aue enim toka, (lo ateva taumattu aue etara kila aue ealomasaanga) lo atoa elome ejuidia am ilou sae tale motouru. ¹⁵ Me karika teva etokatoka eleka tale alena ateva emene kupi sso elo ale me esso ghaa righi voto. ¹⁶ Karika teva eutana emene kiri lao tanganuena me elaa ghaa teva unna aiaasae ngeleka. ¹⁷ Alousiusi ta lo atoa la suusunuku me lo atoa la sussu tale isaa o nau! ¹⁸ Am looloo sae va voto o erau mene lutu tale nau kkaili, ¹⁹ poli voto sesa tale nau o, aue esesaaili tale isaa too nau ang ghe lao sio. Tale kosa ateva oia, karika aue emene righi ase nau evalua o, nongina aitiuti nau God ghe gheleila kosa ateva me nau ghaine, me auena karika aue emene righi voto evalua o elutu. ²⁰ Arova Vau palepale ateva karika ghe nnaala tani atukuna isaa o sesa nau, taumattu ngakapa atoa aue la ghele raua, me poli enannangaili isaa o taumattu ghe suoongaala, liuna evalua o me aue eatukuna isaa o nau. ²¹ Aue lo ateva o nau arova toa la ue etaimim va, ‘Tarala, Mesaea ngateva toko!’ me mene, ‘Tarala, ie too!’ karika am mene aikaaiiaa inangariira. ²² Ta poli katoa taumattu aue la mae me aue la kame va, ‘Aghi Mesaea ngateva,’ me mene katoa aue la kame va, ‘Aghi propete ieghi’ aue la mae la ghelei aimatootoongana me voto tani apasunga sarasarakaniaira tani kame taumattu Vau palepale ghe suoongaala, kotiva isaa o voto aue eroo. ²³ Liuna evalua o me aghaauliaa va am taatara amasina, voto akapa oia ngaghe aulia ngamuemue alokoila etaimim, me auena elutu.

*Maemaeaane Natuna ateva Taumattu ngateva
(Mat 24:29-31; Luk 21:25-28)*

²⁴ “Tale isaa o nau me sesa nau auena,
“sinaka ateva aue esaurrom,
me ulana ateva karika aue emallanga,
²⁵ me katto atoa elomarase aue la katuu,
me voto atoa korokorongana ila elomarase aue la ghaisiisia.’

²⁶ “Me aue la tara Natuna ateva Taumattu ngateva aue emae tale urukookoo. Emae tee korokoronganiaane me kinatama mallangina. ²⁷ Me aue esungi ensolo atoa la lao tale ghaata aighoughou tale kosa ateva tani kolo aitauaa lo atoa ghe suoongainilala, tale kosa akapa ateva.

*Am ghaa ninanna tale fig ateeae
(Mat 24:32-35; Luk 21:29-33)*

²⁸ “Am rooroo tani ghaa alomasaanga tale kiukiu niaimatoonga tale fig ateeae. Nau eteva am tara ai eteae ange tulutulu, am kila va masi nau tale sinaka ateva ange kalakalaala. ²⁹ Liuna evalua o, nau eteva am tara isaa o voto, aue am kila va ange kalakalanginala, tapaa ngatamana. ³⁰ Aghaaulia ngakoronna etaimim va lo ateva oia vituu karika poi aue

ekapa me isaa o voto aue elutu. ³¹ Elomarase me kosa ateva oia aue ekapa me inangarighi karika poi aue ekapa.

*Karika teva ekilakila nau isaa o voto aue elutu
(Mat 24:36-44)*

³² “Me ia o nau eteva o aoa ngateva, karika teva ekilakilaia. Ensolo ngepona liu tee atoa karika la kilakila, me Natuna tee. Nim Tamaghi nonga ekilakila. ³³ Am anguu taatara me am aimonomonosiaa* poli am tam kilakila va saa nau eteva isaa o voto aue emae. ³⁴ Nonginaaili taumattu ngateva ang ghe kasukasu vuli tanganuena, me ghe taula niuungu ta kapuna tau ngai nonganongo anna atoa. Ghe aikoitaala niuungu ta kateva kateva etaira, me ghe uela ta lo ateva ghe aaitoiaa atamana ataeae va eanguu taatara.

³⁵ “Mausina avalua o me am anguu taatara atoka poli karika am kilakila va lovisaa tau ngalena emene kiriaa: aue elo alai, o eleivoo, o elopai, o elue talaua. ³⁶ Erau rekata parasi va etaraiem ta am aseasekanua. ³⁷ Voto aghaauliaa etaimim, aghaauliaa tee ta taumattu ngakapa atoa va, ‘Am anguu taatara atoka!’ ”

14

*Laghe paepae salana tani uvi emate Iesu
(Mat 26:1-5; Luk 22:1-2; Jon 11:45-53)*

¹ Kasi ghalua nau me auena niaimonomonosiaa tale nivelu eitaua ngateae ta Pasova ngateva me nivelu eitaua ngateae tale verete karika righi isti etana ghe mae, me namu ngatoa ta pristi etoa me tau ngai aapasunga ngatoa tale inangari nipaopao ngila ghe paepae righi salana tani kune aisulia Iesu me la uvi ematea. ² Laghe uela va, “Ita rau mene ghelei tale nau nivelu eitauaa, ta taumattu ngatoa la rau tiuaa teae niaiuvi.”

*Vause ateva ghe kaola llo masi ngusungusuaane ta uruna Iesu
(Mat 26:6-13; Jon 12:1-8)*

³ Iesu ghe tokatoka eBetani tale alena ateva Saemon emua arau anna tasussuku eteva. Nau Iesu ang ghe namanama, me vause ateva ghe sso tee mae aikakkaai eteva, laghe gheleiela tale atu eteva alabasta ia, pasu ia tale aiaaoo masi ngusungusuaane laghe gheleiela nonga tale oane natu ai erighi la koloa va nadi ia, aipolina namungaili. Ghe ghelei polakila aikakkaai eteva me ghe kaola aiaavusuvusuena ateva ta uruna Iesu.

⁴ Katoa taumattu laghe tokatoka ghe sessailala me laghe aippooaa elome etaira va, “Vaalua me eruuruungia aiaaoo ateva masi ngusungusuaane? ⁵ La rooroo tani polia ta kotolu ai (300) silva koen,* me viliki veu la tau lao ta taumattu karika righi peiira.” Me laghe kisokisoia.

⁶ Me Iesu ghe uela va, “Ratiela! Vaalua me am poppooaa teeia? Ange gheleiela masi voto etaghi. ⁷ Llo taumattu karika peiira la tokatoka teeiem nau ekapa atoa. Am rooroo tani sausila nau eteva am aloanna. Aghi karika aue atoka teeiem nau ekapa atoa. ⁸ Nge gheleiela voto erooroo tani ghelei; ange kaola aiaaoo masi ngusungusuaane ta

* **13:33:** aimonomonosiaa Kasina uru ngai laghe pitila, laghe uela va, aimonomonosiaa me am looloo sae. **13:35:** Luk 12:38. **14:3:** Luk 7:37-38. * **14:5:** silva koen Silva koen ativilau (denarius) erooroo aipolina kateva nau. **14:7:** Diut 15:11. **14:8:** Jon 19:40.

vilikighi tani aimonomonosiaa ngamuemua tale nikkaiaa.⁹ Aghaaulia ngakoronna va eaa aue la ppooaa masi kiukiu eteva tale kosa ateva, aue la ghauliaa tee masi gheeleiaane vause ateva oia, tani nnainia."

¹⁰ Me Jiudas Iskariot, kateva ta kasangaulu ghalua (12) disaepolo, ghe lao sio ta namu ngatoa ta pristi etoa tani taula Iesu ta nimaira. ¹¹ Laghe nongo avaluela o me laghe masimasila, me laghe gheleila inangari nialokoi va aue la taula righi viliki veu. Me Jiudas ghe tiuala tani pae salana tani tau lao Iesu ta ngetaira.

*Iesu ghe namanama teela kapuna disaepolo atoa
(Mat 26:17-25; Luk 22:7-14, 21-23; Jon 13:21-30)*

¹² Tale aitiutiu eteva nau tale nivelu eitauaa tale verete karika righi isti etana, nau eteva laghe uviuvi emate Pasova sipsipi eteva, kapuna disaepolo atoa Iesu laghe mae sio me laghe uela etana va, "Eaa uanna va ami laa ghaimonomonosiaa voto me ughelei ninamanama ateae ta Pasova?"

¹³ Liuna avalua o me ghe suula ghalua tani kapuna disaepolo. Ghe uela etairarua va, "Amalu lao tale masaliki taatara ateae, me nau amalu tara taumattu ngateva, esuusunuki aikaai manu eteva, amalu usia. ¹⁴ Lo ateva ale elaa kupi sso etana, amalu ue ta tau ngalena va, 'Tisa euela va: Eaa ia lo atiulu rum aue atoka etana, me aue anama Pasova ngateva tee kapughu disaepolo atoa?' ¹⁵ Me aue eapasunga rum atiulu epona namuu ia, me ngeila aimonomonosiaa ngatokaiela. Amalu aimonomonosiaa aneita inana tale ia o rum atiulu."

¹⁶ Disaepolo alua lalu ghe lao sio tale masaliki taatara ateae, me lalu ghe saopi ekapala voto Iesu ghe auliaala. Me lalu ghe aipanipaniaala inana tale Pasova ngateva.

¹⁷ Vara elo alai me Iesu me kasangaulu ghalua disaepolo laghe rekatala. ¹⁸ Laghe tiuala tani namanama, me Iesu ghe uela etaira va, "Aghaaulia ngakoronna etaimim va kateva etaimim aue etaueeghi lao ta nimaira tau ngai ssateeghi etoa. Taumattu ngateva ia oia ange namanama teeieeghi."

¹⁹ Disaepolo atoa laghe tiuala tani alousiusi, me kateva kateva etaira ghe kokkolomi Iesu va, "Koti aghi, no?"

²⁰ Ghe liula me ghe uela va, "Kateva ta kasangaulu ghalua kapughu disaepolo, ita namanama aitauaa. ²¹ Poli Natuna ateva Taumattu ngateva aue elao nongina Uru ngai Manga ateva eaauliaa va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula."

*Iesu ghe tau lao sio verete me uaeni ta disaepolo atoa
(Mat 26:26-30; Luk 22:15-20; 1 Ko 11:23-25)*

²² Laghe namanama, me Iesu ghe ghaala verete ateva me ghe kaili emasina saela, me ghe piriela me ghe tau lao sio ta disaepolo atoa, me ghe uela va, "Am ghaala. Isaa oia verete malataughu."

²³ Me ghe mene ghaala kapa uaeni eteva, me ghe kaili emasina saela ta God, me ghe tau lao sio etaira, me ila akapa laghe ropila tale ia o kapa uaeni eteva.

²⁴ Me ghe uela etaira va, “Uaeni eteva oia raeghi ia tani ghelei ouna inangari niaippooa ngaitauaa me aue eakalaa tani sausi oroi taumattu. ²⁵ Aghaaulia ngakoronna etaimim va karika aue amene ropi uaeni lomosi ta aropi ouna uaeni tale ararimangalina ateva God.”

²⁶ Me laghe ueila kkinari eteae, me laghe kupi ghoala tale masaliki taatara ateae me laghe saela tale motouru eteva eOliv.

*Iesu ghe aulia ngamuemua alokoila
llo Pita aue eghelei*
(Mat 26:31-35; Luk 22:31-34; Jon 13:36-38)

²⁷ Iesu ghe uela ta kapuna disaepolo atoa va, “Am akapaaili aue am ilou vulieghi, nongina Uru ngai Manga ateva eaauliaa. Eue va, ‘Aue auvi emate tau ngai toi sipsipi eteva, me sipsipi etoa aue la ilou reerekataa.’ ²⁸ Me nau atotu tale nimate aue amuemu lao eGalilii me aue am laa taraiieghi okae.”

²⁹ Me Pita ghe uela va, “Arova ila akapa la ilou vulio, aghi karika poi arooroo tani ilou vulio.”

³⁰ Iesu ghe liula me ghe uela etana va, “Aghaaulia ngakoronna etam va, ia o voo ngateva auena taita ateva paolo eaangari ghaluaata, aue uue akasina kotoluaata va karika ukilakilaieghi.”

³¹ Pita ghe aikaaia ngakoronganaili liuna avalua o me ghe uela va, “Aue amate teeio, me karika arooroo tani ue va karika akilakilaio.” Ila akapa inangariira nongina Pita.

Iesu ghe looloo sae eGetsemeni
(Mat 26:36-46; Luk 22:39-46)

³² Iesu me kapuna disaepolo atoa laghe lao sio tale voto ateva la kolokolo Getsemeni etana, me Iesu ghe uela ta kapuna disaepolo atoa va, “Am toka oia, me alaa looloo sae.” ³³ Me ghe kolola Pita, Jeimis me Jon va la usia, me nannaane ghe tiuala tani maate, me ang ghe ateateaa saasakiaa. ³⁴ Me ghe uela etairatolu va, “Maamauluaaghi ange sessaaili tee nialousiusi eteva, me egheleieghi arova amate. Am toka oia me am anguu taatara.”

³⁵ Ghe nim kasu tee lao sio, me ghe tau siola paane, me ang ghe looloo sae va, arova erooroo, isaa o sesa nau eghelekkelia. ³⁶ Me ghe uela va, “*Abba*,[†] Tamaghi, isaa akapa voto urooroo tani ghelei. Ughaa velu kapa nimmarikana ateva etaghi, me urau mene ghelei tale aloaloannaaghi ta ughelei tale aloaloannaam.”

³⁷ Ghe kiriaa lao sio ta disaepolo kotolu me ghe tarailotolla ta latolu ghe aseasekanua, me ghe uela ta Pita va, “Saemon, uaseasekanua? Karika urooroo tani anguu ta nim teva aoa? ³⁸ Am anguu taatara me am looloo sae ta God va karika am mene sso tale nitootonga. Nannaimim eanna tani ghelei voto, me vilikiimim mangoona.”

³⁹ Me ghe mene kasula tani looloo sae nongina ghe ghelei muela. ⁴⁰ Vara ghe mene kiriaa mae sio etairotolu me ghe mene saopilotolla ta latolu ghe aseasekanua, poli matairotolu ghe maamaateaili. Me karika latolu ghe kilakila sa ateva tani aulieinia.

14:24: Eks 24:8; Sek 9:11; Jer 31:31-34; 1 Ko 10:16; Hib 9:20. **14:27:** Sek 13:7. **14:28:** Mat 28:16; Mak 16:7. **14:31:** Jon 11:16. **14:32:** Jon 18:1. **14:34:** Jon 12:27. **14:36:** Mak 10:38; Jon 6:38. [†] **14:36:** Tale inangari nge Aramaik, “Abba” malloeana va “Tamaghi”.

⁴¹ Ghe kiriaa mae sio aiaakotonna me ghe uela etairotolu va, “Amotolu aseasekanua me amotolu maamatua ngatoka, va? Ange roola! Nau eteva ange rekatala. Am tarala, Natuna ateva Taumattu ngateva ngeila tautauela ta nimaira sesa taumattu ngatoa. ⁴² Amotolu totula me ita kasu! Lo ateva etautaueghi lao ta tau ngai ssateeieghi etoa ange reerekata.”

*Jiudas ghe tau lao sio Iesu ta
tau ngai ssateeena atoa*

(Mat 26:47-56; Luk 22:47-53; Jon 18:3-12)

⁴³ Nau Iesu ghe samasama nonga me Jiudas, kateva ta kasangaulu ghalua (12) disaepolo, ghe rekata teela taumattu ngatoa. Laghe posoposo baenata atoa me tuku ngai etoa. Namu ngatoa ta pristi etoa, me tau ngai aapasunga ngatoa tale inangari nipaopao, me namu ngatoa laghe sungilala.

⁴⁴ Lo ateva ghe tauue lao sio etaira ghe auliaala aimatootoongana ateva va, “Lo ateva taumattu angusua, ia o lo ateva am kuneia me am kasueinia.” ⁴⁵ Nau ghe rekatala, ghe lao sio arau ta Iesu me ghe uela va, “Rabael!” me ghe ngusuela. ⁴⁶ Laghe kuneiela me laghe poso atinginaiela. ⁴⁷ Kateva tana taumattu ghe tiitingina ghe ghaala iemana baenata ateva, me ghe sai patela talingana ativilau kateva kapuna tau ngai nonganongo anna namu ngateva ta pristi etoa.

⁴⁸ Iesu ghe liula me ghe uela etaira va, “Am annaa va aghi tau niainao aghi, va am maeaa sio iemaimim baenata me tuku ngai tani ghaaieghi? ⁴⁹ Nau etoa aghe tokatoka teeiem tale ale manga tani apasunga, me karika am ghe kunekuneieghi. Me masina, inangari tale Uru ngai Manga ateva ghaine elutu ekoronna.” ⁵⁰ Me ila akapa disaepolo atoa laghe aitiuaala, me laghe ilou vuliela.

⁵¹ Kateva aliki taita ghe usiusia, ghe aaitiitiiiaa nonga kalio atiulu usousoana ia, nau laghe kune teeielaa ⁵² ghe vella kaliona atiulu usousoana ia me ghe nim iloula karika kaliona.

Kansolo atoa laghe kookolomi Iesu

(Mat 26:57-68; Luk 22:54-55, 63-71; Jon 18:13-14, 19-24)

⁵³ Laghe ghaala Iesu me laghe laoainie sio ta namu ngateva ta pristi etoa. Namu ngatoa ta pristi etoa, namu ngatoa, me tau ngai aapasunga ngatoa tale inangari nipaopao, laghe velu eitauaala. ⁵⁴ Pita ghe aaimuli me karika ghe akalakalaa ta Iesu. Vara me ghe ssola tale valavalaa ateeae ghe taataliaa alena ateva namu ngateva tale pristi etoa. Ghe toka tee siola kapuira tau ngai toitoi etoa pristi etoa tale sama kura ateeae me ghe maamaruu.

⁵⁵ Namu ngatoa ta pristi etoa me kansolo atoa laghe tootoongala tani pae teva taumattu ghe auliaa righi sesa gheeleiaane Iesu me laghe uvi ematea, me karika laghe tarala teva. ⁵⁶ Katoa taumattu laghe aauliaa inangari kamena tee Iesu, me inangariira laghe poppooaa karika ghe laolao aitauaa.

⁵⁷ Vara me katoa etaira laghe tinginala me laghe aikamea teela Iesu tani ue va, ⁵⁸ “Ami ghe nongola ta ghe uela va, ‘Aghi aue arruti velu ale manga ateva taumattu ngatoa laghe atuluela ta nimaira, me elome tale kotolu nau aue aghatulu mene kateva, karika taumattu aue atulua ta

nimaira.’’⁵⁹ Me isaa o tee inangari laghe gheleila ghe aikasakasaliaala me ghe aituaala.

⁶⁰ Vara me namu ngateva ta pristi etoa ghe tinginala emua etaira me ghe kolomila Iesu va, ‘‘Karika aue uliu inangariira? Vaalua tale inangari la ghaauliaa teeio?’’⁶¹ Me Iesu ghe nim maamatuaa tingina me karika poi ghe liula inangariira.

Me namu ngateva ta pristi etoa ghe mene kolomiela va, ‘‘Koronna va io Mesaea ngateva, natuna io Goto ateva taumattu ngatoa la tautau sae niarangise etana?’’

⁶² Iesu ghe liula me ghe uela va, ‘‘Ue, aghi! Aue am tara Natuna ateva Taumattu ngateva ta etoka sio tale pai muenna ativilau ta lo ateva sarasarakana ia, me esio tale karaane epona liu.’’

⁶³ Namu ngateva ta pristi etoa ghe rasila ghinnanina, me ghe uela va, ‘‘Karika ita mene aloanna mene righi taumattu tani auliaa mene righi inangari. ⁶⁴ Ngam nongola ange ghaala liuna ateva God. Sa ateva am aloanna va ita gheleia etana?’’

Laghe uela va, ‘‘Ange gheleila ssavoto, ita uvi ematea.’’⁶⁵ Me katoa etaira laghe tiuaala tani kanusuia; laghe iri rungaala matane tale kalio, me laghe tuutumaria ta nimaira, me laghe ue va, ‘‘Arova propete io, uauliaa va see ange uviuvio!’’ Me lo atoa la ghaitaraa ale manga ateva laghe ghaaiela me laghe tiuaala tani posalaia.

Pita ghe uela va etam kilakila Iesu

(Mat 26:69-75; Luk 22:56-62; Jon 18:15-18, 25-27)

⁶⁶ Pita ghe tokatoka euu, elome tale valavalala atuae, me kateva vause kapuna tau ngai uungu ia namu ngateva ta pristi etoa ghe mae sio etana.

⁶⁷ Nau eteva ghe tarala Pita ta ghe maamaruu, ghe lao akalakalangina sio me ghe taatara lao sio etana me ghe uela va, ‘‘Io tee ughe kasukasuu tee Iesu aNasareti ia.’’

⁶⁸ Pita ghe uela va, ‘‘Karika poi akilakila isaa ona inangari uaauliaa.’’ Me ghe kasula me ghe kupi ghoala tale atamana atuae. Vara me taita paolo ateva ghe aangulara.[†]

⁶⁹ Me ia o vause ateva tau ngai uungu ia ghe mene taraiela me ghe uela ta lo atoa laghe tiitingina teeia va, ‘‘Kateva tee o.’’⁷⁰ Me Pita ghe mene uela va, ‘‘Karika.’’

Karika masau me lo atoa laghe tiitingina kalakalaa laghe uela ta Pita va, ‘‘Koronna io kateva etaira, poli io aGalilii io.’’

⁷¹ Me Pita ghe aaulia ngakorokorongana va, ‘‘Koronnaaili karika akilakila taumattu ngateva ona am aaulieinia. Arova anim kamekame, God aue eghelei righi voto sesa etaghi.’’

⁷² Vara me taita paolo ateva ghe mene angari eghaluenela, me Pita ghe annaala inangarina Iesu ghe uela va, ‘‘Auena paolo taita ateva eaangari ghaluaata aue uee akasina kotoluaata va karika ukilakilaieghi.’’ Me ghe ngalaalousiusieiliila.

15

Laghe laoaa sio Iesu ta Paelat

(Mat 27:1-2, 11-14; Luk 23:1-5; Jon 18:28-38)

14:64: Lev 24:16; Jon 19:7. [†] **14:68:** Kasina uru ngai laghe pitila, karika laghe pitila va, Vara me taita paolo ateva ghe aangulara.

¹ Elue talaua poopooa, namu ngatoa ta pristi etoa, namu ngatoa, me tau ngai aapasunga ngatoa tale inangari nipaopao, laghe velu eitauaala me laghe mae aitauaa sio nonga tale kateva ninannaa. Laghe irila Iesu, me laghe kasueiniela tani laoainia ta Paelat.

² Paelat ghe kolomiela va, “Io kingi io ta ajiu etoa?”

Me Iesu ghe uela va, “Ue, nongina uaauliaa.”

³ Me namu ngatoa ta pristi etoa laghe ppooala ta Paelat oroi voto karika masina ta Iesu. ⁴ Me Paelat ghe mene kolomiela va, “Karika aue uliu? Tarala, oroi inangari ngeila auliaa teeio.”

⁵ Me Iesu karika ghe liula inangularina, me Paelat ghe soghiaala gheeleiaane.

*Paelat ghe uela va la ghavukala sae Iesu
tale aikotoo*
(Mat 27:15-26; Luk 23:13-25; Jon 18:39-19:16)

⁶ Paelat ghe gheelei kateva ase voto nau ekapa atoa nau Pasova ngateva. Ghe tautau velu lo ateva taumattu, taumattu ngatoa la ghanna va ekupi ghoa tale ale mata voovoo. ⁷ Taumattu ngateva, ararina ateae ta Barabas, ghe tokatoka tale ale mata voovoo, ia me mene katoa taumattu, poli laghe aiuvii teela gavmani me laghe uvi ematela katoa tana taumattu. ⁸ Taumattu ngatoa laghe lao sio ta Paelat me laghe uela etana va eghelei voto nongina egheelei.

⁹ Paelat ghe kolomilala va, “Am anna va atau velu kapuira kingi eteva ajiu etoa?” ¹⁰ Poli Paelat ghe kilakila va namu ngatoa ta pristi etoa laghe sessaila ta Iesu poli taumattu ngakapa atoa laghe maamasiaa Iesu, liuna avalua o me laghe maeainie sio tale liu niaisakei. ¹¹ Namuu ta pristi etoa laghe suusulungi taumattu tani ue sae ta Paelat va erau mene tau velu Iesu, ta la ghanna va etau velu Barabas.

¹² Me Paelat ghe mene kolomilala va, “Sa ateva am anna va agheleia ta lo ateva am ue va kapuira kingi ia ajiu etoa?”

¹³ Laghe ovaova atingina tani ue sae va, “Uavukalaie sae tale aikotoo!”

¹⁴ Paelat ghe kolomilala va, “Poli sa? Sa ateva voto sesa ghe gheleila?”

Me laghe mene ovaova anamuu tee lao sio tani ue va, “Avukalaie saela tale aikotoo!”

¹⁵ Poli Paelat ghe aanna tani ghelei emasimasi taumattu ngatoa, liuna avalua o me ghe tau vella Barabas, me ghe taula Iesu ta soldia ngatoa, me laghe uetaielu mua me ghe vira mene tauela va la ghavukalaie sae tale aikotoo.

*Soldia ngatoa laghe auliaa teela Iesu
tale inangari*

(Mat 27:27-31; Jon 19:2-3)

¹⁶ Soldia ngatoa laghe ssoala Iesu tale tanganuena Gavana ngateva, la kolokoloa va Praetorium ateva, me laghe kolo aitauaala soldia ngatoa me laghe mae akapa sio. ¹⁷ Laghe asaela aiaasae ateva ghueghuenna ia ta Iesu me laghe navitaala kou nguru eteva tale uasa ateva rorroana ia, me laghe atokaie saela ta uruna Iesu. ¹⁸ Me laghe uue etana va, “Ei, kapuira kingi eteva ajiu eteo!” ¹⁹ Me laghe parula uruna ateva tale ai eteae, me laghe kanusuila, me kateva kateva etaira ghe suusuuiaa ta liue kkena Iesu tani tau lao ninamu ngateae etana. ²⁰ Laghe ruu ekapala

tani attara ta Iesu, me laghe ghaa vella aiaasae ateva ghueghuenna ia laghe asae tau lao sio etana, me laghe asae taula ghinnanina, me laghe ghaiae lao sio tani laa avukalaie sae tale aikotoo.

*Laghe avukala saela Iesu tale aikotoo
(Mat 27:32-44; Luk 23:26-43; Jon 19:17-27)*

²¹ Saemon atala nge Saerini ia, natuna ta Aleksanda me Rufus, ghe rekata mae sio me ghe aloanna tani kupi sso, me soldia ngatoa laghe aeala me laghe sungiela va esau aikotoo ateva unna ia Iesu. ²² Laghe ghaala Iesu me laghe laoainie sio tale voto ateva ararina atae ta Golgota, malloeanva va “Voto ateva arova Riu uru taumattu ngateva”. ²³ Laghe tau lao sio uaeni laghe kaai teela murr ta Iesu, me ghe tam aloannala tani ropi. ²⁴ Me laghe avukala saela Iesu tale aikotoo, me laghe tiuuala tani anamisi tani aikoita ghinnanina.

²⁵ Ta 9 kilok elue talaua^{*} laghe avukala saela Iesu tale aikotoo. ²⁶ Me laghe pitila inangari me laghe avukala tee saela. Laghe pitila laghe uela va, “Terai oia kapuira Kingi ia Ajiu etoa.” ²⁷⁻²⁸ Laghe avukala tee saela taita alua lalu ghe aaiuvii me lalu ghe ghaaghhaa peiira taumattu ngatoa, kateva ta pai muenna ativilau, me kateva ta pai uaise ativilau.[†] ²⁹ Taumattu ngatoa laghe kasukasu tapaa salana laghe aauliaa teeia inangari karika masina. Laghe samasama ringaringa me laghe uela va, “Ei! Io oia ughe uela va urooroo tani rruti ale manga ateva me umene atulua ta kotolu nonga nau, ³⁰ erooroo va ghaine uasaangio me ukkure vulu sio aikotoo ateva?”

³¹ Namu ngatoa ta pristi etoa me tau ngai aapasunga ngatoa tale inangari nipaopao laghe aamamarasaia tani ue elome etaira va, “Ghe asaangi katoa, me karika erooroo tani asaangia! ³² Arova Mesaea ia, kapuira kingi ia AlIsraeli etoa, ghaine etani kkure vulu sio aikotoo ateva, me aue ita aiesoaa etana nau ita tara.” Tau niainao me tau niainvii tee alua, lalu ghe aauliaa teeia inangari.

*Iesu ghe matela
(Mat 27:45-56; Luk 23:44-49; Jon 19:28-30)*

³³ Tale pai ngelo sinaka ativilau[‡] me saurrom ateva ghe mae sio, ghe akoula kosa ateva ghe roola kotolu aoa. ³⁴ Me ta 3 kilok elo alai[§] Iesu ghe sama anamungailiila me ghe uela va, “Eloi, Eloi, lama sabaktani?” (malloeanina va, “Kapughu Goto ateva, Kapughu Goto ateva, vaalua me angu tau velueghila?”)

³⁵ Nau katoa taumattu laghe tiitingina akalakalangina laghe nongola isaa o inangari, laghe uela va, “Am nongola, ekolokolo Elaija.”

³⁶ Me kateva taumattu ghe iloula tani laa asuu tuku spans ateva tale uaeni kaakaalina, me ghe apasapasaiela tale ai eteae, me ghe taue saela va Iesu ghe mmua. Ghe uela va, “Ita toitoi mua, me ita tara va kotiva Elaija esio me eghaa velue sio.”

³⁷ Me Iesu ghe ovaova anamungailiila, me inoane ghe kapala.

15:21: Rom 16:13. **15:24:** Sams 22:18. * **15:25:** 9 kilok elue talaua Tale inangari nge Griek, aiaakotonna ateva aoa. **15:27-28:** Ais 53:12. † **15:27-28:** Kasina uru ngai laghe pitila, laghe uela va, 28 Inangari tale Uru ngai Manga ateva laghe pitila ange lutu ekoronnala va, “Laghe ioi teeelia va, ie tee sesa taumattu ia.” (Luk 22:37) **15:29:** Sams 22:7; 109:25; Mak 14:58. ‡ **15:33:** pai ngelo sinaka ativilau Tale inangari nge Griek, ghaonomina (6) ateva aoa.

15:34: Sams 22:1. § **15:34:** 3 kilok elo alai Tale inangari nge Griek, aiaaghasio (9) ateva aoa. **15:36:** Sams 69:21.

³⁸ Kali atiulu ghe vuuvukala tale ale manga ateva ghe tarriila elome, ghe tiauala epona me ghe laa sio ruu euu. ³⁹ Me nau lo ateva tau ngai uvii eaitoiaa kateva ai (100) tau ngai uvii, ghe tiitingina emua ta Iesu, ghe nongola Iesu ghe samala, me ghe tarala vaalua ghe matela, soldia ngateva ghe uela va, "Koronnaaili taumattu ngateva oia Natuna ia God!"

⁴⁰ Katoa tana vause laghe tiitingina amasau me laghe taatara. Elome etaira Meri aMakdala ia, Salome, me Meri kinairarue ia Jeimis ghauna me Joses. ⁴¹ Nau Iesu ghe tokatoka eGalilii, ila o vause atoa laghe aaimuli teeia me laghe saasausia, me mene oroi katoa vause laghe mae aitauaa teeie sio eJerusalem.

*Laghe alokoila Iesu tale lienga
niaikkaia ngateae*

(Mat 27:57-61; Luk 23:50-56; Jon 19:38-42)

⁴² Nau ghe elo alaila ta nau niaimonomonosia ngateva, lo ateva nau emuli ia ta nau manga ateva, ⁴³ Josep, tanganuena tale masaliki taatara ateeae eArimatia, namuu ia ta Kansolo atoa, me ie tee ghe toitoi ararimangalina ateva God, karika ghe moiela tani sso tara Paelat. Ghe loola Iesu tani laa kaieinia. ⁴⁴ Paelat ghe soghila tani nongo va gharovaeaata ta ghe matela, me ghe kolola namu ngateva ta soldia ngatoa, me ghe kolomiela va, "Ange matela?" ⁴⁵ Nau namu ngateva ghe uela va ange matela, Paelat ghe uela va Josep erooro tani ghaa Iesu. ⁴⁶ Josep ghe polila masi kalio atiulu usousoana ia, ghe ghaa velu siola Iesu tale aikotoo. Me ghe sumuela, me ghe laoainie sio tani alokoia tale lienga niaikkaia ngateae laghe kaie ssola elome tale vallae. Ghe atakirila atu eteva tani atingina runga liu eteva. ⁴⁷ Me Meri aMakdala ia me Meri kinna ia Joses lalu ghe tarala nongina laghe alokoiola.

16

Iesu ghe totula tale nimate

(Mat 28:1-8; Luk 24:1-12; Jon 20:1-10)

¹ Nau eteva nau manga ateva ghe kapala, Meri aMakdala ia, Salome me Meri kinna ia Jeimis, laghe polila oeli masi ngusungusuaane tani laa rariaa ta vilikina Iesu. ² Elue talaua poopooa tale aitiutiu eteva nau, laghe lao sio tale lienga niaikkaia ngateae nau sinaka ateva ang ghe saela. ³ Laghe kasu aaikolomi va, "See aue eatakiri velu atu eteva tale paa lienga ateeae?"

⁴ Vara laghe taatarala, me laghe tarala va karika teva atu tale paa lienga niaikkaia ngateae, me atu eteva namungaili ia ang ghe toka ppae lao sio. ⁵ Laghe kupi ssola tale paa lienga niaikkaia ngateae, me laghe tarala aliki taita ateva ghe tokatoka tale pai muenna ativilau, ghe aasae ghinna usousoana, me laghe matautula.

⁶ Aliko taita ateva ghe uela etaira va, "Am rau mene matautu. Am paepae Iesu aNasareti ia, ia o ghe matela tale aikotoo. Ange totula, karika ia oia. Am tarala voto ateva laghe alokoiola etana. ⁷ Am laa auliaa ta kapuna disaepolo atoa, me Pita tee, va Iesu ange muemue lao sio eGalilii. Aue am sio taraia okae, nongina ghe auliaala etaimim."

⁸ Gharovaeaata ta laghe kipi velu ghoala, me laghe kasu vulila paa lienga niaikkaia ngateae, me laghe iloula. Kovaira ghe tallula, me laghe reterete. Karika laghe aippooaa, ta laghe maamataatu.

*Iesu ghe aotuotula ta Meri aMakdala ia
(Mat 28:9-10; Jon 20:11-18)*

⁹ * Nau Iesu ghe totula elue talaua poopooa, tale aitiutiu eteva nau, ghe aotuotue akasinala ta Meri aMakdala ia, ia, ia o Iesu ghe ghaa vella raroai ghatiu (7) etana. ¹⁰ Vause ateva o ghe lao sio ghe auliaala ta lo atoa laghe tokatoka tee Iesu, me laghe aale amate teeia. ¹¹ Me nau laghe nongola Meri ghe uela va Iesu ang ghe sakesakela, me ia ghe taraiela, karika laghe aiesouala.

*Iesu ghe aotuotula ta mene ghalua disaepolo
(Luk 24:13-35)*

¹² Emulina ghe mene aotuotula ta ghalua kapuna disaepolo lalu ghe kasukasu elaolao tale salana atikirighi, me taataraane ghe isaa ppaela.

¹³ Lalu ghe kiri lao sio ta mene katoa kapuna disaepolo tani auliaa, me karika laghe aiesouala.

*Iesu ghe mene aotuotula ta kasangaulu kateva disaepolo
(Mat 28:16-20; Luk 24:36-49; Jon 20:19-23; Apos 1:6-8)*

¹⁴ Emulina ghe mene aotuotula ta kasangaulu kateva (11) kapuna disaepolo, nau laghe namanama. Karika ghe masimasieinilala poli karika laghe aaiesoainia me urunguitaniira korokoronganaili, ta poli karika laghe aaiesoaa lo atoa laghe auliaa va Iesu ange totula.

¹⁵ Me ghe uela etaira va, “Am lao tale kosa akapa ateva, me am laa ppooaa masi kiukiu tale taumattu ngakapa atoa. ¹⁶ Lo ateva taumattu aue eaiesoaa me la ghasuua, aue esaanga. Lo ateva karika eaiesoaa aue eaisakei me eghaa nimmarikana. ¹⁷ Lo atoa la ghairesoaa aue la ghelei niaimatootoongana: Tale ararighi eteae aue la ghaa velu raroai etoa, me aue la ghaippooaa tale oroieili asease nisama. ¹⁸ Aue la poso katu ngatoa ta nimaira. Arova la ropi righi manu sesaaili, karika la rooroo tani mate. Aue la poso tau sessa atoa me tau sessa atoa aue la masina.”

*Iesu ghe saela epona liu
(Luk 24:50-53; Apos 1:9-11)*

¹⁹ Emuli nau Vau eteva Iesu ghe ruula tani aippooaa teeila, God ghe ghiaielia, me ghe saela epona liu, me ghe tokala tale pai muenna ativilau ta God. ²⁰ Disaepolo atoa laghe lao sio tani ppooa ngakapa see. Vau Palepale ghe uungu eitauua teeila tani ghelei aiematootoongana atoa tani asarasarakana inangariira.

* **16:9:** Llo akasina alua tani vuku pokane laghe piti ekasinala ta nimaira, karika urooroo tani tara Mak 16:9-20. Oroi katoa tau ngalomasaanga la aikaaiaa va karika Mak ghe pitiela. Katoa tani taumattu laghe nim tara ssola tale mene kasina kiukiu elome tale Uru ngai Manga ateva me laghe nim piti mae sio ta vuku eteva ta Mak. **16:14:** 1 Ko 15:5. **16:15:** Apos 1:8.

16:16: Apos 2:38. **16:17:** Apos 2:4; 8:7. **16:18:** Luk 10:19; Apos 28:3-6. **16:19:** Apos 1:9-11; 2:33-34. **16:20:** Apos 14:3; Hib 2:3-4.

Masi kiukiu Luk ghe pitiela Inangari emuemua

Luk karika va kateva kapuna disaepolo Iesu, ta dokta ia, ghe kasukasu eitauaa tee Pol. Luk ghe pitila ghalua vuku, Masi Inangarina me Gheegheleiaaira Apostolo atoa, me lalu auliaa kiukiuna Iesu me aitiuti etoa ninamanama tale ale manga atoa. Eaauliaa oroi voto ghe lutula tale tokatokane Iesu, me inangarina Iesu. Etiuaa tale lutulutuaane Jon tau ngai asuu ia, me eruu tale tottotuaane Iesu. Luk karika ajiu ia, me eapasunga vaalua Iesu eaaloanna taumattu karika ajiu ila, lo atoa karika tue peipeiena ila, lo atoa ajiu laghe kolokolola va “tau ngai ghelei ssavoto ila”, me lo atoa karika arariira. Eaauliaa tee nilooloo sae, Spirit Manga ateva, me nimasimasi.

Tani kila amuemua

Inangari tani tiuaa 1:1-4

Lutulutuaane Iesu me nau aliki ia 1:5-2:52

Jon tau ngai asuu ia me Iesu 3:1-4:13

Iesu ghe uungula eGalilii 4:14-9:50

Iesu ghe saela eJerusalem 9:51-19:10

Iesu ghe uungula eJerusalem 19:11-21:38

Matemateaane me tottotuaane Iesu 22:1-24:53

Aitiutiui

¹ Namu ngateva Tiopilus, kasina ninamanama ang ghe lao sio, oroi taumattu laghe tootoongaala tani piti kiukiuna voto Vau eteva ghe gheleila me ghe lutula elome etaimami. ² Laghe aaimuli tee inangariira lo atoa laghe tarala isaa o voto ta mataira. Laghe tiula ta nau voto ghe tani tiuaala. Isaa o taumattu ghe uungu tale inangarina ateva Vau ngepona ateva me ila laghe tau mae sio isaa oia kiukiu. ³ Liuna avalua o me aghi tee aghaloanna tani piti eghulughuluena isaa o kiukiu me aghasaokie atu ta getam. Aghe uungula oroi nau tani kolomi emasina vaalua isaa o inangari ghe tani tiuaala. Namu ngateva, isaa oia voto ngapitila isaa akapaaili koronna. ⁴ Utara me aue ukila amasina va isaa o inangari laghe apasungaala etam koronna akapa.

Ensolo ateva ghe uela ta Sekaraea va Jon aue elutu

⁵ Nau Herot kingi ia ejidua, kateva pristi ghe tokatoka, ararina atuae ta Sekaraea, tuvuna ia Abija, me vausenna ateva, ararina atuae ta Elisabet, ie tee tuvuna ta Eron. ⁶ Ilalua ghulughuluena ilalua ta matane Vau eteva. Lalu ghe aaimuli tee kanna inangari nipaopao me inangarina Vau eteva me karika righi gheeleiaairarua sesa ta matane. ⁷ Me tee, karika righi natuirarua ta poli Elisabet kina ngere ia, me tee lalu geh taita namuula me vause namuula.

⁸ Kateva nau, kapuna atoa Sekaraea, laghe uungu tani ghelei unguaira pristi etoa, me Sekaraea, ie tee ghe uungu. ⁹ Vara me laghe gheleila kasina salana tani kila va saa pristi eteva esso tale rum manga

atiulu tani sso ghelei asu eteva masi ngusungusuaane esae ta Vau eteva. Laghe gheleila isaa o voto me laghe kilala va aue Sekaraea esso.¹⁰ Nau ghe gheelei isaa o voto tani ghelei asu eteva masi ngusungusuaane, taumattu ngatoa laghe looloo sae eleka, elome tale vanisi eteva tale ale manga ateva.

¹¹ Vara me ensolo ateva kapuna ia Vau eteva ghe otuotula ta Sekaraea. Ghe tiitingina tale pai muenna ativilau tale olta ngateva laghe gheeghelei asu eteva masi ngusungusuaane etana.¹² Sekaraea ghe tarala ensolo ateva, me ghe soghieiniela, me ghe matautula.¹³ Me ensolo ateva ghe uela etana va, "Sekaraea, urau mene matautu. Vau eteva ang ghe nongola kalum nilooloo sae etana. Vausenim ateva ta Elisabet aue eghaa aliki eteva taita ia me uase ararina ataeae ta Jon.¹⁴ Nimasimasi aue etoka ta ngetaimalua me aue amalu toka amasina. Oroi tee taumattu aue emasimasi poli aliki eteva aue elutu,¹⁵ poli ia aue enamuu ta taataraane Vau eteva, me erau mene ropi uaeni me manu sarasarakana. Aue Spirit Manga ateva etoka etana nau ia ta kova kinna, me nau ekapa atoa.¹⁶ Ia aue ekatulaa oroi taumattu nge Israeli etoa me aue la mene kiri me la oghi lao ta Vau eteva kapuira God ia.¹⁷ Uunguaane me sarasarakaniaane aue nongina Elaija, me aue emuemue ta Vau eteva. Aue eghelei tamatama atoa me natuira atoa la mae aitauaa, me aue la kateva nonga, me aue eghelei emasina nannaairia lo atoa karika la nonganongo usilaa me aue la ghaa masi ninannaa nongina lo atoa ghulughuluena ila. Aue eghelei taumattu eaimonomonosiaa tale maemaeaane Vau eteva."

¹⁸ Me Sekaraea ghe kolomila ensolo ateva va, "Vaalua arooroo tani kila va inangarim koronna, poli ngaghe taita namuula me vausenighi tee ateva ang ghe vause namuula?"

¹⁹ Me ensolo ateva ghe liula me ghe uela va, "Aghi Gabriel. Atiitingina emua ta matane Vau eteva me ia esungieghila tani sio auliaa isaa oia masi inangari ta ngetam.²⁰ Unongo! Poli karika uaaiesoaa inangarighi, aue upaavoo. Karika aue usama lomosi ta voto aghauliaala aue elutu. Inangarighi aue elutu ekoronna tale nau Vau eteva eaaloanna."

²¹ Me taumattu ngatoa laghe toitoi poi Sekaraea me ngila ghe nannaia va sa ateva ange lutula me karika ange kupikupi ghoa parasi tale rum manga atiulu.²² Vara me ghe kupi ghoa mae, me karika ghe roola tani aippooaa teeila, me laghe nim kilala va koti ange tarala teva nitaatara ie nonga ange kilaiela tale rum manga atiulu, poli ghe nim suisui me ghe aimatoonga ta nimane, ta ghe paavoola.

²³ Vara nauna tani uungu ghe ruula, me Sekaraea ghe oghi lao sio tanganuena.²⁴ Emuli tale isaa o nau, me vausenna ateva ta Elisabet ang ghe suusunuku, me ghe tam aotuotu poila ghe roola ghalima ulana.²⁵ Ghe uela va, "Vau eteva ghe alousiusi teeieghila, me ang ghele gheleila ia oia voto ateva ange lutu etaghi, tani ghaa velu nipalata ateva etaghi ta mataira taumattu ngatoa."

*Ensolo ateva ghe auliaala kien Meri
va Jesu aue elutu*

²⁶ Tale aiaaghaonomina ateva (6) ulanina Elisabet nau ghe suusunuku, Vau eteva ghe suula ensol Gabriel tani sio tale natu masaliki erighi eGalili, ararina ataeae ta Nasareti.²⁷ Ghe lao sio tani tara aliki

vause ateva, karika ghe aso tee poi teva taita, ararina atae ta Meri. Laghe aseainiela va elai ta Josep, tuvuna ia Deivit. ²⁸ Ensolo ateva ghe lao sio etana me ghe uela va, “Elue talaua etam! God ang ghe arangiseiola, me Vau eteva etokatoka teeio.”

²⁹ Meri ghe soghiaala tani nongo isaa o inangari, me ghe annangailiila va tani saa inangari llo oia. ³⁰ Me ensolo ateva ghe uela va, “Meri, urou mene matautu. Vau eteva aue eghelei masi voto etam. ³¹ Unongo! Aue ukkai aliki eteva taita ia, me uase ararina atae ta Iesu. ³² Ia aue enamu, me aue la koloa va Natuna ateva Lo ateva Iaaili Epona. Me Vau eteva God aue egheleia ekingi nongina tuvuna ta Deivit. ³³ Ia aue namuu tale ararimangalina ateva Jekop nau ekapa atoa, me ninamu ngateae etana karika aue ekapa.”

³⁴ Me Meri ghe kolomila ensolo ateva va, “Isaa o voto, vaalua aue elutu, poli karika aghe aso tee poi teva taita?”

³⁵ Me ensolo ateva ghe liula inangarina me ghe uela va, “Aue Spirit Manga ateva emae toka etam, me sarasarakaniaane Lo ateva Iaaili Epona aue eakouo. Ia o aliki eteva aue umolenainia aue emanga, me aue la koloa va Natuna ia God. ³⁶ Unongo, mangalim ta Elisabet ang ghe vause namuula, me ia oia ekakkai me aue emolena, aliki eteva taita ia. Nau to ang ghe lao sio, laghe ue va karika erooroo tani ghaa aliki. Me ia oia esuusunuku ang ghele ghaonomola (6) ulanina. ³⁷ Poli karika teva voto God etam rooroo tani ghelei.”

³⁸ Me Meri ghe uela va, “Unongo, aghi kapuna vause tau ngai uungu ieghi Vau ngepona ateva. Erooroo tani ghelei etaghi voto nongina uauliaa.” Vara me ensolo ateva ghe kasu vuliela.

Meri ghe lao sio tani tara Elisabet

³⁹ Kasina nau ghe lange sio tale isaa o nau, Meri ghe ailuiluila tani lao tale voto ateva oroi motouru etana tale kateae ppae natu masaliki tale masaliki eteae ejidia. ⁴⁰ Me ghe kupi ssola tangantuena Sekaraea me ghe tarala Elisabet me ghe uela va, “Elo alai etam.” ⁴¹ Nau Elisabet ghe nongola Meri ghe samasama teeia, aliki eteva ta kovane namungaili ta ghe aisiisiaala, me Spirit Manga ateva ghe pasula ta Elisabet. ⁴² Me ghe sama anamungailiila tani ue va, “Vau eteva ang ghe tau aatu sio niarangise elaulau niarangise etautau ta mene katoa vause. Ia ona aliki eteva ukaakaia aue eghaa niarangise ta Vau eteva. ⁴³ Kalughu sa ateva me kinna ateva Vaughu eteva ange mae sio tani taraieghi? ⁴⁴ Nau eteva anongola ta usamala, arovaeaata ta aliki eteva ta kovaghi emasimasila me eaisisiaala. ⁴⁵ God aue earangiseio poli ughe aiesoala voto Vau eteva ghe uela va aue elutu ta ngetam.”

Kkinarina atae Meri

⁴⁶ Meri ghe uela va,
“Maamauluaaghi etautau sae ararina atae Vau eteva,
⁴⁷ me urunguitanighi eteva emasimasiangaili God ta eaasaangieghi.
⁴⁸ Aghi nim tau ngai uungu ieghi etana, karika teae ararighi, me ghe taraieghila tale maamasinaane.

Ia oia vituu eteva me llo auena vituu aue la ue va Vau eteva ghe arangiseieghila,

1:31: Ais 7:14; Mat 1:21-23.

1:32: 2 Sam 7:12, 13, 16; Ais 9:7.

1:37: Aitiutiu 18:14.

1:46: 1 Sam 2:1-10.

- ⁴⁹ Lo ateva sarasarakananaili ia ghe gheleila voto namungaili etaghi, me ararina ateeae manga ia.
- ⁵⁰ Eaapasunga masi aalousiusiaane ta lo atoa la oneoneainia
aue etoka gheelei evalua o tale ia oia vituu eteva me llo auena vituu.
- ⁵¹ Ghe gheleila kinatama voto ta nimana,
me ta lo atoa la tautau sae nannaaira, aue egheleila la ghaitiuua see.
- ⁵² Ghe atoka siola lo atoa taumattu namu ngila me sarasarakananaili ila
me ghe atingina saela lo atoa taumattu karika righi arariiira.
- ⁵³ Ghe tautau masi voto ta lo atoa taumattu maloona ila,
me lo atoa tau peipeiena ila, ghe sungisungi vella, nim ila laghe
kasukasus karika laghe ghaaghaa righi voto.
- ⁵⁴ Ghe sausila kapuna tau ngai nonganongo anna atoa ta Israeli etoa,
poli eannaa aalousiusiaane
- ⁵⁵ ta Abraham me lo atoa tuvuna auena la lutu,
nongina ghe auliaala ta tuvuita atoa.”
- ⁵⁶ Meri ghe toka teela Elisabet ghe roola kotolu ulana me ghe vira
mene kiriaa lao sio tanganuena.

Lutulutuaana Jon tau ngai aasuu ia

- ⁵⁷ Nauna Elisabet tani molenaa, me ghe molenaala aliki eteva taita ia.
⁵⁸ Lo atoa taumattu tanganueira aitauaa me kapuna atoa, laghe nongola
kiukiu vaalua Vau eteva aalousiusiaane ta Elisabet. Laghe masimasi
aitauaa teeielaa.
- ⁵⁹ Aiaaghaoaluna (8) ateva nau, taumattu ngatoa laghe mae sio tani
velu eitauaa tani iso aliki eteva, me laghe aloanna tani ase ararina ateeae
ta Sekaraea, poli ararina ia tamane. ⁶⁰ Kinna aliki eteva ghe uela va,
“Karika! Ararina ateeae ta Jon.”

⁶¹ Me laghe uela etana va, “Karika teva kapuimim ararina ia arari
eteae ona.”

⁶² Me laghe aaimatoonga ta nimaira tani kolomi tamana aliki eteva
va saa arari eteeae eaaloannaia. ⁶³ Sekaraea ghe aimatoongaala etaira
va la ghaa taula teva aipitipi me epiti inangarina. Inangarina ghe
pitila ghe uela va, “Aliko eteva, ararina ateeae ta Jon.” Taumattu ngatoa
laghe soghiaala voto laghe tarala. ⁶⁴ Arovaeaata ta God ghe otile paane
ateva Sekaraea, me Sekaraea ghe samala, me ghe mene tiuala tani
sama me ghe tau saela ararina ateeae God. ⁶⁵ Me lo atoa masaliki
kalakalangina ila laghe tarala isaa o voto ghe lutula, me ghe moilala, me
kiukiu ghe kasu ekapa seela, me lo akapa atoa laghe tokatoka tale voto
ateva oroi motouru etana ejiudia, laghe nongo akapala. ⁶⁶ Lo akapa
atoa taumattu laghe nongola, laghe nnaa soso laala isaa o kiukiu,
me laghe aaikolomieinila va, “Aliko eteva oia, aue saa taumattu nau
enamuu?” Poli laghe tarala va sarasarakaniaane Vau eteva ghe toka
aitauaa teeielaa.

Kkinarina ateeae Sekaraea

- ⁶⁷ Spirit Manga ateva ghe pasula ta Sekaraea, tamane aliki eteva, me
ghe aulia ngamuemua alokoila inangari tani ue va,
⁶⁸ “Ita tau sae ararina ateeae Vau eteva, kapuira Goto ia Israeli etoa,

poli ghe mae sio tani sausi kapuna taumattu ngatoa me ghe poli aoghi teeilala.

69 Ghe tau mae sio kateva taumattu sarasarakanaili ia tani sausita elome ta tuvuna atoa Deivit, kapuna tau ngai nonganongo anna ateva God.

70 Nongina ghe gheleila inangari nialokoi ta propete atoa manga ila me ila laghe auliaala emua arau,

71 va ue easaangita ta tau ngai ssateeita atoa,
me ta nimaira lo atoa esessaieiliila etaita.

72 Ta poli aalousiusiaane ghe sausila tuvuuta atoa,
me eannaa inangari manga emua arau ghe aulia ngalokoila

73 ghe auliaala inangari nialokoi ta tuvuuta ateva ta Abraham.

74 Eanna tani asaangita ta nimaira tau ngai ssateeita atoa
me ita kkaueinia me ita rau mene matautu.

75 Liuna avalua o me nau ekapa atoa, nau sakesake ita, ita kasu tale salana manga me ghulughuluena ta matane.

76 Me io, natughu, ue la ghaseo va kapuna propete io Vau eteva;
me io, ue umuemuea Vau eteva tani aimonomonosiaa salane atikirighi,

77 tani ghelei masalika tale kapuna taumattu ngatoa, vaalua tani saanga
me eghaa velu kaluira ssavoto,

78 tale aalousiusiaane kapuita Goto ateva,
me mallanga ngepona liu eteva ue esio etaita

79 tani tau mae mallanga ateva tale taumattu ngatoa la tokatoka tale saurrom
me tootoo nimate ateva

me tani aitaraa kasukasuaaita tani lao tale salana luei.”

80 Ia o aliki eteva ghe namuula, me alomasaanganiaane ghe sarasarakanailiila, me ghe tokatoka tale voto ateva karika righi taumattu etana, elomosina ta ghe vira mene ghaala nauna tani ppooaa tale taumattu nge Israeli etoa.

2

Lutulutuaane Iesu (Mat 1:18-25)

1 Tale isaa o nau, Siisa Augustus ghe alokoila kateva inangari va la ghaa akapa arariira taumattu ngatoa. **2** Nau eteva Kuirinius gavana ia eSiria, laghe gheleila aitiutiu eteva sensis. **3** Liuna avalua o me isaa akapa taumattu ghe oghioghi lao tale masaliki tuvuira atoa, me gavmani ghe ghaaghaa arariira.

4 Poli Josep ararimangalina aitauaa tee Deivit, liuna avalua o me ghe kasu vulila masaliki eteae eNasareti nge Galilii, me ghe saela ejidua tale masalikina ateae Deivit, la kolokoloa va Betlehem, tani alokoi ararina ateae. **5** Ia me vause ateva laghe aseainiela va eghaaia, ararina ateae ta Meri, lalu ghe saela va gavmani ghe ghaa arariirarua. Isaa o nau Meri ghe suusunuku. **6** Ilalua eBetlehem me ghe ghaala nauna Meri tani molenaa, **7** me ghe molenaala natuna aitiutiu eteva aliki taita ia, me ghe ghiisainiela tale kalio me ghe alokoie siola tale aikaai aneira inana ateva vulumakao atoa, poli isaa akapa ale aiasoaso ghe pasula.

Ensolo atoa laghe auliaala kieira tau ngai toi sipsipi etoa

⁸ Eleka tale masaliki eteae eBetlehem, katoa tana tau ngai toi sipsipi laghe aaitoiaa kieira ghaata kkena tale voto ateva rarrasa etana, eleivoo. ⁹ Me kateva kapuna ensolo Vau eteva ghe rekataala etaira me mallangina ateva ghe talieinilala me laghe matautu saasakiaala. ¹⁰ Ensolo ateva ghe uela etaira va, “Am rau mene matautu, poli amae sio tani auliaa kieimim tale masi kiukiu. Isaa oia inangari aue eghelei isaa akapa taumattu la masimasieili. ¹¹ Ia oia nau eteva aliki eteva, aiasaangimim ia, ange lutula tale masalikina ateae Deivit, ia Mesaea ia, me Vau ia. ¹² Vaalua aue am kilaia, aue am taraiia ghiighisainia tale kalio, me easoaso tale aikaai aneira inana ateva vulumakao atoa.”

¹³ Arovaea nonga ta mene katoa ensolo oroiannaaili ila la tokatoka epona liu, laghe kaurekatila, me laghe tingina teela ia o ensolo ateva, me laghe tiuaala tani kkaua ararina ateae God, laghe ue va,

¹⁴ “Ita tau sae ararina ateae Vau eteva epona liu

me tale kosa ateva luei aue etoka ta lo atoa God emaamasieinila.”

¹⁵ Nau ensolo atoa laghe kasu vulilala, me laghe saela epona liu, me tau ngai toi sipsipi etoa laghe aippooa ngaitauaala va, “Ita kasu me ita lao eBetlehem, me ita laa tara isaa o voto ange lutula, Vau eteva eauliaala.”

¹⁶ Laghe ailuiluila tani kasu, me laghe laa saopi sio Meri me Josep me aliki eteva, ghe asoaso tale aikaai aneira inana ateva vulumakao atoa. ¹⁷ Nau eteva laghe taraiela, laghe auliaaa seela inangarina aliki eteva, ensolo ateva ghe auliaala etaira. ¹⁸ Me ila akapa taumattu ngatoa laghe nongola kiukiu tau ngai toi sipsipi etoa laghe auliaala, me laghe soghiaala. ¹⁹ Meri ghe ailokoia ngakapala isaa o inangari tale urunguitanina, me nau ekapa atoa ghe annaa. ²⁰ Tau ngai toi sipsipi etoa laghe oghiaala, me laghe tau saela ararina ateae God, me laghe masimasiangailiila God, poli isaa akapa voto ensolo ateva ghe auliaala, laghe tarala me laghe nongola, nongina ghe auliaala.

Laghe asela ararina ateae Iesu

²¹ Aiaaghaoaluna (8) ateva nau laghe isola aliki eteva, me laghe asela ararina ateae ta Iesu, kinna karika ghe kaaia me ensolo ateva ghe ase alokoila ararina ateae.

Simion me Anna lalu ghe tarala Iesu tale ale manga ateva

²² Ghe ghaala nau ta Josep me Meri tani raarangisana, tani aimulsi tee inangari nipaopao Moses ghe piti elokoila. Liuna avalua o me lalu ghe saula aliki eteva, me laghe saela eJerusalem tani apasungainia ta Vau eteva. ²³ Lalu ghe anna tani aimuli tee Uru ngai Manga ateva eue va, “Isaa akapa aliki taita aitiutiu tani lutu, la taula lao me la ghamangaila ta Vau eteva.” ²⁴ Lalu ghe saela tani ghelei aiaavusuvusuena, nongina inangarina Vau eteva ghe auliaala va, “Ghila alua nongina alikao alua, o valusu elua, lalu vira mene naanamu.”

²⁵ Isaa o nau kateva taumattu ghe tokatoka eJerusalem, ararina ateae ta Simion, ghe gheelei nonga voto ghulughuluena, me ghe aaimuli tee God. Spirit Manga ateva ghe tokatoka ta ngetana. Ghe toitoi ia o taumattu ngateva aue alona eusi Israeli etoa. ²⁶ Spirit Manga ateva ang ghe aotula etana va karika aue emate lomosi ta etara mua kapuna

Mesaea ngateva Vau eteva. ²⁷ Spirit Manga ateva ghe katulainiela me ghe kupi ssola tale ale ngeleka atiulu tale ale manga ateva, me kinna me tamane Iesu lalu ghe maeaa sio ia o aliki eteva Iesu etana, tani ghelei voto inangari nipaopao eaauliaa. ²⁸ Me Simion ghe sauela me ghe kalopiela, me ghe tau saela ararina ataeae God, me ghe uela va,

²⁹ "Vau eteva, aghi kapum tau ngai nongonongo anna ieghi,
ia oia urooroo tani tau velueghi tale luei, nongina ughe auliaala.

³⁰ Mataghi ange tarala kalum niasaangi eteva,

³¹ ughe aimanomanosieiniela ta mataira isaa akapa taumattu ngatoa,

³² ia mallanga ia eaapasunga Vau eteva ta mene katoa patunganue namuu,

me ae la gharuaa kapum taumattu nge Israeli etoa."

³³ Tamana me kinna Iesu lalu ghe soosoghiaa voto Simion ghe aauliaa tee Iesu. ³⁴ Me Simion ghe arangiseiluelu, me ghe uela ta Meri va, "Ia oia natum ateva ae eghelei oroi taumattu nge Israeli, katoa ae la mate, me katoa ae la saanga, ae etoka tani aimatootoongana ta taumattu ngatoa, me karika poi ae la annaia, ³⁵ me ae eghelei nannaairaa aisuliaane ae eotu. Me io, Meri, alousiusiaam ae enongina baenata ateva epasapasa urunguitanim ateva."

³⁶ Vause ateva, propete ia, ghe vause namungailila, ararina ataeae ta Anna, natuna ia Panuel, tale ararimangali eteva ta Asa, ie tee ghe tokatoka tale ale manga ateva. Nau ghe laila ghe toka teela taitanna ateva ghaituae (7) ninamanama nonga me taitanna ateva ghe raue vuluela. ³⁷ Taitanna ateva ghe raue vuluela, me ghe tokala ghe roola ghaoolungaulu ghaatiae (84) anna ninamanama, me ghe kakkaua tale ale manga ateva ellaa me eleivoo, me ghe naenae me ghe looloo sae tale nau laghe suitoongaala va la lao aitauaa etana tale ale manga. ³⁸ Nau Simion ghe aaippooaa tee Meri me Josep, Anna ghe rekatala, me ghe tiuaala tani tau sae God, me ghe aauliaa aliki eteva ta lo atoa laghe toitoi kapuira tau ngai asaangi eteva Israeli etoa.

Josep me Meri lalu ghe kiriaa siola eNasaret

³⁹ Nau Josep me Meri lalu ghe ghelei ekapala voto tale inangarina Vau eteva, me lalu ghe mene oghi siola tanganueirarua eNasareti, ta pai nge Galilii. ⁴⁰ Ia o aliki eteva ang ghe naanamuu, me sarasarakania, alomasaanga ia, me God ghe aarangiseia.

Iesu elome tale ale manga

⁴¹ Isaa akapaaili ninamanama, tamana me kinna Iesu lalu ghe saesae eJerusalem tale nivelu eitaua ngateae, laghe aseasea va Pasova. ⁴² Nau anna ninamanama Iesu ghe kasangaulu ghaluaela (12), laghe saela tale nivelu eitaua ngateae, nongina laghe gheelei arau. ⁴³ Nau nivelu eitaua ngateae ghe ruula, tamane me kinna ngila ghe mene ooghiaa tani lao tanganueira, me taita arighi ta Iesu ghe tokala eJerusalem. Karika lalu ghe kilala. ⁴⁴ Lalu ghe annaa va Iesu ghe kasukasu tee mene katoa taumattu. Laghe kasula ghe roola kateva nau, me lalu ghe tiuaala tani paea. Lalu ghe aaikolomainie see, ta mangaliirarua atoa me kapuirarua atoa. ⁴⁵ Nau karika lalu ghe taraiela, lalu ghe mene ooghiaa lao sio

2:30: Ais 52:10; Luk 3:6; Tts 2:11. **2:32:** Ais 42:6; 49:6; 52:10. **2:34:** Ais 8:14; Mat 21:42;
1 Pita 2:8. **2:39:** Mat 2:23. **2:41:** Eks 12:24-27; 23:14-17; Diut 16:1-8.

eJerusalem tani mene paea. ⁴⁶ Ghalua nau ghe lange sio, me lalu ghe taraiela elome tale ale manga, ghe tokatoka tee tau ngai aapasunga ngatoa. Ghe nonganongola, me ghe kookolomila tale nikokkolomi. ⁴⁷ Lo atoa laghe nonganongoa laghe soosoghiaa aalomasaanganiaane, me vaalua ghe liuliu uneira nikokkolomi. ⁴⁸ Nau eteva kinna me tamane lalu ghe taraiela, lalu ghe soghieiniela, me kinna ghe uela etana va, “Natughu, vaalua me ughe ghelei evalueiengaluela o? Angalua me tamam angalu ghele nannangailio nau eteva angalu ghele paepaeo.”

⁴⁹ Ghe kolomiluelua va, “Vaalua me amalu paepaeaghi? Amalu rorooroo tani kila va aghi tale alena ateva Tamaghi.” ⁵⁰ Karika lalu ghe kila amasinala malloceanina voto ghe auliaala etairarua.

⁵¹ Me ghe usiluelua, me laghe siola eNasareti, me nau ekapa atoa ghe nonganongo usilainilalua. Me kinna ghe ailokoia ngakapaailila isaa o voto tale urunguitanina ateva. ⁵² Me Iesu ghe naanamuu, me aalomasaanganiaane tee ghe laa saesae, me God me taumattu ngatoa laghe aaloannaailiia.

3

*Jon tau ngai aasuu ia ghe aimonomonosiaala salana atikirighi
(Mat 3:1-12; Mak 1:1-8; Jon 1:19-28)*

¹ Tale aiaakasangaulu ghalimae (15) atae ninamanama ta Taiberias Siisa tani aitoiaa eRom, me Pontius Paelat gavana ia ejudia, me Herot ghe aaitoiaa eGalilii, me tuena ta Pilip ghe aaitoiaa eIturea me eTrakonitis, me Lisanias ghe aaitoiaa eAbilen — ² isaa o nau Annas me Kaeapas namuu ilalua ta pristi etoa ta ajiu etoa, me isaa o nau tee, Jon natuna Sekaraea ghe tokatoka tale voto ateva karika righi taumattu ta ngetana, me inangarina God ghe mae sio etana. ³ Jon ghe kasukasu ekapa see tale masaliki eJodan, kalakalaa tale ateo atae, me ghe poppoaa ta taumattu ngatoa va la nna ngaioghioghiaa me la ghaha niasuu, me God aue ekkaluaa kaluira ssavoto. ⁴ Nongina propet Aisaea ghe pitila emua arau, ghe uela va,

“Tale voto ateva karika righi taumattu etokatoka etana, lingi ngalo taumattu ngateva ekolokolo, eue va,

‘Am aimonomonosiaa salane atikirighi Vau eteva,
am ghelei eghulughuluena akapala salane.

⁵ Aue la rovii liu me voto saesaena pei nikai emasina,
me llo salana viloviloana pei nighelei eghulughuluena
me voto sesaaili aue la ghelei emasina.

6 Me taumattu ngakapa atoa aue la tara kanna niasangi God.’”

⁷ Oroienaaili taumattu ghe mae sio ta Jon va easula, me Jon ghe uela etaira va, “Am nongina va natuira iem katu ngatoa! See euela etaimim va am ilou vuli sessaiaane Vau eteva ange anna tani lutu etaimim? ⁸ Am kuneaa righi ueimim tani apasunga va ngam ghe vella kaluimim ssavoto. Am rau mene ue va, ‘Ami tuvuna amami Abraham.’ Poli aghaaullia etaimim va God erooroo tani ghelei isaa o atu etuvuna Abraham. ⁹ Kulum ateva aimonomonosiaanna ia tani tue akatuu ai, me isaa o ai karika ekuukuneaa masi uene aue la tue me la sau velu sae tale kuraa atae.”

¹⁰ Me taumattu ngatoa laghe kolomila Jon va, “O sa ateva ami gheleia?”

¹¹ Jon ghe uela etaira va, “Arova ghalua unem sioto, utau lao teva ta lo ateva karika teva unna, me arova righi anem inana, uparruu mene katoa.”

¹² Tau ngai ghaa takis atoa tee laghe mae sio va easuula, me laghe uela ta Jon va, “Tisa, ami vaalua ami ghelei?”

¹³ Jon ghe uela etaira va, “Am ghaa lo viliki veu gavmani eue va am ghaa, am rau mene nim ghaa righi ta aloaloannaaimim.”

¹⁴ Me katoa tana soldia laghe kolomiela va, “Me ami, sa ateva ami gheleia?”

Jon ghe uela etaira va, “Am rau mene amatautu taumattu ngatoa tani ghaa uneira viliki veu, me am rau mene aikameaa. Am masimasi tee aipoliimim.”

¹⁵ Ila akapa taumattu ngatoa laghe toitoi Mesaea ngateva, laghe nanaa va koti Jon Mesaea ia. ¹⁶ Jon ghe uela etaira va, “Aghi aghaasuum tale manu, me mene kateva aue emae, ia sarasarakaniaane elaulau sarasarakaniaaghi. Karika masi taumattu ngieghi tani pulaka unna aiiri aikasukasu. Ia aue easuum tale Spirit Manga ateva me tale kuraa atae. ¹⁷ Aue emae arova taumattu ngateva eposoposo unna pokonateva aisaraki uiti ia tani pola uiti tale kou uit, me aue eatoka aitauaa uiti tale ale ngai atoka uiti eteva, me aue evelu sae kou uiti tale kuraa atae karika erooroo tani pala.” ¹⁸ Tale oroi asease salana, Jon ghe poppoaa masi kiukiu tale taumattu ngatoa.

¹⁹ Me Herot ia o gavana ia,* Jon ghe uela etana va, “Karika masina ta ughe lai sarila Herodias, poli vausenni ia tuem.” Oroi mene kasina ase gheeleiaane sesa ²⁰ me Herot ghe gheleila voto ateva sesaaili ia, nau ghe atoka ssola Jon tale ale mata voovoo.

Iesu ghe ghaala niaasuu

(Mat 3:13-17; Mak 1:9-11)

²¹ Nau Jon ghe aasuu taumattu ngatoa, ghe asuu teela Iesu. Epona liu ghe otiela nau Iesu ghe looloo sae, ²² me Spirit Manga ateva ghe sio mae ta Iesu nongina ghila ateva, valusu ia. Me lingi ngalo ateva epona liu ghe uela va, “Io natughu io, aghaailousiangailio me masimasiaaghi ta ngetam namungaili.”

Arariiura tuyuna atoa Iesu

(Mat 1:1-17)

²³ Nau Iesu ghe tiuaala uunguaane koti anna ninamanama kotolungauluae (30). Taumattu ngatoa laghe annaa va natuna ia Josep,

Josep natuna ia Heli,

²⁴ me Heli natuna ia Matat,
me Matat natuna ia Livae,
me Livae natuna ia Melki,
me Melki natuna ia Jannai,
me Jannai natuna ia Josep,

²⁵ me Josep natuna ia Mattataeas,
me Mattataeas natuna ia Eimos,

3:12: Luk 7:29. **3:16:** Apos 13:25. **3:19:** Mat 14:3-4; Mak 6:17-18. * **3:19:** gavana Tale inangari nge Grik, *Tetrak*, lo ateva taita ghe aaitoiaa kateva patunganue namuu tale ghaatiae patunganue namuu. **3:22:** Jon 1:32. **3:23:** Luk 4:22; Jon 6:42.

me Eimos natuna ia Nahum,
 me Nahum natuna ia Esli,
 me Esli natuna ia Naggai,
²⁶ me Naggai natuna ia Mahat,
 me Mahat natuna ia Mattataeas,
 me Mattataeas natuna ia Semein,
 me Semein natuna ia Josek,
 me Josek natuna ia Joda,
²⁷ me Joda natuna ia Joanan,
 me Joanan natuna ia Resa,
 me Resa natuna ia Serubabel,
 me Serubabel natuna ia Sealtiel,
 me Sealtiel natuna ia Neri,
²⁸ me Neri natuna ia Melki,
 me Melki natuna ia Addi,
 me Addi natuna ia Kosam,
 me Kosam natuna ia Elmadam,
 me Elmadam natuna ia Er,
²⁹ me Er natuna ia Josua,
 me Josua natuna ia Eliesa,
 me Eliesa natuna ia Jorim,
 me Jorim natuna ia Mattat,
 me Mattat natuna ia Livae,
³⁰ me Livae natuna ia Simion,
 me Simion natuna ia Jiuda,
 me Jiuda natuna ia Josep,
 me Josep natuna ia Jonam,
 me Jonam natuna ia Eliakim,
³¹ me Eliakim natuna ia Melea,
 me Melea natuna ia Menna,
 me Menna natuna ia Mattata,
 me Mattata natuna ia Naetan,
 me Naetan natuna ia Deivit,
³² me Deivit natuna ia Jesi,
 me Jesi natuna ia Obed,
 me Obed natuna ia Boasi,
 me Boasi natuna ia Salmon,
 me Salmon natuna ia Nason,
³³ me Nason natuna ia Aminadab,
 me Aminadab natuna ia Admin,
 me Admin natuna ia Arni,
 me Arni natuna ia Hesron,
 me Hesron natuna ia Peres,
 me Peres natuna ia Jiuda,
³⁴ me Jiuda natuna ia Jekop,
 me Jekop natuna ia Aisiki,
 me Aisiki natuna ia Abraham,
 me Abraham natuna ia Tera,
 me Tera natuna ia Nahor,
³⁵ me Nahor natuna ia Seruk,
 me Seruk natuna ia Reu,
 me Reu natuna ia Pelek,

me Pelek natuna ia Eber,
 me Eber natuna ia Sela,
³⁶ me Sela natuna ia Keinan,
 me Keinan natuna ia Apaksat,
 me Apaksat natuna ia Sem,
 me Sem natuna ia Noa,
 me Noa natuna ia Lemek,
³⁷ me Lemek natuna ia Metiusila,
 me Metiusila natuna ia Inok,
 me Inok natuna ia Jaret,
 me Jaret natuna ia Mahalalel,
 me Mahalalel natuna ia Kenan,
³⁸ me Kenan natuna ia Enos,
 me Enos natuna ia Set,
 me Set natuna ia Adam,
 me Adam natuna ia God.

4

*Namu ngateva ta raroai etoa
 ghe tootoongaala Iesu*

(Mat 4:1-11; Mak 1:12-13)

¹ Iesu ghe lau sae mae tale ateo atea eJodan, me Spirit Manga ateva ghe pasula etana, me ghe ssoainiela tale voto ateva karika righi taumattu etana. ² Namu ngateva ta raroai etoa ghe tootoongaala Iesu tale ghaatingaulu (40) nau. Isaa o nau karika ghe namanama poila, me airuuruu tale isaa o nau ghe maloola.

³ Namu ngateva ta raroai etoa ghe mae sio ta Iesu me ghe uela va, “Arova koronna va Natuna io God, uauliaa tale atu etiulu o me ekoli me everete.”

⁴ Iesu ghe liula me ghe uela va, “Uru ngai Manga ateva eaauliaa va, ‘Karika taumattu ngatoa va la maamaulue nonga tale inana.’ ”

⁵ Namu ngateva ta raroai etoa ghe saeaala Iesu tale motouru tani apasunga patunganue namu ngakapa atoa tale kosa ateva oia, me tale ia o tuku nau erighi ghe apasunga ngakapala kosa ateva. ⁶ Me ghe uela ta Iesu va, “Aue atau aatu matuutulieni, me unamuu tani aitaraa isaa o voto. Ta aghe ghaala isaa akapa o voto, me arova aghaloanna tani taula ta see, aue ataula. ⁷ Isaa o voto aue peim arova usuuiaa me ukkaueinaghi.”

⁸ Iesu ghe liula me ghe uela va, “Uru ngai Manga ateva eue va, ‘Ukkaua Vau eteva kapum Goto ia, me uaimulusi teeia nonga.’ ”

⁹ Ghe mene saeaala Iesu tale pungani ale manga ateva eJerusalem, me ghe uela va, “Arova Natuna io God, ulove velu sio. ¹⁰ Ta Uru ngai Manga ateva eue va,

“ ‘Ia aue esuu kapuna ensolo atoa
 tani sio aitara ngamasinaailio,

¹¹ Me aue la sau evukalaio me
 karika aue utaghua kekem tale atu.’ ”

¹² Iesu ghe uela etana va, “Uru ngai Manga ateva eue va, ‘Urau mene tootoonga Vau eteva kapum Goto ia.’ ”

¹³ Namu ngateva ta raroai etoa ghe ruu ekapala unna nitootoonga ta Iesu, me ghe kasu vuliela tani mene toi mene teva masi nau ppae.

Iesu ghe tiuaala niuungu eGalilii

(Mat 4:12-17; Mak 1:14-15)

¹⁴ Iesu ghe ghaala sarasarakana tale Spirit Manga ateva, me ghe kiri lao sio eGalilii, me kiukiuna ghe lao sio tale masaliki ekapa atoa. ¹⁵ Ghe aapasunga tale aleira ale nivelu eitaua ngatoa, me ila akapa laghe aarueinia.

Laghe tiu vella Iesu eNasaret

(Mat 13:53-58; Mak 6:1-6)

¹⁶ Iesu ghe lao sio eNasareti nongina ghe namuula, me tale nau manga ghe ssola tale ale nivelu eitaua ngateva, nongina eghe gheelei nau ekapa atoa, me ghe tingina saela tani riti Uru ngai Manga ateva. ¹⁷ Me laghe taula vuku eteva unna ia propete Aisaea, laghe aseasea va skrol, ghe pulakaiela, me ghe paela inangari Aisaea ghe pitila, ¹⁸ ghe uela va, “Spiriti eteva ta Vau eteva etokatoka etaghi,

poli eghe suitoongainaghila

tani ppoaa masi inangari ta lo atoa karika peiira.

Me ghe sungieghila tani ppoaa va la ghaa velu lo atoa tale ale mata voovoo,

mata salusalu etoa aue la taatara,

tani ruu maamatana ta lo atoa la gheelei sesa etaira,

¹⁹ me tani aulia ngaotu va nauna oia Vau eteva tani asaangi kapuna taumattu.”

²⁰ Iesu ghe mene talila skrol ateva, me ghe tauet lao sio ta lo ateva ghe aaitaraa skrol atoa, me ghe toka siola tani ppoaa. Ila akapa laghe pasiaala mataira etana, ²¹ me Iesu ang ghe aauliaa etaira va, “Inangari oia tale Uru ngai Manga ateva ange koronnala ghaine tale nongonongoaaimim.”

²² Laghe soghiaala tani nongo masi inangari ghe kupi ghoa mae ta paane, me laghe masimasila, me laghe aaikolomieinila va, “Ia oia natuna Josep, o karika?”

²³ Iesu ghe auliaala etaira va, “Akilakila va aue am ue ta tuku inangari eteva va, ‘Io dokta io, ughelei emasinaio mua.’ Me aue am ue etaghi va, ‘Ughelei mua righi voto oia tangantuem, nongina ami ghe nongola ughe gheelei voto eKapenium.’”

²⁴ Ghe mene uela va, “Aghaaaulia ngakoronna etaimim va karika toa la rooroo tani oneoneaa teva propete tanganeira aitauaa me ia.

²⁵ Aghaaaulia ngakoronna va oroi vause raue vulu eIsraeli nau ta Elaija, nau karika teva vaoo tale kotoluae (3) ninamanama me ghaonomo (6) ulana, me paka maloo ateva ghe asola eIsraeli. ²⁶ Vau eteva ghe tam suula Elaija va ghe lao ta teva eIsraeli, ta ghe lao sio tale masaliki eteae eSarepat, ta vause raue vulu eteva elome tale patunganue namu ngateae eSaedon. ²⁷ Me tee, oroi taumattu nge eIsraeli, isiki tasussuku eteva ghe ghaailala, nau ta propete ateva Elaisa, karika laghe raarangisanala, me Naaman nonga, aSiria ia, ghe raarangisanala.”

²⁸ Lo atoa elome tale ale nivelu eitaua ngateva laghe nongola inangrina me ghe sessaieiliilala. ²⁹ Laghe tingina saela, me laghe kuneielia,

4:13: Hib 2:18; 4:15. **4:18:** Ais 61:1-2; 58:6. **4:22:** Luk 3:23; Jon 6:42. **4:24:** Jon 4:44.

4:25: 1 Ki 17:1, 7. **4:26:** 1 Ki 17:8-16. **4:27:** 2 Ki 5:1-14.

me laghe ae velue ghoala eleka tale masaliki taatara ateeae, me laghe saeainiela tale motouru eteva. Laghe aloanna tani bbi velue sio tale vallae.³⁰ Me Iesu ghe kasula ta mallomeira, me ghe kasu vulilala.

*Iesu ghe ghelei emasinala taita ateva
raroai eteva etana
(Mak 1:21-28)*

³¹ Iesu ghe lao sio eKapenium, masaliki taatara ia eGalilii. Vara nau manga ateva ghe mae sio, me ghe tiuaala tani apasunga inangarina God ta taumattu ngatoa.³² Laghe soghiaala voto ghe aauliaa, ta nonginaaili taumattu ngateva matuutulienia ia.

³³ Elome tale ale nivelu eitaua ngateva, taita ateva, raroai eteva ghe tokatoka etana. Ghe sama anamuula,³⁴ me ghe uela va, “Iesu aNasareti io, umae sio tani ghelei sa ateva etaimami? Vara ugheli saasakieinamami? Akilakilaio, io manga io kapuna io God.”

³⁵ Iesu ghe uela va, “Urau mene sama! Kupi ghoa mae!” Ghe kupi ghoala, me ghe gheleila taumattu ngateva ghe katuula elome ta taumattu ngatoa, me karika ghe vakovakola.

³⁶ Ila akapa laghe soghiaala tani nongo me tara, me ngila ghe aippooaa elome etaira va, “Saa voto llo oia? Matuutulienia me sarasarakana inangarina! Epoppooaa ta raroai etoa, me la kupikupi ghoa!”³⁷ Kiukiuna Iesu ghe lao sio tale mene kasina masaliki.

*Iesu ghe ghelei emasinala oroi taumattu
(Mat 8:14-17; Mak 1:29-34)*

³⁸ Iesu ghe kupi ghoala tale ale nivelu eitaua ngateva, me ghe lao sio tanganue Saemon. Alumuna Saemon ghe iisiki, vilikina ghe aanasa atingina me matana ghe valavalanga. Laghe aulieiniela ta Iesu va esausia.³⁹ Iesu ghe tingina valaala ta komona vause ateva, me ghe paola isiki eteva, me ghe kapala. Vause ateva ghe masinala, ghe totula, me ghe kaisila aneira inana.

⁴⁰ Nau sinaka ateva ang ghe suusuu, laghe maea ngakapa sio taumattu asease isiki etaira, tani ghaa niaisausi ta Iesu. Ghe nim saasaoaa nimana etaira me laghe maamasina.⁴¹ Raroai etoa laghe kupikupi vulu ghoa taumattu ngatoa, me laghe samasama anamungaili, laghe ue va, “Io Natuna io God.” Iesu ghe paopaoa me ghe ue ta raroai etoa va, “Am rau mene sama,” poli ila raroai etoa la kilakila va ia Mesaea ia.

*Iesu ghe poppooaa
(Mak 1:35-39)*

⁴² Elue talaua poopooa Iesu ghe ssola tale voto ateva karika righi taumattu etana, me laghe paepaea. Nau laghe taraiela, laghe auliaala etana va erau mene kasu.⁴³ Ghe uela etaira va, “Karika apoppooaa nonga etaimim. Atani ppooaa masi kiukiuna aririmangalina ateva God ta mene kasina masaliki taatara, mausina avalua o me Tamaghi ghe sungieghila.”⁴⁴ Liuna avalua o me ghe poppooaa tale ale nivelu eitaua ngatoa ejudia.

5

*Iesu ghe kolola aitiutiu etoa tana disaepolo
(Mat 4:18-22; Mak 1:16-20)*

¹ Kateva nau, Iesu ghe tiitingina elosamarra tale ateo talia ngateae eGenesaret, me oroieili taumattu ngatoa laghe mene tomuela, tani nongo inangarina ateva God. ² Me Iesu ghe tarala paanaka aluepai, lalu ghe vuuvukala tale ateo talia ngateae, me tau ngai pae kko atoa laghe kkure vululuelua, me laghe porapora uneira uvena. ³ Me ghe aikaaila tale gharighi paanaka, unna ia Saemon, me ghe uela ta Saemon va esiki tee ghoa paanaka arighi mala masau elosamarra. Me ghe toka siola tale paanaka arighi, me ghe mene tiuala tani apasunga.

⁴ Nau ghe ruula tani sama, me ghe uela ta Saemon va, “Ose tee ghoala elo malionge, me am velu sio uneimim uvena aighaa kko.”

⁵ Saemon ghe liula tani ue va, “Namu ngateva, eleivoo ami tootoonga poila tani luku, me karika poi ami ghaala teva, me elue talaua teeiemamila. Me poli angu aauliaa, aue amene ghoa velu sio isaa oia uvena.”

⁶ Me nau eteva laghe velu siola uneira uvena, laghe ghaala oroieili kko, me uneira uvena ghaisa ngarighi ghe tarrii. ⁷ Vara me angila ghe palepale lao mene kasina kapuira, laghe vuuvukala tale mene kateva paanaka, tani mae sausila. Me laghe mae sio, laghe kaaila kko tale paanaka alua, me ghaisa ngarighi lalu ghe vuluu.

⁸ Nau eteva Saemon Pita ghe tara avaluela o, ghe tturrula ta liue kkena Iesu, me ghe uela va, “Vau eteva, kasu vulueghila; ta aghi tau ssavoto ieghi.” ⁹ Poli ia me kapuna atoa laghe soghiala voto oia, nau laghe tarala, ¹⁰ me tee Jeimis me Jon, natuna ilalua Sebedi, lalu ghe uungu etauaa tee Saemon.

Me Iesu ghe uela ta Saemon va, “Karika umene matautu: aue llo to nau emaemae, aue utau ngai luku taumattu.” ¹¹ Me nau eteva laghe ssola elae, laghe kasu vulila isaa akapa voto me laghe usiela.

*Iesu ghe ghelei emasinala
tau tasussukuna ateva
(Mat 8:1-4; Mak 1:40-45)*

¹² Kateva nau, Iesu ghe tokatoka tale kateae masaliki, me kateva taumattu, anna tasussuku eteva, ghe tarala Iesu, me ghe suuiala ta liue kkena Iesu, me ghe uela etana va, “Vau eteva, marova ualoanna, urooroo tani ghelei eraarangisanaieghi ta mata God!”

¹³ Iesu ghe ssuuiala nimana, me ghe posoala, me ghe uela va, “Aghaaloanna. Angu raarangisanala!” Arovaeaata ta tasussuku eteva ghe kasu vulila taumattu ngateva.

¹⁴ Iesu ghe uela etana va, “Urou mene kiukiu ta teva taumattu, ta ulaa tara mua pristi eteva, me ia aue eauliaa ta taumattu ngatoa va angu raarangisanala, me ughelei sae aiaavusuvusuena, nongina Moses ghe auliaala.”

¹⁵ Me kiukiuna Iesu ghe kasu ekapa seela, me oroieili taumattu ghe mae sio tani nongoa, me ghe ghelei emasinailala. ¹⁶ Me oroaata nau ghe kasukasu vuli taumattu ngatoa, me ghe laolao tale voto karika righi taumattu etana, me ghe looloo sae.

*Iesu ghe ghelei emasinala
tangorengorena ateva*

(Mat 9:1-8; Mak 2:1-12)

¹⁷ Kateva nau, Iesu ghe mene aapasunga, me katoa Paresi me tau ngai aapasunga ngatoa tale inangari nipaopao, laghe mene mae sio tani toka. Laghe kasula ejerusalem, me isaa akapa lutu masaliki eGalilii me eJiudia. Me sarasarakaniaane Vau eteva ghe toka aitauua teela Iesu, tani ghelei emasina lo atoa laghe iisiki. ¹⁸ Katoa taumattu laghe sau mae sio kateva taita. Ia oia taita ateva riuna atoa matena ila, me ghe asoaso tale komona atiulu. Laghe aaloanna tani saue sso tale ale ateva tani tauue lao ta Iesu. ¹⁹ Me poli oroeili taumattu ghe tokatoka, me karika righi salana tani ssoainia, laghe saue saela epona tale pungani ngale ateva, laghe ghaa vella aiaakou, me laghe tauue siola tee komona atiulu elome ta taumattu ngakapa atoa, me emua ta Iesu.

²⁰ Nau eteva Iesu ghe tarala uneira niaiesoaa, me ghe uela ta taumattu ngateva va, “Kapughu, kalum ssavoto ange kapala!”

²¹ Tau ngai aapasunga ngatoa tale inangari nipaopao, me Paresi etoa, laghe tiuaala tani nnaa elome tale nannaaira va, “Saa taumattu ia ierai oia me eaauliaa saasakiaa tee God, nau egheeleia va eaairooa tee God! Poli God nonga erooroo tani kkaluaa ssavoto!”

²² Iesu ghe kilala nannaaira, me ghe uela etaira va, “Vaalua me am nannaas isaa ona ase voto tale urunguitaniimim? ²³ Vaalua, malumina tani ue va, ‘Kalum ssavoto ange kapala,’ o tani ue va, ‘Tingina saela, me ukasu?’ ²⁴ Ghaine aghaloanna va am tara kila, va Natuna ateva Taumattu ngateva matuutuliena teeia tani kkaluaa ssavoto tale kosa ateva.” Me Iesu ghe uela ta taumattu ngateva oia va, “Aghaauliaa etam va, tingina saela, me usau komom, me ulao tanganuem!” ²⁵ Katengaata ta taumattu ngateva ghe tingina saela, ta mataira taumattu ngakapa atoa, ghe saula komona ghe asoaso etana, me ghe lao sio tanganuena, me ghe tau saela ararina atuae God. ²⁶ Taumattu ngakapa atoa laghe soghiaala isaa oia voto ghe lutula. Laghe matautula, me ila tee laghe tau saela God, laghe ue va, “Ngami tarala kateva ase voto ghaine!”

Iesu ghe kolola Livae
(Mat 9:9-13; Mak 2:13-17)

²⁷ Emulina, Iesu ghe laolao, me ghe tarala tau ngai ghaa takis eteva, ararina atuae ta Livae, ghe tokatoka tale natu ngale arighi aighaa takis ia. Iesu ghe uela etana va, “Mae usieghi.” ²⁸ Livae ghe tingina saela, ghe kasu vuli ekapaailiila voto, me ghe usiela.

²⁹ Me Livae ghe gheleila kinatama ninamanama atuae tanganuena mausि Iesu, me tale ninamanama atuae, oroeili tau ngai ghaa takis atoa, me mene katoa taumattu, laghe toka aitauua teeilaluela. ³⁰ Paresi etoa me tau ngai aapasunga ngatoa tale inangari nipaopao, ila tee Paresi ila, angila ghe samasama anamuu kapuna disaepolo atoa Iesu. Laghe ue va, “Vaalua me am namanama me am ropiropi, aitauua tee tau ngai ghaa takis atoa me tau ssavoto atoa?”

³¹ Me Iesu ghe liula inangariira me ghe uela va, “Karika va masina atoa la laa taatara dokta, ta isikinna atoa. ³² Karika aghe sio mae tani kolo ghulughuluena taumattu, ta aghe sio mae tani kolo tau ssavoto atoa tani nna ngaioghioghiaa.”

*Iesu ghe auliaala uunguua ninae
(Mat 9:14-17; Mak 2:18-22)*

³³ Me taumattu ngatoa laghe uela ta Iesu va, “Oroiaata nau, kapuna disaepolo atoa Jon laghe naenae, me laghe looloo sae, me kapuira disaepolo tee atoa Paresi etoa, la gheelei evalua o. Me io, kapum disaepolo atoa la tam naenae.”

³⁴ Me Iesu ghe uela va, “Marova kateva taita ealoanna tani lai, koti aue am auliaa ta kapuna atoa va la rau mene namanama, nau eteva ia o taita ateva etokatoka teeila? Karika! ³⁵ Me auena, nau la vira ghaaghaa velu taita ateva, ia o nau eteva, la vira nae.”

³⁶ Iesu ghe auliaa teela kateae kiukiu niaimatoonga etaira va, “Marova pokane ateva aiaasae ange tarriila, karika teva taumattu erooroo tani mene rasi ouna ateva aiaasae, tani samapi tarrii eteva tale pokane ateva aiaasae. Marova egheelei evalua o, aue egheelei kiikiuua ouna ateva aiaasae, me tee ia o ouna ateva aiaasae, karika aue masina tee pokane ateva aiaasae. ³⁷ Karika teva taumattu etottoli kaai ouna uaeni tale pokane ateva aikaai gheelei tale viliki meemee. Marova egheelei evalua o, aue ouna uaeni egheelei polaki aikaai eteva, me aue ilalua akapa uaeni eteva me aikaaina ateva aue lalu peisaane. ³⁸ Liuna avalua o me la tottoli kaai ouna uaeni tale ouna aikaai manu gheelei tale viliki meemee. ³⁹ Me lo atoa taumattu la ropiropi pokane uaeni, karika aue la aloanna ouna. La ue va, ‘Llo pokane masinaaili.’ ”

6

*Vau tale nau manga ateva
(Mat 12:1-8; Mak 2:23-28)*

¹ Kateva nau manga, Iesu ghe kasu longotila tale utani uiti eteae. Kapuna disaepolo atoa laghe ghaala kasina tana uiti, me laghe sapusapulaa vella vilikina ta nimaira, me laghe namala. ² Katoa tana Paresi laghe uela etaira va, “Vaalua me am gheelei voto ona, inangari nipaopao eue va karika masina tani gheelei tale nau manga ateva?”

³ Iesu ghe liula me ghe uela etaira va, “Koti karika am ghe ritila kiukiuna atea Deivit, nau ia me kapuna atoa laghe maloola, ⁴ me ghe ssola tale alena ateva God, me ghe ghaala verete laghe amangala, me ghe namala, me ghe tau lao sio tee ta lo atoa laghe kasukasu teeia. Isaa oia verete karika erooroo va nim taumattu enama, ta pristi nonga atoa.” ⁵ Me Iesu ghe uela etaira va, “Natuna ateva Taumattu ngateva Vau ia tale nau manga ateva.”

*Iesu ghe ghelel emasinala taumattu ngateva nimana atelange matena ia
(Mat 12:9-14; Mak 3:1-6)*

⁶ Mene kateva nau manga, Iesu ghe kupi ssola tale ale nivelu etaua ngateva tani ppooaa, me kateva taita ghe tokatoka, nimane muenna atelange matena ia. ⁷ Tau ngai aapasunga ngatoa tale inangari nipaopao, me Paresi etoa, laghe taatara usiusi Iesu, laghe aloanna tani kila va aue egheelei emasina tau sessa atoa ta nau manga ateva, o karika. Laghe paepae righi salana tani laoaa Iesu tale niaiskei. ⁸ Me Iesu ang ghe kila vella nannaaira, me ghe uela ta taumattu ngateva, nimana

atelange matena ia, va, "Tingina saela, me la taraio." Me ghe tingina saela.

⁹ Me Iesu ghe uela etaira va, "Aghaloanna tani kolomiem kateva voto. Emaamasina tani ghelei masi voto, o sesa voto, ta nau manga ateva? Tani asaangi maamauluua kateva taumattu, o tani turungia?"

¹⁰ Ghe aitara ngakapa seela etaira, me ghe uela ta taumattu ngateva va, "Korosila nimam atelange." Me ghe gheleila, me nimana atelange ghe masinala nongina emua arau. ¹¹ Me tau ngai aapasunga ngatoa tale inangari nipaopao, me Paresi etoa, ghe sessai etinginailala. Me angila ghe aaioe va, "Sa ateva ita gheleia ta Iesu?"

Iesu ghe kolola 12 apostolo

(Mat 10:1-4; Mak 3:13-19)

¹² Kateva nau tale isaa o nau, me Iesu ghe saela tale motouru tani looloo sae, ghe looloo saela ta God tale ia o voo ngateva, lomosi ta ghe paila. ¹³ Nau eteva ghe paila, ghe kolo aitauaala kapuna disaepolo atoa, me ghe suitoongaala kasangaulu ghalua (12), me ghe mene aselala va apostolo ila. ¹⁴ Kateva ta Saemon (Iesu ghe aseala va Pita etana), me ghe kolo teela Andru, tue me nenga ilalua me Saemon, me Jeimis, me Jon, me Pilip, me Batolomiu, ¹⁵ me Matiu me Tomas, Jeimis natuna ia Alpeas, me Saemon laghe asease Selot etana, ¹⁶ me Jiudas natuna ia Jeimis, me Jiudas Iskariot, ia auena ghe tau lao Iesu ta nimaira tau ngai ssateena atoa.

*Iesu ghe ghelei emasinala oroieili
taumattu ngatoa*

(Mat 4:23-25)

¹⁷ Iesu me ila o kapuna disaepolo atoa, laghe sio mae tale motouru eteva, me laghe tinginala tale malaale. Ia, me oroieili kapuna disaepolo atoa, me oroieili tee taumattu, laghe kasula tale distriki eteva ejjudia, me masaliki taatara atae eJerusalem, me tale samarra ateva kalakalangina tale masaliki taatara aluae eTaer me eSaendon, ¹⁸ laghe mae sio tani nongoa, me laghe maeaa tee sio kapuira tau sessa atoa va la masina. Me lo atoa tee sesa spiriti eteva ghe tokatoka etaira, Iesu ghe ghelei emasinailala. ¹⁹ Me oroieili taumattu angila ghe paepaea tani nim tulia, poli sarasarakan ghe kasukasu etana, me ghe ghelei emasina akapailala.

Nimasimasi me nialousiusi
(Mat 5:1-12)

²⁰ Iesu ghe taatara lao sio ta kapuna disaepolo atoa, me ghe uela va, "Aue emasinaaili ta lo atoa karika tue peipeiena am,
poli ararimangalina ateva God kaluimmi ia.

²¹ Aue emasinaaili ta lo atoa ghaine am maamaloo,
ta auena essoiem.
Aue emasinaaili ta lo atoa ghaine am aalousiusi,
ta auena am kanga.

²² Aue emasinaaili etaimim nau eteva taumattu ngatoa la sessa teeiem,
me nau eteva la aatoka apolapolaiem, me la lakolakoam,
me la ue va, 'Io sesa taumattu io,' mausi Natuna ateva Taumattu ngateva!

²³ "Am roroo tani masimasi nau eteva llo o elutu, me am loku, me am masimasi, poli namungaili aipoliimim etoitoiem epona liu. Nongina emua arau, tuvuira atoa laghe gheleila isaa oia voto ta propete atoa.

²⁴ "Me am lo atoa tue peipeiena am, aue esesaaili etaimim,
poli nimasimasi ghaine am ghaaghaa, auena ekarika.

²⁵ Me am lo atoa ghaine esossoiem, aue esesaaili etaimim;
auena am maloo!
Me lo atoa ghaine am kangkanga, aue esesaaili etaimim;
auena am alousiusi me am ngala!

²⁶ Me marova taumattu ngakapa atoa la aasaesae arariimim, aue
esesaaili etaimim;
nongina emua arau, tuvuira atoa laghe gheleila isaa oia voto ta
propete kamekame atoa.

Tani ailousiaa tau ngai ssateeita atoa
(Mat 5:38-48; 7:12)

²⁷ "Me aghaauliaa ta lo atoa am nonganongo, va am ailousiaa tau ngai ssateeimim atoa, am ghelei masi niuungu ta lo atoa la sessa teeiem.

²⁸ Am arangise lo atoa la poppooaa saasakiaa teeiem, me am pure ta lo atoa la alooanna tani ghelei saasakieiniem. ²⁹ Me marova teva eposala kativilau bbam, utau lao mene kativilau me eposala teeia; me marova teva taumattu ealoanna tani ghaa unem aiaasae ngeleka ateva, masina eghaa tee unem sioto ateva. ³⁰ Utau lao peim ta lo ateva ekolomio, me marova lo ateva ange ghaala righi peim, urau mene kolomia va emene kiriaa mae. ³¹ Am ghelei voto ta mene kateva taumattu nongina am alooanna va emene ghelei mae etaimim.

³² "Marova am ailousiaa nonga lo atoa la aailousieiniem, vaalua me am aaloanna tani ghaa nimasimasi? Poli tau ngai gheelei ssavoto atoa tee la ailousiaa lo atoa la aailousieinila! ³³ Me marova am gheelei emasina ta lo atoa la gheelei emasina etaimim, vaalua me am aaloanna tani ghaa nimasimasi? Tau ngai gheelei ssavoto tee atoa, la gheelei evalua o! ³⁴ Me marova am tau viliki veu nonga ta lo atoa am nannaa va ila aue la mene liu etaimim, vaalua me am aaloanna tani ghaa nimasimasi? Tau ngai gheelei ssavoto tee atoa la tautau viliki veu ta tau ngai gheelei ssavoto atoa, me ila tee la annaa va aue la ghaa ailiuli! ³⁵ Am ailousiaa tau ngai ssateeimim atoa, me am ghelei masi voto etaira; am aiparruaa viliki veu, me am rau mene nnaa va am mene ghaa ailiuna. Poli am, aue am ghaa namungaili aipolipoli, me aue natuna iem lo ateva Iaaili Epona. Ta egheelei masina ta lo atoa karika la kaakaili emasina me lo atoa sesa gheeleiaairaa. ³⁶ Am alousiusi tee mene katoa taumattu, nongina Tamaimim ateva eaalousiusi teeiem."

Am rau mene auliaa katoa gheeleiaairaa
(Mat 7:1-5)

³⁷ Iesu ghe mene uela va, "Am rau mene ue va katoa nonga taumattu la gheelei ssavoto, me God karika aue eue teeiem va am tee am gheelei ssavoto; am rau mene sunganaa tau lao sesa aipolipoli ta kateva; me God karika aue esunganaa tau aatu sesa aipolipoli etaimim. Am kkaluaa gheeleiaa kateva taumattu, me God aue ekkaluaa gheeleiaaimim. ³⁸ Am parruu, aue God emene tau aatu etaimim; ekaai,

me emonnaa tau sio, me emene kaai, me aue epasu, me aue ekao velu kasina. Llo am tautau lao ta katoa, aue God emene tau aatu nongina am tautaula.”

³⁹ Iesu ghe kiukiuaala kateae kiukiu niaimatoonga, “Teva mata salusalu karika erooroo tani katulaa mene teva mata salusalu; marova egheelei, aue lalu katuu velu sio tale liu eteva. ⁴⁰ Tau ngai ghaa alomasaanga ateva karika namuu ia ta kapuna tau ngai aapasunga ngateva. Nau ange kila akapala voto, aue enongina kapuna tau ngai aapasunga ngateva.

⁴¹ “Vaalua me utaatara nonga vongovongo ta matana kapum ateva, me karika utaatara paka palanga ateva ta matam? ⁴² Vaalua me ualoanna tani ue ta kapum ateva va, ‘Kapughu, aghaaloanna tani ghaa velu tuku vongovongo ateva ta matam,’ me io karika urooroo tani tara paka palanga ateva ta matam? Usimaghalue io, ughaa velu mua paka palanga ateva ta matam, me utaatara amasina tani ghaa velu tuku vongovongo ateva ta matana kapum ateva.

Ai eteae me uene

(Mat 7:17-20; 12:34-35)

⁴³ “Masi ai eteae karika ekuukuneaa sesa ue ngai, tee sesa ai eteae karika ekuukuneaa masi ue ngai. ⁴⁴ Isaa akapa ai la taatara kila tale ueira la kuukuneaa. Karika am ghaaghaa ue ngai tale uasa karasa atikirighi, me ue uasa tale ai rorroana atea. ⁴⁵ Masi taumattu ngateva eaapasunga masi voto tale masi urunguitanina ateva, me sesa taumattu ngateva, sesa voto eghooa tale llo sesa etokatoka tale urunguitanina ateva. Sesa voto taumattu ngateva egheelei, etokatoka tale urunguitanina ateva, eaapasunga nau eteva eaaippooaa.”

Tau ngalomasaanga ateva me alo kapakapa ateva lalu ghe atulula ale alua

(Mat 7:24-27)

⁴⁶ Iesu ghe mene auliaa tee lao sio va, “Vaalua me am aseaseaghi va, ‘Vau eteva,’ me karika am gheelei nongina aghaauliaa? ⁴⁷ Aue aghapasunga va saa taumattu ia lo ateva emaemae etaghi, me enonongo inangarighi, me eaimulusi tee. ⁴⁸ Ia nongina lo ateva taumattu ghe kai liu siola, me ghe atulula alena ateva epona tale atu. Nau eteva ateo atea ghe ghoala, me ghe akala poila ale ateva, karika poi ghe aisiisiaala, poli ghe atulu ekorokoronganaiiliela. ⁴⁹ Me lo ateva taumattu enonganongo inangarighi, me karika egheelei, ia nongina lo ateva taumattu ghe atulula alena ateva tale kosa karika korokorongan. Me nau eteva ateo atea ghe ghoala, me ghe akalala ale ateva, ale ateva ghe katuula, me ghe akalainiela.”

7

*Aikaaiane kapuira namu ngateva
tau ngai uvii etoa*

(Mat 8:5-12; Jon 4:43-54)

¹ Nau eteva Iesu ghe ruula tani auliaa isaa o voto ta nonganongoaa taumattu ngatoa, me ghe ssola eKapenium. ² Kateva namuu ghe aaitoiaa kateva ai (100) tau ngai uvii, kapuna tau ngai nonganongo anna ateva ghe isikila, me ghe aailousiangailia, me ang ghe aainasiaa tani

mate. ³Namu ngateva ta tau ngai uvii etoa ghe nongola va Iesu ang ghe rekatala, me ghe suula namuu ta ajiu etoa, tani laa koloa va emae ghelei emasina kapuna tau ngai nonganongo anna ateva. ⁴Nau laghe lao sio ta Iesu laghe aipoopoliangaili tani kolo Iesu, me laghe ue va, “Utani sausia, ⁵ poli eailousiangailiita ajiu etoa, me ghe sausitala tani atulu aleita ale nivelu eitaua ngateva.” ⁶Liuna avalua o me Iesu ghe usilala.

Ang ghe aakalakala tangantuena, me namu ngateva ta tau ngai uvii etoa ghe suula kapuna atoa tani laa ue etana va, “Vau eteva, urau mene nnaa. Karika masina ieghi va umae tangantuenghi. ⁷Mausina avalua o me karika ataataraienghi va masi taumattu ieghi tani mae taraio. Anim anna va uppoaa teva tuku inangari, me aue kapughu tau ngai nonganongo anna ateva emasina. ⁸Aghi tee auungu ta namu ngatoa, me aghaaitoiaa katoa tani tau ngai uvii. Arova aue ta kateva va, ‘Lao sio,’ aue elao, va aue va, ‘Mae sio,’ aue emae, me arova aghele ue ta kapughu tau ngai nonganongo anna ateva va, ‘Gheleila llo toko,’ egheelei.”

⁹Iesu ghe soghieiniela nau ghe nongoala. Ghe kiriela, me ghe taatara lao sio ta taumattu ngatoa laghe aaimuli teeia, me ghe uela va, “Aghaauliaa etaimim va ia oia ase niakaia ngateva namuu ia, karika aghe tara poia eIsraeli.” ¹⁰Me taumattu ngatoa ghe sungilala, laghe oghi lao sio elo ale, me laghe tarala tau ngai nonganongo anna ateva, ta ang ghe masinala.

Iesu ghe totula natuna aliki taita ateva vause raue vulu eteva

¹¹Kasina nau ghe lange sio, me Iesu ghe lao sio tale masaliki eteae eNain. Kapuna disaepolo atoa me tana taumattu ngatoa laghe usiela tani lao. ¹²Nau ang ghe reerekata tale namu ngateae atamana tale ia o masaliki eteae, me ngeila ghe sausau emae ghooa taumattu ngateva matena ia. Vause ateva raue vulu ia, ie nonga o natuna ateva ghe matela. Me oroieili taumattu tale ia o masaliki eteae laghe usiusi kinna. ¹³Nau Vau eteva ghe taraiela, urunguitanina ateva ghe aloususi teeielo, me ghe uela etana va, “Urou mene ngala.”

¹⁴Ghe lao sio tale aisalo atea laghe sausaua etana, me ghe posoala, me lo atoa laghe sausaua laghe matua atinginala. Me ghe uela va, “Taita ateva, aghaauliaa etam va totula!” ¹⁵Taumattu ngateva matena ia ghe totu etokala, me ghe tiuala tani sama. Me Iesu ghe taue lao sio ta kinna.

¹⁶Taumattu ngatoa laghe soghiaala, me laghe tau saela God, me laghe ue va, “Propete ateva namuu ia ange rekatala elome etaita. Me God ange mae sio tani sausi kapuna taumattu ngatoa.” ¹⁷Isaa o kiukiuna Iesu ghe kasu ekapa seela ejjudia, me tale distriki kalakalangina ejjudia.

*Iesu me Jon tau ngai aasuu ia
(Mat 11:2-19)*

¹⁸Kapuna disaepolo atoa Jon laghe aulia ngakapala isaa o kiukiun etana. Ghe kolola ghalua, ¹⁹me ghe sungiluelo va lalu laa kolomi Vau eteva va, “Io ia o taumattu ngateva laghe uela va aue emae, o aue ami mene toi ppae mene teva?”

²⁰ Nau lalu ghe laa rekata sio ta Iesu, lalu ghe uela ta Iesu va, “Jon tau ngai aasuu ia esungiengaluela tani mae kolomio va, ‘Io ia o taumattu ngateva laghe uela va aue emae, o ami mene toi ppae mene teva?’”

²¹ Ia o nau eteva, Iesu ghe ghelei emasinala oroi taumattu tau sessa, me lo atoa raroai etoa laghe tokatoka etaira, me ghe gheleila mata salusaluna atoa laghe taatarala. ²² Ghe liula ta lo atoa Jon ghe sungilala va, “Am oghi lao sio, me am laa ghauliaa ta Jon llo ngam tarala, me ngam nongola. Mata salusaluna atoa la taatarala, me vereverenna atoa la kasukasula me tasussukuna atoa la raarangisanala, me talinga volongo atoa la nonganongola, me matena atoa la totula, me lo atoa karika peiira la nongola masi kiukiu. ²³ Me aue emasinaaili ta taumattu ngateva, unna niaiesoaa etam kaakatuu vulueghi.”

²⁴ Vara me lo atoa Jon ghe sungilala laghe kasula, me Iesu ghe tiuaala tani auliaa Jon ta taumattu ngatoa. Ghe ue va, “Sa ateva am ghe ssola tani taraia tale voto ateva karika righi taumattu etana? Pitpiti eteva ghe kuukueinia? ²⁵ Arova karika, tani sa ateva am ghe kasueiniela tani sso taraia? Teva taumattu ghe aasae righi masi ghinna? Karika va isaa avalua o, ta lo atoa la asae masi ghinna, me la tokatoka tale masi nitoka, la tokatoka tanganuena king. ²⁶ Tani sa ateva am ghe kasula tani sso taraia? Propete ateva? Aghaaauliaa etaimim va ue, me emene laulau mene katoa propete. ²⁷ Ia o taumattu ngateva, Uru ngai Manga ateva ghe aauleinia nau ghe uela va,

“Tarala, aue aasuu aikasuaa inangarighi eteva emuemueinio,
me ia aue eaimonomonosiaa ngamuemue ngalokoi salam.”

²⁸ Aghaaauliaa etaimim va, ta lo atoa laghe lutula tale kosa ateva oia, karika teva erooroo ta Jon. Me lo ateva karika teae ararina, me iaaili euu tale ararimangalina ateva God, elaulau Jon.”

²⁹ (Taumattu ngakapa atoa, me tau ngai ghaa takis atoa, nau laghe nongola inangarina Iesu, laghe akoronnala va salane God koronna, poli Jon ghe asuulala. ³⁰ Paresi etoa me lo atoa tau ngalomasaanga ila tale inangari nipaopao, laghe ratila aloaloannaane God etaira poli karika va Jon ghe asuulala.)

³¹ Me Iesu ghe mene uela va, “Sa ateva voto arooroo tani auliaa me eaimatoonga taumattu tale lo ateva oia vituu? Me ila saa taumattu ngila? ³² Ila nonginaaili aliki etoa la tokatoka tale liu nianamisi, katoa la ue lao ta mene lutu katoa va,

“Ami ghe vuuvuu kkinari nilai eteae etaimim,
me karika am ghe lokuloku;
ami ghe ueei kkinari nialousiusi,
me karika am ghe ngangngala.”

³³ Nau Jon tau ngai aasuu ia ghe mae sio, me karika ghe namanama verete, me karika ghe ropiropi uaeni, am ue va, ‘Raroai eteva ghe tokatoka etana.’ ³⁴ Me nau Natuna ateva Taumattu ngateva ghe mae sio, me ghe namanama, me ghe ropiropi, am ue va, ‘Tau ninamanama ia, me tau niropiropi ia, me kapuira ia tau ngai ghaa takis atoa, me tau ssavoto atoa.’ ³⁵ Masi ninannaa kanna God eaapasunga va koronna ia tale maamauluaaira lo akapa atoa la aaimuli teeia.”

Vause ateva sesa gheegheleiaane ghe kaola masi aiaaoo ta Iesu

³⁶ Kateva Paresi ghe kolola Iesu va ghe laa namanama teeia tanganuena. Liuna avalua o me Iesu ghe lao sio tanganuena, me ghe lao sio tale tevoo tani namanama. ³⁷ Kateva vause tale ia o masaliki eteae, tau ngai ghelei ssavoto ia, ghe nongola va Iesu ghe namanama tanganuena Paresi eteva. Liuna avalua o me ghe ghaa lao sio aikaai eteva alabasta ia, pasu ia tale aiaaoo masinaaili ngusungusuaane. ³⁸ Ghe suuiala emuli ta liue kkena Iesu, me ghe tiuaala tani ngala, me ghe apposi kkena Iesu tale rarum matane, me ghe uluulu tale uu nguruna, me ghe nguungusuaa kkena, me ghe kaokao masi aiaaoo.

³⁹ Paresi eteva ghe koloala ghe tarala isaa o voto, me ghe tiuaala tani nna ngainao elome etana va, “Arova taumattu ngateva oia va propete ia, aue ghele kila va see eposoposoa, ta vause ateva oia tau ssavoto ia.”

⁴⁰ Iesu ghe liula etana me ghe uela va, “Saemon, aghanna tani auliaa kateva voto ta ngetam.”

Saemon ghe liula me ghe uela va, “Tisa, aulieiniela.”

⁴¹ Iesu ghe kiukiuaala kiukiu eteae, ghe uela va, “Taumattu ngalua lalu ghe ghaala viliki veu pei niliu ta kateva taumattu. Kateva ghe ghaala ghalima ai (500) silva koen, me mene kateva ghe ghaala ghalimangaulu (50). ⁴² Karika teva etairarua ghe roola tani liu unna viliki veu lao taumattu ngateva. Liuna avalua o me ghe uela va unna viliki veu pei niliu enim vulla. See etairarua aue eailousiangaili ia o taumattu ngateva?”

⁴³ Saemon ghe liula me ghe uela va, “Aghannaa va koti lo ateva taumattu, unna viliki veu pei niliu oroi.”

Iesu ghe liula me ghe uela va, “Angu aulia ngakoronnala.”

⁴⁴ Vara me ghe kiriela, me ghe taatara lao sio ta vause ateva, me ghe uela ta Saemon va, “Tarala vause ateva o. Amae sio tanganuem, me karika utau mae sio righi manu aipora kkeghi. Eporala kkeghi tale rarum matane, me eulula tale uu nguruna. ⁴⁵ Karika ungusueghila nau arekatala, me ia, nau akupi sso mae arau, karika ghe ruu poi tani ngusu kkeghi. ⁴⁶ Io karika ukaola righi oeli ta urughu, me ia ekaola llo masi ngusungusuaane ta kkeghi. ⁴⁷ Liuna avalua o me aghaauliaa etam va kanna ssavoto oroieili, ange kapala, liuna avalua o me ailousiaane namungaili. Me lo ateva karika oroi llo laghe kkaluaala etana, aielousiaane karika namuu.”

⁴⁸ Me Iesu ghe uela ta vause ateva va, “Kalum ssavoto ange kapala.”

⁴⁹ Mene katoa laghe kololala tani mae namanama, laghe ue elome etaira va, “See etana ierai, me eue va ekakkluuaa ssavoto?”

⁵⁰ Iesu ghe uela ta vause ateva va, “Kalum niaikaaiaa ange asaangiola. Kasula tale luei.”

8

Vause atoa laghe kasukasus tee Iesu

¹ Emulina, Iesu ghe lao sio tale mene kasina masaliki taatara me llo masaliki ghauna, tani ppooaa masi kiukiu tale ararimangalina ateva God. Kasangaulu ghalua (12) disaepolo laghe usiusia, ² me tee lo atoa vause Iesu ghe tiu vella raroai etoa me ghe ghaa vella isiki etoa etaira; Meri aMakdala ia, lo ateva vause ghaitu (7) raroai laghe kupi ghoala

etana; ³ Joana vausenna ia Kusa (Kusa ia namuu ia ta lo atoa laghe aaitaraa voto tale paa ngalena ateva Herot); Susana; me oroila mene katoa vause. Ila laghe saasausi Iesu me kapuna atoa tani tau lao peiira me viliki veu tani sausi niuungu.

*Kiukiu niaimatoongana tale tau ngai pasa katu ue ngai eteva
(Mat 13:1-9; Mak 4:1-9)*

⁴ Taumattu ngatoa laghe kasukasu tale masaliki taatara atoa tani mae tara Iesu. Nau laghe orioeili ila, me Iesu ghe auliaala kiukiu niaimatoongana ateeae, ghe uela va, ⁵ “Tau ngai pasa katu ue ngai eteva ghe kasula tani pasa katu ue ngai. Nau eteva ghe kaokaoaala katu ue ngai, kasina katu ue ngai ghe katuula tapaa salana, me laghe asala me ghila atoa laghe namala. ⁶ Kasina ghe katuula tale voto ateva sakolo ia. Nau eteva ghe piipinosa, ghe mallela me ghe mmatela, ta poli euu atu ia, me karika righi manu. ⁷ Kasina ghe katuu ssola elome tale uasa karasa atoa, me nau eteva laghe pinosa aitauaa teela uasa karasa atoa, uasa karasa atoa laghe kavili ematelala. ⁸ Kasina ghe katuula tale masi kosa. Ghe pinosala me ghe kuneaala katu ue ngai ghe roola kateva ai (100), me ghe laula oororiaa llo katu ue ngai ekasina ghe kaokaoaala.”

Nau eteva ghe ruula tani kiukiu, ghe sama anamuula me ghe uela va, “Lo ateva talingane manee tani nongo, aue enongo.”

*Mausina kiukiu niaimatoongana
(Mat 13:10-17; Mak 4:10-12)*

⁹ Kapuna disaepolo atoa Iesu laghe kolomiela tale malloeanina kiukiu niaimatoongana ateeae. ¹⁰ Iesu ghe uela va, “Alomasaanga tale voto eaaisulia tale ararimangalina ateva God, Tamaghi ghe tau aatu sio etaimim, me ta mene katoa aghaauliaa kiukiu niaimatoonga, poli, “‘La taatara, me karika aue la tara kila;

la nongonongo me karika la aalomasaanga tee.’

*Iesu ghe auliaala malloeanina kiukiu niaimatoongana ateeae
(Mat 13:18-23; Mak 4:13-20)*

¹¹ “Malloeanina kiukiu niaimatoongana ateeae ia avalua toko va: Katu ue ngai eaaimatoonga inangarina ateva God. ¹² Llo ghe katuula etapaa salana eaaimatoonga lo atoa la nongonongo, vara me namu ngateva ta raroai etoa emaema, me eghaaghaa velu inangari tale urunguitaniira. Liuna avalua o me karika aue la aikaaiaa me la saanga. ¹³ Llo tale voto ateva sakolo ia, aue la masimasi tani nongo inangarina God, me aikaaiaira karika aluse, ta poli karika righi oaira. Nau nitootoonga emae, aue la katuu vulu God. ¹⁴ Llo katu ue ngai ghe katuu ssola elome tale uasa karasa eaaimatoonga lo atoa la nongonongo, me nau la tokatoka, la nannangaili asease voto atoa, me la aloanna tani tue peipeiena, me la aloanna tani ghaa voto aue eaamasimasi maamauluaaira, me isaa o voto aue ekavili ekatungila. Me karika aue la kuneaa righi uene. ¹⁵ Katu ue ngai tale masi kosa eaaimatoonga lo atoa masina nannaaira me urunguitaniira masina, la nongonongo aikaaiaa inangari, me la posoposo parasi tale inangarina ateva God me la kuukuneaa masi ue ngai.

*Lam ateeae tale aitiitinginane ateva
(Mak 4:21-25)*

¹⁶ “Karika teva eaarokoti lam atae me eaakou rungainia tale teva aiaku manu, me eaatoka pakeainia tale aisalo. Ta eaatokiae sae tale aitiitinginane ateva, me lo atoa la kupi sso tale ale ateva, aue la taatara etana. ¹⁷ Me karika righi voto eaaisulia va aue etam otu, me karika righi voto la aituttua va aue etam otu, va taumattu ngakapa atoa karika aue la kila. ¹⁸ Lo ateva righi voto etana, God aue emene tau lao kasina etana; me lo ateva karika righi voto etana, voto eannaa va isaa etana, God aue eghaa velu etana.”

Iesu, kinna me nengane atoa

(Mat 12:46-50; Mak 3:31-35)

¹⁹ Vara me kinna Iesu me nengane atoa laghe mae sio tani tara Iesu, karika laghe roola tani lao akalakalangina ta Iesu, poli orioieili taumattu ngatoa. ²⁰ Katoa laghe auliaala ta Iesu va, “Kinam me nengam atoa ila eleka, me la ghaloanna tani taraio.”

²¹ Iesu ghe liula me ghe uela va, “Lo atoa la nongonongo inangarina ateva God me la gheelei uunguaane, ila kinaghi ila me nengaghi ila.”

Iesu ghe paola ttasi eteva me ghe lueila

(Mat 8:23-27; Mak 4:35-41)

²² Kateva nau Iesu me kapuna disaepolo atoa laghe aikaaila tale paanaka ateva, me Iesu ghe uela va, “Ita lao tale pai kativilau tale ateo talia ngateae.” Vara me laghe tiu ghoala. ²³ Nau eteva laghe oseose elaoelao, Iesu ghe askanue alokoila, me ghe llusula. Paka kuukuu ttasi eteva ghe lutu teeilala, me ang ghe aavuluu paanaka ateva, me laghe tokala tale paka nimoia.

²⁴ Disaepolo atoa laghe angunila Iesu me laghe uela va, “Vau eteva, vau eteva, ngita raaraaua!”

Iesu ghe tingina saela me ghe paola kuukuu eteva me paka kotoo atoa laghe aakope, me ttasi eteva ghe kapala, me luei eteva ghe asola. ²⁵ Ghe kolomila kapuna disaepolo atoa va, “Vaalua karika righi aikaaiiaaimim?”

Tale nimoia laghe soghiaala voto oia ghe lutula, me ngila ghe aaikolomieinila va, “Saa taumattu ia lo ateva oia? Esamasama tee ttasi eteva me kotoo atoa, me la nongonongo usilainia.”

Iesu ghe ghelei emasinala taumattu ngateva raroai etoa etana

(Mat 8:28-34; Mak 5:1-20)

²⁶ Laghe ose lao sio tanganue aGeresa* ngatoa, tale mene pai kativilau eGalilii. ²⁷ Nau Iesu ghe tingina ssola elae, taita ateva, raroai etoa laghe tokatoka etana, tale masaliki taatara atae, ghe ghoa mae tani sou Iesu. Oroi nau ang ghe lao sio ghe tam aasae righi ghinna, me ghe tam tokatoka tale teva ale ta ghe tokatoka tale liu niaikkaiaa. ²⁸ Nau ghe tarala Iesu ghe aore anamungailila, me ghe tturru siola ta liue kkena Iesu, me namungaili ta ghe samala me ghe uela va, “Sa ateva ualoannaia etaghi Iesu, Natuna io God iaaili Epona? Aghaaloanna va urau mene ghelei righi sesa etaghi!” ²⁹ Poli Iesu ghe aulia ngasarasarakanala ta raroai etoa va la kupi vulu ghoa ia o taumattu ngateva. Oroiaata raroai etoa ngila ghe tokala etana, liuna avalua o me nau laghe irripoi nimane me kkena tale sene, me taumattu ngateva ghe aaitoiaa poia,

8:16: Mat 5:15; Luk 11:33. **8:17:** Mat 10:26; Luk 12:2. **8:18:** Mat 25:29; Luk 19:26.

* **8:26:** aGeresa Kasina uru ngai laghe pitila, laghe ue va aGeresa, kasina laghe ue va aGadara.

ghe gheeghelei patepate sene, me raroai etoa laghe kookoueinie see tale voto karika righi taumattu etana.

³⁰ Iesu ghe kolomiela va, “See ia ararim atae?”

Ghe liula va, “Aghi Lijen,” ta oroi raroai etoa laghe tokatoka etana.

³¹ Me laghe aipoopolia ta Iesu va ghe rau mene suu vella lao tale liu eteva karika aioghioghi etana.

³² Oroieili mosu ghe tingina duesue see tale motouru. Raroai etoa laghe kookolomi esarasarakanaaili ta Iesu va etau vella me la laa kupi sso ta mosu etoa, me Iesu ghe tau vellala. ³³ Nau eteva raroai etoa laghe kasu vulila taumattu ngateva oia, laghe kupila mosu etoa, me mosu etoa laghe aikarati velu siola tale voto ateva siosiona ia, me laghe aoso velu siola tale ateo talia ngateae, me ghe arropi ematelala.

³⁴ Lo atoa laghe aitaraa mosu, laghe tarala vaalua isaa o voto ghe lutula. Laghe iloula tani laa kkailaa tale masaliki taatara atae, me mene kasina lutu masaliki kalakalangina. ³⁵ Me taumattu ngatoa laghe lao sio tara isaa o voto ghe lutula. Nau eteva laghe mae sio ta Iesu, laghe tarala taumattu ngateva ia o raroai etoa laghe kasu vuliela, ghe tokatoka ta liue kkena Iesu, ghe molu etokala, me nannaane ang ghe masinala; me laghe matautula. ³⁶ Lo atoa laghe tarala, laghe auliaala kiukiuna taumattu ngateva oia, raroai etoa etana, saa voto ghe lutula, me ghe masinala. ³⁷ Isaa avalua o me taumattu tale masaliki etae eGeresa me llo masaliki kalakalaa etana, laghe kolomila Iesu va ekasu, poli paka nimoia ateva ghe ghaailala. Iesu ghe aikaaila tale paanaka ateva, me laghe aimonomonosiaala tani kasu.

³⁸ Taumattu ngateva raroai etoa laghe kasu vuliela, ghe aloannaaili tani usi Iesu. Iesu ghe sungi aaoghiela, me ghe uela etana va, ³⁹ “Ukiri lao tanganuem, me ulaa ghauiliaa saa voto God ghe gheleila etam.” Liuna avalua o, taumattu ngateva oia ghe lao sio tanganuena, me ghe kiukiuaala tale masaliki taatara atae saa voto Iesu ghe gheleila etana.

Vause arighi matena ia me vause ateva isikina ia

(Mat 9:18-26; Mak 5:21-43)

⁴⁰ Nau eteva Iesu ghe oghiaala, taumattu ngatoa laghe souela tale nimasimasi, poli ila akapa laghe aloanna tani taraia. ⁴¹ Taumattu ngateva ararina atae ta Jaeras, namuu ia tale ale nivelu eitaaua ngateva, ghe mae sio, me ghe suuiaala ta liue kkena Iesu, poli ghe aloannaaili va Iesu ghe usia, me lalu ghe lao tanganuena, ⁴² poli kateva nonga ia natuna aliki vause ateva, anna ninamanama erooroo kasangaulu ghaluae (12), me ang ghe aainasiaa tani mate.

Nau eteva Iesu ang ghe laolao, taumattu ngatoa laghe tomtomua. ⁴³ Me vause ateva rae ateva ghe iloueinia ghe roola kasangaulu ghaluae (12) ninamanama, ie tee elome ta taumattu ngatoa. Ghe rungiaala unna viliki veu tani ghaa niaisausi,[†] me karika teva ghe roola tani ghelei emasinaia. ⁴⁴ Ghe keola emuli ta Iesu, me ghe posola euu tale sama unna aiaasae ateva Iesu, me katengaata nonga ta rae ateva ghe ruula tani ilou.

⁴⁵ Iesu ghe kolomila va, “See etulieghila?”

Nau eteva laghe uela va karika poi teva ghe tulielu, Pita ghe uela va, “Vau eteva, taumattu ngatoa orsieili ila, me la aikerreii tani atu etam.”

[†] 8:43: Kasina uru ngai laghe pitila, karika laghe uela va Ghe rungiaala unna viliki veu tani ghaa niaisausi.

⁴⁶ Me karika ta Iesu ghe mene uela va, “Kateva etulieghila; aghateateala va kasina tani sarasarakana ange kasula etaghi.”

⁴⁷ Me vause ateva, ghe kilala va karika ghe roola tani aisulia, ghe moiela, me ghe lao sio tani suuiaa ta liue kkena Iesu. Ta mata taumattu ngatoa, ghe auliaala mausi saa, me ghe tulila Iesu, me vaalua arovaeaata nonga ta ghe masinala. ⁴⁸ Iesu ghe uela ta vause ateva va, “Natughu, tale unem niaakaiaa etaghi angu masinala. Kasula tale luei.”

⁴⁹ Nau eteva Iesu ghe aippooaa, me taumattu ngateva ghe kasula tanganuena Jaeras, ia o namuu ia tale ale nivelu eitaua ngateva, ghe rekatala. Ghe uela va, “Natum vause arighi ange matela. Urou mene ghelei va emene aanasa ta tisa ngateva.”

⁵⁰ Iesu ghe nongola, me ghe uela ta Jaeras va, “Urou mene matautu; unim aikaiaa, me aue emasina.”

⁵¹ Nau eteva ghe rekatala tanganuena Jaeras, ghe tam aloannala righi taumattu tani usie sso elo ale, ta Pita nonga me Jeimis, Jon, me tamane me kinna aliki vause arighi, ila nonga laghe ssola. ⁵² Taumattu ngatoa laghe ngangngala, me laghe aalousiusi teeia. Iesu ghe uela va, “Angenna ngam ngalala. Aliko vause arighi karika ematela, ta enim aseasekanua.”

⁵³ Laghe kangainiela, ta laghe kilakila va aliki vause ateva matena ia.

⁵⁴ Iesu ghe kune siola nimane atelange, me ghe uela va, “Aliko erighi, totula!” ⁵⁵ Aliko vause arighi ghe sakesakela, me arovaeaata ta ghe laa sio totu, me ghe tingina saela. Me Iesu ghe uela etaira va la tau lao righi inana, me enama. ⁵⁶ Tamane me kinna lalu ghe soghiaala tani tara, me Iesu ghe aulia ngakorokoronganala etairarua va lalu rou mene auliaa ta righi taumattu isaa o voto ghe lutula.

9

*Iesu ghe suula 12 disaepolo
(Mat 10:5-15; Mak 6:7-13)*

¹ Iesu ghe kolo aitauaala kasangaulu ghalua (12) kapuna disaepolo, me ghe taula sarasarakana me nimatuutuliena etaira tani ghaa velu raroai, me tani ghaa velu isiki ta taumattu ngatoa. ² Me ghe sungilala tani laa ppooa ngaotu ararimangalina ateva God, me tani ghelei emasina tau sessa atoa. ³ Ghe uela etaira va, “Am rau mene ghaa righi voto nau am kasu. Karika mene tiulu aikkatulu tani kkatulu, teva aikaai ghinna, me righi inana me viliki veu, me karika am mene ghaa ghalua aiaasae. ⁴ Me arova am laa toka tale lo ateva ale, am toka elaa ghaa nau am kasu vuli lo ataeo o masaliki. ⁵ Me arova karika la ghaaiem, am kasu. Nau am kasu, am rariaa velu kosa ta kkeimim, me aue la kila va voto laghe gheleila karika masina.” ⁶ Me disaepolo atoa laghe kasula tani laa ppooaa see masi inangari tale kateae kateae masaliki, me tani ghelei emasina tau sessa atoa.

*Herot ghe aloanna tani kila va Iesu tani see ia
(Mat 14:1-12; Mak 6:14-29)*

⁷ Gavana ngateva Herot ghe nannangaili ta ghe nongola oroieili voto Iesu ghe gheelei, poli laghe uue va Jon ang ghe mene totula tale nimate, ⁸ me katoa laghe uue va Elaija ghe kaurekatila, me katoa laghe uue va kateva ta propete atoa emua arau ang ghe mene totula. ⁹ Liuna

avalua o me Herot ghe ue va, “Jon ngaghe auliaala me laghe sai pulela alona atiulu, me tani see ia taumattu ngateva oia, amene nonganongo uunguaane?” Me ghe aaloanna tani taraia.

*Iesu ghe taula inana ta 5,000 taumattu
(Mat 14:13-21; Mak 6:30-44; Jon 6:1-14)*

¹⁰ Apostolo atoa laghe kiriaa mae sio ta Iesu, me laghe aulia ngakapala voto laghe gheleila. Ghe ghaailala, me ila nonga laghe lao sio tale masaliki taatara ateae eBetsaida. ¹¹ Nau taumattu ngatoa laghe nongola va ang ghe kasula, laghe aimulila etana. Ia ghe masimasieinilala, me ghe tiuala tani ppooaa ararimangalina ateva God etaira, me ghe gheelei emasina tau sessa atoa.

¹² Auena sinaka ateva ghe suu, me kasangaulu ghalua (12) disaepolo laghe lao sio, me laghe uela ta Iesu va, “Sungi vellala, me la lao tale righi masaliki, o paa ngutana, tani laa poli righi inana me la nama, me la ghaso. Ta voto ateva oia ita tokatoka etana vurunganna ia.”

¹³ Iesu ghe uela etaira va, “Am, am taula righi inana, me la nama.”

Laghe liula me laghe uela va, “Ghalima nonga verete me ghaluepai kko. Ualoanna va ami laa poli see righi aneira inana?” ¹⁴ Eroroo ghalima airari (5,000) taita oia ghe tokatoka.

Iesu ghe uela ta disaepolo atoa va, “Am laa ghauliaa etaira va la laa toka aitaaua sio ghalimangaulu (50) taumattu ta kateae uela.”

¹⁵ Disaepolo atoa laghe auliaala, me laghe toka siola tale uela. ¹⁶ Iesu ghe ghaala verete ghalima me kko aluepai, me ghe taatara saela epona liu, me ghe kaili emasina saela, me ghe pirila, me ghe taula ta disaepolo atoa tani laa koita ta taumattu ngatoa. ¹⁷ Laghe namala, me ila akapa laghe tuvula, me disaepolo atoa laghe kaai esokosokoiala tapiri nginana, ghe roola kasangaulu ghaluae (12) laka.

*Pita ghe aulia ngaotula va Iesu tani see ia
(Mat 16:13-19; Mak 8:27-29)*

¹⁸ Kateva nau Iesu ghe puupure, me kapuna disaepolo atoa laghe tokatoka teeia, me ghe kolomilala va, “Taumattu ngatoa la uue va aghi tani see?”

¹⁹ Laghe liula me laghe uela va, “Katoa la ue va io Jon tau ngai aasuu ia, me katoa la ue va io Elaija, me katoa la ue va io kateva ta propete atoa emua arau ang ghe mene totula.”

²⁰ Me ghe kolomilala va, “Me am, am ue va aghi see?”

Me Pita ghe liula me ghe uela va, “Io kapuna Mesaea ngateva God.”

*Iesu ghe uela va aue emate me emene totu
(Mat 16:20-28; Mak 8:30-9:1)*

²¹ Iesu ghe paolala va karika la mene laa ghauliaa see va ia see. ²² Me ghe uela va, “Natuna ateva Taumattu ngateva aue eghaa orioeili immarikana, me namu ngatoa, me namu ngatoa ta pristi etoa, me tau ngai aapasunga ngatoa tale inangari nipaopao, aue la liu viliira etana, me aue la uvi ematea. Me aue kotonna ateva nau, emene totu.”

²³ Vara me ghe uela ta kapuna disaepolo atoa va, “Arova lo ateva ealoanna tani usieghi, etani sioaa nannaane, me esunuki unna aikotoo ateva nau ekapa atoa, me eaimuli etagli. ²⁴ Ta poli arova lo ateva

eannaa nonga maamauluaane, aue eraua. Me arova lo ateva eraua ta poli mausighi, aue esaanga. ²⁵ Me arova lo ateva eghaa voto akapaaili tale kosa ateva, me maamauluaane ekapa, vaalua isaa o voto aue esausia? ²⁶ Arova lo ateva taumattu epalatainaghi me inangarighi eteva, aue Natuna ateva Taumattu ngateva epalatainia, nau eteva emae tee maamallangiaane, me maamallangiaane Tamane, me tee kapuna ensolo atoa manga ila. ²⁷ Aghaaulia ngakoronna etaimim va katoa oia etaimim am tiitingina, karika aue am mate, me aue am tara ararimangalina ateva God.”

*Vilikina Iesu ghe mene isaa ppaela
(Mat 17:1-8; Mak 9:2-8)*

²⁸ Koti ghaoalu (8) nau ghe lange sio, nau ghe ppooaala llo inangari, me ghe kolola Pita me Jon me Jeimis, me laghe saela tale motouru tani looloo sae. ²⁹ Ghe looloo sae, me taatara matane ghe isaa ppaela, ghinnanina ghe usousoanaailiila, me ghe ravaravaienaailiila. ³⁰⁻³¹ Vara me ghalua taumattu, Moses me Elaija, lalu ghe kaurekatila tale mallanginaane ateva God, me lalu ghe samasama tee Iesu. Lalu ghe aauliaa saa llo voto aue elutu etana ejerusalem, me vaalua aue ekasu vuli kosa ateva oia. ³² Matana Pita me mene ghalua tana kapuna ghe maamatana tani asekanu. Me nau laghe totula, laghe tarala mallanga ateva ta matana Iesu, me mene ghalua lalu ghe tiitingina teeia. ³³ Me nau lalu ghe aloanna tani kasu vuli Iesu, me Pita ghe uela ta Iesu va, “Vau eteva, masina ta ngeita tokala oia, me angatolu atulu ale paapali kotolu, kateva alem ia, me kateva alena ia Moses, me kateva Elaija.” Pita ghe auliaala isaa o inangari, me karika ghe kilakila sa ateva ghe aaulieinia.

³⁴ Nau Pita ghe auliaa isaa o inangari, me urukookoo ateva ghe akoulala, me ngilotolu ghe maamatautu. ³⁵ Lingi ngalo ateva ghe mae sio tale urukookoo ateva, ghe uela va, “Ia o taita ateva natughu ia, ngaghe suitoongainiela. Am nongoa.” ³⁶ Nau lingi ngalo eteva ghe ruula, me laghe tara nongala Iesu. Nau laghe oghi sio mae, karika laghe auliaa poila ta mene toa tale voto laghe tarala.

*Iesu ghe ghelei emasinala taita arighi
raroai eteva ghe tokatoka etana
(Mat 17:14-18; Mak 9:14-27)*

³⁷ Ghe paila ta mene kateva nau, nau eteva laghe sio mae tale motouru eteva, me laghe tarala oroieili taumattu ngatoa, laghe mae sio tani sou Iesu. ³⁸ Kateva etaira ghe samala me ghe uela va, “Tisa! Mae tara natughu eteva, ta kateva nonga natughu, me ughelei emasinaia. ³⁹ Nau eteva raroai eteva ekupikupia, esamasama anamungaili, me egheeleia eoo, me usouso paane eghoa, me egheelei saasakiaa vilikina, me karika poi ekasukasu vuli parasia. ⁴⁰ Anim auliaa poila ta kapum disaepolo atoa tani ghaa velu raroai eteva, me karika la roola.”

⁴¹ Iesu ghe liula me ghe uela va, “Am lo ateva oia vituu, karika righi uneimim niaiesoaa, nannaaimim me gheeleiaaimim karika ghu-lughuluena. Ghaisaata aue atoka teeiem, me ghaisaata aue asau sesa gheeleiaaimim? Ghaa mae natum ateva.”

⁴² Nau aliki eteva ghe maemae, me raroai eteva ghe sau velu elokoie siola tapaa kosa, me ghe tiuala tani oo. Iesu ghe paola raroai eteva, me ghe ghelei emasinala aliki eteva, me ghe tauela ta tamana. ⁴³ Ila akapa taumattu ngatoa laghe soghiaala tani tara sarasarakaniaane God.

Ghaluene Iesu ghe uela va aue emate

(Mat 17:22-23; Mak 9:30-32)

Taumattu ngakapa atoa laghe nannangaili isaa akapa voto Iesu ghe gheleila, me Iesu ghe uela ta kapuna disaepolo atoa va, ⁴⁴ “Am nongo amasina sa ateva aghaaulieinia ta ngetaimim, va Natuna ateva Tau-mattu ngateva aue la tauue lao ta nimaira taumattu ngatoa.” ⁴⁵ Karika laghe alomasaanga teela malloeanina inangari Iesu ghe auliaala, ta malloeanina ghe aaaisulia etaira. Laghe maamatautu tani kolomia.

See aue enamuu?

(Mat 18:1-5; Mak 9:33-37)

⁴⁶ Kateva nau, laghe aaissakeana va tani see aue enamuu etaira.

⁴⁷ Iesu ghe kilala nannaairaa, liuna avalua o me ghe ghaala aliki erighi, me ghe mae atingina valainie sio etana. ⁴⁸ Vara me ghe uela etaira va, “See umasimasi tani aikoloaa aliki etoa tale ararighi eteae, ughaaghhaa teeieghi, me ughaaghhaa tee lo ateva ghe sungieghila. See etaimim esio euu, ia namuu ia etaimim.”

*See karika tau ngai ssateeimim ia,
kapuimim ia*

(Mak 9:38-40)

⁴⁹ Jon ghe liula me ghe uela va, “Vau eteva, ami ghe tarala taumattu ngateva, ghe sungi vella raroai etoa tale ararim atea, me ami ghe tootoonga tani pao rungainia, poli karika va eusiusita.”

⁵⁰ Iesu ghe uela va, “Am rau mene paoa, ta lo ateva karika esessa teeita, kapuita ia.”

ASameria ngatoa karika laghe aloanna va Iesu ghe lao tanganueira

⁵¹ Nauna Iesu ang ghe aakalakalangina tani sae epona liu, me ghe annaaili tani sae eJerusalem. ⁵² Ghe sungi emuemuela katoa kapuna tani laa ghaimanomanosieinila tale kateae masalikiira aSameria ngatoa. ⁵³ Karika laghe aloanna tani aikoloainia, ta poli ghe aloanna tani sae eJerusalem. ⁵⁴ Disaepolo alua ta Jeimis me Jon, lalu ghe tarala ta laghe ghelei evaluela o, me lalu ghe kolomila Iesu va, “Vau eteva, ualoanna va ami kolo sae kura atea epona liu, me esio ataila?”* ⁵⁵ Iesu ghe kiriela, me ghe paolaluelu,† ⁵⁶ me laghe mene lao sio ta mene kateae masaliki.

Iesu ghe auliaala vaalua tani aimuli teeia

(Mat 8:19-22)

⁵⁷ Nau laghe kasukasu elao lao tapaa salana, kateva taumattu ghe uela ta Iesu va, “Aghaloanna tani usio nongina eaa ulao.”

9:44: Luk 9:22. **9:45:** Luk 18:34. **9:46:** Luk 22:24. **9:48:** Mat 10:40. **9:50:** Mat 12:30; Luk 11:23. **9:54:** 2 Ki 1:9-16. * **9:54:** Kasina uru ngai laghe pitila, laghe uela va Vau eteva, ualoanna va ami kolo sae kura atea epona liu, me esio ataila, nongina Elaija ghe gheleila? Utara 2 Kingi etoa 1:10-12. † **9:55:** Kasina uru ngai laghe pitila, laghe uela va me ghe uela etairarua va, “Karika amalu kilakila saa spiriti eteva etoka etaimalua. 56 Natuna ateva Taumattu ngateva karika ghe sio mae tanu uvi emate taumattu, ta tani asaangila.”

⁵⁸ Iesu ghe liula me ghe uela va, “Paua nge tapaa tuvui etoa tue liuira, me ghila atoa aleira, me Natuna ateva Taumattu ngateva karika teva alena tani laa ghasekanua etana.”

⁵⁹ Me ghe uela ta mene kateva taumattu va, “Mae usieghi.”

Me taumattu ngateva ghe liula me ghe uela va, “Vau eteva, utau velueghi mua, me alaa kaiaa tamaghi.”

⁶⁰ Iesu ghe uela etana va, “Utau vella matena atoa la laa kaiaa matena atoa. Me ukasu, me ulaa ghauliaa see ararimangalina ateva God.”

⁶¹ Kateva ghe uela ta Iesu va, “Aghi aghaloanna tani usio, me utau velueghi mua, me alaa ghakorova kapughu etoa tanganueghi.”

⁶² Iesu ghe liula me ghe uela etana va, “Arova teva taumattu eoseose me etaatara lao emuli, karika erooroo tani uungu tale ararimangalina ateva God.”

10

Iesu ghe suula 72

¹ Emulina tale isaa o voto, Vau eteva ghe mene suoongaala ghaitungaulu ghalua (72),* me ghe sungi emuemueilala ghalua ghalua ta ngetaira, tani lao akapa see tale masaliki taatara, me tale masaliki auena ghe lao etana. ² Ghe uela ta ngetaira va, “Utana atingiu ang ghele matuela, me tau ngai uungu etoa karika oroi ila. Liuna avalua o, am kolomi sae Vau tale tau ngai mukemuke ateva, va emene sungi toa tau ngai mukemuke, tani lao tale utana atingiu matuenna ia. ³ Am kasula! Asungsungiem nongina natu sipsipi etoa la tiitingina tee sesa paua ngetapaa tuvui etoa. ⁴ Karika am mene ghaa aikaai viliki veu, aikaai ghinna, o aiaasae tale keke. Karika am mene tingina aippooaa elaoelao etapaa salana.

⁵ “Nau am kupi sso tale ale ateva, am ue akasina va, ‘Luei etoka tale ale ateva oia.’ ⁶ Marova teva taumattu tale luei etokatoka, kaluimim luei aue easo ta ngetana; marova karika, aue luei eteva eoghi atu ta ngetaimim. ⁷ Am toka tale ia o ale ateva, marova la tau aatu inana me manu, am ghaa, poli emaamasina va tau ngai uungu eteva eghaa aipolipoli tale uunguaane egheelei. Karika am mene kasu ekapa see tale ale atoa.

⁸ “Nau am lao tale masaliki taatara me la ghaaiem, am nama inana la tau aatu. ⁹ Am ghelei emasina tau sessa atoa, me am ue ta ngetaira va, ‘Ararimangalina ateva God ange kalakalanginala etaimim.’ ¹⁰ Me marova am sso tale masaliki taatara, me la ratiem, am lao tale tummatavanga, me am ue va, ¹¹ ‘Kosa tale masalikiimim etokatoka tale kkengalua, ngangalu raarariaa velu poli ngam ratiengaluela. Me am kila isaa oia voto: Ararimangalina ateva God ange aakalakalaala.’ ¹² Aghaauliaa ta ngetaimim va, aue nau niaiskei eteva, God aue eapasunga maomaona nimmarikana tale masaliki eteae eSodom, me sesaaili tale lo ateae oia masaliki!

9:61: 1 Ki 19:20. **10:1:** Mak 6:7. * **10:1:** Kasina uru ngai laghe pitila laghe uela va, ghaitungaulu (70). **10:2:** Mat 9:37-38; Jon 4:35. **10:3:** Mat 10:16. **10:4:** Mat 10:7-14; Mak 6:8-11; Luk 9:3-5. **10:7:** 1 Ko 9:6-14; 1 Tim 5:18. **10:8:** 1 Ko 10:27. **10:11:** Apos 13:51; 18:6. **10:12:** Aitiutiu 19:24-25; Mat 10:15; 11:24.

*Nialousiusi ta lo atoa masaliki taatara
karika la nanna ngaioghioghiaa*

(Mat 11:20-24)

13 “Aue esesaaili ta ngetam, Korasin! Aue esesaaili tee ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa ue laghe molu tale ghinna nialousiusi me au kura, tani apasunga va ngila ghe oghi vulula sesa gheeleiaaira. 14 Aue emaomaona nimmarikana ta eTaer me eSaedon tale nau niaisakei eteva, me am karika. 15 Me io, Kapenium, uannaa va ue usae epona? Karika, io ue usioaili euu.

16 “See enongonongoam, enongonongoaghi; me see eratiem, eratiemratieghi, me see eratiratierieghi, eratirati lo ateva ghe sungieghila.”

17 Kasina nau ghe lange sio, me ghaitungaulu ghalua (72)† taumattu, laghe oggi mae sio tee nimasimasi, me laghe uela va, “Vau eteva, raroai etoa tee laghe nonganongo usilainamami, nau ami ghe aauliaa voto tale ararim ateae.”

18 Eghe liula me ghe uela va, “Aghe tarala Satana ghe katuula nongina ravaravaia ateva ghe sio mae epona liu. 19 Ngaghe tau aatu sio sarasarakana tani asa katuu me onioni, me tani apala tau ngai ssateeim ateva; karika righi voto ue eghelei saasakieinam. 20 Karika am mene masimasi va raroai etoa la nonganongo usilainam, ta am masimasi va arariimim laghe piti elokoila epona liu.”

Iesu ghe masimasi

(Mat 11:25-27; 13:16-17)

21 Tale ia o nau eteva, Iesu ghe pasula tale nimasimasi kanna Spirit Manga ateva, me ghe uela va, “Atautaao sae, Tamaghi, Vau ngepona liu io me kosa ateva, poli ughe aisuliaala isaa oia voto ta tau ngalomasaanga atoa, me angu aotuotula ta natum natu aliki etoa. Ue Tamaghi, ugheelei isaa o voto tani aimuli tee masi aaloannaam.

22 “Tamaghi ang ghe tau mae sio isaa akapa voto oia etaghi. Karika teva ekilakila va see ia Natuna, Tamane nonga; me karika teva ekilakila va see ia Tamane, Natuna nonga, me lo atoa Natuna ghe suitoongainilala, me ghe apasungaala Tamane etaira.”

23 Eghe kiriela me ghe aulia ngainaola ta kapuna disaepolo atoa va, “Niarangise tale lo atoa taumattu la taatara voto am taatara. 24 Agħaauliaa ta ngetaimim va oroieili propete atoa me kingi etoa laghe aaloanna tani tara voto am taatara ghaine, me karika laghe tarala, me laghe aaloanna tani nongo voto am nonganongo ghaine, me karika laghe nongola!”

Kiukiu niainmatoongana ta masi taumattu nge Sameria ngateva

25 Kateva nau, kateva taumattu, muennaaili ia tale inangari nipaopao, ghe tingina saela tani tootoonga Iesu tale kateva nikokkolomi. Ghe uela va, “Tisa, sa ateva agheleia tani għha maulue ateva tokatoka liu ia?”

26 Iesu ghe liula me ghe uela va, “Sa ateva laghe pitiera tale inangari nipaopao? Saa kilakilaam ta ngetana?”

10:16: Mat 10:40; Luk 9:48; Jon 5:23. † **10:17:** Kasina uru ngai laghe pitila laghe uela va, ghaitungaulu (70). **10:18:** Jon 12:31; Aotu 12:8-9. **10:19:** Sams 91:13; Mak 16:18. **10:20:** Plp 4:3; Aotu 3:5. **10:22:** Jon 3:35; 10:15. **10:25:** Mat 22:35-40; Luk 18:18.

²⁷ Eghe liula me ghe uela va, “Uaielousiaa Vaum ateva kapum Goto ia tale urunguitanim ateva, me tale maamauluaam, me tale sarasarakaniaam, me tale nannaam; me uaielousiaa tee taumattu ngateva kalakalangina ia etam, nongina uaielousieinio.”

²⁸ Iesu ghe liula me ghe uela va, “Inangari angu liula koronnaaili; ughelei isaa o voto, me aue utoka.”

²⁹ Eghe aloanna tani apasunga va ia ghulughuluena ia, me ghe kolomila Iesu va, “See ia taumattu ngateva kalakalangina ia etaghi?”

³⁰ Iesu ghe liula me ghe uela va, “Kateva taumattu ghe kasula eJerusalem tani sio eJeriko, me tau niainao atoa laghe uviela. Laghe ghaa velu ekapala ghinnanina, laghe uviela, me laghe kasu vuli elokoiela, me ghaisa ngarighi ghe mate. ³¹ Pristi eteva ghe usilaala ie nonga o salana atikirighi. Nau ghe tarala taumattu ngateva uvivina ia, ghe keoa ngalokoielo, me ghe kasula. ³² Tee me Livae ateva, nau eteva ghe mae sio tale ia o voto ateva taumattu ngateva ghe asoaso etana, ghe taraiela, me ghe keoa ngalokoielo. ³³ Vara me taumattu nge Sameria ngateva, ie tee ghe usilaala ia o salana atikirighi. Ghe mae sio nongina taumattu ngateva ghe asoaso; nau ghe taraiela, ghe alousiusi teeielo. ³⁴ Ghe lao akalakalaa sio ta ngetana, me ghe kaola oeli me uaeni ta vilikina, me usaina, me ghe ghiisila. Ghe sau etokaie saela tale kien donki eteva,‡ me ghe laoainie sio tale ale aiasoaso ateva me ghe aitarainiela. ³⁵ Elue talaua, ghe tau lao sio ghaluevilau viliki veu ta tau ngai toitoi eteva, me ghe uela va, ‘Uitarainia, me marova uitarainia tee tale mene righi peim, aue amae aliu voto akapa ughe gheleila ta ngetana.’

³⁶ “See ta ngetairotolu uannaa va ia kalakalangina ia ta taumattu ngateva, tau niainao atoa laghe uviela?”

³⁷ Tau ngalomasaanga ateva tale inangari nipaopao ghe liula me ghe uela va, “Ia o taumattu ngateva ghe alousiusi teeielo.”

Iesu ghe uela va, “Lao sio, me ughelei nongina ia o taumattu ngateva gheleila.”

Iesu tanganue Mata me Meri

³⁸ Nau Iesu me kapuna disaepolo atoa laghe kasukasu elao liao, me laghe rekatala tale masaliki eteae. Vause ateva, ararina ateae ta Mata, ghe kolola lao sio tanganuena. ³⁹ Nengana vause ateva, ararina ateae ta Meri, ghe toka siola ta liue kkena Vau eteva, tani nongoa ta ghe aaippooaa. ⁴⁰ Mata ghe aaivengevengesi, poli ia nonga ghe aaimonomonosiaa inana. Ghe mae sio, me ghe uela va, “Vau eteva, emaamasina va aghi nonga aghaimonomonosiaa inana, me nengaghi enim tokatoka? Auliaala, me emae sausieghil!”

⁴¹ Vau eteva ghe liula me ghe uela va, “Mata, Mata, unannaa oroieili voto, ⁴² me kateva nonga voto ateva ualoannaia, me karika ia etam. Meri ange aloannala ia o voto ateva masina ia, me karika aue aghaa velua etana.”

10:27: Diut 6:5; Lev 19:18. **10:28:** Lev 18:5. ‡ **10:34:** Karika va kateva nonga donki taumattu nge Sameria ghe ilou etana. Ghe ilou ta kateva, me ghe kaakaai peina ta mene kasina donki. **10:39:** Jon 11:1; 12:2-3. **10:42:** Mat 6:33.

11

*Iesu ghe apasungaala vaalua tani looloo sae
(Mat 6:9-15; 7:7-11)*

¹ Kateva nau Iesu ghe looloo sae tale kateva voto, me nau ghe ruula, kateva kapuna disaepolo ghe uela etana va, “Vau eteva, uapasunga etaimami vaalua tani looloo sae, nongina Jon ghe aapasunga ta kapuna disaepolo atoa.” ² Iesu ghe uela etaira va, “Nau am looloo sae, am looloo sae avalua toko va,

“Tamamami,
usausiemami tani oneoneaa ararim ateae va manga ia,
ami aloanna va ararimangalim ateva esio.

³ Utau rooroaa mae anemami inana tale kateva kateva nau.

⁴ Me ukkaluaa kaluimami ssavoto,

nongina ami kakkaluua lo akapa atoa la gheelei sesa voto etaimami,
me urau mene tau veluemami va ami lao tale nitootoonga.”

⁵ Iesu ghe mene uela etaira va, “Arova teva kapum ghele mae rekataa etam elomatuua voo, me ughele laa kolomi mene teva kapum va, ‘Aghaloanna va utau mae verete kotolu, ⁶ poli kapughu eteva ekasu emasaula, me ange mae sio tanganueghi, me karikaaili righi inana etaghi va atau lao.’

⁷ “Arova kapum ateva ghele liu etam va, ‘Urau mene angunainaghi. Anga kavatila atamana ateae. Aghi me natughu etoa angami asekanuela. Atam rooroo tani totu va atau aatu voto ualoanna.’ ⁸ Aghaauliaa etaimim va karika aue ghele totu me ghele tau aatu verete, me poli uarrekana tani toka kookolomia, aue ghele totu, me ghele tau aatu voto akapaaili uaaloanna, poli karika upaapalata tani toka kookolomi nau ekapa atoa.

⁹ “Aghaauliaa etaimim va am kolomi, me aue etaui aatu, me am pae, aue am tara, me am mirimiri, aue atamana ateae eotia. ¹⁰ Lo atoa la kookolomi, la ghaaghaa, me lo atoa la paepae, la taatara, me atamana eotioti ta lo atoa la mirimiri.

¹¹ “Arova teva natum eloooloo teva kko, aue ughele taula teva katuu etana? ¹² O arova ghele loo teva otolu ghila, aue ughele tau lao teva onioni? ¹³ Am arova sesa gheegheleiaaimim, me am kilakila tani tau lao masi voto ta natuimim atoa, aue Tamaimim ateva epona liu aue etaui sio Spirit Manga ateva oroiaata ta lo atoa la kookolomia.”

Iesu me Belsibul

(Mat 12:22-30; Mak 3:20-27)

¹⁴ Iesu ghe tiu vella raroai eteva tale taumattu ngateva ghe gheeleia me taumattu ngateva ghe tam samasama. Nau raroai eteva ghe kupi vulu ghoala taumattu ngateva, me ghe tiuaala tani sama, oroieli taumattu ngatoa laghe soghiaala ia o voto ateva Iesu ghe gheeleielia. ¹⁵ Me katoa laghe ue va, “Etiutiu velu raroai etoa tale sarasarakaniaane Belsibul, kapuira namuu ia raroai etoa.” ¹⁶ Me katoa laghe nim anna tani tootoonga Iesu. Laghe kookolomia tale righi aimatootoonganagepona liu.

¹⁷ Me Iesu ghe kilakila nannaairaa, me ghe uela etaira va, “Lo ateva ararimangali eaaipola, karika aue etoka liu, me lo ateva pamili eaaipola aue ila tee la ghaituua. ¹⁸ Arova ararimangalina ateva Satana

eghaluevilau ia, vaalua aue etingina aitauaa? Aghaauliaa etaimim poli am ue va atiutiu velu raroai tale sarasarakaniaane Belsibul.¹⁹ Me arova atiutiu velu raroai tale ararina ateae Belsibul, kapuim atoa tani taumattu laghe tiutiu velu raroai tale ararina ateae see? Ila aue la ghele auliaa va inangari am auliaa kamen.²⁰ Ta poli arova atiutiu velu ta nimane God, eaapasunga va ararimangalina ateva God ang ghe sio mae ta ngetaimim.

²¹ “Nau eteva lo ateva taumattu sarasarakania ia, me eposoposo ghinna niauvii, aue eaitara ngamasina alena ateva, me ghinnanina aue etoka amasina.²² Me arova sarasarakaniaili eteva taumattu emae tee ghinna niauvii, aue euvia, me eghaa velu ekapa ghinna niauvii me eaikoita peina ta mene katoa taumattu.

²³ “Lo ateva karika kapughu ia, tau ngai ssateeghi ia, me lo ateva karika esaasausieghi tani atoka aitauaa, ia etani aatoka apolapola.

*Sesa spiriti eteva ghe mene oghi mae sio
(Mat 12:43-45)*

²⁴ “Nau sesa spiriti eteva ekasukasu vuli taumattu ngateva, ekasukasu ekapa see tale voto mallangona, epaepae teva voto aue eainoana etana. Va etam rooroo tani tara teva voto tani ainoana, ange ue va, ‘Amene oghi lao tale ale ateva aghe tokatoka etana.’²⁵ Nau ange laa rekataa sio va ange tarala alena ateva raarangisana ia, me elome masina tani toka etana,²⁶ liuna avalua o me aue emene kasu tani laa kolo ghatu (7) sesa spiriti gheeleiaaira mene sesaaili. Me aue la kupi sso, me la sso toka tale ale ateva. Gheeleiaane taumattu ngateva esesaaili, elaulau llo gheeleiaane akasina.”

Niarangise koronna

²⁷ Nau Iesu ghe aippooaa, me vause ateva ghe tokatoka teeila ghe sama anamuula, me ghe uela ta Iesu va, “Niarangise etokatoka ta lo ateva vause ghe kaaiola, me ghe ssuola.”

²⁸ Iesu ghe liula me ghe uela va, “Koronnaaili inangarim, me kinatama niarangise ta lo atoa la nongonongo me la uusilaa inangarina God.”

Laghe kolomila niaimatoonga ngateva

²⁹ Nau taumattu ngatoa ngeila ghe ooroi, Iesu ghe uela va, “Lo ateva oia vituu, karika va masi taumattu ngam, ta am anna nonga tani tara niaimatoonga. Saa ghe lutu teela Jona, ie nonga o niaimatootoongana ateva aue elutu.³⁰ Nongina emua arau ta nau Jona, ia ghe aimatootoonganana ta taumattu nge Ninive, aue enongina Natuna ateva Taumattu ngateva tale lo ateva oia vituu.³¹ Tale nau niaisakei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasaueilila tani mae nongo alomasaanganiaane Solomon, me lo ateva taumattu namuu ia ta Solomon ange toka teeiemla.³² Aue taumattu nge Ninive atoa la tingina tale niaisakei eitauaa teeiem, me la ue va sesa am, poli aNinive atoa laghe nna ngaioghioghiaala, nau Jona ghe poppooaa etaira, me ia oia, lo ateva namuu ia ta Jona ange toka teeiemla.

*Mallanga**(Mat 5:15; 6:22-23)*

³³ “Karika teva eaarokoti kuraane lam ataeae va eaatoka aisulieinia, o eaakou rungainia tale teva aikaai manu,* ta eaatokaie sae epona tale aitiitinginane ateva, me nau taumattu ngatoa la kupi sso, aue la rooroo tani tara mallangina ateva. ³⁴ Matam alua emaamallangi vilikim. Arova matam va masina, vilikim akapaaili aue epasu tale mallanga ateva, va nau matam nge sesala, isaa akapa vilikim aue esauroromienia. ³⁵ Liuna avalua o me ukaarasi tani aimonomonosiaa, poli mallanga ateva etam karika va saurrom ia. ³⁶ Liuna avalua o me arova vilikim akapaaili emallanga me karika mene teva tuku vilikim saurromienia, isaa akapaaili aue emallanga, nonginaaili lam ataeae emaamallanga etam.”

*Ghaonomo voto sesaaili**(Mat 23:1-36; Mak 12:38-40; Luk 20:45-47)*

³⁷ Nau Iesu ghe ruula tani aippooaa, me kateva Paresi ghe koloala tani laa namanama tanganuena. Iesu ghe usiela me ghe lao sio tale tevoo ateva tani namanama. ³⁸ Paresi eteva ghe soghiaala tani tara va Iesu ghe tam pora akasinala nimana, nongina gheeleiaaira Paresi etoa, me ghe nim namanama.

³⁹ Me Vau eteva ghe uela etana va, “Am Paresi etoa, am porapora araarrangisana uneimim kapa me pelete eleka, me elome etaimim kuruetuna am, me sesaaili iem. ⁴⁰ Am alo kapakapa am! Am tam kilakila va lo ateva ghe gheleila eleka ghe ghelei teela elome? ⁴¹ Me am taula saa llo voto elome tale uneimim aikakkaai ta lo atoa karika peiira, me aue isaa akapaaili voto aue eraarrangisana etaimim.

⁴² “Aue esesaaili etaimim Paresi etoa, poli am tautau lao aiaasokolo tale lutu voto ghaunaili am ghaaghaa eutana, me am kakkaluaa tani ghelei voto ghulughuluena me tani aielousiaa God. Am ghelei ekapa voto tani ghelei ghulughuluena voto, me tani aielousiaa God, me tee tani taula aiaasokolo.

⁴³ “Aue esesaaili etaimim Paresi etoa, poli am tani aloannaaili aitokatoka ngemua tale ale nivelu eitaaua, me am aloanna va taumattu ngatoa la souem me la ue va, ‘Elue talaua’ me ‘Elo sinaka’ etaimim tale maketi.

⁴⁴ “Aue esesaaili etaimim, ta am nongina liu niaikkaia ngateva taumattu ngatoa la kasukasu saoaa etana, me la tam kilakila va liu niaikkaia ia.”

⁴⁵ Kateva tau ngai aapasunga tale inangari nipaopao ghe liula, me ghe uela va, “Tisa, nau eteva uaauliaa isaa oia voto, uaauliaa teeiemami.”

⁴⁶ Iesu ghe liula me ghe uela va, “Am tau ngai aapasunga iem tale inangari nipaopao, aue esesaaili etaimim, poli inangariimim aanasaaili tale taumattu ngatoa tani aimuli tee, nongina am aatoka sae voto maamatanaaili ta katoa, me karika la rooroo tani sau, me karika am saasausila.

⁴⁷ “Aue esesaaili etaimim ta am atuutulu atu niaimotoonga tale liu niaikkaiaira propete atoa, tuvuim atoa laghe uvi ematelala. ⁴⁸ Am aaulia ngaotu va am masimasiaa saa voto tuvuim atoa laghe gheleila nau laghe uvi ematela propete atoa. Liuna avalua o me am atuutulu atu niaimotoonga tale pongasovuira. ⁴⁹ Liuna avalua o me tale

11:33: Mak 4:21; Luk 8:16. * **11:33:** Kasina uru ngai laghe pitila, karika laghe uela va, o eaakou rungainia tale teva aikaai manu.

aalomasaanganiaane God ghe uela va, ‘Aue asungi tau lao propete atoa me apostolo atoa, katoa aue la uvi saasakieinila, me katoa aue la uvi ematela.’⁵⁰ Liuna avalua o me lo ateva oia vituu, aue la ghaa sesa ngaipolipoli mausi propete akapa atoa laghe uvi ematelala emua arau, tale aitiutiu tale kosa ateva,⁵¹ ghe tiuala ta matemateaane Eibol, me ghe mae sio ta Sekaraea, laghe uvi emateala tale mallome liu nighelei aiaavusuvusuena me tale rum manga atiulu. Aghaaulia ngakoronnaaili etaimim va lo ateva oia vituu aue eghaa sesa aipolipoli.

⁵² “Aue esesaaili etaimim lo atoa alomasaangaaili iem tale inangari nipaopao, poli am ghe ghaa vella kii eteva tani ghaa alomasaanga, me am, karika am soso, me lo atoa vara la kupi sso, am gheelei rungainila.”

⁵³ Me nau Iesu ghe kasu vulila ia o voto ateva me Paresi etoa me tau ngai aapasunga ngatoa tale inangari nipaopao laghe sessaieiliilala, me laghe kookolomi orioieili nikokkolomi.⁵⁴ Laghe sassai a tani nongo va ghe auliaa righi sesa inangari.

12

Am paniem tale gheeleiaaira usimaghala atoa

¹ Nau eteva oroi airari taumattu laghe mae aitauaa sio, laghe aisiriki tani tara, me Iesu ghe tiua ngakasinala tani aippooaa tee kapuna disaepolo atoa. Ghe uela va, “Am taatara amasina tale uneira isti Paresi etoa, usimaghalue ia.² Karika righi voto am aaituttua va aue etam otu, isaa akapa voto pei niaisulia, aue la kila.³ Liuna avalua o, me voto ngam auliaala tale voo ngateva aue la nongo ella, me voto ngam aulia ngaghaunala tale paa ngaleimim, aue la aulia ngaotu tale tummatavanga.

God nonga ita matautainia (Mat 10:28-31)

⁴ “Aghaauliaa etaimim, kapughu etoa, am rau mene matauta lo atoa la uvi emateam, poli auena karika mene righi uunguaaira etaimim.⁵ Aue aghapasunga lo ateva am matautainia. Am matauta lo ateva matuutuliena ia tani uvi emate taumattu, me tani sau velula sae tale Gehenna. Aghaauliaa etaimim va am matautainia!⁶ God karika erooroo tani aikkaluuaa kateva ta ghalima natu ghila aipoliira erooroo ghaluevilau viliki veu.⁷ Ekilakila ghaisa uu ngurum tale urum ateva. Urau mene matautu, ta maamauluaam namungaili ta matane God, elaulau ghila atoa.

Aulia ngaotu Iesu ta taumattu ngatoa (Mat 10:32-33; 12:32; 10:19-20)

⁸ “Aghaauliaa etaimim, va lo ateva eaulia ngaotu ta taumattu ngatoa va kapughi ia, aue Natuna ateva Taumattu ngateva eaulia ngaotua ta kapuna ensolo atoa God va ia kapuna ia.⁹ Lo ateva taumattu eue va karika ekilakilaieghi, aue aghauliaa ta kapuna ensolo atoa God va karika akilakilaia.¹⁰ Me lo atoa la auliaa tee Natuna ateva Taumattu ngateva, aue God ekkaluua. Me lo atoa la auliaa saasakiaa tee Spirit Manga ateva, God karika aue ekkaluua.

¹¹ “Nau eteva la ssoainiem tale liu niaiskei, emua ta namu ngatoa me taumattu matuutuliena, am rau mene matautu tani nnaa va, ‘Vaalua

ami liu inangari, me sa ateva ami aulieinia?" 12 ta Spirit Manga ateva, tale ia o nau eteva, aue eapasunga sa ateva aue am aulieinia."

Kiukiu niaimatoongana tale tau peipeiena ateva alo kapakapa ia

13 Kateva elome tale taumattu ngatoa ghe uela etana va, "Tisa, uauliaa ta tueghi eteva me eaikoita peina tamaingalua etaingalua."

14 Jesu ghe liula va, "See ghe uela va aghi aghelei niaisakei, me akoita voto etaimalua?" 15 Vara me ghe uela etaira va, "Am taatara amasina, me am tingina akorokorongana. Am rau mene raungaa peiimim, poli karika aue am ghaa maulue ateva tale peiimim."

16 Me ghe auliaala kiukiu niaimatoongana ateeae etaira va, "Kateva taita tue peipeiena ia, kosane ateva ghe apinosala oroieili masi inana atoa tale kateae ninamanama. 17 Ghe nannaa va, 'Sa ateva agheleia? Karika teva ale tani atoka aitauaa aneghi inana.'

18 "Vara me ghe uela va, 'Aghelei evalua toko, va arruti aleghi ale nginana atoa, me amene atulu righi namuu, me aghatoka aitauaa sso aneghi inana me peighi. 19 Me aghauliaa etaghi va, "Aghi ngaghaala oroieili masi voto atoa, aue la toka oroi ninamanama. Aghainoana, anamanama, aropi, me amasimasi."

20 "God ghe uela etana va, 'Alo kapakapa ateva! Ghaine eleivoo aghaa velu maamauluaam, me see eghaa voto ughe aimonomonosiaala?'

21 "Aue enongina avalua o tale tue peipeiena atoa la ghaagħaa oroieili voto, me karika la nannaa God."

Am rau mene ghelei nannaaimim va ekatuu

(Mat 6:19-21, 25-34)

22 Vara me Jesu ghe uela ta kapuna disaepolo atoa va, "Liuna evalua o, me aghaauliaa etaimim va, am rau mene annaa maamauluaaimim me am ue va, 'Sa ateva ami namaia,' me am rau mene annaa vilikiimim, me am ue va, 'Sa ateva ami assaea?' 23 Karika am kilakila va maulue ateva namuu ia ta matana God, me inana isaa euu, me vilikiimim isaa epona, me aiaasae isaa euu? 24 Am tara ghila atoa. Karika la pasapasa, me karika la mukemuke, me karika righi aleira tani atoka aneira inana, ta God eangiinginila. Am taumattu ngatoa namuu iem ta matana God. 25 See etaimim enannangaili erooroo tani ghelei maamauluaane emene toka tee lao? Karika poi! 26 Ta poli karika am rooroo tani ghelei isaa o lutu voto, vaalua me am nannaa mene kasina voto?

27 "Am tara vaalua palaoa ngatoa la piipinosa. Karika la uungu aanasa tani għha peiira. Aghaauliaa etaimim va molumoluaane Solomon masinaaili, me palaoa ngatoa, la laulau molumoluaane Solomon. 28 God eaamolumolu evalua o rarrasa atoa, la piipinosa ghaine, me nimanaa la taula sae tale kura ateeae. Am rooroo tani aikaajiaa va aue eaamolumolu evalueiem tee o, għauna uneimim niaikaaiaa. 29 Karika am mene atoka nannaaimim va sa ateva am namaia, me sa ateva am ropia. Am rau mene nnaa isaa o voto. 30 Ta poli taumattu tale kosa ateva la ilou paepae isaa o voto, me Tamaimim epona liu ekilakila va sa ateva am tuutukuna etana. 31 Am pae ararimangalina ateva God, me aue etau aatu isaa o voto etaimim.

32 "Am rau mene matautu, lutu lo atoa sipsip karika oroi iem, ta poli Tamaimim epona liu emasimasi tani tau aatu ararimangalina ateva etaimim. 33 Am taula peiimim me la poli, me viliki veu am taula ta

lo atoa karika righi peiira. Me am ghaar lo ateva aikkaai viliki veu karika aue epoka, me am ghaar ghinnani ngepona liu, karika aue esesa, me karika teva tau niainao erooroo tani ainao, me karika aue eavu. ³⁴ Ta poli voto ateva peiimim etokatoka etana, aue urunguitaniimim tee ateva aue etoka etana.

Am toka anguenguu

(Mat 24:45-51)

³⁵ “Am aimonomonosiaa tale niuungu. Am ghelei kuraimim lam etoka ramerame, ³⁶ nongina lo atoa tau ngai nonganongo anna, la totoi vauira ateva tani kiri mae tale nisigha ngateae. Nau eteva emae, me emirimiri etapaa ngatamana, gharovaeaata nonga ta aue la oti, me ekupi sso. ³⁷ Niarangise etoka ta lo atoa tau ngai uungu, vauira ateva etaraila va karika la aseasekanua, nau emae. Aghaaulia ngakoronna etaimim va aue emolu tani aipanipanliaa aneira inana kapuna tau ngai nonganongo anna atoa, me aue la mae tale tevoo ateva, me etau lao inana etaira. ³⁸ Niarangise aue etoka ta lo atoa tau ngai uungu vauira ateva etara va la aimonomonosiaa, marova emae elomatuaa voo, o elopai. ³⁹ Am nim nnaa va marova taumattu ngateva ekilakila nau eteva tau niainao ateva emae etana, karika aue ghele tau velu alena ateva va ghele rrutia. ⁴⁰ Am tee am aimonomonosiaa, ta poli Natuna ateva Taumattu ngateva aue emae tale nau eteva karika am nanna va aue emae etana.”

⁴¹ Pita ghe kolomila va, “Vau eteva, uaauliaa ia ona kiukiu niaimatoongana ateeae etaimami, o ta taumattu ngakapaaili etoa?”

⁴² Iesu ghe liula va, “See ia lo ateva egheelei emasina uunguaane, me alomasaanga ia tani aitaraa voto, aue eaitara ngakapaaili tau ngai nonganongo anna atoa, tani taula inana tale nau nighaa inana. ⁴³ Niarangise aue etoka tale lo ateva tau ngai nonganongo anna, vauna ateva etara va egheelei isaa o niuungu, nau eteva ekiriaa mae. ⁴⁴ Aghaaulia ngakoronna etaimim va aue eatokaia va eaitara ngakapaaili peina. ⁴⁵ Me marova ia o tau ngai nonganongo anna ateva ennaa va, ‘Vaughu eteva karika aue emae parasi,’ me etiuua tani uvi mene katoa tau ngai nonganongo anna, me etiuua tani namanama, me ropi uaeni, me nannaane eaisavisavila, ⁴⁶ aue kapuna vau ateva ia o tau ngai nonganongo anna ateva emae, tale ia o nau eteva eannaa va karika aue emae etana, aue esai putuputua me eatoka aitauua teeia me lo atoa karika la aikaajiaa.

⁴⁷ “Lo ateva tau ngai nonganongo anna ekilakila sa ateva vauna ateva ealoanna va egheleia, me karika eaimonomonosiaa tani ghelei, aue vauna ateva euvi saasakieinia. ⁴⁸ Me lo ateva karika ekilakila sa ateva vauna ateva ealoannaia etana, me egheelei voto sesa, ia o lo ateva karika aue la uvi saasakieinia. Lo atoa laghe taula oroi voto, la ghanna tani ghaar oroi voto etaira, me lo ateva laghe taula oroieili voto va eitaraa, aue la ghanna oroieili voto va eliu etaira.

Karika va luei ta niaipolapolaii

(Mat 10:34-36)

⁴⁹ “Aghe mae sio tani tau kura ateeae tale kosa ateva oio, me aghan-naaili va arova ghele rame. ⁵⁰ Me aue asuu tale kateva ase niaasuu,

me ngamamarikana teeia, lomosi ta niaasuu eteae eruu etaghi. ⁵¹ Am annaa va aghe mae sio tani tau luei tale kosa ateva? Karika! Aghaauliaa etaimim va, karika va luei, ta niaipolapolaii. ⁵² Ange tiitiuaa oia me ange laolao; aue ghalima taumattu tale kateva pamili aue la aitiuaa, kotolu aue lotolu ssa tee ghalua, me ghalua aue lalu ssa tee kotolu. ⁵³ Aliko taita ateva aue essa tee tamane, me tamane aue essa tee natuna aliki taita ateva. Me aliki vause ateva aue essa tee kinna, me kinna aue essa tee natuna aliki vause ateva. Vause ateva aue essa tee alumuna vause ateva, me alumuna vause ateva aue essa tee vause ateva.”

*Tani kila nau
(Mat 16:2-3; 5:25-26)*

⁵⁴ Ghe uela ta taumattu ngatoa va, “Nau am taatara urukookoo esaesae ta pai sinaka esuu, gharovaeaata nonga ta am ue va, ‘Aue evaao,’ me evaavaao.* ⁵⁵ Me nau eteva am taatara kuukuu eteva emaemae ta saot, am ue va, ‘Aue aanasa ateva elutu’, me aanasa ateva emaemae.† ⁵⁶ Am usimaghala am! Am kilakila tani tara kila voto eeu me eunaakookoo, me vaalua me karika am rooroo tani tara kila nau etiulu oia?

⁵⁷ “Vaalua me am, karika am rooroo tani kila saa voto ghulughuluena? ⁵⁸ Marova ngamalu laolao tale niaisakei me teva aissanim, utootoonga tani kkaluaa etana etapaa salana, ta erau laoainio ta lo ateva egheelei niaisakei, va etaou lao ta polisi etoa, va la atokaio sso tale ale mata voovoo. ⁵⁹ Aghaauliaa etam va karika aue ukupi ghoa lomosina ta utau ekapa lao viliki veu la ghase va utau lao.”

13

Nna ngaioghioghiaa o umate

¹ Tale ia o nau eteva, katoa tana taumattu laghe auliaala ta Iesu vaalua Paelat ghe ubi ematela katoa tana aGalilii nau eteva laghe gheelei sae aiaavusuvusuena ta Vau ngepona ateva. ² Iesu ghe liula etaira me ghe uela va, “Poli ila o aGalilii etoa laghe mate avaluela o, am annaa va ila sesaaili kaluira ssavoto, me lo atoa oia aGalilii karika laghe matela? ³ Aghaauliaa etaimim va karika! Arova am tam nna ngaioghioghiaa, am tee aue am mate. ⁴ Vaalua tale kasangaulu ghaocalu (18) taumattu nge Siloam laghe matela nau aitiketike ateva ghe katuu sauuala ta ngetaira? Am annaa va gheeleiaaira sesaaili ta mene lo atoa eJerusalem? ⁵ Aghaauliaa etaimim va karika! Arova am tam nna ngaioghioghiaa, am tee aue am mate.”

Kiukiu niaimatoongana tale ai eteae (fig)

⁶ Iesu ghe auliaala kateae kiukiu niaimatoongana ta taumattu ngatoa, ghe uela va, “Kateva taumattu, aina fig ateae ghe tiitingina tale umana paa ngutani uaeni etingiu. Ghe lao sio tani taatara poi va ghe tara righi uene me karika ghe tarala righi. ⁷ Ghe uela ta kapuna tau ngai pasa utana atingiu va, ‘Tarala, kotoluae ninamanama aghe mae taatara vara aghe tara righi uene, me karika poi righi ataatarra. Tue veluela! Vaalua me enim ruurungia inanina kosa ateva?’

12:53: Maeka 7:6; Mal 4:6. * **12:54:** Elsraeli, vaao ateva elaa ghaitoka ta pai sinaka esuu, ta poli paamanu eteva (Mediterranean), ia tee ta pai sinaka esuu. † **12:55:** Elsraeli, aanasa ateva emaemae ta pai saot ativilau, ta poli voto ateva aanasa ia, karika oroi voto epilipinosa etana. **13:2:** Jon 9:2. **13:7:** Luk 3:9.

⁸ “Tau ngai pasa utana atingiu ghe liula me ghe uela va, ‘Vau eteva, rati etinginaiela, me emene tingina kateae ninamanama. Aue amene kai talieinia, me amene kuukumui poia.⁹ Marova ekune tale mene kateae ninamanama, aue emasinaaili. Marova karika, aue ita tue velua.’”

Iesu ghe ghelei emasinala vause ateva poupopouena ia tale nau manga ateva

¹⁰ Kateva nau manga, Iesu ghe aapasunga tale kateva ale nivelu eitauaa. ¹¹ Vause ateva raroai eteva ghe tokala ta ngetana ghe roola kasangaulu ghaoaluae (18) ninamanama; raroai eteva ghe gheeleia ghe poupopou tani kasu, me karika ghe rooroo tani korosia. ¹² Nau eteva Iesu ghe taraiela, eghe koloa mae sio etana, me ghe uela va, “Vause ateva, angu masinala tale voto ghe gheelei saasakieinio.” ¹³ Eghe saoaala nimane ta ngetana, me katengaata ta ghe korosiela, me ghe tiuala tani tau sae God.

¹⁴ Kateva tana namuu tale ale nivelu eitauaa ngateva ghe sessaiela ta Iesu, poli ghe ghelei emasinala vause ateva ta nau manga ateva, ghe samala me ghe uela ta taumattu ngatoa va, “Nauita ghaonomo tani ghelei uunguaaita, am mae tale isaa o nau va la ghelei emasinaiem, karika va ta nau manga ateva!”

¹⁵ Vau eteva ghe liula me ghe uela etana va, “Usimaghala am! Am oia, aue am ghele pulaka kieimim vulumakao o donki, me aue am ghele laa gharopiropi tale nau manga ateva. ¹⁶ Vaalua, karika ita rooroo tani sausi ia oia vause ateva tale nau manga ateva? Poli ie tee natuna vause ia Abraham, Satana ghe ghaaiela ghe roola kasangaulu ghaoaluae (18) ninamanama.”

¹⁷ Ailiuliu tale inangarina ghe ghelei epalatala tau ngai ssateena atoa, me taumattu ghe taatara masi voto ghe gheelei, laghe masimasi.

Kiukiu niaimatoongana tale katu ue ngai erighi me isti eteva

(Mat 13:31-33; Mak 4:30-32)

¹⁸ Vara me Iesu ghe kolomila va, “Vaalue ia ararimangalina ateva God? Aue asuimatoongainia tale sa ateva?¹⁹ Ia nongina katu ue ngai erighi la kolokoloa va mastet, taumattu ngateva ghe ghaala katu ue ngai erighi, ghe pasaiela tale umana utana atingiu. Ai erighi ghe pinosala, me ghe namungailila, me ghila atoa laghe gheleila aleira tale laangina.”

²⁰ Iesu ghe mene kolomila va, “Sa ateva aue asuimatoonga ararimangalina ateva God etana?²¹ Ia avalua toko, va vause ateva ghe ghaala isti me ghe ghelei eitauaa teela oroieili palaoa lomosi ta palaoa ngateva ghe rrangala.”

Ghauna ataeae atamana

(Mat 7:13-14, 21-23)

²² Iesu ghe laolao see tale masaliki taatara atoa, me tale ghauna atoa masaliki, ghe aapasunga elaelao ta taumattu ngatoa, me ghe lao sio eJerusalem. ²³ Kateva taumattu ghe kolomiela va, “Vau eteva, karika oroi taumattu aue esaanga?”

Iesu ghe uela etaira va,²⁴ “Am sarasarakanan tani kupi sso tale atamana ataeae ghauna ia; poli oroieili taumattu ngatoa aue la tootoonga tani kupi sso, me karika aue la roo.²⁵ Namuu tale ale ateva aue etingina, me eghoa kavati atamana ataeae; me aue am tingina eleka, me am

mirimiri, me am kolokolo tale atamana atae, me ae am ue va, ‘Namu ngateva, otila atamana atae etaimami!’

“Aue eliu etaimim me eue va, ‘Karika akilakilaiem va am see iem!’

26 “Aue am liu me am ue va, ‘Ami ghe namanama me ropiropi eitauaa teeio; ughe aapasunga tale masalikiimami!’

27 “Aue emene ue va, ‘Karika akilakilaiem va am see iem. Am kasu vulieghila, am akapa sesa gheeleiaaimim!’

28 “Aue am ngala me am aingeresia ngalungaluimim, nau am tara Abraham, Aisiki me Jekop, me propete akapa atoa tale ararimangalina ateva God, me am, ae la tiu veluem! 29 Taumattu ae ekasu tale sinaka esae me sinaka esuu, me tale mene ghaluevilau pai not me saot tale kosa ateva, ae la mae tale tevoo ateva tale kinatama ninamanama atae tale ararimangalina ateva God. 30 Nongola! Kasina taumattu arariira euu ae la matuutuliena, me kasina taumattu matuutuliena ila ae la sioaili euu.”

*Iesu ghe alousiusi teela eJerusalem
(Mat 23:37-39)*

31 Ia o nau eteva katoa tana Paresi laghe mae sio ta Iesu, me laghe uela etana va, “Ukasu vuli voto ateva oia, me ulao ppae tale mene teae masaliki, poli Herot ealoanna tani uvi emateo.”

32 Iesu ghe liula etaira me ghe uela va, “Am laa ghauliaa etana tau nikamekame ateva okae va, ‘Aggi ae atiu velu raroai etoa, me ae aghelei emasina taumattu ghaine me nimanaa, me tale aiaakotonna ateva nau, ae aruu uunguaaghi.’ 33 Karika ae atoka, ghaine, nimanaa me luevo; koronnaaili karika teva propete ae emate eleka eJerusalem!

34 “Jerusalem, Jerusalem! Ughe uvi ematela propete atoa, ughe osala tau ngai kasuaa inangarina atoa God tale atu! Oroiaata aghaaloanna tani atoka aitaueinam kapughu taumattu ngatoa, nongina kina paolo ateva eaakou natuna atoa tale kaekaena, me karika am aaloanna! 35 Liuna avalua o, me am nongola! God ae ekasu vuli alena ale manga ateva, me masalikiimimi taatara atae aue eturungia. Agghauliaa etaimim va karika ae am mene taraieghi, lomosi ta nau eteva ae emae, me ae am ue va, ‘Niarangise ta lo ateva emaemae tale ararina atae Vau eteva.’”

14

Iesu ghe ghelei emasinala taumattu ngateva ghe airorrongoii

1 Kateva nau manga, Iesu ghe lao sio tani namanama tanganue kateva namuu ta Paresi etoa, me taumattu ngatoa karika laghe ghaaghiaa velu mataira ta Iesu. 2 Taita ateva, nimane me kkena ghe rorrongo, ghe tokatoka emua ta Iesu. 3 Iesu ghe kolomila tau ngai aapasunga tale inangari nipaopao me Paresi etoa va, “Vaalua uneita inangari nipaopao eaauliaa, masina tani ghelei emasina teva taumattu tale nau manga ateva, o karika?” 4 Karika laghe liu poila. Iesu ghe posola taita ateva, me ghe ghelei emasinala, me ghe sungi veluela.

5 Vara me ghe uela etaira va, “Arova teva etaimim, teva natuna o kienaa ghaata kkena, ghele katuu velu sio tale liu eteva tale nau manga ateva,

karika aue am ghele ae velue sae parasi?”⁶ Karika laghe roola tani liu inangarina.

Iesu ghe uela va ita siuua nannaaita

⁷ Iesu ghe taatara vaalua katoa tana namuu ta Paresi etoa laghe taatara masi liuira tani toka, me ghe auliaala lo ataeae oia kiukiu niaimatoongana ta taumattu ngakapa atoa: ⁸ “Nau eteva kateva ange koloola tani lao tale ninamanama ataeae, karika umene tara masi aitokatoka va utoka ta ngetana. Karika ukilakila va mene kateva taumattu la kolo teeielaa mene namuu teeia ta ngetam. ⁹ Lo ateva, unna ninamanama ataeae, ghe kolo akapaiemaluela, aue emae etam me eue va, ‘Tinginala, me ierai etoka sio!’ Aue upalata, nau la ghaao me la ghoa atokaio emuli. ¹⁰ Nau eteva ngila koloola, ulaa toka sio tale aitokatoka ateva emuli. Nau lo ateva, unna ninamanama ataeae, emae, eue va, ‘Kapughu, mae sio, me ulaa toka tale masi aitokatoka ateva.’ Isaa o voto aue eghelei, masi ararim ataeae emua tale taumattu ngakapa atoa tale lo ataeae o nivelu eitauua. ¹¹ See ualoanna tani saeaa nannaam, aue God eatokaio sio euu, me see usiuua nannaam aue God eatokaio sae epona.”

¹² Iesu ghe uela ta taumattu ngateva unna ninamanama ataeae va, “Nau eteva ualoanna tani ghelei ninamanama, urau mene kolo kapum atoa, tuem atoa, nengam atoa, mangalim atoa, o taumattu tue peipeiena, poli auena la mene koloo me la liu voto ughe gheleila ta ngetaira. ¹³ Nau ughelei ninamanama ataeae, ukolo lo atoa karika righi peiira, tokatoka ngeuu etoa, kke tapakase atoa, me mata salusaluna atoa; ¹⁴ aue ughaa niarangise, poli ila karika la rororo tani liu voto ughelei ta ngetaira. God aue eliu, tale nau eteva tau ghulughuluena atoa aue la totu tale nimate.”

Kiukiu niaimatoongana tale paka ninamanama ataeae

(Mat 22:1-10)

¹⁵ Nau eteva kateva tana taumattu ghe tokatoka tale ia o ninamanama ataeae ghe nongola isaa oia inangari, me ghe uela ta Iesu va, “Niarangise aue eghaa lo atoa aue la toka tale paka ninamanama ataeae tale ararimangalina ateva God!”

¹⁶ Iesu ghe uela etana va, “Kateva taumattu ghe aimonomonosiaala kinatama ninamanama ataeae, me ghe suula inangari ta oroi taumattu va la mae. ¹⁷ Ghe ghaala nau ninamanama, me ghe suula kapuna tau ngai nongonongo anna ateva va elaa kolo taumattu ang ghe uela va la mae, ta voto akapa ang ghe aimonomonosiaala.

¹⁸ “Ila akapa laghe tiuala tani aikamekameaa me laghe aauliaa vaalua me karika laghe roola tani lao. Aitiutiu eteva ghe uela ta tau ngai nongonongo anna ateva va, ‘Aghe polila tuku kosa ateva. Aghaloanna tani laa taraiia. Alousiusi, ta karika aue amae.’

¹⁹ “Mene kateva ghe uela va, ‘Aghe polila kasangaulu (10) kieghi vulumakao, me alaoao tani taraila, me atoongainila tani uungu, alousiusi ta karika aue amae.’

²⁰ “Mene kateva ghe uela va, ‘Amina laila, o karika arooroo tani mae.’

²¹ “Tau ngai nongonongo anna ateva ghe lao sio, me ghe auliaala ta vauna ateva. Vau eteva ghe sessaiela, me ghe uela etana va, ‘Ailuiliuila, me ukasu parasi me ulao tale liu nivelu eitauua, me tale salana atoa

tale masaliki taatara, me ukolo mae lo atoa karika righi peiira, tokatoka ngeuu etoa, mata salusaluna atoa, me kke tapakase atoa.'

²² "Tau ngai nonganongo anna ateva ghe kasula tani ghelei llo vauna ateva ghe auliaala, me nau ghe kiriaa mae sio, ghe uela va, 'Inangarim ngami gheleila, me oroi aitokatoka karika righi taumattuna.'

²³ "Vauna ateva ghe uela va, 'Ulao tale salana namuu, me ukkele valaa tale ghauna salana, me ukolo asarasarakana taumattu ngatoa, me la mae, me la ghasusu aleghi eteva. ²⁴ Aghaauliaa etaimim va karika poi teva taumattu aghe kolo akasinala, aue la nama aneghi inana!'

*Taumattu ngateva enannaa ngamasina me eaimuli tee Iesu
(Mat 10:37-38)*

²⁵ Oroieili taumattu ngatoa laghe usiusi see Iesu. Ghe kiriela me ghe uela etaira va, ²⁶ "Lo ateva ualoanna tani aimuli teeieghi, karika urooroo va ukapughu disaepolo arova utam rooroo tani rati etoka tamam me kinam, vausenim ateva me natum atoa, tuem atoa me nengam atoa, me maamauluaam. ²⁷ See karika urooroo tani sunuki unem ateva tani aikotoo, me umae aimuli etaghi, karika urooroo tani kapughu disaepolo.

²⁸ "Arova teva etaimim eaimonomonosiaa tani atulu ale ateva, etokatoka sio mua, me etara mua va ghaisa aipolina, me tani tara va viliki veu rooroona tani ruu ale ateva, o karika. ²⁹ Arova etiuua ale ateva me etam rungia, taumattu ngatoa aue la amamarasa, ³⁰ me la ue va, 'Ia o taumattu ngateva ghe tiuaala ale ateva, me karikaaili ang ghe roola tani rungia!'

³¹ "Arova kingi eteva ange laolao tani aiuvii, me kapuna tau ngai uuvi etoa erooroo kasangaulu airari (10,000), aue etoka mua, me eannaa va erooroo tani laa aiuvii tee mene kateva kingi, kapuna tau ngai uuvi etoa erooroo ghaluengaulu airari (20,000), me aue apalaia, o karika? ³² Arova karika erooroo, aue esungi kapuna tau ngaikasuaa inangari etoa tani laa sou kingi eteva, me la loo luei nau eteva masau ila. ³³ Tale ia nonga o salana atikirighi, karika teva etaimim erooroo tani kapughu disaepolo, arova etam oghi vulu peina akapaaili.

*Uela ateva karika righi namina
(Mat 5:13; Mak 9:50)*

³⁴ "Uela ateva masina ia, me marova ekapa namina, vaalua urooroo tani mene ghelei me emene tue namina? ³⁵ Ia o ase uela ateva karika ita rooroo tani ghelei righi voto etana, liuna avalua o me la nim sausau velu.

"Lo ateva talingane manee tani nongo, aue enongo."

15

*Kiukiu niaimatoongana tale sipsipi eteva
ghe rauela
(Mat 18:12-14)*

¹ Kateva nau, tau ngai ghaa takis atoa me tau ssavoto atoa, laghe mae sio tani nongo Iesu. ² Paresi etoa me tau ngai aapasunga tale inangari nipaopao atoa, laghe tiuaala tani auliuliaa Iesu, laghe ue va,

“Ia oia taumattu ngateva ealoanna tau ssavoto atoa tani toka, me tani namanama teeila.”

³ Me Iesu ghe auliaala etaira kiukiu niaimatoongana ataeae etaira. Ghe uela va, ⁴ “Arova kateva etaimim kiena sipsipi erooroo kateva ai (100), me kateva etaira ghele raua, am annaa va karika aue ghele kasu vuli ghasiongaulu ghasio (99) sipsipi nongina la ghele namanama, me ghele laa pae lo ateva ghe rauela, lomosi ta aue ghele taraia? ⁵ Nau eteva ghele taraia, aue ghele masimasi, ghele sauva, me ghele alokoie sae ta pappana, ⁶ me ghele sauve lao tanganuena. Aue ghele kolo kapuna akapa atoa, me lo atoa la tokatoka kalakalaa teeia, me ghele ue ta ngetaira va, ‘Masimasiaaghi namungaili, poli ngatarala kieghi sipsipi eteva ghe rauela. Am mae masimasi teeieeghi?’ ⁷ Aghaauliaa etaimim va, tale isaa o ase salana, namungaili nimasimasi elutululu epona liu, nau eteva kateva tana tau ssavoto enanna ngaioghioghiaa ta ghasiongaulu ghasio (99) taumattu ghulughuluena, karika righi kaluira ssavoto va la nna ngaioghioghiaa.

*Kiukiu niaimatoongana tale
viliki veu etivilau ghe rauela*

⁸ “Marova teva vause unna kasangauluvilau (10) viliki veu, me ghele rau kativilau, sa ateva aue ghele gheleia? Aue ghele arokoti kurane lam ataeae, me ghele kkala tani paea amasinaaili alena ateva, lomosi ta ghele taraia. ⁹ Nau ghele taraia, ghele kolo kapuna atoa, me lo atoa la tokatoka akalakalangina tanganuena, me ghele ue va, ‘Masimasiaaghi namungaili, ta ngatarala uneeghi viliki veu etivilau ghe rauela. Am mae masimasi eitauua teeieeghi?’ ¹⁰ Tale ia o ase salana atikirighi, aghaauliaa etaimim va ensolo atoa kapuna ila God, masimasiaaira namungaili, nau eteva kateva tana tau ssavoto enanna ngaioghioghiaa.”

Kiukiu niaimatoongana tale aliki taita ateva ghe rauela

¹¹ Iesu ghe mene uela va, “Taumattu ngateva, natuna taita alua. ¹² Muli eteva taita ghe uela ta tamane va, ‘Tamaghi, tau mae peighi nau umate aue aghaa.’ Me tamairarua ghe koitaala peiirarua natuna taita alua.

¹³ Karika masau nau ghe lange sio me muli eteva taita ghe tau ekapala peina laghe polila, ghe ghaala viliki veu, me ghe kasula tani lao tale masau patunganue namuu. Ghe tiuaala tani poli aloannaane, ¹⁴ me unna viliki veu ghe kapala, me tale isaa o nau, paka maloo ateva ghe tinginala, me ghe karikala righi peina. ¹⁵ Liuna avalua o me ghe lao sio tani pae niuungu. Kateva taumattu tale ia o patunganue namu ngateae ghe sungiela tani laa ghaitoiaa mosu etoa me eanginila. ¹⁶ Eghe aloannaaili tani nama righi inana aneira mosu etoa, poli karika teva ghe tautau lao righi inana va ghe nama.

¹⁷ “Nau eteva masi ninannaa ghe ghaaiela me ghe uela va, ‘Kapuna tau ngai uungu etoa tamaghi oroieili aneira inana, me aghi oia maloo ateva ange gheelei emateaghi! ¹⁸ Akasu, me alao ta tamaghi, me aue alaa ue va, ‘Tamaghi, aghe ghelei saasakiaala ta mata God, me ta matam. ¹⁹ Karika masina aghi va uaseaghi va natum ieghi; uaseaghi va marova kateva kapum tau ngai uungu.’” ²⁰ Ghe tingina saela, me ange laolao ta tamane.

“Masau ia tanganue tamane, me tamane ghe taraiela; urunguitanina ateva ghe pasula tale nialousiusi, me ghe ilou lao sio tani sou natuna, me ghe llotiela me ghe ngusuela.

²¹ “Aliko taita ateva ghe uela va, ‘Tamaghi, aghe ghelei saasakiaala ta mata God, me ta matam. Karika masina aghi va uaseaghi va natum ieghi.’

²² “Me tamane ghe uela ta kapuna tau ngai uungu etoa va, ‘Am ailuulua! Am maeaa sio teva aiaasae masinaaili, me easae. Am atokala teva ringi ta vuuvuu nimane, me am asae taula lua aikasukasus ta kkena. ²³ Am laa ghaa morona ateva natu vulumakao, me am uvi ematea, me ita namanama aitauaa teeia, me ita masimasi. ²⁴ Poli ia oia natughu taita ateva ghe matela, me ange mene sakesakela, me ghe rauela, me ange rekatala.’ Me laghe tiuala tani masimasi.

²⁵ “Karika masau, me natuna mua ateva taita ghe oghiaa mae sio etapaa ngutana. Eghe kasukasu emaemae, ang ghe kalakalangina elo ale, me ghe nongola paka mangalia ateva tale nikau me niloku. ²⁶ Ghe kolola kateva tani aliki, me ghe kolomiela va, ‘Vaalua me la gheelei mangalia ateva okae?’

²⁷ “Aliko eteva ghe liula me ghe uela va, ‘Nengam ateva ange rekatala. Tamam evui ematela morona ateva natu vulumakao, poli nengam ange mae sio tani rekataa etana, me ange masimasi.’

²⁸ “Mua ateva taita ghe sessaiela, me ghe tam aloannala tani sso elo ale. Tamane ghe ghoa mae tani aipoopoliaa poi teeia. ²⁹ Ghe liula ta tamane me ghe uela va, ‘Tarala, ninamanama atoa ngaghe uungula etam nonginaaili tau ngai nongonongo anna ateva, me karika poi aghe nongonongo vulu inangarim. Sa ateva ughe tauue mae sio etaghi? Karika poi va ughe tau mae sio arova nim teva natu meemee va aghe ghelei teae ninamanama, me aghe masimasi eitauaa tee kapughu etoa! ³⁰ Me natum taita ateva oia ghe nim lao sio tani rungia see peim tale vause ngetapaa salana atoa, me nau erekatala, ughuvi ematela morona ateva natu vulumakao va eanna ia!’

³¹ “Tamane ghe liula me ghe uela va, ‘Natughu, io utokatoka teeieghi nau ekapa atoa, isaa akapa peighi peim. ³² Me ita velu eitauaa me ita tani masimasi, poli nengam ghe matela, me ange sakesakela, me ghe rauela, me ange rekatala.’ ”

16

Kiukiu niaimatoongana ateae tale taumattu ngateva ghe aaitoiaa tau ngai uungu etoa

¹ Iesu ghe uela ta kapuna disaepolo atoa va, “Kateva tau peipeiena, kapuna tau ngai uungu eteva, laghe ue va karika masina ia, ta karika ghe aaitara ngamasina peina kapuna namu ngateva. ² Kapuna namu ngateva ghe koloala me ghe kolomiela va, ‘Vaalua tale inangari anonganongo la ghaauliaa teeio? Laa ghaimonomonosiaa kiukiuna uunguaam tale peighi uaaitaraa, poli karika urooroo tani mene aitaraa peighi.’

³ “Tau ngai uungu eteva ghe nnaala va, ‘Kapughu namu ngateva ange ghaaghaa velu niuungu etaghi. Sa ateva agheleia? Karika sarasarakanai ieghi tani kaikai me palatanna ieghi tani nim loo viliki veu. ⁴ Ngakilala

sa ateva agheleia, me nau eteva aruu tale niuungu, taumattu ngatoa aue la ghaikoloainaghi nau alao tanganueira.'

⁵ "Liuna avalua o me ghe kolokolo kateva kateva tale taumattu laghe nim ghaala voto ta vauna ateva. Ghe kolomila aitiutiu eteva va, 'Ghaisa kalum voto ughe nim ghaala ta vaughu eteva?'

⁶ "Lo ateva taumattu ghe nim ghaala voto ghe liula me ghe uela va, 'Ghaoalu ai (800) galon^{*} oliv oeli.'

"Tau ngai uungu eteva ghe uela etana va, 'Ghaala uru ngai etikirighi laghe pitila kalum voto ughe nim ghaala ta vaughu eteva, me arovaeaata ta utoka sio, me upiti nonga ghaata ai (400).'

⁷ "Me ghe kolomila mene kateva va, 'Ghaisa kalum voto ughe nim ghaala?'

"Me taumattu ngateva ghe uela va, 'Kateva ai (100) aikaai uiti.'

"Tau ngai uungu eteva ghe uela etana va, 'Ghaala uru ngai eteva laghe pitila kalum voto ughe nim ghaala etana, me upiti nonga ghaoalungaulu (80).'

⁸ "Nau vauna ateva ghe kilala voto kapuna sesa tau ngai uungu eteva ghe gheleila, ghe arueiniela, poli ghe gheleila voto tau muenna nonga atoa la gheelei. Taumattu tale kosa ateva oia muennaaili ila tale ase salana tani ghelei uunguaaira, me taumattu tale mallanga atoa karika.
⁹ Aghaauliaa etaimim va am ghinaghina masi voto tale kosa ateva tani ghelei, me eoroi kapuimim. Me nau eteva isaa o voto ekapa aue la masimasi tani ghaaiaeem tale voto ateva tokatoka liu ia.

¹⁰ "Lo ateva la atoka tuutuliira etana tale lutu voto pisike, aue la atoka tee tuutuliira tee etana tale namuu voto. Me lo ateva etam gheelei voto koronna tale lutu voto pisike, karika aue eghelei voto koronna tale llo voto namuu. ¹¹ Arova karika la ghaatoka tuutuliira etaimim tani aitaraa masi voto tale kosa ateva, karika teva aue eatoka tuutulina etaimim tani ghaa voto koronna. ¹² Me arova la tam aatoka tuutuliira va am rooroo tani aitaraa katoa peiira, karika teva aue ghele tau aatu righi voto va ghele peiimim.

¹³ "Karika teva tau ngai nonganongo anna erooroo tani uungu ta ghalua vau, poli aue ghele ssa tee kateva, me ghele aielousiaa kateva. O aue ghele nongo usilaa kateva, me ghele liu vilina ta mene kateva. Karika am rooroo tani uungu ta God me viliki veu."

Inangari nipaopao me ararimangalina ateva God

(Mat 11:12-13)

¹⁴ Paresi etoa, la ghaielousiangaili viliki veu, nau laghe nongola isaa o inangari, laghe tiuaala tani amamarasa Iesu. ¹⁵ Iesu ghe uela etaira va, "Am, am nim aaloanna tani aitaratarainam tani ghelei masi voto ta mata taumattu ngatoa, me karika, ta God nonga ekilakila urunguitaniiim, poli voto masinaaili ta mata taumattu ngatoa, sesaaili ta matane God.

¹⁶ "Inangari nipaopao me inangariira propete atoa laghe pitila, ghe laa ghaa sio nau ta Jon, me ghe tiuaala tale nau etiulu o, masi inangari tale ararimangalina ateva God laghe tiuaala tani ppooa ngaotua, me taumattu ngakapa atoa laghe annaaili tani kupi sso etana. ¹⁷ Elomarase

* **16:6:** Tale inangari nge Griek, kateva ai bath. **16:10:** Luk 19:17-26. **16:13:** Mat 6:24.
16:15: Mat 23:28; Luk 18:9-14. **16:16:** Mat 11:12-13. **16:17:** Mat 5:18.

me kosa ateva lalu rooroo tani kapa, me teva tuku voto ghaunaaili tale inangari nipaopao karika erooroo tani kapa.

¹⁸ “Lo ateva erati vausenna ateva me elai ta mene teva vause ange lai sarila. Me lo ateva taita emene ghaa vause ateva oia laghe rati etokaiela, ia tee ange lai sarila.

Tau peipeiena ateva me Lasarus

¹⁹ “Kateva tau peipeiena ghe molumolu me ghe aasae masi ghinna atoa, me ghe gheelei ninamanama nau ekapa atoa. ²⁰ Tapaa ngatamana tale valavala atae tangantuena, tau nilooloo ateva, ararina atae ta Lasarus, laghe mae aatokaia, pasu ia tale usai. ²¹ Ghe anna va enama llo inana aue ekatuu tale unna tevoo ateva tue peipeiena ateva. Me tee paua atoa laghe mae raarameaa usaina.

²² “Ghe ghaala nau eteva, tau nilooloo ateva ghe matela, me ensolo atoa laghe saue lao sio, me laghe laa ghalokoi valainie sio ta Abraham.[†] Tau peipeiena tee ateva ghe matela, me laghe kaineiniela. ²³ Tale Hades, ghe aateateaa paka mmarikana ateva, me vara ghe sae taatara, me ghe tarala Abraham masaeili ia, me Lasarus ghe tokatoka valaa etana. ²⁴ Ghe kolokolo saela etana me ghe uela va, ‘Tamaghi Abraham, alom eusieghi me usuu Lasarus tani asuu elo velena tale vuuvuu nimane ateva tale manu me esio amakarrii ramuramuti paaghi eteva, poli aghateateaa paka mmarikana tale kura atae oia.’

²⁵ “Abraham ghe liula me ghe uela va, ‘Natughu, unnaa nau ta sakesake, io ughe ghaaghaa masi voto, nau Lasarus ghe ghaaghaa voto sesa. Me ghaine ange tokatoka amasina oia, me io angu ghaaghaa mmarikana. ²⁶ Me tee, elome etaimami me io, paka salesalena ateva easoaso. Lo atoa la anna tani kasu oia me la ghatu ona, karika la rooroo, me lo tee atoa la anna tani kasu ona me la mae etaimami, karika aue la roo.’

²⁷ “Ghe liula me ghe uela va, ‘Tana aghaloannaaili, Tamaghi, va usuu Lasarus me elao tanganue tamaghi, ²⁸ poli ghalima nengaghi, me Lasarus elaa ghauliaa kieira, poli ila tee la rau mae tale voto ateva oia sesaaili ia.’

²⁹ “Abraham ghe liula me ghe uela va, ‘Inangariira Moses me propete atoa isaa okae etaira; aue la nongola.’

³⁰ “Tau peipeiena ateva ghe uela va, ‘Karika, Tamaghi Abraham! Arova teva ang ghe matela ghele lao etaira, aue la ghele nna ngaioghioghiaa tale kaluira ssavoto.’

³¹ “Abraham ghe uela etana va, ‘Arova la tam rooroo tani nongo Moses me propete atoa, karika aue la akoronna voto, arova teva ghele totu tale nimate, me ghe auliaa etaira.’ ”

17

Ssavoto (Mat 18:6-7)

¹ Iesu ghe uela ta kapuna disaepolo atoa va, “Voto egheelei taumattu ekaakatuu tale ssavoto ange ailtutua, me aue esesaaili ta taumattu ngateva egheelei voto oia elutulutu! ² Aue ghele masinaaili etana marova la ghele iri atu etiulu maate ia ta ngalonan, me la ghele ghoa

[†] **16:22:** Ajiu etoa laghe annaa va epona liu ghulughuluena atoa taumattu la tokatoka tale ninamanama atae. Lo ateva etokatoka tee sio Abraham, eaapasunga va ia namuu ia.

allusia elo malionge, ta erau ghelei teva aliki va unna niaikaiaa ekatuu.
3 Am paniem tale voto am gheelei!

“Marova tuem ateva o nengam ateva egheelei ssavoto, uaulia ngakorokorongana etana, me marova enna ngaioghioghiaa, ukkaluaa.
4 Marova egheelei teeio voto karika masina ghaituaata (7) tale kateva nau, me emae kkaluaa ghaituaata, me eue va, ‘Nganna ngaioghioghialaa,’ ukkaluaa voto egheelei teeio etana.”

Niaikaiaa

5 Apostolo atoa laghe uela ta Vau eteva va, “Ughelei unemami niaikaiaa me enamuu.”

6 Vau eteva ghe liula va, “Marova uneimim niaikaiaa naana-mungaane nongina katu ue ngai erighi ghaunaaili ia (mastet), am rooroo tani ue ta ai eteae o va etammuti tee uane, me emene ghoa pinosa elamana, aue ghele roo tani nongo usilainiem.

Uunguaane tau ngai nonganongo anna ateva

7 “Marova kateva etaimim kapuna tau ngai nonganongo anna ateva euungu etapaa ngutana, o eaaitaraa kiem sipsipi, nau ekiriaa mae elo ale, vaalua, aue uailuulieinia tani namanama? **8 Karika! Aue ughele ue etana va, ‘Uaimonomonosiaa aneghi inana, me uaipanipanliaa, me ukaisi tau mae aneghi inana, me uaku ateoghu me anamanama me aropi, me auena umina namanama me uropi.’ **9 Vaalua, karika aue ukaili emasina tale uunguaane ange gheleila?** **10 Nim nongina am, nau ngam gheleila voto God eaaulaa etaimim tani ghelei, airuuruu am nim ue va, ‘Uunguaamami arau, poli ami nim tau ngai nonganongo anna iemami erau.’”****

Iesu ghe ghelei emasinala 10 tau tasussuku (lepa)

11 Iesu ghe mene laa saesae eJerusalem, ghe kasu eloi lao sio tale aioloa ngateva eSameria me eGalili. **12 Ghe kasukasu elaolao tale masaliki eteae, me kasangaulu (10) taita aneira tasussuku eteva, laghe sousouela, laghe tingina amasaula, **13 me laghe kolokolo atingina tani ue va, “Iesu! Namu ngateva! Alousiusi teeiemamila!”****

14 Nau Iesu ghe tarailala, me ghe uela va, “Am lao sio, me am laa apasungainam ta pristi etoa.” Laghe kasukasu elaolao, me laghe raarangisanala.

15 Kateva etaira, nau ghe tarala va ghe raarangisanala, ghe oghi lao sio, me namungaili ta ghe tau saela God. **16 Ghe lao sio me ghe suuiuala ta liue kkena Iesu, me ghe kaili emasinala etana. Taita ateva oia aSameria ia.**

17 Iesu ghe uela va, “Kasangaulu (10) taumattu la raarangisanala, me eaa ghasio (9)? **18 Vaalua me taitani ngeleka ateva, ia nonga emae sio tani amasina ta God?” **19 Iesu ghe uela etana va, “Tingina saela me ukasu; unem niaikaiaa ange ghelei emasinaiola.”****

Maemaea ararimangalina ateva God

(Mat 24:23-28, 37-41)

20 Katoa tana Paresi laghe kookolomi Iesu va lovisa ararimangalina ateva God aue emae. Ghe liula me ghe uela va, “Ararimangalina ateva God karika aue emae nongina am, am taatara. **21 Karika teva aue eue va,**

'Tarala, ie toko!' o, 'Ie teke!' ta ararimangalina ateva God ia oia elome ta ngetaimim."

²² Vara me ghe uela ta kapuna disaepolo atoa va, "Nau too emaema, aue am aloannaaili tani tara Natuna ateva Taumattu ngateva tale teva nau, me karika aue am taraia. ²³ Katoa aue la ue etaimim va, 'Tarala, ie teke!' o, 'Tarala, ie toko!' Karika am mene akoronnaila va am usilaa. ²⁴ Poli nongina ravaravaia ateva eravaravaia elomarase, me emammalanga akapa tale pai etoa, aue enongina Natuna ateva Taumattu ngateva tale nauna ateva. ²⁵ Aitiutiu aue eateateaa mmarikana, me taumattu tale lo ateva oia vituu aue la ratia.

²⁶ "Me nauna Natuna ateva Taumattu ngateva aue enongina nau Noa. ²⁷ Taumattu ngatoa laghe namanama me ropiropi, taita me vause atoa laghe lailai, me ghe ghaala nau eteva Noa ghe kupi ssola tale anua ateva, me manu ghagga ateva ghe mae sio, me ghe tturungi ekapailala.

²⁸ "Aue enongina tee nau ta Lot. Taumattu ngatoa laghe namanama, ropiropi me laghe aaipoliaa peiira, laghe pasapasa, me laghe atuutulu. ²⁹ Me nau eteva Lot ghe kasu vulila eSodom, kura atae me atu ramerame ghe sio mae epona liu, ghe tturungi ekapailala.

³⁰ "Aue enongina nau eteva Natuna ateva Taumattu ngateva emae rekata. ³¹ Tale ia o nau eteva, taumattu ngateva etokatoka eleka tale ale ateva, erau mene kupi sso tanganuena va eso ghaa peina; aue enongina tee taumattu ngateva euungu tapaa ngutana, erau mene oghi ghoa tanganuena. ³² Am annaa sa ateva ghe lutula ta vausenna ateva Lot! ³³ See etootoonga tani asaangi maamauluaane, aue eraua; me see earau maamauluaane, aue esaanga. ³⁴ Tale ia o nau eteva, aghauliaa etaimim va, aue ghalua taumattu lalu aso tale kateae nonga aisalo eleivoo: kateva aue la ghaaia, me kateva aue la rati elokoia. ³⁵⁻³⁶ Ghalua vause aue lalu gheelei putuputu palaoa: kateva aue la ghaaia, me kateva la rati etokaia."*

³⁷ Disaepolo atoa laghe kolomiela va, "Vau eteva, llo oia eaa aue elaa lutu?"

Iesu ghe liula me ghe uela va, "Nongina eaa matena ateva taumattu easoaso, paka ghila atoa la velovelu eitauaa."†

18

Kiukiu niaimatoongana atae ta vause raue vulu eteva me tau ngai ghelei niaisakei eteva

¹ Iesu ghe auliaala kiukiu niaimatoongana atae ta disaepolo atoa tani apasunga etaira va la tani looloo sae tale nau ekapa atoa, me karika la mene sio asoasoaa. ² Me ghe uela va, "Tale kateae masaliki tau ngai ghelei niaisakei eteva, karika ghe maamatauta God ateva, me tee karika ghe oneoneaa tee kasina taumattu. ³ Me tee vause raue vulu eteva, ie tee elome tale masaliki eteae, ghe maemae nonga ta tau ngai ghelei niaisakei eteva. Ghe aaloannaaili va esausia, tale aloaloannaane. Ghe ue etana va, 'Usausieghi tale tau ngai ssateeieghi eteva.'

17:23: Mak 13:21; Luk 21:8. **17:28:** Aitiutiu 18:20; 19:25. **17:31:** Mat 24:17-18. **17:32:**

Aitiutiu 19:17, 26. **17:33:** Luk 9:24. * **17:35-36:** Kasina uru ngai laghe pitila, laghe mene pitila va, 36 Ghalua aue lalu uuungu etapaa ngutana: kateva aue la ghaaia; me kateva la rati etokaia. (Mat 24:40) † **17:37:** Paka ghila atoa, la aseasela va valsa, la namanama nonga voto ang ghe matela me mauuna. **18:1:** Kol 4:2; 1 Tes 5:17.

4-5 “Kasina nau ang ghe lange sio, karika ghe aloanna tani nongoa me sausia, vara me ghe nnaala va, ‘Arongona ta karika aoneoneaa God me taumattu tee atoa, me poli vause raue vulu eteva oia etautau mae maate etaghi, asausia, poli erou toka maemae nonga va eghelei emangooieghi.’”

6 Vau eteva ghe uela va, “Am nongo inangarina sesa tau ngai ghelei niaiskei eteva ghe auliaala. 7 Am annaa va God karika aue eghele sausi kapuna atoa ghe aimatoongainilala, la looloo sae etana tale llaa me voo? Vaalua, am annaa tee va aue ghele aippetana tani sausila? 8 Aghauliaa etaimim va arovaeeangaili ta aue ghele sausila. Tale isaa o salana, nau Natuna ateva Taumattu ngateva aue esio tale kosa ateva, aue etara righi taumattu eaisesoaa etana?”

Kiukiui niaimatoongana ateae ta Paresi eteva me tau ngai ghaa takis ateva

9 Kasina taumattu la nannainila nonga va ila ghulughuluena ila, me katoa taumattu karika. Iesu ghe kiukiuaala etaira ia oia kiukiui niaimatoongana ateae, ghe uela va,¹⁰ “Ghalua taumattu lalu ghe saela tale ale manga ateva tani looloo sae, kateva taumattu Paresi ia, me kateva tau ngai ghaa takis ia. 11 Taumattu tale Paresi eteva ghe tingina saela me ghe looloo saela, me ghe aauliaa masi uunguaane. Ghe uela va, ‘God, aghi akaakaili emasina etam va aghi karika nongina lo atoa taumattu la ainao, gheeleiaira karika masina, me la lailai sari, me nongina ia o tau ngai ghaa takis ateva. 12 Ghaluaata tale ghaitu (7) nau anaenae, me atautau aiaasokolo tale voto akapa aghaaghaha.’

13 “Tau ngai ghaa takis ateva ghe tingina amasaula, me ghe sioaala nannaane, me ghe looloo saela, ghe uela va, ‘God, ualousiusi teeieghi, poli aghi tau ssavoto aghi.’

14 “Aghauliaa etaimim va ia oia taumattu ngateva, karika nongina Paresi eteva, nau ghe kasula tani lao tanganuena, God ghe taraiela va ia ghulughuluena ia. See esaeaa nannaane, aue God etaue sio euu, see esioaa nannaane euu, God aue eanamunamunganeia.”

Natu aliki etoa me Iesu

(Mat 19:13-15; Mak 10:13-16)

15 Taumattu ngatoa laghe maeaa sio natuira raaraina atoa ta Iesu, va esaoaa nimane etaira me earangiseila. Disaepolo atoa laghe tarailala me laghe pao rungainilala. 16 Me Iesu ghe kolola natu ngaliki etoa laghe mae sio etana me ghe uela va, “Am tau velu natu aliki etoa la mae etaghi, karika am mene ghelei rungainila. Ta poli ararimangalina ateva God anueira ia taumattu ngatoa nongina natu ngaliki etoa. 17 Aghaulia ngakoronnaaili, va arova see karika eghaa lo ateva o ararimangalina God nongina natu aliki etoa, karika aue esso etana.”

Tau peipeiena ateva

(Mat 19:16-30; Mak 10:17-31)

18 Kateva namuu ghe mae sio ta Iesu, me ghe kolomiela va, “Masi tisa ngateva, vaalua aroo tani ghelei, me aghaa lo ateva o maulue tokatoka liu ia?”

19 Iesu ghe liula me ghe uela etana va, “Vaalua me uue va masina ieghi? Karika teva masina, ta God nonga masina ia. 20 Ukilakila

inangari nipaopao eue va, ‘Karika umene lai sari, karika umene aiuvi emate, karika umene ainao, me tee karika umene kamekame tale niaisakei, uoneoneaa tamam me kinam.’”

²¹ Ghe uela ta Iesu va, “Isaa ona voto ngaghe aimuli teela nau aliki ieghi arau.”

²² Nau Iesu ghe nongola isaa o inangarina, ghe uela etana va, “Kateva voto karika ughe gheleia. Utau lao peim la poli, me ughaa viliki veu me ulaoa ta taumattu karika righi peiira. Arova ughelei evalua o, aue utau peipeiena epona liu, me umae aimuli teeieghi.”

²³ Me nau ghe nongola isaa o inangari, ghe alousiusila, ta poli ia tau peipeiena ia. ²⁴ Iesu ghe taatara lao sio etana, me ghe uela va, “Aanasaaili ta tau peipeiena ateva tani kupi sso tale aririmangalina ateva God! ²⁵ Poli marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale aririmangalina ateva God.”

²⁶ Taumattu ngatoa laghe nongoala, me laghe kolomiela va, “See nonga erooroo tani saanga?”

²⁷ Jesu ghe liula me ghe uela va, “Voto taumattu karika erooroo tani ghelei, God nonga erooroo.”

²⁸ Pita ghe uela etana va, “Tarala, ngami ghe kasu vulila tangueimami me peiimami tani aimuli teeio!”

²⁹ Iesu ghe uela ta ngetaira va, “Aghaaulia ngakoronna etaimim va, arova teva taumattu ekasu vuli tanganuena, manna, tuena atoa, nengana atoa, kinna me tamana me natuna atoa, mausi aririmangalina ateva God, ³⁰ aue God etau lao etana oroieili peina tale nau oia, me nau aue emae, eghaa lo ateva maulue tokatoka liu ia.”

Iesu ghe aulia ngamuemuela matemateaane

(Mat 20:17-19; Mak 10:32-34)

³¹ Iesu ghe kolo aitauaala kapuna kasangaulu ghalua (12) disaepolo, me ghe uela etaira va, “Ngita laa saesae ejerusalem, me isaa akapa inangari propete atoa laghe piti emuemuela ta Natuna ateva Taumattu ngateva aue ekoronna. ³² Aue la taue lao ta taumattu ngeleka atoa, me aue la kusiaa teeia, me kangainia, me kanusuia, la parua, me la uvi ematea. ³³ Emuli tale kotolu nau, aue etotu.”

³⁴ Aloira disaepolo atoa karika ghe maamasaanga tee inangarina. Malloeana inangari ghe aaisulia, karika laghe kilakila sa ateva Iesu ghe aaulieinia etaira.

*Tau nilooloo ateva mata salusalu ia
ghe taatarala*

(Mat 20:29-34; Mak 10:46-52)

³⁵ Nau Iesu ang ghe mae akalakalaa sio ejeriko, mata salusalu eteva ghe tokatoka tale sama salana atikirighi, uunguaane tani looloo. ³⁶ Ghe nongonongo oroieili taumattu ngatoa laghe kasukasu elangelange nongina ghe tokatoka, me ghe samala, me ghe kolomilala va sa ateva ange lutula. ³⁷ Laghe uela etana va, “Iesu aNasareti ia toko ekasukasu emaemae.”

³⁸ Me ghe kolokolo va, “Iesu, natuna io Deivit, ualousiusi teeieghi!”

³⁹ Taumattu ngatoa laghe muemue, laghe paopaoa va, “Urou mene sama.” Me karika, ta ghe mene kolokolo anamuula tani ue va, “Natuna ateva Deivit, ualousiusi teeieghi!”

⁴⁰ Iesu ghe tinginala, me ghe uela va, “Taumattu ngateva emae etaghi.” Nau ghe mae akalakalaa sio, Iesu ghe kolomiela va,⁴¹ “Sa ateva ualoanna va agheleia etam?”

Ghe liula me ghe uela va, “Vau eteva, aghaloanna tani taatara.”

⁴² Vara me Iesu ghe uela etana va, “Angu taatarala; tale kalum niaikaaia angu masinala.”⁴³ Ia arau o me ghe taatarala, me ghe aimulila ta Iesu, ghe tautau sae ararina atae God. Nau taumattu ngatoa laghe taraiela, ila tee laghe tau saela ararina atae God.

19

Iesu me Sakies

¹ Iesu ghe ssola eJeriko, me ang ghe mene aainasiaa tani kasu.

² Kateva taumattu ghe tokatoka okae, ararina atae ta Sakies, namuu ia ta lo atoa uunguaaira tani ghaa takis, me tue peipeiena ia.³ Ghe aloanna tani tara va Iesu saa taumattu ia, me karika ghe roroo, ta poli tukunaaili ia, me oroieili taumattu ngatoa.⁴ Liuna avalua o me ghe ilou emuemuela me ghe saela ai eteae ta ghe kilakila va Iesu aue ghe mae avalua o.

⁵ Nau Iesu ghe rekatala tale ia o ai eteae, ghe taatara saela, me ghe uela va, “Sakies, kkure parasi sio mae, ta ghaine atani laa toka teeo tanganuem.”⁶ Gharavaea nonga ta ghe kkure siola, me ghe masimasieiliila me ghe kolola Iesu va lalu lao tanganuena.

⁷ Nau taumattu ngatoa laghe tara avaluela o, laghe tiuaala tani auliulieinia tani uue va Iesu ange lao sio tani toka tee tau ssavoto ateva.

⁸ Sakies ghe tingina saela me ghe uela ta Iesu va, “Vau eteva, aue ataula kasina peighi ta lo atoa karika righi peiira. Me arova aghe kamekame me aghe ghaaghhaa peiira taumattu ngatoa, aue aliu ghaatiaata.”

⁹ Iesu ghe uela etana va, “God ange asaangila taumattu tale lo ateva oia ale, poli ia tee taumattu ngateva oia, tuvuna ia Abraham.¹⁰ Poli Natuna ateva Taumattu ngateva ghe sio mae tani pae me asaangi taumattu ghe rauela.”

Kiukiu niaimatoongana tale

10 tau ngai nonganongo anna

(Mat 25:14-30)

¹¹ Nau eteva laghe nonganongo isaa o inangari Iesu ghe aauliaa, me ghe mene tiuaala tani auliaa kateae kiukiu niaimatoongana, ta poli ang ghe reerekata eJerusalem, me taumattu ngatoa laghe annaa va Iesu aue ekingi tale ia arau o nau eteva.¹² Ghe uela va, “Kateva namuu ghe lao sio tale patunganue namuu masau tani ghaa ninamuu va ekingi, me auena emene kiri mae.¹³ Ghe kolola kasangaulu (10) kapuna tau ngai nonganongo anna me ghe tau lao sio kativilau gol koen* ta kateva kateva etaira. Me auena ghe kasu, ghe uela etaira va, ‘Am uungu tani mene saoaa mene righi lomose ta amene kiri mae.’

19:7: Luk 15:2. **19:8:** Eks 22:1; Nam 5:6-7. **19:9:** Apos 16:31; Luk 13:16. **19:10:**

Luk 15:4; Jon 3:17; 1 Tim 1:15. * **19:13:** gol koen Tale inangari nge Grik, mina. Kateva mina erooroaa aipolipoli ta kotolu ulana.

14 "Taumattu ngatoa tale masalikina atae karika laghe masimasieiniela, me laghe suula kasina etaira tani laa auliaa va, 'Karika ami aaloanna va ierai enamuu etaimami.'

15 "Me karika, ta ghe ghaala ninamu ngateae va ekingi, me ghe kiri lao sio tanganuena. Ghe kolola kapuna tau ngai nonganongo anna kasangaulu me tani tara va ngila ghe uunguaala mene righi viliki veu tani saoaa tale llo laghe ghaa akasinala o karika.

16 "Aitiutiu eteva ghe lao sio me ghe uela va, 'Namu ngateva, unem gol koen ativilau, aghe uunguaala me aghe mene ghaala kasangauluvilau.'

17 "Vauna ateva ghe liula va, 'Masi uunguaam, poli ughe ghelei emasinala tale pisike niuungu, aue uitaraa kasangauluae masaliki taatara.'

18 "Aiaaghalua ateva ghe lao sio me ghe uela va, 'Namu ngateva, unem gol koen ativilau, aghe uungula me aghe mene gheleila ghalimavilau.'

19 "Me ghe uela etana va, 'Me io, aue uitaraa ghalimae masaliki taatara.'

20 "Mene kateva kapuna tau ngai nonganongo anna ghe lao sio me ghe uela va, 'Unem gol koen ativilau toko. Aghe suumi elokoiola tale tuku tapiri kalio ateva. 21 Aghe matautainiola ta io karika masi taumattu io, unim ghaaghhaa voto karika kalum, me unim mukemuke voto karika ughe pasala.'

22 "Namu ngateva ghe liula me ghe uela etana va, 'Aue uaisakei tale isaa o inangari uaauliaa, io sesa tau ngai nonganongo anna io. Ughe kilakila va aghi karika masi taumattu ieghi, anim ghaaghhaa voto karika kalughu, me anim mukemuke voto karika aghe pasala. 23 Vaalua me karika ughe alokoi ssola uneghi viliki veu tale ale aialokoi viliki veu eteva? Me nau eteva ngaghe kiriiaa mae sio aue aghele ghaa tee llo laghe saoaa saela tee me llo aghe tau aatu.'

24 "Me ghe auliaala ta lo atoa laghe tiitingina akalakala va, 'Am ghaa vella unna gol koen ativilau, me am taue lao ta lo ateva ghe ghaala kasangauluvilau gol koen.'

25 "Laghe uela va, 'Namu ngateva, ia ang ghe ghaala kasangauluvilau!'

26 "Me ghe liula me ghe uela va, 'Aghaauliaa etaimim va lo ateva euungu aanasa tale voto laghe taula aue la mene saoaa mene kasina, me lo ateva karika euunguaa voto laghe taula etana aue la ghaa velu saa voto isaa etana. 27 Me isaa o taumattu karika laghe aloanna va aghi akapuira kingi, am ghaaila mae me am uvi ematela emua ta ngetaghi.'"

Iesu ang ghe aakalakala eJerusalem

(Mat 21:1-11; Mak 11:1-11; Jon 12:12-19)

28 Nau eteva Iesu ghe ruula tani auliaa llo oia, me ghe kasu emuemula tani sae eJerusalem. 29 Nau eteva ang ghe aakalakala tale masaliki elua eBetpeis me eBetani tale motouru eteva la kolokolo va Oliv, ghe sungila disaepolo alua, ³⁰ me ghe uela etairarua va, "Amalu lao tale ia o masaliki eteae. Me nau amalu kipi sso tale masaliki eteae, aue amalu tara atingina natu donki eteva iriiri etingina ia, karika teva taumattu ghe sae toka ta ngetana me ghe iloueinia. Amalu pulakaia, me amalu maeainia oia. ³¹ Marova teva ekolomiemalua va, 'Vaalua me amalu puupulakaia?' amalu ue etana va, 'Vau eteva eaaloannaia.'"

³² Nau lalu ghe lao sio, lalu ghe tarala va llo Iesu ghe auliaala, ghe koronnala. ³³ Nau lalu ghe puupulakaia, tau kienaa ghe kolomilaluelua va, “Vaalua me amalu puupulaka natu donki eteva?”

³⁴ Lalu ghe liula me lalu ghe uela va, “Vau eteva eaaloannaia.”

³⁵ Lalu ghe laoainie sio ta Iesu, me lalu ghe pulela uneirarua aiaasae ngeleka epona tale ghaata kkena ateva, me laghe sausila Iesu tani sae toka sae etana. ³⁶ Nau eteva Iesu ghe iilou elaolao, taumattu ngatoa laghe aalokoi aiaasae ngeleka tapaa salana.

³⁷ Nau eteva ang ghe aakalakalaa tale voto ateva nongina salana atikirighi ghe laa siosio tale motouru eteva eOliv, ila akapaa illo atoa laghe usiusi Iesu laghe tiuaala tani masimasieili. Laghe kikkinari enamungaili tani kkauaa sae God, ta poli laghe annaa isaa o mirikol laghe tarala Iesu ghe gheleila.

³⁸ “Aue God eghelei emasina ta kingi eteva emaemae tale ararina ataeae Vau ngepona ateva!”

“Luei etoka epona liu, me ita tau sae ararina ataeae God iaaili epona!”

³⁹ Katoa elome tale ila o taumattu ngatoa Paresi ila laghe ue ta Iesu va, “Tisa, pao rungaala kapum disaepolo atoa!”

⁴⁰ Iesu ghe liula me ghe uela etaira va, “Aghaaauliaa etaimim va, marova la matua atoka, aue atu etoa la sama anamungaili tani tau sae ararighi eteae.”

⁴¹ Nau eteva ang ghe aakalakalaa me ghe taatara siola ejerusalem, ghe alousiusi teeielia. ⁴² Me ghe uela va, “Jerusalem, ghaine tale nau eteva oia aghaloanna va arova ughele kila sa ateva gheleio me ughele toka tale luei. Me karika, ta isaa o voto eaaisulia etam, me karika urooroo tani tara kila. ⁴³ Nau too emaemae aue tau ngai ssateem atoa, aue la atulu aivativati eteva, me la talieinio, me la toka rungainio tale pai ekapa. ⁴⁴ Aue la tturungio, io me taumattu ngatoa la tokatoka elome etam. Karika aue la rati etoka tiulu atu va aue emene toka saoaa ta mene tiulu, ta poli karika ughe kilala nau eteva God ghe mae sio tani sausio.”

Iesu elome tale ale manga ateva

(Mat 21:12-17; Mak 11:15-19; Jon 2:13-22)

⁴⁵ Iesu ghe ssola tale ale ngeleka atiulu tale ale manga ateva, me ghe ameti velu ghoala lo atoa laghe aaitauaa me laghe aaipoliaa elome.

⁴⁶ Me ghe uela etaira va, “Uru ngai Manga ateva eue va, ‘Aleghi eteva aue eale ailooloo sae ia,’ me ngam gheleielia va ‘aleira ale niaisulia ia tau niainao atoa.’”

⁴⁷ Nau ekapa atoa ghe aapasunga asease voto tale ale manga. Namu ngatoa ta pristi etoa me tau ngai aapasunga tale inangari nipaopao, me lo atoa laghe muemueaa taumattu ngatoa, laghe paepae salana tani uvi emate Iesu. ⁴⁸ Me karika laghe rooroo, poli taumattu ngatoa laghe aloannaaili tani nongo Iesu.

20

Nikokkolomi tale matuutulienaaane Iesu

(Mat 21:23-27; Mak 11:27-33)

¹ Kateva nau Iesu ghe aapasunga ta taumattu ngatoa elome tale ale ngeleka atiulu tale ale manga ateva, ghe poppooaa masi inangari, me namu ngatoa ta pristi etoa, tau ngai aapasunga atoa tale inangari nipaopao me lo atoa la muemueaa taumattu ngatoa, laghe mae akalakalaan sio etana. ² Me laghe uela etana va, “See ghe tau aatu sio matuutulienam, me see ghe sungiola tani mae ghelei isaa oia voto?”

³ Iesu ghe liula me ghe uela va, “Aghi tee amene kolomiem, me am liu mae etaghi. ⁴ See ghe tau lao sio matuutulienam ta Jon tani asuu, taumattu ngatoa, o God?”

⁵ Laghe ailoela me laghe uela va, “Marova ita ue va, ‘God,’ aue eue va, ‘Me vaalua me karika am ghe aaiesoaa ta ngetana?’ ⁶ Me marova ita ue va, ‘Taumattu ngatoa,’ taumattu ngakapa atoa aue la osaita tale atu, ta ila, la ghaaiesoaa va Jon propete ia.”

⁷ Me laghe liula tani ue va, “Karika ami kilakila va see ghe taula matuutulienam.”

⁸ Me Iesu ghe uela etaira va, “Aghi tee karika aue aghauliaa va see ghe tau mae sio matuutulienam etaghi.”

Kiukiu niaimatoongana tale sesa tau ngeutana atoa laghe aitaraa utani uaeni etingiu

(Mat 21:33-46; Mak 12:1-12)

⁹ Me ghe tiuala tani kiukiuaa kateae kiukiu niaimatoonga. Ghe uela va, “Kateva taumattu ghe pasala utani uaeni etingiu, ghe tau lao sio ta katoa tau ngeutana tani aitarainia, me ghe kasu emasaueilila tani laa toka see. ¹⁰ Ghe ghaala nau eteva tani pariki utani uaeni etingiu, me ghe sungila kateva kapuna tau ngai uungu tani laa ghaa righi ue uaeni tale utani uaeni etingiu, me lo atoa laghe aitaraa utana atingiu laghe uvi emamateala me laghe sungi aaoghiela; karika ghe ghaala righi voto. ¹¹ Ghe mene sungila mene kateva tau ngai uungu; me laghe mene uvi emamateala, me laghe apalataiela me laghe sungi aaoghiela; ie tee karika ghe ghaala righi voto. ¹² Aiaakotolu eteva tau ngai uungu laghe uvi saasakieiniela me laghe sau velue ghoala eleka.

¹³ “Me tau ngumana ghe nnaala va, ‘Sa ateva agheleia? Aue asungi lo ateva natughu taita aghailousiangailia, me koti aue la oneoneainia.’

¹⁴ “Nau eteva lo atoa laghe aitaraa utani uaeni etingiu laghe tarala natuna ateva tau ngumana ghe maemae, laghe aailoe va, ‘Ta oia taumattu ngateva, auena eghaa peina tamane. Ita uvi ematea, me ita, aue ita ghaa akapa utana atingiu.’ ¹⁵ Me laghe sau velue ghoala eleka me la ghe uvi emateala.

“Sa ateva tau ngumana aue egheleia ta ngetairam? ¹⁶ Aue emae me euvi emate akapa lo atoa laghe aitaraa utani uaeni etingiu, me etau lao utana atingiu ta mene kasina ppae taumattu.”

Me nau eteva taumattu ngatoa laghe nongola isaa oia inangari, laghe uela va, “Karika emene ghelei evalua o!”

¹⁷ Iesu ghe taatara lao sio etaira me ghe kolomilala va, “Isaa oia voto laghe pitila tale Uru ngai Manga ateva, malloeanina avalu tokoko?

“Ta o atu eteva tau ngai atulu ale atoa laghe ratiela
ghe aitiutiula tale atu ekapa atoa tani suei ale ateva.”

¹⁸ See ukatuu saoaa tale ia o atu eteva, aue utakotokoto. Me arova ia oia atu eteva ekatuu saoaa sae etam, aue utaputuputu.”

¹⁹ Me tau ngai aapasunga tale inangari nipaopao atoa me namu ngatoa ta pristi etoa laghe kilala va Iesu ghe auliaala kiukiu niaimatoonga mausi gheeleiaaira, me angila ghe paepae va vaalua la kuneia. Karika laghe roola, ta laghe maamatauta taumattu ngatoa.

*Tani tau lao takis ta Siisa
(Mat 22:15-22; Mak 12:13-17)*

²⁰ Tau ngalomasaanga tale inangari nipaopao atoa me namu ngatoa ta pristi etoa laghe paepae salana tani kune Iesu. Laghe suula katoa tani gheleila va voto laghe aauliaa vara mene koronna. Laghe annaa tani ghaaia tale inangari ghe aauliaa, me la rooroo tani tau lao ta Gavana. ²¹ Vara me laghe kolomiela va, “Tisa, ami kilakila va inangarim me llo uaapasunga koronna. Karika uaaimassiaa, me uaapasunga ngakoronna salane God. ²² Vaalua uannaa? Inangari nipaopao eue va masina etaita tani tau lao takis ta Siisa o karika?”

²³ Iesu ang ghe kila vella kamekameaaira taumattu ngatoa oia laghe anna tani ghelei, me ghe uela etaira va, ²⁴ “Am apasungaala tivilau viliki veu etaghi. See tootoona ateva me ararina ateeae o etana?”

Me laghe uela va, “Siisa.”

²⁵ Iesu ghe uela etaira va, “Liuna avalua o me am tau lao llo voto kanna Siisa, me llo voto kanna God am tau lao ta God.”

²⁶ Karika laghe roola tani ghaaia tale inangarina ghe aauliaa tale matavanga. Laghe soghiaala llo ghe liula me laghe paavoola.

*Matena atoa aue la totu
(Mat 22:23-33; Mak 12:18-27)*

²⁷ Sadiusi etoa, karika la ghairesoaa tale nitotu tale nimate, katoa etaira laghe mae sio ta Iesu me laghe kolomiela kateva nikokkolomi.

²⁸ Laghe uela va, “Tisa, Moses ghe pitila va, ‘Arova taita ateva emate vulu vausenna ateva, me karika teva naturirua, teva tuena o nengane taita etani ghaa vause ateva, me ealutu righi natuna lo ateva taita ang ghe matela.’ ²⁹ Ia avalua o, me ghaiitu (7) taita tue me nenga laghe tokatoka. Mua ateva ghe ghaala vause ateva, me karika teva natuna, me ghe matela. ³⁰ Aiaaghaluene ateva taita, ³¹ vara me aiaakotolu eteva ghe mene ghaala vause ateva, me ghe nim isaa avaluela o, me taita ghaiitu oio laghe mate akapala, karika laghe alutula righi aliki. ³² Airuuruu, vause ateva tee ghe matela. ³³ Isaa avalua o, me nau la totu tale nimate, nongina uauliaa, see aue evausenna ia, poli ila akapa laghe laila etana?”

³⁴ Iesu ghe liula me ghe uela va, “Taumattu tale nau etiulu oia la lailai.

³⁵ Me lo atoa Vau ngepona ateva aue etaraila va ila ghulughuluena ila va la totu tale nimate, me la toka tale nau ekapa atoa, karika aue la mene lai, ³⁶ poli karika aue la mene mate. Aue la nongina ensolo atoa. Ila natuna ila God, poli laghe totula tale nimate. ³⁷ Moses tee ghe apasungaala etaita va taumattu la matemate aue la mene totu. Tale kiukiu eteae ghe pitiela tale nau eteva ghe tarala natu ai erighi ghe ataataia, ghe uela va, ‘Vau ngepona ateva kapuna Goto ia Abraham, me kapuna Goto ia Aisiki, me kapuna Goto ia Jekop.’ ³⁸ Me God ateva, karika va kapuira ia lo atoa matena ila, karika. Kapuira ia lo atoa maulue ila, poli ta taataraane God ila akapa maulue ila.”

³⁹ Kasina tau ngai aapasunga tale inangari nipaopao laghe liula me laghe uela va, “Masinaaili, Tisa!” ⁴⁰ Me karika laghe mene roo poila tani kolomi mene righi nikokkolomi.

See tuvuna ia Mesaea?
(Mat 22:41-46; Mak 12:35-37)

⁴¹ Me Iesu ghe uela etaira va, “Vaalua me la ue va Mesaea tuvuna ia Deivit? ⁴² Poli ia Deivit ghe uela ta vuku eteva ta Sams va,

“Vau ngepona ateva ghe uela ta kapughu Vau eteva va,

“Toka siola tale pai muenna ativilau

⁴³ lomose ta aghatoka sio lo atoa la sessa teeio eeu,
me uatingina saoaa kkem etaira.”’

⁴⁴ Isaa avalua o, me Deivit ekolokoloa va kapuna Vau eteva. Vaalua me mene tuvuna ia?”

Am paniem ta tau ngai aapasunga ngatoa tale inangari nipaopao
(Mat 23:1-36; Mak 12:38-40; Luk 11:37-54)

⁴⁵ Nau eteva taumattu ngakapa atoa laghe nongonongo, me Iesu ghe uela ta kapuna disaepolo atoa va, ⁴⁶ “Am paniem tale tau ngai aapasunga atoa tale inangari nipaopao. La aloannaaili tani asae masi ghinna me nongina namu ngatoa, me la tingina kasu see, me la aloanna va taumattu ngatoa la soula tale masi inangari nongina oroi taumattu etokatoka. Me la aloannaaili tani toka tale uneira aitokatoka namu ngatoa elome tale ale nivelu eitauaa me nongina namu ngatoa la namanama. ⁴⁷ La ghaagħha aita tħaua peiira vause raue vulu etoa, me la kamekame tani għelei aluseaili nilooloo sae. Nau eteva la lao tale niaisakei, aue la għaa namungaili nimmarikana.”

21

Unna viliki veu vause ateva raue vulu ia għe taula ta God
(Mak 12:41-44)

¹ Tale ale manga ateva, Iesu ghe atangarola me għe tarala taumattu ngatoa tue peipeiena ila, laghe veluvelu viliki veu tale aikaai viliki veu eteva. ² Me għe tara teela vause ateva raue vulu ia, karikaaili righi peina, għe velu kaaila tapiri viliki veu eluevilau.* ³ Me għe uela va, “Aghaaulia ngakoronna etaimim va ia o vause ateva raue vulu ia karika peina, ange kaaila oroi viliki veu, me ngeapalala katoa. ⁴ Poli katoa oia oroieili uneira viliki veu etokatoka, me la nim vella nonga kasina tale aikaai eteva. Me ia o vause ateva karikaaili tivilau eogħi elokoila, ange kapaa ilila viliki veu eposoposo tani poli anna inana.”

Iesu għe auliaala vaalua aue la tturru ale manga ateva
(Mat 24:1-2; Mak 13:1-2)

⁵ Katoa lagħe aaruua ale manga ateva. Lagħe ue va, “Masinaaili taataraane atu, me kasina masi voto lagħe tau lao sio ta God tani amolumolu emasina ia o ale ateva.” Me Iesu għe uela va, ⁶ “Isaa o llo am aaruua — nau too emaemae karika teva atu aue etoka saoaa ta mene kateva. Aue taumattu ngatoa aue la puli reerekata isaa akpaaili oia voto.”

20:42: Sams 110:1. * **21:2:** Tale inangari nge Griķ, għaluevilau lepton. Lepton għaunaaili etivilau viliki veu, nongina kativilau toea, me 100 lepton erooroo kateva denarius. **21:3:** 2 Ko 8:12. **21:6:** Luk 19:44.

*Sesa nau me niaiuvi aue mae
(Mat 24:3-14; Mak 13:3-13)*

⁷ Me laghe kolomila va, “Tisa, aue lovisa isaa oia voto aue elutu? Me saa voto aue elutu tani apasunga va ange nauula?”

⁸ Iesu ghe liula me ghe uela va, “Am paniem teva taumattu erau mene kameam. Poli oroi taumattu aue la mae tale ararighi eteae, me la ue va, ‘Aghi Mesaea ieghi.’ Me aue la ghauliaa va nau ange mae akalakalaalaa sio, me am rau mene aimuli teeila. ⁹ Am rau mene matautu nau am nongo niaiuvi me niamakatakata. Isaa o voto etani lulu ekasina me karika la ghaaimatoonga va airuuruu tale kosa ateva, ange rekatala.”

¹⁰ Eghe mene auliaa tee lao sio etaira va, “Anua atoa aue la aiuvieinila, me ararimangali etoa tee. ¹¹ Kinatama rukeruke atoa aue la lulu tale kosa ateva. Maloo atoa aue la lulu tale kasina masaliki me sessa atoa aue la lulu. Aue niaimatoonga sesaaili me matautuna aue elutu elomarase.

¹² “Emua ta isaa akapa o voto, aue la kuneiem me aue am ghaa nimmarikana, me la laoainiem tale ale nivelu eitaua ngatoa tani aisakei, me la atokaiem tale ale mata voovoo. Aue la ghaaiem tani atinginaiem emua ta mata kingi etoa me gavana ngatoa tani aisakei, mausi ararighi eteae. ¹³ Isaa avalua o me aue eoti salaimim tani ppocaa aikaaiiaaimim ta getaghi. ¹⁴ Liuna avalua o am rau mene aimonomonosiaa va saa inangari aue am liu etaira, ¹⁵ ta aghi aue atau aatu inangari tani ppooaa me alomasaanga, me tau ngai ssateeimim atoa karika aue la roro tani liu. ¹⁶ Tamaimim me kinaimim, tueimim atoa me nengaimim atoa, me mangaliimim atoa me kapuimim atoa, ila tee aue la tauem lao ta tau ngai ssateeimim atoa, me aue la uvi emate katoa etaimim. ¹⁷ Ila akapaaili aue la ssa teeiem poli ararighi eteae. ¹⁸ Me karikaaili tikirighi uu nguruuimim aue eraua. ¹⁹ Am tingina akorokorongana, me aue am ghaa maulue ateva tokatoka liu ia.

*Iesu ghe auliaa teela vaalua aue la tturuu ejerusalem
(Mat 24:15-21; Mak 13:14-19)*

²⁰ “Nau eteva am tara ejerusalem tau niaiuvi etoa angila taatalieinia, aue am kila va ejerusalem nauna ange kalakalaala va la turungia. ²¹ Tale ia o nau eteva, lo atoa elome ejidua am ilou sae tale motouru, me see atoa elome ejerusalem am kupi ghoa me am ilou. Me see atoa am tokatoka tale paa ngutana, karika am mene kupi sso ejerusalem. ²² Poli nau tani ghaa aipolipoli tale sesa gheeleiaair ajerusalem atoa me voto laghe piti elokoila tale Uru ngai Manga ateva ange lutululu. ²³ Alousiusi ta lo atoa la suusunuku me lo atoa la sussu tale isaa o nau! Poli namungaili voto sesa tale ia o masaliki eteae, me sessaiaane God aue etoka tale isaa o taumattu. ²⁴ Katoa aue la uvi ematela tale baenata, me katoa aue la ghaaila nongina karavusu etoa tani lao tale kasina anua, anueira ativuu etoa, me aue anueira ativuu etoa la asa tau sio ejerusalem lomasina ta nauira eruu.

*Maemaeaane Natuna ateva Taumattu ngateva
(Mat 24:29-31; Mak 13:24-27)*

²⁵ “Aue niaimatootoongana aue elutu tale sinaka ateva me ulana ateva me katto atoa. Tale kosa ateva, taumattu tale anua atoa aue la

matautu me karika aue la alomasaanga tee lingi niaangarina manu eteva me manu ghagga ateva. ²⁶ Me taumattu aue ennangaili me la matautu poli la kila va voto sesa ange maemae tale kosa akapa ateva, poli God aue eghelei voto atoa korokorongana ila elomarase la ghaisisia. ²⁷ Tale ia o nau eteva aue la tara Natuna ateva Taumattu ngateva esio tale urukookoo tee sarasarakaniaane me kinatama mallangina ateva. ²⁸ Nau isaa o voto etiuua tani lutu, am tingina sae me am masimasi, poli nauna Vau ngepona tani asaangiem ange akalakalaala.”

*Kiukiu niaimatoongana tale fig ateae
(Mat 24:32-35; Mak 13:28-31)*

²⁹ Me Iesu ghe mene auliaala kateae kiukiu niaimatoongana, “Am tarala fig ateae me mene kasina tana ai. ³⁰ Nau eteva utara ange vubbuleaa uruna, angu kilala va masi nau tale sinaka ateva ange aakalakala. ³¹ Liuna avalua o me nau eteva am tara isaa o voto, aue am kila va maemaeaane Natuna ateva Taumattu ngateva nongina kingi ange aakalakala.

³² “Aghaaulia ngakoronna etaimim va ia oia vituu eteva karika poi aue ekapa me isaa o voto aue elutu. ³³ Elomarase me kosa ateva aue lalu kapa, me inangarighi eteva karika poi aue ekapa.

³⁴ “Am tani taatara amasina. Am rau mene laa ropi see sesa manu va am veeveena, me am rau mene annaa voto tale kosa ateva, ta erau gheleiem va am katuu, me am nim soghi ta ia o nau eteva erekata, ³⁵ am nannaa va karika aue emae etana. Isaa o voto aue elutu tale taumattu ngakapa atoa la tokatoka tale kosa ateva. ³⁶ Nau ekapa atoa am anguu taatara me am looloo sae va aue am sarasarakanana tani saanga tale isaa oia voto ange anna tani lutu, me am rooroo tani tingina emua ta matane Natuna ateva Taumattu ngateva.”

³⁷ Ellaa Iesu ghe aapasunga tale ale manga ateva, vara elo alai ghe sae asoaso tale motouru eteva eOliv. ³⁸ Vara elue talaua poopooa, taumattu ngakapa atoa laghe maemae tale ale manga ateva tani nongoa.

22

*Judas ghe aloannala tani taula Iesu
(Mat 26:1-5, 14-16; Mak 14:1-2, 10-11; Jon 11:45-53)*

¹ Nau nivelu eitaua ngateae tani nama verete karika righi isti etana ang ghe aakalakala, la kolokoloa va “Pasova.” ² Namu ngatoa ta pristi etoa me tau ngai aapasunga ngatoa tale inangari nipaopao laghe paepae righi salana tani ubi eisulia Iesu, me laghe maamatauta taumattu ngatoa. ³ Satana ghe kupila Jiudas la kolokoloa va Iskariot, ia tee kateva ta kasangaulu ghalua (12) disaepolo. ⁴ Liuna avalua o me ghe kasula tani laa aippooaa tee namu ngatoa ta pristi etoa me namu ngatoa ta polisi etoa, laghe aaitoiaa ale manga ateva, va vaalua erooroo tani tau lao Iesu etaira. ⁵ Laghe masimasiangailiela me laghe uela etana va, “Aue ami tau aatu righi viliki veu.” ⁶ Jiudas ghe aloannala me ghe tiuaala tani pae righi salana tani ghelei va la kune Iesu, nau taumattu ngatoa karika ila.

*Niaipanipaniaa tale Pasova ngateae
(Mat 26:17-25; Mak 14:12-21; Jon 13:21-30)*

⁷ Ang ghe ghaala nau eteva tale nivelu eitauaa tale verete karika righi isti etana, me nau niuvi emate sipsipi, me la nama tale ia o Pasova ngateva. ⁸ Iesu ghe uela ta Pita me Jon va, “Amalu kasu me amalu laa aipanipaniaa ninamanama ateaet Pasova.” ⁹ Lalu ghe kolomiela va, “Eaa uanna va angalu laa aipanipanieinia?”

¹⁰ Ghe liula me ghe uela va, “Nau eteva amalu laa soso tale masaliki taatara ateaet, aue amalu sou taita ateva esusuunuki manu tale aikaai manu eteva. Nau eteva amalu taraia, amalu usie sso tale ale ateva. ¹¹ Me amalu ue ta lo ateva alena ateva va, ‘Tisa ngateva eanna tani kila va eaa ia rum atiulu enama inani Pasova tee kapuna disaepolo atoa.’ ¹² Me aue ia eapasunga rum atiulu, ia epona tale ale ateva namuu ia, voto akapa isaa etana. Amalu sae aipanipaniaa inana etana.”

¹³ Lalu ghe kasula me lalu ghe lao sio, me lalu ghe tarala voto Iesu ghe auliaala etairarua, me lalu ghe aipanipaniaala inana tale Pasova ngateva.

Disaepolo atoa laghe namanama teela Iesu

(Mat 26:26-30; Mak 14:22-26; 1 Ko 11:23-25)

¹⁴ Nau eteva ghe ghaala nau ninamanama, me Iesu me apostolo atoa laghe lao sio tale tevoo tani namanama. ¹⁵ Me ghe uela etaira va, “Aghaloannaaili tani namanama teeiem tale lo ateva oia Pasova, me auena aghaa nimmarikana. ¹⁶ Ta poli aghaauliaa etaimim va karika aue amene namanama tale mene teva Pasova lomose ta malloeanina koronna elutu tale ararimangalina ateva God.”

¹⁷ Iesu ghe ghaala kapa uaeni eteva, me ghe kaili emasina saela ta God, me ghe uela va, “Am ghaala, me am aikoita see elome etaimim. ¹⁸ Ta poli aghaauliaa etaimim va, karika aue amene ropi righi uaeni lomosina ta God aue eaitoia ngakapa kosa ateva.”

¹⁹ Iesu ghe mene ghaala verete ateva, me ghe kaili emasinala, me ghe pirila, me ghe tauet lao sio ta kapuna disaepolo atoa, me ghe uela va, “Isaa oia verete ateva malataughu ia, ngatautau aatu. Nau am namaia, am annainaghi nau ekapa atoa.”

²⁰ Nau laghe ruula tani namanama, tale ia o salana atikirighi, ghe mene ghaala kapa ateva airopiropi ia, me ghe uela va, “Ia oia ouna ateva inangari niaippooa ngaitauaa tale raeghi eteva aue eakalaa etaimim.

²¹ Me lo ateva aue etaeueghi lao ta tau ngai ssateeghi etoa, ie tee oia tale tevoo ateva. ²² Ta poli Natuna ateva Taumattu ngateva aue elao nongina God ghe uela va elao, me alousiusi ta lo ateva ange tautau velua.” ²³ Me laghe tiuala tani aikolomieinila va see etaira ange gheelei evalua o.

See aue tani namuu?

²⁴ Karika masau, me angila ghe mene aissakeana tee ninamu ngateae va see etaira aue tani namuu. ²⁵ Iesu ghe uela etaira va, “Kapuira kingi etoa tau ngeleka atoa, la gheelei taumattu enim uungu aanasa etaira, me lo atoa la aitarainila, la ghaaloanna va taumattu ngatoa la asaesae arariira. ²⁶ Me am, karika am mene ghelei nongina ila la gheeghelei. Ta lo ateva etaimim namuu ia, etani sio euu nongina teva aliki, me lo ateva emuemuaa niuungu, etani nongina teva tau ngai nonganongo anna.

²⁷ Am annaa va, see tani namuu ia? Lo ateva etokatoka tale tevoo me enamanama, o lo ateva ekaakaisi anna inana? Lo ateva etokatoka tale

tevoo me enamanama. Aghi atokatoka elome etaimim nongina tau ngai nonganongo anna ateva.²⁸ Am, am ghe toka teeieghila, nau aghe ghaala nitootoonga.²⁹ Me nongina Tamaghi ghe tau mae sio ararimangalina ateva tani aitarainia, ngamene tautau aatu ararimangali eteva etaimim tani aitarainia.³⁰ Liuna avalua o me aue am namanama me am ropi tale uneghi tevoo ateva tale ararimangalighi eteva, me aue am toka tale uneira aitokatoka namu ngatoa, me am ghelei niaisakei tale kasangaulu ghalua (12) ararimangali nge Israel.”

*Iesu ghe uela va Saemon Pita aue eue va karika ekilakilaia
(Mat 26:31-35; Mak 14:27-31; Jon 13:36-38)*

³¹ Vara me Iesu ghe mene uela va, “Saemon, Saemon, aghaauliaa etam va Satana ange kolomila va etootoongainam nongina la sausau kirikiri uit.³² Me aghe looloo saela mausim Saemon, va unem niaikaiaa karika emene katuu. Me nau eteva ukiriaa mae etaghi, uakorokorongana nengam atoa.”

³³ Pita ghe liula ta Iesu me ghe uela va, “Vau eteva, aghi aaipanipaniaa tani usio tani lao tale ale mata voovoo me tani mate teeio.”

³⁴ Jesu ghe liula me ghe uela va, “Aghaauliaa etam Pita, va auena paolo ateva taita ia eaangari elopai, aue uue akasina kotoluaata va karika ukilakilaieghi.”

³⁵ Vara me Iesu ghe kolomilala va, “Ia o nau eteva aghe sungiemla tani laa ppooaa masi kiukiu, me karika am ghe ghaala righi aikaai viliki veu, me aikaai ghinna, o aiaasae tale keke, am ghe annala mene righi voto?”

Laghe liula me laghe uela va, “Karika.”

³⁶ Me ghe uela etaira va, “Isaa oia arova righi uneimim aikkaai viliki veu, am ghaa tee me uneimim aikkaai ghinna, me arova karika righi iemaimim baenata, am tau uneimim aiaasae ngeleka ateva me la polia, me am poli iemaimim.³⁷ Ta poli Uru ngai Manga ateva eue va, ‘Laghe ioi teeielia va, ie tee sesa taumattu ia,’ me aghaauliaa etaimim va, isaa o voto aue elutu etaghi. Nongina saa voto laghe pitila va aue elutu etaghi, ange maemae ta ekaurekati ekapa.”

³⁸ Disaepolo atoa laghe ue va, “Vau eteva, tarala, ghalua toko bae-nata.”

Me ghe uela etaira va, “Ange roola.”

*Iesu ghe looloo sae tale motouru eteva eOliv
(Mat 26:36-46; Mak 14:32-42)*

³⁹ Iesu ghe kopi ghoala me ghe mene saela tale motouru eteva eOliv tani mene looloo sae nongina arau ghe gheeghelei, me disaepolo atoa laghe usiela.⁴⁰ Nau eteva laghe laa sae rekata, ghe uela etaira va, “Am looloo sae va karika am mene katuu tale nitootoonga.”⁴¹ Me ghe kasu vulilala, me ghe lao tee sio, maamasauaane nongina ughele osaosa tiulu atu, me ghe suuiaa siola patu kkena me ghe tiuala tani looloo sae.⁴² Ghe looloo sae avalua toko va, “Tamaghi, arova uanna, ughaa velu kapa nimmarikana ateva etaghi. Me ughelei nongina aloaloannaam, me karika va aloaloannaaghi.”⁴³ Ensolo ateva ghe kasula epona liu ghe sio mae tani akorokoronganaia.⁴⁴ Iesu ghe ateateaala maamatana namungaili, me karika ghe aamaomao tani looloo sae. Ghe aaupaka,

me aupaka ateva ghe akaakalaa sio tale kosa ateva tani nonginaaili rae ateva.*

⁴⁵ Ghe tingina saela nau eteva ghe ruula tani looloo sae, me ghe lao sio ta disaepolo atoa, me ghe tarailala va laghe aseasekanua, poli nialousiusi ghe ghelei emangoolala. ⁴⁶ Ghe kolomilala va, “Vaalua me am aseasekanua? Am anguula, me am looloo sae va karika am mene katuu tale nitootoonga.”

Judas ghe aitauaala Iesu

(Mat 26:47-56; Mak 14:43-50; Jon 18:3-11)

⁴⁷ Nau ghe tingina aippooaa me tana taumattu ngatoa laghe rekatala. Jiudas, kateva ta kasangaulu ghalua (12) disaepolo, ghe muemueinila. Ghe mae akalakalaa sio ta Iesu, tani ngusua. ⁴⁸ Me Iesu ghe uela etana va, “Aghaalousiusi teeio Jiudas, ta vara umene ngusungusueghi tale masi niaingusu, me karika ta angu aaitauaa Natuna ateva Taumattu ngateva ta tau ngai ssateena atoa.”

⁴⁹ Nau eteva lo atoa laghe tiitingina tee Iesu laghe tarala sa ateva aue elutu, me laghe uela va, “Vau eteva, erooroo va ami aiuvii tale baenata?”

⁵⁰ Me kateva etaira ghe sai patela talingana muenna ativilau kapuna tau ngai nongonongo anna ateva namu ngateva ta pristi etoa.

⁵¹ Iesu ghe uela va, “Ange roola!” Me Iesu ghe tulila talingana taumattu ngateva, me ghe mene masinala.

⁵² Iesu ghe uela ta namu ngatoa ta pristi etoa, me polisi etoa laghe aitaraa ale manga ateva, me lo atoa la muemueaa taumattu ngatoa, laghe mae sio tani kuneia va, “Am annaa va aghi amuemua tau niainao atoa, va am mae sio tee tuku ngai me baenata tani kuneieghi? ⁵³ Me isaa o nau ekapaaili aghe tokatoka teeiem tale ale manga ateva, me karika am ghe kunkuneieghi? Nau eteva oia ange nauimmi iela, nau eteva sarasarakaniaa saurrom ateva ange muemueinamla.”

Pita ghe uela va etam kilakila Iesu

(Mat 26:57-58, 69-75; Mak 14:53-54, 66-72; Jon 18:12-18, 25-27)

⁵⁴ Laghe kuneiela, me laghe kasueiniela. Laghe laoainie sio tale alena ateva namu ngateva ta pristi etoa. Pita ghe aaimuli, me masuaeili ia etana. ⁵⁵ Katoa taumattu laghe gheleila kura ataeelome elome tale valavalaa ataeae, me laghe toka taliaala etana. Me Pita ghe toka teeila siola.

⁵⁶ Vause ateva tau ngai nongonongo anna ia ghe taraiela ta ghe tokatoka nongina kura ataeae ghe ramerame, me ghe tara sossolainiela, me ghe uela va, “Ia tee, ia o taumattu ngateva ghe kasukasu teeia.”

⁵⁷ Pita ghe ssakeaala me ghe uela ta vause ateva va, “Karika poi akilakilaia.”

⁵⁸ Karika masauna arighi me mene kateva ghe taraiela, me ghe ue etana va, “Io tee kateva etaira.”

Me Pita ghe uela ta taita ateva va, “Karika va aghi tee.”

⁵⁹ Kateva aoa ghe lange sio me kateva etaira ghe mene uela va, “Koronnaaili, ia oia taumattu ngateva ghe usiusia, ta ie tee aGalilii ia.”

⁶⁰ Me Pita ghe uela ta taumattu ngateva va, “Karika akilakila sa ateva uaaulieinlia.” Nau eteva ghe tingina aippooaa me paolo ateva taita ia ghe aangarila. ⁶¹ Vau eteva ghe kiriela me ghe taatara lao sio ta Pita, me Pita ghe annaala inangarina Vau eteva ghe auliaala etana ghe uela

* **22:44:** Kasina uru ngai laghe pitila, karika laghe pitila ves 43-44. **22:54:** Mak 14:53-54.

va, "Ghaine auena paolo ateva taita ia eaangari, aue kotoluata uue va utam kilakilaieghi." ⁶² Liuna avalua o me ghe kipi ghoala, me ghe ngala alousiusieiliila.

*Lo atoa laghe aaitoiaa Iesu laghe piipilosia
(Mat 26:67-68; Mak 14:65)*

⁶³ Lo atoa laghe aaitoiaa Iesu laghe tiuaala tani pilosia, me laghe uviuvia. ⁶⁴ Laghe sum rungaala matane, me laghe kookolomia va, "Uauliaa inangarina God va see ange posalaiola." ⁶⁵ Me laghe aauliaa oroieili inangari karika masina tani auliaa teeia.

*Iesu ghe tinginala emua ta kansolo atoa
(Mat 26:59-66; Mak 14:55-64; Jon 18:19-24)*

⁶⁶ Nau eteva ghe paila, namu ngatoa me namu ngatoa ta pristi etoa me tau ngai aapasunga ngatoa tale inangari nipaopao, laghe toka aitauaala me laghe ssoaala Iesu etaira. ⁶⁷ Me laghe uela va, "Arova Mesaea io, uauliaa etaimami."

Me Iesu ghe liula me ghe uela va, "Arova aghauliaa etaimim, karika poi aue am aiesoaa etaghi. ⁶⁸ Me arova aghele kolomiem va vaalua nannaaimim tale Mesaea, karika poi aue am ghele liu. ⁶⁹ Me nau too emaema karika masau me aue Natuna ateva Taumattu ngateva aue etoka tale pai muenna ativilau ta God ateva sarasarakananaili ia."

⁷⁰ Laghe kolomiela va, "Ia avalua o, me io Natuna io God?"

Ghe liula me ghe uela va, "Ngam auliaala va aghi Natuna aghi God."

⁷¹ Laghe uela va, "Sa ateva inangari ita mene laa pae ta mene righi taumattu? Ta angita tani nongola ta paane."

23

*Laghe laoaa sio Iesu ta Paelat
(Mat 27:1-2, 11-14; Mak 15:1-5; Jon 19:28-38)*

¹ Vara me ila akapa kansolo atoa laghe tingina saela me laghe kasueiniela, laghe laoainie sio ta Paelat. ² Me laghe tiuaala tani auliaa teeia. Laghe ue va, "Ngami ghe tarala taumattu ngateva etiitiuaa ppae kasina ninanna tani ghelei saasakiaa tokatokaa taumattu. Karika ealoanna va ami tau lao takis ta Siisa, me eue va ia Mesaea ngateva, kingi ia."

³ Paelat ghe kolomila Iesu va, "Io kapuira kingi io aJiu etoa?"

Iesu ghe liula me ghe uela va, "Ue, nongina uaauliaa."

⁴ Paelat ghe auliaala ta namu ngatoa ta pristi etoa me taumattu ngatoa va, "Karika ngatarala righi sesa gheeleiaane taumattu ngateva oia."

⁵ Me laghe aaulia ngasarasarakanava, "Ekasukasu ekapa see oia ejjudia, me etiitiuaa voto sesa tale voto aapasunga tale taumattu ngatoa. Ghe tiuaala eGalilii me ange mae sio eriere."

Paelat ghe suu tau lao sio Iesu ta King Herot

⁶ Tale nonganongoaane Paelat tale isaa o voto, ghe kolomila va, "Taumattu ngateva oia aGalilii ia, o karika?" ⁷ Nau eteva ghe kilala va Iesu ghe tokatoka tale pai etivilau King Herot ghe aitarainia, ghe sungi tau lao sio ta Herot. Isaa o nau, Herot ghe sae mae ejerusalem.

⁸ Nau eteva Herot ghe tarala Iesu, ghe masimasieiliila, ta poli ang ghe aloanna vella tani taraia. Poli tale uunguaane ghe nongonongo, me ghe aloannaaili tani taraia eghelei righi mirikol. ⁹ Eghe kolomiela tale oroi nikokkolomi, me Iesu karika ghe liu poila. ¹⁰ Namu ngatoa ta pristi etoa me tau ngai aapasunga ngatoa tale inangari nipaopao laghe tiitingina, laghe aauliaa teeia inangari sarasarakananaili. ¹¹ Herot me kapuna tau ngai uvii etoa laghe piipilosia, laghe kangkainia, me laghe amolumolu emasinaailiela, me laghe sungiela ghe mene lao sio ta Paelat. ¹² Ia o nau eteva, Paelat me Herot lalu ghe aikapukapuaala, poli nau too ang ghe lao sio lalu ghe aaisessaii.

Paelat ghe uela va Iesu emate

(Mat 27:15-26; Mak 15:6-15; Jon 18:39-19:16)

¹³ Paelat ghe kolo aitauaala namuu ta pristi etoa, namu ngatoa me taumattu ngatoa. ¹⁴ Me ghe uela etaira va, “Am maeara sio taumattu ngateva oio etaghi poli am ue va ia etiitiuaa ppa kasina ninannaa tani ghelei saasakiaa tokatokaa taumattu. Ghe tiitingina emua etaimim me aghe kolomiela kasina nikokkolomi, me aghe tarala va karika righi gheeleiaane sesa. ¹⁵ Ta nim nongina Herot ange sungi aaoghie mae sio etaita. Am taatara va karika righi sesa gheeleiaane va eghaa nimate. ¹⁶⁻¹⁷ Liuna avalua o anim parua, me atau velua.”*

¹⁸ Katengaata nonga ta laghe aiovavao ngalokoila tani ue va, “Uka-suua taumattu ngateva ona, me utau velu Barabas emae etaimami!”

¹⁹ (Barabas laghe atokaie ssola tale ale mata voovoo, ta poli ia ghe muemua niamakatakata tale masaliki taatara, me ghe aiuvi ematela.)

²⁰ Poli aaloannaane tani tau velu Iesu, Paelat ghe mene kolo taula taumattu ngatoa. ²¹ Me laghe ovaova atingina me laghe ue va, “Ayukalaie saela tale aikotoo!”

²² Aiaakotonna ghe mene uela etaira va, “Poli saa? Sa ateva voto sesa taumattu ngateva oio ghe gheleila? Karika ngaghe tarala righi gheeleiaane sesa va emate, liuna avalua o aparua me atau velua.”

²³ Laghe ovaova me laghe akorokorongana va esae vukala tale aikotoo. Uneira niaore ghe koronnala. ²⁴ Paelat ghe nnaala va eaimuli tee aaloannaaira. ²⁵ Ghe tau vella taita ateva laghe aloannaiela ghe tokatoka tale ale mata voovoo mausi ghe muemua niamakatakata me ghe aiuvi ematela, me ghe taula Iesu tale aloannaaira.

Laghe avukala saela Iesu tale aikotoo

(Mat 27:32-44; Mak 15:21-32; Jon 19:17-27)

²⁶ Nau eteva tau ngai uvii etoa laghe kaakasueinia elaoelao, laghe kune atokala Saemon atala nge Saerini ia, ghe rekata sae mae me ghe aloanna tani sso tale masaliki taatara atae. Me laghe tau lao sio aikotoo ateva etana va esaua, me eaimuli tee Iesu. ²⁷ Oroieili taumattu ngatoa laghe aaimuli tee Iesu, me elome etaira vause atoa laghe aalousiusi teeia.

²⁸ Iesu ghe kiriela me ghe uela etaira va, “Vauseni nge Jerusalem atoa, am rau mene alousiusi teeieghi. Am alousiusi teeiem me natuim atoa. ²⁹ Ta poli kateva nau ae emae, ae am ue va, ‘Nimasimasi tale vause

* **23:16-17:** Kasina uru ngai laghe pitila, laghe uela va 17 Me etani tau velu kateva taumattu elao etaira tale nivelu etaua ngateae la kolokoloa va Pasova. **23:29:** Luk 21:23.

atoa kina ngere ila, lo atoa karika righi natuira, me lo atoa karika laghe sussu.’³⁰ Tale isaa o nau,

“Aue la kolo motouru etoa va, “Am katuu saoaala etaimami!”
me saesaena atoa va, “Am akouemamila!”’

³¹ Taumattu ngatoa la gheelei teeieghi, me karika aghe gheleila righi voto sesa. Alousiusi etaimim arova auena la gheelei teeiem, poli am ghe gheleila voto sesa.”

³² Mene ghalua taumattu, gheeleiaairarua sesa, laghe ghaa teeilaluela tani laa uvi ematelalua. ³³ Nau eteva laghe lao sio tale voto ateva la kolokoloa va “Voto ateva arova Riu uru taumattu ngateva” etana, tale ia o voto ateva laghe avukalaie saela tee lo alua gheeleiaairarua sesa, kateva tale pai muenna ativilau, me kateva tale pai uaise ativilau. ³⁴Iesu ghe uela va, “Tamaghi, ukkaluaa, ta poli karika la kilakila va voto ateva la gheeleia sesaaili ia.”† Me tau ngai uvii etoa laghe tiuuala tani anamisi tani aikoita ghinnanina.

³⁵ Taumattu ngatoa laghe tingina taatara, me namu ngatoa laghe attara teeia. Me laghe ue va, “Ghe asaangila katoa, tau veluela me easaangia, kotiva kapuna Mesaea ia God, me God ghe suitoongainiela.”

³⁶Tau ngai uvii tee atoa laghe saela, me laghe piipilosia, me laghe tau lao sio manu eteva sarasarakania ia, ³⁷ me laghe ue va, “Kotiva kapuira kingi io ajiu etoa, uasaangio.”

³⁸Epona etana laghe pitila tuku inangari eteva va, “Ierai oia kapuira kingi ia ajiu etoa.”

³⁹Kateva ta lo alua gheeleiaairarua sesa ghe aauliaa tee Iesu va, “Karika io va Mesaea io? Uasaangio me uasaangi teeengalua!”

⁴⁰Mene kateva ghe sessaiela tani nongo, me ghe uela va, “Karika umaamatauta God? Poli kateva nonga ia aipolipoli eteva angita ghaaiela. ⁴¹ Italua, italu ghaaghha aipolipoli tale gheeleiaitalua sesa. Me ia oio taumattu ngateva karika righi sesa gheeleiaane!”

⁴² Vara me ghe uela va, “Iesu, unnaingagi nau eteva umae tale ararimangalim ateva.”

⁴³Iesu ghe liula me ghe uela va, “Aghaaulia ngakoronna etam, ghaine angu toka teeieghila tale umana utana atingiu God.”

Matemateaane Iesu (Mat 27:45-46; Mak 15:33-41; Jon 19:28-30)

⁴⁴Pai ngelo sinaka ativilau‡ ghe mae sio, me saurrom ateva ghe akou ekapala kosa ateva lamosina ta 3 kilok elo alai,§ ⁴⁵ta poli sinaka ateva ghe saurromienala tale ia o voto ateva. Me kalio atiulu ghe vuuvukala tale ale manga ateva ghe tarriila me ghe ghaluevilaula. ⁴⁶Iesu ghe sama anamuula me ghe uela va, “Tamaghi, maamauluaghi ngatautau aatu ta nimam.” Nau eteva ghe auliaala llo me ghe ainoana aruula me ghe matela.

⁴⁷Kapuira namu ngateva tau ngai uvii etoa ghe tarala isaa o voto ghe lutula, ghe tau saela God me ghe uela va, “Koronna, ia oia taumattu ngateva tau ghulughuluena ia.” ⁴⁸Oroi taumattu laghe mae sio laghe

23:30: Osea 10:8; Aotu 6:16. **23:34:** Sams 22:18. † **23:34:** Kasina uru ngai laghe pitila, karika laghe pitila isaa oia inangari. **23:35:** Sams 22:7-8. **23:36:** Sams 69:21. ‡ **23:44:** 3 kilok elo alai Tale inangari nge Grik, ta aiaaghasiona (9) ateva aoa. § **23:44:** 3 kilok elo alai Tale inangari nge Grik, ta aiaaghasiona (9) ateva aoa.

23:45: Hib 6:19-20; 10:19-20.

tarala sa ateva ghe lutula, laghe aalousiusi me laghe kasula. ⁴⁹ Me lo atoa laghe kilakilaia me vause atoa laghe usiela arau eGalilii laghe tiitingina amasau, me laghe tarala sa ateva ghe lutula.

Laghe kaiāala Iesu

(Mat 27:57-61; Mak 15:42-47; Jon 19:38-42)

⁵⁰ Kateva taita, ararina ataeae ta Josep, ia kateva ta kansolo atoa me masi taumattu ia me ghulughuluena ia, ⁵¹ karika ghe lao aitauaa tee sio nannaaira kansolo atoa laghe nnaala me voto laghe gheleila. Tanganuena tale masaliki taatara ataeae eArimatia, kateae uneira masaliki taatara ajiu etoa. Me ghe toitoi tani tara ararimangalina ateva God. ⁵² Ghe lao sio ta Paelat me ghe kolomila Iesu etana. ⁵³ Me ghe ghaaiela me ghe sumuela tale kalio, me ghe alokoielaa tale lienga ataeae laghe kai essola tale atu. Karika laghe alokoi poi teva taumattu etana. ⁵⁴ Nau eteva oia nau niaimonomonosiaa ia, me nau manga ateva ang ghe aakalakalaa.

⁵⁵ Vause atoa laghe mae aitauaa tee sio Iesu eGalilii laghe mene usila Josep, laghe tarala lienga ataeae, me laghe tarala vaalua laghe alokoie ssola. ⁵⁶ Vara me laghe lao sio tanganueira, laghe aimonomonosiaala voto masi ngusungusuaane. Me laghe ainoanala tale nau manga ateva nongina inangari nipaopao eaauliaa.

24

Iesu ghe mene totula

(Mat 28:1-10; Mak 16:1-8; Jon 20:1-10)

¹ Me tale aitiutiu eteva nau, elue talaua poopooa, vause atoa laghe ghaala voto masi ngusungusuaane laghe aimonomonosiaala me laghe lao sio tale lienga niaikkaia ngateae. ² Me laghe tarala atu eteva angila ghe atakiri veluela nongina laghe atingina rungaala atamani lienga niaikkaia ngateae. ³ Laghe kupi ssola me karika laghe tarala Vau eteva Iesu. ⁴ Laghe tingina nannaa, vara me laghe tarala taita alua lalu ghe tiitingina akalakalaa etaira, mallanga ateva tale ghinnaniiraru. ⁵ Vause atoa oia laghe matautula, me laghe tturru siola tapaa kosa, me taita alua oia lalu ghe uela etaira va, ‘Vaalua me am paepae taumattu sakesake nongina taumattu matena? ⁶ Karika ia oia; ange totula! Am rooroo tani annaa nongina ghe auliaala etaimim nau eteva ghe tokatoka arau eGalilii. ⁷ Ghe uela etaimim va, ‘Aue la tau lao Natuna ateva Taumattu ngateva ta nimaira tau ngai ghelei ssavoto atoa, me aue la avukalaie sae tale aikotoo ateva, me aue kotonna ateva nau aue emene totu.’ ⁸ Me laghe nnaala isaa oia inangari Iesu ghe auliaala.

⁹ Me laghe kasu vulila lienga niaikkaia ngateae. Nau eteva laghe kiriaa lao sio, laghe kiukiuaala isaa oia voto ta kasangaulu kateva (11) disaepolo, me mene katoa taumattu. ¹⁰ Meri aMakdala ia, Joana, me Meri kinna Jeimis, me mene kasina vause, laghe auliaala isaa oia voto ta apostolo atoa. ¹¹ Me laghe nannaa va vause atoa laghe auliaa kapa atoa, me karika laghe aiesoala inangariira. ¹² Vara me Pita ghe tingina saela me ghe ilou lao sio tale lienga niaikkaia ngateae, ghe turruaa siola me ghe tarala nonga kalio, me ghe oghiaa lao sio tanganuena, me ghe nnangailiila isaa o voto ghe lutula.

*Nikasu tani lao Emmaus
(Mak 16:12-13)*

¹³ Ie nonga o nau eteva ghalua tana kapuna Iesu lalu ghe laolao tale kateae masaliki la asease va Emmaus, erooroo kasangaulu kateva (11) kilomita* tani kasu ejerusalem me tani lao etana, ¹⁴ me lalu ghe kiukiuaa isaa akapa oia voto ghe lutula. ¹⁵ Lalu ghe aaikolomi me lalu ghe kiuki, me Iesu ghe sokotilaluelu me ghe kasu eitauaa teeilaluelu; ¹⁶ God ghe ghelei rungainilaluelu va lalu rau mene tara kila Iesu.

¹⁷ Iesu ghe uela etairarua va, “Sa ateva amalu kiukiueinia nau eteva amalu kasukasu emaema?”

Lalu ghe tinginala, me taatarairarua ghe alousiusinnala. ¹⁸ Kateva etairarua, ararina atea ta Kliopas, ghe liula me ghe uela etana va, “Koti io nonga kateva taumattu ejerusalem karika ukilakila saa voto ghe lutula isaa to nau ang ghe lao sio, no?”

¹⁹ Iesu ghe kolomilaluelu va, “Saa voto?”

Lalu ghe liula me lalu ghe uela va, “Voto ghe lutula ta Iesu aNasareti ia. Ia oia taumattu ngateva propete ia, me inangarina me gheeleiaane sarasarakan ta matane God me taumattu ngatoa. ²⁰ Kapuita namu ngatoa ta pristi etoa me mene katoa tau ngai toitoi laghe tau veluela me laghe ubi emateala tale aikotoo. ²¹ Ami ghe nannaa va ia oia taumattu ngateva ue ghe ghaa oghi ita aIsraeli etoa! Me tee, ghaine ange kotonna atevala nau isaa oia voto ghe lutula. ²² Me tee, katoa kapuimami vause la asoghisoghiemamila; nau la siola nongina laghe alokoila Iesu, ²³ me karika la taraiela. La oghila, me la uela va la tara nongala ensolo alua, me ensolo alua lalu uela va ange totula. ²⁴ Me katoa kapuimami la lao sio nongina laghe alokoila Iesu, me la tarala va koronna llo vause atoa la ghauliala, poli karika la taraiela.”

²⁵ Me Iesu ghe uela etaira va, “Alokapakapa iemalua? Aanasaaaili iemalua tani aiesoaa voto akapa propete atoa laghe auliaala! ²⁶ Karika amalu kilakila va Mesaea etani ghaa mua nimmarikana tale isaa o voto me auena ekupi sso tale mallangina ateva?” ²⁷ Vara me Iesu ghe kiri tau lao sio etairarua saa voto laghe auliaala ekiukiueinia elome tale Uru ngai Manga akapa ateva. Etiitiuaa tale unna vuku Moses me voto propete atoa laghe pitila.

²⁸ Vara angilotolu ghe reerekata tale masaliki eteae lalu ghe laolao etana, me Iesu ang ghe gheelei va ghe kasu vulilalua. ²⁹ Me angilalu ghe gheelei rungarungainia tani ue va, “Ita ghaso. Sinaka ateva ange laa siosio, me ghaisa ngarighi evoo.” Me ghe kupi ssola tani toka teeilalua.

³⁰ Nau eteva ghe toka aitauaa teeilalue siola tale tevoo ateva, ghe ghaala verete, ghe kaili emasinala, ghe pirila me ghe tiuaala tani tau lao etairarua. ³¹ Me matairarua ghe otila, me lalu ghe tara kilaiela, me ghe aikapakapaaillla tale taatarairarua. ³² Me angilalu ghe aikolomieinilalua va, “Karika va isaa oia voto eatatala tale urunguitaniitalua nau eteva esamasama teeitalua tapaa salana me nau ekiri tau mae sio Uru ngai Manga ateva etaitalua.”

³³ Arovaeangaili ta lalu ghe tingina saela me lalu ghe kiriaa siola ejerusalem. Me lalu ghe tarala kasangaulu kateva disaepolo me mene katoa kapuira taumattu laghe tokatoka aitauaa ³⁴ me laghe ue va,

* **24:13:** kasangaulu kateva (11) kilomita Tale inangari nge Grik, 60 stadia. **24:21:** Luk 19:11; Apos 1:6. **24:24:** Jon 20:3-10. **24:26:** Luk 9:22. **24:27:** Sams 22:1-21; Ais 53. **24:34:** 1 Ko 15:4-5.

“Koronna! Vau eteva ange totula me erekataala ta Saemon.” ³⁵ Me taita alua lalu ghe kiukiuaala sa ateva ghe lutula tapaa salana, me vaalua lalu ghe tara kilala Iesu nau eteva ghe pirila verete.

Iesu ghe rekataala ta disaepolo atoa

(Mat 28:16-20; Mak 16:14-18; Jon 20:19-23; Apos 1:6-8)

³⁶ Nau eteva laghe toka kiukiuaa isaa o voto me katengaata ta Iesu ghe tingina polakila elome etaira, me ghe uela etaira va, “Luei aue etoka atitauaa teeiem.”

³⁷ Laghe soghila me laghe matautula, ta laghe annaa va laghe tarala raroaina ateva Iesu. ³⁸ Ghe uela etaira va, “Vaalua me am soghila? Vaalua me nannaaimim eghaaghalaua?” ³⁹ Am tarala nimaghi me kekeghi. Aghi oia! Am posoaghila me am tara; raroai eteva karika righi malatauna me riuna, nongina aghi!”

⁴⁰ Nau eteva ghe auliaala voto oia me ghe apasungaala nimane me kekena. ⁴¹ Laghe masimasieiliila me laghe soghila tani tara Iesu, me karika laghe aaiesoaa va voto laghe tarala koronna, me Iesu ghe kolomilala va, “Righi aneimim inana?” ⁴² Laghe tau lao sio tuku kko arighi laghe tungi esaela tale kura, ⁴³ ghe ghaaiela, laghe taatara me ghe namaelia.

⁴⁴ Ghe uela etaira va, “Isaa oia voto ngaghe auliaala etaimim nau eteva aghe tokatoka teeiem. Isaa akapa voto laghe piti elokoila elome tale kanna inangari nipaopao Moses, propete atoa me Sams, etani lutu ekoronna.”

⁴⁵ Me ghe otira nannaairaa va la tara kila Uru ngai Manga ateva.

⁴⁶ Ghe uela etaira va, “Isaa o voto laghe piti elokoila va: Mesaea aue emmarikana me aue emate, me aue emene totu tale nimate tale kotonna ateva nau, ⁴⁷ me aue la ppooaa ninna ngaioghioghiaa tale ararina ateae, me nikkaluaa tale uunguua ssavoto, aue erooa ngakapa kosa ateva, etiuaa ejerusalem. ⁴⁸ Am oia am ghe tarala me aue am ppooaa isaa oia voto. ⁴⁹ Aghi aue asungi tau aatu sa ateva Tamaghi ghe aulieiniela tale inangari nialokoi; am toka arau oia tale masaliki taatara ateae lomose ta am ghaa sarasarakana aue ekasu epona liu.”

Iesu ghe saela epona liu

(Mak 16:19-20; Apos 1:9-11)

⁵⁰ Vara me ghe kasueinilala, me laghe lao sio eBetani, ghe atingina saela nimana epona me ghe arangiseilala. ⁵¹ Nau eteva ghe aarangi-seila, me ghe kasu vulilala me God ghe ghaiae saela epona liu. ⁵² Me laghe kkaueiniela, me laghe oghi lao sio ejerusalem tee nimasimasi. ⁵³ Laghe nim tokala o tale ale manga ateva me laghe tautau sae ararina ateae God.

Masi kiukiu Jon ghe pitiela Inangari emuemua

Jon kateva ta kasangaulu ghalua (12) disaepolo, me easeasea va “lo ateva disaepolo Iesu ghe ailousieinia”. Ghe pitila masi kiukiu tale ia oia vuku eteva poli ghe aloannala va taumattu la aiesoaa ta Iesu me la ghaa maulue ateva tokatoka liu ia (20:31). Jon epoppoaa Iesu va Inangari eteva, ghe tokatoka tee God emua arau.

Jon karika ghe pitila teva kiukiu niaimatoonga, ta ghe pitila kasina mirikol Iesu ghe gheleila, me easeasela va “niaimatoongana atoa”, me ghe pitila voto Iesu ghe apasungaala etaira. Ghe pitila oroeili inangari tale saa voto Iesu ghe apasungaala ta kapuna disaepolo atoa tale ia o voo ngateva laghe kuneiela, me oroi voto ta Spirit Manga ateva. Jon eaauliaa va ghe tarala Iesu nau ghe matela, me ghe mene taraiela nau ghe totula tale nimate.

Tani kila amuemua

Aitiutiu inangari 1:1-18

Iesu ghe uungu me ghe apasunga 1:19–12:50

Taumattu ngatoa laghe aaulia ngaotu Iesu 1:19-51

Aitiutiu tale uunguaane Iesu 2:1–4:54

Niaimatoongana atoa me taumattu la sessa tee Iesu 5:1–7:52

Vause ailai salosalooa eteva 7:53–8:11

Iesu ghe apasungaala me ghe gheleila niaimatoongana atoa 8:12–10:42

Iesu ghe totula Lasarus tale nimate, me ghe ssola eJerusalem 11:1–12:50

Matemateaane me tottotuaane Iesu 13:1–20:31

Airuuruu eteae ninamanama tee Iesu 13:1-30

Iesu ghe apasungaala ta disaepolo atoa 13:31–16:33

Iesu ghe looloo sae mausi disaepolo atoa 17:1-26

Laghe kunela Iesu, laghe gheleila niaisakei, me Iesu ghe matela 18:1–19:42

Tottotuaane Iesu 20:1-31

Iesu, Pita me Jon 21:1-25

Inangari eteva ghe taumattula

¹ Emua arau, nau karika righi voto ghe lutu, Inangari eteva ghe tokatoka. Ghe tokatoka tee God, me ie tee Goto ia. ² Emua arau, ia ghe tokatoka tee God.

³ Tale ia o Inangari eteva God ghe ghelei ekapala voto. Karika righi voto God ghe gheleila aue ghe lutu arova Inangari eteva karika ia.

⁴ Maulue ateva etokatoka ta ngetana, me maulue ateva, mallangiira ia taumattu ngatoa. ⁵ Ia o mallanga ateva, elallaa tale saurrom ateva, me saurrom ateva karika erooroo tani ghelei epalaia.*

1:1: Jon 17:5; 1 Jon 1:1-2; Aotu 19:13. **1:3:** 1 Ko 8:6; Kol 1:16-17; Hib 1:2. **1:4:** Jon 5:26.

1:5: Jon 3:19. * **1:5:** tani ghelei epalaia o tani tara kilaia.

⁶ God ghe suula taumattu ngateva, ararina atea ta Jon. ⁷ Ghe mae sio tani auliaa mallanga ateva oia ta taumattu ngatoa, poli ghe aloanna va ila akapa la ghairesoaa inangarina. ⁸ Jon karika va mallanga ia. Ia ghe nim mae sio tani ppooa ngaotu inangarina mallanga ateva. ⁹ Mallanga ateva koronna ia ghe sso mae tale kosa ateva, me emaamallanga tale taumattu ngakapa atoa.

¹⁰ Ia o Inangari eteva ghe tokala oia tale kosa ateva, me arongona ta God ghe gheleila kosa ateva tale ia o Inangari eteva, me karika teva ghe kilakilaia. ¹¹ Ghe tani mae sio tanganuena, me kapuna atoa karika laghe aikoloainiela. ¹² Katoa tana taumattu laghe aikoloainiela, me laghe aiesoaaala etana, me tale ararina atea. Liuna avalua o, me ghe tau lao sio niavauvau eteae va ila natuna ila God. ¹³ Karika va natuna ila God tale raeira taumattu ngatoa, me aloannaaira taita atoa me vause atoa, me nannaa taita atoa. Nim ia God ghe gheleilala va natuna ila.

¹⁴ Inangari eteva ghe taumattula, me ghe toka teeiemamila. Ami ghe tarala naanamunganiaane ateva tale ie nonga o Natuna ateva, Tamana ghe sungiela. Ia pasu ia tale maamasinaane me inangari koronna.

¹⁵ Jon ghe aulieiniela nau ghe sama anamungailila me ghe uela va, “Ia oia taumattu ngateva aghe aaulieinia va ue emae. Ia namuu ia etaghi, me aghi ghauna aghi etana, poli ia ghe tokala arau, me avirina aghe lutula.” ¹⁶ Poli pasu ia tale maamasinaane, liuna avalua o me ita ghaaghhaaseasee niarangise. ¹⁷ Poli God ghe tau lao sio inangari nipaopao ta Moses, me Moses ghe tau mae sio etaita, me Iesu Karisto ghe tau lao sio maamasinaane me inangari koronna. ¹⁸ Karika poi teva ghe tara God. Natuna nonga, ia koronna ia va Goto ia me kalakalanginaaili ia ta Tamana, ia ghe apasungaala etaita va God vaalue ia.

*Jon tau ngai aasuu ia ghe aulia ngaotula Iesu
(Mat 3:1-12; Mak 1:2-8; Luk 3:15-17)*

¹⁹ AJiu etoa laghe suula pristi etoa me Livae[†] atoa eJerusalem tani laa kolomi Jon va ia see. ²⁰ Jon karika ghe aisuliaala etaira, me ghe uela etaira va, “Karika aghi va Mesaea ieghi.”

²¹ Laghe mene kolomiela va, “Io Elaija?”

Ghe liula me ghe uela va, “Karika.”

Me laghe mene kolomiela va, “Io Propete io?”

Ghe mene liula me ghe uela va, “Karika.”

²² Vara me laghe uela etana va, “Me uue va io see? Me ami laa ghauliaa ta lo atoa la sungiemamila tani mae kolomi va io see.”

²³ Jon ghe liula tale inangarina propet Aisaea ghe uela va, “Aghi lingi ngalo taumattu ngateva ekolokolo tale voto ateva karika righi taumattu etokatoka etana ghe ue va, ‘Ghelei eghulughuluenal salane atikirighi Vau eteva.’” ²⁴ Elome tale lo atoa laghe lao sio tani kolomi Jon, katoa etaira Paresi ila. ²⁵ Laghe kolomiela va, “Vaalua me uaasuu taumattu me karika va Mesaea etam, karika va Elaija etam me karika va Propete io?”

²⁶ Jon ghe uela etaira va, “Aghi aghaasuuem tale manu, me kateva elome etaimim karika am kilakilaia. ²⁷ Arongo ta aghi aghe muuemue

1:6: Mat 3:1; Luk 1:13-17, 76. **1:9:** Jon 8:12. **1:13:** Jon 3:3-6; 2:11; 1 Pita 1:23. **1:14:**

Plp 2:7. **1:17:** Eks 34:28; Rom 6:14. **1:18:** Eks 33:20; Jon 6:46; 1 Tim 6:16. [†] **1:19:** Livae

Livae etoa laghe saasausi tani uungu tale ale manga ateva. **1:21:** Diut 18:15, 18; Mat 11:14.

1:23: Ais 40:3. **1:27:** Jon 1:15.

mae sio, me karika masi taumattu ngieghi tani pulaka velu oasa tale unna aikasukasu elua, ia aue eaimuli etaghi.”

²⁸ Isaa o voto ghe lutula eBetani tale pai kativilau eJodan, nongina Jon ghe aasuu.

Natuna sipsipi eteva God

²⁹ Mene kateva nau me Jon ghe tarala Iesu ghe maemae aloi etana me ghe uela va, “Am tarala! Taumattu ngateva oia, natuna sipsipi ia God! Ia aue eghaa velu ssavoto tale kosa ateva. ³⁰ Ia aghe aulieiniela etaimim, nau aghe ue va, ‘Kateva taumattu aue emae, ia namuu ia ta gettaghi, poli ghe tokala arau, me avirina aghe lutula.’ ³¹ Karika aghe kilala va ia see, ta anim aasuu taumattu tale manu va aue alraeli etoa la taraia.”

³² Jon ghe aulia ngaotula ta taumattu ngatoa, ghe uela va, “Aghi tee okae, me aghe tarala Spiriti eteva ghe kasula epona liu nonginaaili va ghila ateva valusu ia ghe mae sio toka etana. ³³ Karika aghe kilala va ia see, ta lo ateva ghe sungieghila tani asuuem tale manu eghe uela etaghi va, ‘Aue utara Spiriti eteva esio toka tale kateva taumattu, me aue ukila va ia o taumattu ngateva aue easuuem tale Spirit Manga ateva.’ ³⁴ Aghi aghe tarala isaa o voto ghe lutula. Liuna avalua o me aghaauliaa etaimim va ia Natuna ia God.”

Aitiutiu etoa kapuna disaepolo Iesu

³⁵ Mene kateva nau Jon me ghalua tana kapuna disaepolo latolu ghe tiitingina aitauaa. ³⁶ Nau ghe tarala Iesu ghe kasukasu elaoalao me ghe uela va, “Am tarala! Ia o natuna sipsipi eteva God!”

³⁷ Ilalua o disaepolo alua lalu ghe nongola, me lalu ghe lao sio tani aimuli tee Iesu. ³⁸ Iesu ghe kiriela me ghe tarailuelu, me ghe uela va, “Sa ateva amalu aloannaia?”

Lalu ghe liula me laghe uela va, “Rabae, eaa utokatoka?” (Ta inangari nge Hibru, “Rabae” malloeanva “tisa”.)

³⁹ Iesu ghe liula me ghe uela va, “Amalu usieghila, me amalu laa tara.”

Lalu ghe usiela tani laa tara nongina Iesu ghe tokatoka. Ang ghe 4 kilokola elo alai,[‡] me laghe toka teeielava me ghe voola.

⁴⁰ Andru, nengane ia Saemon Pita, kateva ta ilalua o taumattu ngalua lalu ghe nongola Jon, me lalu ghe usila Iesu. ⁴¹ Aitiutiu eteva voto Andru ghe gheleielu, ghe kasula tani pae tuena ta Saemon Pita tani auliaa etana va, “Ngami ghe tarala Mesaea ngateva.” (Ta inangari nge Hibru, malloeanva “Mesaea” elaoalao aitauaa tee samasama nge Grik va “Karisto.”) ⁴² Andru ghe laoaa sio tuena ta Iesu. Me nau Iesu ghe taraiela, ghe uela va, “Saemon natuna io Jon. Aue la kolo ararim ateeae ta Kepas” (malloeanva ta inangari nge Grik va Pita, atu ia).

Iesu ghe kolola Pilip me Nataniel

⁴³ Vara ghe pai saela ta mene kateva nau, me Iesu ang ghe anna tani lao eGalilii. Nau ta ghe lao sio, ghe paela me ghe tarala Pilip, me ghe uela etana va, “Mae usieghi.”

⁴⁴ Pilip atala nge Betsaida ia, tanganueirarua Andru me Pita. ⁴⁵ Pilip ghe paela me ghe tarala Nataniel me ghe uela etana va, “Ngami tarala

1:29: Ais 53:6-7; 1 Pita 1:18-19. **1:30:** Jon 1:15. **1:32:** Mat 3:16. **1:34:** Mat 3:17.

1:36: Jon 1:29. [‡] **1:39:** 4 kilokola elo alai Tale inangari nge Grik, aiaakasangalua ateva aoa.

1:40: Mat 4:18-20. **1:42:** Mat 16:18. **1:45:** Diut 18:18; Ais 7:14; 9:6; Jer 23:5; Esik 34:23.

taumattu ngateva Moses ghe pitila me ghe aulieiniela tale inangari nipaopao, me propete atoa laghe piti emuemue alokoila maemaeaane, Iesu ta ngetana, natuna ia Josep aNasareti ia.”

⁴⁶ Me Nataniel ghe kolomiela va, “Righi masi voto elutululu eNasareti?”

Pilip ghe liula me ghe uela va, “Mae sio me ulaa tara.”

⁴⁷ Nau Iesu ghe tarala Nataniel ghe kasukasu emaemaetana me ghe uela va, “Tarala! Taumattu ngateva o, ia taumattu koronna ia ta aIsraeli etoa, karika egheelei me eaauliaa voto kamena.”

⁴⁸ Nataniel ghe kolomila Iesu va, “Vaalua ughe kilaieghila?”

Iesu ghe liula me ghe uela va, “Ngaghe taraiola nau Pilip ghe koloola ta ughe tokatoka tale liue fig ateae.”

⁴⁹ Me Nataniel ghe uela va, “Tisa, io Natuna io God, me io kingi nge Israeli io.”

⁵⁰ Iesu ghe liula me ghe uela va, “Uaikaaiaa etaghi poli auela va aghe taraiola ughe tokatoka tale liue fig ateae? Aue utara mene kasina voto namungaili aue elutu. ⁵¹ Aghaarulia ngakoronna etaimim va aue am tara epona liu aue eotia, me kapuna ensolo atoa God aue la siosio me la saesae ta Natuna ateva Taumattu ngateva.”

2

Nisigha ngateae eKena

¹ Ghalua nau ghe lange sio me Meri, kinna Iesu, ghe siola tale nisigha ngateae tale masaliki eteae eKena ta pai nge Galilii. ² Laghe aloanna va Iesu me kapuna disaepolo atoa la usi sio tale nisigha ngateae. ³ Nau uaeni ghe kapala, kinna ghe lao sio tani auliaa ta Iesu va, “Uaeni ange kapala.”

⁴ Iesu ghe liula me ghe uela va, “Vause ateva, urau mene auliaa voto va aghelei, ta naughu karika ghe mae.”

⁵ Kinna ghe uela ta tau ngai nongonongo anna atoa va, “Am ghelei saa voto eauliaa etaimim.”

⁶ Elome tale ale ateva, ghaonomo (6) aikaai manu laghe gheleila tale atu ghe tokatoka, uneira ajiu etoa aiporapora nau la ghaloanna tani aimuli tee uneira lo. Kateva aikaai manu erooroo tani kaai koti kateva ai (100) lita.

⁷ Iesu ghe uela ta tau ngai nongonongo anna atoa va, “Am aku kaai manu esae pasu tale aikaai manu.” Me laghe gheleila voto ghe auliaala.

⁸ Me Iesu ghe mene uela va, “Am akula righi me am laa tau ta lo ateva eaaitoiaa ninamanama ateae.” Tau ngai nongonongo anna atoa laghe gheleila voto Iesu ghe auliaala.

⁹ Taumattu ngateva ghe aaitoiaa ninamanama ateae ghe tootoongala manu ang ghe uaenila. Karika ghe kilala va eaa laghe ghaala; tau ngai nongonongo anna atoa laghe akula manu, ila nonga laghe kilala. Vara me tau ngaitoi ninamanama ateae ghe kolola lo ateva taita ghe laila, ¹⁰ me ghe uela etana va, “Ila akapa taumattu ngatoa la ghaai koita ngakasina masi uaeni, me nau taumattu ngatoa la ropiropi, me nannaaира ange aisavisavilaala, me la vira mene tautau lao llo uaeni karika tani masina. Me io, uarongi etokala masinaaili uaeni, me angu vira mene maeaa sio.”

11 Ia o niaimatoongana ateva Iesu ghe gheleiela, aitiutiu ia tale isaa akapa niaimatoonga. Ghe gheleiela eKena ta pai nge Galilii. Tale ia o nau eteva Iesu ghe apasungaala sarasarakaniaane, me kapuna disaepolo atoa laghe aiesoala etana.

12 Vara me Iesu ghe kasula eKena me ghe siola eKapenium, ia, kinna, nengane atoa me kapuna disaepolo atoa. Laghe tokala kasina nau tale ia o masaliki eteae.

Iesu ghe ameti vella taumattu ngatoa laghe poppoli me laghe aitauaa voto tale ale manga ateva

(Mat 21:12-13; Mak 11:15-17; Luk 19:45-46)

13 Nivelu eitauaa ta nau Pasova uneira ajiu etoa ang ghe aakalakalaa, liuna avalua o me Iesu ghe saela eJerusalem. 14 Ghe tarala taumattu ngatoa elome tale valavala atea ale manga ateva, laghe aitauaa me aipoliaa vulumakao me sipsipi me valusu. Ghe tara teela lo atoa laghe aakolikolaa viliki veu. 15 Iesu ghe ghaala uasa me ghe gheleila uip ateva, me ghe ameti velu ghoala taumattu ngatoa tale ale manga ateva, tee me kieira ghaata kkena, me ghe sau etakila uneira tevoo atoa lo atoa laghe aikolikolaa viliki veu, me uneira viliki veu ghe kao reerekataala. 16 Me ghe uela ta lo atoa laghe aitauaa ghila valusu va, “Am ghaala valusu me am kasu. Am rau mene ghelei alena ateva Tamaghi va arova maketi ia.”

17 Me disaepolo atoa laghe annaala sa ateva Uru ngai Manga ateva ghe aulieiniela, ghe uela va, “Aielousiaaghi tale alem ateva eramerame elome etaghi arova kura atea.”

18 Namuu ta ajiu etoa laghe kolomila Iesu va, “Sa ateva aimatootoongana ave ugheleia tani apasunga etaimami va io ughe ghaala matuutulienia tani ghelei isaa o voto angu gheleila ghaine?”

19 Iesu ghe liula me ghe uela va, “Am rruti ale manga ateva o, me ave aghatulua ta kotolu nonga nau.”

20 Me ajiu etoa laghe uela va, “Ghe roola ghaatingaulu ghaonomo (46) ninamanama laghe gheleila ale manga ateva, me io ave unim gheleia ta kotolu nonga nau?” 21 Ta ale manga ateva Iesu ghe aaulieinia, vilikina ia. 22 Liuna avalua o me nau God ghe totuela tale nimate, kapuna disaepolo atoa laghe nnaala inangarina ghe auliaala, me laghe aiesoala tale Uru ngai Manga ateva tee me inangari Iesu ghe auliaala.

Iesu ghe kilakila eeleiaria taumattu ngatoa

23 Nau ghe tokatoka eJerusalem tale nivelu eitaua ngateae ta nau Pasova, oroi taumattu laghe aikaiaala ta Iesu poli laghe tarala ghe gheleila niaimatoonga. 24 Iesu ghe kilakila saa voto elome tale maa-mauluaaira, liuna avalua o me karika ghe aatoka tuutulina etaira. 25 Karika teva ghe rooroo tani auliaa ta ngetana va saa taumattu ila, poli ghe kilakila urunguitaniira.

3

¹ Kateva taumattu, ararina atea ta Nikodimas, Paresi ia me namuu ia ta ajiu etoa. ² Kateva nau, nau ang ghe aitarrauiila, Nikodimas ghe lao sio tani tara Iesu, me ghe uela va, “Tisa, ami kilakila va God ghe

sungiola tani sio apasunga voto etaimami, poli karika teva erooroo tani ghelei niaimatoonga ugheelei, arova God karika etokatoka teeia.”

³ Iesu ghe liula me ghe uela va, “Aghaaulia ngakoronna etam va, karika teva erooroo tani kupi sso tale ararimangalina ateva God, arova karika etam lutu ppae.”

⁴ Me Nikodimas ghe kolomila va, “Vaalua aue lo ateva taumattu ang ghe namuula emene lutu? Erooroo tani kupi sso ta kova kinna me emene lutu eghaluene?”

⁵ Iesu ghe liula me ghe uela va, “Aghaaulia ngakoronna etam va, arova uanna tani sso tale ararimangalina ateva God, utani lutu tale manu me Spiriti eteva. ⁶ See elutululu tale taumattu, taumattu ia, me see elutululu tale Spiriti eteva, spiriti ia. ⁷ Urau mene soghiaa inangarighi nau aue va, ‘Am tani lutu ppae.’ ⁸ Kuukuu eteva ekuukuu ekapa see tale voto ealoanna tani lao etana. Arongona ta urooroo tani nongoa, me karika ukilakila va eaa ekasukasu me eaa elaoalao. See elutu tale Spiriti eteva, ia nongina kuukuu eteva, karika teva erooroo tani tara kilaila.”

⁹ Me Nikodimas ghe kolomila Iesu va, “Vaalua isaa o voto aue elutu?”

¹⁰ Iesu ghe liula me ghe uela va, “Vaalua me io tau ngai aapasunga io ta Israeli atoa, me karika ukilakila isaa o voto? ¹¹ Aghaaulia ngakoronna etam va ami, ami kilakila sa ateva ami aaulieinia poli ngami ghe tarala. Karika teva etaimim aue ealoanna voto ami aauliaa. ¹² Arova am tam aiesoaa nau aghaauliaa etaimim voto oia tale kosa ateva, vaalua aue am ghele aiesoaa nau aghele auliaa voto epona liu? ¹³ Karika teva ghe sae epona liu. Natuna ateva Taumattu ngateva nonga ghe kasula epona liu, me ghe sio mae tale kosa ateva. ¹⁴ Nongina Moses ghe avukala saela katu ngateva tale voto ateva karika righi taumattu etokatoka etana, Natuna ateva Taumattu ngateva aue esae vukala, ¹⁵ tani tau lao maulue ateva etoka nau ekapa atoa ta lo atoa aue la ghaikaaiaa ta Natuna ateva Taumattu ngateva.”

¹⁶ Poli God ghe aaielousiangaili taumattu tale kosa ateva oia, liuna avalua o me ghe tau mae sio Natuna ateva, kateva nonga ia, me see aue eaikaaiaa etana karika aue emate, ta aue eghaa maulue ateva etokatoka nau ekapa atoa. ¹⁷ Karika va God ghe suula Natuna tani sio tale kosa ateva oia tani ghelei niaiskei ta taumattu tale kosa ateva. Ghe sungiela tani sio asaangi taumattu. ¹⁸ Lo ateva eaikaaiaa ta getiana, karika aue eghaa sesa aipolipoli tale niaiskei, me lo ateva etam aikaaiaa ta getiana aue evira ghaa sesa aipolipoli tale niaiskei, ta poli karika eaikaaiaa tale ararina ateeae Natuna ateva God. ¹⁹ Niaiskei eteae ia avalua toko: Mallanga ateva ghe mae sio tale kosa ateva, me taumattu ngatoa la gheloanna saurrom, me karika la gheloanna mallanga, poli gheeleiaira sesa. ²⁰ Lo atoa taumattu la gheelei voto sesa la tam maamasiaa mallanga ateva, me karika la gheloanna tani mae etana, poli mallanga ateva eaapasunga voto la gheelei. ²¹ Me lo atoa la tokatoka tale voto koronna, aue la lao tale mallanga ateva, poli la ghaaloanna va mene katoa taumattu la kila va voto la gheelei God egheelei taula.

3:3: Mat 18:3; 1 Pita 1:23. **3:5:** Esik 36:25-27. **3:6:** Jon 1:13. **3:14:** Nam 21:9; Jon 8:28; 12:32. **3:15:** Jon 20:31. **3:16:** Jon 3:36; 10:28; Rom 5:8; 8:32; 1 Jon 4:9-10. **3:17:** Luk 19:10. **3:18:** Jon 5:24. **3:19:** Jon 1:5, 9; 8:12.

Iesu me Jon tau ngai aasuu ia

²² Vara me Iesu me kapuna disaepolo atoa laghe siola ejiudia, ghe toka teeilala, me ghe aasuu taumattu. ²³ Jon tee ghe aasuu taumattu tale voto ateva la kolokolo Aenon ta ngetana, kalakalaa tale masaliki eteae eSalim, poli ia o voto ateva manu ia. Me oroi taumattu ghe mae sio ta Jon, me Jon ghe asuulala. ²⁴ (Isaa o nau Herot karika ghe atoka sso Jon tale ale mata voovoo.) ²⁵ Vara me kapuna disaepolo atoa Jon me kateva tana ajiu laghe tiuaala tani aissakeana tee saa tikirighi salana nisuu me naporapora la usilaa nau la ghaloanna tani aimuli tee uneira lo. ²⁶ Kapuna disaepolo atoa Jon laghe lao sio ta Jon me laghe uela etana va, “Tisa, taumattu ngateva ghe toka teeiola ta pai kativilau tale ateo ateae eJodan me ughe aauliaa kiukiuna, ia oia ange aasuu taumattu, me ila akapa ngeila laolao ta ngetana.”

²⁷ Jon ghe liula me ghe uela va, “Karika teva taumattu erooroo tani ghaa righi voto, arova God epona liu etam anna va eghaa. ²⁸ Am ghe nongoaghila nau aghe ue etaimim va, ‘Karika va aghi Mesaea ieghi. Aghi God ghe sungieghila tani muemueainia.’ ²⁹ Nau taita ateva elailai vause ateva, lalu lai me ia aue vausenna ia. Me lo ateva taita euiiuitnesi, ie tee emasimasi nau enongonongo kapuna ateva elailai, nongina aghi nimasimasi eteva elome etaghi namungaili ia. ³⁰ Emaamasina va ararina ateae esae epona, me ararighi eteae esio euu.”

³¹ Lo ateva ghe kasula epona liu me ghe sio mae, ia epona, me elaulau isaa akapa voto. Taumattuna kosa ateva oia egheelei gheeleiaa kosa ateva, me eaauliaa voto tale kosa ateva. Me lo ateva ghe kasula epona liu, ia epona tale taumattu ngakapa atoa. ³² Eaauliaa poi voto ghe tarala me ghe nongola, me karika teva eaaiesoaa inangarina. ³³ Me lo ateva eaaiesoaa inangarina eaapasunga va God koronna ia. ³⁴ Poli lo ateva God ghe sungiela eaauliaa inangarina God, me God ghe tau lao sio Spiriti eteva etana, karika erooroo tani kapa. ³⁵ Tamane eaailousiaa Natuna, liuna avalua o me ghe taula isaa akapa voto ta ngetana. ³⁶ Lo ateva eaikaaiaa ta Natuna, maulue ateva aue etoka liu etana. Lo ateva etam nongo usilainia, karika aue eghaa lo ateva o maulue, me God sessaiaane etana aue etoka nau ekapa atoa.

4

Iesu me vauseni nge Sameria ngateva

¹ Iesu* ghe kilala va Paresi etoa ngeila ghe nongola va ia ang ghe ghaagħha oroi taumattu tani asuu, me Jon karika. ² Me karika va Iesu ghe aasuu, ta kapuna disaepolo atoa.

³ Iesu ghe kasu vulila ejiudia, me ang ghe mene laa saesae eGalilii. ⁴ God ghe aloanna va eusilaa salana atikirighi esosso elome eSameria. ⁵ Ghe kasukasu elao lao me ghe rekatala tale masaliki eteae la kolokoloa va Sika eSameria, kalakalangina ia tale tuku kosa ateva Jekop ghe tauet lao sio ta natuna ta Josep emua arau. ⁶ Ateo kaikai eteae Jekop ghe kaiela ghe asoaso tale masaliki eteae Iesu ghe kasukasu elao lao etana. Vara me

3:22: Jon 4:1-2. **3:28:** Jon 1:20; Mat 11:10. **3:31:** Jon 8:23. **3:32:** Jon 3:11. **3:35:** Mat 11:27; Jon 5:20. **3:36:** Jon 3:16-18; 1 Jon 5:12. **4:1:** Jon 3:22. * **4:1:** Iesu Kasina uru ngai laghe pitila, laghe uela va Vau eteva. **4:5:** Aitiuti 33:19; Jos 24:32.

ang ghe maamangoo poli ghe kasula tale aluse salana, me ghe toka siola kalakalangina tale ateo kaikai eteae. Ang ghe pai ngelo sinakala.[†]

⁷ Kateva vauseni nge Sameria ghe mae sio tani aku, me Iesu ghe uela etana va, “Aku tau mae sio righi manu, me aropi.” ⁸ (Kapuna disaepolo atoa laghe ssola elo masaliki tani poli inana.)

⁹ Vauseni nge Sameria ngateva ghe uela etana va, “Io ajiu io me aghi vauseni nge Sameria ngaghi. Vaalua me ulooloo manu etaghi?” (Ghe auliaala llo poli ajiu etoa me aSameria ngatoa karika laghe samasama aitauaa.)

¹⁰ Iesu ghe liula me ghe uela va, “Arova ughele kila masi voto God eanna tani tau aatu, me ughele kila tee lo ateva ekookolomio tani ropi, aue ughele kolomia tale llo ateo etautau mae maulue.”

¹¹ Me vause ateva ghe uela va, “Namu ngateva, karika teva unem aiakueku, me ateo atea sio liuna ia, me eaa aue ulaa ghaaia lo atea ateo etau mae maulue? ¹² Tuvuimami eteva ta Jekop ghe kaiela ateoimami eteae oia, me natuna atoa me kieira ghaata kkena atoa laghe roapiropi etana. Koti io namuu io ta Jekop, va?”

¹³ Iesu ghe liula me ghe uela va, “Lo atoa aue la ropi tale ia oia ateo kaikai eteae, aue la mene aloanna tani ropi. ¹⁴ Me lo ateva eropi tale ateo atea aghi aue atauela, karika aue emene kangngata tani ropi. Lo atea ateo aue atauela aue etoka etana nonginaaili lo atea ateo enim toka akaakalaa me karika ematimati, me aue etaula maulue ateva karika ekapakapa.”

¹⁵ Me vause ateva ghe uela ta Iesu va, “Namu ngateva, utau mae ia o ateo atea, me auena arau mene aloanna tani ropi va amene mae aku oia.”

¹⁶ Me Iesu ghe uela etana va, “Lao sio me ulaa kolo taitanim ateva, me amalu mae.”

¹⁷ Me vause ateva ghe uela va, “Karika teva taitanighi.”

Me Iesu ghe uela va, “Uaulia ngakoronna va karika teva taitanim. ¹⁸ Poli angu ghe ghaa muela ghalima taita, me lo ateva taita utokatoka teeia karika va taitanim ia. Liuna avalua o me inangarim uauliaa koronnaaili.”

¹⁹ Me vause ateva ghe uela va, “Namu ngateva, ngakilala va io propete io. ²⁰ Tuvuimami etoa la kakkaua tale ia o motouru eteva, me am ajiu etoa, am ue va masaliki nikkaua ngateae eJerusalem.”

²¹ Iesu ghe uela etana va, “Uaiesoaa inangarighi va aue kateva nau ta isaa to nau emaema karika aue am kkaua Tamaita ateva tale ia o motouru eteva me eJerusalem. ²² Am aSameria ngatoa, karika am kilakila see am kaakaueinia. Ami ajiu etoa, ami kilakila God ateva ami kaakaueinia, poli ta ajiu etoa aue niasaangi emae. ²³ Me nau ie emaema me ange rekatala va Spiriti eteva kanna ia God aue eghelei taumattu la rooroo tani kkaua God tale koronna. Tamaita ateva ealoanna va isaa o ase taumattu la kaeinia. ²⁴ God spiriti ia, me lo atoa la kaakaueinia, Spirit Manga ateva ekaakatulainila tani kkaua tale voto koronna.”

[†] **4:6:** pai ngelo sinaka Tale inangari nge Grik, ghaonomina (6) ateva aoa. **4:9:** Esra 4:1-5. **4:10:** Jon 7:37-38; Aotu 21:6. **4:12:** Jon 8:53. **4:14:** Jon 6:35. **4:20:** Diut 12:5-14; Sams 122:1-5. **4:22:** 2 Ki 17:29-41; Ais 2:3; Rom 9:4-5. **4:24:** 2 Ko 3:17; Rom 12:1; Plp 3:3.

²⁵ Me vause ateva ghe uela va, “Akilakila va Mesaea ngateva aue emae (la kolokoloa va Karisto etana). Nau emae aue eaulia ngamasinaaili ekapa voto etaimami.”

²⁶ Me Iesu ghe uela etana va, “Aghi oia asamasama, aghi oia taumattu ngateva uaaulieinia.”

²⁷ Isaa o nau me kapuna disaepolo atoa ngila ghe kiriaala, me laghe soghiala tani tara Iesu ghe samasama tee vause ateva. Me karika teva ghe kookolomia va, “Sa ateva ualoannaia?” me, “Vaalua me usamasama teeia?”

²⁸ Vause ateva ghe velu etokala ateona aikaai manu eteva, me ghe ilou ssola tale masaliki eteae, me ghe uela ta taumattu ngatoa va, ²⁹ “Am mae sio, me am laa tara taumattu ngateva, eaulia ngakapala voto agheelei. Koti ia Mesaea ia?” ³⁰ Taumattu ngatoa tale masaliki eteae laghe lao sio tani taraia.

³¹ Nau isaa o voto ghe lutulutu, me kapuna disaepolo atoa Iesu laghe ue etana va, “Tisa, namanamala mua.”

³² Iesu ghe liula me ghe uela etaira va, “Aneghi tani inana karika am kilakila.”

³³ Disaepolo atoa laghe tiuala tani aikolomieinila va, “Teva taumattu emae sio tani anginia?”

³⁴ Iesu ghe uela etaira va, “Inana anamanama nau agheelei uunguaane lo ateva ghe sungieghila, me tani ruu isaa o niuungu ghe uela va agheelei. ³⁵ Am roo tani ue va, ‘Kasi ghaata ulana me ita laa ghaa inana tale utana atingiu.’ Aghaauliaa etaimim va am taatara sso, me am tara utana atingiu ang ghele matuela, me ang ghele roola tani ghaa inanina. ³⁶ Lo ateva taumattu euungu tani ghaa inana tapaa ngutana eghaagħha arau aipolina, me eghaagħha aitaua inana aue etoka nau ekapa atoa. Liuna avalua o me lo ateva epasapasa inana me lo ateva eghaagħha, ilalua akpa lalu masimasi. ³⁷ Koronnaaili ia tuku inangari eteva eue va, ‘Kateva epasapasa, me mene kateva emukemuke.’ ³⁸ Ngasungisungiem tani laa għaa inana tale utana atingiu, katoa ppae ghe matela uunguaair etana, me am, am ghe nim ssola tani ghelei eruu uunguaair.”

³⁹ Oroi taumattu nge Sameria tale ia o masaliki erighi laghe aikaiaala ta Iesu poli vause ateva ghe uela va, “Ia oia taumattu ngateva eaulia ngakapala voto agheelei.” ⁴⁰ Laghe lao sio tani kolomi esarasarakana Iesu va emene toka teeila mua. Liuna avalua o me Iesu ghe mene toka teeilala għalua nau. ⁴¹ Ghe mene oroi ila taumattu nge Sameria ghe aikaiaala ta Iesu poli inangarina laghe nongola.

⁴² Me laghe ue ta vause ateva va, “Karika va ami aikaiaia ta Iesu poli isaa o inangari uauliaala etaimami. Ami tee ngami nongoala, me ngami kila akoronnala va ia aue easaangi taumattu ngatoa tale kosa ateva.”

*Iesu ghe ghelei emasinala natuna taita arighi kateva namuu
(Mat 8:5-13; Luk 7:1-10)*

⁴³ Iesu ghe toka teela aSameria ngatoa għalua nau, me ghe kasu vulilala tani mene sae eGalilii. ⁴⁴ Iesu ghe auliaala va, propete ateva, la oneoneainia tale kasina ppae masaliki, me tanganuena karika. ⁴⁵ Liuna avalua o, nau ghe saela eGalilii, laghe masimasila va etoka teeila, poli ila

tee laghe saela tale nivelu eitaua ngateae eJerusalem, me laghe tarala voto Iesu ghe gheleila.

⁴⁶ Nau ia eGalilii, Iesu ghe mene lao sio eKena, masaliki eteae ghe gheleila manu ghe uaenila. EKapenium, kateva namuu, kapuna tau ngai uungu ia kingi, natuna taita arighi ghe iisiki. ⁴⁷ Nau eteva ghe nongola va Iesu ang ghe kasula ejjudia me ang ghe rekatala eGalilii, ghe lao sio tani tara Iesu, me tani koloa va esio ghelei emasina natuna, poli ang ghe ainasiaa tani mate.

⁴⁸ Iesu ghe uela etana va, “Karika am rooroo tani aikaiaa, arova am tam tara niaimatoonga me mirikolo atoa.”

⁴⁹ Me taumattu ngateva ghe uela va, “Namu ngateva, italu sio tara parasi natughu, me erau mate.”

⁵⁰ Me Iesu ghe uela etana va, “Natum aue etoka. Kasula, me ulaa taraia.”

Namu ngateva ghe aiesoala inangarina Iesu, me ghe kasula.

⁵¹ Karika ghe rekata eKapenium, me kapuna tau ngai uungu etoa laghe sousouela tapaa salana tani auliaa etana va natuna ang ghe masinala. ⁵² Me ghe kolomilala va lovisa ghe masinala, me laghe uela va, “Ghalailloo ta 1 kilok[†] aanasa ateva ghele kapala.”

⁵³ Me tamane ghe kilala va ia o nau eteva ghalailloo Iesu ghele uela va, “Natum aue etoka.” Taumattu ngateva me lo atoa elome tale paa ngalena ateva, laghe aiesoala ta Iesu.

⁵⁴ Aiaaghaluene ateva o niaimatoongana Iesu ghe gheleiela nau ghe kasula ejjudia me ghe saela eGalilii.

5

Iesu ghe ghelei emasinala tangorengorena ateva

¹ Kasina nau ang ghe lao sio me Iesu ghe saela eJerusalem tale mene kateva uneira nivelu eitauaa ajiu etoa. ² EJerusalem kateae atamana laghe aseasea va Atamani Sipsipi ia. Kalakalaa tale atamana ateeae, ateo talia ngateae taumattu ngatoa laghe kaiela ghe asoaso, ghalima varandaane, me ta samasamaaira aHibru etoa laghe aseasea va Betesda.* ³⁻⁴ Oroi tau sessa ghe asoaso akalakalaa tale ia o ateo talia ngateae, katoa mata salusalu ila me katoa tangorengore ila me katoa vilikiira matena.† ⁵ Kateva taumattu ghe tangorengorela kotolungaulu ghaoaluae (38) ninamanama, ie tee ghe asoaso akalakalaa tale ateo talia ngateae. ⁶ Iesu ghe tarala ia o taumattu ngateva ghe asoaso, ghe kilala va ang ghe tangorengorela oroi ninamanama, me ghe uela etana va, “Ualoanna tani masina?”

⁷ Tangorengorena ateva ghe liula me ghe uela ta Iesu va, “Namu ngateva, karika teva tani saueghi, me elaa sau velueghi sio tale ateo talia ngateae nau eaisiisia. Vara atootoonga, me karika arooroo, ta mene katoa ppae taumattu la siosio akasina.”

⁸ Iesu ghe uela etana va, “Tingina saela, usau komom, me ukasu.”

4:46: Jon 2:1-11. **4:47:** Mat 8:5-6. **4:48:** Jon 2:18; 1 Ko 1:22. **4:50:** Mat 8:13. [†] **4:52:**
1 kilok Tale inangari nge Grik, gaituna (7) ateva aoa. ^{*} **4:54:** Jon 2:11. **5:2:** Betesda
Kasina uru ngai laghe pitila, laghe uela va, Betsata, me kasina laghe ue va, Betsaida. [†] **5:3-4:**
Kasina uru ngai nau laghe pitila, laghe ue teela va, laghe toitoi nau manu eteva ghe aisiisia. 4
Kasina nau kapuna ensolo ateva Vau ngepona ateva ghe siosio, ghe aisiisia manu eteva, me lo
atева ghe siosio akasina tale ateo talia ngateae, nau ghe aisiisia, arova saa ase isiki etana, ghe
maamasina. **5:8:** Mat 9:6.

⁹ Gharavaeaata ta taumattu ngateva ghe masinala, ghe saula komona, me ghe tiuaala tani kasu.

Isaa o voto ghe lutula tale nau manga ateva. ¹⁰ Liuna avalua o me nau ajiu etoa laghe tarala ia o taumattu ngateva ghe masinala, me laghe uela etana va, "Ghaine nau manga ateva. Karika masina tani sau komom etana."

¹¹ Ghe liula me ghe uela va, "Lo ateva taumattu eghelei emasinaieghila, euela va asau komoghu me akasu."

¹² Me laghe kolomiela va, "See ia taumattu ngateva euela etam va usau komom me ukasu?"

¹³ Taumattu ngateva ghe masinala karika ghe kilala va see ghe ghelei emasinaiela, poli oroiannaaili taumattu, me Iesu ang ghe aisavisavilainiela elome tale taumattu ngatoa.

¹⁴ Emulina Iesu ghe ssola tale ale manga ateva, me ghe paela me ghe tarala taumattu ngateva. Me ghe uela etana va, "Tarala, angughe masinala. Isaa oio nau urau nim ghelei ssavoto va llo sesaaili emene lutu ta ngetam." ¹⁵ Ghe lao sio me ghe laa ghauliaa sio ta ajiu etoa va Iesu ghe ghelei emasinaiela.

¹⁶ Liuna avalua o me ajiu etoa laghe tiuaala tani ghelei voto sesaaili ta Iesu, poli ghe gheelei isaa o voto tale nau manga ateva. ¹⁷ Iesu ghe uela va, "Tamaghi euungu me karika ghe ruu, me aghi tee auungu." ¹⁸ Ajiu etoa laghe aloannaaili tani ubi emate Iesu, poli karika va ghe gheelei laelaeaa nonga nau manga ateva, me poli ghe ue tee va Tamane ta God, ghe gheeleia va lalu ghe aairooaa me God.

Natuna ateva God namuu ia, me ie tee erooroo tani ghelei niuungu

¹⁹ Iesu ghe uela ta ajiu etoa va, "Aghaaulia ngakoronna etaimim va Natuna ateva God karika erooroo tani ghelei voto ta nannaane, ta egheelei nonga voto etaatara ta Tamane egheelei. Isaa akapa voto Tamane egheelei, Natuna tee ateva egheelei. ²⁰ Tamana eaaielousiaa Natuna, liuna avalua o me isaa akapa voto egheelei, eaapasunga etana. Me ealoanna va am soghiaa, liuna avalua o me aue emene apasunga taula mene kasina paka voto. ²¹ Nongina Tamane etottotu taumattu matena, me etautau lao maulue etaira, Natuna tee etautau lao maulue ta taumattu tale aloaloannaane. ²² Tamane karika egheelei niaisakei ta teva taumattu. Ghe taula ta Natuna va ie nonga egheelei niaisakei tale isaa akapa taumattu. ²³ Liuna avalua o me taumattu ngakapa atoa aue la tau sae ararina atuae Natuna ateva God, nongina la tautau sae ararina atuae Tamane. Lo ateva etam tautau sae ararina atuae Natuna, karika etautau sae ararina atuae Tamane, ia ghe sungiela.

²⁴ "Aghaaulia ngakoronna etaimim va lo ateva enongo inangarighi, me eaikaaiaa ta lo ateva ghe sungieghila va asio, maamauluaane aue etoka amasina nau ekapa atoa, me karika aue eghaa sesa aipolipoli tale niaisakei, poli ang ghe kasu vulila nimate, me ang ghe tokala tale maulue. ²⁵ Aghaaulia ngakoronna etaimim va aue kateva nau, me nau eteva oia ange rekatala, lo atoa taumattu laghe matela, aue la nongo lingi ngalona ateva Natuna ateva God, me lo atoa taumattu la nongoa, aue la għha maulue. ²⁶ Maulue ateva etokatoka ta Tamane, me ghe tauela ta Natuna, me maulue ateva etokatoka tee ta Natuna. ²⁷ Tamane

ghe avauvauela me ghe tau lao sio niuungu tani ghelei niaiskei tale taumattu, poli Natuna ia Taumattu ngateva.

²⁸ “Am rau mene nnangaili inangari oio aghaauliaa, poli aue nau to emaema lo atoa taumattu la asoaso tale liu, aue la nongo lingi ngalona ateva Natuna ateva Taumattu ngateva, ²⁹ me aue la totu tale liu. Lo atoa laghe gheelei masi voto, aue la totu me la ghaa maulue, me lo atoa laghe gheelei sesa voto, aue la totu me la ghaa sesa aipolipoli. ³⁰ Karika arooroo tani ghelei voto tale aloaloannaaghi. Aghaaimuli tee inangarina lo ateva ghe sungieghila. Me ia eaauliaa tau mae vaalua aghelei niaiskei. Niaiskei agheelei ghulughuluena, poli karika aghaimuli tee nannaaghi.”

Mene katoa laghe eaaulia ngaotu tee va Iesu saa taumattu ia

³¹ Iesu ghe mene uela va, “Arova aghi nonga aghaaulia ngaotu uunguaaghi me gheeleiaaghi, taumattu ngatoa la rau mene aiesoaa inangarighi aghaauliaa. ³² Mene kateva tee eaaulia ngaotu uunguaaghi me gheeleiaaghi, me akilakila va inangarina koronna.

³³ “Am ghe suula taumattu tani laa kolomi Jon, me Jon ghe auliaala voto koronna etaira. ³⁴ Aghi karika atututuli inangariira taumattu ngatoa, mausina me aghaauliaa inangari oia poli aghaaloanna va am saanga. ³⁵ Jon nongina lama atae eramerame me emaamallanga, me am ghe masimasi tani ghaa isaa o mallanga, vara karika masau me ngam ghe maamango.

³⁶ “Isaa o voto Jon ghe auliaala eaaimatoonga mae etaghi, me karika erooroo tale voto isaa oia nau agheelei. Isaa akapa o niuungu, Tamaghi ghe tau mae sio va aghelei me aruu. Isaa o niuungu agheelei eaaulia ngaotu ta taumattu ngatoa va Tamaghi ghe sungieghila tani sio oia. ³⁷ Tamaghi, ia o ghe sungieghila tani sio, ie tee eaaulia ngaotueeghi. Am karika am ghe nongo poi lingi ngalona ateva, me karika am ghe tara taataraane, ³⁸ me inangarina tee karika elome tale maamauluaaimim, poli karika am aiesoaa tale taumattu ngateva ghe sungiela, me ghe sio mae oia. ³⁹ Tale nannaaimim am annaa va inangari tale Uru ngai Manga ateva aue etau aatu maulue tokatoka liu ia, liuna avalua o me am paepae me am ritiritia. Me Uru ngai Manga ateva eaaulieinaghi, ⁴⁰ me karika am aloanna tani mae etaghi va am ghaa maulue.

⁴¹ “Karika aghanna va taumattu ngatoa la arueinaghi. ⁴² Akilakilaiem va aielousiaane ateva God karika ia etaimim. ⁴³ Aghe sio mae ta ararina atae Tamaghi, me karika am anna inangarighi, me arova teva ghele mae tale aloaloannaane, arovaeeata ta aue am ghele anna tani nongo inangarina. ⁴⁴ Vaalua aue am aikaaiaa? Poli am anna nonga va kapuimim atoa la arueinam, me karika am anna niaruaa God nonga erooroo tani tau aatu.

⁴⁵ “Karika am mene nnaa va aghi aue aghaauliaa gheeleiaaimim sesa ta Tamaghi. Ia o Moses am annaa va aue esausiem, ia aue eaaulia sesa gheeleiaaimim. ⁴⁶ Arova am ghele aiesoaa tale inangarina Moses, aue am ghele aiesoaa tee tale inangarighi, poli inangari ghe pitila eaaulieinaghi. ⁴⁷ Arova karika am aiesoaa tale inangari ghe pitila, vaalua aue am aiesoaa inangarighi?”

6

*Iesu ghe anginila 5,000 taumattu
(Mat 14:13-21; Mak 6:30-44; Luk 9:10-17)*

¹ Vara me Iesu ghe mene lao sio ta pai kativilau tale ateo talia ngateae eGalilii, mene kateae ararina ta Taiberias. ² Oroiannaaili taumattu laghe usiela, poli laghe taraiela ghe gheleila niamatoonga tani ghelei emasina tau sessa atoa. ³ Iesu ghe saela tale motouru tani toka tee kapuna disaepolo atoa. ⁴ Pasova ngateva, nivelu eitauaa ia ta ajiu etoa, ang ghe aakalakalaa.

⁵ Nau Iesu ghe atangarola me ghe tarala taumattu ngatoa laghe maemae etana, me ghe uela ta Pilip va, “Eaa ita laa ghaa verete me ita angini isaa oia taumattu?” ⁶ Ghe auliaala isaa o voto tani tootoonga unna niaikaiaa Pilip, me Iesu ang ghe kila vella sa ateva aue egheleia.

⁷ Pilip ghe uela va, “Arova ita ghele poli verete ta ghalua ai (200) silva koen,* karika aue ghele roo. Marova ita ghele taula tuku gharighi ta kateva kateva taumattu, karika aue ghele roo akapa etaira.”

⁸ Kateva kapuna disaepolo, Andru etana, tue me nenga ilalua me Saemon Pita, ghe uela ta Iesu va, ⁹ “Kateva aliki oia anna bali verete ghalima me anna kko ghalua. Me karika aue eroo tani sausi tani angini ekapa taumattu oia oroiannaaili.”

¹⁰ Iesu ghe uela ta kapuna disaepolo atoa va la ghauliaa ta taumattu ngatoa me la toka sio. Oroiannaaili rarrasa etana ia o voto ateva, me oroi tee taita atoa, ghe rooroo ghalima airari (5,000). ¹¹ Nau laghe toka siola, Iesu ghe ghaala verete, me ghe kaili emasina saela ta God, me ghe taula ta kapuna disaepolo atoa va la laa ghaikoita. Ghe ghelei evalue teela o tale kko. Me ila akapa laghe roola tale inana.

¹² Nau ghe ssoilala tani namanama, Iesu ghe uela ta kapuna disaepolo atoa va la kaai eitauaa tapiri nginana, me erau nim vulla nonga.

¹³ Disaepolo atoa laghe ghaa aisokosokoiaala tapiri nginana laghe nama vulla tale verete ghalima, me laghe kaaila kasangaulu ghaluae (12) laka isaa o inana ghe oghila ta ghe ssoilala.

¹⁴ Taumattu ngatoa laghe tarala isaa o niamatoonga Iesu ghe gheleila, me laghe ue va, “Koronna, ia propete ateva laghe uela va aue emae tale kosa ateva oia.” ¹⁵ Iesu ghe kilala va laghe anna tani gheleia va ghe kapuira kingi ia, me karika aloannaane Iesu. Liuna avalua o me ghe kasu vulilala, me ie nonga ghe saela tale motouru.

*Iesu ghe kasula epona tale manu
(Mat 14:22-27; Mak 6:45-54)*

¹⁶ Pai ngelo alai, kapuna disaepolo atoa Iesu laghe siola elamana tale ateo talia ngateae. ¹⁷ Laghe aikaaila tale paanaka ateva, me laghe tiuaala tani ose tani lao eKapenium. Ang ghe aitarrauui me Iesu ghe tam laa rekata etaira. ¹⁸ Kuukuu eteva ghe tiuaala, me ttasi eteva ghe lutula tale paamanu eteva. ¹⁹ Nau ta disaepolo atoa laghe osela ghe roola 5-6 kilomita[†] me laghe tarala Iesu ghe kasukasu epona tale paamanu eteva. Ghe kasukasu emaemae etaira me ngeila ghe maamatautu etingina. ²⁰ Me Iesu ghe uela etaira va, “Aghi oia. Am rau mene matautu.” ²¹ Me disaepolo atoa laghe vira mene masimasila tani

* **6:7:** silva koen Silva koen ativilau (denarius) aipolina kateva nau. **6:15:** Jon 18:36.

† **6:19:** 5-6 kilomita Tale inangari nge Grik, 25 o 30 stadia.

kaaia, me arovaeaata ta paanaka ateva ghe ssola elae nongina eaa laghe aloanna tani lao.

Taumattu ngatoa laghe paepae Iesu

²² Vara ghe paila ta mene kateva nau, me taumattu ngatoa elamana ta pai nge sinaka sae tale ateo talia ngateae laghe kilala va ghalailloo kateva nonga paanaka ghele vuuvukala, me nau disaepolo atoa laghe aikaaila, Iesu ghe tam aikaai teeilala. ²³ Mene katoa tani paanaka nge Taiberias laghe mae sio nongina Vau eteva ghe kaili emasinala tale verete me laghe namala. ²⁴ Taumattu ngatoa laghe tarala va Iesu me kapuna disaepolo atoa karika ila, liuna avalua o me laghe aikaaila tale isaa o paanaka me laghe lao sio eKapenium tani pae Iesu.

Iesu verete maulue ia

²⁵ Laghe laa rekata sio tale pai kativilau tale ateo talia ngateae, me laghe tarala Iesu, me laghe kolomiela va, “Tisa, lovisaa umae sio oia?”

²⁶ Iesu ghe liula me ghe uela etaira va, “Aghaaulia ngakoronna etaimim va karika am paepaeaghi poli am taatara niaimotoonga agheelei, ta nim mausi inana am namanama me esossoiem. Liuna avalua o me am paepaeaghi. ²⁷ Am rau mene uungu tani ghaa llo inana esesa. Am uungu tani ghaa lo ateva inana etautau aatu maulue etokatoka liu, Natuna ateva Taumattu ngateva aue etau aatu ia o inana ateva, poli Tamane ta God ghe anamunamungainiela tani ghelei isaa o voto.”

²⁸ Vara me laghe uela etana va, “Saa righi voto ami ghelei, me aue ami roo tani ghelei niuungu God ealoanna?”

²⁹ Me Iesu ghe liula me ghe uela etaira va, “Kateva nonga niuungu God ealoannaia, va am aikaaiiaa tale taumattu ngateva God ghe sungiela tani mae.”

³⁰ Liuna avalua o me laghe mene uela va, “Sa ateva niaimotoonga aue ughelei me aue ami tara, me ami aikaaiiaa ta getam? Me saa niuungu aue ugheelei? ³¹ Nongina tuvuimami etoa, nau ila tale voto ateva karika righi taumattu etokatoka etana, laghe namanama mena, nongina Uru ngai Manga ateva eue va, ‘Moses ghe tau lao sio inana ngepona liu eteva va la namaia.’”

³² Liuna avalua o me Iesu ghe uela etaira va, “Aghaaulia ngakoronna etaimim va karika va Moses ghe tau aatu sio isaa o verete ngepona liu. Tamaghi nonga etautau aatu lo ateva verete ngepona liu koronna ia. ³³ Lo ateva verete God etautauela, ia o taumattu ngateva ghe kasula epona liu tani tau lao maulue tale taumattu tale kosa ateva.”

³⁴ Me laghe uela etana va, “Namu ngateva, utau mae ia o verete ateva tale nau ekapa atoa.”

³⁵ Iesu ghe liula me ghe uela va, “Aghi ia o verete ateva etautaula maulue. Lo ateva emae etaghi, karika aue emaloo, me lo ateva eaikaaiiaa etaghi, karika aue eanna tani mene ropi. ³⁶ Ngaghe auliaala etaimim me ngam ghe taraiaghila, me karika am aikaaiiaa etaghi. ³⁷ Isaa akapa taumattu Tamaghi etautau mae etaghi, aue la mae etaghi, me karika poi arooroo tani sungi velu teva. ³⁸ Karika aghe kasula epona liu tani sio ghelei nannaaghi. Aghe sio mae tani ghelei nannaane lo ateva ghe sungieghila. ³⁹ Nannaane lo ateva ghe sungieghila va karika teva

ta lo atoa ghe taula mae sio etaghi emene raua. Eanna va atotula, me la ghaa maulue nau airuuruu tale kosa ateva. ⁴⁰ Aloonnaane Tamaghi va ila akapa lo atoa la tara Natuna me la ghaikaaiaa etana, la ghaa maulue ateva etokatoka nau ekapa atoa me aghi aue atotula me la ghaa maulue tale airuuruu tale kosa ateva.”

⁴¹ Vara me ajiu etoa laghe tiuaala tani olueinia tale inangari, poli Iesu ghe uela va, “Aghi verete ateva ghe kasula epona liu.” ⁴² Laghe ue va, “Taumattu ngateva oia Iesu etana, natuna ia Josep, ami kilakila tamana me kinna, vaalua me eue va ghe kasula epona liu?”

⁴³ Iesu ghe uela etaira va, “Am rau mene olueinaghi. ⁴⁴ Karika teva erooro tani mae etaghi arova Tamaghi, ia o ghe sungieghila, etam gheleia tani mae etaghi. Me arova teva emae etaghi, aghi aue atotua, me eghaa maulue tale airuuruu eteva nau. ⁴⁵ Kateva propet ghe pitila ghe uela va, ‘God aue eapasunga voto tale isaa akapa taumattu.’ Liuna avalua o me lo atoa la nongonongo usilaa Tamaghi me la ghaaghhaa alo-masaanga etana, aue la mae etaghi. ⁴⁶ Karika mene teva taumattu ghe tarala Tamaghi, ta llo nonga ateva ghe tokatoka teeia, me ghe sio mae. Nim ie nonga, me mene karika teva. ⁴⁷ Aghaaulia ngakoronna etaimim va lo ateva eaikaaiaa etaghi, maulue ateva tokatoka liu ia etokatoka etana. ⁴⁸ Aghi verete ateva etautau maulue ateva. ⁴⁹ Tuvuimim atoa laghe namala mena tale voto ateva karika righi taumattu etokatoka etana, vara me laghe matela. ⁵⁰ Me lo ateva verete ghe kasula epona liu me ghe sio mae, lo ateva enamaia, karika aue emate. ⁵¹ Aghi verete maulue ieghi, aghe kasula epona liu. Lo ateva enama ia o verete ateva aue etoka nau ekapa atoa. Me ia o verete ateva aue atauela, malataughu eteva. Aghe taue lao sio tale taumattu tale kosa ateva oia, me aue la roo tani ghaa maulue.”

⁵² Nau eteva ajiu etoa laghe nongola isaa o inangarina, ghe sessailala, me laghe ue va, “Vaalua aue etau mae malatauna, me ita nama?”

⁵³ Iesu ghe liula me ghe uela etaira va, “Aghaaulia ngakoronna etaimim va karika am rooroo tani ghaa maulue, arova am tam nama malatauna Natuna ateva Taumattu ngateva, me am tam ropi raena ateva. ⁵⁴ Lo ateva taumattu enama malataughu, me eropi raeghi eteva, aue eghaa maulue ateva tokatoka liu ia, me aue atotua, me eghaa maulue tale airuuruu tale kosa ateva. ⁵⁵ Poli malataughu eteva inana tuungia, me raeghi eteva ateo tuungia. ⁵⁶ Lo ateva enama malataughu, me eropi raeghi, etokatoka teeieghi, me aghi atokatoka teeia. ⁵⁷ Tamaghi, aitau maulue ia, ghe sungieghila tani sio, me atokatoka poli Tamaghi etautau mae maulue. Liuna avalua o me lo ateva enamaieghi, mausighi me aue eghaa maulue. ⁵⁸ Lo ateva o verete ghe kasula epona liu karika nongina lo ateva verete tuvuimim atoa laghe namaiela, me ngeila ghe matela. See enama lo ateva oia verete aue etoka nau ekapa atoa.” ⁵⁹ Isaa o inangari Iesu ghe aauliaa me ghe aapasunga tale aleira ale nivelu eitauaa ajiu etoa eKapenium.

Inangari maulue ateva

⁶⁰ Oroi ila lo atoa disaepolo laghe nongola me laghe uela va, “See aue enongo, poli aanasaaili inangari eaauliaa?”

⁶¹ Iesu ghe kilala sa ateva kapuna disaepolo atoa laghe annainia, liuna avalua o me ghe kolomilala va, "Vaalua me isaa o inangari ange ghelei saasakiaala aikaiaaimim?" ⁶² Vaalua ta arova am ghele tara Natuna ateva Taumattu ngateva ghele sae nongina ghe kasula? ⁶³ Spirit Manga nonga ateva etautau lao maulue tale taumattu. Sarasarakaniaa taumattu karika aue eghelei righi llo. Isaa o inangari aghaauliaa etaimim ekasukasu tale Spirit Manga ateva, me etautau aatu maulue ateva. ⁶⁴ Me katoa etaimim karika am aikaiaia." (Iesu ghe auliaa llo poli ang ghe kila vella va see karika aue eaikaiaia etana, me ang ghe kila teela see aue etaue lao ta nimaira tau ngai ssateena atoa.) ⁶⁵ Me Iesu ghe uela etaira va, "Mausina avalua o me aghaauliaa etaimim, va karika teva eroroo tani mae etaghi, arova Tamaghi etam gheleia tani mae."

⁶⁶ Poli isaa o inangarina Iesu ghe auliaala me oroi kapuna disaepolo laghe liula viliira ta Iesu, me laghe ruula tani usia.

⁶⁷ Iesu ghe kolomila kapuna kasangaulu ghalua (12) disaepolo va, "Am tee am aloanna tani kasu vulieghi?"

⁶⁸ Saemon Pita ghe liula me ghe uela va, "Vau eteva, ami mene lao ta see? Poli inangari maulue ateva tokatoka liu ia, ia etam. ⁶⁹ Ami aikaiaia etam, me ami kilakilaaili va io taumattu ngateva manga ia kapuna ia God."

⁷⁰ Iesu ghe liula me ghe uela va, "Am oia kasangaulu ghalue iem aghe suitoongainiema, me kateva etaimim nongina raroai eteva!"

⁷¹ Iesu ghe aauliaa Jiudas, natuna ia Saemon Iskariot, ie tee elome ta kasangaulu ghalua kapuna disaepolo, me ia aue etau lao Iesu ta tau ngai ssateena atoa.

7

Nengane atoa Iesu karika laghe aaiesoaa etana

¹ Vara me Iesu ghe kasu seela eGalilii, me karika ghe aloanna tani sae ejidua, poli ajiu etoa laghe anna tani ubi ematea. ² Nau ang ghe aakalakalaa tani velu eitauaa me ajiu etoa laghe ghelei lutu ale kamekame.* ³ Nengane atoa Iesu laghe ue etana va, "Kasula me usae ejidua, me kapum disaepolo atoa aue la tara uunguaam ugheelei. ⁴ Lo ateva eanna va taumattu ngatoa la kilaia karika eaaisulia va egheelei voto. Liuna avalua o me emasina va ughelei tale tummatavanga me kosa akapa ateva aue ekilao." ⁵ Nengane atoa laghe aulia ngavaluela o, poli ila tee karika laghe aikaiaia ta Iesu.

⁶ Iesu ghe uela etaira va, "Naughu karika ghe mae. Am nauimim etokatoka arau. ⁷ Taumattu tale kosa ateva oio karika aue la ssa teeiem. Aue esessaila nonga etaghi, poli aghaaulia ngaotu gheeleiaaira karika masina. ⁸ Am saela tale nivelu eitaua ngateae. Karika aue asae poli naughu karika ghe mae." ⁹ Ghe auliaala isaa o inangari, me ghe tokala eGalilii.

Iesu ghe lao sio tale nivelu eitaua ngateae nau laghe gheelei ale kamekame

* **6:64:** Jon 13:11. **6:65:** Jon 6:44. **6:68:** Mat 16:16. **7:1:** Jon 5:18. **7:2:** Lev 23:34.

* **7:2:** ale kamekame Ajiu etoa laghe gheelei lutu ale kamekame tani aso etana tani nnaa vaalua tuvuira atoa laghe tokatoka nau laghe kasukasu tee Moses. Utara Levitikos 23:33-43.

7:5: Apos 1:14.

¹⁰ Vara nengana atoa laghe kasula tani sae tale nivelu eitaua ngateae, me Iesu ghe vira aimulila. Kasukasuaane karika toa laghe kilaiela, ghe nim kasu einaola tani sae. ¹¹ Tale ia o nivelu eitaua ngateae, namuu ta ajiu etoa ngila ghe paepae Iesu, me laghe aikolomainie see va, “Eaa ia?”

¹² Ta polina me taumattu ngatoa ngila ghe auliulueinia. Katoa laghe ue va, “Iesu masi taumattu ia.” Me katoa laghe ue va, “Enim kamekame taumattu ngatoa.” ¹³ Karika teva ghe auliaa isaa o inangari ta mata ngoroi etoa, poli laghe maamatauta kapuira namu ngatoa ajiu etoa.

¹⁴ Laghe ghaa longotila tale ia o nivelu eitaua ngateae, me Iesu ghe tiuala tani apasunga voto ta taumattu ngatoa tale ale ngeleka atiulu tale ale manga ateva. ¹⁵ Namuu ta ajiu etoa laghe soghiaala tani nongoa, me laghe ue va, “Vaaluia me ekilakila oroi voto nau karika teva ghe apasungaala etana?”

¹⁶ Iesu ghe liula me ghe uela va, “Karika aghaapasunga nim nannaaghi. Voto aghaapasunga kanna lo ateva ghe sungieghila. ¹⁷ Arova teva eannaaili tani aimuli tee aloannaane God, aue ghele kila va voto aghaapasunga ekasukasu ta God, me karika va nim kalughu. ¹⁸ Lo ateva taumattu eauliaa nannaane enim aloanna tani ghelei ararina ataeae, me lo ateva ealoanna tani tau sae ararina ataeae lo ateva ghe sungiela, voto eaauliaa koronna, karika kamena. ¹⁹ Moses ghe tau aatu sio inangari nipaopao etaimim, me karika teva etaimim eaaimuli tee. Mausi saa me am anna tani uvi emateaghi?”

²⁰ Taumattu ngatoa laghe ue etana va, “Raroai eteva etam. See eanna tani uvio?”

²¹ Iesu ghe liula me ghe uela va, “Aghe gheleila kateva voto, me am ghe soghieiniela. ²² Moses ghe uela etaimim va am iso natuimim taita atoa (karika va tani Moses ghe auliaala, ta tuvuimim atoa). Me am isoisoila tale nau manga ateva. ²³ Arova am rooroo tani iso aliki eteva tale nau manga ateva, tani nongo usilaa inangari nipaopao kanna Moses ghe auliaala, o vaaluia esessaiem etaghi, poli aghe ghelei emasina akapala vilikina taumattu ngateva tee tale nau manga ateva? ²⁴ Am rau mene auliaa gheeleia taumattu tale taataraimim, am ghelei niaisakei tale ghulughuluena salana.”

Taumattu ngatoa laghe anna tani kila va Iesu tani saa taumattu ia

²⁵ Katoa tana taumattu nge Jerusalem laghe ue va, “Ia oia taumattu ngateva la paepaea tani uvia? ²⁶ Tarala, epoppoaa ta mata ngoroi etoa, me karika la gheelei righi voto etana. Koti namu ngatoa la kilakila akoronna va ia Mesaea ia. ²⁷ Me iekai ita kilakila tanganuena, me Mesaea ngateva, karika aue ita kila va eaa tanganuena.”

²⁸ Iesu ghe aapasunga tale ale manga ateva, me ghe sama anamungailiila, me ghe uela va, “Am annaa vara am kilakilaieghi, me vara am kilakila tanganueghi. Aghi karika aghe mae sio tale aloaloannaaghi. Lo ateva ghe sungieghila koronna ia, me am, karika am kilakilaia. ²⁹ Aghi akilakilaia, poli aghe tokatoka teeia, me ghe sungieghila tani sio.”

³⁰ Katoa taumattu laghe anna tani kuneia, me karika laghe roola tani kuneia, poli nauna karika ghe mae. ³¹ Oroi taumattu ghe aikaaiaala

etana, me laghe ue va, “Arova Mesaea ngateva esio, koti voto aue eghelei aue elau llo ia oia taumattu ngateva egheelei?”

Laghe suula polisi etoa tani mae kune Iesu

³² Nau Paresi etoa laghe nongola taumattu ngatoa laghe aissakeana, laghe lao sio tani tara namuu ta pristi etoa, ila me namuu ta pristi etoa laghe suula polisi etoa tani laa kune Iesu.

³³ Me Iesu ghe uela etaira va, “Karika oroi nau aue atoka teeiem, me amene kasu tani sae ta lo ateva ghe sungieghila. ³⁴ Aue am pae poieghi, me karika aue am taraiieghi, poli voto ateva alao etana am karika am rororo tani lao etana.”

³⁵ Taumattu nge Jiu etoa laghe tiuaala tani aikolomieinila va, “Eaa aue elao me karika aue ita taraiia? Koti aue elao tale llo masaliki aGrik atoa la ghaaitoiaa, me katoa tani kapuita la tokatoka etana. Koti aue mene laa ghapasunga ta aGrik atoa. ³⁶ Saa malloeana inangarina nau eue va, ‘Aue am pae poieghi, me karika aue am taraiieghi’, me ‘Voto ateva alao etana am karika am rororo tani lao etana’?”

Iesu ghe auliaala ateo atea maulue ia

³⁷ Airuuruu tale ia o nivelu eitaua ngateae, kinatama nauira ateva, Iesu ghe tinginala, me ghe sama anamungailila me ghe uela va, “Lo ateva ukaakangngata tani ropi, umae etaghi me uropi. ³⁸ Lo ateva eaikaiaia etaghi, aue ateo atea maulue ia aue eakalaa elome tale urunguitanina ateva, nongina Uru ngai Manga ateva eaauliaa.” ³⁹ Iesu ghe aauliaa Spirit Manga ateva va lo atoa la aikaiaia etana aue la ghaia. Isaa o nau Spirit Manga ateva karika ghe mae, poli God karika ghe tau sae Iesu.

Taumattu ngatoa ghe ghalueilala

⁴⁰ Katoa taumattu laghe nongola isaa o inangari Iesu ghe aauliaa etaira me laghe uela va, “Koronna, taumattu ngateva oia, ia o propete ateva Moses ghe aulieiniela.” ⁴¹ Mene katoa laghe ue va, “Ia oia taumattu ngateva Mesaea etana.” Mene katoa laghe ue va, “Karika va Mesaea ngateva aue ekasu eGalilii. ⁴² Uru ngai Manga ateva eue va Mesaea ngateva aue elutu ta mangalina atoa Deivit, me aue elutu eBettlehem, ia o masalikina ia Deivit.” ⁴³ Taumattu ngatoa ghe ghalueilala tale ninannaa ta poli Iesu. ⁴⁴ Katoa ngila ghe anna tani kuneia, me karika teva ghe roola.

Namu ngatoa karika laghe aikaiaala ta Iesu

⁴⁵ Polisi etoa laghe laa rekata sio, me namuu ta pristi etoa me Paresi etoa laghe kolomilala va, “Vaalu me am tam maeaa sio Iesu?”

⁴⁶ Polisi etoa laghe liula me laghe uela va, “Karika teva taumattu erooroo tani aippooaa nongina taumattu ngateva okae.”

⁴⁷ Me Paresi etoa laghe uela va, “Ae! Am tee ange kamekameam?

⁴⁸ Ngam tarala va teva namuu ta ajiu etoa me Paresi etoa eaaiakaiaia etana? ⁴⁹ Lo atoa la ghaikaiaia etana karika la kilakila inangari nipaopao, me God ang ghe kasikienainilala.”

⁵⁰ Nikodimas, ia o ghe lao akasina sio ta Iesu, ie tee ghe tokatoka me ghe uela va, ⁵¹ “Uneita inangari nipaopao eue va, ita rau mene

7:34: Jon 8:21; 13:36. **7:37:** Lev 23:36; Ais 55:1; Jon 4:14. **7:38:** Ais 58:11. **7:39:** Jon 16:7; 20:22; Apos 2:4. **7:40:** Jon 6:14. **7:41:** Jon 1:46. **7:42:** Sams 89:3-4; Maeka 5:2.

7:46: Mak 1:22. **7:48:** Jon 12:42. **7:50:** Jon 3:1-2.

ghelei righi voto ta teva taumattu, ita tani nongo mua va sa ateva ghe gheleielala.”

⁵² Me laghe uela etana va, “Koti io tee aGalilii io? Uriti Uru ngai Manga ateva, me utara va karika teva propete aue ekasu eGalilii.” ⁵³ † *Me laghe tiu reerekataala tani lao tanganueira.*

8

¹ *Iesu ghe saela tale motouru eteva ararina atea eOliv.* ² *Elue talaua poopooa ghe mene ssola tale ale manga ateva, me taumattu ngakapa atoa laghe mene mae sio tani taraia, me ghe toka siola, me ghe tiuuala tani apasunga etaira.* ³ *Vara me Paresi etoa me tau ngai aapasunga ngatoa tale inangari nipaopao ngila ghe reerekataa vause ateva etana.* Laghe taraiela ghe aso teela taita ateva karika manna ia, me laghe atinginaiela elome ta mata taumattu ngatoa. ⁴ *Me laghe uela ta Iesu va, “Tisa, ia oia vause ateva easoaso tee taita ateva karika manna ia, me ami ghaaiela.* ⁵ *Tale inangari nipaopao Moses ghe uela va ia oia ase vause ateva egheelei evalua o pei nikumu ematea. Me io, aue uue va saa?”* ⁶ *Laghe aaulia ngavalua o tani tootoonga Iesu, me saa llo ghe auliaa aue laghe tingina etana tani ghelei niaisakei etana.*

Iesu ghe tturru siola euu, me ghe tiuuala tani pitipiti tale vuuvuu nimane ateva nonginaaili va karika ghe nonganongola. ⁷ *Laghe mene kookolomia, me Iesu ghe tinginala, me ghe uela etaira va, “Lo ateva elome etaimim etam gheelei righi voto sesa, ughaa tiulu atu, me io uaitiutiu tani kumua.”* ⁸ *Vara me ghe mene tturru siola euu, me ghe mene tiuuala tani pitipiti.*

⁹ *Me lo atoa laghe nongola, laghe tiuuala tani kasu kateva kateva, ghe tiuuala ta namu ngatoa, me ghe laa ruu sio tale airuuruu eteva taumattu. Me Iesu nonga me vause ateva lalu ghe tokala.* ¹⁰ *Iesu ghe mene tingina saela, me ghe uela etana va, “Eaa ila? Karika teva eanna tani tau aatu sesa aipolipoli etam?”*

¹¹ *Ghe liula me ghe uela va, “Karika teva, namu ngateva.”*

Me Iesu ghe uela va, “Aghi tee atam anna tani tau aatu sesa aipolipoli etam. Kasula, me unim ruu tani ghelei ssavoto.”

Iesu mallanga ia tale kosa ateva

¹² *Iesu ghe mene uela ta taumattu ngatoa va, “Aghi mallanga ieghi tale kosa ateva oia. Lo ateva eaimuli teeieghi, karika aue ekasu tale saurrom ateva, ta aue eghaa lo ateva o mallanga etautau aatu maulue.”*

¹³ *Paresi etoa laghe nongola, me laghe uela ta Iesu va, “Io nonga uaauilia ngaotu gheeleiaam me uunguaam. Liuna avalua o me inangarim karika koronna.”*

¹⁴ *Iesu ghe liula me ghe uela va, “Koronna va aghaulieinagi nonga, me inangarighi koronna. Ta poli akilakila tanganueghi me eaa alaolao, me am, am tam kilakila tanganueghi me eaa aue alao.* ¹⁵ *Am, am gheelei niaisakei tale taumattu nongina gheeleiaa kosa ateva, me aghi karika. Karika agheelei niaisakei tale teva taumattu.* ¹⁶ *Arova aghele ghelei*

7:52: Jon 7:41-42. [†] **7:53:** Llo akasina uru ngai laghe pitila, karika laghe pitila Jon 7:53-8:11. Oroi ila lo atoa laghe pitila kiukiu eteae ta Jon 7:53, me kasina laghe piti seela. Kasina laghe pitiela elome ta Jon 7:36 me Jon 7:37, me kasina laghe pitiela ta airuuruu ta Jon 21:25, me mene kasina laghe pitiela emuli ta Luk 21:38. **8:5:** Lev 20:10; Diut 22:22-24. **8:7:** Diut 17:7.

8:11: Jon 5:14. **8:12:** Ais 49:6; Jon 1:4-9; 9:5; 12:46. **8:14:** Jon 5:31-32; 7:28. **8:15:** Jon 12:47. **8:16:** Jon 5:30; 8:29.

niaiskei aue aghele ghelei ekoronna poli karika va aghi nonga aue aghele ghelei, ta aghi me Tamaghi ghe sungieghila aue angalu ghele ghelei.¹⁷ Uneimim inangari nipaopao eue va, arova ghalua taumattu lalu auliaa inangariarua me elao aitauaa, isaa o inangari am vira kaili ekoronna.¹⁸ Aghi aghaaulia ngaotu uunguaaghi me gheeleiaaghi, me Tamaghi, ia o ghe sungieghila, ie tee eaauliaa uunguaaghi me gheeleiaaghi.”

¹⁹ Vara me laghe kolomiela va, “O eaa ia tamam?”

Iesu ghe liula me ghe uela va, “Arova am kilakilaieghi, aue am ghele kila Tamaghi, me poli am tam kilakilaieghi, karika aue am kila Tamaghi.”²⁰ Iesu ghe aauliaa isaa o inangari kalakalaa tale ale atiulu laghe kaakaai viliki veu etana tale ale manga ateva. Karika teva taumattu ghe anna tani kuneia, poli nauna karika ghe mae.

Karika am roroo tani lao nongina alaolao

²¹ Iesu ghe mene uela etaira va, “Aue akasu vuliem, me aue am pae poieghi, me am mate tee kaluimim ssavoto. Karika am roroo tani lao nongina aue alao.”

²² AJiu etoa laghe aikolomieinila va, “Vaalua me eue va, ‘Karika am roroo tani lao nongina aue alao?’ Koti enim aloanna tani uvi ematea, no?”

²³ Iesu ghe uela etaira va, “Am, tanganueimim oia euu, me aghi, tanganueghi epona liu, me am taumattu tale kosa ateva oia, me aghi karika.²⁴ Aghaauliaa etaimim va aue am mate tee kaluimim ssavoto, poli arova am tam aiesoaa va aghi see, aue am mate tee kaluimim ssavoto.”

²⁵ Me laghe kolomiela va, “Io see io?”

Me Iesu ghe uela etaira va, “Aghi ia o taumattu ngateva aghe aulieiniela etaimim emua arau.²⁶ Oroiannaaili voto arooroo tani auliaa tani aotu gheeleiaaimim karika masina, me tani ghelei niaiskei etaimim. Ta lo ateva aghaaulieinia koronna ia, poli lo ateva ghe sungieghila koronna ia, me aghi aghaaulia ngaotu tale taumattu tale kosa ateva saa voto aghe nongola etana.”

²⁷ Karika laghe kilakila va Iesu ghe aauliaa Tamane.²⁸ Iesu ghe ue etaira va, “Nau eteva aue am avukala sae Natuna ateva Taumattu ngateva, me aue am vira mene kila va aghi see. Me karika agheelei righi voto ta nannaaghi, ta agheelei nonga voto Tamaghi ghe apasungaala.²⁹ Lo ateva ghe sungieghila etokatoka teeieghi. Karika etautau velueeghi va aghi nonga atokatoka, poli nau ekapa atoa agheeghelei llo voto ealoanna.”³⁰ Nau taumattu ngatoa laghe nongola inangarina, oroi ila lo atoa laghe aikaaiala etana.

Koronna inangari aue egheleiem am toka amasina

³¹ Vara me Iesu ghe uela ta lo atoa ajiu laghe aiesoaa etana va, “Arova nau ekapa atoa am aimuli tee inangarighi, am aue kapughu disaepolo tuungi iem,³² me aue am kila koronna inangari, me llo koronna aue gheleiem am ruu tani nim uungu ta katoa me karika am tokatoka tale aloannaaimim.”

³³ Laghe liula me laghe uela va, “Ami tuvuimami ta Abraham, karika teva etaimami enim uungu me karika etokatoka tale aloaloannaane. Vaalua me uue va, ‘Aue am ruu tani uungu ta katoa?’”

³⁴ Iesu ghe liula me ghe uela va, “Aghaaaulia ngakoronna etaimim va lo ateva enim toka gheelei voto sesa, ia tau ngai uungu ia tale voto llo sesa, karika etokatoka tale aloannaane. ³⁵ Tau ngai nonganongo anna ateva enim tokatoka tau tee vauna ateva. Natuna nonga ateva vauna ateva aue etoka teeia nau ekapa atoa. ³⁶ Arova natuna ateva egheleiem am ruu tani uungu ta katoa, aue am vira ruu tani uungu ta katoa. ³⁷ Akilakila va tuvuna am Abraham, me poli inangarighi karika elome tale urunguitaniimim, me am aloanna tani uvi emateaghi. ³⁸ Voto aghe tarala ta Tamaghi, aghaauliaa. Voto am ghe nongola ta tamaimim ateva am gheeghelei.”

Am tamaimim ateva ta Satana

³⁹ Laghe liula me laghe uela ta Iesu va, “Ami tuvuimami eteva ta Abraham.”

Me Iesu ghe uela etaira va, “Arova tuvuna am Abraham aue am ghe gheelei voto nongina Abraham ghe gheelei. ⁴⁰ Nau eteva aghaauliaa voto koronna aghe nongola ta God, am aloanna tani uvi emateaghi. Abraham karika ghe gheelei evalua o. ⁴¹ Am, am tani gheelei nonginaaili tamaimim ateva.”

Me laghe uela etana va, “Vara natu ngerengere iemami? Ami kateva nonga tamaimami God ta ngetana.”

⁴² Iesu ghe uela etaira va, “Arova natuna iem God, aue am ghele aielousieinaghi, poli aghe kasula nongina etokatoka. Karika nim nannaaghi va aghe sio mae, ia ghe sungieghila tani sio. ⁴³ Vaalua me karika am nonganongo kila inangarighi? Poli karika am rooroo tani nongo inangarighi, ⁴⁴ am tamaimim ateva ta Satana, poli am aloanna tani gheelei voto ealoanna. Ia emua arau ghe aiuuvi ematela, me karika eaauliaa righi koronna poli karika righi koronna etana. Nau eaauliaa kamena, euusila ngarau gheegheeliaane kamena. Poli ia ekamekame, o tamaira akapa ia lo atoa la kamekame. ⁴⁵ Ta poli aghaauliaa voto koronna, karika am aikaaiaa etaghi. ⁴⁶ Teva etaimim erooroo tani auliaa righi gheeleiaaghi karika masina? Arova aghauliaa koronna, vaalua me am tam aikaaiaa ta ngetaghi? ⁴⁷ Lo atoa natuna ila God, aue la nongo usilaa inangarina, me am, karika am aloanna tani nongo inangarina, poli karika va natuna am God.”

Iesu me Abraham

⁴⁸ Me ajiu etoa laghe liula me laghe uela ta Iesu va, “Inangariimami ami aauliaa koronna va io aSameria io, me raroai eteva etokatoka etam, va?”

⁴⁹ Iesu ghe liula me ghe uela va, “Karika teva raroai etaghi, ta anim tautau sae ararina atuae Tamaghi, me am aasiosio ararighi eteae.

⁵⁰ Me aghi karika aghanna tani gheelei ararighi eteae. Kateva nonga eanna tani tau sae ararighi eteae, me ia tau ngai gheelei niaisakei ia.

⁵¹ Aghaaulia ngakoronna etaimim va arova lo ateva enongo usilaa inangarighi, ia o taumattu ngateva karika aue etara nimate.”

⁵² Me ajiu etoa laghe uela etana va, “Ia oia ngami kilala va raroai eteva etokatoka etam, poli Abraham me mene katoa propete ngila ghe matela. O me uue va, ‘Lo atoa la nongo usilaa inangarighi karika aue la ateateaa nimate.’ ⁵³ Vara io va namuu io ta tuvuimami eteva ta Abraham me mene katoa propete ngila ghe matela? Vara mene see etam?”

⁵⁴ Iesu ghe liula me ghe uela va, “Arova aghele tau sae ararighi eteae, ararighi eteae nim kapa ia. Me Tamaghi, ia o am ue va kapuimim Goto ia, etautau sae ararighi eteae. ⁵⁵ Am karika am kilakilaia. Aghi nonga akilakilaia. Arova aghele ue va karika akilakila, aue aghele kamekame nongina am tau nikamekame iem. Aghi akilakilaia, me anonganongo usilaa inangarina. ⁵⁶ Tuvuimim ateva ta Abraham ghe masimasieiliila tani tara isaa oia naughu. Nau eteva ghe tarala ghe masimasieiliila.”

⁵⁷ Me ajiu etoa laghe uela etana va, “Meie! Anem ninamanama karika ghe nim sae ta ghalimangauluae (50), me vaalua ughe tarala Abraham?”

⁵⁸ Iesu ghe uela etaira va, “Aghaaulia ngakoronna etaimim va auena Abraham ghe lutu, aghi ngaghe toka vella arau!” ⁵⁹ Me ngila ghe reirei atu tani kumua. Iesu ghe aisuliaala, me ghe kupi ghoala tale ale manga ateva.

9

Iesu ghe ghelei emasinala mata salusalu eteva

¹ Iesu ghe kasukasu elao lao, me ghe tarala taumattu ngateva ghe lutu emata salusalula. ² Kapuna disaepolo atoa laghe kolomiela va, “Tisa, vaalua me ghe mata salusalunala, poli ia kanna ssavoto, o tamana me kinna?”

³ Iesu ghe liula etaira me ghe uela va, “Karika va ia kanna ssavoto, o tamana me kinna, ta mausi aue taumattu ngatoa la tara uunguaane God etana. ⁴ Aue ita ghelei uunguaane lo ateva ghe sungieghila tani mae ghelei. Ellaa ita tani uungu, va nau eleivoo, karika teva erooroo tani uungu. ⁵ Nau atokatoka oia tale kosa ateva, aghi mallanga aghi tale kosa ateva.”

⁶ Nau ghe aippooaa, me ghe kanusuila tuku kosa ateva, va ghe maramarakanala, me ghe atavainie saela tale matana alua, ⁷ me ghe uela etana va, “Kasula, me ulaa pora matam tale ateo ateeae kaikaina ia, ararina ateeae ta Siloam.” (Mallooeana Siloam va “sungiela”.) Ghe porala matana, me ghe kiriuala, me ghe taatara.

⁸ Kapuna atoa me lo atoa laghe taataraia ta ghe toka looloo, laghe ue va, “Karika va ia okae taumattu ngateva ghe toka looloo nonga tapaa ngatamana tale ale manga ateva?” ⁹ Katoa laghe ue va, “Ia oio taumattu ngateva.”

Mene katoa laghe ue va, “Karika, arova taataraane va ia okae.”
Ia ghe uela va, “Aghi oia.” ¹⁰ Laghe kolomiela va, “Vaalua me matam ghe taatarala?”

¹¹ Ghe liula me ghe uela va, “Taumattu ngateva la kolokoloa va Iesu etana, ghe ghelei emaramarakanala tuku kosa ateva, me ghe atavainie saela ta mataghi, me ghe uela etaghi va, ‘Ulaa pora matam tale ateo ateeae eSiloam.’ Aghe lao sio va aghe porala mataghi, me aghe taatarala.”

¹² Laghe kolomiela va, “Eaa ia, ia ona taumattu ngateva uauleinian?”

8:58: Jon 1:1. * **8:58:** Iesu ghe ghaala ararina ateeae God, nongina Eksodis 3:14 eaauliaa.
9:2: Esik 18:20; Luk 13:2, 4. **9:3:** Jon 11:4. **9:5:** Mat 5:14; Jon 8:12. **9:6:** Mak 8:23.

Ghe liula me ghe uela etaira va, “Karika anga kilala.”

¹³ Laghe laoaa sio taumattu ngateva mata salusalu ia ta Paresi etoa.

¹⁴ Ia o nau eteva nau manga ia Iesu ghe gheleila matana alua lalu ghe taatarala. ¹⁵ Paresi tee atoa laghe kolomiela va, “Vaalua utaatarala?”

Ghe uela etaira va, “Ghe atava saela kosa maramarakana ta mataghi, me aghe lao sio tani pora mataghi, me aghe taatarala.”

¹⁶ Katoa Paresi laghe ue etana va, “Taumattu ngateva oia karika va God ghe sungiela, poli etam aitaraa nau manga ateva.”

Mene katoa laghe ue va, “Vaalua sesa taumattu ngateva erooroo tani ghelei righi niaimatoonga?” Ghe ghaluela nannaaira me laghe aitiuaala.

¹⁷ Laghe mene ue ta mata salusalu eteva va, “Io, vaalua nannaam etana, ta poli ghe otira matam alua?”

Ghe uela va, “Ia propete ia.”

¹⁸ Poli ajiu etoa laghe tam aikaaia inangarina mata salusalu eteva, va ia mata salusaluna ia, me ghe mene taatarala, laghe suula inangari ta tamana me kinna va lalu mae. ¹⁹ Angila ghe kookolomi tamana me kinna va, “Ierai natuimalue ia? Amalu ghe ue va ghe lutu emata salusalunala? Me vaalua me ghaine etaatara?”

²⁰ Tamana me kinna lalu ghe liula etaira va, “Angalu kilakilaia va natungalue ia ta ghe lutu emata salusalunala. ²¹ Vaalua me ghaine etaatara, angalu tam kilakila va see ghe otira matana alua. Am kolomia, ta namuu ia, me ia aue eauliaa etaimim.” ²² Lalu ghe aulia ngavalua o poli lalu ghe maamatauta namuu ta ajiu etoa, ta namuu ta ajiu etoa laghe ue va arova lo atoa la ue va Iesu Mesaea ia, aue la tiu vella tale ale nivelu eitaua ngateva, me karika aue la mene mae kkaua teeila. ²³ Liuna avalua o tamana me kinna lalu ghe uela va, “Am kolomia, ta namuu ia.”

²⁴ Laghe mene kolola mata salusalu eteva ghe mae sio. Me laghe uela etana va, “Utau sae God,* poli ami kilakila taumattu ngateva ona va tau ngai gheelei ssavoto ia.”

²⁵ Ghe liula etaira va, “Arova tau ngai gheelei ssavoto ia o karika, atam kilakila. Kateva nonga voto akilakilaia va, aghi mata salusalu ieghi, me isaa oia ngataatarala.”

²⁶ Laghe mene kolomiela va, “Saa llo ghe gheleila etam, me vaalua ghe otira matam?”

²⁷ Ghe liula etaira va, “Ngaghe auliaa muela etaimim, me karika am ghe aloanna tani nongo. Vaalua me am aloanna tani mene nongo? Koti am tee, am anna va ekapuna disaepolo iem?”

²⁸ Paresi etoa laghe auliaa saasakiaala etana. Laghe uela etana va, “Io nonga kapuna disaepolo io, ami kapuna disaepolo iemami Moses.

²⁹ Ami kilakila va God ghe aippooaa teela Moses. Me ia ona taumattu ngateva, ami tam kilakila tanganuena.”

³⁰ Taita ateva oia ghe liula etaira va, “Ngasoghiaala inangariim! Am ue va am tam kilakila tanganuena, me ia oia taumattu ngateva ghe otira mataghi elua. ³¹ Ita kilakila va God etam rooroo tani nongo usilaa tau ngai gheelei ssavoto atoa, me arova lo ateva ekakkaua God me eaimuli usi tee aloannaane God, ia aue God enongo usilainia. ³² Emua

arau nau kosa ateva ghe tiuaala, karika ita ghe nongo poila righi taumattu ghe lutu esalusulunala me matana ghe mene otile. ³³ Arova ghe tam kasula ta God, karika erooroo tani ghelei righi voto.”

³⁴ Me laghe liula me laghe uela etana va, “Ughe lutula tale ssavoto, me vaalua me uanna tani apasunga voto etaimami!” Me laghe tiu veluela va karika emene mae kkaua teeila.

³⁵ Iesu ghe nongola va ngila ghe tiu veluela. Nau ta ghe paeala me ghe taraiela, ghe uela etana va, “Uaikaaiaa ta Natuna ateva Taumattu ngateva?”

³⁶ Me taumattu ngateva o ghe kolomila va, “Namu ngateva, auliaala etaghi va see ia, ia ona taumattu ngateva, me aue aghaikaiaa ta ngetana.”

³⁷ Iesu ghe uela etana va, “Angu ghe taraiela, me ia oia esamasama teeio.”

³⁸ Me taumattu ngateva o ghe uela va, “Vau eteva, aghaaikaiaa,” me ghe suuiala ta liue kkena Iesu me ghe kauineiola.

³⁹ Iesu ghe uela va, “Aghe sio mae tale kosa ateva tani ghelei niaisakei ta taumattu ngatoa, me aue lo atoa mata salusaluna ila la taatara, me lo atoa la taatara la mata salusaluna.”

⁴⁰ Katoa Paresi laghe tokatoka me laghe nongola llo Iesu ghe auliaala, me laghe kolomiela va, “O ami tee mata salusalu iemami?”

⁴¹ Iesu ghe liula me ghe uela va, “Arova mataimim salusaluna, karika aue ghele righi kaluimim ssavoto, me poli am ue va, ‘Ami taatara,’ liuna avalua o me kaluimim ssavoto, ie etokatoka etaimim.”

10

Iesu masi tau ngai toi sipsipi ia

¹ Iesu ghe mene uela va, “Aghaaulia ngakoronna etaimim va lo ateva taumattu, karika ekupikupi sso tale atamani valavala sipsipi eteae, ta etattakole tale valavala ateeae, tau niainao ia, me aisari katoa ghinnaniira ia. ² Lo ateva taumattu ekupikupi sso tale atamana ateeae, ia tau ngai toi sipsipi ia. ³ Tau ngai toi atamana ateeae etaatara kila tau ngai toi sipsipi eteva, me eotioti atamana ateeae, me tau ngai toi sipsipi eteva ekupikupi sso, me sipsipi etoa la nonganongo kila lingi ngalona ateva. Ekolokoloa arariira kiena sipsipi etoa, me ekuukupieinila ghoa eleka. ⁴ Nau eteva ekuukupia ngakapa ghoa kiena sipsipi, me emuemueinila, me kiena sipsipi etoa la ghaaimuli teeia, poli la nonganongo kila lingi ngalona ateva. ⁵ Karika la rooroo tani usi mene teva ppaet taumattu. Me aue la ghele ilou vuli teeia, poli karika la nonganongo kila lingi ngalona ateva.” ⁶ Iesu ghe auliaala ia o kiukiu niaimatoongana ateeae, me nannaaира karika ghe masalike teela voto ghe auliaala etaira.

⁷ Liuna avalua o me Iesu ghe mene uela etaira va, “Aghaaulia ngakoronna etaimim va aghi atamani sipsipi etoa ieghi. ⁸ Lo atoa laghe muemue mae akasina sio etaghi, tau niainao ila me aisari ghinna ila, me sipsipi etoa karika laghe nongo kilailala. ⁹ Aghi atamana ieghi. Lo ateva ekupikupi sso etaghi aue esaanga. Aue esso me eghoa, me aue eghaa masi inana. ¹⁰ Tau niainao ateva emaemae tani ainao, me tani aiuvvii emate, me tani tturuu. Me aghi aghe mae sio va la ghaa maulue, me maamauluairaa epasu tale masi voto. ¹¹ Aghi masi tau ngai toi sipsipi

ieghi. Masi aitoi sipsipi eteva, etautau maamauluaane tani sausi kienasipsipi etoa.¹² Polipolina ateva taumattu, nau eteva sesa paua ngetapaa tuvui eteva emaemaetani nama sipsipi etoa, aue eilou vuli sipsipi etoa, poli karika va tau ngai toi sipsipi ia, me karika va kienatuungi ila. Me paua ateva aue ghele namaila me ghele ameti reerekatainila.¹³ Ia o taumattu ngateva eiilou vuli sipsipi etoa poli enim uungu tani ghaaviliki veu, me karika nannaane tani aitaraa sipsipi.

¹⁴ “Aghi masi aitoi sipsipi ieghi. Akilakila kieghi sipsipi, me ila la kilakilaieghi,¹⁵ nongina Tamaghi ekilakilaieghi, me aghi akilakila Tamaghi, me atautau maamauluaaghi tani sausi kieghi sipsipi etoa.¹⁶ Mene katoa tana kieghi sipsipi, karika ila elome tale ia oia valavalataeae. Aue atani ghaaila, me la mae kupi sso, me ila tee aue la nongo lingi ngalohu eteva, me aue ekateva nonga ila, me ekateva nonga tau ngai toiira.¹⁷ Tamaghi eailousieinaghi, poli aue atau velu maamauluaaghi, me auena amene ghaa.¹⁸ Karika teva erooroo tani ghaa velu maamauluaaghi. Aghi atautau velu maamauluaaghi, me aghi nonga matuutuliena aghi tani tau velu maamauluaaghi me matuutuliena aghi tani mene ghaa. Tamaghi ghe auliaa tau mae isaa oia inangari va aghelei.”

¹⁹ Isaa o inangarina ghe gheleila me ajiu etoa ghe ghaluelala.²⁰ Oroiila taumattu ngatoa laghe ue va, “Raroai eteva etokatoka etana, me veeveena ia. Vaalua me am anna tani nongo inangarina?”

²¹ Me katoa laghe ue va, “Lo ateva raroai eteva etokatoka etana karika erooroo tani auliaa isaa o voto. Raroai eteva karika erooroo tani otimataira salusaluna atoa.”

Ajiu etoa karika laghe aaiesoaa ta Iesu

²² Nau eteva tani nnaa lao nau laghe tau saela ale manga ateva ghe rekatala. Ia o nivelu eitaua ngateae ghe lutulutu tale nau kkaili eJerusalem,²³ me Iesu eleka tale ale manga ateva ghe kasukasu tale varanda ngateva laghe asease Solomon etana.²⁴ Me ajiu etoa laghemae sio tani tingina talieinia me ngila ghe ue etana va, “Lovisaa uauliaakiemami? Ange matemate toitoiaaimami. Arova io Mesaea ngateva, uaulia ngamasina etaimami.”

²⁵ Iesu ghe liula me ghe uela etaira va, “Aghaauliaa etaimim, me karika am aaiesoaa. Niuungu aghe gheelei tale ararina atea Tamaghi eaauliaa va aghi see ieghi.²⁶ Am tam aaiesoaa poli karika va kieghi sipsipi iem.²⁷ Kieghi etoa sipsipi la nonganongo kila lingi ngalohu eteva. Akilakilaila me la ghaaimuli teeieghi.²⁸ Atautaula maulue ateva etokatoka nau ekapa atoa, me karika aue la mate. Karika teva erooroo tani ghaa vella ta nimaghi.²⁹ Tamaghi, ghe taula mae sio etaghi, enaanamuu vulu isaa akapaaili taumattu, me karika teva erooroo tani ghaa vella ta nimane Tamaghi.³⁰ Aghi me Tamaghi kateva nonga iengalua.”

³¹ Me ajiu etoa ngila ghe mene reirei atu tani kumua.³² Me Iesughe uela etaira va, “Aghe apasungala orioannaaili masi niuungu kanna Tamaghi. Am anna tani kumueghi tale mausi sa ateva tale isaa o niuungu?”

³³ AJiu etoa laghe liula me ghe uela va, “Karika ami anna tani kumuo poli isaa o voto, ta poli uaauliaa saasakiaa tee God, poli nim taumattu io, me uue va io God.”

³⁴ Me Iesu ghe liula me ghe uela etaira va, “Karika am ghe ritila tale uneimim inangari nipaopao, eue va, ‘Aghe uela va am goto iem?’

³⁵ Emua arau God ghe ppooala inangarina ta taumattu ngatoa me ghe uela va goto ila. Inangarina God tale Uru ngai Manga ateva karika eaikolikoliaa. ³⁶ Me aghi, Tamaghi ghe amangaieghila me ghe sungieghila tani sio tale kosa ateva oia. Liuna avalua o me aue va Natuna ieghi God. Vaalua me am ue va aghaauliaa saasakiaa ta God?

³⁷ Am rau mene aiesoaa etaghi arova atam gheelei uunguaane Tamaghi.

³⁸ Arova am tam aiesoaa etaghi, am aiesoaa tale niuungu agheelei, poli agheelei uunguaane Tamaghi, me aue am kila va Tamaghi etaghi me aghi ta Tamaghi.” ³⁹ Laghe mene anna tani kuneia, me karika laghe roola.

⁴⁰ Me Iesu ghe mene oghi lao sio, me ghe lau longotila ejordan, me ghe lao sio tale voto ateva Jon ghe aasuu taumattu etana, me ghe tokala tale ia o voto ateva. ⁴¹ Me oroieili taumattu ghe mae sio etana. Laghe ue va, “Koronna va Jon ghe tam gheleila teva niamatoonga, me voto ghe auliaala tale ia oia taumattu ngateva koronna akapa.” ⁴² Tale ia o voto ateva oroi taumattu ghe aiesoala ta Iesu.

11

Lasarus ghe matela

¹ Kateva taumattu, Lasarus etana, ghe iisiki. Ghe tokatoka eBetani, tanganueiraru Meri me tuena ta Mata. ² Meri ia o vause ateva ghe kaola voto masi ngusungusuaane ta kkena Vau eteva, me ghe ulula tale uu nguruna, ia o Meri kapuna taita ateva oia ta Lasarus ghe iisiki. ³ Liuna avalua o me kapuna vause alua lalu ghe suula inangari ta Iesu tani auliaa kienia va, “Vau eteva, unongo, masi kapum ateva eiisiki.”

⁴ Nau eteva Iesu ghe nongola, ghe uela va, “Ia okae isiki eteva karika aue eruu tale nimate. Enim lutula tani apasunga sarasarakaniaane God, me la tau tee sae ararina atea Natuna ateva God.” ⁵ Iesu ghe aielousiangaili Mata me nengane ta Meri me Lasarus. ⁶ Liuna avalua o, nau eteva Iesu ghe ghaala inangari va Lasarus eiisiki, ghe mene tokala ghalue nau nongina ghe tokatoka arau.

⁷ Vara me ghe uela ta kapuna disaepolo atoa va, “Ita kasu me ita mene sae ejidua.”

⁸ Me kapuna disaepolo atoa laghe uela etana va, “Tisa, vaalua me umene anna tani sae ejidua, ajiu etoa okae ghalavoo nonga laghe anna tani kumu emateo tale atu?”

⁹ Iesu ghe uela etaira va, “Karika am kilakila va kasangaulu ghalua (12) aoa ta kateva nau? Arova lo ateva ekasu ella, karika aue etaghueinia, poli etaatara tale mallanga ateva tale kosa ateva. ¹⁰ Me arova lo ateva taumattu ekasu eleivoo, aue etaghueinia, poli karika etaatara teva mallanga.”

¹¹ Vara ghe ruula tani auliaa llo me ghe mene uela etaira va, “Kapuita ateva ta Lasarus enim sio aseasekanua, me anga laa siosio oia tani angunia.”

¹² Me disaepolo atoa laghe uela etana va, “Vau eteva, arova enim sio aseasekanua, aue emasina.” ¹³ Iesu ghe aauliaa va ang ghe matela, me ila laghe annaa va ghe aauliaa niasekanue ateaet għainoana etana.

¹⁴ Me Iesu ghe vira mene aulia ngamasinala va, “Lasarus ang ghe matela. ¹⁵ Nau eteva aghannainam anim masimasi va karika aghe toka teeiel, poli isaa o voto aue egheleiem am aiesoaa. Ita kasu, me ita sio taraia.”

¹⁶ Vara me Tomasi, kateae ararina laghe kolokoloa va Palue ia, ghe uela ta disaepolo akapa atoa va, “Elauo! Ita akapa ita usia, me ita laa mate teeia.”

Iesu etottotu taumattu matena me etautaula maulue

¹⁷ Nau eteva Iesu ghe laa rekata sio eBetani, ghe nongola va ang ghe asola għaata nau tale lienga niaikkia. ¹⁸ Betani kalakalangina ia eJerusalem, maamasauaane erooroo nim kotolu nonga kilomita. ¹⁹ Oroi ajiu etoa laghe mae sio tani aippooaa me toka tee Mata me Meri tani aale amate, poli kapuirarua taita ateva ghe matela. ²⁰ Nau eteva Mata ghe nongola va Iesu ang ghe rekatala, ghe lao sio tani soua, me Meri għe tokala elo ale.

²¹ Me Mata ghe uela ta Iesu va, “Vau eteva, arova ugħe tokatoka oia, kapugħu taita ateva karika aue għe mate. ²² Me ia oia akilakila va arova ugħe kolom righi voto ta God, aue għelete tau aatu.”

²³ Iesu ghe uela etana va, “Kapum taita ateva aue sakesake.”

²⁴ Mata ghe uela etana va, “Akilakila va aue etotu tale nau taumattu ngatoa aue la totu tale liu, tale airuuruu tale nau.”

²⁵ Iesu ghe uela etana va, “Aghi atottotu taumattu matena, me etautau lao maulue. Lo ateva eaiesoaa etagħi, arova emate, aue emene sakesake. ²⁶ Lo ateva etokatoka me maulue ia, arova eaikaaiaa etagħi, karika aue emate. Uaaiesoaa tale isaa oia inangari?”

²⁷ Mata ghe uela ta Iesu va, “Ue, Vau eteva. Aghħaiesoaa va io Natuna io God, me io Mesaea io, ia o laghe uela va aue emae.”

Iesu ghe alousiusi teela Lasarus me għe ngħalaiela

²⁸ Mata ghe ruula tani ppooaa isaa o inangari me ghe lao sio tani tara Meri, me ghe aulia ngainaola etana va, “Tisa ange rekatala, me eanna tani taraio.” ²⁹ Nau eteva Meri ghe nongola, arova ħaata ta għe tinginala, me ghe lao sio tani tara Iesu. ³⁰ Iesu karika ie għe mae rekata. Għe aajitoka see tale voto ateva Mata għe lao sio tani soua etana. ³¹ Ajju etoa lagħe tokatoka tee Meri elo ale tani alousiusi eitħaua teeia. Vara me lagħe taraiela ta għe tinginala, me għe ailu luu tani kupi għoħa. Lagħe usiela, poli lagħe annaa va ang għe laolao tani ngala nongina lagħe alokoila taumattu ngateva matena ia.

³² Nau eteva Meri għe laa rekata sio nongina Iesu għe tiitingina, għe taraiela, me għe suuiaala ta liue kkena, me għe uela va, “Vau eteva, arova ugħe tokatoka oia, kapugħu taita ateva karika aue għe mate.”

³³ Iesu ghe tarala Meri me ajiu etoa laghe ngangngala me ghe sessaiela, me ie tee ang ghe anna tani ngala. ³⁴ Me ghe uela va, “Eaa am ghe alokoiola?”

Me laghe uela etana va, “Vau eteva, mae sio me ulaa tara.”

³⁵ Me Iesu ghe ngalala.

³⁶ Ajiu etoa laghe ue va, “Am tarala, Iesu eailousiangaili Lasarus.”

³⁷ Me katoa laghe ue va, “Ghe ghelei emasinala mata salusaluna ateva, me vaalua me karika ghe roola va ghe sausi Lasarus va karika ghe mene mate?”

Iesu ghe totula Lasarus tale nimate

³⁸ Iesu ghe mene sessaiela nau eteva ghe kasukasu elaolao nongina laghe alokoila Lasarus. Tale voto ateva liengani niaikkia ia me laghe atoka rungaala atu eteva etana. ³⁹ Iesu ghe uela va, “Am ghaa vella atu eteva.”

Me Mata, kapuna vause ia tau raua, ghe uela va, “Vau eteva, aiaaghaatane ateva oia nau ang ghe asola tale liu. Nei mauuna ateva ang ghe tiuaala.”

⁴⁰ Me Iesu ghe uela etana va, “Auela va saa etam? Auela va arova uaiesoaa, ghaine utara sarasarakaniaane God.”

⁴¹ Vara me laghe ghaa vella atu eteva. Me Iesu ghe taatara saela epona me ghe uela va, “Tamaghi, akaakaili emasinaaili ta ughe nongola kalughu nikokkolomi. ⁴² Me akilakila va nau ekapa atoa unonganongaoghi, me poli mausi taumattu toko la tiitingina, liuna avalua o me ngamene aauliaa isaa oia inangari me ae la ghaisoaa va io ughe sungieghila tani sio.”

⁴³ Nau eteva ghe ruula tani auliaa llo, me ghe kolokolo anamungailila me ghe uela va, “Lasarus, kipi ghoa mae!” ⁴⁴ Me ia o taumattu ngateva ghe matela ghe kipi ghoa mae. Nimane me kkena sumsum tale kalio la sumsumaa matena atoa, me matane sumsum tale mene tuku kateva kalio.

Iesu ghe uela va, “Am pulaka vella tapiri kalio, me am tau velua me ekasu.”

Namu ngatoa laghe tingina aitauaala tani uvi emate Iesu

(Mat 26:1-5; Mak 14:1-2; Luk 22:1-2)

⁴⁵ Oroi ila ajiu etoa laghe mae sio tani alousiusi tee Meri, laghe tarala ia o voto ateva Iesu ghe gheleiela, me laghe aiesoala etana. ⁴⁶ Me katoa etaira laghe lao sio tani tara Paresi etoa tani auliaa etaira sa ateva Iesu ghe gheleiela. ⁴⁷ Namu ngatoa ta pristi me Paresi etoa laghe lao sio tani kolo kansolo atoa.

Me laghe velu eitauaala me laghe uela va, “Sa ateva ita gheleia, poli taumattu ngateva oia ange gheelei oroi niamatoonga?” ⁴⁸ Arova ita tau velua, me ita tam ghelei rungainia, taumattu ngakapa atoa ae la ghaikaaiaa etana, me ae aRom atoa la mae, me la uvi tuuturungita, me la ghaa velu ale manga ateva.”

⁴⁹ Kateva taumattu elome etaira, ararina ataeae ta Kaeapas, ia namuu ia ta pristi etoa tale ia o ninamanama ataeae, ghe uela va, “Am oia, karika am kilakila righi voto! ⁵⁰ Am tee, karika am kilakila va emaamasina arova kateva nonga taumattu ghele mate tani ghaa liuira

akapa taumattu ngatoa, me karika masina arova taumattu ngakapa ghele mate.”

⁵¹ Karika Kaeapas ghe nim aauliaa isaa o inangari tale aloannaane, poli ia namuu ia ta pristi etoa tale ia o ninamanama atea, me ghe aulia ngamuemua alokoila inangari o va Iesu aue emate tani sausi taumattu ngakapa atoa. ⁵² Karika va aue emate ta ajiu nonga atoa, ta mene katoa tani natuna God la tokatoka see, aue egheleila la velu eitauaa me ekateva nonga ila. ⁵³ Ghe tiuala tale ia o nau eteva, namu ngatoa laghe tiuala tani aippooaa tee salana vaalua tani uvi ematea.

⁵⁴ Poli isaa o voto me Iesu ghe ruula tani kasu ta mata ngoroi etoa elome ta ajiu etoa. Ghe ssola tani toka tau tale masaliki eteae eEpraim, kalakalangina tale voto ateva karika righi taumattu ta ngetana, ia me kapuna disaepolo atoa.

⁵⁵ Pasova ngateva ang ghe aakalakalaa. Oroieili taumattu nge Jiu etoa la tokatoka amasau eJerusalem laghe tiuala tani rekata eJerusalem tani ghelei eraarangisanaila me auena Pasova ngateva ghe tiuaa.

⁵⁶ Laghe paepae Iesu me laghe ssola kona ale manga ateva, me laghe tiuala tani aikolomieinila. Laghe ue va, “Am annaa va aue emae tale ia oia nivelu eitaua ngateae?” ⁵⁷ Namuu ta pristi etoa me Paresi etoa laghe uela ta taumattu ngatoa va, arova lo ateva etara Iesu, elaa ghaulienia etaira. Ia o salana atikirighi laghe annaa va aue la kune Iesu ta ngetana.

12

Meri ghe kaola voto ateva masi ngusungusuaane ta kkena Iesu eBetani (Mat 26:6-13; Mak 14:3-9)

¹ Kasi ghaonomo (6) nau ghe tokatoka me ghe laa ghaa nau Pasova, Iesu ghe mene siola eBetani, tanganue Lasarus, ia o Iesu ghe totuela tale nimate. ² Laghe gheleila ninamanama atea tani amasimasi Iesu. Mata ghe aai koita see inana, me Lasarus ghe tokatoka tee taumattu ngatoa laghe mae sio tani namanama tee Iesu. ³ Meri ghe ghaala botolo ateva ghe kaakaai voto masi ngusungusuaane laghe gheleila nonga tale oane natu ai erighi la aseasea va nadi ia me aipolina namungaili, me ghe kaoala ta kkena Iesu, me ghe uluulu kekena tale uu nguruna, me masi neina ateva ghe rooaala ale ateva tani aaoo.

⁴ Me kateva kapuna disaepolo, Jiudas Iskariot etana, ia aue etau lao Iesu ta tau ngai ssateena atoa, ghe uela va, ⁵ “Vaalua me karika am rooro tani tauela va la poli ia okae voto ateva masi ngusungusuaane ta kotolu ai (300) silva koen,* me am ghele taula ta lo atoa karika righi peiira?” ⁶ Jiudas ghe aauliaa isaa o inangari karika va poli ghe annaa llo taumattu karika righi peiira, ghe aauliaa poli ia tau niainao ia, me ia ghe posoposo aikaai viliki veu eteva, me kasina nau ghe aainao etana.

⁷ Iesu ghe liula me ghe uela etana va, “Tau veluela, poli eaatoka ia oia voto ateva masi neina, me aue elaa ghaa nau eteva aue amate, me la laa kaeinaghi. ⁸ Lo atoa karika righi peiira, la tokatoka teeiem nau ekapa atoa, me aghi, karika aue atoka teeiem nau ekapa atoa.”

Namuu ta pristi etoa laghe aailoe tani uvi emate Lasarus

11:52: Jon 10:16. **11:53:** Jon 5:18. **12:1:** Jon 11:1, 43. **12:2:** Luk 10:40. **12:3:**

Luk 7:37-38. * **12:5:** silva koen Silva koen ativilau (denarius) kateva nau aipolina. **12:8:** Diut 15:11.

⁹ Orioieili ajiu etoa laghe kilala va Iesu eBetani. Liuna avalua o me laghe lao sio karika mausi Iesu nonga va laghe lao sio. Laghe lao tee sio poli laghe aloanna tani tara tee Lasarus, ia o Iesu ghe totuela tale nimate. ¹⁰ Liuna avalua o me namuu ta pristi etoa laghe aailoe va la uvi emate tee Lasarus, ¹¹ ta mausi Lasarus me orioieili ajiu etoa ngeila ghe liuliu viliira ta pristi etoa, me ngeila ghe aaikaiaa ta Iesu.

*Iesu ghe kupi ssola eJerusalem nonginaaili kingi eteva
(Mat 21:1-11; Mak 11:1-11; Luk 19:28-40)*

¹² Vara mene kateva nau, me orioieili taumattu laghe saela eJerusalem tale Pasova ngateva, me laghe nongo teela va Iesu aue emae tee tale ia o nivelu eitaua ngateae. ¹³ Liuna avalua o me laghe ghaala uru ootou, me laghe lao sio tani sou Iesu tapaa salana. Laghe aaore me laghe ue va, “Ita tau sae ararina ateaee God! God aue eghelei masi voto ta ia oia taumattu ngateva ghe mae sio tale ararina ateaee! Ia kingi ia ta Alisraeli etoa!” ¹⁴ Iesu ghe ghaala donki eteva, me ghe laa sae toka etana, nongina inangari laghe pitila tale Uru ngai Manga eteva va,

¹⁵ “Natuna aliki vause ateva Saeon, urau mene matautu.

Am tara kapuimim kingi eteva emaemae
eiilou tale natu donki eteva.”

¹⁶ Isaa o nau kapuna disaepolo atoa karika laghe kilakila malloeana isaa o voto, me nau eteva God ghe vira mene tau saela ararina ateaee Iesu, me laghe vira mene nnaala voto Uru ngai Manga eteva ghe auliaala, me vaalua me taumattu ngatoa laghe gheleila isaa o voto ta ngetana.

¹⁷ Lo atoa taumattu laghe tarala Iesu ghe kolola Lasarus tani kupi ghoa tale lienga niaikkaia ngateae, laghe aauliaa isaa o voto laghe tarala. ¹⁸ Taumattu ngatoa laghe nongola ia o niaimatoongana ngateva ghe gheleila, liuna avalua o me laghe ghoala tani soua tapaa salana. ¹⁹ Paresi etoa laghe tarala isaa o voto me laghe ue va, “Tarala! Llo ita anna tani ghelei karika ita roroo, poli taumattu ngakapa tale kosa eteva ngila usiusia.”

Katoa taumattu nge Grik laghe anna tani tara Iesu

²⁰ Katoa taumattu nge Grik laghe sae teela eJerusalem tani kkaua ta nau nivelu eitaua ngateae. ²¹ Laghe lao sio tani tara Pilip aBetsaida ia eGalilii, me laghe kolomiela va, “Namu ngateva, ami aloanna tani sama tee Iesu.” ²² Pilip ghe lao sio tani auliaa ta Andru, me lalu ghe lao sio tani tara Iesu, me lalu ghe auliaala etana.

²³ Iesu ghe liula me ghe uela va, “Ange ghaala nauna God tani tau sae ararina ateaee Natuna eteva Taumattu ngateva. ²⁴ Aghaaulia ngakoronna etaimim va, arova la tam pasa katu uiti eteva tale kosa eteva va emate, aue nim kateva nonga aue etoka. Me arova emate, aue eapinosa orioannaaili uit. ²⁵ Lo eteva eaaielousiaa maamauluaane, aue eraua. Me lo eteva etam aloanna maamauluaane tale kosa eteva oia, egheelei tani ghaa maulue eteva etokatoka liu ia. ²⁶ Lo eteva taumattu esaasausieghi, eaaimuli teeieeghi me voto eteva atokatoka etana, ie tee aue etoka aitauaa teeieeghi etana. Lo eteva taumattu esaasausieghi, Tamaghi etautau sae ararina ateaee.

*Aue la avukala sae Natuna ateva
Taumattu ngateva*

²⁷ “Ia oia voto maateaili ange lutulutu tale maamauluaaghi, me nganannangaili, me karika akilakila sa ateva atani aulieinia. Koti aue va, ‘Tamaghi, ughaa velu isaa o llo voto maamaatana.’ Karika! Ta poli isaa o voto maamaatana me aghe sio mae va elutu etaghi. ²⁸ Tamaghi, utau sae ararim ateeae!”

Vara Iesu ghe aauliaa isaa o inangari me lingi ngalo ateva ghe kasula epona liu ghe uela va, “Ngaghe tau saela ararighi eteae me aue amene ghelei.” ²⁹ Taumattu ghe tiitingina teeia laghe nongola, me katoa laghe uela va palapalanga ateva, me katoa laghe ue va, “Ensolo ateva ghe sama teeielaa.”

³⁰ Me Iesu ghe uela etaira va, “Ia o lingi ngalo ateva eppooaala inangari tani sausiem, karika va esaasausieghi. ³¹ Taumattu tale kosa ateva oia, God ange tiitiuaa tani ghelei niaiskei ta ngetaira. Me vau tapaa kosa ateva oia, God aue esau velue sio. ³² Me aghi, nau la ghavukalaieghi sae tale kosa ateva oia, aue aghelei taumattu ngakapa atoa la mae etaghi.” ³³ Iesu ghe aauliaala inangari o tani auliaa vaalua aue emate.

³⁴ Me taumattu ngatoa laghe uela ta Iesu va, “Inangari nipaopao eue va Mesaea ngateva aue etoka nau ekapa atoa. Vaalua me uee va aue la avukala sae Natuna ateva Taumattu ngateva? See ia Natuna ateva Taumattu ngateva?”

³⁵ Iesu ghe liula me ghe uela va, “Nauna mallanga ateva tani toka teejem karika aluse. Liuna avalua o me nau etokatoka teeiem am kasu teeia, poli saurrom ateva erau akouem. Poli lo ateva ekasukasu tale saurrom etam kilakila va eaa elaolao. ³⁶ Am aikaaiaa tale mallanga ateva nau etokatoka teeiem, me aue natuna am mallanga ateva.” Nau eteva Iesu ghe ruula tani ppooaa isaa o inangari, ghe kasu vulilala me ghe lao sio tani aisulia.

Taumattu ngatoa laghe tam anna tani aikaaiaa ta Iesu

³⁷ Ghe gheleila oroiannaaili niaimatoonga elome ta mata ngoroi etoa, me karika laghe aikaaiaa ta ngetana. ³⁸ Isaa o voto ghe lutula tani ghelei ekoronna inangarina Aisaea propete ia ghe uela va,

“Vau eteva, karika teva ghe aikaaiaa inangariimami,
me karika teva ang ghe tarala sarasarakaniaam.”

³⁹ Taumattu ngatoa karika la rooroo tani aiesoaa ta Iesu, nongina Aisaea ghe mene uela va,

⁴⁰ “Vau ngepona ateva ghe ghelei emata salusaluna ilala
me urunguitaniira korokoronganaili

poli la rau taatara ta mataira
me la kila tale urunguitaniira
me la mae etaghi me agheleila va la mene masina.”

⁴¹ Aisaea ghe tarala sarasarakaniaane Iesu, liuna avalua o me ghe auliaala isaa o voto ta ngetana.

⁴² Me oroi ila kapuira namu ngatoa laghe aikaaiala ta Iesu, me karika laghe aaotu, poli Paresi etoa laghe uela va lo ateva eaikaaiaa ta Iesu,

12:27: Sams 6:3; 42:5; Mat 26:38. **12:32:** Jon 3:14. **12:33:** Jon 19:6. **12:34:** Sams 110:4; Ais 9:7; Den 7:14. **12:35:** Jon 8:12. **12:36:** Ips 5:8. **12:38:** Ais 53:1. **12:40:** Ais 6:10. **12:41:** Ais 6:1. **12:42:** Jon 9:22.

aye la tiu velua tale ale nivelu eitaua ngateva,⁴³ poli laghe annaaili va taumattu earueinila, me karika va God.

Iesu ghe mae sio tani asaangi kosa ateva

⁴⁴ Iesu ghe sama anamungailila me ghe uela va, “Lo ateva eaaikaiaia etaghi, eaikaiaia tee ta lo ateva ghe sungieghila.⁴⁵ Me lo ateva etaraieghgi, etaatara tee lo ateva ghe sungieghila.⁴⁶ Aghi aghe mae sio tale kosa ateva oia arova mallanga ateva va lo ateva eaaiesoaa etaghi, karika aue etoka tale saurrom.

⁴⁷ “Arova lo ateva enongo inangarighi me etam aimuli tee, karika aue agheleia va eaisakei, poli karika aghe mae sio tani ghelei niaiskei tale taumattu tale kosa ateva oia, ta aghe mae sio tani asaangila.⁴⁸ Lo ateva etam annaieghgi, me erati inangarighi, aue isaa o inangari aue egheleia eaisakei nau airuuruu tale kosa ateva.⁴⁹ Karika aghaauliaa righi voto tale nim nannaaghi. Tamaghi ghe sungieghila ghe auliaala sa ateva tani aulieinia me vaalua tani auliaa.⁵⁰ Akilakila va llo ghe auliaala aue etau mae maulue ateva tokatoka liu ia. Liuna avalua o me atani auliaa voto Tamaghi ghe auliaa tau mae sio.”

13

Iesu ghe porala kkeira kapuna disaepolo atoa

¹ Nau Pasova ngateva karika ghe mae, me Iesu ang ghe kilala va nauna ange aakalakalaa tani kasu vuli kosa ateva, me emene sae ta Tamane. Ghe aielousiangaili kapuna atoa tale kosa ateva oia. Aielousiaane etaira ghe laa ghaa sio nau ghe mate vululala.

² Nau laghe namanama ta pai ngelo alai, Satana ang ghe atoka ssola ninanna ngateva ta Jiudas, natuna ia Saemon Iskariot, tani laoaa Iesu ta tau ngai ssateena atoa. ³ Iesu ghe kilakila va God ghe tau ekapala voto ta nimane, me ia ghe kasula ta God, me aue emene sae ta God. ⁴ Liuna avalua o me Iesu ghe tingina saela nongina laghe namanama, me ghe ghaa vella unna aiaasae ngeleka ateva, me ghe ainavitaala taolo ateva. ⁵ Ghe kao kaaila manu tale aikaai manu etivilau, me ghe tiuaala tani pora kkeira disaepolo atoa, me ghe uluulu tale taolo ateva ghe aainavitainia etana.

⁶ Ghe rekatala ta Saemon Pita, me Pita ghe uela etana va, “Vau eteva, uaanna tani pora kkeghi?”

⁷ Me Iesu ghe liula me ghe uela etana va, “Voto agheelei, karika aue ukila ghaine, auena uvira mene kila.”

⁸ Me Pita ghe uela etana va, “Karikaaili umene pora kkeghi!”

Me Iesu ghe uela va, “Arova atam pora kkem, karika urooroo tani toka teeieghgi.”

⁹ Saemon Pita ghe uela etana va, “Vau eteva, karika umene pora nonga kkeghi ta upora tee nimaghi me urughu eteva!”

¹⁰ Me Iesu ghe uela va, “Lo ateva ang ghe suusuula karika erooroo tani mene suusu, ta enim pora nonga kkena, me aue eraarangisana. Am raarangisana am, karika va am akapa.” ¹¹ Poli Iesu ghe kilakila va see aue etaue lao ta tau ngai ssateena atoa, liuna avalua o me ghe uela va, “Karika va am akapa raarangisana am.”

12 Nau eteva ghe ruula tani pora kkeira, me ghe mene asaela unna aiaasae ngeleka ateva, me ghe toka siola nongina aillai inana ateva, me ghe uela etaira va, "Ngam tara kilala voto ngagheleila?" 13 Am ue etaghi va kapuimim tisa ieghi me Vauimmi ieghi. Isaa o voto am asease etaghi masinaaili, ta koronna. 14 Arova aghi, vauimmi ieghi me tisa ieghi, me ngaporala kkeimim, am tee am pora kkeira mene katoa etaimim. 15 Ngaghaapasunga tau aatu voto am ghelei, am ghelei nongina ngagheleila. 16 Aghaaulia ngakoronna etaimim va tau ngai nonganongo anna ateva karika namuu ia ta vauna ateva, me tau ngai kasuaa inangari eteva karika tee enaanamuu ta lo ateva esungisungia. 17 Arova am kila isaa o voto me am ghelei, aue emasinaaili etaimim.

18 "Karika va aghaauliaa inangari oia etaimim akapa, ta poli akilakila lo atoa aghe suitoongainiema, me llo Uru ngai Manga ateva ghe auliaala aue ekoronna. Ghe uela va, 'Lo ateva enamanama teeieeghi aue essa teeieeghi.'

19 "Aghaaulia ngamuemue aalokoi llo oia, me nau aue elutu aue am aiesoaa etaghi va aghi ia o taumattu ngateva. 20 Aghaaulia ngakoronna etaimim va lo ateva eghaaghaha lo ateva aghe sungiela, eghaaghahaieghi, me lo ateva eghaaghahaieghi, eghaaghaha lo ateva ghe sungiehila."

Iesu ghe auliaala voto aue elutu etana

(Mat 26:20-25; Mak 14:17-21; Luk 22:21-23)

21 Nau eteva Iesu ghe ruula tani auliaa isaa o inangari, nannaane ghe maatela me ghe siuailila euu, me ghe uela va, "Aghaaulia ngakoronna etaimim va kateva etaimim aue etaueeghi lao ta nimaira tau ngai ssateeghi etoa."

22 Aloira disaepolo atoa ghe kaakapa va ghe auliaa tee see, liuna avalua o me laghe aitara atokala. 23 Me lo ateva disaepolo Iesu ghe ailousiangailia ghe tokatoka akalakalanginaaili ta Iesu. 24 Saemon Pita ghe matamatatai elao va ghe kolomi Iesu va see aue ghe ghelei isaa o voto ghe aauliaa.

25 Ia o disaepolo ateva ghe valaa lao sio ta Iesu me ghe kolomiela va, "Vau eteva, see aue eghelei isaa o voto?"

26 Iesu ghe liula me ghe uela va, "Lo ateva aue aghasuu verete me ataula etana." Me gheasuula verete me ghe taula ta Jiudas, natuna ia Saemon Iskariot. 27 Jiudas ghe ghaala isaa o inana me Satana ghe valaiela. Me Iesu ghe uela etana va, "Voto uanna tani ghelei, ughelei parasi." 28 Lo atoa laghe tokatoka tale ia o ninamanama ataeae laghe tam kilala malloeanina inangari Iesu ghe aauliaa etana. 29 Katoa laghe annaa va poli Jiudas ghe posoposo uneira viliki veu, o Iesu ghe sungisungia tani laa poli righi voto eaimonomonosiaa tale nivelu eitaua ngateva, o tani laa tau righi voto ta lo atoa karika peiira. 30 Jiudas ghe ghaala tuku verete ateva me ghe kupi ghoala. Ang ghe voola.

Iesu ghe taula ouna tana inangari niloeloe

31 Vara Jiudas ghe kasula me Iesu ghe uela va, "Ia oia Natuna ateva Taumattu ngateva ararina ataeae ange saela epona, me God tee ararina ataeae ange saela epona tale Natuna ateva Taumattu ngateva. 32 Arova

13:14: Mat 20:28; Luk 22:27. 13:15: Plp 2:5; Kol 3:13; 1 Pita 2:21. 13:16: Mat 10:24.

13:18: Sams 41:9. 13:19: Jon 14:29; 16:4. 13:20: Mat 10:40. 13:27: Jon 13:2.

13:31: Jon 12:23. 13:32: Jon 17:5.

ararina atae God esae epone tale Natuna ateva Taumattu ngateva, God nonga aue emene asaesae ararina atae Natuna ateva Taumattu ngateva, me isaa o voto aue eghelei parasi.

³³ “Kapughu aliki etoa! Karika oroi nau aue atoka teeiem, me ghaisa ngarighi am tiuua tani paeaghi. Aghaauliaa llo nongina aghe aauliaa ta ajiu etoa, ‘Karika am rooroo tani lao nongina ngalaolao.’

³⁴ “Ngatautau aatu ouna inangari niloeloe: elome etaimim am aielousi. Nongina aghi aghe aielousieiniemla, elome etaimim am tani aielousi. ³⁵ Arova elome etaimim va am aielousi, ila akapa aue la kila va am kapughu disaepolo iem.”

Iesu ghe uela va Pita aue eliu vilina etana

(Mat 26:31-35; Mak 14:27-31; Luk 22:31-34)

³⁶ Saemon Pita ghe kolomila Iesu va, “Vau eteva, eaa aue ulao?”

Iesu ghe liula me ghe uela va, “Karika urooroo tani lao nongina ngalaolao tale isaa oia nau. Auena aue uaimuli.”

³⁷ Pita ghe liula me ghe uela va, “Vau eteva, vaalua me karika arooroo tani usio tale isaa oia nau? Aghi aue amate ta polim.”

³⁸ Iesu ghe kolomiela va, “Uannaa va aue umate ta mausighi? Aghaaulia ngakoronna etam va aue uaulia ngakasina kotoluaata va karika ukilakilaieghi, me auena taita ateva paolo eaangari.

14

Iesu salana ia tani lao ta Tamane

¹ “Am rau mene alousiusi. Am aiesoaa ta God, me am aiesoaa tee etaghi. ² Tanganuena Tamaghi oroiannaaili voto tani toka etana, me ngalaolao tani aimonomonosiaa isaa o voto aue kaluimim. Karika aue aghele auliaa arova isaa o voto kamena. ³ Poli ngalaolao tani aimonomonosiaa tanganueimim, me aue amene sio ghajiem, me am laa toka teeieghi tale voto ateva atokatoka etana. ⁴ Ngam ghe kilala salana atikirighi tani lao tale voto ateva ngalaolao etana.”

⁵ Me Tomasi ghe uela etana va, “Vau eteva, karika ami kilakila va eaa aue ulao. Vaalua aue ami kila salana atikirighi?”

⁶ Iesu ghe uela etana va, “Aghi salana aghi, koronna ieghi me maulue ieghi. Karika teva aue erooroo tani lao ta Tamaghi ta emae mua etaghi.

⁷ Arova ngam ghe kilaieghila, ngam ghe kilala Tamaghi. Etiitiuua ghaine ngam kilaiela, me ngam ghe taraiela.”

⁸ Pilip ghe uela etana va, “Vau eteva, ami anna va uapasunga Tamam etaimami, me aue vira mene masina etaimami.”

⁹ Iesu ghe uela etana va, “Ei Pilip! Vaalua me ngaghe toka teeemla oroi nau, me karika ughe kilaieghi? Lo ateva ang ghe taraieghila, ang ghe tarala Tamaghi. Vaalua me uue va, ‘Uapasunga Tamam etaimami?’

¹⁰ Karika uaiesoaa va aghi ta Tamaghi, me ia etaghi? Inangari aghaauliaa etaimim karika nim nannaaghi, ta Tamaghi etokatoka etaghi, me ia eghelei isaa o niuungu. ¹¹ Am aiesoaa nau eteva aue va aghi ta Tamaghi, me ia etaghi. Arova karika, am annaa niuungu aghe gheleila me aue eakorokorongana uneimim niaikaiaa. ¹² Aghaaulia ngakoronna etaimim va lo ateva eaiesoaa etaghi, isaa o niuungu agheelei ie tee aue

13:33: Jon 7:33-34. **13:34:** Jon 15:12, 17; 1 Jon 3:23; 2 Jon 5. **14:3:** Jon 12:26. **14:6:** Jon 11:25; Rom 5:1-2. **14:7:** Jon 8:19. **14:9:** Jon 12:45; Kol 1:15; Hib 1:3. **14:10:** Jon 12:49. **14:11:** Jon 10:38. **14:12:** Mak 16:19-20.

eghelei me voto aue eghelei aue elau llo oia agheelei, ta poli ngalaa saesae ta Tamaghi. ¹³ Me saa voto am kolomi tale ararighi eteae aue aghelei. Tale ia o salana atikirighi, Natuna aue etau sae ararina ateae Tamane. ¹⁴ Arova righi voto am kolomi etaghi, tale ararighi eteae, aue aghelei.

Iesu ghe uela va aue etau sio Spirit Manga ateva

¹⁵ “Arova am aielousieinieghi, aue am nongo usilaa inangarighi aue va am ghelei. ¹⁶ Aue akolomi Tamaghi, me aue etau aatu mene kateva tau ngai sausi aue etoka teeiem nau ekapa atoa, ¹⁷ Spiriti eteva aue eapasunga voto koronna. Taumattu tale kosa ateva oia karika la rooroo tani ghaaia, poli karika la kilakilaia, me karika laghe taraia. Me am, am kilakilaia, poli etokatoka teeiem, me auena aue etoka elome etaimim. ¹⁸ Karika aue anim kasu vuliem arova aliki raue vulu etoa; aue amene mae taraiem. ¹⁹ Karika aue emasau, me taumattu tale kosa ateva oia la ruu tani taraieghi, me am aue am taraieghi. Poli aghi maulue ieghi, am tee aue am maulue. ²⁰ Me ia o nau eteva aue am kila va aghi ta Tamaghi, me am etaghi, me aghi etaimim. ²¹ Lo ateva taumattu ekila inangarighi niloeloe me enongo usilaa, eaielousieinaghi. Me Tamaghi eaielousieinia, me aghi tee aue aghaielousieinia, me aue aghapasungainaghi etana.”

²² Mene kateva Jiudas (karika va Iskariot) ghe uela ta Iesu va, “Vau eteva, vaalua me aue uapasungainio nonga etaimami, me karika va taumattu tale kosa akapa ateva?”

²³ Iesu ghe liula me ghe uela etana va, “Lo ateva taumattu eaielousieinaghi, aue enongo usilaa inangarighi, me Tamaghi aue eaielousieinia, me aue angalu mae etana tani toka aitauaa teeia. ²⁴ Lo ateva etam aielousieinaghi, karika aue enongo usilaa inangarighi. Isaa oia inangari am nonganongo karika inangarighi, ta inangarina Tamaghi, ia ghe sungieghila tani sio.

²⁵ “Isaa oia inangari aghaauliaa nau atokatoka teeiem. ²⁶ Me Tau ngai sausi eteva, Spirit Manga ia, aue Tamaghi esungia tani sio tale ararighi eteae, aue eapasunga ngakapa voto etaimim me aue esausiem tani mene nnaa llo voto aghe auliaala etaimim. ²⁷ Luei eteva aghalokoia etaimim. Kalughu luei eteva ngatautau aatu etaimim. Lo ateva o luei karika nongina lo ateva luei kosa ateva etautau aatu. Am rau mene alousiusi me am matautu.

²⁸ “Ngam ghe nongola ngaghe auliaala etaimim va, ‘Aue akasu, me aue amene mae taraiem.’ Arova am ailousieinaghi, aue am ghele masimasi poli aue asae ta Tamaghi, ta poli Tamaghi namuu ia etaghi. ²⁹ Auena isaa o voto elutu, me anim aulia ngakasina alokoi kieimim, poli nau isaa o voto elutu, aue am aikaaiia etaghi. ³⁰ Karika aue aghaippooa ngaoroi teeiem, poli vau tapaa kosa ateva ange reerekata. Me karika righi sarasarakaniaane tani ghelei righi voto ta ngetaghi, ³¹ me aue taumattu tale kosa ateva la kila va aghaielousiaa Tamaghi, poli llo Tamaghi ghe auliaa tau mae sio aghelei.

“Am tingina saela me ita kasu.”

14:13: Mat 7:7; Jon 15:16. **14:15:** Jon 15:10; 1 Jon 5:3. **14:16:** Jon 14:26; 15:26; 16:7.

14:17: Jon 16:13. **14:20:** Jon 17:21-23. **14:24:** Jon 7:16. **14:28:** Jon 20:17. **14:29:** Jon 13:19.

15

Iesu koronna atae uasa uaeni

¹ Iesu ghe mene uela va, "Aghi koronna atae uasa uaeni, me Tamaghi umana paa ngutana atingiu. ² Lo atikirighi tuuna etaghi etam kuukuneaa righi uenenna, esaisai velua, me llo tuuna ekunekune, esaisai velu lutu llo tuuna karika masina, me eraarangisana tani mene kuneaa mene righi uenena. ³ Inangari aghe ppooala etaimim ghe gheleiemla ngam ghe raarangisanala. ⁴ Am toka etaghi me aue atoka etaimim. Laa ngai eteva karika aue righi uenenna arova etam tuutuu tale aina ateva. Nongina am, arova am tam toka etaghi, karika aue am kuneaa righi ue ngai.

⁵ "Aghi aina aghi me am laangina iem. Lo ateva etoka etaghi me aghi atoka etana, aue ekuneaa oroi ue ngai. Poli karika urooroo tani ghelei teva voto arova karika ieghi. ⁶ Lo ateva taumattu karika etokatoka etaghi, aue la ghaa velua nongina la ghaaghaa velu laa ngai, me nau ange mmatela, la ghaaghaa me la tautau sae tale kuraa. ⁷ Arova am toka etaghi me inangarighi etoka etaimim, nau am kolomi righi voto, aue am ghaa. ⁸ Arova am kuneaa oroi ue ngai, aue la tau sae ararina atae Tamaghi, me am aue ekapughu disaepolo iem.

⁹ "Nongina Tamaghi ghe aielousieinaghila, aghi tee aghe aielousieinamla. Am toka tale ia o niaielousi eteva kalughu ia. ¹⁰ Arova am nongo usilaa inangarighi niloeloe, aue am toka tale aielousiaaghi eteva, nongina aghi aghe nongo usilaala inangarina niloeloe Tamaghi, me aghe tokatoka tale aielousiaane ateva. ¹¹ Aghannaaili va lo ateva nimasimasi kalughu ia etoka etaimim, me epasu tale maamauluaaimim. Liuna avalua o me aghaauliaa isaa oia inangari etaimim. ¹² Inangarighi niloeloe isaa avalua toko: am aielousiaa mene kateva elome etaimim nongina aghi aghe aielousieinamla. ¹³ Arova teva taumattu eaielousiangaili kapuna atoa me ghele tau velu maamauluaane tani sausila, ia o lo ateva ase niaielousi, namungaili ia elaulau ekapa mene kasina ase niaielousi. ¹⁴ Aue kapughu iem arova am ghelei voto aloeloeam etana. ¹⁵ Ia oia karika ngakolokoloam va tau ngai nonganongo anna iem, poli tau ngai nonganongo anna ateva etam kilakila voto vauna ateva eannaa tani ghelei. Ngakolokoloam va kapughu iem poli isaa akapa voto aghe nongola ta Tamaghi ngaghe aulia ngaotula etaimim. ¹⁶ Karika va am, am ghe suoongainieghila, ta aghi aghe suoongainiemla, me aghe tau aatu sio niuungu tani kasu, me am kuneaa oroi llo ue ngai etokatoka liu. Liuna avalua o me nau eteva am kolomi righi voto ta Tamaghi tale ararighi eteae, aue Tamaghi etau aatu. ¹⁷ Isaa o inangari niloeloe aghaauliaa etaimim: am aielousiaa mene kateva elome etaimim.

Taumattu tale kosa ateva aue la ssa tee disaepolo atoa

¹⁸ "Arova taumattu tale kosa ateva oia la ssa teeiem, am nim annaa va laghe ssa tee akasina teeieghila. ¹⁹ Arova kosa ateva oia tanganueimim tuungia, aue la ghele masieinam va kapuira iem, me poli ngaghe suoongainamla tale kosa ateva oia, liuna avalua o me la sessa teeiem. ²⁰ Am annaa llo aghe auliaala etaimim va, 'Tau ngai nonganongo

15:2: Mat 3:10. **15:6:** Mat 7:19; 13:42. **15:8:** Mat 5:16. **15:10:** Jon 14:15; 1 Jon 2:5.
15:12: Jon 13:34. **15:13:** Jon 10:11; 1 Jon 3:16. **15:14:** Mat 12:50. **15:17:** Jon 13:34.
15:19: Jon 17:14. **15:20:** Jon 13:16.

anna ateva karika namuu ia ta vauna ateva.' Arova laghe gheelei saasakiaa etaghi, aue la ghelei tee etaimim. Arova laghe nongo usilaala inangarighi, aue la ghele nongo usilaa tee inangariimim. ²¹ Aue la ghelei teeiem isaa o voto poli mausi ararighi eteae, ta poli karika la kilakila lo ateva ghe sungieghila tani sio. ²² Arova aghe tam sio mae tani auliaa inangari etaira, karika aue la ghele tara kila va gheegheleiaaira sesa, me ia oia karika la rororo tani ue va la tam kilakila va gheegheleiaaira sesa. ²³ Lo ateva esessa teeieghi, esessa tee Tamaghi. ²⁴ Arova aghe tam toka teeilala me aghe tam gheleila niuungu elome etaira, nongina karika mene teva taumattu ghe gheleila emua arau, karika aue la ghele tara kila va gheegheleiaaira sesa. Me poli laghe tarala, liuna avalua o me la sessa teeengalua me Tamaghi. ²⁵ Isaa oia voto elutulutu tani asokoi inangari laghe pitila tale uneira inangari nipaopao, eue va, 'Karika esuisui kkai tale teva voto me la nim sessaila etaghi.'

²⁶ "Nau tau ngai sausi eteva emae, aue eauliaa uunguaaghi etaimim. Aue asungia tani sio etaimim, ia o Spiriti eteva eaapasunga voto koronna, aue ekasu ta Tamaghi. ²⁷ Me am tee, aue am aulia ngaotueghi poli am ghe toka teeieghila nau aghe tiuala uunguaaghi.

16

¹ "Aghaaauliaa isaa o voto etaimim poli am rau mene oghi vulu aikaaiaaimim. ² Aue la tiu veluem tale aleira ale nivelu eitauua, me aue nau emaemae lo atoa la uvi emateam, aue la ghanna va la gheelei uunguaane God. ³ Isaa o voto aue la ghelei etaimim poli karika la kilakilaiengalua me Tamaghi. ⁴ Aghaaauliaa isaa o voto etaimim me nau isaa o voto etiuaa tani lutu, aue am nnaa va ngaghe auliaala kieimim.

Uunguaane Spirit Manga ateva

"Aghe tokatoka teeiem, liuna avalua o me karika aghe aauliaa isaa o voto emua arau. ⁵ Me ia oia ngamene laa saesae ta lo ateva ghe sungieghila tani sio, me karika teva etaimim ekookolomieghi va, 'Eaa ulao?' ⁶ Nau ngaghaauliaa me ngam nonganongo isaa o inangari ngam nim aalousiusi. ⁷ Aghaaulia ngakoronna etaimim va emaamasina va akasu, poli arova atam kasu, tau ngai sausi eteva karika aue esio etaimim, me poli ngakasukasu aue asungia tani mae etaimim. ⁸ Nau eteva emae aue eghelei taumattu tale kosa ateva oia la kila amasina ssavoto me ghulughuluena me niaiskei. ⁹ Tale ssavoto, poli la tam aiesoaa etaghi, ¹⁰ me tale ghulughuluena, poli ngalaa saesae ta Tamaghi, me karika aue am mene taraeighi. ¹¹ Me tale niaiskei, poli vau tapaa kosa ateva oia ang ghe aisakeila, me ghe tam roola.

¹² "Oroiannaaili voto aghanna tani auliaa etaimim, me poli isaa oia nau karika aue am kila amasina. ¹³ Nau Spiriti eteva eaapasunga voto koronna aue emae, aue eauliaa voto koronna etaimim. Karika aue eauliaa righi voto nim nannaane. Aue eauliaa llo ghe nongola me aue eauliaa kieimim tale voto auena emae. ¹⁴ Aue easaesae ararighi eteae, poli aue eghaa inangarighi me eauliaa etaimim. ¹⁵ Isaa akapannaaili voto kannaa Tamaghi, kalughu. Liuna avalua o me aue va, 'Aue eghaa inangarighi, me eauliaa etaimim.'

Nialousiusi me nimasimasi

¹⁶ “Karika masauna arighi me aue am lungieghi, me karika aue emasau me aue am mene taraieghi.”

¹⁷ Me katoa tani kapuna disaepolo laghe aikolomieinila va, “Vaalua me eue va, ‘Karika masauna arighi me aue am lungieghi, me karika masau me aue am mene taraieghi,’ me eue tee va, ‘Alao ta Tamaghi?’”
¹⁸ Laghe aikolomieinila va, “Vaalua malloeanu nau eue va ‘karika masauna arighi?’ Karika ita kilakila amasina llo eaauliaa.”

¹⁹ Iesu ghe kilakila saa voto ateva laghe anna tani kolomia. Liuna avalua o me ghe uela etaira va, “Nguela va, ‘Karika masauna arighi me aue am lungieghi, me karika masau me aue am mene taraieghi.’ Isaa o llo am aikolomainiem etana? ²⁰ Aghaaulia ngakoronna etaimim va aue am ngala me am alousiusieili, me taumattu tale kosa ateva oia aue la masimasi. Me am, aue am alousiusieili, me alousiusiaaimim aue am mene masimasi etana. ²¹ Nau aliki eteva ange anna tani lutu, vause ateva ealousiusi poli ekilakila va nau nimmarikana ange rekatala, me nau aliki eteva elutulutu, eaikkaluaa nimmarikana ghe ghaala, poli emasimasi va aliki eteva ange lutula tale kosa ateva. ²² Ia o voto ateva nonginaaili am. Ia oia am aalousiusi me aue amene taraiem, me aue am masimasi. Lo ateva nimasimasi, karika teva aue eghaa velua etaimim. ²³ Ia o nau eteva karika aue am kolomieghi tale teva voto. Aghaaulia ngakoronna etaimim va Tamaghi aue etau atatu voto am kolomi tale ararighi eteae. ²⁴ Nau too ang ghe lao sio karika am ghe kookolomi righi voto tale ararighi eteae. Am kolomi me aue am ghaa me aue am pasu tale nimasimasi.

Iesu ghe apalala kosa ateva

²⁵ “Isaa o voto aghaauliaa etaimim tale inangari niaimatoonga, me aue nau too emaema, karika aue aghauliaa voto etaimim tale inangari niaimatoonga. Aue aghaulia ngamasalikangaili Tamaghi etaimim, me aue am kila amasinaailiia. ²⁶ Ia o nau eteva aue am kokkolomi tale ararighi eteae, me karika aue va aghi aue akolomi Tamaghi tani sausiem, ²⁷ poli Tamaghi tee eaielousieinam ta am, am ghe aielousieinaghila me am aiesoaa va aghi aghe tokatoka tee God, me aghe sio mae. ²⁸ Aghe kasula ta Tamaghi, me aghe sio mae tale kosa ateva oia, me aue amene kasu vuli kosa ateva oia tani mene sae ta Tamaghi.”

²⁹ Me kapuna disaepolo atoa laghe uela va, “Ngami vira mene ghaagħha amasina inangarim, poli karika umene poppooaa inangari niaimatoonga. ³⁰ Ia oia ngami kilakila va ukilakila akapa voto, me karika teva aue ekolomio tale righi nikokkolomi, poli ukilakila akapa nannaaimami. Liuna avalua o me ami aiesoaa va ugħe kasula ta God.”

³¹ Iesu ghe liula me ghe uela etaira va, “Angam vira aikaaiaa etagħi? ³² Nau ange aakalakalaa me ange rekatala va aue la għameti reerekatainam, me kateva kateva etaimim aue eilou lao tanganuena. Aue am ilou vulieghi me aue ekapa kapugħu, me karika va aue ekapaa ħalli kapugħu, ta poli Tamaghi aue etoka teeieegħi.

³³ “Aghe aauliaa isaa oia inangari etaimim, poli aghħanna va am toka etagħi, me aue luei eteva etoka etaimim. Kosa ateva oia oroieilli

nimmerikana am ghaagħha, me am rau mene sio asoasoa, poli ngagħe apalala voto tale kosa ateva oia.”

17

Iesu għe pureaala kapuna disaepolo atoa

¹ Nau Iesu għe ruula tani aippooaa me għe taatara saela epona liu me għe uela va, “Tamagħi, ange għaala nau. Utaw sae ararina atħħae natum, me natum tee etaū sae ararim atħħae. ² Poli ugħe tau lao sio ninamu ngateva etħan tħalli taumattu ngakapaa ħalli, va aue etħall Maulue ateva tokatoka liu ia ta lo atoa taumattu ugħe taula lao sio etħan. ³ Maulue ateva tokatoka liu ia, ia avalua toko, va taumattu ekilaio, va io God koronna io, me la kila tee Iesu Karisto ugħe sungielha tħalli sio. ⁴ Agħe asaesela ararim atħħae me sarasarakaniaam tale kosa ateva; ngagħe ruula niuungu ugħe tau mae sio etagħi va agħelei. ⁵ Isaa oia Tamagħi, tale voto ateva utokatoka, utaw mae ninamu ngatev għe tokatoka teeieegħi emua arau, nau kosa ateva karika għe lutu.

⁶ “Ngagħe aulia nġaotula ararim atħħae tale taumattu tale kosa ateva oia ugħe taula mae sio etagħi. Kapum ila me ugħe taula mae sio etagħi, me ngila għe nongo usilaala inangarim. ⁷ Ia oia ngila għe kilala va isaa akpa voto ugħe tau mae sio etagħi kalum. ⁸ Ngagħe auliaa tau lao sio inangari ugħe auliaa tau mae sio etagħi me ngila għe għaalha, me ngila għe akorronna il-lila va aghi agħe kasula etam me ngila għe aika aħħala va io ugħe sungieghila. ⁹ Akookolomi sae mausiira. Karika akookolomio sae tale taumattu ngakpa atoa tale kosa ateva oia. Akookolomio sae mausi taumattu ugħe tau mae sio, poli kapum ila. ¹⁰ Taumattu ngakpa kapugħu, kapum tee, me lo kapum kapugħu tee ila, la għaapasunga masi għeeleiaagħi. ¹¹ Me ia oia karika aue amene toka tale kosa ateva ta ngamene laa saesae etam. Me ila ngila tokatoka. Tamagħi manga io, uaitarainila tale ararim atħħae sarasarakania ia, ia o ararim etħħae ugħe taue mae sio etagħi, me aue ekateva nonga ila, nongina italua ekaakateva nonga italua. ¹² Nau agħe tokatoka teeila, agħe aitħra ngamxinaila tale sarasarakania ararim atħħae, ia o arari etħħae ugħe taue mae sio. Agħe aitarainilala, karika teva għe rauela, llo nongħi ateva taumattu elao lao tale salana nitturru għe rauela. Isaa avalua o me inangari tale Uru ngai Manga ateva għe koronnala.

¹³ “Ia oia ngamene mae saesae etam. Isaa oia voto aghħa auliaa tale nau oia atokatoka tale kosa ateva, me aue la għha kalugħu nimasimasi, me aue epasu tale urunguitaniira. ¹⁴ Agħe auliaa tau lao sio inangarim, me taumattu ngatoa tale kosa ateva oia esessaila etħħira, poli karika va mene taumattu tale kosa ila, nongħi aghi karika va taumattu tale ia oia kosa ateva. ¹⁵ Karika va akookolomio sae va ughħa vella tħalli tale kosa ateva oia. Akookolomio tħalli aitarainila tale sesa taumattu ngateva. ¹⁶ Karika va taumattu tale kosa ila, nongħi aghi karika va taumattu tale kosa iegħi. ¹⁷ Uamangaila tale llo voto koronna; poli inangarim koronna. ¹⁸ Nongħi ugħe sungieghila tħalli sio tale kosa ateva, aghi ngamene sungisungila tħalli sio lao akpa see tale kosa ateva. ¹⁹ Mausiira me agħe tau ekpa aatu sio maħħa l-imbnejha etam, me ila tee aue la tau ekoronna lao maħħa l-imbnejha etam.

²⁰ "Karika apuupure nonga etaira, ta apuupure tee ta lo atoa aue la ghaikaaiaa etaghi nau eteva la nongo inangariira. ²¹ O Tamaghi, apuupure etaira va ekateva nonga ila, nongina io utokatoka etaghi, me aghi etam. Aghaloanna va ila tee la toka etaitalua, me taumattu ngatoa tale kosa ateva oia aue la ghaikaaiaa va io ughe sungieghila. ²² Ughe tau mae sio sarasarakana etaghi, me aghi, ngaghe tau lao sio isaa o sarasarakana etaira va aue ekateva nonga ila, nongina italua ekaakateva nonga italua, ²³ aghi etaira me io etaghi, me aue ugheleila la tani kateva nonga ila, me aue taumattu tale kosa ateva oia la kila va io ughe sungieghila tani sio, me uailousieinila nongina uailousieinaghi.

²⁴ "Tamaghi, aghaloannaaili va taumattu ughe tau mae sio etaghi, la toka teeieghi tale masaliki eteae alaa toka etana, me aue la tara sarasarakana ughe tau mae sio etaghi nau ughe tam ghelei kosa ateva, poli ughe ailousieinaghi.

²⁵ "O Tamaghi, eeleiaam ghulughuluena, me taumattu tale kosa ateva la tam kilakilaio, ta aghi akilakilaio, me kapughu etoa la kilakila va io ughe sungieghila tani sio. ²⁶ Aghe auliaala me apasungaala eeleiaam etaira, me aue amene auliaa etaira. Me aue lo ateva niaielousi ugheleia etaghi aue etoka tee etaira, me aghi tee atoka etaira."

18

Laghe kunela Iesu

(Mat 26:47-56; Mak 14:43-50; Luk 22:47-53)

¹ Nau eteva Iesu ghe ruula tani looloo sae, ia me kapuna disaepolo atoa laghe laula tale ateo arighi Kidron ta ngetana, me laghe lao sio tale paa ngutana atingiu.

² Jiudas, ia o taumattu ngateva aue etaule Iesu ta tau ngai ssateena atoa, ghe kilakila nongina Iesu ghe lao sio, poli oroi nau ia me kapuna disaepolo atoa laghe laolao tale ia o voto ateva. ³ Jiudas ghe lao sio tale paa ngutana atingiu tee soldia ngatoa me polisi etoa, namuu ta pristi etoa me Paresi etoa laghe sungilala. Laghe sausau lam me usulu me voto aiaaiuvii.

⁴ Iesu ange kila akapala voto aue elutu tale maamauluaane. Liuna avalua o me ghe tingina ghoala etaira me ghe uela etaira va, "Am paepae see?"

⁵ Laghe liula me laghe uela va, "Ami paepae Iesu aNasareti ia."

Me Iesu ghe uela va, "Aghi oia." Jiudas, ia o ghe tau lao sio Iesu, ghe tiitingina teeila. ⁶ Nau eteva ghe ruula tani ue va, "Aghi oia," me laghe kaakatungaala viliira etapaa kosa.

⁷ Me Iesu ghe mene kolomilala va, "Am paepae see?"

Me laghe uela va, "Iesu aNasareti ia."

⁸ Iesu ghe liula me ghe uela etaira va, "Ngaghuliaala etaimim va aghi oia. Arova am paepaeaghi, am tau velu lo atoa toko, me la kasu." ⁹ Isaa o voto ghe lutula me inangari ghe aulia ngakasina alokoila ghe koronnala va, "Karika teva ughe tau mae sio etaghi ghe rauela."

¹⁰ Saemon Pita ghe sausau baenata ateva. Ghe kapeala, me ghe patoala kapuna tau ngai nonganongo anna ateva Namu ngateva ta pristi etoa, me ghe sai patela talingane ativilau tale pai muenna atelange. Ararina ateae ia o tau ngai nonganongo anna ateva ta Malkus.

11 Me Iesu ghe uela ta Pita va, “Kaaila baenata ateva tale aikakkaaina ateva. Uannaa va karika arooroo tani ropi kapa ateva Tamaghi ghe tauue mae sio?”

Laghe laoaa sio Iesu ta Annas

(Mat 26:57-58; Mak 14:53-54; Luk 22:54)

12 Me kapuira namu ngateva soldia me kapuna soldia ngatoa me polisi etoa me kapuira namu ngatoa ajiu etoa laghe kunela Iesu, me laghe irila nimana. **13** Me laghe laoa ngakasinaie sio mua ta Annas. Annas alumuna ta Kaeapas, Kaeapas namuu ia ta pristi etoa tale ia o ninamanama ateeae. **14** Kaeapas ia o taumattu ngateva ghe uela ta ajiu etoa va emaamasina arova kateva nonga taumattu ghele mate tani ghaa liuira akapa taumattu ngatoa.

Aitiutiu ta Pita tani ue va etam kilakila Iesu

(Mat 26:69-70; Mak 14:66-68; Luk 22:55-57)

15 Saemon Pita me mene kateva disaepolo lalu ghe aimuli tee Iesu. Poli namu ngateva tana pristi ekilakila ia o disaepolo ateva, liuna avalua o me ia o disaepolo ateva ghe sso teela Iesu elome tale unna valavala ateeae ia o namu ngateva tana pristi. **16** Me Pita nonga ghe toitoi eleka tale atamana ateeae. Ia o disaepolo ateva, namu ngateva tana pristi ghe kilakilaia, ghe oghi ghoala, me ghe aippooaa teela aliki vause ateva ghe aaitoiaa atamana ateeae, me ghe kolola Pita, me lalu ghe kupi ssola.

17 Me aliki vause ateva ghe aaitoiaa atamana ateeae ghe uela ta Pita va, “Io tee kateva kapuna disaepolo ia okae taumattu ngateva, va?”

Pita ghe liula me ghe uela va, “Karika va aghi tee.”

18 Poli kkaili eteva me tau ngai nonganongo anna atoa me polisi etoa laghe aisokosokolaala kura ateeae, me laghe maamaruu. Pita tee ghe tiitingina teeila tani maruu.

Namu ngateva tana pristi ghe kolomila Iesu tale nikokkolomi

(Mat 26:59-66; Mak 14:55-64; Luk 22:66-71)

19 Namu ngateva tana pristi ghe kolomila Iesu ta kapuna disaepolo atoa me tale voto ghe aapasunga.

20 Iesu ghe liula me ghe uela va, “Aghe aapasunga voto ta mata ngoroi etoa. Aghe aapasunga tale ale nivelu eitauaa me tale ale manga, isaa o voto ajiu etoa laghe mae veluelu eitauaa etana. Karika aghe aisulia righi voto. **21** Vaalua me ukookolomieghi? Ukolomi lo atoa laghe nonganongoaghi, poli ila la kilakila sa ateva aghe aaulieinia.”

22 Nau ta Iesu ghe aulia ngavaluela o, me kateva polisi ghe tiitingina akalakalaa etana ghe posalaiela me ghe uela va, “Vaalua me uliuliu ase inangari eteva o ta namu ngateva tana pristi?”

23 Iesu ghe liula me ghe uela va, “Arova aghauliaala righi voto sesa, uaulia ngaotu, me arova aghauliaa voto koronna, vaalua me uposalaiiegħila?” **24** Me Annas ghe sungiela va elao ta Kaeapas, ia namuu ia ta pristi etoa. Iriiri ia me laghe laoainie sio.

Pita ghe mene uela va karika ekilakila Iesu

(Mat 26:71-75; Mak 14:69-72; Luk 22:58-62)

25 Saemon Pita ghe tingina maamaruu me laghe kolomiela va, “Io tee kateva kapuna disaepolo, va?”

Ghe liula me ghe uela va, “Karika va aghi tee.”

²⁶ Kateva kapuna tau ngai nonganongo anna namu ngateva ta pristi etoa, kapuna ia ia o taumattu ngateva Pita ghe patoa vella talingane atelange, ghe uela va, "Aghe tara teeiola tapaa ngutana nau eteva am me ia, va?" ²⁷ Me Pita ghe mene uela va, "Karika." Me paolo ateva taita ia ghe aangulara.

Laghe laoaa sio Iesu ta Paelat

(Mat 27:1-2, 11-14; Mak 15:1-5; Luk 23:1-5)

²⁸ Vara me ajiu etoa laghe ghaala Iesu ta Kaeapas, me laghe laoainie sio tanganuena Gavana ngateva. Elue talaua poopooa. Laghe tam aloanna tani kupi sso tanganuena, poli laghe rau gheleila va laghe tam raarangisana, poli laghe aloanna va la usi tani namanama ta Pasova ngateae. ²⁹ Paelat ghe kupi ghoa mae me ghe uela va, "Vaalua me am maeaa sio taumattu ngateva oia va eaisakei?"

³⁰ Me laghe uela va, "Arova karika ghe gheelei righi sesa voto, karika aue ami ghele maeainia etam."

³¹ Me Paelat ghe uela etaira va, "Am ghaaiela, me am laa ghelei niaiskei etana nongina uneimim lo eaauliaa."

Me ajiu etoa laghe liula me laghe uela va, "Karika erooroo va ami, ami uvi emate teva taumattu." ³² Isaa o voto ghe lutula me inangarina Iesu ghe aaimatoonga ase nimate ateaue eghaaia ghe lutu ekoronnala.

³³ Paelat ghe mene kupi ssola tale ale ateva me ghe uela va la kolo mae Iesu, me ghe kolomila Iesu va, "Io kapuira kingi io ajiu etoa?"

³⁴ Me Iesu ghe kolomiela va, "Nannaam llo ona, o toa laghe auliaa tau aatu sio etam?"

³⁵ Paelat ghe liula me ghe uela va, "Vara ajiu eghi? Kapum atoa me namuu ta pristi etoa la maeainio sio etaghi. Sa ateva ughe gheleielaa?"

³⁶ Iesu ghe uela va, "Ararimangalighi eteva karika va pei tale kosa ateva oia. Arova pei tale kosa ia, aue kapughu tau ngai nonganongo anna atoa la ghele aiuvu tani ghelei runga ajiu etoa, me karika aue la ghele kuneieghi. Me ia oia, ararimangalighi eteva karika pei tale kosa ateva ia."

³⁷ Paelat ghe uela va, "O io kingi io, va?"

Me Iesu ghe uela va, "Uaulia ngakoronna tani ue va aghi kingi eghi, poli mausina avalua o me aghe lutula, me aghe sio mae tale kosa ateva tani aulia ngaotu voto koronna. Lo atoa tale pai koronna ativilau, la nonganongo usilainaghi."

³⁸ Paelat ghe kolomiela va, "Saa ia koronna ateva voto?"

Ghe aulia ngavaluela o me ghe ghoala eleka nongina ajiu etoa, me ghe uela va, "Karika ngatarala righi voto esuisui kkai va sesa voto ghe ghelei. ³⁹ Kateva ase voto agheeleia nau Pasova, atautau velu kateva taumattu etokatoka tale ale mata voovoo ekupikupi ghoa. Am aloanna va atau velu kapuimim kingi eteva ajiu etoa?"

⁴⁰ Laghe ovaova anamuu tani liu va, "Karika mene ia! Utau velu Barabas!" Barabas tau niaiuvi ia.

19

Paelat ghe uela va la uvi emate Iesu

(Mat 27:15-31; Mak 15:6-20; Luk 23:13-25)

¹ Me Paelat ghe uela va la ghaa Iesu me la uetaia. ² Me soldia ngatoa laghe navitaala uasa rorroana tani ghelei unna kou nguru eteva, me laghe atokaie saela ta uruna, me laghe amolumoluela tale aiaasae ateva ghuaghuanna ia. ³ Laghe laolao akalakalaa etana me laghe ue va, “Ei, kapuira kingi eteva ajiu etoa!” Me laghe pooposala pasipasi matane.

⁴ Paelat ghe mene kupi ghoala me ghe uela ta ajiu etoa va, “Am tarala, ngamene aatinginaie ghoa etaimim tani auliaa kieimin va karika ngatarala righi voto esuisui kkai va sesa voto ghe gheelei.” ⁵ Nau ta Iesu ghe kupi ghoa mae, ghe aatoka kou nguru eteva rorroana ia me ghe aasae aiaasae ateva ghuaghuanna ia. Me Paelat ghe uela etaira va, “Taumattu ngateva ie toko, am taraiela.”

⁶ Nau eteva namuu ta pristi etoa me polisi etoa laghe taraiela, laghe ovaova atingina tani ue va, “Esae vukala tale aikotoo, esae vukala tale aikotoo!”

Me Paelat ghe uela va, “Am ghaaiela, me am laa ghavukalaie sae tale aikotoo. Ta ngetaghi, karika ngatarala righi voto sesa ghe gheleila.”

⁷ Ajiu etoa laghe liula me laghe uela va, “Tale uneimami inangari nipaopao, eauliaa va etani mate, poli eue va Natuna ia God.”

⁸ Nau Paelat ghe nongola isaa o inangari, maamatautuaane ghe mene lao tee sio, ⁹ me ghe mene kupi ssola tanganue Gavana ngateva, me ghe kolomila Iesu va, “Eaa ughe kasula?” Me Iesu karika ghe liula unna nikokkolomi eteva. ¹⁰ Me Paelat ghe uela va, “Karika uanna tani sama teeieghi, va? Karika ukilakila va aghi matuutulieni aghi tani auliaa, me aue ughele kasu, o la ghele avukalaio sae tale aikotoo?”

¹¹ Jesu ghe liula me ghe uela va, “Karika aue ghele righi sarasarakaniaa inangarim ta ngetaghi arova God epona liu ghe tam tau aatu sio. Liuna avalua o me lo ateva etautaueghi atu etam, kanna ssavoto elaulau kalum tani ssavoto, me namungaili.”

¹² Ghe tiuala o, Paelat ang ghe paepae salana vaalua tani ghelei, me etau velu Iesu me ekasu, me la rau mene uvi ematea. O me karika ta ajiu etoa laghe ovaova atingina, me laghe ue va, “Arova utau velua va ekasu, karika kapuna io Siisa. Poli lo ateva taumattu eue va kingi ia, ia tau ngai ssateena ia Siisa.”

¹³ Nau Paelat ghe nongola isaa o voto, ghe kupiaa ghoa mae Iesu, me ghe toka siola tale aitokatoka ateva aighelei niaiskei ia, tale voto ateva eleka la kolokoloa va “Atu ia”, me tale inangari nge Aramaik la ue va “Gabbata”. ¹⁴ Ia o nau eteva laghe aimonomonosiaa Pasova ngateva, me sinaka ateva ange tokatoka polaki,* me Paelat ghe uela ta ajiu etoa va, “Kapuimim kingi eteva toko!”

¹⁵ Laghe ovaova atingina me laghe ue va, “Kasueiniela! Kasueiniela me elaa vukala tale aikotoo!”

Me Paelat ghe kolomilala va, “Alaa ghavukala sae kapuimim kingi eteva tale aikotoo?”

Me namuu ta pristi etoa laghe liula me laghe uela va, “Karika mene teva kapuimami kingi, ta nim Siisa nonga.”

¹⁶ Liuna avalua o me Paelat ghe taue lao sio etaira va la laa ghavukalaie sae tale aikotoo.

19:2: Luk 23:11. **19:9:** Mat 27:12. **19:11:** Jon 10:18; Apos 2:23; Rom 13:1. **19:12:** Luk 23:2; Apos 17:7. * **19:14:** sinaka ateva ange tokatoka polaki Tale inangari nge Grik, nongina aiaaghaonomina (6) aoa ngateva.

*Laghe nili evukala saela Iesu tale aikotoo
 (Mat 27:32-44; Mak 15:21-32; Luk 23:26-43)*

Me laghe ghaala Iesu me laghe kasueiniela.¹⁷ Ghe saula unna aikotoo ateva me ghe kupi ghoala, me ghe lao sio tale voto ateva arova Riu uru taumattu ngateva, tale inangari nge Aramaik la aseasea va Golgota.¹⁸ Tale ia o voto ateva laghe nili evukala saela Iesu tale aikotoo ateva, ia me mene ghalua taumattu, kateva ta kativilau, me kateva ta mene kativilau, me Iesu elome.

¹⁹ Paelat ghe aimonomonosiaala inangari ghe pitila, me laghe nili evukala tee saela tale aikotoo. Inangari isaa avalua toko va, “Iesu aNasareti ia, kapuira kingi ia ajiu etoa.” ²⁰ Oroi ila ajiu etoa laghe ritila isaa o inangari, poli voto ateva laghe avukalala Iesu etana kalakalangina ia tale masaliki taatara, me inangari laghe pitila tale inangari nge Aramaik, Latin me Grik. ²¹ Namuu ta pristi etoa ajiu ila laghe lao sio tani tara Paelat, me laghe uela etana va, “Urau mene piti va uee va ‘Kapuira kingi ia ajiu etoa,’ ta upiti va ‘Ghe ue va, ‘Aghi kingi ieghi ta ajiu etoa.’”

²² Paelat ghe liula me ghe uela va, “Llo ngapitila, etoka nongina ngapitila.”

²³ Soldia ngatoa laghe ruula tani nili evukala sae Iesu tale aikotoo, me laghe ghaala ghinnanina, me laghe aikoitaala ghe rooaala taumattu ghaata. Me aiaasae ngelome nonga ateva ghe oghila, me laghe tarala va karika laghe saikiela tale oroi tuku kalio, ta laghe gheleiela tale tuku kateva nonga kalio, karika saasaiki ia.

²⁴ Liuna avalua o me soldia ngatoa laghe uela va, “Ita rau mene rasia, ta ita anamisi tani kila va see aue eghaaia.”

Isaa o voto ghe lutula tani asokoi inangari Uru ngai Manga ateva ghe aulia ngamuemua alokoila va,

“Aue la ghaikoita uneghi aiaasae ngelome ateva etaira,

me aue la anamisi tani kila va see eghaa uneghi koloso ateva.”

Soldia ngatoa laghe ghelei evaluela o.

²⁵ Kinna ghe tiitingina akalakalangina tale aikotoo ateva Iesu ghe vuuvukala etana, ia me nengane vause ateva kinna, me Meri vausenna ia Klopas, me mene kateva Meri aMakdala ia. ²⁶ Nau eteva Iesu ghe tarala kinna me disaepolo ateva ghe ailousiangailiia, lalu ghe tiitingina akalakalaa, me ghe uela ta kinna va, “Kinaghi, ierai o natum ia.” ²⁷ Me ta disaepolo ateva ghe uela va, “Kinam o.” Ghe tiuaala ta ia o nau eteva ia o disaepolo ateva ghe ghaaiela me ghe laoainie sio tangantuena.

*Matemateaane Iesu
 (Mat 27:45-56; Mak 15:33-41; Luk 23:44-49)*

²⁸ Nau eteva Iesu ghe kilala va isaa akapa voto ang ghe ruula, me tani ghelei voto Uru ngai Manga ateva ghe auliaala ekoronna, ghe uela va, “Aloghu etiulu ange kangngatala.” ²⁹ Aikaai uaeni kaakaalina ghe tokatoka. Liuna avalua o me laghe asuula tuku spans ateva me laghe tueiela tale tuu ngai eteva isopi ia, me laghe ssueinie saela ta paane Iesu. ³⁰ Nau Iesu ghe ropila uaeni kaakaalina, me ghe uela va, “Ngaruu ekapala uunguaaghi!” Me ghe tturrula, me ghe tau vella maamauluaane.

Soldia ngateva ghe soala kativilau ta Iesu

³¹ Ia o nau eteva nau niaipanipaniaa ia, me aue ghe pai sae nau manga ia. Poli ajiu etoa laghe tam aloanna va vilikiira ghe vukala tale nau manga ateva tale aikotoo, liuna avalua o me laghe kolomila Paelat va la paru kotokotoo kkeira, me la ghaa velu sio vilikiira. ³² Soldia ngatoa laghe lao sio tale aitiutiu eteva taumattu, me laghe paru kotoola kekena, me laghe mene lao sio ta mene kateva ta ilalua o taumattu ngalua laghe avukala teeilalue saela me Iesu. ³³ Nau eteva laghe mae sio ta Iesu va laghe tarala va ang ghe matela, karika laghe paru kotoola kkena. ³⁴ Kateva soldia ghe soala kativilau ta Iesu tale vaalau eteva, me arovaeaata ta rae me manu ghe akalala. ³⁵ Lo ateva taumattu ghe tarala eaauliaa voto ghe tarala, me inangarina koronna. Ekilakila va voto eaauliaa koronna, me aue am aikaaiia. ³⁶ Isaa o voto ghe lutula tani ghelei inangari tale Uru ngai Manga ateva laghe aulia ngalokoila ekoronna va, “Karika aue la paru kotoo teae riuna.” ³⁷ Me mene kasina inangari tale Uru ngai Manga ateva ghe uela va, “Aue la tara lo ateva taumattu laghe soaiela.”

Laghe kaiaala Iesu

(Mat 27:57-61; Mak 15:42-47; Luk 23:50-56)

³⁸ Vara me Josep, tanganuena tale masaliki taatara ateae eArimatia, ghe lao sio tani kolomi Paelat va ghe ghaa Iesu ang ghe matela. Josep kateva kapuna disaepolo Iesu, me ghe aaisulia poli ghe maamatauta ajiu etoa. Paelat ghe uela va eghaaia, liuna avalua o me Josep ghe lao sio tani ghaa Iesu me ghe kasueiniela. ³⁹ Me Nikodimas tee ghe mae sio. Ia, ia o taumattu ngateva ghe lao sio tani tara Iesu eleivoo. Nikodimas ghe ghaa lao sio voto masi ngusungusuaane la gheelei tale murr me aloi laghe kao aitauaala, maamataniaane erooroo kotolungaulu ghaata (34) kilogram. ⁴⁰ Lalu ghe ghaala Iesu me lalu ghe rariaala voto masi ngusungusuaane, me lalu ghe sumuela tale masi kalio, nongina ajiu etoa laghe gheelei. ⁴¹ Voto ateva laghe avukala saela Iesu etana tale aikotoo, utana atingiu ta ngetana, me liengani niaikkaia ngateae ouna ia etana, karika laghe alokoi teva taumattu ta ngetana. ⁴² Me poli nau niaipanipaniaa ia tale nau manga ateva, me liengani niaikkaia ngateae kalakalangina ia, laghe alokoila Iesu tale ia o voto ateva.

20

Iesu ghe totula tale nimate

(Mat 28:1-10; Mak 16:1-8; Luk 24:1-12)

¹ Elue talaua poopooa tale aitiutiu eteva nau tale uiki, nau ghe tam pai emasina, Meri aMakdala ia ghe ssola tale liengani niaikkaia ngateae, me ghe tarala va ngeila ghe atakiri vella atu eteva tale atamani liengani niaikkaia ngateae. ² Liuna avalua o me Meri ghe ilou lao sio ta Saemon Pita me lo ateva disaepolo Iesu ghe ailousiangailia, me ghe uela etairarua va, “Ngeila sau vella Vau eteva tale liengani niaikkaia ngateae, me karika ngami kilala va eaa ngeila alokoiola!”

³ Liuna avalua o me Pita me mene kateva disaepolo ngilalu ghe laolao tale liu eteva. ⁴ Lalua akapa lalu ghe ilou, me kateva etairarua ghe ilou

emuemuela ta Pita, me ghe laa sso rekata akasina. ⁵ Ghe tturruala tani taatara sso, me ghe tarala kilio laghe sumuela etana, me karika ghe kupi ssola. ⁶ Vara me Saemon Pita ghe aaimuli etana ghe rekatala me ghe kupi ssola tale liengani niaikkaia ngateae me ghe tara alokoila kilio ghe asoaso. ⁷ Me lo atiulu kilio laghe sumla uruna ateva etana ghoughou ia, me ghe asoaso ppae. ⁸ Vara me ia o disaepolo ateva ghe rekata akasinala ghe kupi ssola, ghe tarala isaa o voto me ghe aikaaiuala. ⁹ Karika aloira ghe maamasaanga llo Uru ngai Manga ateva ghe auliaala va Iesu aue emene totu tale nimate.

Iesu ghe rekataala ta Meri aMakdala ia

(Mak 16:9-11)

¹⁰ Me disaepolo alua lalu ghe lao sio nongina laghe tokatoka, ¹¹ me Meri ghe tingina ngangngala eleka tale liu eteva. Ghe ngangngala, me ghe tturruala tani taatara sso elome tale liengani niaikkaia ngateae, ¹² me ghe tarala ensolo alua tale usousoana ghinna lalu ghe tokatoka nongina Iesu ghe asola, kateva ta komo ghuruna, me kateva ta komo kkema.

¹³ Me lalu ghe kolomiela va, “Vause ateva, vaalua me ungangngala?”

Meri ghe liula me ghe uela va, “Ngeila sau vella Vaughu eteva, me karika akilakila va eaa ngeila alokoiola.” ¹⁴ Ghe aauliaa llo me vara ghe kiriela, me ghe tarala Iesu ghe tiitingina, me karika ghe kilakila va Iesu etana.

¹⁵ Me Iesu ghe uela etana va, “Vause ateva, vaalua me ungangngala, me upaepae see?”

Meri ghe annaa va tau ngai toi utana ia, ghe liula me ghe uela va, “Namu ngateva, arova io ughe ghaaiela, uauliaa va eaa ughe alokoiola me alaa ghaaia.”

¹⁶ Iesu ghe uela etana va, “Meri.”

Ghe kiriela me ghe uela va, “Rabboni!” (Inangari nge Aramaik, malloeana va “Tisa”.)

¹⁷ Iesu ghe uela va, “Urou mene posoaghi, poli karika aghe sae ta Tamaghi. Lao sio me ulaa ghauliaa ta nengaghi etoa va, ‘Ngalaasaesae ta Tamaghi me Tamaimim teeia, me kapughu Goto ia me am tee kapuimmi ia.’”

¹⁸ Meri aMakdala ia ghe laoaa sio masi kiukiu ta disaepolo atoa, me ghe uela va, “Aghe tarala Vau eteva!” Me ghe auliaala inangari Iesu ghe auliaala etana.

Iesu ghe rekataala ta kapuna disaepolo atoa

(Mat 28:16-20; Mak 16:14-18; Luk 24:36-39)

¹⁹ Elo alaina ateva aitiutiu eteva nau tale uiki, nau disaepolo atoa laghe lao aitauaa sio, me laghe aikavati runga poli laghe maamatauta ajiu etoa, Iesu ghe rekataala me ghe tinginala elome etaira, me ghe uela va, “Luei etoka etaimim.” ²⁰ Ghe aulia ngavaluelo o me ghe apasungaala nimane me lo ativilau pai laghe soaiela. Disaepolo atoa laghe masimasi etinginala nau laghe tarala Vauira ateva.

²¹ Me Iesu ghe mene uela va, “Luei etoka etaimim. Nongina Tamaghi ghe sungieghila, aghi ngamene sungisungiem.” ²² Ghe aulia ngavaluelo o, me ghe inoaa tau lao sio etaira me ghe uela va, “Am ghaa Spirit Manga

ateva. ²³ Arova am kkaluaa sesa gheeleiaaira mene katoa, aue isaa o voto aue ekapa, me arova am tam kkaluaa, isaa o voto karika aue ekapa.”

Iesu ghe rekataala ta Tomasi

²⁴ Ia o nau eteva Iesu ghe rekataala ta disaepolo atoa, Tomasi (la kolokoloa va Palue ia), kateva ta kasangaulu ghalua (12) disaepolo, karika ia. ²⁵ Liuna avalua o me katoa tani disaepolo laghe uela etana va, “Ami tarala Vau eteva!”

Me Tomasi ghe uela va, “Arova atani tara liu nili ta nimane, me atuli liu nili ta nimane tale vuuvuu nimaghi, me aposo lo ativilau pai laghe soaiela, aue avira mene aikaaiia.”

²⁶ Ghaitu (7) nau ghe lange sio me disaepolo atoa laghe mene tokatoka tale ale ateva, ila me Tomasi, me laghe aaikavati runga, me Iesu ghe tinginala elome etaira me ghe uela va, “Luei etoka etaimim.” ²⁷ Me ghe uela ta Tomasi va, “Posola toko, me utara nimaghi. Ssuua mae sio nimam, me uposo lo ativilau pai laghe soaiela etaghi. Erau mene ghalua nannaam, unim aiesoaa.”

²⁸ Tomasi ghe uela etana va, “Vaughu io me kapughu Goto io!”

²⁹ Me Iesu ghe uela etana va, “Poli angu taraiaghila, uaaiesoaa. Niarangise ta lo atoa karika la taatara, me la nim aaiesoaa.”

³⁰ Iesu ghe gheleila oroi mene kasina niaimatoongana ta mataira disaepolo atoa, me karika aghe pitila tale ia oia vuku eteva. ³¹ Me llo oia aghe pitila va am aiesoaa etana va Iesu Messaea ia, me Natuna ia God, me nau am aiesoaa, aue am ghaa maulue tale ararina atae.

21

Ghaitu (7) disaepolo laghe tarala Iesu

¹ Vara me Iesu ghe mene rekataala ta kapuna disaepolo atoa tale manu talia ngateae eTaiberias. Ghe rekataala etaira avalue toko va:

² Saemon Pita, Tomasi (la kolokoloa va Palue ia), me Nataniel aKena ia ta pai nge Galilii, me natuna taita alua Sebedi, me mene ghalua tana disaepolo laghe mae aitauaa sio. ³ Me Pita ghe uela etaira va, “Aghoa luku.” Me laghe uela etana va, “Ami usio.” Liuna avalua o me laghe saesaela tale paanaka ateva, me laghe ghoala tani luku, me ia o voo ngateva, karika laghe lukula righi kko.

⁴ Elue talaua poopooa me laghe tarala Iesu ghe tiitingina elosamarra, me karika laghe tara kilaiela.

⁵ Ghe ue ghoa etaira va, “Kapughu aliki etoa, am ghaala righi kko?”

Me laghe ue sso va, “Karika.”

⁶ Ghe uela etaira va, “Am velu uenaimim uvena ataeae tale pai muenna ativilau tale olimoim paanaka ateva, me aue am ghaa righi kko.” Nau laghe gheleila isaa o voto karika ngila ghe rooroo tani ae uvena ataeae, poli kko ghe oroiannaaili ila.

⁷ Me lo ateva disaepolo Iesu ghe ailousieiniaaili ghe uela ta Pita va, “Vau eteva okae!” Nau eteva Saemon Pita ghe kilala va Iesu okae, ghe mene asaela unna aiaasae ngeleka ateva (poli ghe ghaa velu elokoielo) me ghe aoso velu siola tapaa manu. ⁸ Me mene katoa etaira tana disaepolo laghe aaimuli tale paanaka ateva, laghe aeae uvena ataeae

pasu ia tale kko. Karika masau ila elae, ghe rooroo kateva ai (100) mita nonga. ⁹ Nau eteva laghe sokolaala, me laghe tarala kura ataeae me kko etoa laghe asoaso etana me verete.

¹⁰ Me Iesu ghe uela etaira va, “Am ghaa mae sio righi kko avirina am lukula.”

¹¹ Saemon Pita ghe saesaela me ghe ae alokoi saela uvena ataeae elae, pasu ia tale kko namuu, ghe roola kateva ai ghalimangaulu kotolu (153). Arongona ta oroi kko me uvena ataeae karika ghe marala. ¹² Iesu ghe uela etaira va, “Am mae namanama.” Disaepolo atoa laghe anna tani kolomia va ia see, me karika teva ghe rooroo tani ue va ekolomia, poli laghe kilakila va ia Vau eteva. ¹³ Iesu ghe lao sio tale kura ataeae me ghe suraki saela verete me ghe tau lao sio etaira. Me ghe ghelei evalue tee lao o tale kko. ¹⁴ Aiaakotonna ateva o nau Iesu ghe rekataala ta disaepolo atoa nau eteva ghe totula tale nimate.

Iesu ghe uela ta Pita va eaitaraa kienasipsipi etoa

¹⁵ Nau eteva laghe ruula tani namanama me Iesu ghe uela ta Pita va, “Saemon natuna io Jon, tani koronna va uailousieinaghi? Me ailousiaam etaghi elaulau mene katoa disaepolo?”

Me Pita ghe uela va, “Ue, Vau eteva, ukilakila va aghailousieinio.”

Iesu ghe uela etana va, “Uangini kieghi lutu sipsipi etoa.”

¹⁶ Me Iesu ghe mene uela etana va, “Saemon natuna io Jon, koron-naaili va uailousieinaghi?”

Me Pita ghe liula me ghe uela va, “Ue, Vau eteva, io ukilakila va aghailousieinio.”

Me Iesu ghe uela etana va, “Uaitaraa kieghi sipsipi.”

¹⁷ Aiaakotonna ta Iesu ghe mene uela etana va, “Saemon natuna io Jon, uailousieinaghi?”

Pita ghe tam masimasila poli ghe mene kolomiela aiaakotonnaata ateva va koronna va eaielousiaa Iesu. Pita ghe liula me ghe uela va, “Vau eteva, ukilakila akapa voto, me ukilakila va aghailousieinio.”

Iesu ghe uela etana va, “Uangini kieghi sipsipi. ¹⁸ Aghaaulia ngakoronna etam va nau eteva aliki taita io, uaaitiitii, me ulaolao nongina aloannaam, me nau utaita namuu, aue ussuua sae nimam, me kateva ppae aue eaitiitii, me ekatulainio lao nongina utam aloanna tani lao.”

¹⁹ Iesu ghe aaulia ngavalua o tani apasunga ase nimate ateva Pita aue ghaaia tani tau sae God. Vara me Iesu ghe uela ta Pita va, “Uaimuli teeieghi!”

Inangarina lo ateva disaepolo Iesu ghe ailousieinia

²⁰ Pita ghe kiriela me ghe tarala lo ateva disaepolo Iesu ghe ailousieinia ghe aimuli teeilalua. (Ia, ia o ghe tani vaavalaa lao ta Iesu nau laghe namanama me ghe ue va, “Vau eteva, see aue etauo lao ta nimaira tau ngai ssateem atoa?”) ²¹ Nau Pita ghe taraie lao sio me ghe kolomila Iesu va, “Vau eteva, vaalua ta ierai o?”

²² Iesu ghe liula me ghe uela va, “Arova aghanna va ghele tokatoka me aghele mene kiriaa mae, vaalua ta getam? Unim aimuli teeieghi.”

²³ Poli isaa o inangari me kiukiu ghe kasu ekapa seela ta tue me nenga atoa va ia o lo ateva disaepolo karika aue emate. O me Iesu karika va

ghe uela va karika aue emate, ta ghe nim ue va, “Arova aghanna va ghele tokatoka me aghele kiriaa mae, vaalua ta ngetam?”

²⁴ Ia o disaepolo ateva, ia oia eaaulia ngaotu isaa o voto me ghe piti elokoila. Ami kilakila va inangarina koronna.

²⁵ Iesu ghe gheleila mene oroieili voto. Aghannaa va arova la ghele piti kateva kateva tale vuku, aue karika righi voto tale kosa ateva oia tani alokoi isaa o vuku.

Gheegheleiaaira Apostolo Atoa Inangari emuemua

Luk ghe mene pitila righi tana kiukiu ghe tiuala tale Masi Inangarina ghe pitiela. Etuaa tale saesaane Iesu epona liu me nau God ghe tau lao sio Spirit Manga ateva tale Nau Pentikos. Aitiutiu etoa sapta la kiukiuaa masi kiukiu ghe kasu ekapa seela, eJerusalem me ejudia ta ajiu etoa, vara me eSameria me eAntioch ta lo atoa karika ajiu ila. Tale ila o sapta ngatoa, Luk ekiukiuaa Pita, Jon, Stipen me Pilip. Sapta 13-28 ekiukiuaa uunguaane atoa Pol, tale kotoluae nikasu see tani ppooaa masi kiukiui, tale patunganua eSaepuras, me ta llo namuu patunganua alua ghaine ita aseaselalua va Teki me Gris. Ekiukiuaa tale nau Pol ghe saela eJerusalem, ajiu etoa laghe kuneielua, me aRom atoa laghe gheleila niaiskei etana ghaluaata, me vaalua ghe saela eRom. Luk ghe kasukasu etauuaa tee Pol kotoluaata, me ghe pitila va “ami” ta 16:10-17; 20:5-21:18 me 27:1-28:16 tani apasunga va ia ghe tokatoka tee Pol.

Tani kila amuemua

Aitiutiu tale ale manga 1:1-5:42

Nau sesa me tau ngaiesoa ngatoa laghe oroila 6:1-9:31

Pita me aitiutiu tau ngeleka atoa laghe aiesoaa 9:32-12:25

Pol ghe kasukasu tee Banabas 13:1-16:5

Pol ghe lao sio eTeki me eGris 16:6-19:20

Pol ghe saela eJerusalem, laghe kuneielua, me ghe saela eRom 19:21-28:31

Iesu ghe saela epona liu

¹ Tiopilus, tale lo ateva to vuku aghe piti ekasinaiela, aghe auliaala niuungu Iesu ghe tiuala tani ghelei me tani apasunga, ² nau ghe ruula tani aippooaa tee kapuna apostolo atoa ia o ghe suoongainilala, me tale sarasarakaniaane Spirit Manga ateva ghe auliaa tau lao sio vaalua la uungu me ghe ghaala nau eteva ghe oghi saela epona liu. ³ Emuli tale nimmarikana ghe ghaala, ghe apasungaala oroiceili voto tani apasunga va ia maulue ia ta ila o apostolo atoa. Ghe kaurekatila etaira ghe roola ghaatingaulu (40) nau, me tani auliaa ararimangalina ateva God. ⁴ Kateva nau laghe namanama etauuaa me ghe uela etaira va, “Karika am mene kasu vuli mua eJerusalem. Am toi kateva voto Tamaghi ghe aulieiniela tale inangari nialokoi va aue enim tau aatu etaimim, ia o ghe aulieiniela. ⁵ Jon ghe aasuu taumattu tale manu, me karika masau me aue am ghaa niaasuu tale Spirit Manga ateva.”

⁶ Nau laghe velu etauuaala me laghe kolomiela va, “Vau eteva, tale isaa oia nau erooroo va umene asaesae arariira atea alIsraeli etoa?”

⁷ Ghe uela etaira va, “Karika uunguaaimim tani kila nau Tamaghi ghe atokala tale sarasarakaniaane. ⁸ Me am, aue am ghaa sarasarakania nau Spirit Manga ateva emae etaimim, me saa llo am ghe tarala me nongola, aue am laa ppooaa tale masaliki taatara eJerusalem, tale provinsi eteva ejudia, eSameria me tale kosa akapa ateva.”

⁹ Nau ghe ruula tani auliaa llo me God ghe ghaiae saela epona liu emua ta mataira, me urukookoo ateva ghe aisulieiniela tale taataraira.

¹⁰ Nau laghe taatara usiusie sae elomarase nongina ghe laa saesae, arovaesaata ta taumattu ngalua lalu ghe aasae kalio usousoana lalu ghe kaurekatila me lalu ghe tingina teeilala. ¹¹ Me lalu ghe uela va, “Taumattu nge Galilii etoa, vaalua me am tingina taatara sae elomarase? Ia o Iesu God ange ghaiae saela epona liu aue emene oghi sio nongina ngam taraiela elaa saesae.”

Mataeasi ghe ghaala liuna ateva Jiudas

¹² Nau ensolo alua lalu ghe kasula, laghe oghi sio mae eJerusalem ta laghe laa sae kasu tale motouru eteva la aseasea va eOliv, maa-masauaane erooroo kasukasuaaira ta sambati.* ¹³ Nau laghe rekatala, laghe saela tale ale ngepona atiulu nongina laghe tokatoka. Lo atoa laghe mae sio, Pita, Jon, Jeimis me Andru me Pilip, Tomas, Batolomiu, Matiu, Jeimis natuna ia Alpeas, me Saemon laghe aseasea va Selot ia, me Jiudas natuna ia Jeimis. ¹⁴ Ila me vause atoa, me Meri kinna ia Iesu, me tuena atoa me nengane atoa Iesu, laghe maemae aitauua nonga tani looloo sae.

¹⁵ Tale isaa o nau Pita ghe tingina saela elome ta lo atoa laghe aaiesoaa, ila akapaaili erooroo kateva ai me ghaluengaulu (120). ¹⁶ Ghe uela va, “Tueghi me nengaghi etoa, Spirit Manga ateva ghe auliaala emua arau ta paane Deivit va Jiudas aue emuemuaa lo atoa aue la laa kune Iesu. Isaa o inangari Uru ngai Manga ateva ghe tani lutu ekoronnala. ¹⁷ Poli Iesu ghe suoongainiela tani uungu teeita, Jiudas ia kateva elome etaita.”

¹⁸ (Ia o taumattu ngateva ghe ghaala aipolipoli tale sesa gheeleiaane me ghe polila kosa ateva, ghe katuula ghe akasa ngamateala, me kovane ateva ghe tapolakala, me tinena ghe ghoa mae eleka. ¹⁹ Ila akapa eJerusalem laghe nongola me laghe asela voto ateva o tale inangari tanganueira va Akeldama, malloeana va “Kosa ateva rae etana”.)

²⁰ Pita ghe uela va, “Laghe pitila tale vuku eteva ta Sams va,

“ ‘Alena ateva aue enim toka

me karika teva tani toka etana’

me,

“ ‘Liuna ateva tani muemuaa niuungu kateva ppae aue eghaaia.’

²¹ Liuna avalua o me ita tara teva taumattu ghe kasukasu teeita nau ekapa atoa nau Vau eteva Iesu ghe tokatoka teeita, ²² etiitiuaa nau Jon ghe aasuu me ghe laa ghaa sio nau God ghe ghaa saela Iesu epona liu. Ita ghaa teva ghe tani tarala isaa o voto me tottotuaane Iesu.”

²³ Laghe asela ghalua taumattu, Josep laghe aseasea va Barsabas, me laghe aseasee teeia va Jastas,† me mene kateva taumattu, Mataeasi etana. ²⁴ Me laghe looloo saela, laghe uela va, “Vau ngepona ateva, io ukilakila akapa urunguitaniira taumattu ngatoa, uapasunga va see etairarua ughe suoongainiela va ²⁵ eghaa niuungu eteva va eapostolo me eghaa niuungu eteva Jiudas ghe katuu vuluela tani lao nongina aue elao.” ²⁶ Laghe kaaila voto aluepai eaimatoonga ararirarua aluae. Nau

1:11: Mat 26:64; Luk 21:27. **1:12:** Luk 24:50-53. * **1:12:** kasukasuaaira ta sambati Ajiu etoa la uee va urooroo tani kasu tale sambati ta kateva kilomita nonga. **1:13:** Mat 10:2-4.

1:16: Sams 41:9. **1:18:** Mat 27:3-8. **1:20:** Sams 69:25; 109:8. **1:22:** Mak 1:9; 16:19; Jon 15:27. † **1:23:** Josep arari nge Hibru ia, me Jastas arari nge Latin ia. Barsabas malloeana va ghe lutula ta sambati.

laghe senusenuaala, ararina atae Mataeasi ghe katuu ekasinala, me ie tee ghe lao aitauaa tee sio kasangaulu kateva apostolo.

2

Spirit Manga ghe sio mae ta Nau Pentikos

¹ Ghe ghaala nau ta Pentikos, taumattu ngatoa laghe aaikaiaia, ila akapa laghe mae sio tani velu eitauaa tale kateva voto. ² Katengaata nonga ta laghe nongola niaangari eteva arova paka kuukuu eteva, ghe sio mae epona liu me ghe pasula elome tale ale ateva. ³ Laghe tarala lo ateva ghe sio mae arova kura ataata atea, me ghe polaie seela nonginaaili ramuramuti paa atoa, me ghe tokala epona ta kateva kateva etaira. ⁴ Laghe pasula tale Spirit Manga ateva, me laghe tiuaala tani aippooaa tale aseasee nisama karika samasama tanganueira, ta Spirit Manga ateva ghe tau lao sio.

⁵ Tale ia o nau eteva oroi ajiu etoa laghe aairesoaa ta God, laghe mae akapa see sio tale kosa akapa ateva tani velu eitauaa eJerusalem. ⁶ Nau laghe nongola mangalia ateva, laghe mae sio tani velu eitauaa, me laghe soghila tani nongo inangari tanganueira, disaepolo atoa laghe aauliaa. ⁷ Mataira ghe otla me laghe kolomila va, “Taumattu ngatoa oia la aippooaa ila akapa laghe mae sio eGalilii. ⁸ Vaalua me kateva kateva etaita ita nonganongo kila inangari tanganueita? ⁹ Ita taumattu tale Patia, Midia, Elam, me taumattu nge Mesopoteimia, Judia, Kapadosia, Pontus me Eisia, ¹⁰ Prigia me Pampilia, Ijip, me katoa laghe mae sio tale kasina masaliki eLibia kalakalangina tale masaliki eteae eSaerini, me katoa laghe mae sio eRom, ¹¹ ita ajiu etoa me lo atoa ghavirina laghe mene aiesoaa teeitala, aKrit me aArabia, ita akapa ngita nongola kinatama voto ateva God nge gheleila nau ngila ppooaala tale inangari tanganueita.” ¹² Laghe soghila me aloira ghe kapaala me laghe aikolomieinila va, “Sa mallooeana llo oia?”

¹³ Katoa laghe aanamisainila tani ue va, “La ropila manu eteva sarasarakania ia.”

Pita ghe ppooaala ta taumattu ngatoa

¹⁴ Pita ghe tingina aitauaa teela kasangaulu kateva (11) apostolo, ghe sama anamuula me ghe uela va, “Am ajiu etoa me lo atoa am tokatoka eJerusalem, am nongo amasina inangari aghauliaa. ¹⁵ Taumattu oia karika la ropila nongina am aauliaa. Elue talaua arau oia ta 9 kilok.* ¹⁶ Isaa oia voto am taatara, propet Joel ang ghe aulia ngalokoila, ¹⁷ ghe uela va,

“God eue va, Airuuruu tale kosa ateva,
 aue atau sio kapughu Spirit Manga ateva tale taumattu ngatoa.
Natuimim taita atoa me vause atoa aue la aulia ngaotu inangarighi.

Aliko taita atoa aue la tara nitaatara,
 me taita namu ngatoa aue la asoasopoi.

¹⁸ Me kapughu tau ngai uungu etoa, taita ila me vause ila,
 aue atau sio tee Spirit Manga ateva etaira,
 me aue la aulia ngaotu inangarighi.

¹⁹ Aghi aue aghapasunga aimatootoongana elomarase

2:1: Lev 23:15-21; Diut 16:9-11. **2:3:** Mat 3:11. **2:4:** Apos 4:31; 10:44-46; 19:6; Mak

16:17. * **2:15:** 9 kilok Tale inangari nge Grik, tale aiaakotoluna ateva aoa. **2:17:** Joel 2:28-32.

me epona tale kosa ateva,
rae, kura atae, me paka asu eteva.

²⁰ Sinaka ateva aue saurrom,
ulana ateva aue eraeraeana,
me auena kinatama nau eteva emae, ia o nau eteva, aue aghi Vau
ngepona ateva aue enaughia.

²¹ Me lo atoa la kolo tau
ararina atae Vau ngepona ateva aue la saanga.’”

²² Pita ghe mene uela va, “Israeli etoa, am nongo. Iesu aNasareti
ia God ghe sungie mae sio etaimim, ghe gheleila paka mirikol me
aimatootoongana elome etaimim tani apasunga etaimim va ia ghe
kasula ta God. Am akapa am kilakila isaa oia voto. ²³ Ia o taumattu
ngateva emua arau God ghe kilaiela me ghe loela tani taue sio etaimim,
am me ssa taumattu ngatoa am ghe uvi emateala tale aikotoo. ²⁴ God
ang ghe totuela tale mammarikana nimate atae, poli nimate atae
karika righi sarasarakaniaane tani poso aoghia. ²⁵ Deivit ghe pitila va
Mesaea ghe auliaala va,

“‘Aghe taatara Vau ngepona ateva emua ta ngetaghi tale nau ekapa
atoa,
poli ia etokatoka tale pai muenna ativilau etaghi,
me karika arooroo tani katuu.

²⁶ Liuna avalua o me urunguitanighi eteva emasimasi me paaghi eteva
ekkinari tau sae ararina atae,
me vaulanighi eteva aue etoka tale voto anannaa va aue aghaa
maulue etana.

²⁷ Poli io karika urooroo tani tau velueghi va alao tanganueira matena
atoa,
me karika aue utau velu kapum taumattu manga va emauu.

²⁸ Ughesapasungaala va aue amene sakesake,
me tokatokaam teeieeghi aue eapasueghi tale nimasimasi.’

²⁹ “Tueghi me nengaghi etoa, aghi aghaaulia ngakorokoronganaili
etaimim va, tuvuita ateva ta Deivit ghe matela, laghe kiaeiniela, me
liuna ateva, etokatoka teeita tale isaa oia nau. ³⁰ Ia propete ia, me
God ghe gheleila kinatama inangari nialokoi eteva va teva tuvuna aue
ekingi nongina ia. ³¹ Me ia ghe taatara lao sio emua, me ghe auliaala
tottotuaane Mesaea, poli karika ghe tau veluela va ghe aso tanganueira
matena atoa, me vilikina karika ghe mauula tale liu. ³² Ia o Iesu, God ghe
totuela tale nimate, ami oia ami ghe taraiela, me ami aaulia ngaotua.
³³ God ghe asaesaeala tani toka tale pai muenna ativilau, me ghe tau sio
mae Spirit Manga ateva nongina ghe auliaala tale inangari nialokoi. Me
Iesu ghe tau sio mae Spirit Manga ateva etaimami, ghaine am taataraia
me am nonganongoa. ³⁴ Poli Deivit karika ghe saela epona liu, me ghe
uelva va,

“Vau ngepona ateva ghe uela ta kapughu Vau eteva va,
“Toka siola tale pai muenna ativilau

³⁵ lomosi ta aghatoka sio lo atoa la sessa teeio euu,
me uatingina saoaa kkem etaira.”’

³⁶ “Liuna avalua o me Israeli ekapa atoa am tani kila amasina va ia o taumattu ngateva am ghe avukalaie saela tale aikotoo, Iesu etana, God ghe gheleielia va Vau ia me Mesaea ia.”

³⁷ Nau laghe nongola inangarina Pita ghe ppooala, ghe pasala urunguitaniira me laghe uela ta Pita me mene katoa apostolo va, “Kapumami etoa, sa ateva ami gheleia?”

³⁸ Pita ghe liula etaira me ghe uela va, “Am nna ngaioghioghiaa, me am ghaa niaasuu tale ararina ataeae Iesu Karisto, me kaluimim ssavoto aue ekapa, me God aue etau aatu Spirit Manga ateva etaimim.

³⁹ Inangari nialokoi uneimim me natuimim atoa me taumattu ngeleka atoa, lo akapa atoa oia Vau ngepona ateva kapuita Goto ia aue ekolola.”

⁴⁰ Oroieili inangari Pita ghe aulia ngasarasarakananailiila etaira tani ue va, “Am asaangiem tale vituu eteva oia sesa ia.” ⁴¹ Lo atoa laghe aikaiaala inangari laghe ghaala niaasuu, ghe roola kotolu airari (3,000) taumattu taita me vause tale ia o nau eteva.

Tau ngaikaia ngatoa laghe velu eitauaala

⁴² Nau ekapa atoa tau ngaikaia ngatoa laghe veluvelu eitauaa tee apostolo atoa, me laghe nonganongo me laghe taatara voto apostolo atoa laghe aapasunga, me laghe namanama, me laghe looloo sae aitauaa. ⁴³ Ila akapa laghe taatara sarasarakaniaane God tale mirikol me aimatootoongana apostolo atoa laghe gheelei, liuna avalua o me laghe oneoneaa God. ⁴⁴ Me ghe kateva nonga ilala, me laghe aitauaa peiira. ⁴⁵ Laghe tautau velu kasina kosa me peiira laghe polipoli me viliki veu laghe kookoita ta lo atoa laghe tuutukuna tale kasina voto. ⁴⁶ Nau ekapa atoa laghe veluvelu eitauaa tale ale ngeleka atiulu tale ale manga, me laghe aaikasuaa see elome tale paa ngaleira tani namanama[†] me laghe masimasi eitauaa, ⁴⁷ laghe tautau sae ararina ataeae God, me taumattu ngatoa laghe oneoneainila. Me tale nau ekapa atoa Vau ngepona ateva ghe mene tautau sso ouna taumattu ghe aasaangi, tani lao aitauaa tee lo atoa akasina.

3

Pita ghe ghelei emasinala tangorengorena ateva tau nilooloo ia

¹ Kateva nau Pita me Jon lalu ghe laa saesae tale ale manga ateva tani looloo sae ta 3 kilok elo alai,* nau nilooloo sae. ² Taumattu ngateva, ghe lutu etangorengorenala, laghe sausaue sae tale atamani ale manga ateva la ghaseasea va Masi Taataraane. Laghe aatokaia nau ekapa atoa tani loo viliki veu tale taumattu ghe kupikupi sso tale ale manga ateva. ³ Nau ghe tarala Pita me Jon ta lalu ghe mae soso tale ale manga ateva, ghe looloo viliki veu etairarua. ⁴ Pita ghe tara sossolainiela, me tee Jon, me Pita ghe uela etana va, “Utaraiengalue mae.” ⁵ Nau ghe taatarailalua ghe annaa va ghe ghaa righi voto etairarua.

⁶ Me Pita ghe uela etana va, “Karika righi viliki veu etaghi. Voto auunusi aue atau aatu etam. Tale ararina nonga ataeae Iesu Karisto aNasareti ia aghaauliaa etam va, tingina saela me ukasukasu.” ⁷ Pita

2:36: Apos 5:30-31. **2:39:** Ais 57:19. **2:41:** Apos 2:47; 4:4. **2:42:** Apos 20:7. **2:44:** Apos 4:32-35. [†] **2:46:** Katoa la annaa va mallooeana va la ghe gheelei Losapa. **2:47:** Apos 6:7; 11:21. *

3:1: 3 kilok elo alai Tale inangari nge Grik, tale aiaaghasiona (9) ateva aoa. **3:4:** Apos 14:9. **3:6:** Apos 4:10; 16:18.

ghe kunela nimana muenna atelange me ghe kune atinginaie saela me katengaata nonga ta kkena me kunikuni kkena ghe sarasarakanala.
⁸ Ghe aosola me ghe tingina saela me ang ghe kasukasu, ghe kupi eitauua tee ssola taita alua tale ale manga ateva, ghe aaooso me ghe kakkaua sae ararina atae God.
⁹ Nau taumattu ngatoa laghe taraiela ta ghe kasukasula me ghe kakkaua ararina atae God,
¹⁰ laghe kilaiela va ia oia taita ateva ghe tokatoka nonga tale atamani ale manga ateva la ghaseasea va Masi Taataraane tani loo viliki veu, laghe soghiaala tani taraiya va ghe kasukasula.

¹¹ Nau laghe nongola kiukiuna tangorengorena ateva va ang ghe kasukasula, ila akapaaili taumattu ngatoa laghe lao sio tani taraiela elome tale ale manga ateva tale varanda ngateva laghe asease va Solomon etana. Ghe kunekune atingina ta taita alua tale ale manga ateva.
¹² Nau Pita ghe tara avaluela o, ghe uela ta taumattu ngatoa va, “Am Israeli etoa, vaalua me am mammanuena voto oia elutula, me vaalua me am taatara sossolainangalua? Am nannaa va taumattu ngateva oia emasinala tale sarasarakaniaangalua o masi tokatokaangalua?
¹³ Kapuira Goto ateva Abraham, Aisiki me Jekop, kapuira Goto ateva tuvuita ia, ia ghe asaesaela ararina atae kapuna tau ngai nonganongo anna ateva ta Iesu. Am ghe tauela ta aRom atoa va la uvi ematea, me am ghe ratiela va ia king ia emua ta Paelat, arongona ta Paelat ghe kilala va Iesu karika righi sesa gheegheleiaane.
¹⁴ Iesu raarangisana ia me ghulughuluena ia, me am, am ghe ratiela, me am ghe aloannala va tau ngai uvii ematea etoka.
¹⁵ Lo ateva etautau mae maulue, am ghe uvi emateala, me God ghe totuela tale nimate. Angalua oia angalu ghe taraiela ta mataingalua me angalu aaulieinia etaimim.
¹⁶ Tale niaikaaiaa ta ararina atae Iesu, taumattu ngateva am taataraia me am kilakilaia, ange korokoronganala. Lo ateva o niaikaaiaa ta Iesu ghe ghelei emasina akapaailiela tale taataraimim.

¹⁷ “Me anga kilaiemla, tueghi me nengaghi etoa, va voto am me kapuim namu ngatoa am ghe gheelei karika am ghe aalomasaanga tee.
¹⁸ Aviri am ghe gheleila, me God ang ghe kila vella emua arau sa ateva auena elutu. Kapuna propete atoa laghe aulia ngamuemue alokoila va Mesaea aue emae ghaa nimmarikana.
¹⁹ Am aikolikoliaa me am nna ngaioghioghiaa tale kaluimim ssavoto, me God aue ekkaluaa, me esei velu kaluimim ssavoto.
²⁰ Me Vau ngepona ateva aue etau aatu nau tani mene akorokoronganma maamauluuaimim, me aue emene suu Mesaea, eghe suimatoongainiela tani sausiem, Iesu etana.
²¹ Ia etani toka epona liu lamosina ta emene oghi sio tani mene ghelei eouna voto akapaaili. Ghe auliaala ta propet manga atoa emua arau.
²² Llo Moses ghe auliaala va, ‘Vau eteva kapuimim Goto ateva aue etau mae teva propete aue enongina ghe atinginaieghi saela, elome ta ngetaimim. Nau propete ateva emae, am rooroo tani nongo usilainia, me am ghelei voto eauliaa.
²³ Arova see atoa la tam nongo usilaa voto eauliaa aue God etturuu vella elome ta kapuna atoa.’

²⁴ “Etiitiuaa ta Samuel me elao lao ta mene katoa propete, laghe aulia ngaotu teela isaa oia nau.
²⁵ Am natura iem propete atoa, me tale niaippooa ngaitaua ngateva God ghe gheleielaa tatuviim atoa nau

ghe uela ta Abraham va, 'Ta tuvum ateva isaa akapaaili taumattu tale kosa ateva aue la ghaa niarangise.' ²⁶ Nau eteva God ghe atingina saela kapuna tau ngai nongonongo anna ateva, ghe sungi ekasinaie mae sio etaimim tani arangiseiem me tani ghelei eoghiem tale gheeleiaaimim sesa."

4

Laghe atoka ssola Pita me Jon tale ale mata voovoo

¹ Pita me Jon karika lalu ghe ruu tani aippooaa tee taumattu ngatoa, me pristi etoa, me namu ngateva ghe aaitoiaa polisi etoa tale ale manga ateva, me Sadiusi etoa laghe rekatala. ² Laghe kilakila va lalu ghe aauliaa ta taumattu ngatoa me aapasunga va Iesu ang ghe totula tale nimate, me ila akapa taumattu ngila ghe matela ila tee aue la totu. Liuna avalua o me ghe sessaieiliila etairarua. ³ Me laghe kuneilaluelu tani laoainilalua tale niaisakei. Poli ang ghe elo alaila, laghe atokailalua ssola tale ale mata voovoo, me laghe toi ta ghe pai sae ta mene kateva nau. ⁴ Oroiannaaili ila lo atoa laghe nongola me laghe aikaiaala ta Iesu, me lo atoa taita laghe aikaiaala erooroo ghalima airari (5,000).

Laghe tau lao sio Pita me Jon va lalu aisakei ta mata kansolo atoa

⁵ Ghe paila ta mene kateva nau, tau ngai toitoi etoa, namu ngatoa me tau ngai aapasunga atoa tale inangari nipaopao laghe velu eitauaala eJerusalem. ⁶ Annas, namuu ia ta pristi etoa, ghe toka teeilala. Ila me Kaeapas, me Jon, Aleksanda, me mene katoa taumattu mangalina ila Annas, laghe toka teeilala. ⁷ Laghe atinginala Pita me Jon emua etaira, me laghe kolomilaluelu va, "See ghe tau aatu sio sarasarakanetaimalua tani ghelei isaa oia voto? Me ta see ararina atae amalu gheeghelei isaa o voto?"

⁸ Spirit Manga ateva ghe pasula ta Pita me ghe uela etaira va, "Am tau ngai toitoi me namuu nge Israeli etoa, ⁹ ngam aloanna tani kolomiengalua ghaine poli angalu ghe gheleila masi niuungu ta tangorengorena ateva, me am aloanna tee tani kila va vaalua taumattu ngateva ghe masinala. ¹⁰ Me isaa oia am me Israeli ekapa atoa am rooroo tani kila va tale ararina atae Iesu Karisto aNasareti ia, am ghe avukalaie saela tale aikotoo, me God ghe totuela tale nimate, ia ghele gheleila me ia o taumattu ngateva ghele masinala, me ange tinginala emua etaimim. ¹¹ Ia Iesu, 'Atu eteva am tau ngai atulu ale atoa am ghe uela va sesa ia me am ghe ratiela, ia ghe aitiutiula tale atu ekapa atoa tani suei ale ateva.' ¹² Karika teva taumattu erooroo tani mene asaangita, karika poi. Nim ararina atae nonga Iesu taumattu ngatoa tale kosa ateva oia ita rooroo tani saanga."

¹³ Namu ngatoa laghe kilakila va Pita me Jon karika lalu ghe sikulula, nim taumattu ilalua, me laghe taatara ta karika ghe moimoilalua. Liuna avalua o me laghe soghiaala tani tara, me laghe kilala va lalu ghe toka teela Iesu. ¹⁴ Me laghe tarala ia o taumattu ngateva, vilikina ghe masinala, ghe tiitingina eitaua teeilalua, liuna avalua o me ghe karikala righi inangariira tani liu etairarua. ¹⁵ Isaa avalua o me namu ngatoa laghe uela etairotolu va lotolu kupi vulu ghoa kansolo

atoa. Nau angilotolu ghe kipi ghoala, laghe aaikolomi va, ¹⁶ “Vaalua aue ita ghelei taita alua oia? Ngilalu ghele gheleila kateva ppae ase niaimatootoongana, me taumattu ngakapa atoa eJerusalem angila ghele kilaiela, ita tee karika poi ita rooroo tani ue va kamea. ¹⁷ Me inangari erau namungaili va elao akapa see ta taumattu ngatoa. Liuna avalua o me ita aulia ngasarasarakanan etairarua va lalu rau mene ppooaa tale ararina atea ia o taumattu ngateva tale mene katoa tana taumattu.”

¹⁸ Emulina laghe kololalue, me laghe paolalueva lalu rau mene ppooaa me apasunga tale ararina atea Iesu. ¹⁹ Pita me Jon lalu ghe liula me lalu ghe uela va, “Vaalua, emaamasina ta matane God tani nongo usilaa inangariimim me karika va inangarina God? Am tani laa anna ngamasina. ²⁰ Karika aue angalu rooroo tani matuua, angalu tani aulia ngakapa voto angalu ghe tarala me angalu ghe nongola.”

²¹ Kansolo atoa laghe mene tau lao sio inangari sarasarakanan etairarua, me laghe sungi velulalue, poli laghe maamatauta taumattu ngatoa. Ila akapa taumattu ngatoa laghe nnaala voto ateva oia God ghe gheleiel, me laghe tautau sae ararina atea God. Liuna avalua o me karika righi salaira kansolo atoa tani ghelei teeilua. ²² Ia o taumattu ngateva lalu ghe gheleila niaimatoonga etana me ghe masinala, anna ninamanama ang ghe laula ghaatingaulu (40).

Laghe kokkolomi sae tani ghaa sarasarakanan tani ppooaa inangarina Iesu

²³ Kansolo atoa laghe tau vella Pita me Jon me lalu ghe oghi lao sio ta mene katoa tau ngaisesoaa, me lalu ghe aulia ngakapaailili inangariira namu ngatoa ta pristi etoa me namu ngatoa laghe auliaala etairarua. ²⁴ Nau laghe nongola, me nannaaira ghe kateva nongala me laghe kakkauaa sae tale kaluira nilooloo sae ta God va, “Vau palepale, ughe gheleila eunaakookoo me kosa ateva me manu etoa me isaa akapaaili voto etokatoka etana. ²⁵ Emua arau kapum Spirit Manga ateva ghe tau lao sio inangari eteva ta tuvuimami eteva, ia o kapum tau ngai uungu ia ta Deivit, me Deivit ghe uela va,

“Vaalua me tau ngeleka atoa esessaileili?

Vaalua me taumattu ngatoa la loeloe asease salana atoa, me karika God etautau vella va la ghelei?

²⁶ Kingi etoa tale kosa akapa ateva la ghaimonomonosiaa tani aiuvii
me namu ngatoa la velvelu eitauaa
tani tau sio Vau ngepona ateva
me tani tau sio kapuna Mesaea ngateva.”

²⁷ Koronnaaili Herot me Pontius Paelat me katoa tau ngeleka me Israeli etoa, laghe velu eitauaala tale ia o masaliki taatara atea tani loe Iesu tani ubi ematea, ia o kapum tau ngai uungu eteva manga ia ughe suitoongainiela va ia Mesaea ia. ²⁸ Nau laghe gheleila isaa o voto laghe nim aimulisi teela nannaam me aloaloannaam. Tale sarasarakaniaam emua arau ughe suimatoongaala va isaa o voto aue elutu. ²⁹ Me ghaine, Vau eteva, urooroo tani annaa inangari isaa o laghe gheelei tani amatautuemami, me usausiemami kapum tau ngai uungu etoa, me ami rooroo tani ppooa ngasarasarakanan inangarim me karika ami

mene matautu. ³⁰ Me urooroo tani saoaa nimam ta tau sessa atoa tani gheleila me la mene masina, me urooroo tani ghelei asease aimatoonga me mirikolo tale ararina ateae Iesu, ia kapum tau ngai uungu eteva manga ia.”

³¹ Nau eteva laghe ruula tani looloo sae, ale ateva laghe velu eitauaala etana ghe aisiisiaala, me laghe pasula tale Spirit Manga ateva, me laghe ppooa ngaotula inangarina God. Laghe aippooa ngasarasarakana me karika laghe maamatautu.

Tau ngaisesoa ngatoa laghe aitauaala peiira

³² Ila akapa tau ngaisesoa ngatoa laghe kateva nonga ilala tale ninanna me nialoanna. Karika teva taumattu ghe ue va peina kannia nonga. Karika, isaa akapaaili voto laghe aitauua elome etaira. ³³ Tale kinatama sarasarakana atoa, apostolo atoa laghe aulia ngaotula tottotuaane Vau eteva Iesu. Me oroieili maamasinaane God ghe tokala etaira akapa, ³⁴ me karika teva taumattu elome ta ngetaira ghe tuutukuna tale inana me voto. Kasina taumattu kosaira me aleira laghe tau lao sio va la poli. Nau eteva laghe polipoli, isaa o viliki veu laghe ghaaghaa laghe laolaoa ³⁵ ta apostolo atoa, me apostolo atoa laghe aikoita ta lo atoa laghe tuutukuna tale kasina voto.

³⁶ Kateva taumattu tale ararimangalina ateva Livae, ararina ateae ta Josep, ghe lutula tale patunganua ateva eSaeparsi me ghe tokatoka eJerusalem, apostolo atoa laghe kolokolo Banabas etana (mallooeana va tau ngai sausia ia tale masi ninannaa), ³⁷ ghe taula tuku kosane ateva me laghe poliela, me ghe ghaala viliki veu me ghe laoaa sio ta apostolo atoa.

5

Ananaeas me Sapaera lalu ghe matela

¹ Taita ateva ararina ateae ta Ananaeas me vausenna ateva ta Sapaera, lalu ghe tau vella tuku kosairarua ateva laghe poliela.

² Ananaeas me vausenna ateva lalu ghe ghaa oghila kasina viliki veu. Ananaeas ghe laoaa sio nonga kasina viliki veu ta apostolo atoa.

³ Vara me Pita ghe uela ta Ananaeas va, “Vaalua me utau vella Satana eapasula urunguitanim ateva me angu kamela Spirit Manga ateva, me angu ghaa oghila kasina aipolipoli tale kosa ateva? ⁴ Nau ghe asoaso kosami ia, ughe ghelei aloannaam etana, me nau ughe aitauaeniela me laghe poliela, viliki veu ghe unem. Me vaalua me ughe aloannala tani mene ghelei evalua o? Karika ukamekame nonga taumattu ngatoa, ta ukamekame tee God.”

⁵ Nau Ananaeas ghe nongola, ghe matela me ghe katuula. Kinatama nimatautu ghe ghaala taumattu ngatoa laghe nongola sa ateva ghe lutula. ⁶ Vara me aliki taita atoa laghe kupi sso mae me laghe ghiisainiela me laghe sauvela, me laghe lao sio tani kaieinia.

⁷ Koti erooroo kotolu aoa ghe lange sio me vausenna ateva ghe kupi ssola. Karika ghe kilala sa ateva ang ghe lutula. ⁸ Pita ghe kolomiela va, “Auliaala etaghi, va isaa nonga oia aipolipoli tale tuku kosa ateva?”

Me ghe liula me ghe uela va, “Ue, nim isaa nonga o.”

⁹ Pita ghe uela etana va, “Vaalua amalu aloanna tani kame kapuna Spiriti eteva Vau eteva? Tarala! Lo atoa la lao sio tani kaiaa taitanim ateva, ila etapaa ngatamana, me ae la mene sau teeio.”

¹⁰ Me katengaata nonga ta vause ateva ghe matela me ghe katuula ta liue kkena Pita. Aliko taita atoa laghe sso mae me laghe saopiela ta ang ghe matela. Laghe sauela tani laa kaiaa valainia ta taitanna ateva. ¹¹ Kinatama nimatautu ghe lutula ta tau ngaisesoa ngatoa, me see ila lo atoa laghe nongola llo kiukiu.

Asease voto ouna ghe lutula

¹² Ta ngetaira apostolo atoa, oroieili niaimatootoongana me mirikolo laghe gheelei. Tau ngaisesoa ngakapa atoa laghe tokatoka aitauua tale varanda ngateva laghe asease Solomon etana. ¹³ Lo atoa karika tau ngaisesoaa ila laghe maamatautu tani mae aitauua tee tau ngaisesoa ngatoa, me karika, ta taumattu ngatoa laghe oneoneainila. ¹⁴ Me oroieili taita me vause laghe aiesoala ta Vau ngepona ateva laghe lao aitauua tee sio kapuna atoa. ¹⁵ Taumattu ngatoa laghe tarala oroieili voto apostolo atoa laghe gheelei, o laghe sausau tau sessa atoa laghe ghoa aalokoila tapaa salana tale aisalo me tale komo va nau Pita ghe kasukasu emaemae, tootoona ateva ghe tulila. ¹⁶ Oroieili taumattu ngatoa tanganueira kalakalaa eJerusalem, laghe maemaeaa tau sessa atoa me lo atoa raroai etoa laghe ghelei saasakieinila, ila akapa laghe maamasina.

Laghe atoka ssola apostolo atoa tale ale mata voovoo

¹⁷ Namu ngateva ta pristi etoa me kapuna akapa atoa, ila elome tale pati eteva ta Sadiusi, laghe nannaa saasakiaa tee apostolo atoa. ¹⁸ Liuna avalua o me laghe kunela apostolo atoa, me laghe atokaila ssola tale ale mata voovoo. ¹⁹ Nau eleivoo ensolo ateva kapuna ia Vau ngepona ateva ghe otile atamana atoa tale ale mata voovoo ateva me ghe kupieinila ghoala. Me ghe uela va, ²⁰ “Am kasula, me am laa tingina tale ale ngeleka atiulu tale ale manga ateva me am ppooaa ta taumattu ngatoa inangari tale ia oia maulue ateva.”

²¹ Elue talaua poopooa tale mene kateva nau laghe ssola tale ale ngeleka atiulu tale ale manga, nongina ensolo ateva ghe auliaala etaira, me laghe tiuuala tani apasunga ta taumattu ngatoa.

Vara me namu ngateva ta pristi etoa me kapuna atoa laghe kolo aitauuala kansolo atoa, namu ngatoa ta natuna atoa Israeli. Laghe suu lao sio inangari tale ale mata voovoo va la maeaa apostolo atoa. ²² Nau polisi etoa tale ale manga ateva laghe rekataala tale ale mata voovoo, laghe tara luulala. Laghe oghi lao sio tani auliaa va, ²³ “Ale mata voovoo ateva kaakavati emasinaaili ia, tee tau ngai toitoi etoa la tiitingina etapaa ngatamana. Nau ami otile karika ami tarala toa elome.” ²⁴ Nau laghe nongola kiukiu namu ngateva ghe aaitoiaa polisi etoa tale ale manga ateva, me namu ngatoa ta pristi etoa laghe annaa sossolaa va sa ateva ae elutu.

²⁵ Kateva taumattu ghe mae sio etaira me ghe uela va, “Am nongola! Taumattu am ghe atoka ssola tale ale mata voovoo, ila tale ale manga ateva la sso aapasunga ta taumattu ngatoa.” ²⁶ Liuna avalua o, polisi etoa me lo ateva ghe aitoieinila laghe ssola tani kuneila, karika laghe

karatainilala poli laghe maamatauta taumattu ngatoa, va la rau kumla arova la uvi apostolo atoa.

²⁷ Nau laghe maeainila sio tale liu niaiskei, namu ngateva ta pristi etoa ghe tiuaala tani kolomila. ²⁸ Ghe uela va, “Ami ghe tau aatu sio inangari sarasarakana va karika am mene laa ghapasunga see tale ararina ateeae ia o taumattu ngateva. Me karika, ta ngam ghele rooa ngakapa seela ejerusalem, me am aaliu teeiemami va ami, ami ghe uvi emateala.”

²⁹ Vara me Pita ghe ghaala liuira apostolo atoa tani liu inangariira, me ghe uela va, “Ami nongo usilaa nonga God me karika taumattu. ³⁰ Kapuira Goto ateva tuvuita atoa ghe totula Iesu tale nimate. Ia o am ghe avukalaie saela tale aikotoo. ³¹ Ia God ghe asaesaeala me ghe atokaiela tale pai muenna ativilau va ia Vauita ia me tau ngai asaangiita ia, tani taula ninna ngaioghioghiaa me nikkaluaa kaluira ssavoto Israeli etoa. ³² Ami tee ami aauliaa voto oio, me tee Spirit Manga ateva, ia o God ghe nim tauue lao sio ta lo atoa laghe nongo usilainiela.”

³³ Nau laghe nongola llo ghe sessailala etaira, me laghe aippooa ngaitauaala tani uvi ematela. ³⁴ Me kateva etaira ghe tingina saela, ararina ateeae ta Gamaliel, ie tee Paresi ia, tau ngai aapasinga ia tale inangari nipaopao me taumattu ngakapa atoa laghe oneoneainia, ghe uela va, “Tau vellala me la kasu mua.” ³⁵ Me ghe uela etaira va, “Am taumattu nge Israeli etoa, am paniem arova am aaloanna tani ghelei righi voto etaira. ³⁶ Poli kasina nau ang ghe lange sio taumattu ngateva ghe tingina saela, ghe poppoaa va ia namuu ia, ararina ateeae ta Tiudas. Ghe ghaala kapuna ghaata ai (400) taumattu. Me aRom atoa laghe uvi emateala me kapuna atoa laghe ilou reerekataa seela. Uunguaaira ghe nim kapala. ³⁷ Emuli etana, Jiudas nge Galilii ghe mene kaurekatila, ta nau nimene ghelei sensis, me oroi taumattu ghe mene usiela. Vara me laghe mene uvi emateala. Me kapuna atoa laghe mene ilou reerekataa seela. ³⁸ Liuna avalua o me tale lo ateeae oia niaiskei aghaaulia etaimim va am tau vellala me la kasu, ta arova nim uunguaaira taumattu ngatoa, aue enim peisaane. ³⁹ Va arova kanna God, karika am rooroo tani paola. Am rau nim aiuvii tee nonga God.” Me ila akapa laghe aimuli teela inangarina Gamaliel.

⁴⁰ Laghe kolola apostolo atoa laghe kupi ssola, me laghe uela va la parula me laghe uela etaira va karika la mene laa ppooaa see tale ararina ateeae Iesu, me laghe sungi vellala.

⁴¹ Nau laghe kasula laghe masimasila, poli God ghe tarailala va la rooroo tani ghaa nimmarikana tale ararina ateeae Iesu. ⁴² Tale nau ekapaaili elome tale ale ngeleka atiulu tale ale manga ateva me tale ale akapaaili, apostolo atoa karika laghe ruula tani ppooaa me apasunga va Iesu Mesaea ia.

6

Ghaitu tau ngai sausi

¹ Tale isaa o nau, disaepolo atoa ngila ghe ooroi me lo atoa etaira laghe samasamaa nge Griek laghe aauliuliaa aHibru etoa ta poli karika laghe aikoita ngamasina voto ta kapuira vause raue vulu etoa tale nau ekapa

atoa. ² Liuna avalua o me kasangaulu ghalua (12) apostolo laghe kolo aitauaala tau ngaikaaia ngakapa atoa me laghe uela etaira va, "Karika masina arova ami ruu tani ppooaa inangarina ateva God me ami mae koita inana. ³ Isaa avalua o tuemami me nengamami etoa, am tara elome etaimim ghai (7) taita pasu ila tale Spirit me alomasaanga, me ami suitoongainila tani ghelei ia o niuungu eteva, ⁴ me ami uunguua nonga tani looloo sae me tani ppooaa inangarina God."

⁵ Isaa o inangari ghe masinala ta taumattu ngakapa atoa, me laghe asela Stipeni pasu ia tale niaikaaia me Spirit Manga ateva, me Pilip, Prokorus, Nikano, Timon, Pamenas, Nikolasi atala nge Antioko ia, karika ajiu ia nau ghe lutula, vara me ghe aiesoala me ghe ajiula, me emulina ghe mene aiesoala ta Karisto. ⁶ Laghe laoainila sio ta apostolo atoa, me laghe looloo saela me laghe saoala nimaira etaira tani amangaila va la ghelei ia o niuungu eteva.

⁷ Inangarina ateva God ang ghe naanamu me ejerusalem oroeili taumattu laghe aiesoala, me oroeili pristi tee atoa laghe nongo usilaala masi inangari.

Laghe kunela Stipeni

⁸ Stipeni pasu ia tale sarasarakana me maamasinaane God. Ghe gheelei mirikolo me niaimatoonga sarasarakana elome tale taumattu ngatoa. ⁹ Me katoa taumattu karika laghe laolao aitauaa tee aloannaane Stipeni. Isaa o taumattu laghe velu eitauaala tale kateva ale nivelu eitauaa la kolokoloa va aleira ia lo atoa emua akasina karika laghe tokatoka tale aloannaaira. Isaa o taumattu atala nge Saerini ila me Aleksandria ila, me provinsi elua ta eSilisia me eEisia. Katoa ta ngetaira laghe sessaila ta Stipeni. ¹⁰ Spirit Manga ateva ghe tau lao sio alomasaanga ta Stipeni, liuna avalua o me karika laghe rororo tani apala inangari Stipeni ghe poppooaa.

¹¹ Kasina taumattu laghe polilala tani aikamea tee Stipeni va laghe nongoala ghe poppooaa saasakiaa ta Moses me God.

¹² Tale isaa o inangari, taumattu ngatoa laghe sessailala, me taumattu ngatoa me namu ngatoa me tau ngai aapasunga atoa tale inangari nipaopao laghe kunela Stipeni me laghe laoainie sio ta Kansolo atoa. ¹³ Laghe ghaala kasina taumattu va eaikamea teeia, ila o taumattu ngatoa laghe uela va, "Ia oia taumattu ngateva enim toka aauliaa saasakiaa tee voto ateva oia manga ia me kanna inangari nipaopao Moses. ¹⁴ Poli ami ghe nongola ta ghe uela va ia o Iesu atala nge Nasareti ia ghe uela va aue etturuu ale manga ateva me eaikolikolaa voto emua arau Moses ghe tau mae sio."

¹⁵ Me taumattu ngatoa tale ia o nivelu eitaua ngateae laghe taatara lao sio ta Stipeni, me laghe tarala matane ghe nonginala ensolo ateva.

7

Inangarina Stipeni

¹ Namu ngateva ta pristi etoa ghe kolomila Stipeni va, "Koronna llo oia?"

²⁻³ Stipeni ghe liula me ghe uela va, "Tueghi me nengaghi me tamaghi etoa, am nongoaghi va God ateva pasu ia tale mallanga ghe rekataala ta

tuvuita ateva ta Abraham nau eteva ghe tokatoka eMesopoteimia. Ghe uela etana va, 'Ukasu vuli tanganuem me kapum atoa, me ulao tale kosa ateva aue aghapasungainia etam.' Me auena ghe laa toka eHaran.

⁴ "Me ghe kasu vulila tanganue aKaldia ngatoa me ghe lao sio tani toka eHaran, me vara tamane ghe matela me ghe mene mae sio tani toka tale kosa ateva oia am tokatoka etana. ⁵ God karika ghe tau lao sio teva tuku kosa etana va ghe kanna. Karikaaili tuku teva. God ghe alokoila inangari nialokoi etana va ia me tuvuna atoa emuli etana aue la ghaa kosa ateva oia, arongona ta ia o nau eteva Abraham karika righi natuna. ⁶ God ghe uela etana va, 'Aue tuvum atoa aue la ativuu tale mene kateae ppae masaliki me la nim tau ngai uungu me taumattu ngatoa tale ia o masaliki eteae aue la ghelei saasakiaa etaira aue eroo ghaata ai (400) ninamanama. ⁷ Me aue aghi aghattara matana lo ateva anua eghaila va la nim tau ngai uungu.' Me God ghe mene uela va, 'Emulina aue la kasu vuli ia o anua ateva me aue la mene mae kkaueinaghi tale masaliki eteae oia.' ⁸ God ghe gheleila inangari niaippooa ngaitauaa tee Abraham tale ni-isoiso ateae me Abraham ghe tamane iela Aisiki me vara ghaitu nau ghe lange sio me Abraham ghe isola Aisiki. Vara me Aisiki ghe natunala ta Jekop me Jekop ghe natunala kasangaulu ghalua (12) ghe tuvuitala.

⁹ "Me tuena taita namu ngatoa Josep laghe nannaa saasakiaa teeia, liuna avalua o me laghe tauet lao sio me ghe siola elijip me laghe ghaala aipolipoli, me God ghe tokatoka aitauaa teeia, ¹⁰ me ghe aasaangia tale isaa akapaaili voto sesa, me ghe tau lao sio alomasaanga etana va Peroo kingi nge Ijip ateva ghe maamasiaa uunguaane me ghe gheleila ghe namuula elijip me tale alena akapa ateva.

¹¹ "Vara me kinatama maloo ateva ghe lutula elijip me eKeinan me voto sesa ghe lutu teeilala, me tuvuita atoa karika laghe roola tani ghaa righi inana. ¹² Nau Jekop ghe nongola va inana elijip, ghe suula tuvuita atoa tani sio elijip tale aitiutiu eteva uneira nisio. ¹³ Aiaaghluene ateae nisio, Josep ghe aulia ngaotula ta tuena atoa va ia see, me liuna avalua o me Peroo ghe kilala kapuna atoa. ¹⁴ Josep ghe suula inangari va tamane ta Jekop me kapuna akapa atoa la sio. Ila akapaaili erooroo ghaitungaulu ghalima (75) taumattu. ¹⁵ Vara me Jekop ghe siola elijip, ia me tuvuita atoa laghe matela okae. ¹⁶ Nau laghe matela laghe mene saeainilala eSekem tale liu niaikkaia ngateva Abraham ghe polie lao sio ta natuna atoa Hamor tale kasina ase viliki veu.

¹⁷ "Nau ang ghe aakalakala va God ghe ghelei roorooaa inangari nialokoi ghe auliaala ta Abraham, me aIsraeli etoa elijip laghe oroen-aaili ila. ¹⁸ Vara me kingi eteva ghe tam kilakila Josep ghe tiuaala tani aitoiaa elijip. ¹⁹ Ghe tiuaala tani pae salana tani ghelei saasakiaa tuvura atoa me tani ghelei voto karika masina etaira. Tee ghe uela va la sau velu natura aliiki etoa me aue la mate.

²⁰ "Tale isaa o nau Moses ghe lutula. Masi taataraane ta matane God me laghe aitarainiela elo ale erooroo kotolu (3) ulana. ²¹ Me nau laghe ghaa velue ghoala eleka tanganueira, natuna vause ateva king

7:5: Aitiutiu 12:7; 15:18; 17:8. **7:6:** Aitiutiu 15:13-14; Eks 12:40. **7:7:** Eks 3:12. **7:8:** Aitiutiu 17:9-14; 21:4. **7:9:** Aitiutiu 37:11, 26-28; 39:1-3, 21-23. **7:10:** Aitiutiu 41:37-44. **7:11:** Aitiutiu 41:54; 42:1-2. **7:13:** Aitiutiu 45:1-4, 16. **7:14:** Aitiutiu 45:9-11; 46:27. **7:15:** Aitiutiu 46:1-7; 49:33. **7:16:** Aitiutiu 23:2-20; 33:19; Jos 24:32. **7:17:** Eks 1:7-8. **7:19:** Eks 1:11-22. **7:20:** Eks 2:2. **7:21:** Eks 2:3-10.

ghe ghaaiela, me ghe aitarainiela va natuna ia. ²² Ghe ghaa akapala alo-masaangania nge Ijip me inangarina me gheeleiaane sarasarakanaili.

²³ “Nau anna ninamanama ghe ghaatingaulua (40), ghe nnaala tani laa tara kapuna atoa, tuvuna atoa Jekop. ²⁴ Ghe tarala kateva aIsraeli, aljipi eteva ghe gheelei saasakieinia me ghe sausila kapuna ateva, me tani liu, ghe uvi ematela aljipi eteva. ²⁵ Ghe annaa va kapuna atoa aue laghe kila va God ang ghe tiitiuaa tani sausila tani asaangila tale niuungu Moses ang ghe tiitiuaa tani ghelei, me aloira karika laghe maamasaanga. ²⁶ Mene kateva nau ghe mene tarala kapuna alua aIsraeli ilalua lalu ghe aaiuvii me ghe tootoongaala tani ghelei rungainilalua me ghe uela etairarua va, ‘Amalua, aHibru nonga iemalua, me vaalua me amalu aaiuvieinamalua?’

²⁷ “Me lo ateva ghe tiuaala tani auiuvii ghe bbi velu lao sio Moses me ghe uela etana va, ‘See ghe uela va io unamuu me ughelei niaiskei etaimami? ²⁸ Ualoanna tani uvi emateaghi nongina ughele uvi ematela aljipi eteva ghalailloo?’ ²⁹ Nau Moses ghe nongola llo, ghe iloula eljip me ghe lao sio tani ativuu etoka eMidien me isaa okae me ghe natunala ghalua.

³⁰ “Nau ghaatingauluae (40) ninamanama ghe ruula me ensolo ateva ghe otuotula ta ngetana tale voto ateva karika righi taumattu etana kalakalaa ia tale motouru eteva eSaenae, tale ramerame kura atae ghe ataata ai erighi. ³¹ Moses ghe soghiala nau ghe tarala me ghe lao akalakalangina sio tale ai erighi tani tara amasinaia me ghe nongola lingi ngalona ateva Vau eteva. ³² Ghe uela va, ‘Aghi kapuira Goto ieghi tuvum atoa me kapuna Goto ieghi Abraham, Aisiki me Jekop.’ Moses ang ghe reterete poli ghe matautula, me karika ghe aloanna tani taatara lao.

³³ “Vau eteva ghe uela etana va, ‘Ghaa vella unem aikasukasu ta kkem ta voto ateva utiitingina etana, manga ia. ³⁴ Aghe tarala sesa nimmarikana kapughu etoa laghe ghaala eljip me ngaghe nongola ngangngalaaira me ngasio mae tani ghaa vella tale karavusu. Mae sio me asungio me umene oghi sio eljip.’

³⁵ “Nim ie nonga o lo ateva Moses aIsraeli etoa laghe ratiela me laghe auliaa teeia inangari va, ‘See ghe uela va unamuu me ughelei niaiskei?’ Ta God nonga, tale ensolo ateva eghe aotuotula etana tale ai erighi ghe ataata, ghe sungiela va ia namuu ia me tau ngai ghaa oghi ia. ³⁶ Ia ghe ghaa vellala eljip me ghe gheleila niaimotoongana me ase mirikolo atoa eljip me eRet Sii me ghaatingauluae (40) ninamanama tale voto ateva karika righi taumattu etana.

³⁷ “Ie nonga o Moses ghe uela ta Israeli etoa va, ‘God aue etau aatu propete ateva aue enongina ghe atinginaiieghi saela, elome ta ngetaimim.’ ³⁸ Moses ghe tokatoka aitauaa teeila tale voto ateva karika righi taumattu etana, me ensolo ateva ghe sama teeila tale motouru eteva eSaenae me ghe ghaala inangari maulue tani asaoki etaita.

³⁹ “Me tuvuita atoa laghe tam nongo usilainiela me laghe ratiela me elome tale urunguitanira, laghe mene oghiaa lao sio eljip. ⁴⁰ Laghe uela ta Eron va, ‘Gheleila righi kapuita goto me emuemueinita, poli ia oia taumattu ngateva ta Moses ghe kolo velutala eljip, karika ngami ghe

kilala va sa ateva ang ghe lutula etana.⁴¹ Isaa o nau laghe gheleila natu tootoo vulumakao arighi me laghe gheleila aiaavusuvusuena etana, me laghe gheleila paka maakiikii eteva tani tau sae voto nimaira ghe gheleila.⁴² God ghe oghi vululala me ghe tau vellala tani kkaaua voto elomarase. Isaa o voto ghe asokoila llo propete atoa laghe pitila tale uneira vuku va,

“Am Israeli etoa karika am ghe tau mae sio righi aiaavusuvusuena etaghi

nau am ghe kasula ghaatingauluae (40) ninamanama tale voto ateva karika righi taumattu etana.

⁴³ Am ghe sausau see alena ale kandisi eteva kapuimim goto ateva ta Molok

me kapuimim katto goto ateva ta Repan

tootoo ateva am ghe gheleielva va am kkaueinia.

Liuna avalua o me aue atau veluem me la ghaaiem sio eBabilon.’

⁴⁴ “Tuvuita atoa laghe tokatoka tee ale manga kandisi eteva ia o laghe sausaua see tani apasunga va God etokatoka elome etaira nau laghe kasukasu tale voto ateva karika righi taumattu etana. Laghe gheleielva nongina vaalua God ghe auliaala ta Moses me vaalua ghe tarala tootoona ateva.⁴⁵ Mene kateva vituu ta tuvuita atoa laghe ghaaiela, me nau Josua ghe mene aitarainilala, laghe sau teeie mae sio nau laghe mae sio tani ghaa ia oia kosa ateva tale llo anua God ghe karati vellala. Ghe tokala o lomasina ta ghe laa ghaa sio nau ta Deivit.⁴⁶ God ghe masimasieiniela, liuna avalua o me Deivit ghe kolomila va eghelei teva ale aitokatokane kapuna Goto ateva Jekop.⁴⁷ Me karika, ta Solomon ghe atulula alena ateva.

⁴⁸ “Me lo ateva Iaaili Epona karika etokatoka tale ale taumattu ngatoa la gheelei, nongina propete ateva ghe uela va,

⁴⁹ “Vau ngepona ateva ghe uela va, “Epona liu aitokatokaghi ia me kosa ateva, aiatingina kkegħi ia.

Sa ateva ale am mene anna tani atulu me ealeghi?

O saa mene teva voto aue aghainoana etana?

⁵⁰ Karika va nimaghi ghe gheleila isaa akapa o voto?”⁵¹

⁵¹ “Am aakorokorongana nannaaimim me urunguitaniimim me non-gonongoaaimim nongina tau ngeleka atoa. Nau ekpa atoa karika am aaloanna tani nongo Spirit Manga ateva nongina tuvuim atoa.⁵² Am annaa teva propete tuvuim atoa karika laghe ghelei saasakiaa teeielia? Laghe uvi emate teela lo atoa laghe aaulia ngamuemua ngalokoi, maemaeaane lo ateva ghulughuluena ia. Me isaa oia nau ngam ghe aitaueiniela me ngam ghe uvi emateala.⁵³ Am oia am ghe għala inangari nipaopao ensolo atoa laghe taula ta Moses me karika am aimuli tee!”

Laghe kumla Stipeni tale atu

⁵⁴ Nau laghe nongola llo ghe sessai etinginailala me laghe aingeresia ngalungaluira etana.⁵⁵ Me Stipeni, pasu ia tale Spirit Manga ateva, ghe taatara saela epona liu me ghe tarala mallangina ateva God me Iesu ghe tiitingina tale pai muenna ativilau ta God.⁵⁶ Me ghe uela va,

7:41: Eks 32:2-6. **7:42:** Eimos 5:25-27. **7:45:** Jos 3:14-17. **7:46:** 2 Sam 7:1-16. **7:47:** 1 Ki 6:1-38. **7:49:** Ais 66:1-2. **7:51:** Ais 63:10. **7:52:** Mat 23:31. **7:55:** Sams 110:1. **7:56:** Kol 3:1.

“Am tarala, ngatarala epona liu ange otiela me Natuna ateva Taumattu ngateva etiitingina tale pai muenna ativilau ta God.”

⁵⁷ Tale isaa o inangarina me laghe rrongi rungaala talingaira me laghe aaore atingina me ila akapa laghe ilou lao sio etana. ⁵⁸ Laghe ae velue ghoala tale masaliki taatara atae me laghe tiuaala tani kumua tale atu. Me lo atoa laghe nongoala laghe alokoila ghinnaniira ta liue kkena aliki taita ateva, Sol ta ngetana.

⁵⁹ Nau laghe kumkumua, Stipeni ghe looloo saela me ghe uela va, “Vau eteva Iesu, ughaa maamauluaaghi.” ⁶⁰ Me ghe suuiala ta patu kkena me ghe sama anamuula me ghe uela va, “Vau eteva, urau mene annaa kaluira ssavoto.” Nau ghe aulia ngavaluela o me ghe asekanuela.

8

¹ Me Sol ie tee okae, me ta matane Sol, voto laghe ghelei teela Stipeni ghe tarala va masina.

Sol ghe tiuaala tani tturuu tau ngaisesoa ngatoa

Tale nau eteva Stipeni ghe matela etana, laghe tiuaala o tani uvi saasakiaa tau ngaisesoa ngatoa eJerusalem. Liuna avalua o me tau ngaisesoa ngatoa laghe iloula eJerusalem me laghe lao sio tale masaliki etoa ejidua me eSameria. Me apostolo atoa laghe tokala. ² Kapuna taita atoa laghe tani aikaaiiaa ta God laghe kaiaala Stipeni me laghe kaarasila tani ngalaia. ³ Me Sol ghe tiuaala tani tturuu tau ngaisesoa ngatoa. Ghe kupikupi kateva kateva ale me ghe kunekune velu ghoa taita me vause atoa me ghe laa ghaatokaila sso tale ale mata voovoo.

Pilipi ghe poppoaa eSameria

⁴ Lo atoa laghe ilou reerekataa seela laghe poppoaa inangarina ateva Iesu ta kona laghe laolao. ⁵ Pilipi ghe lao sio tale kateae masaliki taatara eSameria me ghe ppooala Mesaea etaira. ⁶ Oroi ila taumattu ngatoa nau eteva laghe nongola inangarina Pilipi, me laghe tarala niaimatootoongana ghe gheleila me laghe nongo amasinaailila inangari ghe auliaala. ⁷ Laghe tarala Pilipi ghe tiu vella raroai etoa tale oroi taita me vause. Raroai etoa laghe aaore anamuu nau eteva laghe kupikupi vulu ghoa taumattu ngatoa. Me oroi ila lo atoa vilikii matena me tangorengorena laghe masinala. ⁸ Isaa avalua o me paka nimasimasi eteva ghe lutula elome tale ia o masaliki taatara ataeae.

Saemon tau raroai ia

⁹ Kateva taumattu ghe tokatoka elome tale masaliki taatara atae, ararina atae ta Saemon, muennaaili ia tani ghelei nialaala. ASameria ngatoa laghe soosoghiaa voto laghe taatara ta ghe gheeghelei, me ghe saasaea nannaa va ia namuu ia. ¹⁰ Tau ngaitoitai etoa me nim taumattu ngatoa, ila akapa laghe nongonongo inangarina, me laghe ue va, “Taumattu ngateva oia sarasarakaniaa ngepona liu namungaili etana.” ¹¹ Laghe nongonongoa poli oroiaata laghe soosoghiaa nialaala ghe gheelei. ¹² Me nau eteva Pilipi ghe poppoaa masi inangari tale ararimangalina ateva God me ararina atae Iesu Karisto, lo atoa laghe aikaaiiaa, taita atoa me vause atoa, laghe ghaala niaasuu. ¹³ Saemon ia tee eghe aikaaiiaala me ghe ghaala niaasuu. Ghe aimuli teela Pilipi me

ghe taatara kinatama niaimatootoongana me mirikolo Pilipi ghe gheelei me ghe soosoghiaa.

¹⁴ Nau apostolo atoa eJerusalem laghe nongola va aSameria ngatoa laghe aikaiaala inangarina God, laghe suula Pita me Jon tani laa taraila. ¹⁵ Nau lalu ghe rekatala, lalu ghe looloo saela ta God va Spirit Manga ateva esio ta aSameria ngatoa, ¹⁶ poli Spiriti eteva karika ghe mae etaira. Laghe nim ghaala niaasuu tale ararina atea Vau eteva Iesu. ¹⁷ Nau eteva lalu ghe ruula tani looloo sae, lalu ghe saoaala nimairarua etaira me laghe ghaala Spirit Manga ateva.

¹⁸ Saemon ghe tarala va apostolo alua lalu ghe saoaala nimairarua etaira me laghe ghaala Spiriti eteva. Liuna avalua o me eghe ghaala viliki veu me ghe laoaa sio etairarua, me ghe uela va, ¹⁹ “Amalu tau mae sarasarakanata ateva ona tee etaghi, me arova asaoaa tee nimaghi ta toa taumattu, la rooroo tani ghaa Spirit Manga ateva.”

²⁰ Pita ghe liula ta Saemon me ghe uela va, “Aue God eturungi etitauaa teeio me unem viliki veu, poli unannaa va upoli tale viliki veu voto God enim tautau mae. ²¹ Karika righi uunguaam tale niuungu eteva oia, ta nannaam karika ghulughuluena ta matane God. ²² Unna ngaioghioghiaa me uvelu sesa ninanna me ulooloo sae ta Vau ngepona ateva va marova ealoanna, aue ekkaluaa isaa o sesa ninanna tale urunguitanim ateva. ²³ Ataatara va nannaam epasupasu tale nissaii, liuna avalua o ssavoto ateva ang ghele iri etokaiola.”

²⁴ Vara me Saemon ghe uela va, “Amalu looloo sae ta Vau ngepona ateva me amalu aulieinaghi sae me isaa o voto amalu auliaala erau mene lutu etaghi.”

²⁵ Nau lalu ghe ruula tani ppooa ngaotu inangarina ateva Vau ngepona ateva, lalu ghe kiriaa saela eJerusalem, lalu ghe kasu poppooaa elaa saesae masi kiukiu tale oroi masaliki eSameria.

Pilipi me aItiopia ngateva

²⁶ Kateva kapuna ensolo Vau ngepona ateva ghe uela ta Pilipi va, “Ukasu me ulao tale pai saot ativilau tale salana atikirighi karika righi taumattu etana, ia o salana atikirighi ekasukasu eJerusalem me esiosio eGaza.” ²⁷ Pilipi ghe tiuala tani kasu, ghe laolao me ghe soula taumattu nge Itiopia ngateva, namuu ia, uunguaane tani aitara isaa akapaaili unna viliki veu Kandake, kuiini nge Itiopia ia. Ia o taumattu ngateva ghe saela tani kkaua eJerusalem, ²⁸ me ghe oghiaala tani lao tanganuena, ghe tokatoka epona tale ai-ilou eteva, me ghe ritiriti vuku eteva ta propete ateva ta Aisaea. ²⁹ Me Spiriti eteva ghe uela ta Pilipi va, “Ulaa kasu karanga tale unna ai-ilou eteva.”

³⁰ Liuna avalua o me Pilipi ghe ilou lao sio tale unna ai-ilou eteva, me ghe nongola taumattu ngateva ghe ritiriti inangari tale vuku eteva ta propete ateva Aisaea. Me Pilipi ghe kolomiela va, “Vaalua, ukilakila llo ona uritiriti?”

³¹ Ghe uela ta Pilipi va, “Vaalua akila, nau eteva karika teva tani asaoki tau mae me akila? Lau sae mae tale ai-ilou eteva me usae toka teeieghi.”

³² Namu ngateva ghe ritiriti inangari tale Uru ngai Manga ateva eue va, “Laghe ghaiae lao sio tani uvia nongina sipsipi eteva,

me nonginaaili tee natu sipsipi erighi nau la ghaaloanna tani sunapi velu uuna tale vilikina,
karika ghe otile paane ateva tani ppooaa righi inangari.

³³ Laghe gheleila ararina atea ghe siola eeu me ghe sesala. Karika laghe gheleie eghulughuluena unna niaiskei eteae.

Isaa avalua o me karika aue la kiukiua natuna atoa,
poli laghe ruula maamauluane tale kosa ateva.”

³⁴ Namu ngateva ghe kolomila Pilipi va, “Uauliaa etaghi va propete ateva oia ghe aauliaa see? Eaulieinia, o mene kateva ppae taumattu?”

³⁵ Vara me Pilipi ghe otile paane ateva me ghe tiuala tani auliaa isaa o inangari tale Uru ngai Manga ateva me ghe auliaala masi kiukiuna Iesu etana.

³⁶⁻³⁷ Lalu ghe iilou elaoalo tale salana atikirighi me lalu ghe rekatala tale ateo atea, me ghe uela namu ngateva oia va, “Tarala, ateo atea o. Vaalua, karika urooroo tani asuuueghi?”* ³⁸ Namu ngateva ghe auliaala ta lo ateva ghe iilouaa ai-ilou eteva va etoka mua. Pilipi me namu ngateva lalu ghe kkure siola me lalu ghe siola tale ateo atea me Pilipi ghe asuuuela. ³⁹ Nau eteva lalu ghe lau sae mae tale ateo atea, kapuna Spiriti eteva Vau ngepona ateva ghe ghaala Pilipi me ghe kasueiniela. Namu ngateva ghe tam mene tara poila Pilipi. Ghe pasula tale nimasimasi poli ghe aiesoala ta God, me ghe lao sio tanganuena.

⁴⁰ Pilipi ghe rekataala tale masaliki taatara atea eAsotus, me ghe kasu ekapa seela tale mene kasina masaliki tani ppooaa masi inangari lomosi ta ghe laa rekata sio eSiisaria.

9

Sol ghe aikolikoliaala

¹ Tale isaa o nau Sol ghe kakkalui tani uvi emate lo atoa laghe aaimuli tee Vau eteva. Liuna avalua o me ghe lao sio tani tara namu ngateva ta pristi etoa, ² me ghe kolomiela va epiti uru ngai me Sol esau sio ta namu ngatoa tale ale nivelu eitaua ngakapaaili eDamaskas. Me uru ngai eauliaa va arova Sol etara lo atoa, taita me vause, la uusilaa salane Iesu, aue ekuneila me esaeainila tale ale mata voovoo ateva eJerusalem. ³ Nau Sol ghe kasu vulila eJerusalem me ang ghe kalakalaa eDamaskas me arovaata nonga ta mallanga ateva ghe sio mae epona liu me ghe akouela. ⁴ Me Sol ghe katuu siola tapaa kosa me ghe nongola lingi ngalo ateva ghe uela va, “Sol, Sol, vaalua me ugheelei saasakieinaghi?”

⁵ Me Sol ghe kolomila va, “Namu ngateva, io see?”

Lingi ngalo ateva ghe liula me ghe uela va, “Aghi Iesu ugheelei saasakieinaghi. ⁶ Totula me usso tale masaliki taatara atea me aue uso kila sa ateva aue ugheleia.”

⁷ Taita atoa laghe kasukasu tee Sol laghe matautu etinginala me karika righi nisama etaira. Laghe nongola lingi ngalo ateva me karika laghe taatara teva taumattu. ⁸ Sol ghe totu saela tapaa kosa me nau ghe otile matane karika ghe roola tani tara teva voto. Liuna avalua o me laghe kunela nimane me laghe katulainie ssola eDamaskas. ⁹ Kotolu

8:36-37: Apos 10:47. * **8:36-37:** Kasina uru ngai laghe pitila laghe piti teela va, 37 Pilipi ghe liula me ghe uela va, “Arova uuaikaaiaa tale urunguitanim ateva, urooroo tani ghaa niaasuu.” Namu ngateva ghe liula me ghe uela va, “Aghaaikaaiaa va Iesu Karisto Natuna ia God.” **8:40:** Apos 21:8. **9:1:** Apos 8:3.

nau ghe mata salusalula me karika ghe namanamala me karika ghe ropi poila.

¹⁰ Kateva disaepolo eDamaskas, ararina ateeae ta Ananaeas, Iesu ghe sama teeielaa tale nitaatara ateeae, ghe uela etana va, "Ananaeas!"

Ananaeas ghe liula me ghe uela va, "Ue Vau eteva, aghi toko."

¹¹ Me Vau eteva ghe uela etana va, "Aimanomanosiaala me ukasu lao tale salana atikirighi la kolokoloa va Ghulughuluena etana, me tangantuena Jiudas ukolomi taumattu ngateva atala nge Tases ia, ararina ateeae ta Sol. Ia okae esso looloo sae, ¹² me tale nitaatara ateeae Sol ghe tarala taita ateva ararina ateeae ta Ananaeas ghe kupi ssola me ghe saoaala nimane etana me matana ghe mene taatarala."

¹³ Ananaeas ghe liula me ghe uela va, "Vau eteva, oroi taumattu ghe auliaala etaghi kiukiuna Sol me voto sesa ghe gheleila ta kapum taumattu ngatoa eJerusalem. ¹⁴ Me ghe sio mae oia eDamaskas ta ghe ghaala matuutuliena ta namu ngatoa ta pristi etoa tan kune lo atoa la kolokolo tau ararim ateeae."

¹⁵ Vau eteva ghe uela ta Ananaeas va, "Lao sio poli ngaghe suitoon-gainiela va ia aue eghelei uunguaaghi tan aulia ngaotu ararighi eteeae ta taumattu ngeleka atoa me kingi etoa me taumattu nge Israeli tee atoa. ¹⁶ Aue aghapasunga etana va aue etani ghaa oroi nimmarikana ta poli ararighi eteeae."

¹⁷ Vara me Ananaeas ghe lao sio me ghe ssola tale ale ateva Sol ghe tokatoka etana me ghe saoaala nimane ta Sol me ghe uela va, "Nengaghi Sol, Vau eteva esungieghila, ia o Iesu etana ghe aotuotula etam etapaa salana nau ughe mae siosio. Esungieghi mae sio etam va io urooroo tan mene taatara, me aue upasu tale Spirit Manga ateva." ¹⁸ Arovaeata nonga ta llo arova vaka kko ghe kao vella ta matane Sol me ghe mene taatarala. Ghe totu saela me ghe ghaala niaasuu. ¹⁹ Me nau eteva ghe namanamala me ghe mene sarasarakanala.

Sol ghe poppoaaa eDamaskas

Sol ghe mene tokala kasina nau tee disaepolo atoa eDamaskas. ²⁰ Arovaeata ta ghe tiuala tan ppooaa Iesu tale aleira ale nivelu eitauuaa, ghe aaulia ngaotu va Iesu Natuna ia God. ²¹ Taumattu ngakapa atoa laghe nongola me laghe soghieiniela me laghe aippooaa elome etaira va, "Ia oia taumattu ngateva ghe uviubi lo atoa eJerusalem la kolokolo tau ararina ateeae Iesu. Me ghe sio mae oia tan kune tau ngaiiesoa ngatoa va esaeainila ta namu ngatoa ta pristi etoa." ²² Me nau eteva Sol ghe poppoaaa inangarina ateva Iesu, ghe tuttukueili ajiu etoa laghe tokatoka eDamaskas, me laghe soghiaala me karika laghe roola tan kaili ekamena va Iesu Mesaea ia.

²³ Oroi nau ghe lange sio me ajiu etoa laghe velu eitauuaala me ngila ghe loeloe Sol tan uvi ematea. ²⁴ Me karika, ta Sol ghe kilala voto laghe loela. Ellaa me eleivoo laghe lollosainia tale isaa akapa paa ngatamana elome tale masaliki taatara ateeae tan uvi ematea. ²⁵ Kateva eleivoo, kapuna disaepolo atoa Sol laghe ghaala kinatama keru eteva me laghe kaaila Sol me laghe rekatila uasa eluekirighi, me laghe taue siola eleka tale valata me ghe kasula.

Sol ghe saela eJerusalem

26 Nau eteva Sol ghe rekatala eJerusalem ghe tootoonga tani lao aitauaa tee disaepolo atoa, me ila akapa laghe maamatautainia ta karika laghe aaiesoaa va Sol ang ghe disaepolola. ²⁷ Vara me Banabas ghe mae sio tani sausia. Ghe ghaala Sol me ghe laoainie sio ta apostolo atoa tani aulia ngamasalika etaira vaalua Sol ghe tarala Vau eteva etapaa salana me Vau eteva ghe sama teeielia, me ghe mene lao tee sio tani auliaa vaalua Sol karika ghe maamatautu tani ppooaa tale ararina ataeae Iesu eDamaskas. ²⁸ Liuna avalua o me Sol ghe toka aitauaa teeilala me ghe kasukasu ekapa see eJerusalem me karika ghe maamatautu tani ppooaa tale ararina ataeae Vau eteva. ²⁹ Sol me lo atoa ajiu ila la samasama nge Grik laghe aissakeanaala me ngila ghe loeloe tani uvi ematea. ³⁰ Nau katoa disaepolo laghe kilala, laghe sioaala Sol eSiisaria me laghe sungie lao sio eTases.

31 Liuna avalua o me ale manga akapaaili eJiudia, eGalilii me eSameria laghe tokala tale luei me Spirit Manga ateva ghe akorokoronganailala tani toka me tani tau sae Vau eteva, me ghe aisausieinilala me laghe oroieili ila.

Aenias me Dokas

32 Nau Pita ghe kasu ekapa seela ghe lao tee sio eLida tani tara katoa kapuna taumattu God laghe tokatoka okae. ³³ Isaa eLida me ghe tarala taumattu ngateva ararina ataeae ta Aenias tangorengorena ia me ghe asola tale komo ghaoaluae (8) ninamanama. ³⁴ Pita ghe uela etana va, “Aenias, Iesu Karisto ae eghelei emasinaio. Totu saela me ughou komom.” Arovaengaili ta Aenias ghe totu saela. ³⁵ Taumattu ngakapa atoa laghe tokatoka eLida me eSeron laghe taraiela me laghe tiuuala tani aiesoaa ta Vau ngepona ateva.

36 Isaa ejopa kateva disaepolo vause ia ararina ataeae ta Tabita (tale aseasea nge Grik, Dokas, malloeana va, kateva ghaata kkena la aseasea va dia). Tale nau ekapaaili ghe gheelei masi niuungu me ghe saasausi taumattu karika righi peiira. ³⁷ Tale isaa o nau Pita ghe tokatoka eLida, me Tabita ghe isikila me ghe matela. Laghe suusiela me laghe saeainiela tale ale ngepona atiulu. ³⁸ Ejopa kalakalangina ia eLida, liuna avalua o me nau disaepolo atoa laghe nongola va Pita eLida, laghe suula taumattu ngalua tani laa kolo Pita va emae parasi.

39 Isaa arau o Pita ghe usilaluela. Nau lotolu ghe rekatala ejopa lotolu ghe saela epona tale ale ngepona atiulu me ghe tarala vause atoa raue vulu ila pasueili ila tale ale atiulu, me laghe tiitingina emua ta Pita me laghe ngangngala, me laghe aapasunga ghinna Dokas ghe gheleila nau maulue ia.

40 Pita ghe sungi vella ghoala eleka me ghe suuiala tani looloo sae. Vara me ghe taatara lao sio tale vause ateva matena ia me ghe uela va, “Tabita, totu saela.” Tabita ghe otila matane, me nau ghe tarala Pita me ghe totu etokala. ⁴¹ Pita ghe posola nimane atelange me ghe sausiela tani tingina sae. Vara me ghe kolola vause atoa raue vulu ila tee mene katoa tau ngaisesoaa me ghe tau lao sio Tabita etaira maulue ia. ⁴² Kiukiu ghe rooala ejopa me oroieili taumattu ghe aikaiaala ta Vau ngepona ateva. ⁴³ Pita ghe mene tokala oroi nau ejopa tee taumattu

ngateva ararina ataeae ta Saemon uunguaane tani kuluki viliki ghaata kkena tani ghelei mene kasina asease voto.*

10

Konilies ghe kolola Pita

¹ Isaa eSiisaria, taumattu ngateva, ararina ataeae ta Konilies, ghe tokatoka. Ia kateva namuu ghe muemuaa kateva ai (100) tau ngai uvii tale Kohot ateva laghe aseasea va Kohot nge Itali ia.* ² Ia me vausenna ateva me natuna atoa laghe aikaiaa ta God me laghe oneoneainia. Ghe tautau lao voto tale taumattu karika righi peiira me ghe looloo sae ta God nau ekapa atoa. ³ Kateva nau ta 3 kilok elo alai† ghe tarala kateva nitaatara. Ghe tarala kapuna ensolo ateva God ghe mae sio etana me ghe uela etana va, “Konilies!”

⁴ Konilies ghe taatara lao sio etana me ghe matautula me ghe uela va, “Vau eteva, vaalua?”

Me ensolo ateva ghe uela etana va, “Unem nilooloo sae me masi uunguaam tale taumattu karika peiira, God ghe masimasiaala. ⁵ Ghaine usuu righi taumattu tani lao ejopa me la laa kolo taumattu ngateva Saemon la kolokoloa va Pita etana. ⁶ Etokatoka tee mene kateva Saemon uunguaane tani kuluki viliki ghaata kkena tani ghelei mene kasina asease voto, me alena ateva etokatoka kalakalangina ghoa elamana.”

⁷ Nau ensolo ateva ghe kasula, me Konilies ghe kolola ghalua tana kapuna tau ngai nonganongo anna me kateva kapuna tau ngai uvii ie tee ghe aainesoaa ta Vau ngepona ateva, ⁸ me ghe aulia ngakapala voto ghe lutula me ghe sungilotolla me laghe lao sio ejopa.

Unna nitaatara ataeae Pita

⁹ Mene kateva elo sinaka, nau ngila ghe kalakalangina tale masaliki taatara ataeae ejopa, me Pita ghe saela epona tale ale ateva‡ tani looloo sae. ¹⁰ Ghe maamaloo me ghe anna tani nama righi inana. Nau laghe aaimonomonosiaa inana me ghe tarala nitaatara ataeae. ¹¹ Ghe tarala epona liu ghe otiela me ghe tarala voto ateva namuu ia nongina tiulu kalio reerekati aighoughouna ghaata me ghe sio mae tale kosa ateva. ¹² Elome etana asease ghaata kkena atoa me llo erarraa euu me ghila atoa la looloo elomarase. ¹³ Vara me lingi ngalo ateva ghe uela va, “Pita! Totu saela me ughuvi emate llo me unama.”

¹⁴ Pita ghe liula me ghe uela va, “Karika poi arooroo, Vau ngepona ateva! Karika poi aghe nama righi voto karika raarangisana.”

¹⁵ Lingi ngalo ateva ghe mene mae sio ghaluene etana me ghe uela va, “Urau mene ue va karika raarangisana llo God ang ghe ghelei eraarangisanala.”

¹⁶ Ghe lutula kotoluata vara me arovaeaata ta kalio atiulu ghe mene saela epona liu.

¹⁷ Nau Pita ghe annaa poi va saa malloeana ia o nitaatara ataeae me taumattu Konilies ghe suula laghe tarala alena ateva Saemon me laghe

* **9:43:** Voto atoa nongina aikasukasu, aikaai ghinna, kou nguru, paisi, me mene kasina ase voto. * **10:1:** Kohot nge Itali ia Tau ngai uvii tale Kohot nge Itali ia, ila atala nge Itali ila.

† **10:3:** 3 kilok elo alai Ta inangari nge Grik, tale aiaaghasiona (9) ateva aoa. ‡ **10:9:** Ale atoa eIsraeli karika righi pungane nongina ale ghaine. **10:14:** Lev 11:1-47; Esik 4:14. **10:15:** Mak 7:15, 19.

tingina ssola tapaa ngatamana.¹⁸ Laghe kolokolola me laghe kolomila va, "Saemon Pita etokatoka oia?"

¹⁹ Pita karika ghe ruu tani nncaa nitaatara atea me Spiriti eteva ghe uela etana va, "Saemon, taumattu kotolu lotolu paepaeo.²⁰ Tingina saela me usio tarailotolu me urau mene rati tani usilotolu ta aghi asungilotolula."

²¹ Pita ghe siola me ghe uela ta taita kotolu va, "Aghi oia, am paepaeaghi. Vaalua me am mae sio?"

²² Taita kotolu lotolu ghe liula va, "Ami kasula tanganue Konilies, kateva namuu, tau ghulughuluena ia me eoneoneaa God. Taumattu nge Jiu ekapa atoa la oneoneainia. Ensolo manga ateva ghe auliaala etana va ekoloo me ulao tanganuena me ulaa ghauliaa saa llo voto aue uauliaa me aue enongo."²³ Pita ghe uela etairotolu va, "Ita ghaso."

Pita tale alena ateva Konilies

Ghe pai saela ta mene kateva nau, me Pita me mene katoa tau ngaisesoa nge Jopa laghe usila taita kotolu me laghe kasula.²⁴ Vara aiaaghaliene ateva nau, laghe rekataala eSiisaria. Konilies ghe kolo aitauaala mangalina atoa me kapuna atoa, me laghe toitoi Pita.²⁵ Nau eteva Pita ghe maemae, Konilies ghe souela me ghe suuiala ta liue kkena tani oneoneainia.²⁶ Pita ghe kune atinginaie saela me ghe uela etana va, "Tingina saela! Aghi nim taumattu ieghi nongina io."

²⁷ Nau lalu ghe samasama, me lalu ghe kupi ssola me Pita ghe tarala oroi taumattu ngatoa ngila ghe velu etauaala.²⁸ Ghe uela etaira va, "Am kilakilaaili uneimami inangari nipaopao va ajiu etoa karika la rooroo tani aighui tee tau ngeleka atoa me tani laa taraila. Me God ghe apasungaala etaghi va karika amene ue va kasina taumattu karika raarangisana.²⁹ Liuna avalua o me nau eteva am ghe suula inangari etaghi va amae, karika aghe ratila tani mae. Erooroo va am auliaa vaalua me am ghe uela va amae?"

³⁰ Konilies ghe liula me ghe uela va, "Kotolu nau ang ghe lange sio, aghe tokatoka tanganuegħi me ta 3 kilok elo alai,³¹ nongina ghaine, aghe looloo sae me taumattu ngateva ghinnanina ghe maamallanga ghe tinginala emua etagħi.³² Me ghe uela etagħi va, 'Konilies, unem nilooloo sae me masi uunguaam tale taumattu ngatoa karika peiira, God ghe masimasiaala.³³ Usungi righi taumattu elao ta Saemon Pita ejopa etokatoka tanganuena Saemon uunguaane tani kuluki viliki għaata kkena tani għelei mene kasina asease voto, me alena ateva etokatoka akalakalangina għoq elamana.'³⁴ Liuna avalua o me arovaeata ta agħe suula inangari etam me masinaili etam ta angu mae sio. Vau ngepona ateva aue etoka aitaua teeita nau eteva uauliaa sa ateva għe sungiola tani mae aulieinia me ami nongoa."

³⁴ Vara me Pita ghe tiuaala tani aippooaa, ghe uela va, "Għaine ngatarala va koronna God karika eaaimassiaa.³⁵ Me tale isaa akapaaili patunganua namuu, God ealoanna lo atoa la oneoneaa nonga God, me la għeelei voto masina.³⁶ Am kilakila inangarina God għe suula ta taumattu nge Israeli etoa, masi inangari va luei ekasu ta Iesu Karisto, ia Vau ia tale ila akapaaili taumattu ngatoa.³⁷ Am kilakila sa ateva għe

10:26: Apos 14:13-15; Aotu 19:10. **§ 10:30:** 3 kilok elo alai Ta inangari nge Griek, tale aiaaghasiona (9) ateva aoa. **10:34:** Diut 10:17; Rom 2:11. **10:37:** Mat 4:12-17.

ailutuaala eJiudia. Jon ghe aippooaa tale niaasuu eteae, me emulina, Iesu ghe tiuaala tani uungu eGalilii.³⁸ Me am kilakila vaalua God ghe tau lao sio Spirit Manga ateva me sarasarakanata Iesu aNasareti ia, me vaalua ghe kasu ekapa seela me ghe gheeghelei masi niuungu me ghe gheeghelei emasina lo atoa taumattu sesa taumattu ngateva ghe ghelei saasakieinilala, ta poli God ghe tokatoka teeia.

³⁹ “Ami, ami ghe tara akapala voto ghe gheleila tale masalikiira ajiu etoa me ejerusalem. Laghe avukalaie saela tale ai eteae tani uvi ematea. ⁴⁰ Tale aiaakotonna ateva nau, God ghe totuela tale nimate va taumattu ngatoa la taraia. ⁴¹ Karika va ila akapa taumattu ngatoa laghe taraielta ta llo nonga atoa God ang ghe suitoongainilala. Nau ghe totula tale nimate, ami, ami ghe namanama me ami ghe ropi teeielia. ⁴² Ghe uela etaimami va ami ppooaa ta taumattu ngatoa me aulia ngaotu etaira va ia God ghe suitoongainiela va eghelei naisakei ta lo atoa sakesake ila me lo atoa matena ila. ⁴³ Ila akapa propete atoa laghe aaulieinia va lo atoa la ghairesoaa etana God aue ekkaluua kaluira ssavoto tale ararina atea Iesu.”

⁴⁴ Nau eteva Pita ghe poppooaa isaa o inangari me Spirit Manga ateva ghe sio mae ta lo akapa atoa laghe nongonongo isaa o inangari. ⁴⁵ Tau ngairesoa ngatoa isoisona ila laghe mae aitauua tee sio Pita laghe soghila tani tara va Spirit Manga ateva ghe sio mae tee ta taumattu ngeleka atoa. ⁴⁶ Laghe nongolala ta laghe aippooaa tale asease nisama karika samasama tanganueira me tee laghe tautau sae God.

Me Pita ghe uela va,⁴⁷ “Teva erooroo tani ue va isaa oia taumattu erau mene ghaa niaasuu tale manu? Poli ngila ghaala Spirit Manga ateva nongina ita.”⁴⁸ Me Pita ghe uela va la ghaa niaasuu tale ararina atea Iesu Karisto. Me laghe kolomila Pita va emene toka teeila mua mene righi nau.

11

Pita ghe auliaala malloeana voto ghe gheleila

¹ Vara me apostolo atoa me tau ngairesoa ngakapa atoa eJiudia laghe nongola va taumattu ngeleka atoa tee laghe aikaiaala inangarina ateva God. ² Liuna avalua o me nau Pita ghe saela ejerusalem lo atoa isoiso ila tau ngairesoaa ila laghe sama anamuu teeielia,³ me laghe ue va, “Io ughe lao sio tanganueira lo atoa karika isoiso ila me ughe namanama teeilala.”

⁴ Me Pita ghe tiuaala tani aulia ngamasalika saa voto ghe lutula. ⁵ “Aghe tokatoka tale masaliki taatara atea eJopa me aghe looloo sae me aghe tarala nitaatara atea. Aghe tarala voto ateva namuu ia nongina tiulu kalio reerekati aighoughouna ghaata me ghe kasula epona liu me ghe sio mae nongina aghe tokatoka. ⁶ Nau aghe taatara ssola elome tale kalio atiulu aghe tarala asease ghaata kkena atoa, lo atoa ita aaitarainila me lo atoa karika ita aaitarainila, me llo erarraa euu me ghila atoa la looloo elomarase. ⁷ Vara me aghe nongola lingi ngalo ateva ghe ue etaghi va, ‘Pita, utotu me ughuvi emate llo me unama.’

10:38: Mat 3:16; Luk 4:17-21. **10:41:** Apos 1:8; Luk 24:42-43. **10:42:** Apos 17:31; 1 Pita 4:5. **10:43:** Ais 53:5-6; Jer 31:34; Apos 2:38. **10:44:** Apos 11:15; 15:8. **10:46:** Apos 2:4; 19:6. **10:48:** Apos 19:5. **11:3:** Apos 10:28; Gal 2:12. **11:5:** Apos 10:9-48.

8 "Aghe liula me aghe uela va, 'Karika poi, Vau ngepona ateva! Karika poi aghe nama righi voto karika raarangisana.'

9 "Lingi ngalo ateva ghe mae sio epona liu ghe mene aippooaala ghaluene me ghe uela va, 'Urau mene ue va karika raarangisana llo God ang ghe ghelei eraarangisanala.' 10 Llo oia ghe lutula kotoluata me isaa akapa llo ghe mene saela epona liu.

11 "Karika masau me taita kotolu laghe sungilotolla eSiisaria tani mae taraieghi, lotolu ghe mae sio tale ale ateva ami ghe tokatoka etana. 12 Me Spiriti eteva ghe uela etaghi va, 'Urau mene rati tani usilotolu ta aghi aghe sungilotolla,' me isaa toko ghaonomo (6) kapughu laghe usieghila ami ghe kupi ssola tale alena ateva taumattu ngateva. 13 Ghe auliaala etaimami vaalua ghe tarala ensolo ateva ghe lao sio tanganuena me ghe uela va, 'Suula inangari ta Saemon la kolokoloa va Pita etana, ia eJopa. 14 Ia aue emaeaa inangari egheleio me lo atoa tee tanganuem aue am saanga.'

15 "Nau eteva aghe tiuaala tani aippooaa, Spirit Manga ateva ghe sio mae etaira nongina ghe sio mae etaita nau ta Pentikos. 16 Me aghe annaala sa ateva Vau ngepona ateva ghe aulieiniela nau ghe uela va, 'Jon ghe aasuu taumattu tale manu me am aue am ghaa niaasuu tale Spirit Manga ateva.' 17 Liuna avalua o me poli God ghe tau lao sio kateva nonga ia voto ateva karika ita polipolia nongina ang ghe taue mae sio etaita lo atoa ita aikaaiia ta Iesu Karisto, aghi tee karika arooroo tani ghelei runga uunguaane God."

18 Nau eteva laghe nongo avaluela o karika laghe mene auliaala righi voto. Ta ngila ghe nim tautau sae God me laghe ue va, "God ange tau lao sio ninna ngaioghioghiaa ta taumattu ngeleka atoa va la kiri mae etana me la saanga."

Ale manga eAntio

19 Nau eteva lo atoa laghe ilou reerekata seela nau laghe ubi ematela Stipeni, laghe lao sio arau tale distriki eteva ePoenia me patunganua ateva eSaeparsi me tale masaliki taatara eAntiok tale provinsi eteva eSiria me laghe poppoaa ta ajiu nonga atoa. 20 Katoa etaira atala nge Saeprasi ila me tale masaliki taatara ateae eSaerini laghe lao sio eAntiok me laghe tiuaala tani ppooaa ta aGrik tee atoa. Laghe aauliaa masih inangarina Vau eteva Iesu. 21 Sarasarakaniaane Vau eteva ghe tokatoka teeila, mausina avalua o me oroieili taumattu ghe aikaaiiaala me laghe mene sso mae sio ta Vau eteva.

22 Tau ngaisesoa ngatoa eJerusalem laghe nongola voto o me laghe suula Banabas tani lao eAntiok. 23 Nau eteva ghe rekatala me ghe tarala vaalua maamasinaane God namungaili, ghe masimasieiliila me ghe asarasarakailala tani toka akorokorongana ta Vau eteva tale urunguitaniira. 24 Ia masih taumattu ia me pasu ia tale Spirit Manga ateva me korokorongana ia tale niaikaaiia, me oroieili lo atoa laghe mene sso mae tani aimuli tee Vau eteva.

25 Vara me Banabas ghe lao sio eTases tani pae Sol. 26 Nau eteva ghe taraiela ghe koloala me ghe laoainie sio eAntiok. Tale kasangaulu ghalua (12) ulana lalu ghe toka teela ale manga atoa me lalu ghe

aapasunga inangarina ateva God ta oroi taumattu ngatoa. Me isaa eAntiok laghe ase akasinala disaepolo atoa va Kristen ila.

²⁷ Tale isaa o nau katoa propete laghe kasula ejerusalem me laghe sio mae eAntiok. ²⁸ Kateva etaira, ararina atea me ghe tinginala tale korokoronganiaane Spiriti eteva me ghe aulia ngaotula va maloo ateva sesaaili ia aue erooa ngakapa kosa ateva, me nau Klaodies Siisa ghe aaitoiaa eRom, maloo ateva ghe lutula. ²⁹ Nau laghe nongola inangarina Agabas, laghe annaala va la sausi lo atoa ejjudia, me kateva kateva ta disaepolo atoa laghe aisokosokoiaala viliki veu tale aloannaaira. ³⁰ Banabas me Sol lalu ghe ghaala viliki veu me lalu ghe laoaa sio ta namu ngatoa tale ale manga ejerusalem.

12

Laghe uvi ematela Jeimis, me Pita laghe atokaie ssola tale ale mata voovoo

¹ Isaa o nau king Herot ghe tiuaala tani kune katoa tale ale manga, tani ghelei saasakieinila. ² Ghe auliaala me laghe sai pulela alona atiulu Jeimis tuena Jon tale baenata ateva. ³ Nau Herot ghe tarala va ajiu etoa laghe masimasiaala llo ghe gheleila, me ghe mene auliaala me laghe mene kunela Pita, tale nau nivelu eitaua ngateae tani nama verete karika righi isti etana. ⁴ Ghe atoka ssola Pita tale ale mata voovoo me ghe atinginala kasangaulu ghaonomo (16) soldia laghe aaikoli tani aitoieinia, ghaata mua soldia ta kateae nitoitoi. Herot ghe anna va eaisakei tale tummatavanga nau Pasova eruu.

⁵ Nau Pita ghe tokatoka tale ale mata voovoo me tau ngaisesoa ngatoa tale ale manga laghe looloo asarasarakana sae ta God va esausia.

Pita ghe kupi ghoala tale ale mata voovoo

⁶ Ia o voo ngateva me ghe pai Herot ghe atinginaia emua ta mata ngoroi etoa me ghe aisakei, Pita ghe aseasekanua ta mallomeirarua soldia ngalua iriiri ia tale sene alua, me mene ghalua soldia lalu ghe aaitoiaa atamana atea. ⁷ Vara me kapuna ensolo ateva Vau ngepona ateva ghe rekatala me mallanga ateva ghe lutula tale ale mata voovoo me ensolo ateva ghe posola usuena ativilau Pita tani angunia me ghe uela etana va, “Totu parasila,” me sene alua lalu ghe kao vellalue la ta nimane.

⁸ Me ensolo ateva ghe uela etana va, “Asaela ghinnanim me unem aikasukasu ta kkem.” Me Pita ghe gheleila llo ensolo ateva ghe auliaala. Vara me ensolo ateva ghe uela va, “Uasae unem aiaasae ngeleka ateva me uaimuli teeieghi.” ⁹ Liuna avalua o me Pita ghe kasu vulila ale mata voovoo atiulu me ghe aimuli teela ensolo ateva. Ghe annaa va ghe nim asoasopoi. Karika ghe kilakila va isaa o voto ghe lutulutu ekronna. ¹⁰ Lalu ghe laula aitiuti eteva soldia ghe toitoi atamana atea me mene aiaaghluene ateva me lalu ghe rekatala tale atamana atea aeana ia tale ale mata voovoo tale ia o masaliki taatara atea, me ia o atamana atea ghe otiela, karika teva ghe otiela, me lalu ghe kupi ghoala. Lalu ghe kasu tee siola tale mene katikirighi salana, vara me arovaeaata nonga ta ensolo ateva ghe kasu vulila Pita.

¹¹ Vara me Pita ghe vira kilala sa ateva ghe lutula etana me ghe uela va, “Koronnaaili Vau ngepona ateva esuula kapuna ensolo ateva tani

sio asaangieghi ta nimane Herot me voto aJiu etoa la ghanna tani ghelei etaghi.”

¹² Ghe tinginala ghe nannaala mua me ang ghe laolao tanganue Meri kinna ia Jon, kateae ararina ta Mak, nongina oroi taumattu ghe veluelu eitauaa tani looloo sae. ¹³ Ghe mirimirila tale atamani ngeleka atea me vause ateva Roda etana tau ngai nonganongo anna ia ghe ghoa mae tani nongo. ¹⁴ Nau eteva ghe nongo kilala lingi ngalona ateva Pita ghe masimasi etinginala me karika ghe otira atamana atea ta ghe ilou ssola elome me ghe uela ta taumattu ngatoa va, “Pita eleka tale atamana atea eghoa tiitingina.”

¹⁵ Me laghe ue teeielva va, “Angu veeveela?” Me nau ghe sarasarakanan tani auliaa me laghe nnaala va, “Koti kapuna ensolo ateva okae.”

¹⁶ Pita ghe mene mirimirila me laghe ghoala tani oti atamana atea me laghe soghiaala tani taraia. ¹⁷ Me Pita ghe paopaoa ta nimane va la rau mene sama, me ghe auliaala sa ateva ghe lutula me vaalua Vau ngepona ateva ghe ghaa velue ghoa mae tale ale mata voovoo, me ghe uela etaira va, “Am auliaa ta Jeimis me mene katoa kapuita, sa ateva ghe lutula.” Me ghe mene lao ppae sio.

¹⁸ Vara ghe paila me soldia ngatoa nannaaira ghe aisavisavilaala me ngila ghe aaikolomieinila va, “Sa ateva ghe lutula ta Pita?” ¹⁹ Herot ghe uela va la laa paea. Nau eteva karika laghe roola tani taraia, ghe kolomila soldia ngatoa laghe aaitoieiniela, me karika laghe roola tani liu, me ghe uela va la uvi ematela.

Matemateaane Herot

Vara me Herot ghe kasula ejjudia tani mene laa toka tau eSisiaria. ²⁰ Herot ghe sessaia ta taumattu nge Taer me Saedon, me laghe aloannala luei etana, poli laghe ghaaghhaa inana tale llo masaliki king ghe aitarraa. Liuna avalua o me katoa etaira laghe mae aitauaa sio me laghe siola tani taraia. Laghe lao akasina sio ta Blastus, ia ghe aitarraa tanganuena king, va ghe sausila, me laghe vira lao sio tani tara king.

²¹ Tale nau eteva laghe suitoongainiela, Herot ghe asaela ase aiaasae ateva tani apasunga va ia kingi ia me ghe tokala tale unna aitokatoka ateva uneira ia kingi etoa me ghe gheleila kateva niaippooaa ta taumattu ngatoa. ²² Me taumattu ngatoa laghe aaore tani ue va, “Karika va lingi ngalo taumattu ia, ta lingi ngalo goto ia.” ²³ Arovaeaa nonga ta kapuna ensolo ateva Vau ngepona ateva ghe taula sessa ateva etana me ttoliti etoa laghe nama amateala, poli taumattu ngatoa laghe kaakaueinia tani arueinia me karika ghe tautau sae ararina atea God.

²⁴ Me masi inangarina ateva God ang ghe laolao akapa see me ang ghe piipinosa anamu.

²⁵ Banabas me Sol lalu ghe ruula uunguaairarua tani taula viliki veu eJerusalem me lalu ghe mene lao sio eAntiok me lalu ghe kolo teela Jon Mak.

13

Tau ngaisesoa ngatoa laghe suula Banabas me Sol tani laa ppooaa

¹ Tale ale manga ateva eAntiok katoa propete me tisa laghe aapasunga masi nitoka God ghe aloanna: Banabas, me Simion, mene kateae

ararina ta Niger,* me Lusias aSaerini ia, me Sol, me Manain, lalu ghe namu ngaitauaala me Herot, gavana ia. ² Kateva nau laghe kakkaua Vau ngepona ateva, me laghe naenae, me Spirit Manga ateva ghe uela va, “Am amanga Banabas me Sol me lalu ghelei niuungu eteva oia, aghe suitoongainilaluela tani gheleia.” ³ Liuna avalua o me nau laghe mene naela me laghe looloo saela, me laghe saoaala nimaira etairarua, me laghe sungilaluela tani kasu.

eSaepras

⁴ Spirit Manga ateva ghe sungi taulalue ghoala eSeleusia, lalu ghe aikaaila me lalu ghe lao sio tale patunganua ateva eSaeprasi. ⁵ Nau eteva lalu ghe rekatala tale masaliki taatara ataeae eSalamis, lalu ghe ppooaala inangarina ateva God elome tale aleira ale nivelu eitauaa ajiu etoa. Jon Mak ghe toka teeilaluela tani sausilalua.

⁶ Lotolu ghe kasu ekapa seela tale patunganua ateva me lalu ghe mae sio ePapos. EPapos lalu ghe tarala kateva ajiu, tau nigelei nialaala ia me propete kamekame ia, ararina ataeae ta Bar-Iesu. ⁷ Ia oia taumattu ngateva ghe tokatoka tee gavana ngateva, ararina ataeae ta Sejias Polus. Gavana tee alomasaanga ia. Ghe kolola Banabas me Sol ta ghe aaloanna tani nongo inangarina God. ⁸ Ia o ase taumattu ngateva ghe gheelei nialaala, tale inangari nge Grik la aseasea arariira ataeae ta Elimas. Elimas ghe aloanna tani ghelei saasakiaa uunguaairarua Banabas me Sol, ta karika ghe aloanna va gavana ngateva eairesoaa ta Iesu. ⁹ Me Sol, mene kateae ararina ta Pol, pasu ia tale Spirit Manga ateva, ghe alumila Elimas me ghe uela va, ¹⁰ “Io natuna io Satana. Me tau ngai ssateeira io voto llo ghulughuluena! Me isaa akapa gheeleia nikamekame me ssavoto epasupasu etam. Erooroo va uruu tani ghelei saasakiaa salane Vau ngepona ghulughuluena? ¹¹ Ghaine nimane atelange Vau ngepona ateva esae etam, me umata salusalu. Karika aue utara sinaka ateva me aue utoka mala ngaluse nau.”

Pol ghe nim ruuruu poi tani auliaa me matane Elimas ghe saurorromienala me ghe mata salusalula me ang ghe paepae teva taumattu tani posoa me ekatulainia. ¹² Nau eteva gavana ngateva ghe taraiela, ghe aiesoaaala, me ghe soghiangailiila kanna niapasunga Vau ngepona ateva.

Banabas me Pol lalu ghe lao sio tani ppooaa eAntiock elome ePisidia distrik

¹³ Pol me kapuna atoa laghe kasu vulila ePapos, me anua ateva ghe kaailala me laghe lao sio tale masaliki taatara ataeae ePerga tale provins ateva ePampilia. Me Jon Mak ghe oghi vululaluela me ghe oghi lao sio ejerusalem. ¹⁴ Lalu ghe kasu vulila ePerga, me laghe kasu lao sio eAntiock elome ePisidia Distrik. Me ta nau manga ateva, laghe kupi ssola tale aleira ale nivelu eitauaa ngateva ajiu etoa me laghe toka siola. ¹⁵ Vara katoa laghe ruula tani riti inangari tale inangari nipaopao me propete atoa me namu ngatoa tale ale nivelu eitauaa ngateva laghe suula inangari ta Pol me kapuna atoa va, “Kapuimami etoa, marova righi inangari niasarasarakana am aaloanna tani auliaa etaimami, masina am rooroo tani sso auliaa.”

* **13:1:** Niger Tale inangari nge Latin, malloeana va veroverongana. **13:2:** Apos 9:15.
13:3: Apos 6:6. **13:5:** Apos 12:12; 15:39. **13:11:** Apos 9:8. **13:13:** Apos 15:38.

¹⁶ Pol ghe tingina saela me ghe paolala tale nimane atelange va karika la mene toka samasama, me ghe uela va, "Am Israeli etoa me am tau ngeleka atoa am tautau sae ararina ataeae God, am nongoaghi! ¹⁷ Kapuira Goto ateva Israeli etoa, ghe suitoongaala tuvuita atoa va kapuna ila. Me nau eteva laghe kasu vulila kosaira me laghe siola eljip, ghe gheleilala laghe oroienaailliila. Vara me tale sarasarakaniaane, ghe mene ghaa vellala eljip. ¹⁸ Me nau eteva laghe tokala tale voto ateva karika righi taumattu etana, karika ghe liula sesa ta ngetaira erooroo ghaatingauluae (40) ninamanama. ¹⁹ Ghe tturuula ghaitu (7) ararimangali nge Keinan, me ghe tau lao sio isaa o kosa va ekosaira kapuna atoa. ²⁰ Isaa akapa voto o ghe lutula erooroo ghaata ai me ghalimangauluae (450) ninamanama.

"Vara me God ghe tau lao sio kapuira namu ngatoa tani aitarainila erooroo nau eteva propete Samuel ghe tinginala. ²¹ Vara me taumattu ngatoa angila ghe kookolomi teva kingi, me God ghe tau lao sio Sol natuna ia Kish, tale ararimangali eteva ta Benjamin. Ghe aitarainilala ta ghaatingauluae (40) ninamanama. ²² Vara ghe ghaa vella Sol, me ghe gheleila Deivit ghe kingila. Ghe auliaa tootoongaala va, 'Ngatarala Deivit, natuna ia Jesi, ia lo ateva taumattu aghaloannaaililia tale urunguitanighi eteva. Ia aue egelei ekapa voto aghaloanna va egelei.'

²³ "Nongina God ang ghe auliaala tale inangari nialokoi, va ghe tau lao sio tau ngai asaangi eteva ta Israeli etoa, tuvuna ia Deivit, Iesu etana. ²⁴ Auena Iesu ghe mae, Jon ghe ppooaala ninna ngaioghioghiaa me niaasuu ta taumattu nge Israeli ekapa atoa. ²⁵ Jon ang ghe maemae ta ghe ruu uunguaane, me ghe uela va, 'Am annaa va aghi see etaghi? Karika va aghi Mesaea am toitoia. Karika, ia eaaimuli etaghi, me aghi karika tani masina aghi tani pulaka unna ai-iri aikasukasu ta kkena.'

²⁶ "Kapughu etoa, tuvuna atoa Abraham, me am tau ngeleka atoa am kakkaua God, God ghe tau mae sio isaa oia inangari niasaangi etaita! ²⁷ Taumattu nge Jerusalem atoa me kapuira namu ngatoa karika laghe tara kilala Iesu, aloira karika ghe masaangaala inangariira propete atoa isaa o laghe ritiriti tale isaa akapa nau manga, laghe ghelei rooroaaala nau laghe uela va aue emate. ²⁸ Karika laghe tarala righi masih salana tani tingina etana me la uvi ematea, me laghe kolomila Paelat va la uvi ematea. ²⁹ Nau eteva laghe ghelei ekapala voto Uru ngai Manga ateva ghe uela va la ghelei, laghe ghaa veluela tale ai eteae me laghe lao sio tani alokoie sso tale lienga niaikkaia ngateae. ³⁰ God ghe mene totuela tale nimate ³¹ me oroeili nau, ghe otuotula ta lo atoa laghe kasu teeielia eGalilii tani sae ejerusalem nau maulue ia. Ila lo atoa laghe taraiela, ghaine la aaulia ngaotu ta kapuita taumattu ngatoa.

³² "Me angalu aauliaa masi kiukiu etaimim: Sa ateva God ghe aulieiniela tale inangari nialokoi ta tuvuita atoa ³³ ang ghe ghelei eroorooaala etaita, nau ghe totula Iesu. Nongina laghe piti elokoila ta aiaaghala ateva Sam, va

"'Io natughu io,
Ghaine nge tamami ieghila.'

13:17: Eks 1:7; 6:6; 12:51.

13:18: Nam 14:34; Diut 1:31-32.

13:19: Diut 7:1; Jos 14:1.

13:20: Aitoi 2:16; 1 Sam 3:20.

13:21: 1 Sam 8:5, 19; 10:20-24.

13:22: 1 Sam 13:14; 16:12;

Sams 89:20.

13:23: 2 Sam 7:12-16.

13:24: Mat 3:1-2.

13:25: Jon 1:20, 27.

13:28:

Mat 27:22-23.

13:29: Mat 27:59-60.

13:31: Apos 1:3, 8.

13:33: Sams 2:7.

³⁴ Koronna inangari va God ghe totuela tale nimate, karika aue emene mate, nongina ghe auliaala tale isaa toko inangari, va
“Aue atau aatu etaimim niarangise ateva manga ia me koronna ia tale inangari nialokoi aghe auliaala ta Deivit.”

³⁵ Nongina ghe auliaala tale mene kateva inangari va,
“Karika aue utau velu kapum taumattu ngateva manga ia va emauu.”

³⁶ “Nau eteva Deivit ghe ruula tani ghelei uunguaane God tale unna ateva vituu, ghe matela; me laghe kiaeiniela nongina tuvuna atoa me vilikina ghe mauula. ³⁷ Me lo ateva taumattu God ghe totuela tale nimate karika ghe mauula.

³⁸ “Liuna avalua o, kapughu etoa, aghaloanna tani aulia ngaotu me am kila va ta Iesu, God aue ekkaluua kaluita ssavoto. ³⁹ Ta netana lo atoa la ghaikaiaa aue egheleila va karika righi kaluira ssavoto. Isaa avalua o me inangari nipaopao kanna Moses karika erooroo tani asaangiem tale kaluimim ssavoto. ⁴⁰ Am paniem! Saa voto God ghe auliaala ta propete atoa erau lutu etaimim, laghe uela va,

⁴¹ “Am tarala, lo atoa taumattu am aattara nonga tani sama,
aue am soghiaa sa ateva aue agheleia, me aue am mate,

Tale nau oia aue aghelei kasina voto,
karika aue am nnaa va koronna,
arongona ta marova kasina taumattu aue eauliaa poi etaimim!”

⁴² Nau eteva Pol me Banabas angilalu ghe kasukasu vuli ale nivelu eitaua ngateva, taumattu ngatoa laghe mene aloannailuelu va lalu mene ppooaa isaa oia voto tale lo ateva too nau manga. ⁴³ Nau eteva lo atoa laghe mae sio tani velu eitauua laghe kasu reerekatala, oroi ajiu etoa me mene katoa taumattu avirina laghe vira aiesoala tee ajiu etoa, laghe usilaa Pol me Banabas. Lalu ghe tani aippooaa teeila tale inangari niaisausiaa tani poso parasi maamasinaane God.

⁴⁴ Tale mene kateva nau manga, ghaisa ngarighi me taumattu ngakapa atoa tale lo ateae o masaliki taatara laghe velu eitauaala tani nongo inangarina ateva Vau ngepona ateva. ⁴⁵ Nau eteva ajiu etoa laghe tarala oroeili taumattu, me angila ghe nannaas saasakiaa me angila ghe aauliaa tee Pol me saa voto ghe aauliaa.

⁴⁶ Pol me Banabas, karika lalu ghe matautula, lalu ghe liula me lalu ghe uela etaira va, “Ami tani ppooaa inangarina ateva God akasina etaimim. Ta am, am ghe ratiela me eaapasunga va God karika ghe suitoongainiema tani ghaa maulue ateva etokatoka liu. Liuna avalua o, koti ami lao ta tau ngeleka atoa. ⁴⁷ Vau ngepona ghe uela ta kateva kateva etaingalua va,

“‘Aghe gheleiola va io mallanga io ta taumattu ngeleka atoa,
me urooroo tani sausila tani ghaa niasaangi tale kosa akapa ateva.’”

⁴⁸ Nau eteva taumattu ngeleka atoa laghe nongola llo oia, laghe masimasieiliila me laghe tau saela inangarina ateva Vau ngepona ateva, me lo atoa God ghe suimatoongainilala va la ghaa maulue ateva etokatoka nau ekapa atoa, laghe aiesoala.

⁴⁹ Inangarina ateva Vau ngepona ateva ghe rooa ngakapaailila ia o voto ateva. ⁵⁰ Vara me ajiu etoa laghe ghelei saasakiaala nannaaira

lo atoa vause laghe oneoneaa God me ila namuu ila, me lo atoa taita namuu ila tale lo atae o masaliki taatara, me laghe tiuaala tani gheleia saasakiaa tee Pol me Banabas, me laghe tiu vellaluela tale ia o voto ateva.⁵¹ Lalu ghe rariaa vella au kosa ta kkeirarua tani apasunga va gheeeliaairaa sesa. Me lalu ghe lao sio elkoniam.⁵² Me disaepolo atoa eAntiok elome tale distriki eteva ePisidia laghe pasula tale nimasimasi me tale Spirit Manga.

14

eElkoniam

¹ Elkoniam Pol me Banabas lalu ghe mene gheleila uunguaairarua nongina lalu ghe gheelei eAntiok elome tale distriki eteva ePisidia. Lalu ghe ssola tale aleira ale nivelu eitaua ngateva Ajiu etoa me lalu ghe aippooala me tale poppooaairarua sarasarakanaili, oroieili taumattu ngatoa ajiu ila me aGrik ila laghe aiesoala.² Katoa tana ajiu karika laghe aikaiaala laghe tau lao sio sesa ninannaa ta katoa tana taumattu ngeleka me laghe gheleli esessaila tau ngaisesoa ngatoa.³ Lalu ghe tokala oroi nau elkoniam me karika lalu ghe maamatautu tani aulia ngaotu Vau ngepona ateva, me Vau eteva ghe tau lao sio sarasarakanetairarua me lalu ghe gheleila oroieili ase niaimatootoongana me mirikolo atoa, me tale isaa o voto lalu ghe gheelei, Vau eteva ghe apasunga ta taumattu ngatoa va voto o lalu ghe aulia ngaotu tale maamasinaane koronna akapa.⁴ Me taumattu tale ia o masaliki taatara atae ghe ghalua atokailala; katoa laghe lao aitauaa tee sio ajiu etoa, me katoa laghe lao aitauaa tee sio apostolo alua.⁵ Emulina ajiu etoa me mene katoa tana taumattu ngeleka laghe tingina aitauaa teela kapuira namu ngatoa, me laghe aaloanna tani uvi taita alua me tani kumlalua tale atu va lalu mate.⁶ Pol me Banabas lalu ghe nongola me lalu ghe iloula. Lalu ghe lao sio tale distriki eteva eLikaonia, tale masaliki taatara aluae eListra me eDebi me mene kasina lutu masaliki.⁷ Me lalu ghe mene ppooala masi kiukiu.

eListra me eDebi

⁸ EListra kateva tana taita, tangorengorena ia, tokatoka ngeuu ia nau ghe lutula, karika ghe kasukasula.⁹ Ghe tokala me ghe nongola nau Pol ghe aippooala. Pol ghe taatara lao sio etana me ghe tarala va aikaiaane erooroo tani ghelei emasinaia,¹⁰ me ghe sama anamuula etana me ghe uela va, “Tingina saela,” me taita ateva ghe aoso atingina saela me ghe kasukasula.

¹¹ Nau eteva taumattu ngatoa laghe tarala isaa o voto Pol ghe gheleila, laghe tiuaala tani sama me aore atingina tale inangari tanganueira eLikaonia, laghe ue va, “Goto atoa ngila nonginala taumattu ngatoa me ngila sio mae etaita.”¹² Banabas laghe asela ararina atae ta Sius me Pol laghe asela ararina atae ta Hermes poli ia ghe muemuaa niaippooaa.¹³ Alena ale manga ateva goto ateva Sius ghe tokatoka akalakalangina eleka tale masaliki taatara atae. Pristi eteva ta goto ateva ta Sius ghe maeaa sio vulumakao me pusi ngai tale namu ngateae atamana poli ia me taumattu ngatoa laghe anna tani ghelei aiaavusuvusuena etairarua.

¹⁴ Apostolo alua ta Banabas me Pol lalu ghe nongola voto o laghe aaloanna tani ghelei etairarua me lalu ghe rasila uneirarua aiaasae tani apasunga va karika lalu ghe masimasi me lalu ghe ilou ssola elome ta taumattu ngatoa me lalu ghe tiuala tani sama anamuu. ¹⁵ Lalu ghe ue va, "Vaalua me am anna tani ghelei isaa ona voto? Angalua nim taumattu iengalua nongina am. Angalu ghe mae sio tani aulia ngaotu masi kiukiu va am kiri tale voto kamena me am taatara lao tale Goto ateva tokatoka liu ia ghe gheleila elomarase me kosa ateva, paamanu eteva me isaa akapaaaili voto elome tale isaa o voto. ¹⁶ Emua arau taumattu ngeleka atoa karika laghe kilakila God, liuna avalua o me God ghe tau vellala tani kasu tale aloaloannaaira. ¹⁷ Me ghe aapasunga voto tani aimatoonga va ia etautau masi voto, me eaapasunga maamasinaane ta etautau sio vaoo ateva epona liu, me inana tale nauna, me etautau aatu inana, me eaapasu urunguitaniimim tale nimasimasi." ¹⁸ Tale isaa o inangari, ghaisa ngarighi karika lalu ghe roo tani ghelei runga taumattu ngatoa tani ghelei aiaavusuvusuena lao ta ngetairarua.

¹⁹ Katoa tana ajiu laghe kasula eAntiok elome ePisidia Distrik me elKoniam laghe pasalila taumattu ngatoa me laghe kumla Pol tale atu me laghe ae velue ghoala tale masaliki taatara ateeae poli laghe annaa va ang ghe matela. ²⁰ Nau disaepolo atoa laghe tingina talieiniela me ghe totu saela me ghe kiriaa ssola tale masaliki taatara ateeae. Eghe paila tale mene kateva nau, ia me Banabas lalu ghe lao sio eDebi.

Lalu ghe oghi lao sio eAntiok eSiria

²¹ Pol me Banabas lalu ghe ppooaala masi kiukiu eDebi me oroieili taumattu laghe aiesoala. Vara me lalu ghe oghiaa siola eListra, elKoniam me eAntiok elome ePisidia Distrik. ²² Lalu ghe aasarasarakanala tau ngaisesoa ngatoa me lalu ghe auliaala va la poso parasi lo ateva o niaikaaiia. Lalu ghe ue ta taumattu ngatoa va, "Tani kupi sso tale ararimangalina ateva God, aue ita tani sou oroieili voto aanasa." ²³ Tale kateva kateva ale manga, lalu ghe suimatoongaala elda ngatoa me lalu ghe naela me lalu ghe looloo saela tani taula lao ta nimane Vau ngepona ateva, ia laghe aatoka tuutuliira etana. ²⁴ Nau lalu ghe lao akapa see sio tale distriki eteva ePisidia me lalu ghe mae sio tale distriki eteva ePampilia. ²⁵ Isaa o lalu ghe aippooaala tale masaliki taatara ateeae ePerga vara me lalu ghe siola tale masaliki taatara ateeae eAtalia.

²⁶ EAtalia lalu ghe aikaaila tale anua ateva me lalu ghe lao sio eAntiok tale provinsi eteva eSiria nongina laghe taulalue lao sio ta God va tale maamasinaane God lalu ghelei isaa o niuungu lalu ghe kasula tani ghelei, me lalu ghe ruula, me lalu ghe kiriaa mae sio. ²⁷ Nau lalu ghe rekataala eAntiok lalu ghe kolo aitauaala taumattu ngatoa tale ale manga ateva me lalu ghe auliaala voto God ghe sausilaluelu tani ghelei me vaalua ghe otilla salaira taumattu ngeleka atoa tani aiesoaa. ²⁸ Lalu ghe tokala oroi nau tee lo atoa laghe aikaaiia tale ia o masaliki eteae.

15

Nivelu eitaua ngateae eJerusalem

14:15: Apos 10:26; Sams 146:6. **14:16:** Apos 17:30. **14:17:** Jer 5:24. **14:19:** Apos 17:13; 2 Ko 11:25. **14:22:** Apos 15:32; 1 Tes 3:3. **14:26:** Apos 13:1-2. **14:27:** Apos 15:4, 12.

¹ Katoa taumattu laghe kasula eJiudia me laghe sio mae eAntiok tani mene apasunga ta tau ngaisesoa ngatoa. Laghe ue va, “Karika am roro tani saanga marova am tam aimuli tee inangari nipaopao kanna Moses va la iso taita atoa.” ² Isaa oia inangari ghe gheleila kinatama naisamaaii tee Pol me Banabas. Elda ngatoa laghe suoongaala Pol me Banabas tani mene katoa tana tau ngaisesoa tani sae eJerusalem tani sae tara apostolo atoa tee elda ngatoa tale isaa o inangari. ³ Tau ngaisesoa ngatoa tale ale manga ateva laghe sungilala tani sae eJerusalem me nau laghe laa saesae, laghe sso teela ePoenisia me eSameria me laghe kiukiuaala vaalua taumattu ngeleka atoa laghe aikolikoliaala. Nau laghe nongola isaa o inangari, laghe masimasieiliila. ⁴ Nau laghe rekatala eJerusalem, tau ngaisesoa ngatoa, apostolo atoa me elda ngatoa laghe masimasieiliila tani soula, me Pol me Banabas lalu ghe auliaala vaalua God esaasausilalua tale uunguaairarua.

⁵ Katoa tana tau ngakaaiaa laghe aimuli usi tee katoa tana Paresi, laghe tingina saela me laghe uela va, “Am tani iso taumattu ngeleka atoa me la tani usilaa inangari nipaopao kanna Moses.”

⁶ Apostolo atoa me elda ngatoa laghe toka siola tani aisakeiaa isaa o inangari. ⁷ Oroieili niappooaa ghe lange sio me Pita ghe tingina saela me ghe uela va, “Kapughu etoa, am kilakila kasina nau ang ghe lao sio God ghe suoongainaghila elome etaimim va aghaulia ngaotu lo ateva oia masi kiukiu ta taumattu ngeleka atoa me ila tee aue la roo tani nongo me la aikaaiaa. ⁸ God ekilakila akapa urunguitaniira taumattu ngatoa, liuna avalua o me tani apasunga va eaaloanna tee taumattu ngeleka atoa, me etaatau lao Spirit Manga ateva, nongina ghe taue mae sio ta ngetaita. ⁹ God etaatara taumattu ngeleka atoa me ita ajiu etoa va kateva nonga ita. Poli ang ghe kkaluaala kaluira ssavoto nau laghe aiesoala. ¹⁰ Vaalua me am aaloanna tani tootoonga God me am tautau lao maamatana ta mene katoa tau ngaisesoa me emua arau ita me tuvuita atoa ita ghe tam roro tani sau? ¹¹ Karika emene isaa avalua o! Ita aiesoaa va ita me ila aue ita saanga tale maamasinaane ateva Vau eteva Iesu.”

¹² Ila akapa taumattu ngatoa laghe matua ngatokala me laghe nongola Banabas me Pol lalu ghe auliaala llo aimatootoongan me mirikolo God ghe sausilaluela tani ghelei nau lalu ghe uungu ta taumattu ngeleka atoa. ¹³ Nau lalu ghe ruula tani aippooaa, Jeimis ghe liula me ghe uela va, “Kapughu etoa, am nongoaghi. ¹⁴ Saemon Pita ghe auliaala etaita vaalua God ghe apasunga ngakasinala ailousiaane ateva ta taumattu ngeleka atoa me ghe gheleila katoa etaira va kapuna tuungi ila. ¹⁵ Inangariira propete atoa elaolao aitauua tee isaa oia inangari va taumattu ngeleka atoa la aiesoaa, nongina Uru ngai Manga ateva eaauliaa va,

¹⁶ “Emuli tale isaa oia voto aue aoghi

me alaa ghatulu alena ateva Deivit* ghe katuula
me voto ghe sesala, aue amene atulu
me aue aghelei nongina arau.

15:1: Gal 5:2. **15:2:** Gal 2:1. **15:4:** Apos 14:27. **15:7:** Apos 10:1-43. **15:8:** Apos 10:44; 11:15. **15:10:** Mat 11:30; Gal 3:10. **15:11:** Gal 2:16; Ips 2:5-8. **15:13:** Gal 2:9. **15:16:** Eimos 9:11-12. * **15:16:** Alena ateva Deivit eaimatoonga kingi etoa tuvuna ila Deivit.

¹⁷ Poli aghaloanna va mene kasina taumattu aue la mene pae Vau ngepona ateva,

tee ila o taumattu ngeleka atoa aghe kololala va ekapughu ila,’ ghe uela Vau eteva ia egheelei isaa oia voto.

¹⁸ Ngila ghe kilala oroi ninamanama ang ghe lange sio.”

¹⁹ Jeimis ghe uela va, “Nannaaghi va ita rau mene ghelei voto eaanasaaili ta ngetaira taumattu ngeleka atoa la maemae ta God. ²⁰ Ita roo tani piti tikirighi uru ngai elao etaira me ita auliaa isaa oia voto va la rau mene nama inana la tautau lao tale kapuira tootoo goto atoa, me la rau mene ghelei uunguaa niallai salosaloaa see ateae, me la rau mene nama ghaata kkena la kiikii pule aloira, me la rau mene nama malatau rae ta ngetana. ²¹ Ta emua arau inangari nipaopao kanna Moses laghe aaulia ngaotu tale isaa akapaaili masaliki taatara, me laghe ritiritu tale ale nivelu eitaua ngatoa tale isaa akapaaili nau manga.”

Uru ngai etikirighi laghe pitiela ta tau ngaikaia ngeleka atoa

²² Vara me apostolo atoa me elda ngatoa me ila akapa tale ale manga ateva laghe uela va la suoongaa righi taumattu me la sungila sio eAntiok tee Pol me Banabas. Laghe asela Jiudas (la aseasea va Barsabas) me Saelas. Taita alua oia lalu ghe muemuaa tau ngaisesoa ngatoa.

²³ Laghe pitila uru ngai etikirighi eue va,

Ami apostolo atoa me elda ngatoa, ita aiesoa ngaitauaa,

Ami tautau aatu masimasiaimami etaimim akapa taumattu ngeleka atoa am ghe aiesoaala isaa ona tale masaliki taatara ateae eAntiok me tale provinsi elua eSiria me eSilisia.

²⁴ Ami ghe nongola va katoa ta ngetaimami laghe sio atu ta ngetaimim me laghe aauliaa inangari egheelei saasakiaa tokatokaaimim me egheelei saasakiaa nannaaimim me karika ami ghe sungilala.

²⁵ Ami masimasi eitauaala tani suu katoa ta ngetaimami tani kasu eitauaa tee masi kapuita alua ta Banabas me Pol tani sio taraiem.

²⁶ Taumattu ngalua oia angilalu ghe tau lao sio maamauluaairarua tale ararina ateae kapuita Vau eteva Iesu Karisto. ²⁷ Liuna avalua o ngami sungisungi tee Jiudas me Saelas tani akorokorongana inangari ami ghe pitila. ²⁸ Ngami mae aitauaa sio nonga tale kateva nonga ninannaa me Spirit Manga ateva va emaamasina va karika ami mene saoaa sae mene righi inangari maate tee isaa toko inangari nipaopao:

²⁹ Karika am mene nama malatau la gheelei sae aiaavusuvusuena tale tootoo atoa, me am rau mene nama llo ghaata kkena la kiikii pule aloira, me malatau rae ta ngetana, me am rau mene ghelei uunguaa niallai salosaloaa see ateae. Aue am toka amasina marova am usilaa isaa oia inangari.

Masinaaili.

³⁰ Apostolo atoa me elda ngatoa laghe sungila isaa oia taumattu tani sio eAntiok, me laghe kolo aitauaala taumattu ngatoa laghe aiesoaa me laghe taula uru ngai etikirighi. ³¹ Nau laghe nongola uru ngai etikirighi, laghe pasula tale nimasimasi poli laghe nongola inangari niaisausiaa.

³² Jiudas me Saelas ilalua tee propete ilalua me lalu ghe kaarasila tani aippooaa teeila me tani asarasarakanaila tale masi inangari. ³³⁻³⁴ Laghe tokala kasina nau me ghe ghaala nauirarua taita alua tani mene oghiaa sae nongina laghe sungilalue. Laghe sungilalue tee kaluira

niarangise me luei.[†] ³⁵ Pol me Banabas lalu ghe tokala eAntiok tee mene katoa me laghe aapasunga me laghe aaulia ngaotu inangarina ateva Vau eteva.

Pol me Banabas lalu ghe aitiuaala

³⁶ Oroi nau ghe lange sio me Pol ghe uela ta Banabas va, “Italu mene oghi lao ta kapuitalua atoa tale masaliki taatara atoa nongina italu ghe ppooaala inangarina ateva Vau eteva, me ita laa taraila va vaalua aikaaiiaira.” ³⁷ Banabas ghe aloanna va Jon Mak eusilalua, ³⁸ me Pol karika ghe aaloanna poli eghe oghi vululuelu ePampilia me karika ghe usilaluelu tani laa ghelei niuwungu. ³⁹ Taita alua lalu ghe aisavalaa teela tuku ninanna ngateva o me lalu ghe aitiuaala. Banabas ghe kolola Jon Mak me lalu ghe aikaaila me lalu ghe lao sio eSaeparsi. ⁴⁰ Me Pol ghe kolola Saelas me tau ngaisesoa ngatoa laghe taulalue lao sio tale maamasinaane Vau ngepona ateva, me lalu ghe kasula. ⁴¹ Lalu ghe lao sio eSiria, eSilia me lalu ghe aasarasarakana taumattu ngatoa tale ale manga atoa.

16

Timoti ghe usila Pol me Saelas

¹ Pol me Saelas lalu ghe lao sio eDebi me lalu ghe mene lao tee sio eListra. Tale masaliki eteae o, kateva disaepolo ghe tokatoka, ararina ateae ta Timoti, kinna ateva ajiu ia me ghe aaiesoaa, me tamane ateva aGriki ia. ² Tau ngaisesoa ngatoa eListra me elkoniam laghe aarueinia. ³ Pol ghe anna tani koloa va lotolu ghe kasu, liuna avalua o me ghe isouela poli ghe nnaala ajiu etoa nongina lotolu ghe laolao me laghe kilakila va tamane ateva aGrik ia. ⁴ Nau eteva laghe laolao tale isaa akapa masaliki taatara laghe aauliaa saa ninannaa apostolo atoa me elda ngatoa eJerusalem laghe mae aitauaa sio etana va taumattu ngatoa la aimuli tee. ⁵ Liuna avalua o me isaa akapa ale manga ghe sarasarakanala tale aikaaiiaira me nau ekapa atoa tau ngaisesoa ngatoa laghe ooroi.

Pol ghe tarala nitaatara ateae eTroas

⁶ Pol me kapuna atoa laghe kasu ekapa seela tale voto alua ePrigia me Galaisia poli Spirit Manga ateva ghe paolala va la rau mene ppooaa inangari eteva tale provinsi eteva eEisia. ⁷ Nau laghe rekatala tale aioloa ngateva eMaesia laghe anna tani sso eBitinia me kapuna Spiriti eteva Iesu ghe tam annala va laghe sso. ⁸ Liuna avalua o me laghe kasu ssola eMaesia me laghe siola eTroas. ⁹ Vara eleivoo me Pol ghe tarala, tale unna nitaatara ateae, taumattu nge Mesedonia ngateva ghe tiitingina me ghe kolokolo Pol, ghe ue va, “Umae eMesedonia me umae sausiemami.” ¹⁰ Nau eteva Pol ghe ruula tani tara unna nitaatara ateae, arovaea nonga ta ami* ghe aimonomonosiaala tani lao eMesedonia. Ami ghe kilala va God ang ghe koloamamila tani laa ppooaa masi kiukiu etaira.

Lidia ghe aikolikoliaala ePilipae

[†] **15:33-34:** Kasina uru ngai laghe pitila laghe mene piti teela va, 34 Me Saelas ghe anna tani toka, me Jiudas nonga ghe oghi sae eJerusalem. **15:37:** Apos 12:12, 25. **15:38:** Apos 13:13; Kol 4:10. **16:1:** Apos 14:6; 2 Tim 1:5. **16:2:** Plp 2:19-22. **16:4:** Apos 15:23-29.

16:6: Apos 18:23. * **16:10:** Luk ghe usilaala eTroas, liuna avalua o me ghe pitila va “ami”.

¹¹ Ami ghe tiu ghoala eTroas me ami ghe kautula tale patunganua ateva eSamotres, vara mene kateva nau, ami ghe lao sio tale masaliki taatara atae eNiapolis. ¹² Ami ghe kasula o me ami ghe mene lao sio ePilipae, aRom atoa laghe aaitarainia me ia masaliki namuu ia ta masaliki taatara atoa tale ia o distriki eteva eMesedonia. Me ami ghe tokala o kasina nau.

¹³ Vara nau manga ateva, me ami ghe kupi vulu ghoala atamana ataeae tale masaliki taatara atae, me ami ghe lao sio tale ateo atae. Ami ghe annaa va ami ghe tara teva voto, me ami ghe looloo sae etana. Vause atoa laghe velu eitauaala tale ia o voto ateva me ami ghe toka siola, me ami ghe tiuaala tani aippooaa teeila. ¹⁴ Kateva ta ila o lo atoa laghe nongonongo inangari, kateva vause, ararina atae ta Lidia, ia tau ngai kkaua ia ta God me karika va ajiu ia, laghe polipoli ghinna ghueghuenna etana, tanganuena tale masaliki taatara atae eTaeataera. Vau ngepona ateva ghe otla urunguitanina ateva tani nongo amasina voto Pol ghe ppooala. ¹⁵ Vara me ia me lo atoa laghe tokatoka aitauaa nonga tale kateva ale, laghe ghaala niaasuu, me ghe koloamamila va ami lao tanganuena. Ghe uela va, “Arova am aaiesoaa va aghaaikaiaa ta Vau ngepona ateva, am mae toka tanganueghi.” Ghe tani kolokolo rerrekanainiemami, liuna avalua o me ami ghe toka teeila.

Pol me Saelas tale ale mata voovoo

¹⁶ Kateva nau, ami ghe laolao tale voto ateva ailooloo sae ia, me ami ghe soula aliki vause ateva, karika ghe tokatoka tale aloannaane, me kateva spiriti ghe tokatoka etana me ghe aaulia ngamuemue voto, me ghe vira mene lutulutu. Ghe gheelei oroieili uneira viliki veu lo atoa laghe aaitarainia poli ghe aauliaa voto auena elutu. ¹⁷ Ia o aliki vause ateva ghe aaimuli teeiemami me Pol, me ghe ovaova ghe ue va, “Isaa oia taumattu, kapuna tau ngai nongonongo anna ila Goto ateva iaaili epona, me la ghaauliaa etaimim salana tani saanga.” ¹⁸ Ghe gheelei evaluela o oroi nau, me Pol ang ghe maamangoo teeia, liuna avalua o me ghe kiriela me ghe uela ta spiriti eteva va, “Tale ararina atae Iesu Karisto, aghaauliaa etam va ukupi vulue ghoa!” Tale ia o tuku nau erighi, spiriti eteva ghe kasu vuliela.

¹⁹ Nau eteva lo atoa laghe aitaraa ia o aliki vause ateva, karika ghe tokatoka tale aaloannaane, laghe kilala va salaira tani ghaa viliki veu ang ghe kapala, laghe kunela Pol me Saelas me laghe aelalue lao sio tale matavanga tani laa tingina ta mataira namu ngatoa. ²⁰ Laghe laoainilalue sio ta lo atoa laghe gheelei niaiskei me laghe uela va, “Taumattu ngalua oia ajiu ilalua, me lalu ghe gheleila me niaisessaii ang ghele namuula tale masaliki eteae oia. ²¹ Lalu ghe aapasunga voto karika masina va ita aRom atoa ita aimuli tee.”

²² Taumattu ngatoa laghe usila kaluira tani ghelei tee Pol me Saelas, me tau ngai ghelei niaiskei etoa laghe auliaala me polisi etoa laghe ghaa vella ghinnanirarua me laghe parulaluelua. ²³ Laghe paru emaamaatelalue me laghe atokailalue ssola tale ale mata voovoo ateva, me laghe auliaala ta tau ngai toitoi eteva va, “Ukaarasi tani tara rungarungainilalua.” ²⁴ Nau ghe ghaala inangari matuutulienra, ghe

atokailaluela tale ale ngelome atiulu me ghe sikilaala kkeirarua tale aikakkamoti eteva me ghe kamotila kkeirarua.

²⁵ Elomatuua voo me Pol me Saelas ngilalu ghe looloo sae me kikkinari sae ta God me karavusu etoa laghe nonganongolalua. ²⁶ Vara me kinatama rukeruke ateva ghe rukela. Nau eteva rukeruke ateva ghe rukela ale mata voovoo ateva, atamana akapa atoa ghe otlala me sene ta karavusu etoa ghe kaola. ²⁷ Tau ngai toi ale mata voovoo ateva ghe totula me ghe tarala ta atamana tale ale mata voovoo ghe otila, me ghe ghaala iemane baenata ateva me vara ghe pasa amatea poli ghe annaa va karavusu etoa ngila ghe iloula.[†] ²⁸ Pol ghe kolokolo anamungainiela me ghe uela va, “Urau mene pasa amateo ta ami ekapa ami tokatoka!”

²⁹ Me tau ngai toi ale mata voovoo ateva ghe reterete poli ghe matautula, me ghe kolokolola va la maeaa teae lam, ghe ilou velu ssola, me ghe suuiuala emua ta Pol me Saelas. ³⁰ Vara me ghe ghoainilaluela eleka me ghe kolomilaluela va, “Namu ngalua, sa ateva arooroo tani gheleia me asaanga?”

³¹ Lalu ghe liula me lalu ghe uela etana va, “Uaiesoaa ta Vau ngepona Iesu, me aue usaanga, io me kapum atoa tanganuem.” ³²⁻³⁴ Tale ia o voo ngateva, tau ngai toi ale mata voovoo ateva ghe ghaailalue lao sio tanganuena me ghe porala usairarua, me ghe anginilaluela. Me lalu ghe auliaala inangarina Vau ngepona ateva etana, me tee ta lo atoa laghe tokatoka tanganuena. Ia ghe aiesoala, me arovaeaa ta lalu ghe asuuela me lo atoa tee tanganuena. Emuli tale nau laghe suula, ghe pasula tale nimasimasi poli ghe aiesoala ta God, ia me natuna akapa atoa me vausenna ateva.

³⁵ Vara ghe paila, me tau ngai ghelei niaiskei etoa laghe suula inangari ta kapuira polisi etoa va la laa ue va la tau velu taita alua. ³⁶ Vara me tau ngai toi ale mata voovoo ateva ghe uela ta Pol va, “Tau ngai ghelei niaiskei etoa la uela va ami tau velu emalua. Amalu rooroo tani kasu, me aue amalu kasu tale luei.”

³⁷ Pol ghe uela ta polisi etoa va, “Angalua sitisen nge Rom iengalua, me karika laghe ghelei muela niaiskei etaingalua me laghe paruengaluelua ta mata ngoroi etoa. Me tee laghe atokaiengalue ssola tale ale mata voovoo. Me isaa oia ngila nim anna tani sungieinangalua va angalu kasu? Karika poi! Ila la tani mae ghaaiengalua, me la kasueinangalua.”

³⁸ Polisi etoa laghe lao sio tani auliaa inangarina Pol ta tau ngai ghelei niaiskei etoa. Me nau laghe nongola va Pol me Saelas sitisen nge Rom ilalua, ghe moilala tale llo laghe ghelei teeilaluvela. ³⁹ Laghe lao sio tale ale mata voovoo tani kkaluua etairarua me laghe kololaluvela me laghe kasu eitauua teeilalue ghoala eleka, me laghe uela etairarua va, “Masina, amalu rau mene toka oia, amalu kasu.” ⁴⁰ Nau lalu ghe kupi ghoala tale ale mata voovoo, lalu ghe lao sio tanganue Lidia, me lalu ghe saopila lo atoa laghe aiesoala ta Iesu me lalu ghe aippooaa teeilala tani asarasarakanaila, me lalu ghe mene kasula.

17

eTosalonika

16:27: Apos 12:18-19. [†] **16:27:** Marova karavusu etoa laghe iloula, namu ngatoa aue laghe uvi emate tau ngai toi ale mata voovoo ateva. **16:30:** Apos 2:37.

¹ Pol me kapuna atoa laghe kasu eloi lao sio tale masaliki taatara aluae eAmpipolis me eApolonia tani lao tale masaliki taatara ateae eTesonika. Isaa okae ale nivelu eitaua ngateva aleira ia ajiu etoa ghe tokatoka. ² Pol ghe kipi ssola tale ale nivelu eitaua ngateva me ghe tiuaala tani ppooaa nongina nau etoa ghe gheelei. Kotolu nau manga ghe toka teeilala me laghe aippooa ngaitauaa teela Uru ngai Manga ateva. ³ Ghe aulia ngamasalikangailila etaira me ghe aapasunga tale Uru ngai Manga ateva va koronna Mesaea aue eghaa nimmarikana me emate me aue emene totu tale nimate. Me ghe uela va, “Iesu ia Mesaea ia, aghi apoppoainia etaimim.” ⁴ Katoa tana ajiu laghe aiesoala, me laghe aimuli teela Pol me Saelas. Oroi tee aGrik atoa laghe aiesoala ta God, me oroi namuu tale vause atoa laghe usila Pol me Saelas.

⁵ Katoa tana ajiu karika laghe aaiesoaa, laghe annaa saasakiaala. Li una avalua o me laghe kolo aitauaala kasina taumattu makatakatanna, me tee taumattu tale matavanga, me laghe aaikkalui see tale masaliki taatara ateae. Laghe aaore atingina, me laghe lao sio laghe ilou ssola tale alena ateva Jeson tani ae velu ghoa Pol me Saelas etaira. ⁶ Me nau eteva karika laghe tarailaluela, laghe aela Jeson me mene katoa tau ngaisesoaa me laghe laoainila sio emua ta namu ngatoa tale masaliki taatara ateae. Laghe ovaova me laghe ue va, “Isaa oia taumattu laghe ghelel saasakia ngakapala voto tale kosa akapa ateva, ila oia ngila mae sio. ⁷ Me Jeson ghe masimasiaala Pol me kapuna atoa, me ghe ghaailala laghe ssola tale alena ateva. Ila akapa la sassakeaa inangarina Siisa, la ue va kateva kingi, ararina ateae ta Iesu.” ⁸ Nau eteva taumattu ngatoa me namuu tale masaliki taatara atoa laghe nongola ghe sessaileilila. ⁹ Vara me laghe uela ta Jeson me tau ngaisesoaa ngatoa va, “Ange roola mua tani aisakei me am tau mae sio viliki veu, me am kasu. Arova la matua atoka auena am mene mae ghaa uneimim viliki veu.”

eBeria

¹⁰ Nau eteva ghe voola, tau ngaisesoaa ngatoa laghe suula Pol me Saelas tani lao eBeria. Nau lalu ghe laa rekata sio, lalu ghe ssola tale ale nivelu eitaua ngateva, aleira ia ajiu etoa. ¹¹ ABeria ngatoa, masi taumattu ila, me nannaairia masalikeaili ta aTesonika ngatoa, poli laghe aloannaaili tani nongo inangari Pol ghe poppooaa, me isaa akapa nau laghe taatara tale Uru ngai Manga ateva tani tara va voto Pol ghe poppooaa koronnaaili. ¹² Liuna avalua o me oroi taumattu nge Jiu etoa laghe aiesoala, me oroi vause me taita nge Grik tee, namuu ila tale ia o masaliki taatara ateae, laghe aiesoala.

¹³ Nau ajiu etoa eTesonika laghe nongola va Pol ghe poppooaa inangarina ateva God eBeria, ila tee laghe lao sio. Laghe tiuaala tani ghelel aisavisavilaan nannaairia taumattu ngatoa va la rau mene nongo inangarina God Pol ghe poppooaa. ¹⁴ Lo atoa laghe aaiesoaa ngaitauaa laghe suula Pol tani sio elamana tani sio pae teva anua. Saelas me Timoti lalu ghe tokala eBeria. ¹⁵ Me lo atoa taumattu laghe laoaa sio Pol tale masaliki taatara ateae eAten, auena laghe kasu, Pol ghe suula inangari etaira va, “Am lao me Saelas me Timoti lalu mae tara parasieghi, me ngotolu uungu eitauaa.”

Pol eAten

¹⁶ Nau eteva Pol ghe toitoi Saelas me Timoti eAten, ghe alousiusieiliila tani tara va masaliki taatara ateeae pasu ia tale tootoo goto atoa. ¹⁷ Liuna avalua o me ghe ssola tale ale nivelu eitaua ngateva tani aippooaa tee ajiu etoa me aGrik atoa laghe kakkaua God tee ajiu etoa,* me tee nau ekapaaili ghe poppooaa ta taumattu ngatoa tale matavanga. ¹⁸ Tau ngai aapasunga ngatoa ta Epikuria me Stoik laghe tiuuala tani aissakeana teeia. Katoa etaira laghe kokkolomi va, “Vara eue va saa, ia oia taumattu ngateva etam kilakila sa ateva eaulieinia?” Katoa laghe ue va, “Eanna tani aulia ngaotu mene kasina ase goto.” Laghe aauliaa isaa o inangari poli Pol ghe aaulia ngaotu masi inangarina Iesu me tottotuaaira matena atoa. ¹⁹ Vara me laghe koloala me laghe ssoainiela tale voto ateva eAreopagas, kansolo atoa la veluvelu eitauua etana, me laghe uela etana va, “Erooroo va ami kila isaa oia voto ouna uaaulia ngaotu? ²⁰ Ta io angu ghaaghaa mae ouna voto tale nonganongoaaimami, me ami anna tani kila malloeanina isaa o voto.” ²¹ (Ila akapa taumattu nge Ateni etoa, me mene katoa tana taumattu karika tanganueira okae laghe mae sio tani toka eAten, karika la gheelei righi voto, karika, ta laghe nim aloannaaili tani nongo me auliaa kiukiu ouna.)

²² Vara me Pol ghe tingina saela elome ta namu ngatoa tale ia o masaliki taatara ateeae tale motouru eteva eAreopagas me ghe uela va, “Taumattu nge Ateni etoa, ataatara va nannaaimim namungaili tale isaa akapa uunguaa nikkaua. ²³ Poli nau akasukasu see ataatara voto am kakkaua etana, me aghe tara teela kateva liu nighelei aiaavusu-vusuena, laghe pitila inangari etana laghe uela va, ‘Ta Goto ateva karika ami kilakilaia.’ Am nongo, God am kakkuaeinia me karika am kilakilaia, ghaine aghaulia ngaotu etaimim. ²⁴ Ia o Goto ateva, ia ghe gheleila kosa ateva me isaa akapaaili voto etana. Ia Vau ia tale kosa ateva me epona liu. Karika etokatoka tale ale manga taumattu ngatoa la gheelei. ²⁵ Karika etuutukuna poi tale teva voto, me ita taumattu ngatoa karika ita gheelei teva voto ta nimaita tani sausia, karikaaili, poli ia nonga etautau mae maulue me ainoaita me tee isaa akapaaili mene kasina voto. ²⁶ Tale kateva nonga taumattu ghe gheleila ararimangali ekapa atoa, va la toka akapa see me la apasu kosa ateva. Me ghe suitoongaala nauira aue la toka, me ghe apasunga teela aioghioghi tale kosaira. ²⁷ God ghe gheleila isaa oia voto va taumattu ngatoa aue la paea. Me nau la paepae, koti aue la taraia, me ia karika emene masau tale kateva kateva etaita. ²⁸ Poli ta ngetana ita tokatoka me ita aikasuaa, me taumattu ita.[†] Nongina kasina inangariimim am ghe pitila eue va, ‘Ita tee natuna ita.’[‡]

²⁹ “Liuna avalua o, poli ita natuna ita God, ita rau mene annaa va ia nongina tootoo gol, silva me atu, taumattu ngatoa la gheelei tale aalomasaanganiaaira. ³⁰ Tale nau ang ghe lao sio, God ghe nim taatara avalua o gheeleiaaira taumattu ngatoa, poli karika laghe kilakila amasina aloannaane God. Me ghaine eaaulia ngakorokorongana tale taumattu ngakapa atoa tani oghi vulu gheeleiaaira sesa. ³¹ Poli ang ghe

^{17:17:} Apo 18:19. * ^{17:17:} aGrik atoa laghe kakkaua God tee ajiu etoa Katoa aGrik laghe kakkaua ngaitauua tee ajiu etoa, me karika laghe aaimuli ekapa tee inangari nipaopao kanna Moses. ^{17:24:} 1 Ki 8:27; Apo 7:48. ^{17:25:} Sams 50:12. ^{17:27:} Sams 145:18; Jer 23:23.

^{17:28:} Pol ghe auliaala nongina Epimenidis aKrit ia ghe pitila. ^{17:29:} Ais 40:18-20; 44:10-17; Apo 19:26. ^{17:31:} Sams 96:13.

suila nau eteva, aue eghelei niaiskei ghulughuluena tale kosa ateva tale uunguaane ia o taumattu ngateva ang ghe suitoongainiela. Ang ghe apasungaala issa oia voto tale taumattu ngatoa nau ghe totula ia o taumattu ngateva tale nimate.”

³² Nau laghe nongola va matena atoa aue la mene totu, katoa etaira laghe tiuala tani pilosia, me katoa laghe ue etana va, “Ami aaloanna va umene auliaa issa o voto etaimami.” ³³ Vara me Pol ghe kasu vulilala. ³⁴ Karika tani oroi ila lo atoa laghe aiesoala, me laghe tiuala tani usilaa Pol. Elome etaira Dionisius tee ghe usilaa, kateva tana namuu tale kansolo ateva ta Areopagas, tee me kateva vause ararina ataeae ta Damaris, me mene katoa taumattu.

18

eKorint

¹ Vara me Pol ghe kasula eAten, me ghe lao sio tale masaliki taatara ataeae eKorint. ² Isaa eKorint Pol ghe soula taumattu ngateva ajiu ia, ararina ataeae ta Akuila, ia atala nge provinsi eteva ePontus. Karika oroi nau ia me vausenna ateva ta Prisila lalu ghe kasula elitali me lalu ghe lao sio eKorint, poli Klaodies Siisa ghe uela va ajiu ekapa atoa la kasu vuli eRom. Vara me Pol ghe lao sio tani tara Akuila me vausenna ateva ta Prisila. ³ Me poli uunguaane tani ghelei tenti nongina ilalua o lailai elua, liuna avalua o me ghe toka teeilaluela me ghe uungu teeilalu. ⁴ Me tale issa akapa nau manga, Pol ghe laa ghaippooaa tale ale nivelu eitaua ngateva, ghe tootoonga tani ghaa nannaairaa aGrik me ajiu etoa va la ghaisoaa ta Iesu.

⁵ Nau Saelas me Timoti lalu ghe kasu vulila provinsi eteva eMesononia me lalu ghe rekatala eKorint, Pol ghe ruula tani uungu tani ghelei tenti, me ghe poppooaa nonga masi kiukiu ta taumattu ngatoa, me ghe aaulia ngaotu ta ajiu etoa va Iesu Mesaea ia. ⁶ Me nau eteva ajiu etoa laghe tam aaloannaia me laghe tiuala tani auliaa teeia, Pol ghe kaokaoaa vella kosa tale ghinnanina tani apasunga va karika ghe laolao aitauua tee nannaairaa, me ghe uela etaira va, “Marova am tam saanga, rangane ateva aue etoka etaimim. Ngaghe gheleila uunguaaghi etaimim. Nge tiitiuaa oia, ngalaolao ta taumattu ngeleka atoa.”

⁷ Vara me Pol ghe kasu vulila ale nivelu eitaua ngateva, me ghe lao sio tale kateva ale kalakalaa ia tale ale nivelu eitaua ngateva, alena ia kateva taumattu ararina ataeae ta Titias Jastas, ia aGrik ia me ghe kakkaua ngaitauua tee ajiu etoa. ⁸ Krispas, namuu ia tale ale nivelu eitaua ngateva, ia me ila akapanaaili taumattu ngatoa laghe tokatoka tangantuena laghe aiesoala ta Vau eteva, me tee oroi mene katoa aKorint laghe nongola Pol ghe poppooaa, laghe aiesoala me laghe asuulala.

⁹ Kateva eleivoo Vau eteva ghe aippooaa teela Pol tale nitaatara ataeae. Ghe uela ta Pol va, “Karika umene matautu! Uppooa ngasarasarakanata taumattu ngatoa me karika umene ruu tani ppooaa. ¹⁰ Ta aghi aue atoka teeio, me karika teva aue eroo tani ghelei saasakieinio. Poli oroi ila kapughu taumattu ngatoa tale lo ataeae oia masaliki taatara.” ¹¹ Liuna

avalua o me Pol ghe tokala eKorint erooroo kateae ninamanama me ghaonomo (6) ulana, tani apasunga inangarina ateva God etaira.

¹² Me nau Galio ghe gavanaala tale provinsi eteva eAkaia, ajiu etoa laghe tingina aitauaala tani kune atoka Pol, me laghe laoainie sio tale liu niaiskei nongina Galio ghe gheelei niaiskei. ¹³ Laghe ue va, “Taumattu ngateva oia ghe aauliaa ta taumattu ngatoa va la kkaua God tale llo salana karika eaaimuli tee loo.”

¹⁴ Nau Pol ghe anna tani sama, Galio ghe uela ta ajiu etoa va, “Marova lo ateva oia taumattu ghe gheleila righi voto sesaaili, aghi aue aroo tani nongo inangariim. ¹⁵ Me isaa o nikokkolomi tale inangari, arari me tale uneimim inangari nipaopao, am, am ghelei me am toka amasina. Karika va aghi aue aghelei niaiskei tale isaa o ase voto.” ¹⁶ Liuna avalua o me Galio ghe sungi vellala tale liu niaiskei. ¹⁷ Vara me ila akapanaaaili laghe poso atokala Sostenes, ia namuu ia tale ale nivelu eitaua ngateva me laghe uviela emua tale liu niaiskei. Galio karika ghe aisaeinilala.

Prisila, Akuila me Apolos

¹⁸ Pol ghe mene toka taula eKorint oroi nau. Vara me ghe kasu vulila tau ngaisesoa ngatoa me ghe lao sio tale masaliki taatara atuae eKenkria tani aikaai tale anua ateva tani lao eSiria, me Prisila me Akuila lalu ghe usiela. Auena ghe aikaai ghe ggalila uu nguruna eKenkria mausi inangari nialokoi ghe gheleila ta God. ¹⁹ Laghe rekatala eIpises, me Prisila me Akuila lalu ghe tokala. Me Pol ghe lao sio tale ale nivelu eitaua ngateva tani aippooaa tee ajiu etoa. ²⁰ Nau laghe kolomiela va etoka teeila tale mene kasina nau, Pol karika ghe aloannala. ²¹ Nau ang ghe kasukasu, ghe gheleila inangari nialokoi eteva, ghe uela va, “Aue* amene mae etaimim arova aloannaane God.” Vara me ghe saesaela tale anua ateva tani kasu. ²² Nau ghe rekatala eSiisaria, ghe saela eJerusalem, me ghe soula taumattu ngatoa tale ale manga ateva tale nimasimasi, me ghe aippooaa teeilala. Vara me ghe siola eAntiok tale provinsi eteva eSiria.

²³ Pol ghe tokala kasina nau okae eAntiok, vara me ghe kasula tani lao akapa see tale provinsi elua eGalaisia me ePrigia, tani asarasarakana tau ngaisesoa ngakapa atoa.

²⁴ Kateva tana ajiu, ararina atuae ta Apolos, ghe lutula tale masaliki taatara atuae eAleksandria, me ghe mae sio tani toka eIpises. Alomasaanga ia tale Uru ngai Manga ateva, me muenna ia tee tani aippooaa. ²⁵ Auena ghe mae eIpises, laghe apasungaala salane Vau ngepona ateva etana, me nannaane sarasarakanaaili tani mene apasunga ta mene katoa. Ghe aaulia ngamasinaaili voto Iesu ghe gheleila, arongona ta ghe kilakila nonga niaasuu kannia Jon. ²⁶ Ghe tiuuala tani ppoaa ngasarasarakananale ale nivelu eitaua ngateva, me karika ghe maamatautu. Nau Prisila me Akuila lalu ghe nongoala, lalu ghe koloala va elao tanganueirarua me lalu tani aulia ngamasinaaili salane God etana.

²⁷ Nau Apolos ghe aloanna tani lao eAkaia, tau ngaisesoa ngatoa laghe asarasarakanaiel, me laghe pitipiti lao sio ta lo atoa okae disaepolo laghe tokatoka eAkaia va la soua me la ghaaia. Nau ghe laa rekataa sio,

18:18: Nam 6:18; Apos 21:24. * **18:21:** Kasina uru ngai laghe pitila, laghe mene pitila va Aue atani lao ejerusalem tani toka tale nivelu eitaua ngateae.

ghe saasausi emasinaaili lo atoa taumattu tale maamasinaane God me laghe aiesoala. ²⁸ Ghe apalala ajiu etoa, nau laghe aissakeanaala tale tummatavanga, poli ghe aapasunga tale Uru ngai Manga ateva va Iesu Mesaea ia.

19

eIpises

¹ Nau Apolos ghe tokatoka eKorint, Pol ghe usilaala salana ngelae atikirighi. Emulina ghe rekatala tale masaliki taatara atea eIpises me ghe saopila katoa tana disaepolo. ² Me ghe kolomilala va, “Ngam ghe ghaala Spirit Manga ateva nau eteva am ghe aikaiaala?”

Laghe liula me laghe uela va, “Karika, me karika ami ghe nongo poi va teva Spirit Manga etokatoka.”

³ Me Pol ghe kolomilala va, “Saa talo niaasuu eteva am ghe ghaaiela?”

Me laghe liula me laghe uela va, “Kanna niaasuu Jon.” ⁴ Pol ghe uela va, “Lo ateva niaasuu Jon ghe gheeleia, pei ninna ngaioghioghia ia. Me ghe uela ta taumattu ngatoa va la ghaisoaa tale lo ateva taumattu aue emae emuli etana, ia o taumattu ngateva Iesu ta ngetana.” ⁵ Nau eteva laghe nongola isaa o inangari, me laghe ghaala niaasuu tale ararina atea Vau eteva Iesu. ⁶ Nau Pol ghe saoaala nimane etaira, me Spirit Manga ateva ghe sio mae etaira me laghe samala tale asease nisama me laghe aauliaa inangarina God. ⁷ Ila o disaepolo atoa ooroiaaira erooroo kasangaulu ghalua (12).

⁸ Pol ghe ssola tale aleira ale nivelu eitaua ngateva me ghe popooaa inangarina Iesu me aririmangalina ateva God, me karika ghe maamatautu, me kotolu ulana ghe ppooala isaa o inangari me ghe tootoonga tani ghaa oghi nannaaira. ⁹ Me katoa laghe tam anna tani nongo me laghe tam aikaiaia. Laghe poppooaa saasakiaa tale salane Vau ngepona ateva ta tummatavanga. Isaa avalua o me Pol me disaepolo atoa laghe ruula tani lao tale aleira ale nivelu eitaua ngateva. Pol ghe poppooaa inangari tale kateva kateva nau elome tale unna sikulu eteva Tiranus. ¹⁰ Ghe roola ghaluae ninamanama Pol ghe ghelei evaluelia o, liuna avalua o me ila akapa taumattu ngatoa tale provinsi eteva eEisia, ajiu ila me aGrik ila, laghe nongola inangarina ateva Vau eteva.

Natuna atoa Skeva

¹¹ God ghe gheelei mirikolo ouna tale uunguaane Pol. ¹² Taumattu ngatoa laghe mae ghaaghaa unna aiaasae ateva Pol aiuungu ia me unna aiulua matane, me emulina laghe laa ghaatulituli ta kapuira tau sessa atoa, me laghe maamasina me lo atoa raroai etoa laghe kupilala, raroai etoa laghe kasukasu vulila.

¹³ Katoa ajiu laghe uungu ekapa see tani tiu velu raroai etoa, me laghe asease ararina atea Vau eteva Iesu tani toongi tani tiu velu raroai etoa tale taumattu ngatoa. Laghe ue va, “Tale ararina atea Iesu, ia o Pol epoppooaa inangarina ateva, ami aauliaa etaimim va am kupi ghoa mae.” ¹⁴ Natuna taita ghatu (7) Skeva, ia namuu ia ta pristi etoa, laghe gheelei isaa o voto. ¹⁵ Kateva nau laghe gheleila ase nippooa ngateva o me raroai eteva ghe liula me ghe uela va, “Akilakila Iesu me akilakila

Pol, me am tani see am?" ¹⁶ Me taumattu ngateva oia raroai eteva elome etana ghe aoso atoka saela etaira me ghe uvi saasakieinilala. Ase niuviuvi eteva ghe uvilala etana sesaaili ia, laghe ilou velu ghoala tale ale ateva karika ghinnanniira me vilikiira ghe raerae.

¹⁷ Ila akapa ajiu etoa me Grik etoa eIpises laghe nongo avaluela o me laghe matautu saasakiaala me laghe tau saela ararina ateeae Vau eteva Iesu. ¹⁸ Orioilei lo atoa laghe aikaiaia laghe mae sio tale matavanga me laghe aulia ngaotula sesa gheeleiaairaa. ¹⁹ Me oroi ila taumattu ngatoa laghe gheelei nialaala laghe maeaa tee sio uneira vuku isaa o inangari nialaala elome etana me laghe tuula vuku ta mata taumattu ngatoa. Laghe ira akapala aipolipolina isaa o voto laghe tuula ghe roola ghalimangaulu airari (50,000) silva koen.* ²⁰ Tale ia o salana atikirighi me inangarina ateva Vau ngepona ateva ghe kasu ekapa seela me ghe pinosa akorokoronganala.

²¹ Nau llo ghe lutula, me Pol ghe nnaala tani lao eJerusalem me ghe annaa va elao mua tale provinsi elua eMesedonia me eAkaia, me ghe uela va, "Nau eteva atara eJerusalem, atani lao tee eRom." ²² Pol ghe suula kapuna tau ngai sausi elua ta Timoti me Erastus tani muemue lao eMesedonia me ia Pol ghe toka taula tale provinsi eteva eEisia.

Niaikkaluii eteae eIpises

²³ Tale isaa o nau kinatama niaikkaluii eteae ghe lutula mausi salane Vau eteva. ²⁴ Tau ngai ghelei tootoo voto tale silva, ararina ateeae ta Demetrius, ghe gheelei isaa o lulu tootoo ale, alena ia o goto ateva vause ia, ararina ateeae ta Atemis. Ia me lo atoa laghe gheelei isaa o voto, laghe ghaaghaa orioilei viliki veu. ²⁵ Demetrius ghe kolo aitauaala lo atoa la uungu eitauuaa tale ia o niuungu eteva me ghe uela etaira va, "Kapughu etoa, am kilakila va ita ghaaghaa masi viliki veu tale ia oia niuungu eteva. ²⁶ Me am taatara me am nongonongo vaalua taumattu ngateva oia ta Pol nge ghaala oroi taumattu elpises me tale provinsi ekapa ateva eEisia. Eue va tootoo goto atoa taumattu ngatoa la gheelei karika va goto ila. ²⁷ Aue ita sesa, karika nonga tale niuungu eteva oia ta tee tale uunguua nikkaua, tale alena nikkaua ngateva goto ateva vause ia ta Atemis, me karika aue la oneoneainia, me karika masau me lo atoa tee la tautaue sae eEisia me tale kosa akapa ateva aue la ruu tani taue sae."

²⁸ Nau laghe nongola llo oia, ghe sessai saasakieinilala me laghe tiuaala tani ovaova. Laghe ue va, "Atemis, kapuita ia alpises atoa, namuu ia." ²⁹ Karika masau me ia akapa masaliki taatara ateeae eIpises laghe tiuaala tani aisamaaaii etingina, me katengaata nonga ta laghe kunela Gaeas me Aristakus, taumattu ngalua oia aMesedonia ilalua, me lalu ghe kasukasu tee Pol, me laghe ssoainilaluelu tale liu ngai velu eitaua ngateva uneira ia alpises atoa. ³⁰ Pol ghe anna tani lao ta taumattu ngatoa me disaepolo atoa laghe aarongia. ³¹ Me tee katoa namuu ta gavman kapuna ila Pol laghe suula inangari ta Pol va erau mene laa sso elome tale liu ngai velu eitaua ngateva.

³² Taumattu ngatoa laghe aaisamaaaii. Laghe ovaova me laghe aauliaa inangari karika isaa aitauuaa me oroi ila lo atoa laghe lao sio karika laghe kilakila vaalua me laghe lao sio tale ia o nivelu eitaua ngateae. ³³ Ajiu

19:17: Apos 5:11. * **19:19:** silva koen Silva koen aipolina kateva nau. **19:21:** Apos 23:11; Rom 1:13. **19:23:** 2 Ko 1:8. **19:29:** Apos 20:4; 27:2; Kol 4:10; Plm 24.

etoa laghe bbi tau ssola Aleksanda emua ta taumattu ngatoa me katoa laghe ovaova me laghe auliaa teeia inangari va eghelei righi voto. Me ghe paopaoala ta nimane va la matua atingina poli ghe anna tani aulia ngamasalika inangari ta taumattu ngatoa.³⁴ Nau eteva laghe kilala va ajiu ia laghe ovaovala ghe roola ghalua aoa. Laghe ue va, “Atemis, kapuita ia Alpises atoa, namuu ia.”

³⁵ Kapuira tau ngaipitipiti eteva kansolo atoa ghe paola taumattu ngatoa me ghe uela va, “Taumattu nge Ipises atoa, kosa akapa ateva ekilakila va masaliki taatara atae eIpises eaaitaraa ale nikkaua ngateva kinatama goto ateva Atemis me tootoona ateva ghe katuula elomarase me ghe sio mae.³⁶ Liuna avalua o me voto oia karika teva eue va kamena. Am tani matua atingina me am rau mene ailuilui tani ghelei righi voto me aue masi ninannaa emae.³⁷ Am maeaa sio taumattu ngalua oia me karika laghe ainao poila righi voto tale ale manga me karika laghe auliaa saasakiaa teela kapuita goto ateva vause ia.³⁸ Arova Demetrius me kapuna atoa righi sessaiaaira ta teva taumattu, la laoa tale niaisakei, me gavanaa etokatoka aue erooroo tani ghelei eghulughuluena niaisakei.³⁹ Arova righi voto am mene anna tani auliaa, am laoa tale nivelu eitaua ngateae nau namu ngatoa la koloam va am lao me la nongoam.⁴⁰ Isaa avalua o me ngita tokala tale voto sesa me ita rooroaili va ita aisakei poli marova la kolomi va mausi saa ita gheleila isaa o voto, karika aue ita ghele auliaa righi liuena.”⁴¹ Nau ghe ruula tani auliaa isaa o voto me ghe sungi vellala.

20

Isaa eMersedonia me eGris

¹ Nau niaikkaluii ghe kapala me Pol ghe kolo aitauaala disaepolo atoa me ghe aippooaa teeilala tani asarasarakanaila, me ghe kasu vulilala tani sio eMersedonia. ² Ghe kasu seela tale lo ateva o provins me ghe kaarasila tani aippooaa teeila tale orioeili masi inangari tani asarasarakana isaa o taumattu, me ghe rekatala eGris,³ me ghe tokala kotolu ulana. Nau ghe anna tani lao eSiria tale anua ateva, ajiu etoa laghe loeloe tani ubi ematea. Liuna avalua o me ghe mene aikolikoliaala nannaane va emene oghi sae eMersedonia.⁴ Ghe kasu eitauaa teela Sopata natuna ia Pirus, aBerilia ia, me Aristakus me Sekundus aTesalonika ilalua, Gaeas aDebi ia, Tikikus me Tropimus tanganueirarua eEisia, me Timoti.⁵ Isaa o taumattu laghe muemuela tani sio toiengalua eTroas.⁶ Me angalu* ghe tiu ghoala ePilipae nau nivelu eitaua ngateae tale verete karika righi isti etana ghe ruula. Ghalima (5) nau angalu ghe iloula tale anua ateva, me angalu ghe siola tani tara isaa o taumattu ghe toitoengalua eTroas. Ami ghe tokala ghaitu (7) nau eTroas.

Iutikas ghe totula tale nimate eTroas

⁷ Airuuruu tale nau manga ateva, ami ghe toka aitauaala tani piri verete† me Pol ghe ppooaala ta taumattu ngatoa. Ta aue ghe pai me ghe kasu, ghe ppooaala lomosi ta ghe ghaala elomatuaa voo.⁸ Orioeli lam

* **20:6:** Luk ghe kasukasu eitauaa tee Pol, me ghe pitila va “angalua”. † **20:7:** piri verete Katoa la nannaa va malloeana va ninamanama atae nongina Iesu me disaepolo atoa laghe gheleila tale ale ngepona atiulu, me katoa la nannaa va nim ninamanama atae.

aitaatara tale ale ngepona atiulu ami ghe tokatoka etana. ⁹ Tale uindoa ngateae aliki taita ateva ararina atea ta Iutikas ghe asekanue atokala. Nau Pol ghe aippooaa Iutikas ghe llusu etokala, me ghe laa sae katuu arau epona tale aiaakotonna atiulu ale tale ale ngepona ateva, me ghe siola arau etapaa kosa. Laghe siola tani sauva me matena ia. ¹⁰ Pol ghe kkure siola me ghe tturru siola me ghe saula aliki taita ateva me ghe uela va, "Am rau mene matautu, ta sakesake ia." ¹¹ Vara ghe mene saela epona me ghe pirila verete me laghe namanamala. Laghe aippooaala lomosi ta ghe paila me ghe kasula. ¹² Taumattu ngatoa laghe ghaala aliki taita ateva oia me laghe laoainie sio tanganuena sakesake ia me laghe masimasieiliila.

Pol ghe aippooa ngaruula ta elda ngatoa eIpises

¹³ Ami ghe muemuella tale anua ateva me ami ghe ssola tale masaliki eteae eAsos tani kaai Pol ta ghe uela va aue enim kasuaa me ami mae kaaia okae. ¹⁴ Nau ta ghe souemamila eAsos ami ghe kaaielia me ami ghe lao sio tale masaliki taatara atea eMitilini. ¹⁵ Mene kateva nau ami ghe tiu ghoala me ami ghe rekatala tale patunganua ateva eKios. Lo ateva o nau ghe lange sio me ami ghe ssola tale patunganua ateva eSamos, me ghe paila ta mene kateva nau, me ami ghe rekataala tale masaliki taatara atea eMiletus. ¹⁶ Pol ghe nnaala tani lau etoka eIpises ta la rau mene appataia tale provinsi eteva eEisia. Ta ghe aailuilui tani lao parasi eJerusalem nau ta Pentikos, arova ghe rooroo.

¹⁷ Isaa o eMiletus Pol ghe suula inangari ta elda ngatoa tale ale manga eIpises va la mae taraia eMiletus. ¹⁸ Nau ta laghe rekatala ghe uela etaира va, "Am kilakila vaalua aghe toka teeimla tale mata ngemua ateva nau, nau aghe tani rekatala tale lo ateva oia provinsi eEisia lomosi ta nau oia. ¹⁹ Auungu ta Vau ngepona ateva tale nisioaa ninanna, me rarum mata me maate ta poli loeloeaairajiu etoa tani uvi emateaghi. ²⁰ Am kilakila va karika aghe sio asoasoaa poi tani ppooaa voto llo erooro tani sausiem. Aghe aippooaa tale matavanga me elome tale paa ngaleimim. ²¹ Aghaaulia ngaotu ta ajiu etoa me Grik atoa va la kiri mae ta God tale ninna ngaioghioghiaa me la aiesoaa ta kapuita Vau eteva ta Iesu.

²² "Me ghaine Spiriti eteva ange tau esarasarakana mae sio ninanna va asio eJerusalem me karika akilakila va saa llo aue elutu etaghi. ²³ Me akilakila nonga va, tale masaliki taatara akapa atoa, Spirit Manga ateva eaauliaa kieghi va aue ale mata voovoo me sesa voto etoitieeghi. ²⁴ Amasimasi tani mate mausi Vau ngepona ateva, arova aghele ruu uunguaa Vau eteva Iesu ghe sungieghila tani ghelei, va appoaa ngaotu masi kiukiu tale maamasinaane God.

²⁵ "Aghe kasu ekapa seela etaimim tani ppooaa ararimangalina ateva God me ghaine akilakila va karika teva etaimim aue emene taraieghi. ²⁶ Aghaauliaa etaimim ghaine va, marova toa etaimim karika la saanga, karika righi uunguaaghi etaimim, ²⁷ poli karika aghe maamatautu tani aulia ngaotu aloannaane akapa God etaimim. ²⁸ Am aitara ngamasinaiem me isaa o llo taumattu Spirit Manga ateva ang ghe gheleiemla va am tau ngai toitoi iem tale ale manga ateva. Ia o ale manga ateva God ghe poliela tale raena ateva. ²⁹ Akilakila va nau akasu

vuliem katoa taumattu nongina sesa paua ngetapaa tuvui etoa aue la kупи sso tani tootoonga tani ghelei saasakiaa taumattu. ³⁰ Me elome ta ngetaimim katoa aue la tingina sae tani auliaa voto llo kamena me oroi ila lo atoa etaimim la aikaaiaa aue la oghi tani laa aimuli teeila. ³¹ Liuna avalua o me am paniem. Me am rau mene kkaluaa va kotoluae ninamanama karika aghe aamaomao tani auliaa kie kateva kateva ta ngetaimim, ellaa me eleivoo rarum mataghi ghe kaokao ta poliimim.

³² “Ghaine ngatautauem lao ta God me inangarina tale maamasi-naane erooroo tani atuutulu ta ngetaimim me etaau aatu voto akapa ghe aulia ngalokoila ta lo atoa ang ghe suilala va ila manga ila. ³³ Karika aghe sassai poi lo atoa uneira viliki veu me ghinnaniira. ³⁴ Am kilakila vaalua aghe uungu tale nimaghi eluelange tani ghaa aloannaaghi me kapughu etoa. ³⁵ Tale voto akapa agheelei, aghapasunga etaimim va ita uungu aanasa avalua o tani aisausiaa lo atoa karika sarasarakanila, me anannaa inangarina Vau eteva Iesu ghe auliaala va, ‘Oroieili nimasimasi emaema ta lo ateva taumattu epaaparruu, elaulau lo ateva enim anna tani toka ghaagħha.’”

³⁶ Nau ghe ruula tani auliaa llo, me ghe suuiaala me tee lo atoa laghe usiusia me ghe looloo saela. ³⁷ Ila akapa laghe tiuāala tani ngala me laghe llotiela me laghe ngusuela. ³⁸ Voto ateva ghe tani gheleilala me laghe alousiusieiliila, ia o tuku inangarina ateva ghe uela va karika aue la mene taraia. Vara me laghe kasu eitauaa teeiela tani sio tale anua ateva.

21

Pol ghe saela eJerusalem

¹ Ami ghe kasu vulilala me ami ghe laa ghoa aikaai tale anua ateva me ami ghe tiu ekorokoro ghoala tani lao tale patunganua ateva eKos. Ghe pai saela me ami ghe rekatala tale masaliki taatara atea eRodis me ami ghe mene lao sio tale masaliki taatara atea ePatara. ² Ami ghe tarala anua ateva ghe laolao ePoenia me ami ghe aikaaila etana me ami ghe tiu ghoala. ³ Ami ghe kautula eSaeprasi me karika ami ghe ssola, ta ngami ghe laa siosio tale pai saot ativilau me ami ghe lao sio eSiria. Ami ghe ssola tale masaliki taatara atea eTaer me anua ateva ghe kapela għinna. ⁴ Ami ghe tarala disaepolo atoa me ghaitu (7) nau ami ghe toka teeilala. Spiriti eteva ghe auliaala ta taumattu me laghe aaulia ngasarasarakan ta Pol va erau mene sae eJerusalem. ⁵ Nau eteva naumami tani toka ghe kapala, ngami ghe mene tiutiu għo. Disaepolo atoa, vauseniira atoa me natuira atoa laghe għoala tani oghi eleka tale masaliki taatara atea me ami ghe suuiaala tani looloo sae elosamarra. ⁶ Lagħe oghi għoala etaimmami me ami ghe aikaaila tale anua ateva me ila lagħe oghi lao sio tanganueira.

⁷ Ami ghe tiu għoala eTaer me ami ghe lao sio tale masaliki taatara atea eTolimais. Ami ghe soula katoa lagħe aainesoa ngaitauaa teeiemmami, me ami ghe toka teeilala kateva nonga nau. ⁸ Ghe pai saela me ami ghe kasula tani lao eSiisaria. Ami ghe tokala tanganuena Pilipi, tau ngai ppooaa masi kiukiu ia, me kateva ta ghaitu (7) tau ngai uungu

laghe suoongainilala eJerusalem. ⁹ Ghaata natuna vause karika lailai laghe poppooaa inangarina Vau ngepona ateva.

¹⁰ Ami ghe tokala mene kasina nau me kateva propete ararina ateeae ta Agabas ghe kasula ejjudia ghe sio mae. ¹¹ Ghe mae sio etaimami me ghe ghaala ai-irina ateeae Pol me ghe irila nimane me kkena etana. Me ghe uela va, “Spirit Manga ateva euela va nongina nga irieghila, aue ajiu etoa eJerusalem la iri etoka lo ateva ai-irina ateeae oia me la tau lao ta tau ngeleka atoa.”

¹² Ami ghe nongo avaluela o me ami me taumattu nge Siisaria ngatoa ami ghe aaulia ngakorokoronganala ta Pol va, “Urau mene sae eJerusalem.” ¹³ Vara me Pol ghe liula me ghe uela va, “Vaalua me am ngangngala me am gheelei nannaaghi eaalousiusi? Karika aghaimonomonosiaa nonga tani karavusu ta tani mate tee eJerusalem tale ararina ateeae Vau eteva Iesu.” ¹⁴ Nau eteva karika ghe roola tani nongoamami, ami ghe ruula tani aippooaa, me ami ghe uela va, “Masina, aloannaane Vau ngepona ateva aue eghelei.”

¹⁵ Kasina nau ghe lange sio me ami ghe aimonomonosiaala ghinnanimami me ami ghe saela eJerusalem. ¹⁶ Katoa disaepolo eSiisaria laghe usiemamila laghe laoainiemami sio tanganue Nason, me ami ghe tokala o. Ia atala nge Saeprasi ia, me ia kateva disaepolo ghe tiuua ngakasinala tani aikaaiaa.

Pol ghe rekatala eJerusalem

¹⁷ Nau eteva ami ghe rekatala eJerusalem tau ngaisesoa ngatoa laghe masimasieilliila tani souemami. ¹⁸ Ghe pai saela, ami me Pol ami ghe lao sio tani tara Jeimis, me elda ngakapa atoa laghe mae tee sio. ¹⁹ Pol ghe soulala tale nimasimasi me ghe aulia ngakapaailiila voto God ghe gheleila elome tale taumattu ngeleka atoa tale uunguaane.

²⁰ Nau eteva laghe nongola kiukiu, laghe tau saela ararina ateeae God. Vara me laghe uela etana va, “Kapumami, angu tarala ghaisa airari taumattu nge Jiu ngila ghe aiesoala me ila akapa la sarasarakana tale inangari nipaopao. ²¹ Ngila ghe nongola va io Pol ughe uela ta ajiu etoa la tokatoka tee taumattu ngeleka atoa va la liu viliira tale inangarina Moses me ughe ue teela etaira va la rau mene iso natuira taita atoa me la rau mene aimuli tee gheeleiaira tuvuita atoa. ²² Aue la kila va angu ghe mae sio. Me sa ateva ami gheleia? ²³ Ughelei sa ateva ami aulieinia etam. Taumattu ghaata laata tokatoka teeiemami laata ghe gheleila inangari nialokoi ta God. ²⁴ Ughaa isaa o taumattu me am lao tale ale manga ateva me ughusilaa me am uunguaa niraarangisana, me upoli voto la ghelei pei niploli me aue la ggali uruira tani ghelei rooroaa inangari nialokoi, me ila akapa aue la kila va kiukiu la aauliaa teeio kamena ta io uaaimuli tee inangari nipaopao. ²⁵ Me ta tau ngeleka atoa la ghaaikaiaa, ngami ghe pitipitila etaira tani auliaa nannaaimami va la rau mene nama malatau la ghelelei sae aiaavusuvusuena tale tootoo atoa, me tale rae, me malatau tale asease ghaata kkena atoa la kiikii pule aloira, me la rau mene lai salosalooa see.”

²⁶ Ghe pai saela me Pol ghe ghaala isaa o taumattu me laghe lao sio tani ghelei eraarangisanaila me ghe ssola tale ale manga ateva tani auiliaa ta pristi etoa va saa nau eteva uunguua tani ghelei eraarangisanaila eruu me kateva kateva etaira etaula opring.

Laghe kunela Pol

²⁷ Ghaitu (7) nau ghe ruuruu me katoa ajiu tale provinsi eteva eEisia laghe tarala Pol tale ale manga ateva me laghe sulungila taumattu ngatoa me laghe poso atokala Pol. ²⁸ Laghe aaore tani ue va, “Taumattu nge Israeli etoa, am sausiemami, poli ia oia taumattu ngateva eaapasunga ngakapa see tani akupi kapuita taumattu me uneita inangari nipaopao me ia oia ale manga ateva. Me ange kupiaa tee sso mae taumattu nge Grik atoa tale ale manga ateva tani avuluti voto ateva manga ia.” ²⁹ Kasina nau ang ghe lange sio laghe tarala Tropimus aIpises ia tale masaliki taatara ataeetee Pol me laghe annaa va Pol ghe kupieinie ssola tale ale manga ateva.

³⁰ Taumattu ngatoa laghe nongola isaa o inangari me ila akapa eJerusalem ghe sessailala me laghe aisokosokoilala me laghe posola Pol, me laghe ae velue ghoala eleka me laghe kavatila atamana atoa tale ale manga ateva. ³¹ Nau laghe tootokaa tani uvi emate Pol, inangari ghe ghaala namu ngateva ghe aaitoiaa tau ngai uvii nge Rom akapa atoa eJerusalem va ila akapa eJerusalem laghe aaikkalui. ³² Gherangia nonga ta ghe ghaala tau ngai uvii etoa me namu ngatoa laghe aaitoiaa kateva ai (100) tau ngai uvii me laghe ilou siola kona taumattu ngatoa laghe tokatoka. Me nau taumattu ngatoa laghe tarala tau ngai uvii etoa, laghe ruula tani uvi Pol.

³³ Namuu tale tau ngai uvii etoa ghe lao sio me ghe kunela Pol me ghe uela va la iri etokaia tale sene alua me ghe kolomilala va, “Saa taumattu ia me sa ateva ghe gheleiel?” ³⁴ Ila akapa taumattu ngatoa laghe aisamaaii me namu ngateva ghe tam rooroo tani nongo, ta laghe aisavalaii poli kateva kateva etaira ghe auliaa nannaane. Me ghe uela ta kapuna atoa va, “Am ghaaiela me elao tale ale ateva tau ngai uvii etoa la tokatoka etana.” ³⁵ Nau Pol ghe rekata lao sio tale aisaesae ateva me tau ngai uvii etoa laghe tarala va taumattu ngatoa laghe annaaili tani uvi ematea, liuna avalua o me laghe sauvela. ³⁶ Taumattu ngatoa laghe aimuli me laghe aippooaa ngasarasarakanaili va emate.

Pol ghe aippooaa teela taumattu ngatoa

³⁷ Tau ngai uvii etoa laghe aainasiaa tani ghaa Pol me ghe lao tale ale ateva tau ngai uvii etoa laghe tokatoka etana me Pol ghe ue lao sio ta namu ngateva va, “Eroroo va aghaippooaa teeio?”

Me namu ngateva ghe uela va, “Ukilakila inangari nge Grik? ³⁸ Aghannaa va io kateva aljip kasina nau ang ghe lange sio ghe tiuala niaiuvi eteae me ghe muemuaala ghaata airari (4,000) tau niaiuvi tale iema me laghe ssola tale voto ateva karika righi taumattu etana.”

³⁹ Pol ghe liula me ghe uela va, “Aghi ajiu ieghi me tanganueghi eTases tale provinsi eteva eSilisia, me karika va nim taumattu ieghi tale teae ghauna masaliki taatara. Uttau velueghi me aghaippooaa tee taumattu ngatoa.”

⁴⁰ Nau namu ngateva ghe tau veluela tani aippooaa me Pol ghe tingina saela tale aisaesae ateva me ghe paolala ta nimane va la rau mene sama. Laghe matua ngatinginala me ghe aippooaa teeilala tale inangari nge Hibru.

22

¹ “Tamaghi etoa, tueghi me nengaghi etoa, am nongo! Isaa oia nga ghaloanna tani aulia ngamasalika etaimim va aghi karika aghe ghelei saasakiaala teva voto.”

² Nau laghe nongola Pol ghe samasamaa nge Hibru teeilala laghe matua ngatinginala.

Me Pol ghe uela va,³ “Aghi aJiu ieghi, aghe lutula eTases, tale provinsi eteva eSilisia, me aghe namuula oia ejerusalem. Aghi kapuna tau ngai ghaa alomasaanga ieghi Gamaliel. Ia ghe apasunga ngamasinaailila inangari nipaopao ghe ghaala ta tuvura atoa, me aghe tauueghi lao sio tani ghelei uunguaane God, nongina am akapa am uunguaa ghaine.⁴ Aghe gheelei saasakiaa ta lo atoa laghe uusilaa salane atikirighi Iesu tani atokaila tale nimate. Aghe kunekune taita me vause atoa tani atokaila sso tale ale mata voovoo.⁵ Namu ngateva ta pristi etoa me Kansolo akapa atoa aue la auliaa etaimim va koronna llo oia aghaauliaa. Laghe pitila uru ngai ta namu ngatoa ta aJiu etoa eDamaskas va asio kune katoa kapuita okae tani sae attara matanaila ejerusalem.”

Pol ghe kiukiuaala vaalu ghe aikolikoliaala

⁶ Pol ghe mene uela va, “Aghe kasukasus elaa siosio eDamaskas, elo sinaka, ngaghe akalakalala me arovaearaa ta kinatama mallanga ateva ghe sio mae epona liu, mallangina ateva ghe ghaaieghila.⁷ Me aghe katuula tapaa kosa, me aghe nongola lingi ngalo ateva ghe uela va, ‘Sol, Sol, vaalu me ugheelei saasakieinaghi?’

⁸ “Me aghe liula me aghe uela va, ‘Io see, vau eteva?’

“Me ghe uela etaghi va, ‘Aghi Iesu nge Nasareti ugheelei saasakieinaghi.’⁹ Taumattu ngatoa ami me ila laghe tarala mallanga ateva, me karika laghe nongola lingi ngalo ateva ghe aippooaa teeieghi.

¹⁰ “Aghe kolomila va, ‘Sa ateva agheleia, Vau eteva?’

“Me ghe uela etaghi va, ‘Totula me usio eDamaskas, me kateva taumattu aue eauliaa niuungu ngaghe aimonomonosiaala va ugheelei.’

¹¹ Aghe mata salusalula poli mallanga ateva namungaili ia. Lo atoa ami me ila laghe katulainaghila tani sso eDamaskas.

¹² “Kateva taumattu ghe tokatoka eDamaskas, ararina atuae ta Ananaeas, ghe aaimuli tee inangari nipaopao, me laghe aanamunamunganeia aJiu etoa laghe tokatoka okae eDamaskas.¹³ Ananaeas ghe mae sio tani tingina teeieghi, me ghe uela va, ‘Kapughu Sol, taatarala!’ Me arovaearaa ta mataghi ghe otila me aghe taraiela.

¹⁴ “Me ghe uela va, ‘Kapuira Goto ateva tuvura atoa ghe suitoongainiola va ukila aloannaane me utara Taumattu ngateva Ghulughuluena ia me unongo llo eaauliaa ta paane.¹⁵ Io aue uaulia ngaotua ta taumattu ngakapa atoa tale llo voto ughe tarala me ughe nongola.¹⁶ Sa ateva umene toia? Tingina saela! Ulaa ghaa niaasuu me ukolo tau ararina atuae, me aue epora velu kalum ssavoto.’”

Vau eteva ghe suula Pol tani laa ppooaa ta mene katoa

¹⁷ Pol ghe mene uela va, “Nau aghe oghi saela eJerusalem aghe ssola tani looloo sae tale aleira atiulu ajiu etoa tale ale manga ateva, me aghe tarala kateva nitaatara. ¹⁸ Aghe tarala Vau eteva ghe uela etaghi va, ‘Gherangia ta ukasu vuli eJerusalem, poli karika aue la nongo usilainio nau uppooaa inangarighi.’

¹⁹ “Aghe liula va, ‘Vau eteva, la kilakilaailieghi va aghe laolao tale oroi ale nivelu eitauaa, aghe kunekune me aghe paruparu lo atoa laghe aainesoaa etam. ²⁰ Nau laghe uvi ematela Stipeni, kapum tau ngai aulia ngaotu ia, aghi aghe tiitingina me aghe tarala uviuviaane me aghe asokoila, me aghe aaitaraa ghinnaniira tau ngai uvina atoa.’

²¹ “Vau eteva ghe uela etaghi va, ‘Kasula, ta aue asungio ulao amasaueili ta tau ngeleka atoa.’”

²² Taumattu ngatoa laghe nongonongo Pol ghe samala lomosi ta ghe uela va elao ta taumattu ngeleka atoa, vara me laghe tiaala tani aore anamungaili. Laghe ue va, “Uvi emateala! Karika masina va etoka!”

²³ Laghe aaore me laghe leeleeaa uneira aiaasae ngeleka me laghe veluvelu sae au eteva epona. ²⁴ Liuna avalua o me namuu ta tau ngai uvii etoa ghe auliaala va la ghaa Pol me esso elome tale ale ateva tau ngai uvii etoa la tokatoka etana, me ghe uela va la uetaia me la kolomia va vaalua me taumattu nge Jiu etoa la aaore atingina. ²⁵ Nau laghe iriiria tani uetaia, Pol ghe uela ta kateva namuu eaaitoiaa kateva ai (100) tau ngai uvii ghe tiitingina akalakalangina va, “Emaamasina va am ueta teva sitisen nge Rom karika ghe aisakei?”

²⁶ Nau ghe nongola isaa o inangari, ghe lao sio tani auliaa ta lo ateva namuu ia etaira akapa. Namu ngateva eaaitaraa kateva ai tau ngai uvii ghe uela va, “Sa ateva ugheleia? Ta taumattu ngateva oia sitisen nge Rom ia.”

²⁷ Namu ngateva eaaitara ngakapa tau ngai uvii etoa ghe mae sio ta Pol tani kolomia va, “Io sitisen nge Rom io?”

Pol ghe liula me ghe uela va, “Ue.”

²⁸ Namu ngateva eaaitara ngakapa tau ngai uvii etoa ghe uela ta Pol va, “Aghi aghe vella oroieili viliki veu tani sitisen nge Rom.”

Me Pol ghe uela va, “Aghi sitisen nge Rom ieghi poli tamaghi sitisen nge Romi ia.”

²⁹ Nau lo atoa tau ngai uvii laghe anna tani kolomi righi nikokkolomi ta Pol laghe nongola va Pol sitisen nge Rom ia laghe matautula me arovaeaata ta laghe tapaila, me kapuira namu ngateva eaaitara ngakapa ie tee ghe matautula, ta ia ghe sungilala tani iri Pol.

³⁰ Namu ngateva eaaitara ngakapa tau ngai uvii etoa ghe aaloanna tani kila amasina va Pol ghe tani gheleila saa voto sesa. Me ghe pai saela ghe ghaa vella sene laghe irielia etana. Namu ngateva ghe suula inangari ghe lao sio ta namu ngatoa ta pristi etoa me Kansolo atoa tani velu eitauaa. Me eghaa Pol me esio atinginaia ta mataira.

23

Pol ghe aulia ngaotula inangari ta Kansolo atoa

¹ Pol ghe pasiaala matane ta Kansolo atoa me ghe uela etaira va, “Tueghi me nengaghi etoa, aghe uungu eitauaa teela God, nannaaghi masinaaili, me gheeleiaaghi masina ange mae ghaa sio ghaine.” ² Ghe aulia ngavaluelo o me namu ngateva ta pristi etoa, Ananaeas etana, ghe uela ta taumattu ngatoa laghe tiitingina akalakalangina ta Pol va, “Am posalala paane ateva.” ³ Pol ghe uela etana va, “God aue euvio, poli io nongina aivativati eteva sesa ia, laghe usingiela tale usousoana.* Unannaa va uaaimuli tee inangari nipaopao? O umae sio tani toka tani ghelei niaisakei etaghi me io ugheelei saasakiaa inangari nipaopao, me uue va la posalaieghi.”

⁴ Lo atoa laghe tiitingina akalakalangina laghe uela va, “Vaaluua me uppooaa saasakiaa ta namu ngateva ta pristi etoa kapuna ia God?”

⁵ Me Pol ghe uela va, “Tueghi me nengaghi etoa, karika akilakila va namuu ia ta pristi etoa. Arova aghe kilakila, karika aue aghele ppooaa teeia, poli tale Uru ngai Manga ateva laghe pitila va, ‘Karika umene ppooaa saasakiaa tee lo ateva eaaitoiaa kapum taumattu ngatoa.’”

⁶ Nau Pol ghe kilala va katoa etaira Sadiusi ila, me katoa Paresi ila, ghe sama anamuula tani ue va, “Tueghi me nengaghi etoa, aghi Paresi ieghi, natuira aghi Paresi etoa. Aghaiesoaa va lo atoa laghe matela aue la totu. Liuna avalua o me nga ghaaisakei.” ⁷ Nau Pol ghe aulia ngavaluelo o me Paresi etoa me Sadiusi etoa laghe tiuaala tani aisamaaii. Me laghe tiu reerekataala. ⁸ Ta Sadiusi etoa la ghaiesoaa va lo atoa la matemate karika la rororo tani mene totu, me karika righi ensolo me spiriti. Me Paresi etoa la ghaiesoaa isaa akapa o voto.

⁹ Laghe tiuaala tani aisamaaii enamuu, me katoa tana tau ngai aapasunga tale inangari nipaopao Paresi ila, laghe tiuaala tani aikiso. Laghe ue va, “Taumattu ngateva ona karika righi kannna sesa. Ta koti koronna lo eaauliaa koti spiriti o teva ensolo ghe auliaala etana.” ¹⁰ Me namu ngateva ta tau ngai uvii etoa ghe tarala me ghe nongola niaikkaluii eteae, me ghe matautula. Ghe maamatautu va pai eluevilau lalu rau aisariaa pakapakasi Pol va emate. Mausina avalua o me ghe suula tau ngai uvii etoa tani ghaa velu Pol ta ajiu etoa, me laghe laa ghatokaia tanganueira tau ngai uvii etoa.

¹¹ Eleivoo me Vau ngepona ateva ghe tingina valaala ta Pol me ghe uela etana va, “Utingina asarasarakana me urau mene matautu. Nongina ughe aulia ngaotueghila eJerusalem, umene laa ghaulia ngaotuegheli eRom.”

Ajiu etoa laghe aippooa ngaitauaala tani uvi emate Pol

¹² Elue talaua me ajiu etoa laghe toka aippooa ngaitauaala va la tani uvi emate Pol. Laghe gheleila inangari nialokoi va karika la mene namanama me la mene ropi ta la tani uvi emate mua Pol. ¹³ Ila akapa lo atoa laghe gheleila inangari nialokoi, elaulau ghaatingaulu (40+) taumattu. ¹⁴ Laghe lao sio ta namu ngatoa ta pristi etoa me namu ngatoa tani auliaa kieira va, “Ngami auliaala inangari nialokoi va ami rau mene namanama me ropi ta ami tani uvi emate mua Pol. ¹⁵ Liuna avalua o me am me Kansolo atoa, am suu sae inangari ta namu ngateva ta tau ngai uvii etoa va eghaaie sio me am kame va am mene anna tani

23:2: Jon 18:22-23. **23:3:** Mat 23:27. * **23:3:** Malloeana inangarina Pol va Ananaeas usimaghalue ia. **23:5:** Eks 22:28. **23:6:** Apos 26:5. **23:8:** Mat 22:23. **23:11:** Apos 27:24; 28:16, 23. **23:15:** Apos 25:3.

ghaa amasina righi inangarina. Auena emae rekataa etaimim, aue ami uvi ematea.”

¹⁶ Me nau aloana ateva Pol ghe nongola inangari laghe aaloanna tani ghelei tee Pol, ghe saela tanganueira tau ngai uvii etoa tani auliaa kie Pol.

¹⁷ Pol ghe kolola kateva namuu ghe aaitoiaa kateva ai (100) tau ngai uvii me ghe uela va, “Ghaala aliki eteva toko me ulaoainia ta kapum namu ngateva me aue elaa ghauliaa inangari etana.” ¹⁸ Liuna avalua o me ghe ghaala aliki eteva me ghe laoainie sio ta namu ngateva ta tau ngai uvii ekapa atoa.

Me ghe uela va, “Pol, tau karavusu eteva, euela va amaeaa aliki eteva etam tani auliaa inangarina etam.”

¹⁹ Liuna avalua o me namu ngateva ta tau ngai uvii ekapa atoa ghe kuneiela, me lalu ghe laa tingina ppae sio, me ghe kolomiela va, “Sa ateva inangari uaaloanna tani aulieinia etaghi?”

²⁰ Me aliki taita ateva ghe uela va, “Ajiu etoa la ghaippooa ngaitauaala va la kolomio me utau sio Pol ta Kansolo atoa nimanaa. Aue la kameo va la ghaaloanna tani pae amasina liue inangarina Pol. ²¹ Me urau mene usilaa inangariira. Ōkatoa etaira elaulau ghaatingaulu (40+), aue la llosos atoka tani uvi ematea. Laghe alokoila inangari nialokoi va la tani uvi emate Pol me la vira namanama me la ropi. O isaa oia la sio toitoi va sa ateva aue uliuia tale inangariira.”

²² Me namu ngateva ghe uela etana va, “Karika umene auliaa ta teva va angughe mae auliaa sio etaghi.” Me ghe sungi veluela.

Laghe sungiela tani sio ta Peliks

²³ Liuna avalua o me namu ngateva ta tau ngai uvii etoa ghe kolola ghalua tana namuu me ghe uela va, “Amalu ghaa ghalua ai (200) tau ngai uvii me ghaitungaulu (70) llo aue eilou tale ooso me ghalua ai (200) aisau vaalau me am aimonomonosiaa tani lao eSiisaria ghaine eleivoo ta 9 kilok.[†] ²⁴ Am aimonomonosiaa unna tani ooso Pol me am kasueinia tani sioaa ngamasinaia ta Gavana Peliks.”

²⁵ Me namu ngateva ta tau ngai uvii etoa ghe pitila uru ngai etikirighi ghe uela va,

²⁶ Aghi Klaodias Lisiás,

Apitipiti sio uru ngai etikirighi etam, Gavana Peliks,

Masi ngelo sinaka etam.

²⁷ Ajiu etoa laghe poso atokala ia o taumattu ngateva me la aloanna tani uvi ematea. Me aghe nongola va ia aRom ia. Liuna avalua o me aghi me tau ngai uvii etoa ami ghe lao sio tani ghaa oghia tale nimaira. ²⁸ Aghe aloanna tani kila va vaalua liuene inangari me aghe laoainie sio ta kapuira Kansolo atoa. ²⁹ Me aghe kolomilala, me aghe kilala va laghe nim ghaaiela ta poli uneira inangari nipaopao, me karika ghe gheleila righi voto va emate o esso tale ale mata voovoo.

³⁰ Me ghaine nga nongola va ila aaloanna tani uvi ematea. Liuna avalua o me nga sungi parasie sio mae etam. Me nga ghauliaala ta taumattu ngatoa la ghauliaa teeia inangari va la sio tingina ta matam me unongo inangariira.

[†] **23:23:** 9 kilok Tale inangari nge Griek, aiaakotonna ateva aoa eleivoo. **23:27:** Apos 21:30-33; 22:25-27. **23:28:** Apos 22:30. **23:30:** Apos 23:16-23; 24:1-9.

31 Me tau ngai uvii etoa laghe nongo usilaala namu ngateva me laghe ghaala Pol eleivoo me laghe sioainiela eAntipatris. 32 Ghe paila ta mene kateva nau, tau ngai uvii etoa laghe iloula tale ooso me laghe laoaa sia Pol eSiisaria. Me lo atoa tau ngai uvii laghe nim kaakasuaa ta kkeira laghe oghi saela tale ale ateva tau ngai uvii etoa la tokatoka etana eJerusalem. 33 Me tau ngai uvii etoa la ghe iilou tale ooso laghe laa sia rekataa eSiisaria me laghe taula uru ngai etikirighi ta gavana ngateva me laghe tau tee lao sia Pol etana. 34 Gavana ngateva ghe ritila uru ngai etikirighi, me ghe kolomila Pol va, “Aliaa io?”

Me Pol ghe uela va, “Aghi aSilisia ieghi.”

35 Vara me Peliks ghe uela va, “Nau lo atoa la auliaa teeio inangari la rekata, aue avira nongo inangarim.” Me ghe uela va, “Am ghaa Pol me esso tale ale mata voovoo ateva tanganuena King Herot.”

24

Pol ghe tinginala emua ta Peliks

¹ Ghalima (5) nau ghe lange sia me Ananaeas, namuu ia ta pristi etoa, me mene katoa namuu me loea ngateva ararina ateae ta Tetalas, laghe siola eSiisaria tani ghelei niaisakei ta Pol emua ta gavana ngateva. ² Nau Pol ghe tinginala emua, me Tetalas ghe tiuaala tani auliaa teeia inangarina kamena. Egue ue va, “Namu ngateva Peliks, ami ghe tokatoka tale luei tale oroi nau, poli io ughe aaitarainiemami tale alomasaanganiaam, me ughe ghelei emasinala oroi voto karika laghe ghelei emasinala tale lo ateva oia provins. ³ Tale isaa akapaaili voto ughe ghelei seela, ami maamasieinio me ami ue va masinaaili etam. ⁴ Karika aghaloanna tani nim rungiaa naum, liuna avalua o aghaloanna va umasimasi me unongo tuku inangariimami erighi.

⁵ “Ami ghe tarala va ia oia taumattu ngateva egheelei saasakiaa tokatokaaimami. Etiitiuaa nisessai elome ta ajiu etoa tale kosa akapa ateva oia, me emuemua lo atoa la aimuli tee tau ngai aapasunga ngateva aNasareti ia. ⁶⁻⁷ Ghe aloanna tani ghelei saasakiaa ale manga ateva. Liuna avalua o me ami ghe poso atokaiela.* ⁸ Arova ukolomia, aue io unongo kila isaa oia voto ami auliaa teeia, koronna.”

⁹ Ila akapa ajiu etoa laghe tingina aitauua teela lo atoa laghe auliaa teela Pol, me laghe akoronnala va isaa akapa inangari Tetalas ghe auliaala koronna.

Pol ghe auliaala nannaane ta Peliks

¹⁰ Gavana ghe nakonakoala Pol tani aippooaa me Pol ghe uela va, “Akilakila va io ughe aitaraala anua ateva oia oroieili ninamanama, liuna avalua o aghaiesoaa va urooroo tani nongo tee inangarighi. ¹¹ Urooroo tani kila amasina va karika ghe laa ghaa kasangaulu ghalua (12) nau me aghe saela eJerusalem tani kkaua. ¹² Ila o taumattu ngatoa karika laghe tarala righi voto ami ghe aissakeana teela tale ale manga ateva, o aghe ghelei taumattu va ghe sessaila tale ale nivelu eitauua me tale masaliki taatara. ¹³ Me isaa oia inangari la aauliaa teeieghi etana,

24:5: Apos 17:6. **24:6-7:** Apos 21:28-30. * **24:6-7:** Kasina uru ngai laghe pitila, laghe ue va, me ami ghe aloanna tani ghelei niaisakei etana tale kaluimami inangari nipaopao. 7 Me namu ngateva ta tau ngai uvii etoa, Lisisas, ghe mae sia me namungaili ta ghe kune veluela me ghe ghaa veluela ta nimaimami. 8 Me ghe auliaala va ami mae etam.

karika la rooroo tani apasunga etam va koronna. ¹⁴ Aghaaloanna tani auliaa koronna etam va akakkaua Goto ateva kapuira ia tuvuumami etoa me aghaimulusi tee salane Vau eteva Iesu, la ue va kamena ia. Me aghaiesoa ngakapa inangari nipaopao me inangari propete atoa laghe pitila. ¹⁵ Aghi tee aghaiesoaa God nongina isaa oia taumattu, va aue emene totu isaa akapa ghulughuluena me sesa taumattu tale nimate. ¹⁶ Liuna avalua o atootoonga tani ghelei sa ateva akilakila va ghulughuluena ia nau ekapa atoa ta matane God me taumattu.

¹⁷ “Aghe mene kiri mae sio tani sausi kapughu taumattu ngatoa karika righi peiira tale viliki veu, me tani ghelei aiaavusuvusuena, poli ngaghe kasu vella me ang ghe oroila ninamanama me ngaghe vira mene mae sio tani rekataa. ¹⁸ Laghe tarala va raarangisana ieghi nau eteva aghe gheelei isaa oia niuungu elome tale ale manga ateva. Karika oroi taumattu ghe toka teeieghila, me tee karika righi niaisamaaii. ¹⁹ Me kasina ajiu tale provinsi eteva eEisia, arova la nannaa teeieghi righi voto, la ghele mae tingina emua etam me la ghele auliaa nannaaira. ²⁰ Me isaa o taumattu etokatoka oia la ghele mae aaulia ngaotu righi voto sesa laghe tarala aghe gheleila nau eteva aghe tinginala emua ta Kansolo atoa. ²¹ Akilakila nonga kateva voto aghe sama anamuula nau eteva aghe tinginala ta mataira: Aghe ue va, ‘Aghaiesoaa ta God va aue emene totu taumattu matena. Me mausi isaa oia ninannaa me ghaine angila atinginaieghila tale niaiskei.’”

²² Vara me Peliks, ia o ang ghe kila muela salane Iesu, ghe alokoi taula niaiskei eteae, me ghe uela va, “Ita toi Lisias, me nau emae, amene ghelei niaiskei.” ²³ Ghe uela ta namu ngateva ghe aaitoiaa kateva ai tau ngai uvii va, “Am atoka sso Pol tale ale mata voovoo, me am tau velua me etingina kasu see. Me am rau mene ghelei rungarunga kapuna atoa tani mae taraia.”

²⁴ Kasina nau ang ghe lange sio, Peliks me vausenna ateva ta Drusila, ajiu ia, ghe suula inangari va Pol emae. Ghe nongola inangari niaikaa-iaa ta Karisto Iesu. ²⁵ Nau eteva Pol ghe tiuala tani auliaa inangari tale voto ghulughuluena me tani aitaraa tokatokaam me niaiskei eteae aue emae, Peliks ghe matautula me ghe uela va, “Ange roola me kasula mua. Auena marova mene righi nau, aue amene koloo.” ²⁶ Ia oia nau eteva tee, Peliks ghe nannaa va Pol aue ghe tau lao righi viliki veu etana. Liuna avalua o oroieili nau ghe kolokoloa me ghe aippooaa teeia.

²⁷ Airuuruu tale ninamanama aluae lalu ghe lange sio me Pokias Pestas ghe koliala Peliks. Peliks ghe aloanna tani aipoopolia ta ajiu etoa, liuna avalua o me karika ghe uela va Pol ekupi ghoa tale ale mata voovoo.

25

Pol ghe kolomila va Siisa enongo unna niaiskei eteae

¹ Pestas ghe rekatala tale provins ateva ejjudia tale masaliki taatara atea eSiisaria. Kotolu nau ghe lange sio me ghe saela ejerusalem.

² Me namuu ta pristi etoa, me kapuira tau ngai totoi etoa ajiu etoa laghe lao sio tani auliaa tee Pol ta Pestas, me laghe kolomila Pestas ³ va eghelei aloannaaira tani saeaa Pol ejerusalem ta ngila ghe nnaala va la

UVI ematea sae etapaa salana. ⁴ Pestas ghe liula va, "Pol tale ale mata voovoo eSiisaria, me karika masau me amene oghi sio eSiisaria. ⁵ Am tau velu righi kapuimim tau ngai toitoi me la usieghi sio eSiisaria, me la sio auliaa arova Pol ghe gheleila righi sesa voto."

⁶ Pestas ghe mene tokala ghaoalu (8) va kasangaulu (10) nau me ghe oghi siola eSiisaria. Ghe paila tale mene kateva nau me ghe laa sso toka tale liu niaiskei eteva, me ghe auliaala va Pol emae tale niaiskei. ⁷ Nau Pol ghe rekatala, lo atoa ajiu laghe kasula eJerusalem laghe tingina taliaala Pol, me laghe tiuaala tani aikamea tani auliaa oroieili voto sesa Pol ghe gheleila, me karika laghe rooroo tani apasunga tale niaiskei va koronna.

⁸ Pol ghe liula inangariira me ghe uela va, "Karika aghe gheleila righi sesa voto tani ghelei saasakiaa uneira inangari nipaopao ajiu etoa, me tale ale manga eteva me ta Siisa."

⁹ Pestas ghe anna va ajiu etoa la masieinia, liuna avalua o me ghe kolomila Pol va, "Umasimasi tani sae eJerusalem, me aghi aue arooroo tani sae nongo unem niaiskei eteae eJerusalem?"

¹⁰ Pol ghe liula me ghe uela va, "Atiitingina oia tale unna liu niaiskei eteva Siisa, me atani aisakei oia. Karika righi gheeleiaaghi sesa ta ajiu etoa, me io tee ukilakilaaili. ¹¹ Arova aghe tam aimuli teela inangari nipaopao, me righi gheeleiaaghi sesa me erooroo va amate, karika aratirati tani mate. Me arova inangariira kamena, karika teva erooroo tani tauueghi lao etaira. Aghaaloanna va Siisa enongo uneghi niaiskei eteae!"

¹² Nau Pestas me kapuna tau ngalomasaanga atoa laghe aippooa ngaitauaala me Pestas ghe uela va, "Ualoannala Siisa va enongo unem niaiskei eteae, liuna avalua o me ulao ta Siisa."

Pestas ghe auliaa tootoongaala Pol ta King Agripa

¹³ Kasina nau ghe lange sio King Agripa me nengane vause eteva ta Beniis lalu ghe siola eSiisaria tani tara me tani tau masimasiaairarua ta Pestas. ¹⁴ Nau lalu ghe tokala oroi nau eSiisaria, Pestas ghe auliaala unna niaiskei eteae Pol ta king. Ghe uela va, "Ia oia taumattu ngateva Peliks ghe tam aaloanna tani tau velua tale ale mata voovoo. ¹⁵ Nau aghe saela eJerusalem, namuu ta pristi etoa me namuu ta ajiu etoa laghe uela va ghe gheleila voto sesaaili, me laghe aaloanna va aghi aghauliaa va emate.

¹⁶ "Aghe auliaala etaira va gheegheleiaa nge Rom, karika ami rooroo tani nim uvi emate teva taumattu karika ghe aisakei tee tau ngai ssateena atoa, me erooroo tani liu inangariira tale uneira nikokkolomi.

¹⁷ Nau laghe usieghi sio mae, karika aghe aitoila, ta ghe pai saela tale mene kateva nau, aghe auliaala va Pol emae tale liu niaiskei. ¹⁸ Nau tau ngai ssateena atoa laghe tiuaala tani sama, karika laghe ppooaala righi gheegheleiaane sesa aghe annaa va laghe rooroo tani auliaa. ¹⁹ Laghe nim sessa teeia tale uneira inangari nipaopao la ghairesoaa etana, me taumattu ngateva ararina ateae ta Iesu, ang ghe matela me Pol ghe poppooaa va maulue ia. ²⁰ Karika aloghu ghe masaangaala vaalua aue apae aitiutiu tale inangari, liuna avalua o me aghe kolomila marova ghe masimasi tani sae eJerusalem tani sae aisakei. ²¹ Vara me Pol ghe aloannala me ghe kolomila va namu nge Rom eteva enongo unna

niaisakei eteae, liuna avalua o me aghe uela va Pol etoka lomosina ta aghi aue asungi taue lao ta Siisa.”

22 Vara me Agripa ghe uela ta Pestas va, “Aghaloanna tani nongo ia ona taumattu ngateva.”

Pestas ghe liula me ghe uela va, “Nimana unongoa.”

Pol ghe tinginala emua ta King Agripa

23 Ghe pai saela Agripa me Beniis lalu ghe ssola tale ale atiulu la mae veluelu eitauaa etana, me laghe gheleila voto tani oneoneainilalua. Lalu ghe sso teela namu ngatoa la aitoiaa namuu tale tau ngai uvii etoa, me namu ngatoa tale masaliki taatara ateae, me Pestas ghe uela va, “Am ssoaa mae Pol elome.” 24 Pestas ghe uela va, “King Agripa me lo atoa ngam mae aitauaa teeiemami sio, ngam tarala taumattu ngateva oia! Ila akapaaili ajiu etoa ejerusalem me isaa oia eSiisaria laghe aulia ngakorokorongana etaghi me laghe aaore tani ue va karika erooroo tani mene toka tee lao ta ia erooroo tani mate. 25 Aghe tarala va karika righi voto ghe gheleila va erooroo tani mate. Me poli ghe loola va namu nge Rom ateva enongo unna niaisakei eteae, liuna avalua o aghe annala va asungie lao eRom. 26 Karika aloghu ghe masaangaala va tani sa ateva apitie lao ta kapuita vau eteva, liuna avalua o aghe ghaiae mae sio etaimim akapa, me tani io, King Agripa, va ita nongo kilakila inangarina me aue akila sa ateva apitia. 27 Poli aghannaa va karika masina tani sungi karavusu eteva me karika righi inangari koronna tani aulia ngaotu gheeleiaane sesa.”

26

¹ King Agripa ghe uela ta Pol va, “Urooroo tani auliaa inangarim.”

Pol ghe takala nimane me ghe tiuala tani ppooaa inangarina tani sausia. ² Ghe uela va, “King Agripa! Amasimasi tani tingina emua etam ghaine tani liu inangari niaisakei ajiu etoa la gheelei etaghi. ³ Io ukilakilaaili ajiu etoa me gheeleiaaira me voto la ghaissa tee, liuna avalua o aghanna va uatae atoka me unongoaghi.

⁴ “Ajiu etoa la kilakila tokatokaaghi nau aliki ieghi, me aitiutiu tale maamauluaaghi nau aghe tokatoka tanganueggi me tee ejerusalem.

⁵ Laghe kilakilaailieghi me, arova la masimasi, la rooroo tani auliaa va, tale aitiutiu, aghi kateva tana Paresi, lo atoa la tani uusilaa inangari nipaopao. ⁶ Ghaine nga tinginala tale niaisakei poli uneghi niaikaaiaa tale inangari nialokoi God ghe auliaala ta tuvuita atoa. ⁷ Isaa oia inangari nialokoi, kasangaulu ghalua (12) ararimangaliita la aloanna tani tara va etani lutu ekoronna, nau la kakkaua God llaa me voo. King Agripa, mausi ia o niaikaaia ngateva me ajiu etoa la ghaauliaa teeieggi.

⁸ Vaalua me katoa etaimim karika am rooroo tani aiesoaa va God aue etotu matena atoa?

⁹ “Aghi tee aghe anna tani ghelei oroieili voto tani rati ararina ateae Iesu aNasareti ia. ¹⁰ Aghe gheelei llo oia voto ejerusalem. Aghe ghaaghhaa sarasarakan ta namu ngatoa ta pristi etoa me aghe aatoka

sso kapuna taumattu ngatoa God tale ale mata voovoo, me nau laghe aaisakei, aghi tee aghe aauliaa va la mate. ¹¹ Oroiaata nau aghe laolao tale ale nivelu eitauaa tani laa kuneila me tani atokaila sso tale ale mata voovoo, me aghe tootoonga tani gheleila va la rati aikaiaairaa.

Tale sessaiaaghi namungaili, aghe laolao tee tale masau etoa masaliki taatara tani ghelei saasakieinila.

Pol ghe auliaala vaalua ghe aikaaiiaala

12 “Tale kateae nikasu aghe laa siosio eDamaskas ta namuu ta pristi etoa laghe sungieghila me laghe tau mae sio matuutulienet etaghi. 13 King Agripa, elo sinaka nau aghe laa siosio etapaa salana, aghe tarala mallanga ateva ghe kasula epona liu, maamallangiaane elaulau sinaka ateva, ghe mallangieghila me kapughu etoa. 14 Ami ekapa ami ghe katuula tapaa kosa me aghe nongola lingi ngalo ateva ghe samasamaa nge Hibrula, ghe uela va, ‘Sol, Sol! Vaalua me ugheelei saasakieinaghi? Aue ughaa vakovako nau uaaiuvii tee aaloannaaghi.’

15 “Me aghe kolomila va, ‘Io see, vau eteva?’

“Vau eteva ghe liula me ghe uela va, ‘Aghi Iesu ugheelei saasakieinaghi. 16 Totula me utingina sae. Ngarekataala etam tani suoiongainio va ughuungu etaghi; uppooaa voto angu tarala etaghi me voto auena aghapasunga. 17 Aue aghasaangio ta kapum atoa me taumattu ngeleka atoa nongina ngasungsungi tauo lao etaira. 18 Uoti mataira tale saurrom me la ghaa mallanga ateva, me la kasu vuli sarasarakaniaane ateva Satana me la lao ta God, me God aue ekkaluua kaluira ssavoto me la toka teeieghi me lo atoa God ghe amangailala tale uneira niaikaaiaa etaghi.’

19 “Liuna avalua o, King Agripa, karika aghe nongo vulula lo ateva o nitaatara ghe kasula epona liu me ghe mae sio etaghi. 20 Aghe tiuaala eDamaskas vara me ejerusalem me ejidua ngakapa me ta taumattu ngeleka atoa aghe poppooaa va la kiri tale gheeleiaaira sesa me la mae ta God me la ghasunga tale masi uunguaaira va ngila ghe aikolikoli-aala. 21 Poli aghe poppooa ngavalua o me ajiu etoa laghe posoaghila tale ale ngeleka atiulu tale ale manga ateva me laghe anna tani uvi emateaghi. 22 God ghe sausieghila lomosi ta ghaine ngatinginala tani ppooaa ta ila akapa aliki me namuu. Karika aghaauliaa righi ouna inangari. Inangari oia propete atoa me Moses laghe ppooa ngalokoila arau va aue elutu: 23 Mesaea aue eghaa nimmarikana me etotu ekasina tale nimate me ia aue eppooa ngaotu mallangina ateva ta ajiu etoa me auena ta taumattu ngeleka atoa.”

24 Pol ghe aaippooaa me Pestas ghe savalainiela, ghe uela va, “Pol! Veeveena io? Kinatama alomasaanganiaam atoa ngila gheelei eveeveenaio.”

25 Pol ghe liula me ghe uela va, “Namu ngateva Pestas! Karika veeveena ieghi. Voto aghaauliaa koronna me malloeana masina.

26 King Agripa ekilakilaaili isaa oia voto, me karika amaamatautu tani ppooaa ta ngetana. Akilakilaaili va ia ekilakila isaa oia voto, poli karika aaisulianna.” 27 Pol ghe kolomila va, “King Agripa, uaiesoaa inangariira propete atoa? Akilakila va uaiesoaa.”

28 Me King Agripa ghe uela ta Pol va, “Uannaa va ia oia tuku nau erighi ugheleieghii va ausilaa Karisto?”

29 Pol ghe liula me ghe uela va, “Arova tukuna me aluse nau, alooloo sae ta God va karika io nonga ta am akapa lo atoa am nonganongoaghi ghaine, am ghele tau ngaisesoaa nongina aghi, me karika va tale sene.”

³⁰ King, me gavana, me Beniis, me lo atoa laghe tokatoka teeila, laghe tingina saela. ³¹ Me laghe kipi vulu ghoala ale atiulu me nau laghe aippooaala elome ta ngetaira laghe uela va, “Taumattu ngateva oia karika ghe gheleila righi sesa va esso tale ale mata voovoo me emate.”

³² King Agripa ghe uela ta Pestas va, “Ughe rooroo tani tau velu taumattu ngateva oia arova karika ghe aloannala va Siisa ghe tani nongo unna niaiskei eteae.”

27

Pol ghe laolao eRom tale anua ateva

¹ Nau laghe uela va ami* lao eItali, laghe taula Pol me katoa tani karavusu ta nimane kateva namuu ta tau ngai uvii etoa ghe aaitoiaa kateva ai (100) tau ngai uvii, ararina ateaet ta Jiulies, ia kateva ta Kohot ateva ta Siisa. ² Ami ghe aikaaila tale anua ateva anueira ia taumattu ngatoa tale masaliki taatara ateaet eAdramitium, ghe anna tani ilou lao tale kasina sao tale provinsi eteva eEisia. Ami ghe tiu ghoala, me Aristakus aTesononika ia tale provinsi eteva eMesedonia ghe usiemamila.

³ Vara mene kateva nau me ami ghe rekatala eSaedon. Me poli Jiulies masinaaili ia ta Pol, ghe tau veluela tani laa tara kapuna atoa me laghe tau lao righi llo ghe aloanna. ⁴ Me ami ghe tiu ghoala eSaedon me ami ghe iilou vaavalalaala tale patunganua ateva eSaeprasi poli ami ghe soula kuukuu eteva. ⁵ Ami ghe selela tale tuku mara ateva eSilisia me Pampilia me ami ghe rekatala eMaera tale provinsi eteva eLisia. ⁶ Tale ia voto ateva, tau ngai uvii eteva ghe aaitoiaa kateva ai (100) tau ngai uvii ghe tarala anua ateva ghe kasula tale masaliki taatara ateaet eAleksandria ghe laolao eItali me ghe kaaiemami ghoala etana. ⁷ Ghe oroila nau me karika ami ghe iilou enamuu poli ami ghe soula kuukuu eteva, me aanasaaaili tani lao me ami ghe nim sele akalakalaala tale masaliki taatara ateaet eNidus. Me anua ateva karika ghe rooroo tani usilaan nongina ami ghe anna tani lao, poli kuukuu eteva sarasarakananaili ia, liuna avalua o me ami ghe sele vaavalalaala tale patunganua ateva eKrit kalakalaala tale ngusunguna ateva eSalmone, poli pallunge ia. ⁸ Ghe tattasiemami nau ami ghe ilou vaavalaa me ami ghe rekatala tale saoa ateaet la kolokoloa va Masi Sao ia, kalakalaala tale masaliki taatara ateaet eLasea.

⁹ Oroi nau ang ghe lange sio me ang ghe ghaala nau nittasi poli Nau Ninae ang ghe ruula, me Pol ghe aulia ngakorokoronganala etaira va, ¹⁰ “Taita atoa! Ataatara va, arova ita kasu karika aue ita masina me aue ita velu anua ateva me ghinna me maamauluaaita tee.” ¹¹ Namu ngateva ta tau ngai uvii etoa ghe nongo vulula inangarina Pol me ghe nongo usilaala nannaairarua kapteni me tau nganuena. ¹² Poli sao atikirighi karika masina ia tani vukala nau ttasi, oroi ila lo atoa laghe aloannala tani kasu vuli ia o sao atikirighi me la laa vukala ppae. Arova masina laghe aaloanna tani lao tee ePiniks poli sao atikirighi okae masina ia nau ttasi eteva. Piniks kateae sao eKrit epaapallu tale kuukuu eteva tale nau ttasi.

Ttasi eteva

* **27:1:** Luk ghe kasukasu tee Pol, liuna avalua o me ghe pitila va “ami”. **27:2:** Apos 19:29.

¹³ Nau masi kuukuu erighi ta pai saot ghe tiuaala tani kuukuu, laghe annaala va ngila tani ghaagħhaa voto la għaalonna, liuna avalua o me laghe ae kaaila angga ngateva me laghe tiuaala tani sele vaavalaa eKrit. ¹⁴ Karika masau me salamisana ateva laghe aseasea va “notista” għe sio aloi mae tale patunganua ateva eKrit. ¹⁵ Ttasi eteva għe tiuaala tani uvi anua ateva me karika għe roroo tani mene ilou poli għe sousou kuukuu eteva. Liuna avalua o me ami għe nim tiuaala tani usi kuukuu eteva. ¹⁶ Nau ami għe sele vaavalala tani pallu tale patunganua arighi eKauda, ghaisa ngarighi karika ami għe roo tani ae kaai paanaka ateva, me karika ta' ami għe aee kaaiela. ¹⁷ Liuna avalua o me nau kuruu etoa lagħe aee kaaiela me lagħe keoaa siola kasina uasa tale vusu nganua ateva me lagħe iriela tani posoa akorokorongana anua ateva. Lagħe maamatautu va' ami għe rau tokka sae tale muerra elamana eLibia, liuna avalua o me lagħe velu siola voto ateva tani aogħi anua ateva tale kuukuu eteva, nau ami għe usiusi kuukuu eteva. ¹⁸ Ttasi eteva għe kaarasila tani uvi saasakia anua ateva, liuna avalua o me vara mene kateva nau me kuruu etoa lagħe tiuaala tani sau velvelu sio kasina għinna elamana. ¹⁹ Vara aiaakotonna ateva nau, me lagħe tiuaala tani sau velvelu sio kasina voto peina anua ateva. ²⁰ Oroi nau għe lange sio karika ami għe tara poila sinaka ateva me katto atoa, me ttasi eteva għe tam kapakapa poi, me ami għe kilala va' karika aue ami saanga.

²¹ Oroi nau għe lange sio me taumattu ngato karika lagħe namanama me Pol għe tinginala elome etaira me għe uela va, “Taita atoa! Arova am għe nongo usilaala llo agħe auliaala va ita rau mene tħu għoħa mua nau ita eKrit, karika aue ita għeġle sou isaa oia voto ange lutu teeitala, me karika aue ita għeġle sau velu sio righi għinna avalua o. ²² Me ja oia aghħaaulia etaimim va am mene masimasi poli karika teva etaita aue eraua. Anua ateva nonga aue evulla ia. ²³ Eleivoo kapuna ensolo ateva Goto ateva kapuna iegħi me auungu etana etingina valaala etaghħi ²⁴ me euela va, ‘Pol, urau mene matautu, poli aue utingina emua ta Siisa me uaisakei, me God ange alousiusi teela lo atoa am aikaai eitaua, me poli mausim me aue easaangi maamauluaaira.’ ²⁵ Liuna avalua o me, taita atoa, am rau mene annangaili poli aghħaikkaaia ta' God va voto eauliaala aue ekoronna. ²⁶ Me ita tani laa tokka sae tale teva patunganua.”

Anua ateva għe toka saela me għe tapolapolakala

²⁷ Aiakasangaulu għaata nina ateva (14) voo me kuukuu eteva għe kuukueinamami elaoħao tale kinatama paamanu eteva eAdriatik. Elomattua voo, me kuruu etoa lagħe ateateala va ngami għe reerekata elae. ²⁸ Lagħe velu siola uasa ateva me lagħe toongila va għaatingaulu (40) mita maamasauaane sio. Vara karika masau me lagħe mene toongila me lagħe tarala va kotolungaulu (30) mita maamasauaane sio. ²⁹ Poli lagħe maamatautu va' ami rau sso tokka sae tale teva voto atu, liuna avalua o me lagħe vella għaata angga emuli me lagħe tiuaala tani looloo sae va epai parasi. ³⁰ Kuruu etoa ngila għe paepae salana tani ilou vuli anua ateva, liuna avalua o me lagħe avukala siola paanaka ateva ta' paamanu me lagħe kamekame va varu lagħe mene anna tani velu llo angga emua. ³¹ Vara me Pol għe uela ta' namu ngateva ta' tau ngai uvii etoa va, “Arova kuruu etoa la tam toka tee anua ateva, karika aue ita

saanga.” ³² Liuna avalua o me tau ngai uvii etoa laghe toa patela uasa atikirighi laghe naue lao sio tale paanaka ateva me uasa me paanaka ateva ghe kasuaala.

³³ Auena ghe pai eraarangisana me Pol ang ghe ue etaira akapa va la namanama. Ghe ue va, “Ang ghele roola kasangaulu ghaata (14) nau am ghe vukalala me karika poi am ghe namanama. ³⁴ Aghanna va am ghaa righi inana me am nama me aue am toka. Karika poi teva aue tikirighi uu nguruna aue ekao ta uruna.” ³⁵ Nau eteva ghe ruula tani aippooaa, ghe ghaala kasina verete me ghe kkaili emasina saela ta God emua etaira me ghe pirila me ghe tiuala tani nama. ³⁶ Ila akapaaili nannaairia ghe mene masinala me laghe ghaala inana me laghe tiuala tani nama. ³⁷ Ami ekapaaili tale anua ateva erooroo ghalua ai ghaitungaulu ghaonomo iemami (276). ³⁸ Nau laghe namanamala va ghe ssoilala, me laghe tiuala tani sau velovelu sio beke uit tani ghelei oekana anua ateva.

³⁹ Vara ghe paila me laghe tarala vilikoule ateva samarra ia me karika laghe kilakila va elae tale sa ateva voto, me laghe annaala va laghe sso atoka sae anua ateva tale ia o voto ateva arova la rooroo. ⁴⁰ Laghe toa patela angga ghe tokala o elamana, me laghe pulakala uasa ghe naghinaghi etoka paka ose aluulu ghe aloaloo anua ateva, me laghe avukala saela sele ngemua ateva va ghe kuueinila me laghe sso elae. ⁴¹ Karika laghe sso rekata elae me anua ateva ghe ilou sauuala tale muerra me ghe toka saela. Emua ghe kaarasila tani sae toka karikaaili ghe aaisiisia, me kinatama kotoo atoa laghe tiuala tani ghelei polapolaki emuli.

⁴² Me tau ngai uvii etoa ngila ghe loeloe katikirighi salana va la uvi emate karavusu etoa poli laghe rau sso saoko va laghe ilou. ⁴³ Me poli kapuira namu ngateva tau ngai uvii etoa ghe anna tani asaangi maamauluaane Pol, ghe paolala va la rau mene ghelei voto laghe ailoeaa va la ghelei. Ghe uela va lo atoa la rooroo tani asa la love velu sio elamana me la suu sso elae. ⁴⁴ Mene katoa aue la ghasa sso tale palanga me righi tapiri voto ghe taruurutila tale anua ateva me la sso elae. Tale isaa o salana ami ekapa ami ghe laa sso rekata amasina elae.

28

Pol ghe tokala tale patunganua ateva eMolta

¹ Nau eteva ami ghe ssola elae, ami ghe kilala va patunganua ateva laghe asease Molta etana. ² Taumattu ngatoa tale lo ataeae o masaliki laghe masimasila tani taraiemami. Laghe kuula kura ataeae me ami ghe tiuala tani maruu, ta poli ghe vaavaao me kkaili eteva. ³ Nau Pol ghe lao sio tani ghaa see kasina tana laa kura, ghe sau teela sesa katu ngateva, vara ghe alokoi sae laa kura tale kura ataeae, me kura ataeae ghe llangi vella katu ngateva, me ghe kata avukalala nimana atelange. ⁴ Nau taumattu ngatoa laghe tarala sesa katu ngateva ghe vuuvukala ta nimana Pol, laghe aauliaa elome etaira va ia tau niuvi emate taumattu ia, liuna avalua o arongona ta ang ghe saangala elamana, me kapuira god ateva ararina ataeae ta Niaisakei Ghulughuluena aue eliu me euvi ematea. ⁵ Pol ghe repataa velu saela sesa katu ngateva tale kura ataeae,

me karika righi voto ghe lutula etana. ⁶ Nau taumattu ngatoa laghe toitoi poi vara nimane atelange ghe rrongo, me ghe mate me ghe katuu, me laghe aikolikoliaala nannaaira va Pol goto ia.

⁷ Karika masau tale lo atea o masaliki, kasina kosa, kosane namu ngateva tale patunganua ateva, ararina atea ta Publius. Ghe koloamamilia me ami ghe lao sio tanganuena, me ghe aitarainamamilia tale kotolu nau. ⁸ Tale ia o nau eteva, tamana ghe isiki elokoila, vilikina ghe aanasa me kovane ateva ghe iiloueiniela. Pol ghe ssola tani taraia, me ghe looloo saela me ghe saoaala nimane, me ghe masinala. ⁹ Nau isaa o voto Pol ghe gheleila, mene katoa tana tau sessa tale lo ateva o patunganua laghe mae sio, me laghe masinala. ¹⁰ Laghe gheleila oroieili voto masina etaimami, me laghe tau mae sio kasina voto karika etaimami, nau ami ghe kasukasu.

Pol ghe rekataala eRom

¹¹ Emuli tale ulana kotolu, ami ghe aikaaila tale anua ateva ghe vuuvukala okae, poli nau ttasi. Anue nge Aleksandria ia, emua tale anua ateva, tootoo god alua palue ilalua, Kastor me Polluks.* ¹² Ami ghe laa rekataa sio tale masaliki taatara atea eSirakius, me ami ghe tokala kotolu nau. ¹³ Ami ghe tiu ghoala, ami ghe selela ami ghe rekatala tale masaliki taatara atea eRegium. Me emulina kuukuu eteva ghe mae aloi sio ta pai saot, me anua ateva ghe ilou parasila, me mene kateva nau ami ghe lao sio tale masaliki taatara atea ePuteoli. ¹⁴ Tale lo atea o masaliki taatara, ami ghe saopila katoa taumattu tau ngaisesoaa ila. Laghe koloamamilia tani toka teeila tale ghaitu (7) nau, me ami ghe kasu vulilala tani lao eRom. ¹⁵ Nau tau ngaisesoaa ngatoa laghe nongoamamilia, laghe kasu emasaula tani mae souemami, katoa tale maket eApius, me katoa tale masaliki eteae la ghe aseasea va Kotolu Ale Aiasoaso. Nau Pol ghe tarailala, Pol ghe kaili emasinala ta God, me laghe asarasarakanaielia. ¹⁶ Nau ami ghe rekatala eRom,† laghe tau vella Pol va etoka ie nonga ta kateva ale me tau ngai uvii eteva tani toia.

Pol ghe poppooaa eRom

¹⁷ Pol ghe tokala kotolu nau, me ghe kolo aitauaala namuu ta ajiu etoa, me ghe uela va, “Tueghi me nengaghi etoa, arongona ta karika aghe gheleila righi sesa voto ta taumattu ngatoa, me ta gheeleiaaira tuvuita atoa, me laghe kuneieghila eJerusalem me laghe tueghi lao sio ta nimaira aRom atoa. ¹⁸ Nau laghe kolomieghila me ngila ghe aloanna tani tau velueghi, poli karika righi voto sesa aghe gheleila va la uvi emateaghi. ¹⁹ Nau ajiu etoa karika laghe aaloannala va la tau velueghi, liuna avalua o aghe aloanna va Siisa ghe tani nongoaghi, karika aghe annaala va aghe ghelei me kapughu etoa laghe aisakei. ²⁰ Liuna avalua o aghaloannaiemla va am mae me ataraiem, me atani sama teeiem. Ta poli apoppooaa Mesaea, ita alsraeli etoa ita aaiesoaa va aue easaangita, liuna avalua o me laghe iri etokaieghila tale isaa oia sene.”

^{28:6:} Apos 14:11. * ^{28:11:} Uru tootoo taumattu ngalua laghe atokala emua, me laghe kakkaua etairarua. † ^{28:16:} Kasina uru ngai laghe pitila, laghe mene pitila va namuu ta tau ngai uvii etoa ghe aaitoiaa kateva ai (100) tau ngai uvii ghe tau lao sio karavusu etoa ta lo ateva emuemua tau ngai uvii etoa tale ia o voto ateva, ^{28:18:} Apos 26:31. ^{28:19:} Apos 25:11.

^{28:20:} Apos 26:6-7.

²¹ Me laghe liula va, "Karika toa ajiudia laghe piti mae sio righi uru ngai tani aulieinio, me karika teva ajiudia ghe mae auliaa righi kiukiu etaimami, me tani auliaa righi sesa kiukium. ²² Me ami aaloanna tani nongo righi nannaam, ta poli ami kilakila va taumattu tale kosa akapa ateva la aauliaa saasakiaa tale ia o niaikaaia ngateva."

²³ Laghe asela nau eteva, me oroi taumattu laghe mae sio tale voto ateva Pol ghe tokatoka etana. Elue talaua me ghe laa ghaa sio elo alai, Pol ghe aulia ngamasalikaala ararimangalina ateva God. Ghe aaulia ngaotu Iesu tale inangari nipaopao ta Moses me propete atoa, poli ghe aloanna tani kiri nannaaira me laghe aikaiaia ta Iesu. ²⁴ Katoa laghe akoronnala inangari ghe auliaala, me katoa karika laghe aikaiaala. ²⁵ Laghe tiuaala tani aisavalaa see me laghe tiuaala tani kasu. Pol ghe uela va, "Spirit Manga ateva ghe aulia ngakoronnala ta tuvuimim atoa[‡] ta propete Aisaea va,

²⁶ "Kasula me ulaa ue etaira va,

"Aue am nongo me karika aue am kila;

me aue am tara me karika aue am alomasaanga tee."

²⁷ Urunguitaniira aue ekorokorongana,

me talingaira aue evolovolongina tani nongo,

me laghe akoula mataira va karika la taatara.

Ta la rau tara nonga ta mataira,

me la nongo ta talingaira,

va la kila tale urunguitaniira,

me la kiri mae va aghelei emasinaila.'

²⁸⁻²⁹ "Me aue am kila va niasaangi kanna God ang ghe lao sio ta taumattu ngeleka atoa, me aue ila la nongo!"[§]

³⁰ Pol ghe tokala ghaluae ninamanama tale ale ateva ghe polipolia, me ghe masimasi tani tara taumattu ngakapa atoa laghe mae taataraia.

³¹ Nau ghe poppoaa inangari ararimangalina ateva God me ghe aapasunga Vau ngepona ateva Iesu Karisto, karika ghe maamatautu, ta poli karika teva tani ghelei rungainia.

28:22: Apos 24:14. [‡] **28:25:** tuvuimim atoa Kasina uru ngai laghe pitila, laghe uela va tuvuita atoa. **28:26:** Ais 6:9-10; Apos 25:13; 26:2, 6; 27:24; Rom 1:5. [§] **28:28-29:** Kasina uru ngai laghe pitila, laghe mene pitila va, 29 Me nau eteva ghe auliaala isaa o voto, ajiu etoa laghe kasu vuliela, me emuli ta ngetana laghe aissakeanaala.

Uru ngai etikirighi Pol ghe pitiela ta aRom atoa Inangari emuemua

Pol ghe tokatoka eKorint nau ghe pitila uru ngai ta aRom atoa. Karika ghe saela eRom, liuna avalua o me ghe pitipiti lao siola tale ale manga ateva karika ghe uungula etana. Ghe aulia ngamasalikala masi kiukiu ghe aippooaa teela, me ghe liula katoa nikokkolomi lo atoa karika la aiesoaa laghe kkolomila tale masi kiukiu. Voto namuu tale ia oia uru ngai etikirighi, ia avalua toko: taumattu ngatoa karika la rooroo tani asaangila tale uunguaaira, me, arova la aiesoaa ta Iesu, God aue easela va ghulughuluena ila. Me tee, Pol ghe auliaala vaalua ghe aloanna va ajiu etoa la mae tani aiesoaa va Iesu Mesaea ia. Nongina oroi uru ngai Pol ghe pitila, ghe ruula tani aulia ngaotu vaalua ita tau ngaisesoaa tani toka, me ghe suula masimasiaane ta lo atoa ghe kilailala eRom.

Tani kila amuemua

Aitiutiu tale inangari 1:1-17

Karika teva ghulughuluena ta matane God 1:18–3:20

Ita akapa ita rooroo tani saanga arova ita aiesoaa ta Iesu Karisto 3:21–4:25

Nialesoaa ta Karisto 5:1–8:39

Ajiu etoa me masi kiukiun 9:1–11:36

Vaalua tani toka nau ita aiesoaa ta Karisto 12:1–15:13

Uunguaane Pol me eaa eloanna tani kasu 15:14–23

Pol ghe suula masimasiaane 16:1–27

¹ Aghi, Pol, kapuna tau ngai uungu ieghi Karisto Iesu. Ia ghe suimatoongainaghila tani apostolo me ghe suoiongainaghila tani ppooaa masi kiukiuna God. ² Emua arau, God ghe auliaala masi kiukiun tale inangarina nialokoi ta kapuna propete atoa, laghe pitila tale Uru ngai Manga ateva. ³ Masi kiukiun eaauliaa Natuna, ia ghe lutula tale taumattu, me ia tuvuna ia Deivit. ⁴ Nau God ghe totuela tale nimate, Spirit Manga ghe apasungaala etaita va ia natuna ia God me sarasarakananaili ia, me ia Iesu Karisto Vauita ia. ⁵ Ta ngetana, ami ghe ghaala maamasinaane tani kasuua see masi inangarina, poli eloanna va taumattu tale kosa akapa ateva la ghairesoaa tale ararina ateae Iesu me la nongo usilainia. ⁶ Me am tee, am elome ta lo atoa God ghe kololala va kapuna ila Iesu Karisto.

⁷ Apitipiti atu ta ngetaimim lo akapa atoa ona eRom, God eaielousieinam, ia ghe koloamla va manga am.

Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Pol ghe antani laa tara lo atoa eRom

⁸ Emua akasiña akaakaili emasina ta God tale ararina ateae Iesu Karisto ta ngetaimim akapaaili, ta poli taumattu ngatoa la kiukiuaa aiesoaimim tale kosa akapa ateva. ⁹ God ateva auungu etana tale urunguitanighi ekapa ateva tani ppooaa masi kiukiuna Natuna, erooroo tani aulia ngaotu vaalua aghannainam ¹⁰ nau ekapa atoa tale kalughu

nilooloo sae. Kateva voto alooloo sae nonga etana ia avalua toko va, arova aloaloannaane God, aue eghelei righi salana me aroo tani mae taraiem. ¹¹ Aghaloannaaili tani taraiem me aghele sausiem tale kasina masi niuungu Spirit Manga ateva ghe tau mae sio etaghi tani asarasarakanaiem. ¹² Aghannaaili tani asarasarakana aikaiaaimim me aikaiaaimim tee aue easarasarakanaieghi. Tale isaa o salana, aue ita aisausieinita tale isaa o niarangise. ¹³ Aghanna va am kila, tueghi me nengaghi etoa, va oroaata aghe anna tani mae taraiem me asease voto atoa laghe ghelei rungarungainaghi lomose ta ghaine. Me aue arooroo tani ghaa masi uene elome etaimim nongina aghe gheleila ta mene katoa taumattu karika ajiu ila.

¹⁴ Aghi atani uungu ta lo atoa aGriki ila me lo atoa karika aGriki ila, me lo atoa alomasaangaaili ila me lo atoa alokapakapa ila. ¹⁵ Liuna avalua o me aghannaaili tani mae ppooaa masi kiukiu etaimim lo atoa tee ona eRom.

Sarasarakaniaane masi kiukiu

¹⁶ Karika apaapalataa masi kiukiu, poli sarasarakaniaana God etana tani asaangi lo akapa atoa la ghaaiesoaa etana, ajiu mua atoa me auena lo atoa karika ajiu ila.* ¹⁷ Isaa o masi kiukiu eauliaa nighulughuluena ateva emaemaet God. Ase nighulughuluena ateva ita ghaaghaia nau ita tiitiuaa tale niaikaiaia, me ita ruuruu tale niaikaiaia, nongina Uru ngai Manga ateva eaauliaa va, “Lo atoa la ghaaiesoaa, God aue easela va ghulughuluena ila, me aue la maulue.”

Taumattu ngakapa atoa sesaaili ila

¹⁸ Sessaiaane God esio epona liu tani ssa tee voto akapa atoa la sessa tee God, me tale sesa gheeleiaaira taumattu ngatoa la gheeghelei rungarunga inangarina God koronna. ¹⁹ Poli voto la rooroo tani kila God etana karika masukasukale etaira, poli God ang ghe ghelei emasalike akapala etaira. ²⁰ Karika ita rooroo tani tara God, me ghe tiuuala nau ghe gheleila kosa ateva, sarasarakaniaane tokatoka liuna me gheeleiaane pei ngepona liu, masalikeaili tani tara, poli ita kilakila nau ita taatara voto ghe gheleila. Liuna avalua o me taumattu ngatoa karika la rooroo tani ue va la tam kilakila God.

²¹ Arongona ta la kilakila God, me karika la oneoneainia va ia Goto ia, karika la kaakaili emasina etana, me alokapakapa ila me nannaaira karika masalike. ²² Arongona ta la uue va alomasaanga ila, me karika, ta alokapakapa ila. ²³ Karika la kakkaua God ateva etokatoka liu, me la kakkaua tootoo goto atoa me la gheelei tootoo taumattu karika erooroo tani toka liu, me tee ghila atoa, ghaata kkena atoa me otuena atoa me lo atoa la rarrraa tapaa kosa.

²⁴ Liuna avalua o me God ang ghe tau vella isaa o taumattu tani ghelei voto karika raarangisana urunguitanira ealoannaaili tani ghelei, me la ghelei voto pei nipalataa tale vilikiira tee. ²⁵ Laghe ratila inangarina ateva God koronna ia, me laghe aloannala inangari kamena. Laghe kakkaua me laghe tuuturru tale voto llo God ghe gheleila. Karika laghe

1:13: Apos 19:21. **1:16:** Mak 8:38; 1 Ko 1:18-24; Apos 13:46. * **1:16:** lo atoa karika ajiu ila tale inangari nge Griki, aGriki etoa. **1:17:** Rom 3:21-22; Abak 2:4. **1:19:** Apos 14:15-17; 17:24-28. **1:20:** Job 12:7-9; Sams 19:1. **1:21:** Ips 4:17-18. **1:22:** Jer 10:14; 1 Ko 1:20.

1:23: Diut 4:15-19; Sams 106:20.

kakkauaa God ateva ghe gheleila voto akapaaili, ia nonga ita tau sae ararina atae nau ekapa atoa, koronna!

²⁶ Liuna avalua o me God ghe tau vellala tani toka gheelei isaa o voto sesa ta nannaaira. Vause atoa laghe sau vella masi salana tani lai, me la gheelei voto ita taumattu ngatoa karika ita rooroo tani ghelei. ²⁷ Tale isaa o ase salana taita atoa ngeila ghe ratila tani lai vause atoa, poli aloaloannair namungaili tani lai ta mene kateva taita. Taita atoa la gheelei voto palatana ta mene katoa taita. Liuna avalua o me la ghaaghaa aipolipoli sesa tale maamauluuaaira.

²⁸ Nau eteva la tam anna tani kila God, God etautau velu nannaaira sesa tani nnaa me ghelei voto karika masina etaira tani ghelei. ²⁹ Laghe pasula tale voto karika ghulughuluena, voto sesa, mata nginana ila me la ghalaannaaili tani ghelei voto sesa ta mene katoa, me tani tara ssaii, niaiuvi emate me tani aissakeana me nikamekame, me ninannaas pasu tale voto llo sesa, me la ghaauliulia. ³⁰ La ghauliaa saasakiaa tee mene katoa, la sessa tee God, me la tautaula nimmarikana ta mene katoa, me la tautau sae nannaaira me la ghaasake, me laghe nannaas oroi salana tani ghelei sesa voto. La tam nongonongo usilaa tamaira me kinaira atoa. ³¹ Karika righi masi nannaaira tani ghelei masina. Karika la ailokoiaa inangari nialokoi laghe auliaala, karika la ghaapasunga gheeleia nialousiusi tee mene katoa, me karika la ghalaanna tani sausi mene katoa. ³² Laghe kilakila va God kanna inangari nipaopao eue va taumattu egheelei isaa o voto erooroo tani mate, me karika isaa nonga o llo la gheelei, ta la asarasarakana mene katoa tani mene ghelei isaa o voto.

2

Ghulughuluena niaisakei kanna God

¹ Liuna avalua o me karika masina va uauliaa tee mene kasina taumattu. Aghauliaa etam va karika urooroo tani ue va karika righi gheeleiaam sesa, ta nau uauliaa tee mene kasina taumattu, unim aauliaa teeio tale gheeleiaam, ta poli niuungu sesa la gheelei, io tee ughusiusi tani ghelei. ² Ita kilakila va kanna niaisakei God ghulughuluena. Nau taumattu egheelei sesa niuungu, etautau lao sesa ngaipolipoli. ³ Uannaa va uaauliaa tee katoa tale voto io tee ugheelei, aue easaangi io tale kanna niaisakei God? ⁴ Karika utaatara kila vaalua God pasu ia tale nialousiusi, me toitoiaane etam aluse, me karika emaamangoo vuluo? Uannaa va isaa voto God egheelei sesaaili? Me karika utaatara maamasinaane vaalua etautau aatu nau me aue uroo tani oghi vulu gheeleiaam sesa?

⁵ Urunguitanim ateva korokoronganaili ia. Karika ualoanna tani nna ngaioghioghiaa, liuna avalua o me io ugheelei sesa aipolipolim enaanamuu tale nau eteva God eapasunga sessaiaane tale kanna niaisakei etae ghulughuluena ia. ⁶ God “aue etaula aipolipoli ta taumattu ngakapa atoa tale niuungu la gheelei.” ⁷ Lo atoa la aimuli esarasarakana tee masi niuungu me masi nitoka tee God epona liu, me la paepae salana va God easaesae arariira me eoneoneainila, me tani ghaa maulue ateva tokatoka liu ia nau ekapaaili etoa, God aue etae

lao etaira. ⁸ Me, ta lo atoa la nannainila nonga, me karika la aloanna tani aimuli tee inangarina ateva God koronna ia, me la aimuli tee sesa voto, sessaiaane ateva God etaira aue namungaili. ⁹ Aue namungaili nialousiusi me nimmarikana elutu ta taumattu ekapa atoa la gheelei ssavoto, ta ajiu etoa mua, me tee lo atoa karika ajiu ila.* ¹⁰ Me God aue etau lao masi nitoka epona liu me easaesae arariira me eoneoneainila me etau lao luei ta lo atoa la gheelei masi voto, ta ajiu etoa mua, me tee lo atoa karika ajiu ila.† ¹¹ Ta God karika ealoanna nonga katoa ta ealoanna akapaita.

¹² Lo atoa taumattu la tam kilakila inangari nipaopao me la gheelei ssavoto, aue la tturungila, arongona ta la tam kilakila inangari nipaopao. Me lo atoa taumattu la kilakila inangari nipaopao, me la gheelei ssavoto, God aue eghelel niaisakei tee etaira, poli la kilakila inangari nipaopao me karika la aimuli tee. ¹³ Karika va lo atoa la nongonongo inangari nipaopao ghulughuluena ila ta matane God. Lo atoa la nongonongo usilaa inangari nipaopao, isaa o taumattu aue la ghaa arari ghulughuluena atae. ¹⁴ Nau taumattu ngeleka atoa, karika la kilakila inangari nipaopao kannna God, me tale nannaaira la aimuli tee voto inangari nipaopao eauliaa, tale urunguitaniira eapasunga va la kilakila voto masina me sesa. ¹⁵ Tale gheeleiaira eaapasunga va inangari nipaopao elome tale urunguitaniira. Nannaaira tee eaapasunga voto koronna nau nannaaira ghe aauliaa etaira va kasina voto la gheelei sesa me kasina laghe gheelei masina. ¹⁶ Liuna avalua o me tale masi kiukiuna Iesu apoppoaa, tale ia o nau eteva aue God, ta Iesu Karisto, aue eghelel niaisakei tale nannaaira eaisulia.

Ajiu etoa me inangari nipaopao

¹⁷ Vaalua etam? Uue va ajiu io, uatoka tuutulim tale inangari nipaopao me uaasake va ukilakila God, ¹⁸ ukilakila aloannaane God me ngughe kilakila voto koronna tale inangari nipaopao isaa o voto ghulughuluena. ¹⁹ Uannaa va io uitaraa mata salusalu etoa, me mallanga io tale lo atoa la tokatoka tale saurrom, ²⁰ tau ngai loeloe io tale lo atoa alokapakapa ila, me tau ngai aapasunga io tale lo atoa karika righi masi ninanna etaira nongina lutu ngaliki etoa, io uannaa va tale inangari nipaopao kannna God, voto akapaaili koronna erooroo tani apasunga ta taumattu ngatoa. ²¹ Uaapasunga ta katoa, me vaalua me karika urooroo tani apasunga etam? Me upoppoaa va la rau mene ainao, me io tee uainao. ²² Me uue va lailai etoa la rau mene lai sari kateva manna ateva, me ulailai sari kateva manna ateva. Karika ualoanna tani oneoneaa mene kasina tootoo goto, uainao voto tale ale nikkaa aleira taumattu ngeleka atoa. ²³ Utautau sae nannaam va ukilakila inangari nipaopao, me nau utam aimuli tee, tale isaa o salana, karika uoneoneaa God. ²⁴ Isaa avalua o me nongina Uru ngai Manga ateva eaauliaa va, “Mausiimim me kosa ateva eauliaa saasakiaa tale ararina atae God.”

²⁵ Arova uaimuli tee inangari nipaopao, salana tani isoiso, aue ghele tue malloeana manee, va arova utam aimuli tee inangari nipaopao, aue ghele masina arova laghe tam isoiola. ²⁶ Arova lo ateva taumattu karika

2:8: 2 Tes 1:8. * **2:9:** lo atoa karika ajiu ila tale inangari nge Grik, aGriki etoa. † **2:10:** lo atoa karika ajiu ila tale inangari nge Grik, aGriki etoa. **2:14:** Apes 10:35. **2:20:** 2 Tim 3:5. **2:21:** Mat 23:3-4. **2:24:** Ais 52:5. **2:26:** Gal 5:6.

isoiso ia me eaimuli emasina tee sa ateva inangari nipaopao eaulieinia, ia o taumattu ngateva, God aue etaraia va nongina taumattu ngateva laghe isoelia. ²⁷ Liuna avalua o me am ajiu etoa, taumattu ngeleka atoa la aimuli tee inangari nipaopao, arongona ta karika isoiso ila, aue la ratiem, ta karika am aimuli tee inangari nipaopao, arongona ta am uunus vuku eteva laghe pitila inangari nipaopao me laghe isoiemla.

²⁸ Taumattu ngateva karika ajiu ia nonga eleka ta vilikina, me ni-isoiso atae karika va pei ngeleka nonga ia. ²⁹ Lo ateva taumattu urunguitanina ateva ghulughuluena ia ta God, ia ajiu tuungia, me koronna atae ni-isoiso elutulutu nau urunguita ateva eaaikolikoliaa me kanna Spiriti eteva God egheeleia, karika va nau la isoiso vilikina. Lo ateva eghaaghaa ia o ase niaikolikolia ngateva karika taumattu earueinia, ta God earueinia.

3

God aue eusilaa inangarina ghe auliaala

¹ Liuna avalua o me saa maamasinaane tani ajiu? Me saa righi masi voto aue elutu tale ni-isoiso atae? ² Oroieili asease voto atoa! Aitiutiu eteva voto, God ghe taula inangarina tuu ta ajiu etoa tani aitarainia.

³ Me vaalua arova katoa karika laghe uusilaa inangarina? Am annaa va God karika aue eusilaa inangarina? ⁴ Karika poi! God eauliaa koronna, me taumattu ngakapa atoa tau nikamekame ila, nongina Uru ngai Manga ateva eauliaa va,

“Uapasunga koronna nau uaippooaa,
me aue uapala tale niaiskei.”

⁵ Vaalua? Arova kaluita ssavoto eapasunga aotu gheegheleiaane God ghulughuluena tale tummatavanga, sa ateva ita auliaa? Nau God eattara mataneita tale kaluita ssavoto, aue ita ue va God karika masina ia, va? (Anim poppoaa nongina taumattu ngatoa la ghaippooaa.)

⁶ Karika poi! Arova God karika masina ia, vaalua aue erooroo tani ghelei niaiskei ta taumattu tale kosa ateva? ⁷ Kateva aue eue va, “Arova inangarighi kamena eapasunga aotu inangarina God koronna, tani asaesae ararina atae God, vaalua me easeaseaghi va tau ssavoto aghi me eattara mataneaghi?” ⁸ Vaalua me ita tam ue va, “Ela! Ita gheelei voto sesa me aue masi voto eotu.” Tale ia o salana atikirighi kasina tana taumattu eaaliu teeieghi va aghauliaa isaa o voto, auena God aue eghelei eghulughuluena niaiskei etaira tale voto sesa la gheelei.

Karika teva ghulughuluena ia

⁹ Vaalua? Am annaa va ita ajiu etoa muennaaili ita ta mene katoa taumattu? Karika poi! Poli ngeita ghe apasungala va taumattu ngakapa atoa, ajiu etoa me lo atoa karika ajiu ila, la tokatoka elome tale sarasarakaniaa ssavoto ateva. ¹⁰ Nongina Uru ngai Manga ateva eaauliaa va:

“Karika teva ghulughuluena ia, karika poi;

¹¹ karika teva alomasaanga,
me karika teva epaepae God.

¹² Ila akapa laghe liula vilira ta God,

me ila akapa laghe nim peisaanel;a;
karika teva egheelei masina,
karikaaili teva.”

¹³ “Aloira nongina paa liu niaikkaia ngateva enim toka otioti ia;
me ramuramuti paaira ateva eaauliaa oroieili inangari
nikamekame.”

“Poppooaa musiki paaira sesa nongina lo ateva katuu eai kата amate.”

¹⁴ “Paaira pasueili tale inangari sesa tani ghelei saasakiaa kateva
taumattu.”

¹⁵ “Arovaengaili nonga ta esessaila me la aiuvi emate;

¹⁶ nongina eaa la laolao, la gheelei saasakiaa me la tuuturungi
maamaulue katoa taumattu,

¹⁷ me karika la kilakila masi salana luei.”

¹⁸ “Karika la maamatauta sessaiaane God.”

¹⁹ Ita kilakila va isaa akapa voto inangari nipaopao eaauliaa, eaauliaa
ta lo atoa God ghe taula inangari nipaopao etaira, poli God ghe aloanna
va karika teva taumattu erooroo tani ue va, “Aghi ghulughuluena
ieghi.” Karika poi! Ita akapa taumattu ngatoa tale kosa ateva oia,
aighelei ssavoto ita ta matane God. ²⁰ Liuna avalua o me karika teva
erooroo tani ue va ia ghulughuluena ia ta matane God, poli eaaimuli
tee inangari nipaopao, karika poi! Inangari nipaopao eapasunga sesa
gheeleiaaita.

Ghulughuluena tale niaikaiaa

²¹ Isaa oia God ang ghe apasungaala katikirighi ppae salana vaalua
tani ghulughuluena ta matane. Karika va tani aimuli tee inangari
nipaopao, ta emaema ta God, ghe asola tale inangari nipaopao kanna
ia Moses me vuku etoa propete atoa laghe pitilala. ²² Tale isaa o masi
uunguaane God, ila akapaaili taumattu ngatoa la ghairesoaa ta Iesu
Karisto, God easeasela va, “Ila ghulughuluena ila.” Ita akapaaili kateva
nonga ita, me karika ita aaipola, ²³ ta poli ita akapaaili ita ghe gheleila
ssavoto, liuna avalua o me ita akapaaili masaueili ita tale salana
ghulughuluena kanna God. ²⁴ Me God ghe ghelei eghulughuluena
akapaailitala me karika ekookolomi righi aipolipoli, me ghe nim tau
mae sio Karisto Iesu tani mae poli aoghita. ²⁵ God ghe tau mae sio Iesu
tani mae mate me tani ghelei niaiaavusuvusuena, me raena ateva aue
eakalaa tani ghaa velu kaluira ssavoto taumattu ngatoa la ghairesoaa
etana. Ghe gheleila isaa o voto tani apasunga ghulughulueniaane
va tale nau ang ghe lao sio, God ghe nim taatara kaluira ssavoto
me karika ghe attara mataneila, tale toitoiaane God, karika esessai
parasi ia. ²⁶ God ghe gheleila voto oia tale isaa oia nau tani apasunga
va egheelei eghulughuluena niaisakei, poli ia ghulughuluena ia, me
egheelei eghulughuluena lo atoa la ghairesoaa ta Iesu.

²⁷ Vaalua? Ita rooroo tani aasake va ita ghe gheleila righi voto me
God ghe masieinitala? Karika poi! Nau ghe uela va ghulughuluena
ita, karika va poli ita ghe aimulisi tee inangari nipaopao, ta poli nim
uneita niaikaiaa. ²⁸ Liuna avalua o me ita ue va, taumattu ngateva
eghulughuluena ta matana God tale uunguaa niaikaiaa nonga, me
karika va tani aimuli emasina tee inangari nipaopao. ²⁹ Vaalua? Ia oia

God ateva kapuira God nonga ia ajiu etoa, me karika kapuira God tee ia lo atoa karika ajiu ila? Koronnaaili ia kapuira God tee ia lo atoa karika ajiu ila.³⁰ Poli kateva nonga ia God ateva, egheelei eghulughuluena lo atoa isoiso ila tale niaiesoaa me lo atoa karika isoiso ila elome tale ie nonga o niaiesoaa ngateva.³¹ Vaalua tale ia o niaiesoaa ngateae? Ita sau velu inangari nipaopao? Karika poi! Ta ita akorokorongana inangari nipaopao.

4

God ghe asela Abraham va ghulughuluena ia

¹ Sa ateva ita mene aulieinia ta tuvuita ateva ta Abraham? Sa ateva ghe taraiela tale isaa o voto?² Arova God ghe aseala va ghulughuluena ia mausi gheeleiaane, aue erooroo tani aasake, me karika ta matane God.³ Poli sa ateva Uru ngai Manga ateva eauliaa? Eue va, “Abraham ghe aaiesoaa ta God. Liuna avalua o me God ghe aseala va ghulughuluena ia.”

⁴ Taumattu ngateva egheeghelei niuungu me eghaaghaa aipolipoli. Isaa o aipolina karika ita ue va la nim tautau lao, karika. La tautau lao tani liu niuungu euunguaa.⁵ Ta lo ateva etokatoka tale niaiesoaa me karika va tale niuungu, eaairesoaa tale God ateva eaaulia ngaotu lo atoa sesa gheeleiaaira va ila ghulughuluena ila, poli ia o niaiesoaa ngateae God easeasea va ghulughuluena ia.⁶ Deivit ghe aulia ngavaluelo o, nau ghe aauliaa nimasimasi eteae tale taumattu ngateva God easeasea va ia ghulughuluena ia karika va tale uunguaane.

⁷ “Aue emasinaaili

ta lo atoa gheeleiaaira sesa ang ghe kkaluaala,
me kaluira ssavoto ang ghe ghaa vella.

⁸ Aue emasinaaili ta lo ateva taita

gheeleiaane sesa me Vau ngepona ateva karika aue emene annaa.”

⁹ Vaalua? Ia o nimasimasi eteae uneira nonga lo atoa isoiso ila, o uneira tee ia lo atoa karika isoiso ila? Poli ita ue va God ghe uela va Abraham ghulughuluena ia poli unna niaiesoaa.¹⁰ Vaalua unna niaiesoaa ghe sausielo? God ghe uela va ghulughuluena ia nau laghe vira mene isoioela, o auena laghe isoia? Nau karika laghe isoia me God ghe uela va ghulughuluena ia.¹¹ Nau karika laghe isoia, God ghe aseala va ghulughuluena ia ta poli unna niaiesoaa ta ngetana, me God ghe taula ni-isoiso ateae tani aimatootoongana va ia ghulughuluena ia. Liuna avalua o me Abraham tuvuira akapa ia taumattu ngatoa karika isoiso ila me la aiesoaa ta God, me God easeasela va ghulughuluena ila.¹² Me ia tee tuvuira ia lo atoa isoisona ila me la kasukasu tale salana niaiesoaa ta God nongina Abraham karika laghe isoia me ghe aiesoala ta God.

¹³ Karika tale inangari nipaopao va Abraham me tuvuna atoa laghe ghaala inangari nialokoi va kosa akapa ateva oia kaluira ia, me karika, ta tale nighulughuluena ekasukasu tale niaiesoaa.¹⁴ Arova koronna va llo taumattu eaimuli tee inangari nipaopao, ila nonga aue la ghaa isaa akapaili voto God ghe auliaala tale kanna inangari nialokoi va aue etau mae, uunguaa niaiesoaa aue peisaane. Me isaa o kanna inangari

nialokoi God aue peisaane tee. ¹⁵ Ita kilakila va inangari nipaopao emaemaearaa aipolipoli tale ssavoto ateva, me eaa karika righi inangari nipaopao, karika ita rooroo tani ue va taumattu ngatoa la tam aimuli tee inangari nipaopao.

¹⁶ Liuna avalua o me, tale niaiesoaa, tuvuna atoa Abraham la ghaaghaa voto God ghe auliaala tale inangari nialokoi va aue etaula etaira. Tale ia o salana atikirighi, maamasinaane God eroorooaa va ila akapa aue la ghaa isaa o voto, karika va ghinnanniira nonga lo atoa la aimuli emasina tee inangari nipaopao, karika. Ta ila akapaaili taumattu ngatoa uneira niaiesoaa nonginaaili Abraham, ia mata ngemua ateva tuvuuta. ¹⁷ Nongina Uru ngai Manga ateva eaauliaa va, “Ngaghe gheleioluva tuvuira io oroieili taumattu ngatoa.” Ia o inangari nialokoi eteva masinaaili ia ta taataraane God, ia o Abraham ghe aiesoaa etana. Ia o God ateva etautau maulue ta matena atoa me enim aippooaa me voto karika ghe tokatoka, elutululu.

¹⁸ Abraham ghe aiesoaa me ghe anna ngakorokorongana, arongona ta ghe tam kilakila vaalua God aue eghelei eroorooaa inangari nialokoi etana, liuna avalua o me tuvuira ia oroieili taumattu ngatoa nongina God ghe auliaa va, “Tuvum atoa aue la oroieili nongina katto atoa.” ¹⁹ Koti Abraham anna ninamanama erooroo kateva ai (100), me unna niaiesoaa karika ghe maomaona nau ghe annaa va ia ang ghe taita namuula, me karika erooroo tani mene alakuti teva aliki, me Sera tee kina ngere ia. ²⁰ Unna niaiesoaa karika ghe kasu vuliela, me karika ghe ghaaghala nannaane tale kannaa inangari nialokoi God; unna niaiesoaa ghe sarasarakanala me ghe tau saela God. ²¹ Ghe atoka asasaraskanala nannaane va God aue erooroo tani ghelei inangarina nialokoi aue koronna. ²² Liuna avalua o me God ghe nnaala unna niaiesoaa Abraham me “ghe aseala va ghulughuluena ia.” ²³ Ia o masi inangari ateva koronna ia God ghe aulieiniela ta Abraham va ghulughuluena ia, karika laghe pitila tani sausinonga Abraham, karika! ²⁴ Ta ita tee me eakorokoronganaita va God aue eue etaita tee va ghulughuluena ita, arova ita aiesoaa ta God ia ghe totula Iesu Vauita ia tale nimate. ²⁵ God ghe tauve lao sio va emate poli kaluita ssavoto me ghe totuela tale nimate tani ghelei eghulughuluenaita ta matane God.

5

Nighulughuluena ta matane God

¹ Liuna avalua o, nau angita ghe ghulughuluenalata matane God tale niaiesoaa, ngita ghe tokala tale luei tee God, poli uunguaane Vauita ateva Iesu Karisto. ² Tale kaluita niaiesoaa, Karisto ghe otala salana atikirighi etaita tani kupi sso tale ia o maamasinaane ateva God, ghaine ita tokatoka etana. Me ita toitoi God tani ghaaita, me aue egheleita nongina ia. Ia o voto ateva egheegheleita ita masimasi. ³ Me karika ita masimasiaa nonga isaa o voto, karika. Ita masimasi tee nau ita ghaaghaa maamatana, ta poli ita kilakila va isaa o voto masina etaita, me esaasausita tani tingina akorokorongana. ⁴ Me arova ita tingina akorokorongana me ita tam mangoo vulu voto ita aikaaiia etana, isaa o voto aue esausi gheeleiaaita, me gheeleiaaita aue esausita tale voto

masinaaili ita taatara lao emua etaita. ⁵ Me nau ita aiesoa ngavalua o, uneita niaiesoaa karika eaapalataita poli ita kilakila va God aue eghelel isaa o voto, poli God ghe tau mae sio Spirit Manga ateva etaita tani apasu urunguitaniita tale kanna niaielousi eteva God.

⁶ Ta nau eteva karika righi sarasarakaniaaita tani aisausieinita, God ghe suoongaala nau eteva ta Karisto me ghe matela tani ghaa aoghita tau ngai ghelei ssavoto atoa. ⁷ Koronnaaili,aanasaaili tani tara teva taumattu erooroo tani mate tani sausi teva taumattu ghulughuluena. Me marova ita tara kateva taumattu egheelei masi voto, koti teva erooroo tani asarasarakanaia me emate tani sausia. ⁸ Me God ang ghe apasungaala namungaili ailousiaane etaita tale voto ateva toko: nau eteva ita ghe gheelei ssavoto, Karisto ghe matela etaita.

⁹ Raena ateva ghe akalala me ghe ghelei eghulughuluenaitala, me God ang ghe asetala va ghulughuluena ita. Liuna avalua o, ita kilakilaaili va, Iesu aue emene aisausieinita me aue ita saanga nau eteva God eapasunga sessaiaane ta tau ngai ghelei ssavoto atoa. ¹⁰ Tale nau ang ghe lange sio, ita tau ngai ssateena ita God me ghe gheleitala ghe kapuna itala tale matemateaane Natuna. Ia oia ang ghe kapuna itala God, ita kilakilaaili va maamauluaane Iesu aue easaangita. ¹¹ Me karika isaa nonga o, ta ita masimasi ta poli sa ateva God ghe gheleielmausi Vau eteva ta Iesu Karisto, ia Iesu Karisto ghe gheleitala va kapuna ita God.

Adam me Karisto

¹² Ssavoto ateva ghe mae sio tale kateva nonga taumattu, me ghe tau mae sio nimate. Liuna avalua o me nimate atae ghe ghaa akapala taumattu ngatoa tale kosa ateva, ta poli ila akapa laghe gheleila ssavoto. ¹³ Ssavoto ateva ang ghe aso vella tale kosa ateva me avirina God ghe tau mae sio inangari nipaopao. Me eaa karika righi inangari nipaopao, karika God enannaa kaluira ssavoto taumattu ngatoa la gheelei. ¹⁴ Ghe tiuala ta nau Adam me ghe mae sio ta nau Moses, nimate atae ghe ghaa akapaailila taumattu ngatoa, arongona ta uneira ssavoto karika nongina unna ssavoto Adam, ghe tam nongo usilaala God. Adam tootoona ia taumattu ngateva aue emae.

¹⁵ Ilalua o voto alua karika va ilalua aitauaa, kanna voto God ghe nim tau mae sio, me kanna ssavoto ateva Adam. Kateva nonga taumattu ngateva ghe gheleila ssavoto me orioeili taumattu ngatoa laghe matela. Me kanna voto God ghe nim tau mae sio ghe namungailila, me ghe nim tau lao sio masi voto ta orioeili taumattu ngatoa tale maamasinaane kateva nonga taumattu ngateva, Iesu Karisto. ¹⁶ Me tee kanna voto God ghe nim tau mae sio me kanna ssavoto kateva nonga taumattu, karika lalu lao aitauaa. Karika poi! Ia o kanna ssavoto ateva ghe gheleila me God ghe gheleila niaisakei ta taumattu ngatoa, me ghe uela va, “Aue la ghaa sesa aipolipoli.” Me kanna voto God enim tautau mae isaa avalua toko, nau eteva oroi taumattu ngatoa laghe gheleila ssavoto, God ghe aselala va ghulughuluena ila. ¹⁷ Kateva nonga taumattu ngateva ghe tam nongo usilaala God, me tale ia o kanna ssavoto ateva, nimate atae ghe aitoiaala taumattu ngakapa atoa. Me maamasinaane ateva God ghe nim tau mae sio ghe apalala sarasarakaniaane nimate atae, me ghe namungailila. Liuna avalua o me lo akapa atoa laghe ghaala

5:8: Jon 3:16; 1 Jon 4:10. **5:9:** Rom 1:18; 2:5; Ips 2:3-5. **5:12:** Aitiutiu 3:6; Rom 6:23.
5:13: Rom 4:15.

maamasinaane God, me God ghe aselala va ghulughuluena ila, aue la maulue, me la toka nongina tau ngai toitoi etoa tale uunguaane kateva nonga taumattu, Iesu Karisto.

¹⁸ Liuna avalua o me poli kateva nonga karika ghe usilaala God, me God ghe uela va taumattu ngakapa atoa aue la ghaa sesa aipolipoli. Tale ie nonga o ase salana atikirighi, kateva nonga ghe gheleila voto ghulughuluena me ghe ghelei eghulughuluenailala, me ghe tau lao sio maulue etaira. ¹⁹ Nongina taumattu ngakapa ghe tau ssavotola mausi kateva nonga taumattu ghe tam nongo usilaala God, tale ie nonga o ase salana atikirighi nau kateva nonga taumattu ghe nongo usilaala God, oroieili taumattu aue God egheleila va ghulughuluena ila.

²⁰ God ghe taula inangari nipaopao ta Moses tani apasunga ta taumattu ngakapa atoa me la roro tani tara va voto la gheelei sesa. Nau ssavoto ateva eoroi maamasinaane God emene ooroi tee lao. ²¹ Nongina ssavoto ateva eaaitoiaa uunguaa nimate ateva, maamasinaane God tee erooroo tani aitoiaa tale uunguaa nighulughuluena tani tau lao maulue ateva tokatoka liu ia, aue ita ghaaia ta Iesu Karisto Vauita ia.

6

Ssavoto karika eaitoieinita

¹ Sa ateva ita mene roo tani aulieinia? Aue ita mene ghelei oroieili ssavoto poli ita aloanna va maamasinaane ateva God aue emene lao tee? ² Karika poi! Poli ngita ghe matela, me ssavoto karika mene sarasarakaniaa etaita, me vaalua ita mene ghelei llo niuungu sesa? ³ Karika am kilakila va lo akapa atoa laghe ghaala niaasuu me la kateva nonga teela Karisto Iesu, me laghe ghaala niaasuu tale matemateaana? ⁴ Liuna avalua o me poli laghe kaieinita teela Karisto tale niaasuu me tale sarasarakaniaane Tamane ghe totuela tale nimate, ita tee aue ita mene toka tale ouna nitoka.

⁵ Karisto ghe matela, me ita ghe kateva nonga teeila tale matemateaane. Liuna avalua o me aue ita kateva nonga teeia tale tottotuaane. ⁶ Ta ita kilakila va maamauluaaita pokane ang ghe matela nau Iesu ghe matela tale aikotoo, tani apala sarasarakaniaane ssavoto tale maamauluaaita, liuna avalua o me karika ita mene tau ngai uungu tale ssavoto. ⁷ Nau taumattu ngateva ematemate, ssavoto ateva karika erooroo tani mene aitarainia.

⁸ Ita ghe mate teela Iesu Karisto, liuna avalua o me ita aiesoaa tee va aue ita toka teeia. ⁹ Poli ita kilakila va Karisto ghe totula tale nimate me karika aue emene mate. Liuna avalua o me nimate ateva karika righi sarasarakaniaane tani mene aitarainia. ¹⁰ Nau eteva ghe matela, katengaata ta ghe matela tani apala sarasarakaniaane ssavoto nau ekapa atoa. Me maamauluaane ghaine etokatoka tani tau sae God.

¹¹ Tale ia o salana atikirighi, am tani toka me am tani annaa va am ghe matela tale sarasarakaniaa ssavoto ateva me am maamaulue ta God poli Karisto Iesu. ¹² Liuna avalua o me karika am mene tau veluem va ssavoto ateva emuemueinam tale vilikiimim aue emate, poli am rau usilaa aloannaane vilikiimim. ¹³ Karika am mene tau lao kasina vilikiimim ta ssavoto va evoto tani ghelei llo sesaaili. Am tauem lao ta

God nongina lo atoa laghe totula tale nimate. Me am tau lao vilikiimim ta God, va evoto tani ghelei llo ghulughuluena. ¹⁴ Me ssavoto ateva karika emene muemueiniem, poli karika va am tokatoka tale inangari nipaopao, ta tale maamasinaane God.

Tau ngai uungu tale voto ghulughuluena

¹⁵ Sa ateva ita mene gheleia? Ita ghelei ssavoto poli karika ita tokatoka tale inangari nipaopao, ta ita tokatoka tale maamasinaane God? Karika poi! ¹⁶ Am kilakila va marova am tau veluem tani tau ngai uungu me nongo usilaa mene kateva aeue am tau ngai uungu etana. Karika am kilakila va lo ateva unonganongo usilainia, ia kapum namuu ia? Arova ssavoto ateva emuemueiniem, aeue am mate, me arova am nongo usilaa God, aeue am ghulughuluena. ¹⁷ Me akaakaili emasina ta God, poli kasina nau ang ghe lao sio am tau ngai uungu iem tale ssavoto, me tale urunguitaniimim akapa ateva am ghe nongo usilaala salana niapasunga am ghe ghaala. ¹⁸ Ngam ghe ruula tani tau ngai uungu tale ssavoto ateva, me ngam ghe tau ngai uungula tale salana ghulughuluena.

¹⁹ Aghaauliaa inangarighi tale kiukiu niaimatoonga poli karika alomasaanga iem tani kila. Nongina am ghe tautaula kasina voto tale vilikiimim tani ghelei niuungu karika raarangisana me ghe aasaesae llo karika masina, isaa oia, am taula tani ghelei niuungu tale llo voto ghulughuluena, aeue eamangaiem. ²⁰ Nau am ghe tau ngai uungu tale uunguaa ssavoto ateva, salana ghulughuluena karika ghe mue-mueinam. ²¹ Saa righi masi voto am ghe ghaala tale ase nitoka atea nau ghaine am paapalatainia? Aipolipoli tale isaa o voto nim nimate ateva. ²² Me ia oia ngam ghe ruula tani tau ngai uungu tale ssavoto ateva, me ngam ghe tau ngai nonganongo annala ta God ateva, me voto ngam ghaaghaa aeue ekatulainam lao tale nimanga, me airuuruu am ghaa maulue ateva tokatoka liu ia. ²³ Poli aipolipolina ssavoto ateva nimate ia, me voto ateva God enim tautaue mae, maulue ateva tokatoka liu ia, ie ta Karisto Iesu Vauita ia.

7

Inangari niaimatoonga tale nilai

¹ Kapughu etoa, aghaippooaa tee lo atoa la kilakila inangari nipaopao. Karika am kilakila va inangari nipaopao ateva matuutulienia ia ta lo ateva nonga taumattu karika ghe mate? ² Nongina avalua toko, vause ateva lailai ia, inangari nipaopao egheelei rungainia tee taitanna ateva nau taitanna ateva karika ghe mate, me arova taitanna ateva emate, isaa o inangari nipaopao karika mene righi uunguaane etana. ³ Me arova vause ateva ange mene lai ppaela ta mene kateva taita, me taitanna ateva karika ghe mate, aeue la ue va ghe lai sarila kateva manna ateva. Me arova taitanna ateva ang ghe matela, isaa o inangari nipaopao karika mene righi uunguaane etana, me karika aeue la ue va ghe lai sarila kateva manna ateva arova elai ta mene kateva ppaela taita.

⁴ Am tee, kapughu etoa, am ghe kateva nongala tale vilikina ateva Karisto, me am ghe mate teela Karisto, me inangari nipaopao karika mene righi uunguaane etaimim, me ngam ghe mene toka ppaela, tale

kateva ppae taumattu, ia o ghe totula tale nimate, liuna avalua o me aue ita kuneaa masi uene esae ta God. ⁵ Nau eteva ita ghe tokatoka tale aloaloanna vilikiita, aloaloanna vilikiita ghe muemueinita. Inangari nipaopao ateva ghe gheelei nannaaita ghe aloannaaili tani ghelei voto sesa. Liuna avalua o me voto ita ghe gheelei ghe tautau mae uene nimate atae. ⁶ Me isaa oia angita ghe mate vulula llo voto eposoposo rungainita, me inangari nipaopao karika eroo tani mene ghelei rungainita, me ita uungu tale ouna atikirighi salana kanna ia Spirit Manga ateva, me karika tale pokane atikirighi salana laghe pitiela tale inangari nipaopao.

Niaissarakaa tee ssavoto

⁷ Sa ateva ita mene aulieinia? Inangari nipaopao ateva ssavoto ia? Karika poi! Poli karika aue aghele kila ssavoto arova karika inangari nipaopao. Me karika aue aghele kila va tani saa ia nissaii eteae arova inangari nipaopao karika eaauliaa va, "Urau mene ssaii." ⁸ Poli ssavoto ateva ghe tarala salana atikirighi tale inangari nipaopao, me ghe alutula asease nissaii etaghi. Me arova karika inangari nipaopao, ssavoto ateva karika righi sarasarakaniaane. ⁹ Nau karika teva inangari nipaopao aghe maamaulue, me nau inangari nipaopao ghe mae sio, ssavoto ateva ghe mauluela ¹⁰ me aghi aghe mateka. Aghe nannaia va ia o inangari nipaopao ateva, aue ghe rooroo tani tau mae maulue, me karika, ta ghe nim tau mae sio nimate. ¹¹ Ssavoto ateva ghe tarala salana atikirighi tani kameaghi tale inangari nipaopao tani gheleieghi me amate. ¹² Ia avalua o me inangari nipaopao ateva manga ia, me kateva kateva tale inangari nipaopao, manga, ghulughuluena me masina.

¹³ Vaalua, emaamalloeana va voto masina etautau mae nimate etaghi? Karika poi! Ta ssavoto ateva taumattu ngatoa la tara kilaia va ssavoto ia, etautau mae nimate etaghi tale voto masina. Isaa avalua o me tale inangari nipaopao, ssavoto ateva sesaaili ia, elaulaueili lao.

¹⁴ Ita kilakila va inangari nipaopao liuena ta God; me aghi, nim taumattu ieghi tale kosa ateva oia, me aghi tau ngai uungu ieghi tale ssavoto ateva. ¹⁵ Karika aghaalomasaanga tee voto agheelei, poli voto aghaloanna tani ghelei, karika agheeghelei, me voto karika aghaloanna tani ghelei agheeghelei. ¹⁶ Me arova aghelei voto karika aghaloanna tani ghelei, aghasokoi va inangari nipaopao masina ia. ¹⁷ Nongina avalua o, karika va aghi agheeghelei, ta poli ssavoto ateva etokatoka etaghi egheeghelei. ¹⁸ Akilakila va karika righi masi voto etokatoka etaghi, gheeleiaaghi sesa, poli aghaloanna tani ghelei voto masina, me karika arooroo tani ghelei. ¹⁹ Poli aghaaloanna tani ghelei masi voto me karika agheelei; me karika aghaaloanna tani ghelei sesa voto, me anim toka gheelei. ²⁰ Arova agheeghelei voto karika aghaloanna tani ghelei, karika va aghi agheelei, ta ssavoto ateva etokatoka etaghi, ia egheeghelei.

²¹ Liuna avalua o, aghe tarala va isaa o ninannaa emuemueinaghi: nau aghaloanna tani ghelei masina, karika arooroo tani ghelei, ta voto sesa etokatoka etaghi. ²² Isaa avalua o me tale nannaaghi, aghailousiangaili inangari nipaopao kanna God. ²³ Me amene taatara mene kateva ppae voto sarasarakania ia euungu tale kasina vilikighi,

eaaiuvii tee nannaaghi, me egheegheleieghi akaakaravusu tale ssavoto euungu elome tale vilikighi. ²⁴ Alousiusi ta ngetaghi! See aue eroo tani asaangieghi tale ia oia viliki eteva etautau mae nimate? ²⁵ Akaakaili emasina ta God poli ghe asaangieghila tale uunguaane Iesu Karisto Vauita ia! O tale nannaaghi, aghi akaakaravusu tale kanna inangari nipaopao God, me tale vilikighi, aghi akaakaravusu tale sarasarakanianane ssavoto ateva.

8

Nitoka tale sarasarakaniaane kanna Spiriti eteva God

¹ Liuna avalua o me ghaine lo atoa la tokatoka ta Iesu Karisto, God karika emene tautaula sesa aipolipoli etaira. ² Poli ta Karisto Iesu, sarasarakaniaa Spiriti eteva etautau aatu maulue ateva, me ghe ghaa veluola* tale sarasarakaniaa ssavoto ateva etautau aatu nimate. ³ Ta kanna inangari nipaopao Moses karika ghe roola tani asaangita, poli sesa gheeleiaaita ghe gheleila inangari nipaopao karika sarasarakan, me karika ita rooroo tani aimuli tee. Liuna avalua o me God ghe mene tau mae sio kateva voto tani asaangita, ghe suula Natuna tuunga ateva tani toka nongina ita taumattu ngatoa tale kosa ateva oia, tani mate tale kaluita ssavoto. Liuna avalua o me God ghe attara matanelia ssavoto ateva tale vilikina Karisto, me ghe ruula sarasarakaniaa ssavoto ateva. ⁴ Karisto ghe ghelei ekapala voto ghulughuluena inangari nipaopao eue va ita ghelei, me karika ita mene toka tale nim sesa gheeleiaaita, ta ita aimuli tee Spiriti eteva.

⁵ Lo atoa taumattu la nim tokatoka tale sesa gheeleiaaira aue la nnaa nonga sesa aloannaaira, me lo atoa Spirit Manga ateva emuemueinila la nnaa nonga masi niuungu Spirit Manga ateva ealoanna va la ghelei. ⁶ Marova sesa aloannaita emuemueinita tale ninannaa, aue ita mate. Me marova Spiriti eteva emuemueaa aloannaita, aue ita ghaa maulue me luei. ⁷ Poli sesa aloannaita eaaiuvii tee aloannaane God, poli karika erororo poi tani nongo usilaa kanna inangari nipaopao God. ⁸ Ia avalua o me lo atoa la aimuli tee sesa aloannaaira karika la rooroo tani amasimasi God.

⁹ Am karika va am mene tokatoka tale sesa aaloannaimim, ta tale Spirit Manga ateva kanna ia God, arova ia etaimim. Me marova lo atoa taumattu Spiriti eteva kanna ia Karisto karika ia etaira, karika poi va kapuna ila Karisto. ¹⁰ Aue vilikiimim emate poli ssavoto, me marova Karisto ia elome etaimim, aue Spiriti eteva etau aatu maulue, poli Karisto ghe ghelei eghulughuluenaemla. ¹¹ Me marova Spiriti eteva kanna ia lo ateva ghe totula Iesu tale nimate etokatoka etaimim, ia o God ateva ghe totula Karisto tale nimate, aue emene tau aatu tee maulue tale isaa o vilikiimim ematemate, tale kanna Spiriti eteva ia etaimim.

¹² Liuna avalua o, kapughu etoa, kateva voto ita ghelelei, ita rau mene usilaa sesa aloannaita. ¹³ Ta marova am toka tale sesa aaloannaimim aue am mate, me marova, tale sarasarakaniaa Spiriti eteva, am uvi emate sesa gheeleiaa vilikiimim, me aue am maulue, ¹⁴ poli lo atoa kapuna Spiriti eteva God ekaakatulainila, ila natuna ila God. ¹⁵ Poli

7:25: 1 Ko 15:57. * **8:2:** veluo Kasina uru ngai laghe pitila, laghe ue va velueghi. **8:4:** Gal 5:16, 25. **8:9:** 1 Ko 3:16; 12:3. **8:10:** Gal 2:20. **8:13:** Gal 6:8; Kol 3:5. **8:15:** 2 Tim 1:7; Mak 14:36; Gal 4:5-7; Aotu 21:7.

karika va am ghe ghaala Spiriti eteva tani gheleiem va am mene tau ngai uungu tani matautu, ta am ghe ghaala Spiriti eteva eaapasunga va am natuna am God, me ta ngetana ita aseasea va, “*Abba, Tamaghi.*”[†] ¹⁶ Poli kapuna Spiriti eteva God emaemae aitaaua tee uneita ateva spirit tani aulia ngaotu va ita natuna ita God. ¹⁷ Me poli ita natuna ita, aue ita ghinaghina masi voto God ghe tau lao sio ta Natuna ta Karisto, me marova ita ghaa tee nimmarikana nongina Iesu, auena ita toka teeia tale ararimangalina ateva God.

Masi nitoka auena

¹⁸ Aghi akilakila va isaa oia nimmarikana ghaine ita ghaaghaa, karika poi erooroo tale masi voto auena God eapasunga etaita. ¹⁹ Poli voto akapaaili God ghe gheleila la toitoi me la aloannaaili tee tani tara nau eteva God aue eapasunga va see atoa natuna ila God. ²⁰ Poli voto akapaaili ghe gheleila ang ghe tokala tale kanna nikasikiena God, karika va tale aloannaaira, ta tale aloannaane God. God ghe atokailala tale kanna nikasikiena nau eteva ghe kilala va ²¹ voto akapaaili ghe sesala aue emene toka amasina, me aue la ghaa aitaaua tee natuna atoa God voto masinaaili me karika aue la mene mauu.

²² Ita kilakila va isaa akapaaili voto God ghe gheleila la ngangngalaa nimamarikana nonginaaili vause ateva eanna tani molenaa, lomosina ta nau ghaine. ²³ Me karika va ila nonga, ta ita tee lo atoa ita ghe ghaala tee Spiriti eteva, aitiutiu ia tale kanna inangari nialokoi God. Ita ngangngalaa nimmarikana elome etaita, nau ita toitoi God tani apasunga va ita ang ghe natuna itala, me aue eghaa oghi vilikiita. ²⁴ Nau ghe asaangitala, ghe tau mae sio isaa o inangari nialokoi, me ita toitoi isaa o inangari nialokoi va etani lutu ekoronna etaita. Me marova ngita ghe ghaala sa ateva ita aloannaia emaemae auena emua, karika righi malloeana tani toka toitoi voto emaemae emua. Karika teva etoittoi voto ang ghe ghaala. ²⁵ Me marova ita aiesoangaili tale saa voto llo ita ghe tam ghaa, ita kaarasi tani toitoi me aue ita ghaa.

²⁶ Ta ia nonga o salana atikirighi, Spiriti tee ateva esaasausita nau ita tam sarasarakana, poli karika ita kilakila tee saa voto tani loo sae, me ia Spiriti eteva eloooloo sae mausiita tani aulia ngamasinaaili inangari ita tam rooroo tani aulia ngamasina. ²⁷ Me God ekilakilaaili voto tale urunguitaniita, me ekilakila tee nannaane Spiriti eteva, poli Spiriti eteva eaaimatoonga kapuna taumattu ngatoa God tani looloo sae tani kkolomi voto tale aloannaane God.

²⁸ Me ita kilakila va isaa akapaaili voto God euunguaa tale maamasina lo atoa la ailousieinia me ghe suimatoongainilala, tani ghelei voto tale masi aaloannaane. ²⁹ Ta isaa o llo taumattu God ghe kila akasinailala me ghe suitoongainilala va aue la nongina Natuna ateva, liuna avalua o me Iesu aue tueira mue ia me aue oroi nengane. ³⁰ Ta lo atoa God ghe suimatoongainilala, ghe kololala tani mae etana, me lo atoa ghe kololala, ghe ghelei eghulughuluuenaila, me lo atoa ghe ghelei eghulughuluuenaila, ghe gheleilala va nongina Natuna ta Iesu.

Karika righi voto erooroo tani atoka apolapolaita tale aielousiaane ateva God

† **8:15:** Tale inangari nge Aramaik, “*Abba*” malloeana va “*Tamaghi*”. **8:16:** 2 Ko 1:22. **8:20:** Aitiutiu 3:17-19. **8:23:** 2 Ko 5:2-4. **8:27:** Sams 139:1. **8:28:** Ips 1:11. **8:29:** Kol 1:18; Hib 1:6.

³¹ Liuna avalua o me tale isaa o voto, sa ateva ita roo tani mene aulieinia? Marova God etokatoka aitauaa teeita, see ae eroo tani tau ngai ssateeita? ³² God karika ghe arongila Natuna ateva, ta ghe tauue sio mae nongina aiaavusuvusuena ateva etaita akapaaili. Liuna avalua o me ta ngetana, God ae etaue mae isaa akapaaili voto masinaaili etaita. ³³ See ae eghelei niaisakei ta lo atoa God ang ghe suimatoongainilala? Poli God ang ghelei eghulughuluenuailala. ³⁴ O see ae emene tau mae etaita sesa aipolipoli mausi ssavoto? Poli Karisto Iesu ghe matela me God ghe totuela, me ia ghaine etokatoka tale pai muenna ativilau ta God tani sama tee God mausiita. ³⁵ See ae eroo tani atoka apolapolaita tale aielousiaane ateva Karisto? Karika teva, nongina sesa nau, o nau ita ateateaa nimmarikana, o nau la gheelei saasakiaa ta ngetaita, o nimaloo, o nau karika rooroona ia kalicita, o voto sesaaili eanna tani amataututa tale nimmarikana, o nimate. ³⁶ Nongina Uru ngai Manga ateva eaauliaa va,

“Mausim me ami sousou nimate tale isaa akapa o nau,
ami laghe annaa va ami nongina sipsipi etoa tani uvi ematela.”

³⁷ Tale isaa akapaaili o voto, ita tau ngai apala ita ta ngetana lo ateva ghe aielousieinalta. ³⁸ Ta aghi aghaiesoangaili va karika nimate, o maulue, o ensolo atoa, o spiriti etoa, me tee tale isaa oia nau o auena, me asease nisarasarakana, ³⁹ me karika va tale elomarase o isaa oia euu tale kosa ateva, o isaa akapaaili voto God ghe gheleila eroo tani atoka apolapolaita tale aielousiaane ateva God, ghe mae sio ta Karisto Iesu kapuita Vau palepale ia.

9

Taumattu ngatoa God ghe suimatoongainilala

¹ Aghi apoppoaa voto koronna isaa ta Karisto, karika va akamekame, me Spirit Manga ateva eaasokoi tee tale nannaaghi. ² Urunguitanighi eteva namungaili nialousiusi me mmarikana etokatoka etana. ³ Aghaloanna va God eghaa oghi kapughu etoa, mangalighi ila, me arova God eghelei evalua o, amasimasi tani ghaa nikasikieno kanna God, tani atoka apolaiieghi ta Karisto, tani ghaa liuira. ⁴ Taumattu nge Israeli etoa, God ghe suimatoongainilala va natuna etoa, me ghe apasunga ngaotula sarasarakanianee ateva etaira, me ghe tau lao sio inangari niaippooa ngaitaua ngatoa, inangari nipaopao, salana koronna tani kkaua, me inangari nialokoi etoa. ⁵ Tuvuna ila Abraham, Aisiki me Jekop, me ta ngetaira, Mesaea ngateva ghe lutu eloi mae sio etaira. Karisto Goto ia, eaaitoiaa voto akapaaili, liuna avalua o me ita tani taue sae nau ekapa atoa. Koronna!

⁶ Poli karika va God ghe tam aimuli teela inangarina. Karika va taumattu ngakapa atoa laghe lutula tale ararimangali eteva eIsrael, va kapuna ila God. ⁷ Me karika va tuvuna akapa atoa Abraham koronnaaili va natuna ila Abraham. Ta God ghe uela ta Abraham va, “Tuvum atoa aue la lutu eloi mae ta Aisiki.” ⁸ Malloeana inangari va karika va lo atoa la nim lutulutu nongina arau va natuna ila God. Ta lo atoa God ghe auliaala inangari nialokoi va aue etaula mae, ila aue natuna ila. ⁹ Ta God ang ghe auliaala inangari nialokoi va, “Aue amene mae llo too

ninamanama nongina ghaine ngamae sio, me Sera ue eghaa lo ateva o aliki taita ia.”

¹⁰ Me karika va isaa nonga o, ta Rebeka tee natuna ghalua tamairarua nonga kateva, Aisiki tamaita ia. ¹¹ Auena palua alua lalu ghe lutu o ghelei righi voto sesa o masina, God ghe auliaala inangari eteva ta Rebeka. Ia o inangari eteva eaapasunga va God esuisuimatoongaa tau-mattu tale aloannaane, ¹² karika va tale niuungu, ta poli kolokoloaane God. God ghe uela ta Rebeka va, “Aue natum mua ateva euungu ta natum aiaaghhaluene ateva.” ¹³ Nongina Uru ngai Manga ateva eaauliaa va, “Jekop aghe ailousieiniela, me Iso aghe ratiela.”

¹⁴ Sa ateva ita mene aulieinia? Aue ita ue va God egheeghelei voto karika ghulughuluena? Karika poi! ¹⁵ Ghe uela ta Moses va, “Aue aghapasunga alousiusiaaghi tale lo ateva taumattu aghaloanna tani atasunga etana,

me aue aghalousiusi tee lo ateva aghaloanna tani alousiusi teeia.”

¹⁶ Liuna avalua o me God egheelei tale alousiusiaane, karika va tale saa llo taumattu ngatoa la ghanna o la ghanna tani ghelei. ¹⁷ Tale Uru ngai Manga ateva God ghe uela ta Peroo va, “Aghi aghe gheleiolaa va io namuu io, poli aghe aloannala va uapasunga sarasarakaniaaghi, me taumattu tale ia akapa kosa ateva la roo tani ppooa ngaotu ararighi eteae.” ¹⁸ Liuna avalua o me God eaapasunga alousiusiaane ta lo ateva eanna tani apasunga ailousiaane, me egheelei ekorokorongana urunguitanina lo ateva ealoanna tani akorokoronganai.

¹⁹ Kateva etaimim aue eue etaghi va, “Vaalua me etaatara kaluita ssavoto? Karika teva aue erooroo tani usilaa nannaane me etam usilaa nannaane God.” ²⁰ Me io see, taumattu io, ualoanna tani sau paane God? “Voto ateva kateva egheelei, erooroo tani ue ta lo ateva ghe gheleielaa va, ‘Vaalua me ughe ghelei evalueieghi o?’” ²¹ Tau ngai ghelei sospena ateva egheelei sospena ateva tale kosa erooroo tani ghelei ghalua sospena tale ia nonga o tuku kosa ateva, kateva tale kasina ase nivelu eitaauaa, me kateva tale nim nau etoa.

²² Tale ia o salana atikirighi God ealoanna tani apasunga sessaiaane me etau velu taumattu ngatoa la tara sarasarakaniaane me karika, ta ekaakaarasi tani tojisaa o taumattu esessaia etaira. Isaa o taumattu God ghe aimonomonosiaala va eturungila. ²³ God egheelei isaa o voto tani apasunga ngaotu oroieili kanna mallanga ta lo atoa ghe apasungaala alousiusiaane etaira, ghe aimonomonosia ngakasinailala va ila tee aue la toka teeia tale mallanga ngepona liu. ²⁴ Me ita tee elome ta lo atoa ghe suitoongainilala, karika va ajiu nonga atoa, me lo atoa karika va ajiu ila. ²⁵ Nonginaaili God ghe auliaala ta vuku eteva ta Osea va, “Aghi aue aghaselaa va ‘kapughu ila’ lo atoa karika va kapughu ila,

me aghi aue akoloa va aghailousieinia, lo ateva karika aghe ailousieniela.”

²⁶ Me ghe mene auliaa teela va,

“Me tee tale ia o voto ateva aghe uela etaira va,
‘karika va kapughu taumattu iem,’
aghi aue amene asela va

‘natuna ila God ateva etautau maulue.’”

²⁷ Aisaea ghe sama anamuula tani ppooaa ta aIsraeli etoa va,

9:12: Aitiutiu 25:23. **9:13:** Mal 1:2-3. **9:15:** Eks 33:19. **9:16:** Ips 2:8. **9:17:** Eks

9:16. **9:20:** Ais 29:16; 45:9. **9:21:** Jer 18:6. **9:25:** Osea 2:23. **9:26:** Osea 1:10.

9:27: Ais 10:22-23.

“Arongona ta taumattu nge Israeli etoa oroieili ila nongina rira ateva elosamarra,

karika oroi ila lo atoa aue la saanga.

²⁸ Poli Vau palepale ateva aue eailuilui

tani ghelelai niaiskei me tani turungi ekapaaili taumattu tale kosa ateva.”

²⁹ Nongina Aisaea ang ghe auliaala emua arau va,

“Marova Vau ngepona ateva sarasarakananaili ia

ghe turungi ekapala tuvuita atoa

me ghe tam asaangila toa

aue ita ghe nongina eSodom me eGomorra.”

Alraeli etoa laghe tam aikaiaia

³⁰ Sa ateva ita mene aulieinia? Arongona ta taumattu ngeleka atoa laghe tam paepae salana tani ghulughuluena ta God, me karika, ta laghe ghulughuluena ta God, poli tale uneira niaikaiaia isaa oia voto ghe lutula. ³¹ Me ta aIsraeli etoa laghe uungu aanasaili tani aimuli tee inangari nipaopao tani ghulughuluena, me karika laghe rooroo. ³² Ta poli saa? Poli laghe anna nighulughuluena tale niuungu laghe ghelei, me karika va tale niaiesoaa ta God. Laghe ttukainilala tale atu eteva etapaa salana. ³³ Nongina Uru ngai Manga ateva eaauliaa va,

“Tarala, aghe atokala atu eteva eSaeon va eghelei taumattu ngatoa tani ttukainila

me atu eteva eghelei taumattu ngatoa la katuu.

Me lo ateva eatoka tuutulina etana karika aue eghaa nipalata.”

10

¹ Kapughu etoa, tale urunguitanighi eteva, anannangaili me alooloo sae va God easaangi Alraeli etoa. ² Poli akilakilaailiila, liuna avalua o me aue va sarasarakananaili ila tani aimuli tee niuungu God ealoanna, me karika la kilakila amasina aloannaane God tani ghelei. ³ Karika laghe kilakila salane God tani ghelei eghulughuluenaila ta matane God, me laghe aloanna tani ghulughuluena tale sarasarakananaira, liuna avalua o me karika laghe usilaala salane God tani ghulughuluena. ⁴ Karisto ang ghe ghelei ekoronnala me ghe ghelei roorooaala inangari nipaopao, liuna avalua o me lo akapa atoa la aikaiaia ta Karisto, ila ghulughuluena ila ta matana God.

⁵ Moses ghe aulia ngamasalikala vaalua tani ghulughuluena tale uunguaa inangari nipaopao va, “Taumattu ngateva egheeghelei isaa akapa o voto tale inangari nipaopao, aue eghaa maulue tale isaa o voto.”

⁶ Tani ghulughuluena tale uunguaa niaikaiaia eue va, “Urau mene ue tale urunguitanim ateva va, ‘See erooroo tani sae epona liu?’ ” (Ia o malloeana va usiosioaa Karisto tale kosa ateva oia.) ⁷ “O, ‘See erooroo tani sio arau euu tale voto ateva liuira ia matena atoa?’ ” (Ia o malloeana va ughaghahaa oghi Karisto tale nimate.) ⁸ Sa ateva eaulieinia?

“Inangari oia kalakalanginaaili etaimim,

isaa elome tale paaimim me urunguitaniiimim,”

va, inangari niaikaiaia isaa oia ami aaulia ngaotu. ⁹ Va, arova uaulia ngaotu tale paam ateva va, “Iesu ia Vau ngepona ia,” me uaikaiaia tale urunguitanim ateva va God ghe totuela tale nimate, aue usaanga.

¹⁰ Poli tale urunguitanim uaiesoaa me ughulughuluena ta matane God, me tale paam ateva uaulia ngaotu me aue usaanga. ¹¹ Nongina Uru ngai Manga ateva eauliaa va, “Lo atoa taumattu la atoka tuutuliira etana, karika la rooroo tani ghaa nipaleta.” ¹² Poli karika teva voto epolapola ajiu etoa me taumattu ngeleka atoa. Kateva nonga ia kapura namu ngateva Vauita akapaaili ia. Me earangise taumattu ngakapa atoa nau la kolokolo tau ararina ateae, ¹³ poli, “Lo akapa atoa taumattu la kolokolo tau ararina ateae Vau ngepona ateva, aue la saanga.”

¹⁴ Me, arova la tam aikaiaa etana, vaalua aue la kolomia tani sausila? Me vaalua aue la aikaiaa ta lo ateva karika laghe nongoa? Me vaalua aue la nongo arova karika poi teva ghe auliaa etaira? ¹⁵ Me vaalua aue la ppoaa arova la tam sungila? Nongina Uru ngai Manga ateva eaauliaa va, “Masinaaili tani tara taumattu ngatoa la mae sio tani ppoaa masi kiukiuna God.”

¹⁶ Me karika va aIsraeli ekapa atoa laghe nongo usilaala isaa oia masi kiukiui. Poli Aisaea ghe uela va, “Vau eteva, see ang ghe aikaiaala inangariimami?” ¹⁷ Liuna avalua o me ita kilakila va niaakaiaa emaemaе nau ita nonganongo inangari, inangarina ateva Karisto.* ¹⁸ Aghanna tani kolomi va, koti karika laghe nongo isaa oia inangari? Va karika, angila ghe nongola:

“Lingi ngaloira ang ghe lao akapa see sio tale kosa ateva
me inangariira ang ghe lao akapa see sio tale airuuruu tale kosa
ateva.”

¹⁹ Mene kateva uneghi nikokkolomi, koronna va aIsraeli etoa karika la kilakila malloeana isaa oia inangari? Moses ghe aitiutiula tani auliaa va,

“Aue aghaa lo atoa taumattu karika tue ngarariira, ila arau euu, me tale
ia o salana atikirighi aue aghelei am aittureaa teeila,
me karika tani masina alomasaanganiaairaa, me tale ia o salana
atikirighi aue aghelei nannaaimim esessaaili.”

²⁰ Aisaea ghe aulia ngasarasarakanaaailila va,
“Taumattu ngatoa karika laghe paepaeaghi, angila ghe sakaiaghila.
Ngaghe apasungainaghila ta taumattu ngatoa, karika laghe
paepaeaghi.”

²¹ Me ta aIsraeli etoa ghe uela va,
“Nau ekapa atoa, aghe pulapula nimaghi tani koloaa
taumattu ngatoa karika la nonganongo usilaa me makatakatanna
ila.”

11

God ghe apasungaala ailousiaane ta aIsraeli etoa

¹ Aghanna tani kolomi, koronna va God ang ghe ratila kapuna taumattu ngatoa? Karika poi! Ta aghi tee aIsraeli ieghi. Abraham tuvughi ia, aghi tee elome tale ararimangali eteva ta Benjamin. ² God karika ghe ratila kapuna taumattu ngatoa, ta ghe suimotoongainilala emua arau, me avirina ghe gheleila kosa ateva. Am kilakila sa ateva Uru ngai Manga ateva eaulieinia nau eaauliaa Elaija, nau ghe auliaa sae ta

10:11: Ais 28:16. **10:12:** Apos 15:9. **10:13:** Joel 2:32. **10:15:** Ais 52:7. **10:16:** Ais 53:1. *

10:17: Karisto Kasina uru ngai laghe pitila, laghe ue va, God. **10:18:** Sams 19:4.

10:19: Diut 32:21. **10:20:** Ais 65:1. **10:21:** Ais 65:2. **11:1:** 1 Sam 12:22; Sams 94:14;
Plp 3:5.

God gheeleiaaira aIsraeli etoa karika masina. ³ Ghe ue va, “Vau ngepona ateva, ngila ghe uvi emate akapala kapum propete atoa me laghe tturuula unem liu nigheli aiaavusuvusuena atoa. Me aghi nongaili ngaghele oghi etokala me ghaine la aloannaaili tani uvi emateaghi tee.” ⁴ Me saa ailiuli God ghe tauet lao sio etana? Ghe uela va, “Karika. Kapughu ghaitu airari (7,000) taita karika poi laghe suuiaa patu kkeira tani kkaua goto ateva ta Baal kamena ia.” ⁵ Tale ie nonga o salana atikirighi tale nau etiulu oia, katoa aIsraeli la nongonongo usilaa God, poli ghe suilala va kapuna ila, me ghe apasungaala maamasinaane etaira. ⁶ God esuisuitoongaa taumattu tale maamasinaane ateva, me karika tale voto laghe uunguaala. Poli arova God esuisuitoongaa taumattu tale voto la gheelei, maamasinaane ateva karika va nongina voto ateva enim tautau mae.

⁷ Liuna avalua o me sa ateva ita mene aulieinia? Taumattu nge Israeli etoa karika laghe ghaala sa ateva laghe paepaea. Katoa nonga taumattu God ghe suoongainilala laghe saopiela; me lo akapa atoa God karika ghe suoongainilala, ghe gheleilala va la volovolongina nau eteva ekolokolola. ⁸ Nongina Uru ngai Manga ateva eaauliaa va, “God ang ghe tauet lao sio niasekanue atuae la lullusu saasakiaa etana, ang ghe sum rungaala mataira, va karika la mene taatara, me ghe ghelei evolovolonginailala me la tam rooroo tani non-gonongo, lomosina ta ange ghaala ghaine.”

⁹ Me Deivit ghe uela va,
“Tau vella uneira tevoo ateva pasu ia tale inana enongina va airrekati ia,
me tarapa ateva etaira aue eghelei nannaaira la nnaa va voto akapa masina.

Tau vella isaa o inana la namanama egheleila me la katuu
me la ghaa aipolipoli tale sesa voto laghe gheelei.

¹⁰ Tau vella mataira esaurrom me karika aue la roo tani taatara,
me tau vellala la tau ngai uungu nau ekapa atoa.”

Taumattu ngeleka atoa aue la saanga

¹¹ Isaa avalua o me, aghanna tani mene kolomi va, nau ta aJiu etoa laghe katuala, laghe katuu laalaa liula? Karika poi! Poli laghe gheelei ssavoto, me God ghe asaangila taumattu ngeleka atoa. God ghe ghelei evaluela o poli ghe aloannala va tale isaa o voto ajiu etoa la ssaiila. ¹² Poli ajiu etoa laghe gheleila ssavoto me laghe katuu vulla, niarangise ateva namungaili ia ghe mae sio tale kosa ateva me ta taumattu ngeleka atoa tee. Me nau eteva ajiu etoa God ghe suilala la oghi mae ta God, God aue eghelei voto masinaaili ta taumattu ngakapa atoa aue elau ia o niarangise ateva.

¹³ Tale voto aghaloanna tani auliaa ghaine, elao lao etaimim taumattu ngeleka atoa. Aghi auungu ta apostolo ieghi ta taumattu ngeleka atoa, me amasimasiangaili niuungu eteva agheeleia. ¹⁴ Me koti arooroo tani ghelei nannaaira kapughu ajiu etoa me la tara ssaiila me aue arooroo tani asaangi kasina etaira. ¹⁵ Poli nau God ghe tam aloannailala, God me kosa ateva lalu ghe mae aitauaa sio me ghe lueiluelua. Me

vaalua aue nongina, nau eteva God aue emene ghaaila? Aue enim nonginaaili matena ateva taumattu emene maamaaulue! ¹⁶ Arova tuku mata ngemua ateva verete la taue lao ta God me ange amangaiela, ia akapaaili verete eteva manga ia. Me arova oa ngai eteae manga ia, laangina tee atoa manga ila.

¹⁷ Taumattu nge Israeli etoa nongina ai oliv atea laghe pasaiela tapaa ngutana, me God ghe sai vella kasina tana laangina. Me am taumattu ngeleka atoa nongina ai oliv atea ghe nim pinosala, God ghe ghaala kasina laangina me ghe atokaila lao sio tale ai oliv atea me aue la roo tani ghaa niarangise tale oane ia o ai oliv atea. ¹⁸ Am rau mene saeaa nannaaimim poli God ghe sai vella kasina laa ngai me ghe atokaiemla tani ghaa liuira. Am nongina va nim laangina am, karika va am, am aasarasarakana oane, ta oane easarasarakanaiem. ¹⁹ Me katoa etaimim aue la ue va, “Ue, ta laane ai eteae ghe sai vella eaapasunga va aue ami ghaa liuira ila o taumattu ngatoa.” ²⁰ Koronnaaili, me God ghe sai vella poli karika laghe aaiesoaa. Me am poli am aaiesoaa, isaa avalua o me am tokatoka tale voto ateva laghe tokatoka akasina etana. Me am rau mene saeaa nannaaimim, poli ngam ghe ghaala liuira; ta am matauta voto God erooroo tani ghelei. ²¹ Am mnaa va emua arau God karika ghe tau vella isaa o laa ngai ghe aipatolaa lao tale ia o ai eteae va la toka nongina laghe tokatoka akasina. Am nongo! Tale ia o salana atikirighi God erooroo tani tau velu teeiem.

²² Am tani nna ngamasina va God egheelei masi voto me erooroo tani ghelei tee kasina voto tani attara mataneiem. Eaattara matane lo atoa la gheelei ssavoto, me aue egheelei masina etaimim — arova am toka akorokorongana tani atoka tuutliimim tale alousiusiaane; arova karika, am tee aue eghaa veluem. ²³ Me aIsraeli etoa, arova la aikolikoliaa me la aiesoaa, God aue mene atokaila nongina laghe sai vellala, ta poli God erooroo tani mene atokaila lao. ²⁴ Am taumattu ngeleka atoa, am nongina isaa o laa ngai tale ai oliv atea karika laghe pasaiela, ta ghe nim pinosala etapaa tuvui, me God ghe sai veluemla, me ghe atokaiem lao sio tale kateae ppae ai oliv, God ghe pasaiela tapaa ngutana. Liuna avalua o me koronnaaili erooroo tani ghaa isaa o llo tani laangina ai eteae me emene aipatolaala lao tale aina tuunga atea nongina laghe tokatoka akasina.

Ila akapa aIsraeli etoa aue la saanga

²⁵ Kateva voto koronna ia, aisulianna ia, karika ita ghe kilaiela emua arau. Kapughu etoa, aghaloanna va am kilaia. Me karika am mene tau sae nannaaimim. Ia avalua toko va, kasina tana taumattu nge Israeli, urunguitaniira korokorongana, me isaa oia voto aue enim toka lomosi ta ila akapa taumattu ngeleka atoa God ghe kololala, la mae ta Karisto. ²⁶ Me ia akapa ararimangali eteva eIsraeli aue la saanga avalua toko, nongina Uru ngai Manga ateva eaauliaa va,

“Lo ateva tau ngai asaangiita ia, aue emae eSaeon,

me aue egheelei tuvuna atoa Jekop la kiri tale uunguaa nitam nongo usilaa God,

²⁷ me aue aghelei ia oia niaippooa ngaitaua ngateva teeila,
nau aghaa velu kaluira ssavoto.”

28 Ta poli laghe ratila masi kiukiu, aIsraeli etoa tau ngai ssateena ila God, me isaa o voto aue emasina etaimim taumattu ngeleka atoa. Me poli God ghe suoongainilala, ila kapuna ila mausi tuvuira atoa ta Abraham, Aisiki me Jekop. 29 Poli God karika eikolikoliaa nannaane tale taumattu ekolokolo, me eaarangiseila. 30 Me ta ngetaimim tau-mattu ngeleka atoa, am ghe tam nongo usilaala God tale isaa too nau ang ghe lao sio, me ghaine ngam ghe ghaala alousiusiaane God, poli aIsraeli tee atoa laghe tam nongo usilaala. 31 Nim nongina avalua o, poli tale alousiusiaane God am ghe ghaaiela, aIsraeli etoa angila ghele liula viliira ta God, me aue ila tee la roroo tani ghaa aalousiusiaane ateva God. 32 Ta poli God ang ghe tau vella uunguua nitam nongo usilainia va aue eakaravusu taumattu ngakapa atoa, me aue eapasunga alousiusiaane etaira akapa.

Ita kkaua God

33 Koronnaaili, God masinaaili ia ta taumattu ngakapa atoa,
me tee God alomasaangaaili ia,
me ekilakila voto akapaaili!

See erooroo tani aulia ngaotu voto ange aaloanna tani gheelei?
Karika poi ita roroo tani kila salane.

34 Nongina Uru ngai Manga ateva eaauliaa,
“Karika teva ekilakila vaalua Vau ngepona ateva enannaa.
See erooroo tani taula alomasaanga me niloeloe etana?”

35 “See ghe nim tau lao sio righi voto ta God,
me aue God eliu isaa o voto etana? Karika poi.”

36 Ta poli God nonga ghe ghelei akapaailila voto atoa,
me voto akapaaili etokatoka tale sarasarakaniaane,
me ia kanna akapaaili isaa o voto.
Ita tau sae ararina ataeae nau ekapa atoa! Koronnaaili.

12

Aiaavusuvusuena atoa maulue ila

¹ Liuna avalua o, aghaaulia ngakorokorongana etaimim, kapughu etoa, mausi alousiusiaane ateva God, me am tani taula vilikiimim ta God nongina va aiaavusuvusuena ateva maulue ia, manga ia me God emasimasiangaililia. Tale ia o salana atikirighi aue am kkaua ngakoronna ta God. ² Karika am mene kasu nongina taumattu tale kosa ateva oia la kasukasu. Karika, am tau velu God eikolikolieinam nau eghelei nannaaimim eouna, me am roo tani kila amasinaaili aloannaane God. Me aue am kila saa ase voto masina me egheelei emasimasi God, me ghlughuluuenaili.

³ Poli tale maamasinaane ateva ghe taue mae sio etaghi tani ghelei uunguaane ateva, aghaaulia ngakapa etaimim va, am rau mene nnaa va aalomasaangaimim me gheegheleiaaimim elaulau mene katoa tana taumattu. Karika, ta am nna ngamasinaaili mua saa voto am gheelei erooroo eitauua tee niaiesoaa God ghe tau aatu sio etaimim. ⁴ Nim nonginaaili kateva kateva etaita, asease aissopiaa tale vaulaniita ateva, me isaa akapaaili o voto karika la gheelei nonga kateva niuungu, ⁵ liuna

avalua o me ta Karisto ita tee oroi ita me ita tokatoka nongina va kateva nonga vaulani, me kateva kateva etaita eaipatolaa ta mene kateva. ⁶ Ita akapaaili tale maamasinaane God, ia ghe nim tau mae sio asease niuungu karika va isaa aitauaa. Arova taumattu ngateva uunguaane tani auliaa inangarina ateva God, tau veluela me eauliaa nongina vaalua eairooaa tee aiesoaane. ⁷ Arova kateva taumattu uunguaane tani sausi mene kateva taumattu, tau veluela me esausi. Arova tani apasunga, tau veluela me eapasunga. ⁸ Arova tani asarasarakana taumattu, tau veluela me easarasarakana mene katoa. Arova taumattu ngateva uunguaane tani parruu, tau veluela me etaula tale nimasimasi. Arova tani muemueaa niuungu, esarasarakana tani aitara ngamasina ia o niuungu eteva. Arova tani alousiusi tee mene katoa me esausila, tau veluela me eghelei tale nimasimasi.

Niaielousi

⁹ Am ailousia ngakoronnaaili mene katoa tana taumattu. Am liu viliimim tale voto karika masina, me am poso parasi tale voto masina. ¹⁰ Am ailousiaa kateva kateva ta kapuna atoa God, me am ailousieinila nonginaaili va kapuimim tuungi ila. Am oneoneainila me karika va am, am ghaa nioneoneaa. ¹¹ Am rau mene mangoo, ta am sarasarakana tani tau velu Spirit Manga ateva tani katulainam, me am ghelei uunguaane ateva Vau eteva. ¹² Am masimasi nau am toitoi God va eaisausieinam, me am tani tingina akorokorongana nau maamatana eghaaiem, me am looloo sae nau ekapa atoa. ¹³ Am parruu kapuna taumattu ngatoa God arova la tuutukuna tale righi voto. Am aikoloa ativuu etoa nau la mae tangueimim.

¹⁴ Am arangise lo atoa la gheelei saasakieinam. Am looloo sae va God eghelei emasina etaira, am rau mene looloo sae va God eghelei saasakieinila. ¹⁵ Am masimasi eitauaa tee lo atoa la masimasi, me am alousiusi eitauaa tee lo atoa la alousiusi. ¹⁶ Am annaa kateva nonga ia masi ninannaa erooaa taumattu ngakapaaili etoa. Am rau mene saeaa nannaimim. Am masimasi tani toka tee llo taumattu karika arariira. Am rau mene asaesae arariimim me am ue va am nonga alomasaanga am.

¹⁷ Am rau mene liu sesa tale voto la gheelei etaimim, karika. Isaa akapaaili nau am anna tani ghelei masi niuungu ta mataira taumattu ngakapa atoa. ¹⁸ Arova erooroo, am ghelei voto akapa tani toka aitauaa tee taumattu ngakapa atoa tale luei. ¹⁹ Kapughu etoa, am rau mene liu sesa voto la gheeghelei teeiem. Am tau velu me God aue etaula sessaiaane etaira. Poli angila ghe piti elokoila inangari eue va, Vau palepale eaauliaa va, “Aghi uunguaaghi tani liu sesa voto la gheeghelei, me aue aliu.” ²⁰ Me karika ta,

“Arova tau ngai ssateem ateva emaamaloo, uanginia.

Arova ekaakangngata tee ateo, utau lao me eropi.

Arova ughelei isaa o voto, aue ugheleia epalataa sesa uunguaane egheeghelei.”*

²¹ Urau mene tau velu sesa voto va etauo sio euu, karika, ta ughelei masi voto me aue etau sio sesa voto euu.

12:6: 1 Ko 12:4-11; 1 Pita 4:10-11. **12:10:** 1 Pita 1:22. **12:12:** 1 Tes 5:16-18. **12:13:**

Hib 13:2. **12:14:** Mat 5:44; 1 Ko 4:12. **12:16:** Nitoka 3:7. **12:17:** 1 Tes 5:15. **12:19:**

Diut 32:35; Mat 5:39. **12:20:** Nitoka 25:21-22; Mat 5:44. * **12:20:** Tale inangari nge Griki, aue uatoka sae parikanga ataata epona ta uruna ateva.

13

Uunguaaita ta gavmani

¹ Am akapaaili, am oneoneaa gavmani me lo atoa la uungu etana, poli karika teva erooroo tani aitoiaa arova God etam ue va eaitoiaa. God ghe suitoongaala taumattu ngatoa la uungu ta gavmani. ² Llo taumattu etam nongo usilaa gavmani me kapuna tau ngai uungu etoa, ila la nongonongo vulu saa voto God ghe atokala. Me lo atoa la gheelei evalua o, aue la ghaa sesa aipolipoli ta poli karika la aimuli tee inangariira. ³ Poli gavmani karika ghe tokala va lo atoa la gheeghelei masi niuungu la matautainia. Karika poi, ta lo atoa la gheelei sesa voto. Arova karika ualoanna tani matauta isaa o taumattu euungu ta gavmani, ughelei masi voto me aue easaesae ararim atae. ⁴ Poli ila kapuna tau ngai uungu ila ta God, me la rooroo tani gheleio me utoka amasina, me arova ughelei voto karika masina, aue umatautainila, poli ila sarasarakaniaaira erooroo tani ghelei sesa voto ta lo ateva egheelei saasakiaa. Ila tau ngai uungu ila ta God tani ghelei saasakiaa ta lo ateva egheelei sesa voto. ⁵ Liuna avalua o, am nongo usilaa lo atoa la aitoieinam, poli ita maamatauta sesa voto aue la tau lao ta lo atoa la tam nongonongo usilaa, me tee, ta poli ita kilakila va emaamasina tani nongo usilainila. ⁶ Mausina avalua o me am tee am poli lao viliki veu tale takis, poli lo atoa la uungu ta gavmani, la uungu ta God nau la gheelei roorooaa uunguaaira. ⁷ Saa llo voto pei nitau lao ta gavmani, am tau lao. Am tau lao asease takis tale taumattu ngateva ia uunguaane tani ghaa takis, me am matauta me am oneoneaa lo atoa matuutulienila ila.

Ita aielousiaa mene kateva taumattu

⁸ Am tani liu voroi dinao am gheelei ta mene kateva taumattu. Ta kateva nonga dinao erooroo tani toka nau etoa, niaielousi. Poli lo ateva eaielousiaa mene kateva taumattu, euusilangaili inangari nipaopao. ⁹ Inangari nipaopao eue va, “Karika umene lai sari kateva manna ateva, karika umene aiuvii emate, karika umene ainao, karika umene ssaii.” Isaa akapa llo oia me mene kasina, ita nongo usila ngakapa arova ita nongo usilaa kateva nonga inangari nipaopao eue va, “Uaielousiaa mene kateva taumattu nonginaaili uailousieinio.” ¹⁰ Lo ateva eaielousiaa mene kateva taumattu, karika erooroo tani ghelei righi voto sesa etana. Liuna avalua o me, arova uaielousiaa mene katoa, unonganongo usila ngakapaaili inangari nipaopao.

¹¹ Am ghelei voto oia, poli am kilakila saa ase nau ghaine ita tokatoka etana. Ang ghele naua tani anguu taatara atoka tale uneimim niasekanua, poli nauna God tani asaangita ang ghele kalakalanginala, me karika va nongina ita ghe tani aikaaia ngakasinala. ¹² Ghaisangaili erighi voo ngateva ekapa, me mallanga ateva emae. Ita ruu tani ghelei niuungu kanna surrom ateva me ita ghaa ghinna niaiuuvii tale uunguaa mallanga ateva. ¹³ Ita kasu emasina nongina taumattu ngateva ekasukasu ella, ita rau mene aighui tee lo atoa sesa gheeleiaaira me ita ropi sesa manu, ita rau mene ailai salosalooa nongina ghaata kkena atoa karika masi nannaaira. Ita rau mene aikiso see me ita rau mene

13:1: Tts 3:1; Nitoka 8:15. **13:3:** 1 Pita 2:13-14. **13:6:** Mat 22:21. **13:8:** Mat 22:39-40; Jms 2:8. **13:9:** Eks 20:13-15, 17; Diut 5:17-19, 21. **13:10:** 1 Ko 13:4-7. **13:11:** Ips 5:14; 1 Tes 5:6-7. **13:12:** 1 Jon 2:8. **13:13:** Luk 21:34; Ips 5:18.

ssa tee kateva poli ange apalaitala. ¹⁴ Am ghinaghinnaa Vau palepale Iesu Karisto, me am rau mene nnaa tani usilaa sesa aloannaimim.

14

Am rau mene ue va katoa nonga gheegheleiaaira sesa

¹ Am ghaa isaa o taumattu karika tani sarasarakana uneira niaikaa-iaa, me am rau mene aissakeana teeila tale voto ita nannaa tale saa ase voto ita ghelei me saa ase voto ita rau mene ghelei. ² Kateva kateva taumattu enamanama asease inana nongina vaalua aikaiaane, me taumattu ngateva, aikaiaane karika tani sarasarakana, enamanama nonga ase inana ngeutana me karika enamanama asease malatau etoa. ³ Taumattu ngateva enamanama isaa akapaaili asease inana erau mene nnaa saasakiaa me esessaia ta lo ateva taumattu karika enamanama asease inana me malatau. Me taumattu ngateva karika enamanama malatau, erau mene auliaa saasakiaa me ennaa saasakiaa tee taumattu ngateva enamanama isaa akapaaili asease inana. Poli God ghe ghaa teeila. ⁴ Saa taumattu io me uaauliaa tee tau ngai nongonongo anna ateva kapuna ia kateva ppae taumattu va ia ang ghe ghelei saasakiaala? Uunguaane vauna ateva tani auliaa va masina voto egheelei o karika. Me aue etingina akorokorongana me vauna ateva aue eauliaa va uunguaane masina, poli Vau palepale sarasarakana ia tani gheleia me aue eroo tani tingina akorokorongana.

⁵ Kateva taumattu eanna va, “Kateva tana nau maamasinaane elaulau mene kasina tana nau.” Me mene kateva tana taumattu enanna va, “Isaa akapaaili nau enim aairooaa.” Kateva kateva taumattu etani kila amasinaaili tale nannaane saa voto erooro tani ghelei. ⁶ Lo ateva taumattu enanna sossola kateva nau va nau nikkaua ia, ia o taumattu ngateva enanna Vau ngepona ateva me egheelei llo o voto tani oneoneainia. Lo ateva enamanama asease inana, enamanama tani oneoneaa Vau eteva, poli ekaakaili emasina ta God tale inana. Lo ateva taumattu eratirati tani nama kasina tana asease voto, egheelei tani oneoneaa Vau ngepona ateva, me etautau lao nikaili emasina ta God. ⁷ Karika teva etaita eroo tani nnaa va maamauluaane isaa nonga etana, me karika teva etaita erooro tani nnaa tee va ia erooro tani mate etana. ⁸ Arova ita maulue, ita maulue tani oneoneaa Vau palepale, me arova ita mate tee, ita mate tani oneoneaa Vau palepale. Me arova ita mate o maulue, kapuna ita Vau palepale.

⁹ Poli Karisto ghe matela me ghe mene totula tale maulue, God ghe aloannala va ia kapuira Vau ia matena atoa me maulue tee atoa.

¹⁰ Vaalua me uauliaa tee kapum atoa va ila la gheelei voto karika masina, me vaalua me upiipilosi kapum atoa? Poli ita akapaaili aue ita tingina emua ta God nongina liu niaisakei eteva me eghelei niaisakei etaita. ¹¹ Poli nongina Uru ngai Manga ateva eue va,

“Vau palepale eue va, ‘Koronna nongina va aghi maulue ieghi,

taumattu ngakapaaili etoa aue la tturru etaghi,

me ila akapaaili, aue la aulia ngaotu va aghi God.’”

¹² Isaa avalua o me kateva kateva aue ita auliaa ta God isaa akapaaili asease niuungu ita gheleila tale kosa ateva oia.

13:14: Ips 5:11. **14:1:** Rom 15:7. **14:2:** Aitiuti 9:3-4. **14:3:** Kol 2:16. **14:4:** Mat 7:1; Jms 4:11-12. **14:5:** Gal 4:10-11. **14:8:** Gal 2:20. **14:10:** 2 Ko 5:10. **14:11:** Ais 45:23; Plp 2:10-11.

¹³ Liuna avalua o, ita ruu tani auliaa tee mene kasina tana kapuita va ila nonga la gheelei sesa voto, ta ita nna ngavalua toko va karika ita mene ghelei righi ase voto va eghelei ekatungila tale uunguua ssavoto ateva. ¹⁴ Vau ngepona ateva Iesu ghe gheleila nannaaghi ghe soallaala me ghe masalikaala, me aghe kila amasinala va karika poi teva voto kulukulutana ta matana God. Me arova taumattu ngateva eairesoaa va ia o voto ateva karika raarangisana ia, ia o voto ateva karika raarangisana ia nonga etana. ¹⁵ Arova ughelei saasakiaa ta kapum ateva nau etaraio ta unamanama asease inana, karika ughelei uunguua niaielousi. Urau mene tau velu inana etaatara io unamanama va eturungi ia o taumattu ngateva, ta Karisto ghe matela tani asaangia. ¹⁶ Arova am annaa va kateva voto masina ia, am aipanipaniaa, ta gheegheleiaaimim erau ghelei me katoa tana taumattu aue la ue va isaa o voto karika masina. ¹⁷ Poli ararimangalina ateva God karika pei tale inana me ateo, karika, ta tale nighulughuluena, luei, me nimasimasi. Isaa o voto Spirit Manga ateva etautau mae. ¹⁸ Taumattu ngateva euungu ta Karisto tale ia o salana atikirighi, egheelei God emasimasi me tee egheelei taumattu ngatoa la oneoneainia.

¹⁹ Isaa avalua o me ita atoka nannaaita tale saa voto etautau mae nonga luei, me erooro tani asarasarakanaita me mene katoa tana taumattu. ²⁰ Am rau mene ghelei saasakiaa voto God ghe gheleila, poli ita rooroo tani nama isaa akapaili asease nginana atoa. Isaa akapaili asease nginana atoa raarangisana ila, me la rooroo tani ghelei kasina tana taumattu la katuu tale ssavoto, liuna avalua o me karika masina tani nama isaa akapaili voto. ²¹ Masina ateva voto tani ghelei, ia avalua toko va, am ruu tani nama malatau, ropi sesa manu me tani ghelei asease voto atoa la rooroo tani ghelei kapuimim atoa la katuu tale ssavoto.

²² Saa voto uaikaaiaa etana tale isaa o voto, aue amalua nonga me God. Aue emasinaaili ta lo ateva taumattu enannaa va voto egheelei masina, me nannaane karika eue va egheelei sesa. ²³ Arova eannaa va saa voto enamanama, God eue va karika masina tani nama, egheelei ssavoto, poli gheegheleiaane karika elao lao eitauua tee unna niaikaaiaa. Me arova am gheelei voto me karika am aiesoaa va masina, am gheelei ssavoto.

15

Tani amasimasi katoa ppae me karika va ita

¹ Ita lo atoa korokorongana ita tale niaikaaiaa, emaamasina etaita tani sausi lo atoa aikaaiaira maomaona, me karika ita mene ghelei nonga saa voto aue egheleita me ita masimasi. ² Ta, kateva kateva etaita ita roo tani ghelei saa ase voto masina ta isaa o taumattu ita aiesoaa ngaitauua ta Karisto tani gheleia emasimasi, me aue eghelei ekorokoronganaia. ³ Poli Karisto karika ghe gheelei voto aue ghe rooroo tani ghelei emasimasia nonga. Ta, nongina Uru ngai Manga ateva eaauliaa va, “Saa voto taumattu ngatoa laghe auliaa saasakiaa teeiola God, ang ghele mae sio tee etaghi.” ⁴ Poli isaa akapaili voto laghe pitila tale Uru ngai Manga ateva emua arau, laghe pitila tani

apasunga etaita, tani akorokorongana nannaaita, me egheleita tani tingina akorokorongana, me ita toitoi masi voto God aue etaue mae.

⁵ Me alooloo sae va aue God, lo ateva eaakorokorongana nannaaita, me egheeleita ita tam sessai parasita, aue egheleiem am toka amasinaaili tale luei, nau am aimuli tee Karisto Iesu. ⁶ Liuna avalua o am akapaaili, tale kateva nonga ninannaa aue am tau sae God, ia Tamana kapuita Vau ngepona ateva Iesu Karisto.

⁷ Liuna avalua o me am masimasi tani ghaa mene katoa nongina va tue me nenga am, nonginaaili Karisto ghe masimasila tani ghiaiem. Am ghelei evalua o me aue taumattu ngatoa la tau sae God. ⁸ Poli aghaauliaa etaimim va Karisto ghe nonginala va kapuira tau ngai nonganongo anna ia ajiu etoa tani apasunga va God aue eghelei saa voto ghe auliaala va aue eghelei, tani ghelei rooroaa kanna inangari nialokoi God ta tuvuira atoa, ⁹ me tee tani ghelei taumattu ngeleka atoa tani tau sae God, poli alousiusiaane. Nongina Uru ngai Manga ateva eaauliaa va, “Isaa avalua o me nau atokatoka elome ta taumattu ngeleka atoa aue atauo sae,

aue atauo sae ararim ateeae tale nikkinari.”

¹⁰ Emene ue va,

“Am taumattu ngeleka atoa, am mae aitauaa tee kapuna taumattu ngatoa God tale nimasimasi.”

¹¹ Me emene ue va,

“Tau saela ararina ateeae Vau ngepona ateva, taumattu ngeleka akapa atoa.

Am kkaueinia, am akapa taumattu tale kosa ateva.”

¹² Me Aisaea tee ghe mene uela va,

“Tuvuna ateva Jesi aue emae,

aue eaitaraa taumattu ngeleka atoa.

Me aue la atoka tuutuliiira etana.”

¹³ Me alooloo sae va aue God, ia etautau mae inangari nialokoi etaita, aue egheleiem me am pasu tale nimasimasi me luei ta poli am aaiesoaa etana. Liuna avalua o me kaluimim niaiesoaa tale inangari nialokoi, aue ekorokorongana tani pinosa tale sarasarakaniaane Spirit Manga ateva.

Pol ghe uungula ta taumattu ngeleka atoa

¹⁴ Kapughu etoa, ta ngetaghi akilakilaaili va, am masinaaili iem. Am kilakila amasinaaili isaa o voto, me am rooroo tani apasunga ta mene katoa tana taumattu. ¹⁵ Elome tale uru ngai etikirighi oia, aghe auliaala kasina voto sarasarakanaili, me aue am roo tani mene nnnaa. Aghe aulia ngakapaailiila isaa o voto, poli God ghe tau mae sio maamasinaane etaghi ¹⁶ va aghi atau ngai uungu ta Karisto Iesu, tani uungu ta taumattu ngeleka atoa. Auungu nongina pristi eteva, tani ppooaa masi kiukiu kanna God. Poli aghaloanna va taumattu ngeleka atoa la nongina aiaavusuvusuena ateva God emasimasieinia, poli Spirit Manga ateva ghe amangala ia o aiaavusuvusuena ateva.

¹⁷ Poli aghi auungu tee Karisto Iesu, liuna avalua o, amasimasi ta poli auungu ta God. ¹⁸ Me aghi, karika aghaasakeaa righi voto ta llo nonga Karisto ghe gheleila nau ghe asarasarakanala nannaagli tani katulaa taumattu ngeleka atoa tani nongo usilaa God. Euungu etaghi

tale inangari apoppoaa me voto agheeghelei,¹⁹ tale sarasarakaniaa niaimatootoongana me mirikol atoa, me tale saa voto Spirit ghe gheleila tale salana atikirighi sarasarakananaaili ia. Liuna avalua o, me masaliki ekapaaili aghe laolao etana, ghe tiuaala tale masaliki taatara atae eJerusalem, me ghe laa oghioghi arau tale distriki eteva ellirkum, ngaghe ruu ekapala isaa o distriki tani ppooaa masi kiukiuna Karisto.²⁰ Kateva nonga nannaaghi eteva tani aulia ngaotu masi kiukiun tale masaliki taumattu ngatoa karika laghe nongo poi Karisto, karika aghaaloanna tani uungu tale voto kasina ppaes taumattu laghe uungula etana.²¹ Nongina Uru ngai Manga eteva eaauliaa va,

“Lo atoa karika laghe aulieinia etaira, aue la tara,
me lo atoa karika laghe nongo, aue la nongo kila.”

²² Mausina avalua o me oroieili nau karika aghe rooroo tani mae taraiem.

Pol ghe aaloanna tani lao eRom

²³ Me isaa oia ta ngaghe ruula voto aghe nannangaili tani ghelei tale isaa oia voto, me oroi ninamanama aghe aaloanna tani mae taraiem.²⁴ Aghaloanna tani lao tee eSpein, me nau eteva amae avalua ona, aue akkure atoka eRom, me ita aitara. Aghanna tani toka teeiem ghaisa nonga ulana tani masimasi eitauua, me nau isaa o voto eruu, am sausieghi tale kasukasuaaghi tani lao okae.²⁵ Me isaa arau oia, ngakasukasu tani lao eJerusalem tani laa sausi kapuna taumattu ngatoa God okae.²⁶ Poli ale manga atoa eMesedonia me eAkaia laghe masimasieiliila tani taula viliki veu tani sausi kapuna taumattu ngatoa God karika tue peipeiena ila la tokatoka eJerusalem.²⁷ Ila nonga laghe nnaala tani ghelei tale nimasimasi. Ajiu etoa laghe tautau tee lao ta taumattu ngeleka atoa masi voto kannu God, me emaamasina va taumattu ngeleka atoa tee la liu tale viliki veu tani sausila.²⁸ Nau eteva ngaruula ia o niuungu eteva tani taula viliki veu tau ngaisesoa eMesedonia me eAkaia laghe aisokosokoala tani lao eJerusalem, me avira mene kasu tani lao eSpein me aue atoka mua ona tani taraiem.²⁹ Me akilakila va nau eteva aghatu, aue Karisto ekaarasi tani arangiseita tale uneita nivelu eitauua.

³⁰ Poli tale kaluita niaikaiaa ta Vau ngepona eteva Iesu Karisto me tee poli niaielousi eteva Spirit Manga ghe tauue mae sio etaita, aghaaulia ngasarasarakanana etaimim, kapughu etoa, tani uungu esasarasarakanana teeieghi tani looloo sae ta God mausighi.³¹ Ita looloo sae va, lo atoa taumattu la tokatoka ejudia la tam aaiesoaa ta Iesu Karisto, karika aue la ghelei righi sesa voto etaghi, me uunguaaghi eJerusalem, aue kapuna atoa God la aloannaaili.³² Me aue amae etaimim tee nimasimasi eteva, arova aaloannaane God, me ita masimasi, ita ainoana, ta poli amae etaimim.³³ Alooloo sae va God, ia etautau mae luei, aue etoka aitauua teeiem akapa. Koronna.

16

Pol ghe tau lao sio masimasiaane ta kapuna atoa

15:20: 2 Ko 10:15-16. **15:21:** Ais 52:15. **15:22:** Rom 1:13. **15:25:** 1 Ko 16:1-4.
15:26: 1 Ko 16:1; 2 Ko 8:1; 9:2, 12; Apos 24:17. **15:27:** 1 Ko 9:11. **15:29:** Rom 1:11.
15:30: 2 Ko 1:11; Kol 4:3; 2 Tes 3:1.

¹ Aghaloanna tani auliaa etaimim va, kapuita vause ateva ta Fiibi, tau ngai uungu ia tale ale manga ateva eKenkria, am rooroo tani atoka tuutuliimim etana. ² Akolomiem tani ghaaia tale ararina atae Vau ngepona, nongina taumattu kapuna taumattu ngatoa God la aioneoneainila, me am sausia arova ealoanna righi niaisausi etaimim, poli ghe sausila orioeili taumattu ngatoa, me aghi tee.

³ Am asaoki masimasiaaghi ta Prisila me Akuila, lalu uungu eitauaa teeieghi ta Karisto Iesu. ⁴ Lalu ghe tam matautula tani mate mausi tani asaangi maamauluaghi. Akaakaili emasinaaili etairarua, me karika va aghi nonga, ta tee isaa akapaaili ale manga atoa, aleira ila taumattu ngeleka atoa. ⁵ Am asaoki tee masimasiaaghi ta lo atoa laghe aiesoala me la nim laa aisouii tanganueirarua tani kkauua.

Am sou tee masi kapughu eteva ta Epenetus, aitiutiu ia tani aikaiaia ta Karisto tale provinsi eteva eEisia.

⁶ Am sou tee Meri, ghe uungu aanaasaaili tani sausiem.

⁷ Am sou tee Andronikus me Jiunia tale nimasimasi, ilalua tee ajiu ilalua, me ami ghe karavusu eitauuala. Apostolo ilalua, me taumattu ngakapa atoa la oneoneainilalua, me lalu ghe kila akasinala Iesu, me aghi avirina.

⁸ Am taula masimasiaaghi ta Ampliatus, ia aghaielousieinia mausi Vau palepale.

⁹ Am sou tee Urbanus, ita uungu eitauaa ta Karisto, me masi kapughu eteva Stakis.

¹⁰ Am sou tee Apelis, ghe ghaala nitootoonga me ghe apasunga teela ta taumattu ngatoa vaalua ghe kaakaarasi tani uungu eitauaa tee Karisto.

Am sou tee kapuna atoa Aristobulus.

¹¹ Am sou tee Herodion, ia tee ajiu ia.

Am sou tee kapuna atoa Nasisus la ghaaiesoaa ta Vau ngepona ateva.

¹² Am sou tee Tripena me Triposa, vause alua lalu ghe uungu aanasa ta Vau ngepona, me am sou tee mene masi kapughu eteva Pesis. Ia tee kateva vause ghe uungu aanasa ta Vau ngepona ateva.

¹³ Am sou tee Rupus, Vau ngepona ateva ghe suitoongainiela, me tee kinna, ghe saasausi emasinaailieghi, nonginaaili va natuna tuungi eghi.

¹⁴ Masimasiaaghi ta Asinkritus me Flegon me Hermes, me Patrobas, me Hermas, me kapuira atoa la velovelu eitauaa tani kkauua.

¹⁵ Am taula masimasiaaghi ta Pilologus me Julia, me ta Nereus me kapuna vause ateva, me Olimpas, me ila akapaaili kapuna taumattu ngatoa God, la velovelu eitauaa tani kkauua teela.

¹⁶ Am aisouii tee mene katoa la aiesoa ngaitauaa tale niaielousi.* Me ila akapaaili ale manga atoa ta Karisto la tautau aatu masimasiaaira etaimim.

¹⁷ Amene aulia ngakorokoronganeta etaimim kapughu etoa: Am ai-monomonosiaa tee lo atoa la gheelei taumattu la tokatoka apolapola, me la gheelei taumattu la kaakatuu tale niaikaiaia, me la aauliaa saasakiaa tee niapasunga koronna ngam ghe kila akasinala. Am rou mene toka me kasu ekalakalaa teeila. ¹⁸ Poli lo atoa laghe gheelei isaa o ase voto, karika la uungu ta Karisto Vauita ia, ta la nim nannaa nonga aaloannaaira. La auliaa inangari masinaaili

16:3: Apos 18:2. **16:13:** Mak 15:21. **16:16:** 1 Ko 16:20; 1 Pita 5:14. * **16:16:** Tale inangari nge Grik, tale niaingusu eteva manga ia. **16:17:** Mat 7:15; Tts 3:10. **16:18:** Plp 3:19; 2 Pita 2:3.

nongonongoaane, me la kamekame taumattu ngatoa, me la gheelei saasakiaa urunguitaniira, taumattu ngatoa karika la kilakila amasina masina me sesa. ¹⁹ Taumattu ngakapa atoa angila ghe nongola vaalua masinaaili nongonongo usilaaimim tale masi kiukiu. Liuna avalua o amasimasiangailiem. Aghaaulia ngavalua o poli aghaloanna va am alomasaanga tale saa voto masina, me am toka amasau tale voto karika masina.

²⁰ Me God, ia liue luei ia, ghaisa ngarighi aue easa putuputu Satana ta kkeimim. Alooloo sae va Vauita ateva ta Iesu Karisto aue etam ruu tani apasunga etaimim maamasinaane ateva.

²¹ Timoti, euungu eitauua teeieghi, etautau aatu masimasiaane, me tee Lusias, Jeson, me Sosipata, Ajiu tee ila.

²² Aghi Tetius, aghe pitila tale uru ngai etikirighi oia saa voto Pol ghe auliaala, etautau aatu masimasiaaghi mausi Vau ngepona ateva.

²³⁻²⁴ Gaeas, ia o taumattu ngateva atokatoka teeia tangantuena, me esaasausi lo akapa atoa la aiesoaa tale ia oia masaliki taatara atuae, etautau aatu masimasiaane.

Erastus, ia eaaitaraa viliki veu tale ia oia masaliki taatara atuae, me kapuita ateva ta Kuatus, lalu tautau aatu masimasiaairarua etaimim.[†]

²⁵ Ita taula nikkaua ta God, poli ia erooroo tani gheleiem me am tingina akorokorongana tale masi kiukiu apoppoaa, isaa o masi kiukiu eaaulia ngaotu Iesu Karisto, me tee ia oia voto ateva koronna ia ghe aaisuliaala oroeiili nau, ²⁶ me ghaine ang ghele otuela, nongina inangari propete atoa laghe pitila, me nongina God ateva tokatoka liu ia ghe aulia ngakoronnala va, taumattu ngeleka akapa atoa tale voto akapa laghe nongola isaa o inangari, me aue la rooroo tani aiesoaa me nongo usilaa. ²⁷ God ia nongaaili Goto ia me alomasaanga ia tale voto akapaaili. Ita tauue sae nau ekapa atoa poli uunguaane Iesu Karisto! Koronna.

16:19: Rom 1:8; 1 Ko 14:20. **16:20:** Aitiutiu 3:15. **16:21:** Apos 16:1-2; 19:22; 20:4.

16:23-24: Apos 19:22; 1 Ko 1:14. [†] **16:23-24:** Kasina uru ngai laghe pitila, la ghe piti teela, 24 Alooloo sae va maamasinaane ateva kapuita Vau ngepona ateva Iesu Karisto aue etoka aitauua teeiem akapa. Koronna. **16:25:** Ips 1:9; 3:5, 9; Kol 1:26; Rom 1:5.

Aitiutiu etikirighi uru ngai Pol ghe pitiela ta aKorint atoa Inangari emuemua

Korint namuu masaliki taatara ia tale provinsi eteva eAkaia, tale namuu patunganua ateva ghaine ita aseasea va eGris. Oroi anua laghe mae soso tale saoa atikirighi eKorint, me oroi tau ngelamana atoa laghe tokatoka okae. Oroi voto sesa, nongina tani ropi sesa manu me nialai salosaloaa, ghe lutulutu eKorint. Pol ghe aitiutiula tani ppooaa masi kiukiu eKorint (Apostolo 18). Nau Pol ghe kasula eKorint tani ppooaa tale mene katoa masaliki taatara, oroi voto ghe lutula tale ale manga eKorint, me Pol ghe pitila ia o uru ngai etikirighi tani liu kaluira nikkolomi.

Tani kila amuemua

Aitiutiu tale inangari 1:1-9

Niaissa me niaipolapola tale tau ngaisesoaa 1:10-4:21

Gheeleiaja ssavoto me nikkolomi tale nilai 5:1-7:40

Tani toka nongina tau ngaisesoaa ngatoa 8:1-11:1

Vaaluva vaulanina ateva Karisto ta ale manga etani kkauuaa 11:2-14:40

Karisto ghe totula tale nimate, me tau ngaisesoaa ngatoa aue la totu tee 15:1-58

Pol ghe suula masimasiaane 16:1-24

¹ Aghi Pol, God ghe koloaghila tale aloannaane va ekapuna apostolo ieghi Iesu Karisto, tee me Sostenes, eaaiesoaa ngaitauuaa teeita.

² Angalu pitipiti mae tale alena ale manga ateva God eKorint, ta lo atoa God ghe amangaiemla ta Karisto Iesu, me ang ghe koloamla va am manga am, tee me lo akapa atoa la tokatoka akapa see tale mene kasina masaliki la looloo sae tale ararina ataeae Vau eteva Iesu Karisto, kapuira Vau ia, me ita tee.

³ Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Pol ghe kaili emasina saela ta God

⁴ Anim toka kaakaili emasina sae ta God nau ekapa atoa mausimim, poli ta Karisto Iesu God ghe tau aatu sio maamasinaane ateva.

⁵ Poli ta Karisto, ngam ghe pasula tale voto akapaaili, nongina tale aippooaaimim, me tale alomasaanganiaaimim. ⁶ Tale isaa o salana, God ang ghe apasungaala va nau ami ghe aaulia ngaotu Karisto, ami ghe aaulia ngakoronnaia. ⁷ Liuna avalua o, karika am tuutukuna tale voto God etautau mae tani ghelei wunguaane, nau earieriem tani toi kapuita Vau ngepona ateva Iesu Karisto nau ekauerekati. ⁸ Aue eaitara ngakorokoronganaiem lomosina ta airuuruu eteva nau, me karika aue la ue va sesa am tale nau eteva kapuita Vau eteva Iesu Karisto emene mae. ⁹ God aue eghelei isaa o voto etaimim poli egheelei voto eue va aue eghelei, me ghe suoiongainamla tani aighui eitauuaa tee Natuna, ia kapuita Vau ngepona ia, Iesu Karisto etana.

Niaipolapolaii tale ale manga ateva

¹⁰ Kapughu etoa, tale ararina ataeae kapuita Vau eteva Iesu Karisto,

akookolomiem va am kateva nonga, me aue karika righi niaipolapolaii elutu elome etaimim, me aue am toka aitauaa tale kateva nonga ninannaa me aloannaaimim. ¹¹ Kapughu etoa, katoa laghe tokatoka tanganue vause ateva Kloui, laghe auliaala kieghi va niaissakeana elutulutu elome etaimim. ¹² Malloeane inangari aghaaauliaa isaa avalua toko, va katoa etaimim la ue va “Aghi kapuna disaepolo ieghi Pol,” me katoa la ue va, “Aghi kapuna disaepolo ieghi Apolos,” me katoa la ue va, “Aghi kapuna disaepolo ieghi Pita,*” me katoa la ue va, “Aghi kapuna disaepolo ieghi Karisto.” ¹³ Am annaa va Karisto aipolane ia? Va Pol ghe matela etaimim tale aikotoo? Me am ghe ghaala niaasuu tale ararina atae Pol? ¹⁴ Akaakaili emasina, poli karika agheasuula toa etaimim ta Krispas nonga me Gaeas, ¹⁵ liuna avalua o me karika teva urooroo tani ue va ughe ghaala niaasuu tale ararighi eteae. ¹⁶ (Aghe asuu teela Stepanas me kapuna atoa tanganuena, me karika aghannaa va agheasuula mene righi taumattu.) ¹⁷ Poli Karisto karika ghe sungieghila tani asuu, ta ghe sungieghila tani ppooaa masi kiukiu, me nau appooaa inangarina ateva, arau mene aulieinia tani apasunga va alomasaanga ieghi, ta unna aikotoo ateva Karisto erau nim peisaane.

Karisto alomasaanganiaane ia me sarasarakaniaane ia God

¹⁸ Poli kiukiuna aikotoo ateva alokapakapa ia ta lo atoa ngila raaraaua, me ta lo atoa etaita God easaangita, aikotoo ateva sarasarakaniaane ia God. ¹⁹ Ta Uru ngai Manga ateva eue va,

“Aue aghaa velu aalomasaangania lo atoa taumattu la annaa va alomasaanga ila,

me aue aghapasunga va alokapakapa nannaaira lo atoa taumattu la annaa va la kilakila oroi voto.”

²⁰ Tau ngalomasaanga ateva karika erooroo tani kila God tale alomasaanganiaane. Tau ngai aapasunga ateva tale inangari nipaopao karika erooroo tani kila God tale sa ateva ekilakilaia. Tau nisama ateva karika erooroo tani kila God tale samasamaane. God ghe apasungaala va aalomasaangania taumattu tale kosa ateva oia alokapakapanna. ²¹ God alomasaanga ia, me ghe annaala va alomasaanganiaaira taumattu tale kosa ateva oia karika erooroo tani sausila tani kila God. Liuna avalua o me God ghe annala tani asaangi lo atoa la aiesoaa tale inangari ami aulia ngaotu, me taumattu tale kosa ateva la annaa va isaa o inangari alokapakapanna. ²² Poli ajiu etoa karika la aiesoaa poli la kookolomi aimatootoongana ngepona liu, me lo atoa aGriki ila karika la aiesoaa poli la paepae alomasaanga ateva. ²³ Me karika, ta ami, ami poppooaa matemateaane ateva Karisto, ajiu etoa karika poi la aloanna tani nongoa, me ta lo atoa karika va ajiu ila, alokapakapa ia etaira. ²⁴ Me ta lo atoa God ghe kololala, lo atoa ajiu ila me lo atoa karika va ajiu ila, Karisto sarasarakaniaane ia me alomasaanganiaane ia God. ²⁵ Ta poli inangarina ateva aikotoo ateva, aGrik atoa la annaa va alokapakapa ia, eaapasunga va alomasaanganiaane God elaulau alomasaangania taumattu. Me aikotoo ateva, ajiu etoa la annaa

1:12: 1 Ko 3:4; Apos 18:24-28. * **1:12:** Pita Pol ghe pitila va *Kepas*. Tale inangari nge Aramaik, Kepas malloeana va atu. Tale inangari nge Griki, Pita tee malloeana va atu. **1:14:** Apos 18:8; Rom 16:23. **1:16:** 1 Ko 16:15. **1:18:** Rom 1:16. **1:19:** Ais 29:14. **1:20:** Ais 19:12; 33:18; 44:25; Job 12:17. **1:21:** Mat 11:25. **1:23:** Rom 9:32; 1 Ko 2:14. **1:24:** Kol 2:3. **1:25:** 2 Ko 13:4.

va saghuighuina ia, eaapasunga va sarasarakaniaane God elaulau sarasarakaniaa taumattu.

²⁶ Kapughu etoa, am mene nnaa lao vaalue iem nau God ghe koloamla. Katoa nonga etaimim alomasaanga iem tale taatara taumattu ngatoa tale kosa ateva oia. Me katoa nonga etaimim sarasarakana am, me katoa nonga etaimim am ghe lutula tale llo pamili tue ngararina manee. ²⁷ Poli God ghe suoingaala voto alokapakapanna tale kosa ateva oia tani apalata lo atoa la annaa va alomasaanga ila, me ghe suoingaala lo atoa karika sarasarakana ila tani apalata lo atoa la annaa va sarasarakana ila. ²⁸ God ghe suoingaala voto tale kosa ateva pisikeaili, me voto taumattu tale kosa ateva la ratirati, me voto taumattu tale kosa ateva karika la taatara kkai, God euungu etana tani ghaa velu isaa o voto kosa ateva eannaa va masina me eanamunamungane. ²⁹ Liuna avalua o me karika teva eroroo tani aasake ta matane God. ³⁰ Poli mausi God am ghe kateva nonga iemla ta Iesu Karisto. Ghe maeaa sio alomasaanga etaita, me ita ghe ghulughuluuenala me ita ghe mangala, me ghe ghaa oghitala tale gheeleiaa ssavoto atoa. ³¹ Liuna avalua o, nongina Uru ngai Manga ateva eaauliaa va, “Arova teva eanna tani aasakeaa righi voto, eaasakeaa voto Vau ngepona ateva ang ghe gheleila.”

2

¹ Kapughu etoa, nau aghe mae sio tani aulia ngaotu inangarina ateva God etaimim, karika aghe poppooaa righi asease kinatama inangari tani apasunga va alomasaanga ieghi. ² Poli aghe nnaala tani kkaluaa voto akapa nau aghe tokatoka teeiem, ta aghe annaa nonga Iesu Karisto, ghe matela tale aikotoo. ³ Nau aghe mae sio etaimim, karika aghe sarasarakana, me aghe reterete tale nimatautu. ⁴ Inangarighi me uneghi nippooaa karika aghe poppooaa tale aalomasaangania taumattu tani ghaaiem, ta aghe apasunga ngaotu sarasarakaniaane Spiriti eteva. ⁵ Isaa avalua o me uneimim niaikaiaa erau mene toka tale alomasaangania taumattu, ta etoka tale sarasarakaniaane ateva God.

Alomasaanga ateva emaemaе tale Spiriti eteva

⁶ Ami aauliaa inangari alomasaanga ta lo atoa nonga ngila ghe korokoronganala tale uneira niaikaiaa, karika va aalomasaangania taumattu tale kosa ateva oia, o tale tau ngai toitoi tale kosa ateva oia, poli ghaisa ngarighi aue uunguaaira enim kapa. ⁷ Me karika! Ta ami auliaa alomasaanganiaane God aisuliane emua arau, me ghaine ngami aaotu. God ghe nnaala emua arau va aue eghelei, me aue ita ghaa voto masinaaili etana. ⁸ Karika toa tau ngai toitoi tale kosa ateva oia aloira ghe masaangainiela, poli marova laghe kilakilaia, karika aue laghe uvi emate Vau eteva sarasarakana ia tale aikotoo. ⁹ Nongina Uru ngai Manga ateva eaauliaa va,

“Sa ateva karika righi mata ghe taraia,
me karika righi talinga ghe nongoa,
me karika ghe lutu tale nannaaira taumattu,
isaa o voto, God ghe aimanomanosiaala ta lo atoa la aielousieinia.”

¹⁰ Ta God ang ghe apasungaala isaa o voto etaimami tale kapuna Spiriti eteva.

Ta Spiriti eteva etaatara me ekilakila voto akapaili, tee ninanna me voto aisuliannaaili kanna God. ¹¹ Poli karika teva taumattu ekilakila nannaane kateva taumattu, ta kapuna nonga ateva spiriti etokatoka elome etana, ekilakila. Me tale ia o salana atikirighi me karika teva erooroo tani kila nannaane God, ta kapuna nonga ateva Spiriti God ekilakila. ¹² Ia o lo ateva Spirit Manga ami ghe ghaaiela, kanna ia God. Karika ami ghe kilala God tale nannaaira taumattu tale kosa ateva oia. Liuna avalua o me aloimami ghe masaangaala masi voto God ghe nim tau mae sio. ¹³ Nau ami auliaa isaa o inangari, karika ami auliaa tale aalomasaangania taumattu, ta Spirit Manga ateva etautau mae inangari ami poppooaa. Ami auliaa inangari oia tale llo taumattu Spirit Manga ateva etokatoka etaira. ¹⁴ Me lo atoa taumattu Spiriti eteva karika ia etaira, karika la rooroo tani ghaa ia oia inangari eteva emaemae ta Spiriti eteva. Inangari eteva oia alokapakapa ia etaira. Karika la rooroo tani kilaia, ta poli Spiriti eteva karika ia elome etaira tani ghelei emasalika nannaaira. ¹⁵ Llo taumattu Spirit Manga ateva etokatoka tale maamauluaaira, ae la kila tani aitalutluua voto akapaili sesa me masina elutulutu tale maamauluaaira. Mene kasina taumattu, karika la rooroo tani kila nannaaira lo atoa Spiriti eteva etokatoka etaira. ¹⁶ Ta Uru ngai Manga ateva eue va,

“Karika teva erooroo tani kila nannaane Vau ngepona ateva,
me karika teva erooroo tani loea.”

Me ta ngetaita, ngita ghe kilala nannaane Karisto.

3

Pol me Apolos kapuna tau ngai uungu ilalua God

¹ Koronnaaili, kapughu etoa, karika aghe roo tani sama teeiem nongina aghe samasama tee lo atoa Spirit Manga ateva etokatoka elome etaira, ta aghe sama teeiemla nongina aghe samasama tee taumattu ngatoa la uusilaa aaloannaaira, poli aikaiaaimim ta Karisto nongina raaraina ateva. ² Aghe anginainamla tale rarumi ssu, me karika va tale inana korokorongan, ta karika am ghe aimonomonosiaa tani ghaa. Me isaa tee oia nau, karika am ghe roo poi tani ghaa, ³ ta poli am tokatoka nongina taumattu ngatoa la uusilaa aaloannaaira. Am nannaa saasakiaa tee mene katoa etaimim, me am aissakeana elome etaimim. Isaa o voto eaapasunga va am taumattu tapaa kosa am, me am nongina taumattu ngatoa karika la kilakila God. ⁴ Nau kateva etaimim eue va, “Aghi kapuna disaepolo ieghi Pol,” me mene kateva eue va, “Aghi kapuna disaepolo ieghi Apolos,” eaapasunga va am nim taumattu tale kosa ateva am.

⁵ See ia Apolos, me see ia Pol? Angalua nim kapuna tau ngai uungu iengalua God. Angalu ghe gheelei niuungu God ghe tau mae sio etaingalua, me am ghe aiesoaala. Kateva etaingalua egheelei niuungu God ghe tau mae sio etaingalua tani ghelei. ⁶ Aghi aghe pasala katu ue ngai eteva, me Apolos ghe aitarainiela, me God ghe apinosala ia o katu ue ngai eteva. ⁷ Liuna avalua o me lo ateva epasapasa me lo

ateva eaaitara katu ue ngai eteva, karika righi arariirarua, ta God nonga ararina atae, ta ia eaapinosa ue ngai eteva. ⁸ Lo ateva epasapasa me lo ateva eaaitara katu ue ngai eteva, kateva nonga nannaairarua, me aue God etau lao aipolipoli etairarua erooa niuungu lalu gheelei. ⁹ Angalua angalu uungu eitauaa ta God, me am nongina umana utana atingiu God, me tee am nongina ale ateva God eatuutulua.

¹⁰ Tale maamasinaane God, ghe tau mae sio etaghi va aghelei uunguaane lo ateva muennaaili ia tani atuutulu. Aghe kaiaala suena tani tiuua ale ateva, me auena mene kateva eatulu saoaa tani rungia. Me kateva kateva etani aitoka vaalua eatulu saoaa tale isaa o suena. ¹¹ Ta poli God ang ghe atoka amuemuela Iesu Karisto va ie nonga suena ia, me karika mene teva erooroo tani tingina va esuena. ¹² Arova teva ealoanna tani atulu saoaa sae tale suena, esaoaa sae golo me silva me masi atu, me katoa aue la saoaa sae voto erooroo tani marokase, nongina ai, valaena me uru makere. ¹³ Me maamasinaa uunguaa kateva kateva aue la tarā tale nau eteva Karisto ekaurekati. Tale ie nonga o nau eteva niaisakei nongina kura atae aue etoongi me eapasunga uunguaaira va masina o sesa. ¹⁴ Me marova saa voto laghe atulu etoka saela tale isaa o suena etam ata, ia o tau ngai atulu eteva aue eghaa aipolipoli. ¹⁵ Me marova see uunguaane eata akapa, karika aue eghaa aipolipoli, me ia karika aue eraua, ta aue etoka nongina taumattu ngateva ghe saangala tale kura atae.

¹⁶ Karika am kilakila va am alena ale manga am God, me kapuna Spiriti eteva etokatoka elome etaimim? ¹⁷ Liuna avalua o me arova lo ateva taumattu etuuturungi alena ale manga ateva God, God aue eturungia, poli alena ateva manga ia, me am alena ale manga am God.

¹⁸ Marova teva elome etaimim uannaa va io alomasaanga io tale nannaa taumattu tale kosa ateva oia, urau mene kameo, poli karika alomasaanga io tale voto kanna God. Tani toka va God etaraio va alomasaanga io, aue emasina va taumattu tale kosa ateva la tara va io alokapakapa io. ¹⁹ Ta alomasaangania taumattu tale kosa ateva oia nim alokapakapanna ta taataraane God, nongina Uru ngai Manga ateva eue va, “Katoa taumattu la nannaa va alomasaanga ila, me God eaareainila tale alomasaanganiaira tani taula sio euu.” ²⁰ Uru ngai Manga ateva emene ue va, “Vau ngepona ateva ekilakila va nannaaira taumattu ngatoa la nannaa va alomasaanga ila, ila nim lao ila.” ²¹ Liuna avalua o me karika toa la mene saaaa nannaaira tale saa taumattu la ghaimuli tee, poli God ghe tau aatu sio voto akapaaili tani sausiem: ²² ta arova Pol, Apolos me Pita,* o kosa ateva oia, o maulue ateva me mate ateva, me voto etokatoka ghaine me voto auena emae, isaa akapaaili o voto uneimim. ²³ Ta am, kapuna am Karisto, me Karisto kapuna ia God.

4

Kapuna apostolo atoa Karisto

¹ Liuna avalua o me am tani nnaa va, ami kapuna tau ngai uungu iemami Karisto. God ghe atokaiemamila tani aulia ngaotu voto aisuliane kanna God. ² Kateva voto tau ngai uungu eteva etani gheeleia,

3:8: Mat 16:27; Ips 2:20-22. **3:11:** Ais 28:16; 1 Pita 2:4-6. **3:13:** 1 Ko 4:5. **3:16:** 1 Ko 6:19; 2 Ko 6:16. **3:19:** Job 5:13. **3:20:** Sams 94:11. * **3:22:** Pita Tale inangari nge Griek, Kepas. **4:2:** Luk 12:42.

va etani ghelei emasina uunguaane vauna ateva. ³ Karika anannaa marova am poppooaa teeieghi tale uunguaaghi, me saa llo taumattu epoppooaa teeieghi, ta aghi tee karika aghauliaa teeieghi. ⁴ Karika anannaa va righi voto sesa aghe gheelei, me karika eaapasunga va karika aghe gheleila righi sesa voto, ta Vau ngepona ateva egheelei niaiskei etaghi. ⁵ Liuna avalua o me am rau mene ppooaa tee katoa, ta nau eteva ave emae Vau ngepona ateva ave emae me ia ave egheelei niaiskei. Ia ave eaotu voto taumattu ngatoa laghe aaisulia tale urunguitaniira me karika la ghauliaa ta mene toa. Ia o nau eteva kateva kateva ave eghaa niaruua kanna God.

⁶ Kapughu etoa, aghe pitila llo oia tani aulieiniengalua me Apolos me tani apasunga voto etaimim. Tani annainiengalua, ave am roo tani kila amasina va am tani aimuli tee llo inangari laghe pitila tale Uru ngai Manga ateva, me am rau mene ghelei mene righi asease voto. Tale ia o salana atikirighi, am rau mene aturru kateva tau ngai aapasunga. ⁷ See ghe atokaiemla va am namuu iem ta mene katoa? Voto akapa am ghe ghaala, God ghe tau aatu. Me marova am ghaaghaa voto ta God, vaalua me am aasaesae nannaaimim nongina va am, am gheelei isaa o voto?

⁸ Am gheelei nongina va ngam ghe ghaala voto akapaaili, me ngam ghe ghaala niuungu ekapa Spiriti eteva enim tautau mae, me am annaa va am sarasarakana am ta Spiriti eteva nongina va ngam ghe kingila, me ami karika! Aghanna va am ghele toka nongina kingi etoa, me ami tee ami ghele nongina am. ⁹ Poli ta ngetaghi aghanan aa va God ghe atokaiemila apostolo atoa tani airuuruu. Ami nongina taumattu ngatoa ngila aisakeila me ngila uela va ave la mate tale tummatavanga, ta mataira ensolo atoa, me taumattu ngatoa, me tale kosa akapaaili eteva. ¹⁰ Ami, ami tokatoka va alokapakapa iemami poli ami uungu ta Karisto, me am, am annaa va alomasaangaaili iem ta Karisto. Ami tokatoka va karika sarasarakana amami, me am, am annaa va sarasarakana am, me am la oneoneainam, me am annaa va taumattu ngatoa la rau mene oneoneainamami. ¹¹ Tale isaa too nau me isaa oia nau ami maamaloo, me ami kaakangngata, me ami aasae ghinna marane, me la tuutumariemami, me ami kasukasu see me karika righi aleimami tani toka. ¹² Ami uungu aanasa tale nimaimami. Nau la auliaa saasakiaa teeiemami, ami aarangiseila. Nau la gheelei voto sesa etaimami ami aapala isaa o voto. ¹³ Nau la poppooa saasakiaa teeiemami, ami liuliu inangariira tale masi inangari. Me karika taumattu ngatoa la oneoneainiemami, me la taataraiemami nongina va kinanguluti eteva la laa kaokao velua.

¹⁴ Karika apitipiti llo oia tani apalataiem, ta aghanna tani apasunga llo voto am tani kila, nongina va masi natughu tuungi iem. ¹⁵ Arongona ta marova oroieili kapuimim tau ngai toitoi tani aitarainam tale uunguaane Karisto, me kateva nonga ia tamaimim ateva, poli ta Karisto aghi tamaimmi ieghi, poli aghe mae sio tani auliaa masi kiukiu etaimim. ¹⁶ Liuna avalua o aghaauliaa etaimim va, am usilaa gheeleiaaghi. ¹⁷ Me ngasungisungi tau aatu Timoti, ia natughu ia ta Karisto, me aghaailousieinia me aghaatoka tuutulighi etana tani ghelei uunguaa Vau ngepona ateva, me ia ave egheelei nannaaimim tani mene annaa

gheeleiaaghi tani usilaa Karisto Iesu. Ia aue eapasunga ngakapa voto aghaapasunga ngakapa see tale ale manga akapaili etoa.¹⁸ Katoa etaimim la nannaa va karika aue amae taraiem, me la aasake.¹⁹ Me ghaisa ngarighi amae taraiem, marova Vau ngepona ateva eaaloanna. Me aue akila sa ateva lo atoa la tautau sae nannaaira la gheeleia. Me aue akila va la gheelei tale sarasarakaniaane God, o la nim samasama.²⁰ Poli God eaapasunga va eaaitoiaa taumattu tale voto la gheelei, me karika va voto la aauliaa.²¹ Sa ateva am aloanna va agheleia? Arova am tam ruu tani ghelei evalua o, aue amae paruem tale inangari, o arova am nna ngaioghioghiaa, aue aghapasunga va aghielousieinam tale inangari saghuighuina.

5

Voto sesaaili tale ale manga ateva

¹ Karika aghe roola tani aiesoaa kiukiu aghe nongola tale uunguua nialai salosalooa see ateae elome etaimim, voto sesaaili taumattu ngatoa karika la aiesoaa tee karika la gheelei. Laghe auliaala etaghi va taumattu ngateva ona tale aleimim ale manga ateva ghe aso teela kinna talae ateva, vausenna ia tamana.² Me arongona va kateva etaimim egheelei isaa o voto, me am tautau sae nannaaimim! Vaalua me karika am ngangngala tani alousiusi me am palata? Me vaalua me karika am ghe ghaa vella ia o taumattu ngateva tale uneimim nivelu eitauua?³⁻⁴ Arongona ta karika atokatoka aitauua teeiem, me tale ninanna atokatoka aitauua teeiem. Me ta lo ateva taumattu ghe gheleila ia o ssavoto ateva ngaghe gheleila niaisakei etana tale ararina ateae Vau palepale Iesu. Am kolo teva nivelu eitauua tale ale manga, me aue atoka aitauua teeiem ona tale ninanna, me aue sarasarakaniaane namu ngateva Iesu etoka aitauua teeiem nau am velu eitauua.⁵ Me am ghaa velu ia o taumattu ngateva tale ale manga, nonginaaili va am mene tautaue lao ta Satana. Aue eghaa nimmarikana me aue enna ngaioghioghiaa, me aue eroo tani saanga nau Vau eteva esio.

⁶ Karika masina va am aasake. Karika am kilakila kateva inangari eue va, "Ghaunaaili tuku isti erighi egheelei erranga ia akapa palaoa ngateva"? Marova ia o taumattu ngateva etokatoka elome etaimim, aue egheleiem am usi gheeleiaana.⁷ Am ghaa velu ia o ssavoto ateva elome etaimim nongina ajiu etoa la ghaaghhaa velu isti auena ta nau Pasova, me aue am raarangisana, poli God ghe kkaluaala kaluimim ssavoto. Ta poli Karisto ghe matela etaita nongina ia o sipsipi eteva laghe uviuvi ematea ta Pasova.⁸ Liuna avalua o me ita nnaa ia o namanama ateae ta Pasova, karika ita namanama verete pokane laghe gheelei isti etana, malloeana va karika ita aimuli usi tee gheeleiaa ngemua arau, ta ita namanama verete karika righi isti etana, malloeana va ita aimuli tee llo God ghe auliaala etaita. Ita rau mene kamekame, ta ita auliaa llo koronna.

⁹ Tale nau ang ghe lao sio, aghe pitipitila etaimim va am rau mene aighui tee taumattu ngatoa la gheelei uunguua nialai salosalooa see ateae.¹⁰ Karika aghe aauliaa taumattu ngeleka atoa, la anna nialai salosalooa see ateae, me la aloanna nonga tani toka ghaaghhaa oroi voto,

me tau niainao ila, me la kakkauaa voto tale kosa ateva oia. Arova am aloanna tani kasu vuli isaa o ase sesa taumattu, am tani kasu vuli kosa ateva oia.¹¹ Malloeanina voto aghe aauliaa isaa avalua toko va, am rau mene aighui tee toa taumattu la ue va kapuna ila Iesu me la anna tani ailai salosalooaa see, me tau nissaii ila, me la kakkauaa voto tale kosa ateva, me la poppooaa sesa inangari tee mene kateva, me la ropiropi sesa manu eteva, me la aainao. Am rau mene nim namanama poi tee ila o ase taumattu ngatoa.

¹² Karika uunguaaita tani ghelei niaiskei tale taumattu ngeleka atoa, ta uunguaaimim tani ghelei niaiskei ta lo atoa elome tale ale manga la gheelei ssavoto tale isaa o salana.¹³ Nongina Uru ngai Manga ateva eue va, "Am ghaa velu sesa ateva taumattu elome etaimim." God egheelei niaiskei tale taumattu ngeleka atoa.

6

Uungua tani ghelei niaiskei

¹ Nau eteva kateva etaimim ange ghelei teela mene kateva taumattu ekakkaua, vaalua me elaelaoaa inangarina tale taumattu karika ekilakila God va ila la ghelei niaiskei etairarua, me karika elaelaoaa ta kapuna taumattu ngatoa God va la nongo?² Karika am kilakila va kapuna atoa God aue la ghelei niaiskei tale taumattu tale kosa ateva oia? Poli aue am ghelei evalua o, vaalua me karika am roo tani ghelei niaiskei tale voto pisike elutulutu elome etaimim?³ Karika am kilakila va aue ita ghelei niaiskei ta ensolo atoa? Isaa evalua o me ita roo tani ghelei pisike niaiskei tale kosa ateva oia.⁴ Liuna evalua o, me marova righi uneimim niaissa, vaalua me am tuutuli taumattu ngeleka atoa va la nongo uneimim niaiskei nau ale manga karika eoneoneainila?⁵ Aghaaulia ngavalua o tani apalataiem. Va karika teva taumattu etaimim elome tale ale manga alomasaanga ia va erooroo tani ghelei luei tale isaa o niaissa?⁶ Vaalua me kateva tau ngaisesoaa umene laelaoaa mene kateva tau ngaisesoaa tale niaiskei va taumattu ngateva karika eaiesoaa elaa ruu uneimalua niaiskei eteae?

⁷ Nau kateva etaimim elaelaoaa kateva tale niaiskei, eaapasunga va karika am aimuli tee salane God. Arova tau ngaisesoaa ngateva ekamekameo me eainao peim, urau mene laoainia tale niaiskei.⁸ Me karika, ta am tee, am gheelei voto sesa me am kamekame me am ainao peiira katoa, me isaa o voto sesa am gheelei elome etaimim.

⁹ Karika am kilakila va lo ateva egheelei sesa voto karika aue eghaa niarangise tale ararimangalina ateva God? Am rau mene aikameainam: Lo atoa la gheelei uunguaa nialai salosalooaa see atae, me la kakkauaa voto tale kosa ateva oia, me lo atoa la lailai sari maneira katoa, me lo atoa taita la asoaso tee mene katoa taita,¹⁰ me lo atoa tau niainao ila, me lo atoa tau nissaii ila, me lo atoa la ropiropi sesa manu eteva me la poppooaa sesa inangari tee mene katoa, me lo atoa la ghaiuvii tani ghaa ghinna, karika teva etaira aue eghaa ararimangalina ateva God.¹¹ Tale nau ang ghe lao sio, katoa etaimim am evalua o, me isaa oia ngam ghe raarangisanala tale uunguaa ssavoto ateva, me God ghe amangaiemla, me Spiriti eteva kanna ia kapuita God ateva ghe

ghelei eghulughuluuenaiemla tale ararina atea Vau ngepona ateva Iesu Karisto.

Tani ailai salosalooa see

¹² Katoa etaimim am ue va, “Ami rooroo tani ghelei aloannaaimami tale asease voto atoa.” Koronna, me karika va tani koronna akapa. Karika va voto akapaaili va masina etaimim. “Ami rooroo tani ghelei aloannaaimami tale asease voto atoa,” me karika aghaloanna tani tau velu teva voto va emuemueinaghi. ¹³ Me am ue va, “Inana pei tale kova ateva me kova ateva aighaa inana ia.” Ia o inangari eteva koronna ia, me am tani nnaa va God aue eturungi ekapailalua. Ta vilikiita ateva karika God ghe gheleila va ita uungueinia tale uunguaa nialai salosalooa see, ta peina ia Vau ngepona ateva me ia eaitaraa ia o vilikiita ateva. ¹⁴ Ta tale sarasarakaniaane ateva God aue etotuta tale nimate nongina ghe totula Vau eteva tale nimate. ¹⁵ Karika am kilakila va vilikiimim peina Karisto? Erooroo va taumattu ngateva eghaa vilikina ateva peina ia Karisto me eatoka aitauaa tee vilikina vause ngetapaa salana ateva? Karika poi! ¹⁶ Karika am kilakila va marova lo ateva elao aitauaa tee ia o ase vause ngetapaa salana ateva, ngeilalu kateva nongala tale vilikiirarua? Ta Uru ngai Manga ateva eue va, “Ilalua aue lalu kateva nonga tale vilikiirarua.” ¹⁷ Me lo ateva taumattu eaipatolaa tee Vau ngepona ateva, ekaakateva nonga ilalua tale spirit.

¹⁸ Am ilou vuli uunguaa nialai salosalooa see atea. Mene kasina ssavoto taumattu ngateva egheelei isaa eleka tale vilikina, me tale uunguaa nialai salosalooa see atea ugheelei saasakiaa vilikim tuunga ateva. ¹⁹ Karika am kilakila va vilikiimim ateva alena ale manga ia Spirit Manga ateva, am ghe ghaaiela ta God? Me karika am kilakila va karika va io uaaitarainio, ta io peina io God? ²⁰ Ghe poliemla tale aipolipoli eteva, liuna avalua o me am oneoneaa God tale vilikiimim.

7

Nikokkolomi tale nilai

¹ Ghaine aghaloanna tani auliaa voto am ghe piti mae sio etaghi. Kateva ta isaa o inangari, am ghe pitila va, “Taita ateva erau mene lai, me arova elai, erau mene aso tee vausenna ateva.” ² Poli oroieili uunguaa nialai salosalooa see, liuna avalua o me tani ghelei runga, emasina arova kateva taita eghaa vausenna ateva, me emasina arova kateva vause eghaa taitanna ateva. ³ Taita ateva erau mene raungaa vilikina ta vausenna ateva me vause ateva erau mene raungaa vilikina ta taitanna ateva. Ilalua akapa lalu roo tani ghelei erooaa aloannaairarua. ⁴ Vause ateva karika va ia nonga eaaitaraa vilikina, ta taitanna tee ateva. Tale ia o salana atikirighi, taita ateva tee karika ia nonga eaaitaraa vilikina, ta vausenna tee ateva. ⁵ Kateva urau mene raungaa vilikim ta kateva. Marova amalu mae tale kateva ninannaa va amalu ainoana amua tani aso aitauaa, me amalu ghelei mua uunguaa nilooloo sae, me nau nilooloo sae erau mene aluse. Arovaeaata ta amalu mene mae aitauaa, ta Satana erau ghelei nitootoonga etaimalua, poli karika amalu rooroo tani ghelei runga aloaloanna niaso aitaua ngateae. ⁶ Isaa oia inangari aghaauliaa karika va inangari sarasarakania tani aimuli

tee, ta anim auliaa me aloannaaimim. ⁷ Aloannaaghi va marova am akapaaaili am ghele rau mene lai nongina aghi, me karika, ta kateva kateva taumattu eghaaghaa voto God ghe nim tautau lao sio; katoa la lai, me mene katoa karika.

⁸ Ta ngetaimim lo atoa tam lai iem, me ta lo atoa vause raue vulu em, emaamasina va am ghele nim toka nongina aghi. ⁹ Me arova karika uurooro tani aitaraa aaloannaam tani aso aitauua, uroo tani lai me urau mene toka annaa aaloannaam tani aso aitauua.

¹⁰ Me ta lo atoa lailai iem, aghaaaulia ngasarasarakanan etaimim inangari, karika va inangarighi ta inangarina Vau ngepona ateva: Vause ateva erau mene kasu vuli taitanna ateva. ¹¹ Ta marova ekasu vulia me karika eoghi lao ta taitanna ateva, erau mene lai. Me taita ateva erau mene rati vausenna ateva.

¹² Me ta mene lo atoa am lailai ta lo atoa karika tau ngaisesoaa ila, aghanna tani mene ppoooaa nim inangarighi, karika va inangarina Vau ngepona ateva. Marova taita ateva, vausenna ateva karika eaiesoaa, me ealoanna tani toka tee taita ateva, taita ateva erau mene ratia. ¹³ Me marova vause ateva ekakkauua me taitanna ateva karika, marova taita ateva ealoanna tani toka tee vause ateva, vause ateva erau mene tiu velua. ¹⁴ Poli taita ateva karika eaikaaiaa, God ghe arangiseiela poli vausenna ateva eaikaaiaa. Me vause ateva karika eaikaaiaa, God ghe arangiseiela poli taitanna ateva eaikaaiaa. Marova isaa o voto karika koronna, aue natuirarua atoa karika aue la raarangisana. Me karika, ta isaa oia nau, manga ila.

¹⁵ Marova lo ateva karika eaiesoaa eanna tani kasu, tau veluela. Tau ngaisesoa ngateva, uroo tani mene lai, karika teva egheelei rungainio. Poli God ghe kolotala tani toka tale luei. ¹⁶ Am vause atoa, vaalua am rooroo tani kila va taitanim atoa la rooroo tani aikolikoliao me la saanga, me am tee taita atoa, vaalua am rooroo tani kila va vausenim atoa la rooroo tani aikolikoliao me la saanga?

¹⁷ Emaamasina arova kateva kateva etaimim eroo tani toka nongina vaalua Vau eteva ang ghe atokaiela, me nongina God ghe tani kolo akasinaiela. Ia oia inangari nipaopao ateva aghaulieinia tale ale manga akapaaaili etoa. ¹⁸ Marova lo ateva ngila ghe isoielo, erau mene tootoonga tani aikolikolieinia va arova karika laghe isoielo. Me marova lo ateva karika laghe isoia, karika emene tau velua va la isoia. ¹⁹ Niisoiso ataeae nim peisaane ia, me nitam isoiso ataeae tee nim peisaane ia. Ta tani aimuli tee kannaa inangari sarasarakanan God namuu ia. ²⁰ Am rau mene tootoonga tani aikolikoliao sa ateva am ghe tokatoka etana nau God ghe koloamla. ²¹ Marova lo ateva tau ngai uungu io karika utokatoka tale aloannaam nau God ghe koloola, urau mene nannangaili. Ta marova tikirighi salana eoti tani mene toka tale aloaloannaam, uaimuli tee. ²² Poli lo ateva euungu me karika etokatoka tale aloannaane, me Vau palepale ghe koloala, God ang ghe gheleielo nongina va taumattu ngateva etokatoka tale aloaloannaane. Me mene isaa aitauua nongina lo ateva taumattu ghe tokatoka tale aloannaane nau God ghe koloala, ia nim tau ngai uungu ia etokatoka ta aloannaane Karisto. ²³ God ghe poliemla tale aipolipoli eteva. Liuna avalua o me am rau mene aimuli tee katoa la auliaa sa ateva am tani gheleia tani

amasimasi God. ²⁴ Kapughu etoa, kateva kateva etaimim etani toka nongina God ghe kolo akasinaiela, poli God etokatoka teeiem me aue esausiem.

²⁵ Me tale lo atoa taumattu tam lai iem, karika aghe ghaala righi inangari sarasarakanan ta Vau ngepona tani auliaa etaimim. Tale alousiusiaane, Vau eteva ghe tau mae sio alomasaanga etaghi me am rooroo tani atoka tuutuliimim etaghi, me aue aghauliaa sa ateva anannainia. ²⁶ Poli tale isaa oia nau, ange aanasaailli me aghanna va masina etaimim tani nim toka va karika lailai iem. ²⁷ Marova lailai iem, am rau mene airatii, me arova karika lailai iem, am rau mene tootoonga tani ghaa righi vauseniimim. ²⁸ Me arova taita ateva ulai, karika ugheelei ssavoto, me marova vause ateva ulai, karika ugheelei ssavoto. Me ta lo atoa lailai ila aue la sau voto aanaaa tale maamaulueaaira. Karika aghanna va isaa o voto aanaaa elutu etaimim.

²⁹ Kapughu etoa, malloeana inangarighi isaa avalua toko, va nau ange tuutukunailli, me tale nau too emaema, lo atoa vauseniira atoa nannaairaa ta vauseniira atoa erau mene lau uunguaane God. ³⁰ Nimasimasi, nialousiusi me peira erau mene ghelei erungainila tani ghelei uunguaane God. ³¹ Tau ngaisesoa ngatoa am ghinaghina voto tale kosa ateva oia, am rau mene atoka nannaaimim tale isaa o voto. Poli kosa ateva oia am taataraaia ghaine aue ekapa.

³² Aghaloanna va am rau mene nnangaili vaalua tani toka. Lo ateva taita tam lai ia eanannangaili uunguaane Vau ngepona ateva, nongina vaalua erooroo tani ghelei emasimasia. ³³ Me lo ateva lailai ia enannangaili voto tale kosa ateva oia nongina vaalua erooroo tani ghelei emasimasi vausenna ateva, ³⁴ me nannaane eghaaghluu. Me lo ateva vause tam lai ia enannangaili uunguaane Vau ngepona ateva. Aloannaane tani taula maamaulueaane ta Vau ngepona ateva tale vilikina me tale spirit. Me tale vause ateva lailai ia, enannangaili voto tale kosa ateva nongina vaalua aue eghelei emasimasi taitanna ateva. ³⁵ Aghaauliaa isaa oia voto tani sausiem me karika va tani ghelei rungainam. Ta aghaloanna tani sausiem va am toka tale masi salana, me erau mene ghalua nannaaimim nau am uungu ta Vau ngepona ateva.

³⁶ Arova unannaa va karika angu gheelei emasina ta vause ateva la ue va ulai etana, me angu nannangaili tani lai, amalu lai, karika sesa voto amalu nanna tani ghelei. ³⁷ Me marova angu nnaala va karika amalu mene lai, karika umene usilaa katoa nannaairaa, ughusilaa saa ninannaa angu nnaala, masina. ³⁸ Isaa avalua o me lo ateva elai ta vause ateva, egheelei masina voto, me lo ateva etam lai ta vause ateva, egheelei voto masinaaili.*

³⁹ Vause ateva etani toka tee taitanna ateva lamosina ta taitanna ateva emate, me evira roo tani mene lai ta mene teva taita eanna. Me ia o taita ateva egħħaia etani tau ngaisesoa ta Vau ngepona ateva.

7:31: 1 Jon 2:17. * **7:38:** Katoa tau ngalomasaanga la annaa va malloeana isaa avalua toko va: 36 Arova unannaa va karika angu gheelei emasina ta natum aliki vause ateva nau ange roo poila tani lai, me uvira anna va elai, utau velua me elai, karika sesa voto ugheelei. 37 Me marova angu nnaala va natum aliki vause ateva erau mene lai, karika umene usilaa katoa nannaairaa, ughusilaa saa ninannaa angu nnaala, isaa o voto angu nnaala, masina. 38 Isaa avalua o me lo ateva eta uvelu natuna aliki vause ateva va elai, egheelei masina voto, me lo ateva etam tautau velu natuna aliki vause ateva va elai, egheelei voto masinaaili. **7:39:** Rom 7:2-3.

⁴⁰ Tale nannaaghi, arova vause ateva enim toka, me etam lai, aue emasimasi, me aghannaa va kapuna Spiriti eteva God elaoalao aitaaua tee nannaaghi.

8

Malatau laghe gheelei sae aiaavusuvusuena tale tootoo atoa

¹ Me tale malatau la gheelei sae aiaavusuvusuena tale tootoo atoa: Ita kilakila va, nongina am ghe pitila va, "Ita akapaaili ita kilakila oroi voto," me ia o nikila voto atae erooroo tani gheleita va ita tau sae nannaaita. Me nialousi eteva egheleita tani mene sausi kateva. ² Lo ateva taumattu eannaa va ekilakila akapa voto, karika ekilakila nongina God ealoanna va ekila. ³ Ta lo ateva taumattu eailousiaa God, God etaatara kilaia.

⁴ Tani nama malatau la gheelei sae aiaavusuvusuena tale tootoo atoa,* "Ita kilakila va tootoo atoa karika va koronna ila tale kosa ateva oia," ta ita kilakila va, "Kateva nonga ia God ateva." ⁵ Me arongona ta oroi voto epona liu me tale kosa ateva la kolokolola va goto ila me vau ila, ⁶ me etaita kateva nonga ia God ateva Tamaita ia, ia ghe gheleila voto akapaaili, me ita maamaulue tani oneoneainia. Me kateva nonga ia Vau ngepona ateva Iesu Karisto, ta ngetana God ghe gheleila kosa ateva, me ia etautau mae maulue etaita.

⁷ Me karika va tau ngalesoa ngakapa atoa la kilakila isaa o voto koronna, ta katoa laghe namuu teela niaiesoaa va tootoo atoa maulue ila. Liuna avalua o me nau la namanama malatau taumattu ngatoa laghe ghelei saela aiaavusuvusuena etana tale tootoo atoa, karika aloira ghe maamasaangala, la aateateaa va voto la gheelei karika masina. ⁸ Karika va inana aue elaoa ngakalakalanginaita ta God, me God karika aue etaraio va masina io arova unamanama, me karika aue etaraio va sesa io arova utam namanama.

⁹ Am paniem, am kila va voto am aloanna tani ghelei tale alomasaangaimim erau ghelei lo atoa saghuighuina ila tale niaiesoaa va la katuu. ¹⁰ Poli marova lo ateva ukilakila isaa oia voto me unamanama elome tale teva ale nikkaua alena ateva tootoo goto, me teva karika korokorongana ia tale niaiesoaa etaraio, isaa o voto ugheelei aue easarasarakanaia tani nama malatau la gheelei sae aiaavusuvusuena tale tootoo atoa. ¹¹ Liuna avalua o me ia o kapum ateva karika korokorongana ia tale ninannaa, Karisto ghe matela etana, angu turungila unna niaikaaiaa tale voto ugheelei tale alomasaanganiaam. ¹² Io angu gheleila sesa voto ta Karisto nau angu gheleila voto sesa ta kapum ateva, tale ia o salana atikirighi, me ugheelei saasakiaa nannaane. ¹³ Liuna avalua o me marova malatau anamanama egheelei kapughu eteva ekaakatuu, karika poi aue amene nama malatau, poli arau mene gheleia va ekatuu.

9

Pol nongina mene katoa apostolo

8:1: Apos 15:29. **8:2:** Gal 6:3. **8:4:** Gal 4:8; Diut 4:39; 6:4. * **8:4:** Katoa aGrik laghe gheelei sae sua ghaata kkena aiaavusuvusuena tale tootoo atoa tale aleira ale nikkaua, me laghe vira laolaoa malatau tale maketi va la poli. **8:6:** Ips 4:5, 6. **8:9:** Rom 14:13-15; Gal 5:13. **8:11:** Rom 14:15, 20. **8:13:** Rom 14:21.

¹ Arooroo tani ghelei voto God eaauliaa va masina tani ghelei. Am nannaa va aghi karika apostolo ieghi? Me karika am kilakila va aghi tee aghe tarala Iesu Vauita ia? Poli uunguaaghi am, ang ghe kapuna iemla Vau ngepona ateva. ² Arongona ta marova katoa la annaa va aghi karika apostolo ieghi, me poli am ghe aiesoala tale uunguaaghi, eaapasunga va aghi apostolo ieghi elome ta Vau ngepona ateva.

³ Nau taumattu ngatoa la aauliaa teeieghi va karika apostolo ieghi, aliuliu evalua etaira toko va: ⁴ Emaamasina va angalua me Banabas angalu ghaa inana me ateo etaimim. ⁵ Mene katoa apostolo, me kapuna atoa Vau ngepona ateva, me Pita,* la kasukasu tee vauseniira atoa, me am angiinginila, me am annaa va angalua karika am mene anginiengalua? ⁶ Ta am annaa va angalua nonga me Banabas ngalu tani uungu tani aisausiaa tokatokaalingalua?

⁷ Sa ateva soldia euungu me ia emene paepae voto eghelei tani sausi tokatokaane? Sa ateva taumattu epasapasa eutana me etam namanama inanina? Me sa ateva taumattu eaitoia kiena sipsipi me etam ropiropi rarumi ssuira? ⁸ Karika aghaauliaa voto oia tale aalomasaangania taumattu, ta inangari nipaopao tee eaauliaa. ⁹ Poli Moses ghe pitila tale inangari nipaopao va, “Nau vulumakao ateva euungu tani ghaa velu viliki raisi, am rau mene ghelei runga paane ateva va karika emene nama isaa o raisi.” Koti am annaa va God ghe nannaa vulumakao atoa me ghe auliaala isaa o voto, no? ¹⁰ Am annaa va ghe auliaa etaita nau ghe aulia ngavalua o? Ue! Poli ghe pitila va aloita emasaanga. Lo ateva esaisai utana ateva me lo ateva epasapasaia, lalu uungu poli lalu aiesoaa va auena lalu ghaa inana tale niuungu o lalu gheelei. ¹¹ Poli ami ghe pasala masi ue ngai elome etaimim kanna Spirit Manga, ami annaa tani mene ghaa ghinna etaimim tani sausiemami. ¹² Marova emasina va katoa la ghaaghaa voto etaimim, aue emasinaaili marova ami tee ami ghaa voto etaimim.

Me karika ami ghe ghaaghaa llo voto erooroo va am tau mae tani sausiemami, me ami ghe maamatua maate ghe maemae tale maa-maulueaaimami poli ami ghe rau ghelei runga masi kiukiuna Karisto. ¹³ Am kilakilaaili va lo atoa la uungu tale ale manga, la ghaaghaa aneira inana tale ale manga. Me lo atoa la gheelei sae aiaavusuvusuena la namanama kasina malatau la gheelei aiaavusuvusuena etana. ¹⁴ Tale ia o salana atikirighi Vau ngepona ateva ghe aulia ngasarasarakanala va lo atoa la poppoaaa masi kiukiu, la ghaa aipolipoli tani sausi tokatokaairata lo atoa la nonganongo isaa o masi kiukiu.

¹⁵ Me karika aghe kolomi poila righi voto erooroo va am tau mae tani sausieghi, me karika apitipiti isaa oia inangari poli aghanna va am tau mae righi voto etaghi. Karika aue aghannaa arova amate tee nimaloo me tani velu gheleliaaghi va apoppoaaa masi kiukiu me karika teva etautau mae aipolipoli. ¹⁶ Nau eteva apoppoaaa masi kiukiu, karika arooroo tani asaesae nannaaghi, poli niuungu eteva tani ppooaa, God ghe tauve mae sio etaghi tani gheleia. Aue esesaaili etaghi marova atam gheleia! ¹⁷ Marova anim ppooaa tale aloannaaghi, aue aghaa aipolipoli,

9:1: Apos 22:17-18; 26:16; 1 Ko 15:8-9. **9:2:** 2 Ko 3:2-3. **9:4:** Luk 10:8. *** 9:5:** Pita Tale inangari nge Grik, Kepas. **9:9:** Diut 25:4; 1 Tim 5:18. **9:10:** 2 Tim 2:6. **9:11:** Rom 15:27. **9:12:** Apos 20:34; 2 Ko 11:9. **9:13:** Diut 18:1-3. **9:14:** Mat 10:10; Gal 6:6. **9:16:** Jer 20:9.

me marova karika va tale aloannaaghi, aghi nim gheelei niuungu eteva God ghe taue mae sio etaghi,¹⁸ me saa aipolipoli aue aghaa? Uneghi aipolipoli eteva, ia avalua toko va: amasimasi tani ppooaa masi kiukiu me karika amene nnaa tani ghaa viliki veu, me karika amene kolomi voto erooroo va aghaa tale uunguaaghi eteva tani ppooaa masi kiukiu.

¹⁹ Arongo ta anim tokatoka tale aloannaaghi, me karika teva eaitoieinaghi, ngaghe nim nonginala tau ngai nonganongo anna ateva tani ghaa oroieili taumattu va la mae ta Karisto. ²⁰ Nau auungu tee ajiu etoa, atokatoka nongina ila, tani ghaaila. Arongona ta aghi atam uusilaa inangari nipaopao kanna Moses, atokatoka nongina lo ateva euusilaa inangari nipaopao, tani ghaaila. ²¹ Tale ia o salana atikirighi, nau auungu tee taumattu ngeleka atoa, karika la posoposo inangari nipaopao kanna Moses, atokatoka nongina taumattu ngateva karika eposoposo inangari nipaopao. Agheelei evalua o tani ghaa oroi taumattu ngeleka atoa. Karika malloeane va atam nonganongo usilaa salane God, karika, ta anonganongo usilaa salane Karisto. ²² Nau atokatoka tee lo atoa karika korokorongana uneira niaakaiaa, asease voto la nannaa va karika masina ta tau ngaisesoa ngatoa, karika agheelei isaa o voto, poli arau turungi uneira niaakaiaa. Atokatoka nongina tokatokaairaa taumattu ngatoa tani pae ase salana kona vaalua aroo tani asaangi righi taumattu. ²³ Agheelei isaa o voto mausi masi kiukiu, me ila me aghi aue ami ghaa niarangise kanna God etautaula ta lo atoa la aikaiaa tale masi kiukiu.

²⁴ Am kilakila va lo atoa la aaikarati, kateva nonga ia lo ateva aue eghaa aipolipoli. Am ilou esarasarakana tani ghaa aipolipoli. ²⁵ Lo atoa la aikarati tale niaikarati eteae, la aaimonomonosiaa tale niaikarati eteae tani ghelei vilikiira esarasarakana tani ilou. La gheelei isaa o llo tani ghaa aipolipoli karika aue toka liu, me ita, ita uungu tani ghaa lo ateva aipolipoli tokatoka liu ia. ²⁶ Liuna avalua o me karika va anim ilou rorrou, me karika va aghaaitumari nongina taumattu ngateva ekekkelii tau ngai ssateena ateva me enim tuutumari kuukuu. ²⁷ Karika! Ta agheelei vilikighi tani ghelei va eaimuli tee aloannaaghi, ta God erau ue va atam rooroo tani ghaa aipolipoli, arongona ta aghe poppoaa masi kiukiu ta katoa.

10

Nipaopao tani rau mene kkauaa tootoo goto

¹ Me tee, kapughu etoa, karika aghanna va am kkaluaa va tuvuita akapa atoa laghe aimuli tee kookoo ngateva me laghe kasu longotila eRet Sii. ² Tale kookoo ngateva me tale paa manu eteva, ila akapaaili laghe ghaala niaasuu me laghe kapuna disaepolola Moses. ³ Ila akapa laghe namanama kateva nonga ia inana God ghe taue lao sio,⁴ me laghe ropiropi kateva nonga ia manu eteva God ghe taue lao sio. Me laghe ropiropi tale atu eteva God ghe taue lao sio, ghe kasukasu teeila. Ia o atu eteva Karisto etana. ⁵ Me oroi lo atoa God karika ghe masimasieinilala, liuna avalua o me laghe matela tale voto ateva karika righi taumattu etokatoka etana, me vilikiira ghe rooa ngakapa seela ia o voto ateva.

9:20: Apos 21:20-26. **9:22:** 2 Ko 11:29. **9:25:** Plp 3:14; 2 Tim 4:7-8; 2:4-5. **9:27:** Rom 8:13; 13:14. **10:1:** Eks 13:21-22; 14:22-29. **10:3:** Eks 16:35. **10:4:** Eks 17:6; Nam 20:11. **10:5:** Nam 14:29-30.

⁶ Isaa o voto ghe lutula va eaimatootoongana tani ghelei rungainita tani rau mene tau velu urunguitaniita va elao tale ssavoto nongina ila laghe gheelei. ⁷ Am rau mene toka kakkauaa tootoo atoa nongina katoa etaira. Uru ngai Manga ateva eue va, “Taumattu ngatoa laghe tokatoka sio tani namanama me tani ropi, me laghe tiitingina sae tani loku me laghe gheelei ssavoto.” ⁸ Ita rau mene ghelei niailai salosaloaa see atae nongina katoa etaira, me tale kateva nau, ghaluengaulu kotolu airari (23,000) etaira laghe matela. ⁹ Ita rau mene tootoonga Karisto nongina katoa etaira laghe gheelei, me katu ngatoa laghe katakata amatela. ¹⁰ Me am rau mene auliulia nongina katoa etaira laghe gheelei, me ensolo ateva tau ngai tturuu ia ghe uvi ematelala.

¹¹ Isaa o voto ghe lutula etaira va uneita aimatootoongana, me laghe piti elokoi siola tani auliaa kieita lo atoa ita tokatoka tale airuuruu tale kosa ateva. ¹² Liuna avalua o me marova am annaa va am tiitingina akorokorongana, am aikinikinitaa tokatokaaimim ta am rau katuu. ¹³ Karika righi nitootoonga am ghaaghaa va isaa ppae, ta nim isaa aitauua tale mene kasina nitootoonga elutulutu ta taumattu ngakapa atoa. Me God egheelei voto eue va aue egheelei, karika erooroo tani tau veluem va am ghaa namungaili nitootoonga karika am rooroo tani apala. Ta nau am sou nitootoonga, aue eapasunga salana esausiem tani tingina akorokorongana.

Ninamanama tale tootoo me unna ateva ninamanama Vau ngepona ateva

¹⁴ Liuna avalua o, masi kapughu etoa, am kasu vuli uunguua nikkauua tale tootoo goto atoa. ¹⁵ Asamasama tee taumattu alo-masaanga va am tani nna ngamasina va llo aghaauliaa koronna o kamena. ¹⁶ Nau ita ropiropi tale kapa ateva nau niLosapa, ita kaakaili emasina etana, ita aighui tale raena ateva Karisto. Me nau ita namanama verete isaa o ita aipiria, ita aighui tale vilikina Karisto. ¹⁷ Poli ita oroieili ita me kateva nonga ia verete ateva, kateva nonga ia viliki ita, poli ita akapaaili ita namanama tale ie nonga o verete ateva.

¹⁸ Am annaa taumattu tale Israeli etoa: Lo atoa laghe namanama aiaavusuvusuena laghe kaakateva nonga tale ia o nikkaua ngateae. ¹⁹ Malloeane inangarighi isaa avalua toko va aiaavusuvusuena tau-mattu ngatoa la gheelei lao tale tootoo atoa nim malatau ila, me tootoo goto atoa nim tootoo ila. ²⁰ Ta uneira aiaavusuvusuena lo atoa la tam aiesoaa, la gheelei lao ta raroai etoa, me karika va ta God, me karika aghalona va am aighui tee raroai etoa. ²¹ Karika am rooroo tani ropi tale unna kapa ateva Vau ngepona ateva me unna tee ateva Satana. Karika am rooroo tani namanama tale tevoo alua, unna ateva Vau ngepona ateva me unna ateva Satana. ²² Vaalua? Ita tootoonga tani ghelei Vau ngepona ateva va esessaia? Ita nannaa va ita sarasarakanita etana?

²³ Katoa etaimim am ue va, “Ami rooroo tani ghelei aloannaaimami,” me aghaauliaa etaimim va karika va isaa akapaaili voto aue erooroo tani sausiem. Am ue va, “Ami rooroo tani ghelei aloannaaimami,” me

karika va isaa akapaaili voto egheelei ekorokoronganaita. ²⁴ Karika teva emene nnainia nonga, ta ennaa maamasinaaira mene katoa.

²⁵ Am nim nama malatau am polipoli tale maketi, me am rau mene kolomi righi nikokkolomi eghelelai nannaaimim eghaaghala va malatau o eaa ekasula. ²⁶ Poli, "Kosa ateva kanna ia Vau palepale me voto akapaaili etokatoka etana."

²⁷ Marova toa taumattu la tam aiesoaa la koloam tani laa namanama, me am anna tani usilaa, am nama sa ateva ngila atokaiela emua etaimim. Am rau mene nnaa va am kolomi righi nikokkolomi eghelelai nannaaimim eghaaghala va malatau o eaa ekasula. ²⁸ Me marova teva eue etaimim va, "Isaa oia malatau laghe gheleila aiaavusuvusuena etana tale tootoo," am rau mene nama isaa o malatau, mausi ia o taumattu ngateva eaauliaa, me poli enannaa va karika masina tani nama. ²⁹ Karika aue va am nnaa va karika masina tani nama, ta ia o taumattu ngateva enannaa va karika masina tani nama. Poli vaalua me vara aghelei aloaloannaaghi, me am gheelei rungainaghi me am muemueaa aloaloannaaghi? ³⁰ Marova ausi tani namanama tale ia o ninamanama atae, me akaili emasina sae ta God, vaalua me mene kateva taumattu eaauliaa teeieghi inangari sesa tale isaa o voto ngakaili emasinala ta God va anama?

³¹ Liuna avalua o me nau am namanama, o am ropi, o sa ateva am gheleia, am ghelei tani tau sae ararina atae God. ³² Am rau mene ghelei taumattu va la katuu: ajiu etoa, aGrik atoa o taumattu ngatoa tale alena ale manga ateva God. ³³ Nongina aghi atootoonga tani ghelei voto emasina tale mataira taumattu ngakapaaili tale isaa akapa salana, poli karika anannainieghi nonga, ta aghanna tani sausi oroi taumattu va la roo tani saanga.

11

¹ Am usilaa gheleliaaghi nongina auusilaa gheleliaa Karisto.

Salana nikkauaa ta taita atoa me vause atoa

² Amasimasieinam ta am annainaghi tale voto akapa, me am posoposo parasi voto aghe apasungaala etaimim.

³ Me aghanna va am tara kila va Karisto uruira ia taita akapaaili etoa, me taita ateva uruna ia vausenna ateva, me God uruna ia Karisto.

⁴ Isaa akapaaili taita eloooloo sae me eaauliaa inangarina God, me la akou uruira, karika la oneoneaa uruira. ⁵ Me vause atoa la looloo sae me la auliaa inangarina God, me karika la aakou uruira, karika la oneoneaa uruira; nonginaaili va la ghaggali uruira. ⁶ Marova vause ateva etam akou uruna ateva, emaamasina arova ghele ggali uruna ateva, me poli epaapalata tani sunapi etukuna o tani ggali velu uu nguruna, eakou uruna ateva. ⁷ Me taita ateva erau mene akou uruna ateva, poli ia eaapasunga taataraane me maamasinaane God. Me vause ateva eaapasunga maamasina taitanna ateva. ⁸ Poli karika va God ghe gheleila taita ateva tale vause ateva, ta God ghe gheleila vause ateva tale taita ateva, ⁹ me karika God ghe gheleila taita ateva mausi vause ateva, ta God ghe gheleila vause ateva mausi taita ateva. ¹⁰ Liuna avalua o me

mausi ensolo atoa* me vause ateva eaakou uruna ateva tani apasunga va ia matuutulienia ia.

¹¹ Ta Vau ngepona ateva, vause ateva karika ie nonga etokatoka, me taita tee ateva karika ie nonga etokatoka. ¹² Poli nongina vause ateva, God ghe gheleielia ta taita ateva, taita ateva ghe lutula ta vause ateva, me voto akapa ghe mae sio ta God. ¹³ Am annaa va masina ta vause ateva eloooloo sae ta God, me karika eaakou uruna ateva? ¹⁴ Tale gheeleiaaita, ita kilakila va marova taita ateva aluse uu nguruna aue epalata, ¹⁵ me vause ateva uu nguruna aluse, aimolumoluna ia tani ghelei emasimasia, poli uu nguruna aluse God ghe tau lao sio etana tani akou uruna ateva. ¹⁶ Marova teva eanna tani aissakeana teeieghi tale isaa oia inangari, eroo tani kila va ami, ami tam aimuli tee mene kasina asease salana tani kkauua, tee me mene kasina alena ale manga God.

Unna ninamanama ataeae Vau ngepona ateva

¹⁷ Tale isaa o inangari karika aghanna tani asaesae gheeleiaaimim, poli nau am veluvelu eitauua, am gheelei oroeili voto sesa me karika am gheelei voto masina. ¹⁸ Aitiutiu eteva voto, aghe nongola va nau am maemae aitauua tani kkauua, karika am kaakateva nonga, me aghaiesoaa va isaa oia inangari anonganongo mala koronna. ¹⁹ Koti ghele masina arova am ghelei aipolaii, me aue ita tara va see etani uusilaa gheeleiaane God. ²⁰ Nau am maemae aitauua tani namanama tale Losapa ateva, karika va ia o ninamanama ataeae am gheeleia va unna ia Vau ngepona ateva, ²¹ poli nau am namanama, karika am roo tani toi mene katoa, ta kateva kateva etaimim emuemue tani ghaa anna inaŋa. Liuna avalua o me katoa la maamaloo me lo atoa la tuvutuvu tani namanama me ropi, nannaaira eaaisavisavila. ²² Vaalua? Karika righi aleimim va am toka etana me am namanama me am ropi? Vaalua me karika am oneoneaa kapuna taumattu God, me am mae aapalata lo atoa karika righi peiira? Sa ateva aue aghaulieinia etaimim? Am annaa va agharueinam tale isaa oia voto? Karika poi!

²³ Poli saa llo voto aghe ghaala ta Vau ngepona ateva ngaghe apasungaala ta ngetaimim. Isaa avalua toko va: Vau eteva Iesu, tale ia o voo ngateva laghe tauela ta tau ngai ssateena atoa, ghe ghaala verete, ²⁴ me ghe kaili emasina saela ta God, me ghe pirila, me ghe uela va, “Isaa oia verete malataughu ngatautau aatu mausimim. Am ghelei isaa o voto tani nnainaghi.” ²⁵ Tale ie nonga o salana atikirighi, vara laghe ruula tani namanama me ghe ghaala kapa ateva, me ghe uela va, “Ia oia kapa ateva eaaimatoonga raeghi eteva, egheelei lo ateva inangari niaippooa ngaitauua ouna ia. Nau ekapa atoa nau am ropia, am ghelei isaa o voto tani nnainaghi.” ²⁶ Tale nau ekapaaili, nau am nama ia oia verete ateva me am ropi ia oia kapa ateva, am aaulia ngaotu matemateaane Vau eteva lomosina ta esio.

²⁷ Liuna avalua o me see unama verete me uropi tale unna kapa ateva Vau ngepona ateva tale salana atikirighi etam oneoneaa Karisto, ugheelei voto sesa tale vilikina me raena ateva Vau ngepona ateva.

²⁸ Taumattu ngateva etani tara mua maamauluaane, me auena enama verete me eropi tale kapa ateva. ²⁹ Poli lo ateva enamanama me eropi tale kapa ateva, me karika eoneoneaa vilikina Vau ngepona ateva,

* **11:10:** Tale nannaaira ajiu etoa, nau nikkauua, ensolo atoa tee la tokatoka. **11:18:** 1 Ko 1:10-12. **11:25:** Eks 24:6-8; Hib 8:8-13. **11:27:** Hib 10:29.

enim tutturungi maamauluaane. ³⁰ Isaa avalua o me oroi lo atoa elome etaimim karika la sarasarakana me la iisiki, me katoa ngila ghe asekanuela. ³¹ Marova ita tara akasina mua maamauluaaita, God karika aue eturungita. ³² Nau Vau ngepona ateva egheelei niaiskei etaita, eparuparuta nongina aliki etoa. Liuna avalua o me karika aue ita ghha sesa aipolipoli eitauaa tee taumattu tale kosa ateva oia.

³³ Liuna avalua o, kapughu etoa, me nau am mae aitauaa tani namanama, am toi mene katoa. ³⁴ Me see emaamaloo enamanama tanganuena, erau alutu righi niaiskei etaimim nau am veluvelu eitauaa poli karika eoneoneaa vilikina ateva Karisto. Me tale mene kasina voto, aue aghaulia ngamasina etaimim nau amae.

12

Asease niuungu Spiriti eteva enim tautau mae

¹ Kapughu etoa, tale kanna asease niuungu Spiriti eteva enim tautau mae, karika aghalona va aloimim etam masaanga. ² Am kilakila va nau am ghe tokatoka va taumattu ngeleka am, am ghe tau vella maamauluaaimim tani usilaa oroi salana tani kkauaa tootoo atoa karika la samasama. ³ Isaa avalua o me aghauliaa etaimim va karika teva eaippooaa tale aisausiaa kapuna Spiriti eteva God erooroo tani ue va, “Nikasikiena esae ta Iesu,” me karika teva eroo tani ue va, “Iesu Vau ngepona ia,” arova Spirit Manga ateva karika emuemueinia.

⁴ Oroi asease niuungu Spirit Manga ateva etautau mae etaita, me kateva nonga ia Spiriti eteva. ⁵ Me oroi asease niaiskei, me kateva nonga ia Vau ngepona ateva. ⁶ Me oroi asease salana tani ghelei niuungu, me kateva nonga ia God ateva etautau sarasarakana tani ghelei isaa o niuungu.

⁷ God eaapasunga kapuna Spiriti eteva ta kateva kateva tani sausi tau ngaisesoa ngakapa atoa tale ale manga ateva. ⁸ Ta kateva taumattu, Spiriti eteva etautau rooroaala tani aulia ngamasalika alomasaangania God. Ta mene kateva, ia nonga o Spiriti eteva emene tautau inangari pasu tale alomasaanga. ⁹ Ia o Spiriti eteva etautau niaiesoaa ta kateva, me ta mene kateva, etautau sarasarakana tani ghaa velu isiki. ¹⁰ Ta mene kateva, etautau sarasarakana tani ghelei mirikolo atoa, ta mene kateva uunguaa tani auliaa inangaria God, ta mene kateva etautau alomasaanga tani kila va voto kanna kapuna Spiriti eteva God o karika, me ta mene kateva etautau alomasaanga tani aippooaa tale mene kasina ase niaippooaa kanna Spiriti eteva, me ta mene kateva etautau lao alomasaanga tani aulia ngamasalika malloeane isaa o ase niaippooaa kanna Spiriti eteva. ¹¹ Kateva nonga ia Spiriti eteva, ia egheelei ekapaaili isaa o niuungu, me tale aloannaane etautaula ta kateva kateva taumattu.

Kateva nonga ia vaulanina ateva Karisto me oroi voto etana

¹² Vaulaniita ateva kateva nonga ia, me oroi voto etana. Arongona ta oroi voto etana, me isaa akapaaili o voto, egheelei va kateva nonga ia vaulaniita ateva. Vaulanina ateva Karisto ia avaluue ia o: oroi taumattu la tokatoka etana. ¹³ Poli ita akapaaili ita ghe ghaala niaasu ta kateva nonga ia Spiriti eteva, me ghe gheleitala va kateva nonga ita. Arongona

11:32: Hib 12:5-6. **12:2:** Abak 2:18-19. **12:3:** 1 Jon 4:2-3. **12:4:** Rom 12:6. **12:11:**

1 Ko 7:7. **12:12:** 1 Ko 10:17. **12:13:** Gal 3:28.

ta katoa ajiu ila me katoa karika ajiu ila, me tau ngai uungu etoa karika la tokatoka tale aloannaaira, me lo atoa la tokatoka tale aaloannaaira, ita akapaaili God ghe tau mae sio kateva nonga ia Spiriti eteva etaita.

¹⁴ Vaulaniita ateva karika God ghe gheleiela va kateva nonga ia, ta oroi voto eaipatolaa lao etana. ¹⁵ Marova kekem eue va, "Karika va aghi tee tale ia o vaulani eteva, poli karika va nima ieghi," nau eaaulia ngavalua o, karika egheelei rungainia va karika va ie tee tale ia o vaulani eteva. ¹⁶ Me marova talinga atelange eue va, "Karika va aghi tee tale ia o vaulani eteva, poli karika va mata ieghi," nau eaaulia ngavalua o, karika egheelei rungainia va karika va ie tee tale ia o vaulani eteva. ¹⁷ Marova ia akapa vaulaniita ateva mata ia, karika aue eroo tani nonganongo, me marova ia akapa vaulaniita ateva talinga ia, karika aue eroo tani ngusungusu. ¹⁸ Me karika, ta koronnaaili va God ghe atoka aitauaala isaa akapaaili voto tale vaulaniita ateva tale salana ghe annaala va masina. ¹⁹ Me marova vaulaniita ateva nim nima ia nonga, karika aue ghele teva vaulaniita. ²⁰ Me isaa o voto oroi eaipatolaa etana, me ekaakateva nonga ia vaulaniita ateva.

²¹ Mata ateva karika erooroo tani ue ta nima atelange va, "Karika righi uunguaaghi etam," me uruita ateva karika eroo tani ue ta kekeita atelange va, "Karika righi uunguaaghi etam." ²² Kasina voto tale vaulaniita ateva saghuighuina. Me karika ita rooroo tani maulue arova isaa o voto karika. ²³ Me llo voto tale vaulaniita ateva ita annaa va karika masina taataraane, ita aaitara ngamasinaaili, me lo ateva voto tale vaulaniita ateva ita paapalatainia, ita kaarasi tani aisulainia, ²⁴ me mene kasina voto tale vaulaniita ateva, karika ita mene nnangaili tani aisulia. Ta God ghe atoka aitauaala vaulaniita ateva, me ghe taula namuu nioneoneaa ta llo voto karika eroo tani ghaa nioneoneaa. ²⁵ Isaa avalua o me ita rau mene ghelei righi niaipola tale vaulaniita ateva, ta isaa akapaaili asease voto tale vaulaniita ateva la aaitaraa mene kateva. ²⁶ Marova kateva voto tale vaulaniita ateva emamarikana, isaa akapaaili voto tale vaulaniita ateva aue emmarikana aitauua teeia. Me marova kateva voto tale vaulaniita ateva eghaa nioneoneaa, isaa akapaaili voto tale vaulaniita ateva aue emasimasi.

²⁷ Am akapaaili vaulanina am Karisto, kateva kateva etaimim eaipatolaa tale vaulanina ateva Karisto. ²⁸ Elome tale ale manga, God ghe atokala taumattu ngatoa tani ghelei niuungu. Ghe atoka akasinala apostolo atoa, aiaaghala atoa propete atoa, me aiaakotonna atoa tau ngai aapasunga ngatoa, vara me lo atoa la gheelei mirikol, me lo atoa la sarasarakanana tani ghaa velu isiki, me tani sausi mene katoa, o tani muemueainila, me tani aippooaa tale mene kasina ase niaippooaa kanna Spiriti eteva. ²⁹ Am annaa va ila akapaaili apostolo ila me propete ila me tau ngai aapasunga ila? Me am annaa tee va ila akapaaili la roo tani ghelei mirikol? ³⁰ Vaalua, ila akapaaili la rooroo tani ghaa velu isiki? Me ila akapaaili la roo tani aippooaa tale mene kasina ase niaippooaa kanna Spiriti eteva? Me ila akapaaili la roo tani aulia ngamasalika malloeane isaa o ase niaippooaa kanna Spiriti eteva? ³¹ Aghaloannaaili va am tani alona lo ateva niuungu Spirit Manga etautau emae tani aisausiaa tau ngairesoa ngakapa atoa. Me aghaapasunga etaimim masi salana elaulau mene kasina salana.

13

Niaielousi eteva

¹ Marova Spirit eteva etautau mae sarasarakanan me aghaippooaa tale samasamaairaa taumattu ngatoa me ensolo atoa, me karika aghaielousi, aghi nongina veloo eteva o karoiroi etoa la nim aangari. ² Marova muenna ieghi tani auliaa inangarina God, me aroo tani kila isaa akapaili voto me voto aisuliaane kanna God, me marova kalughu niaiesoaa erooroo tani ghaa velu motouru etoa, me karika aghaielousi, aghi nim lao ieghi. ³ Marova atau ekapa lao peighi ta lo atoa karika tue peipeina ila, me vilikighi eghaa maate me aghele tau sae nannaaghi,* me karika aghaielousi, karika aue aghaa righi voto.

⁴ Taumattu ngateva eaaielousi etam sessai parasia, me taumattu ngateva eaaielousi egheeeli masi voto, me karika etaatara ssaii, me karika eaaisakeana, me karika etautau sae nannaane. ⁵ Karika eaamakatakata, me karika enannainia nonga, karika eaaiuvii, me ekakkaluua voto ang ghe lao sio. ⁶ Taumattu ngateva eaaielousi karika emasimasia ssavoto, ta emaamasiaa voto ghulughuluena. ⁷ Taumattu ngateva eaaielousi karika esio asoasoaa, me karika eruuruu tani aiesoaa, ta eaatoka tuutulina ta God, me etokatoka akorokoronganale tale sesa nau.

⁸ Niaielousi eteva karika ekaakatuu. Uunguua tani auliaa inangarina God aue ekapa, me uunguua tani aippooaa tale mene kasina ase niaippooaa kanna Spiriti eteva aue ekapa, me uunguua alomasaanga eteva tee aue ekapa. ⁹ Malloeane isaa avalua toko va aalomasaanganiaita karika ekilakila akapa voto, me muumuennaita tani auliaa inangarina God tukuna. ¹⁰ Me nau ghulughuluena emae, voto tukuna aue ekapa. ¹¹ Nau aliki ieghi, aghe aippooaa nongina aliki eteva, me nannaaghi nongina aliki eteva, me aalomasaanganiaaghi nongina aliki eteva. Nau aghe namuula, aghe tau lange siola gheeleiaaira aliki etoa emuli etaghi. ¹² Ghaine karika ita kilakila amasina voto kanna God, nongina karika ita taatara amasina voto tale ghalasi eteva karika masalike taataraane, me auena ita kila amasina, nongina va ita taatara matane God. Ghaine akilakila kasina nonga voto kanna God, me auena akila akapaili, nongina God ghe kilaiaghila.

¹³ Me ghaine kotolu voto etokatoka: Niaiesoaa, nitaatara lao emua, me niaielousi. Me lo eteva namuu ia etairotolu, niaielousi eteva.

14

Tani auliaa inangarina God me asease niaippooaa ngatoa kanna Spiriti eteva

¹ Am usilaa salana tani aielousi, me am aloannaaili niuungu kanna Spirit Manga enim tautau mae. Me mata ngemua eteva tale isaa o niuungu, niauliaa inangarina God. ² Ta lo eteva epoppooaa tale mene kasina ase niaippooaa kanna Spiriti eteva, poli karika teva taumattu alona emaamasaanga llo eauliaa, karika esamasama tee taumattu, ta ie nonga me God, ta Spirit Manga eteva eaasaoki etana tani auliaa voto aisuliaane. ³ Ta lo eteva epoppooaa inangarina God eaasarasarakana

13:2: Mat 17:20. * **13:3:** vilikighi eghaa maate me aghele tau sae nannaaghi Kasina uru ngai laghe pitila, laghe uela va arova atau velu vilikighi eata tani ghelei aiaavusuvusuena.

13:6: Rom 12:9. **13:7:** 1 Pita 4:8. **13:13:** 1 Tes 1:3. **14:1:** 1 Ko 12:31; 14:39.

taumattu, me eaippooa ngaisausia tani auliaa inangari nimasimasi etaira. ⁴ Me lo atoa la aippooaa tale mene kasina ppae ase niaippooaa kanna Spirit eteva, la saasausila nonga, me ta lo atoa la poppooaa inangarina God, la saasausi ekapa taumattu ngatoa tale ale manga. ⁵ Aghalonaaili va arova am akapaaili am ghele aippooaa tale kasina ppae ase niaippooaa kanna Spiriti eteva. Me atani annaaili va am ppooaa inangarina God. Marova karika teva tani aulia ngamasalika sa ateva la aulieinia, lo atoa la nim poppooaa tale mene kasina ase niaippooaa kanna Spiriti eteva karika la saasausi ale manga ateva. Liuna avalua o me lo atoa la poppooaa inangarina God, ila epona ta lo atoa la poppooaa tale mene kasina ase niaippooaa kanna Spiriti eteva.

⁶ Kapughu etoa, marova amae taraiem me appooaa tale mene kasina ase niaippooaa kanna Spiriti eteva, me karika aghaaulia ngamasalika saa malloeanina, vaalua aue asausiem? Ta atani auliaa etaimim sa ateva God ghe apasungainiela etaghi, me atau aatu righi alomasaanga me appooaa inangarina God tani loeam. ⁷ Nim nongina voto ateva karika righi maulue etana me egheelei niaangari, nongina flut ateva me aikaukau eteva, marova uneirarua niaangari karika masalike, karika aue ukila va saa kkinari eteae la kaukaua. ⁸ Me marova taue ateva karika masalike aangariaane, see aue aimonomonosiaa tale niaiuvi eteae? ⁹ Am tee am avalua o. Marova am aippooaa tale mene kasina ase niaippooaa taumattu ngatoa karika la kilakila, vaalua taumattu aloira aue masaanga sa ateva am aulieinia? Ta inangari aue nim peisaane. ¹⁰ Orioileili ase nisama tale kosa ateva oia karika isaa aitauua. Isaa o ase nisama, isaa akapaaili tue malloeanina. ¹¹ Marova teva taumattu ghele sama teeieghi me karika akila malloeane inangari eaauliaa, aghi ativuu ieghi tale ia o taumattu ngateva eaippooaa, me ie tee ativuu ia etaghi. ¹² Liuna avalua o, poli am aloannaaili niuungu Spirit Manga ateva enim tautau mae, am tani kolomi tani ghaa llo niuungu erooroo tani asarasarakana ale manga ateva.

¹³ Liuna avalua o me lo ateva eaippooaa tale mene kasina ase niaippooaa kanna Spiriti eteva etani looloo sae tani ghaa alomasaanga tani aulia ngamasalika isaa o inangari. ¹⁴ Marova alooloo sae tale kateva ase niaippooaa kanna ia Spiriti eteva, kapughu spiriti eteva eloooloo sae, me nannaaghi karika ekilakila sa ateva aghaaulieinia. ¹⁵ Sa ateva aue agheleia? Aue alooloo sae tale kapughu spiriti eteva, me aue alooloo sae tee ta nannaaghi, me aue akkinari tee kapughu spiriti eteva, me aue akkinari tee ta nannaaghi. ¹⁶ Marova utau sae God tale kapum spiriti eteva, lo atoa aloira karika emaamasaanga, karika la roo tani ue va, "Koronna," tale unem nilooloo sae tani kaili emasina, poli karika la kilakila sa ateva uaaulieinia. ¹⁷ Aue uroo tani kaili emasina sae ta God tale masi salana, me ta mene kateva taumattu karika ange ghaala niaissausi.

¹⁸ Akaakaili emasina ta God ta alaulau ekapaailiem tani aippooaa tale asease niaippooaa kanna Spiriti eteva. ¹⁹ Me tale ale manga, aghaaloanna tani auliaa ghalima tuku mata nginangari aloghu emaamasaanga tani apasunga ta katoa, me vulla tani auliaa oroieili airari mata nginangari etoa tale mene kasina ppae ase niaippooaa kanna Spiriti eteva.

²⁰ Kapughu etoa, nannaaimim erau mene nongina aliki etoa. Tale

uunguaa ssavoto, am tani nongina raaraina arighi aliki karika eannaa ssavoto. Me isaa o voto aghe auliaala etaimim, va nannaimim etani nongina namu ngatoa taumattu. ²¹ Laghe pitila tale Uru ngai Manga ateva va,

“Tale lo atoa la poppooa tale aseasee nisama,
me ta ativuu etoa,
aue appooaa ta kapughu etoa,
me karika poi aue la nongoaghi,”
ghe uela Vau ngepona ateva.

²² Ase niaippooaa kanna Spiriti eteva, aimatootoongana ia ta lo atoa karika la aiesoaa, me karika ta lo atoa la aimuli tee Vau ngepona ateva. Me tani auliaa inangarina God, aimatootoongana ia ta lo atoa la aiesoaa, me karika ta lo atoa karika la aiesoaa.* ²³ Liuna avalua o me marova taumattu ngakapaaili etoa la velu eitauua tale ale manga me la aippooaa tale ase niaippooaa kanna Spiriti eteva, me marova toa tau ngaisesoaa karika laghe ghaala niasuu o taumattu karika la aiesoaa la kupi sso, aue la nongo me aloira karika aue masaanga, aue la ue va ngam veeveela. ²⁴ Me marova teva tau ngaisesoaa karika ghe ghaala niasuu o teva taumattu karika eaiesoaa ekupi sso, me enongo va am akapaaili am poppooa inangarina God, aue etara kila va ia tau ssavoto ia, me voto am aauliaa egheelei niaisakei tale maamauluaane, ²⁵ me aue etara kila voto aisuliaane elome tale urunguitanina. Liuna avalua o me aue etturru sio euu me ekkauua God, me aue eue va, “Koronnaaili God etokatoka aitauua teeiem!”

Salana tale masi nikkauaa

²⁶ Sa ateva ita mene aulieinia, kapughu etoa? Nau am mae aitauua, kateva kateva etaimim eaimonomonosiaa voto aue esausi ekapaailiem, kateva emaeaa unna kkinari eteae, me kateva eaimonomonosiaa tani apasunga, me kateva eaulia ngaotu inangari aisuliaane kanna God, me kateva eaippooaa tale mene kasina ppae ase niaippooaa kanna Spiriti eteva, me ia, o mene kateva ekiri malloeana isaa o ase niaippooaa. Isaa akapaaili o voto am tani ghelei tani akorokorongana ale manga ateva. ²⁷ Marova toa la anna tani aippooaa tale mene kasina ase niaippooaa kanna Spiriti eteva, enim ghalua o kotolu nonga. Me kateva mua eaippooaa me auena mene kateva, vara me mene kateva ekiri malloeana tani ghelei emasalika isaa o ase niaippooaa. ²⁸ Marova karika teva tani kiri malloeana isaa o ase niaippooaa, lo ateva eaippooaa tale ase niaippooaa kanna Spiriti eteva enim matua atoka me eaippooaa nonga ta ngetana me ta God.

²⁹ Ghalua o kotolu propete la auliaa inangarina God, me katoa la tani nongo amasina tani nnaa va inangari emaema ta God o karika. ³⁰ Me marova inangari eteva kanna ia God ngemae sio ta teva propete etokatoka, aitiutiu eteva propete eaippooaa eruu tani sama. ³¹ Poli am akapaaili am roo tani auliaa inangarina God, kateva mua, vara me mene kateva. Tale ia o salana atikirighi, am akapaaili aue am ghaa

14:21: Ais 28:11-12. * **14:22:** Pol ghe annaa nau ta Aisaea, samasamaaира Asiria ngatoa, aIsraeli etoa karika laghe kilakila, me ghe aimatoonga niaisakei kanna God. Liuna avalua o me ghe aauliaa va ase niaippooaa kanna Spiriti eteva eaimatoonga niaisakei ta lo atoa karika la aiesoaa. Tani nongo inangarina God eaimatoonga va tau ngaisesoaa ngatoa karika la tokatoka tale niaisakei kanna God. **14:23:** Apos 2:13. **14:24:** Jon 16:8. **14:26:** 1 Ko 12:8-10.

14:29: 1 Tes 5:21.

alomasaanga me sarasarakanan tale aikaiaaimim. ³² Poli propete atoa la roo tani ruu tani aippooaa me la tau velu mene katoa tani propete la sama. ³³ Poli God karika va ia aisavisavilana ia ta Goto ia tale luei.

Nongina katoa ale manga, ³⁴ vause atoa la rau mene toka samasama tale ale manga. Karika am mene tau vella va la toka aisamaaii, ta la matua atoka, nongina inangari nipaopao eauliaa. ³⁵ Marova la anna tani kila voto, la rororo tani kolomi taitaniira atoa tanganueira, poli karika masina ta vause ateva tani toka samasama tale ale manga.

³⁶ Vaalua, inangarina ateva God ghe tiuaala etaimim? Me ang ghe tokala nonga etaimim? ³⁷ Marova teva eannaa va ia propete ia, me Spiriti eteva etokatoka etana, aue ekila va sa ateva apitipiti emae etaimim, Vau palepale ghe sungieghila tani gheleia. ³⁸ Marova teva etam aloanna isaa o voto, tau veluela me enim toka.

³⁹ Isaa avalua o, kapughu etoa, me am tani alonaaili tani auliaa inangarina God, me am rau mene ghelei runga kateva tani aippooaa tale mene kasina ase niaippooa kanna Spiriti eteva. ⁴⁰ Ta voto akapaaili am tani ghelei emasina me tale salana ghulughuluena.

15

Tottotuaane Karisto

¹ Kapughu etoa, aghanha tani mene auliaa etaimim masi kiukiu aghe ppooala etaimim. Ngam ghe aiesoala me ngam ghe atokala tuutuliimim etana. ² Poli ngam ghe aiesoala isaa o masi kiukiu, ngam ghe saangala, marova am poso parasi inangari aghe ppooala etaimim. Arova karika, aue aikaiaaimim aue enim peisaane.

³ Sa ateva aghe ghaaiela, aghe tau aatu sio etaimim va mata ngemue ia, va Karisto ghe matela tale kaluita ssavoto, nongina Uru ngai Manga ateva eaauliaa; ⁴ va laghe kaieiniela me ghe mene totula tale aiaakotonna ateva nau, nongina Uru ngai Manga ateva eaauliaa. ⁵ Ghe aotuotula ta Pita,* vara me apostolo kasangaulu ghalua (12) laghe taraiela. ⁶ Emulina ghe aotuotula ta lo atoa oroaair elaulau ghalima ai (500), oroi lo atoa etaira ila tokatoka maulue ila, me katoa ngila ghe asekanuela. ⁷ Ghe aotuotula ta Jeimis, vara me ta ila akapa apostolo atoa. ⁸ Airuuruu etaira akapa ghe aotuotula etaghi, nongina va lo ateva ghe tam ghaa nauna tani lutu.

⁹ Aghi airuuruueili ieghi ta apostolo atoa, karika masina tani koloaghi va apostolo ieghi, poli aghe gheelei saasakiaa alena ale manga ateva God. ¹⁰ Me tale maamasinaane ateva God, ngaghe aghi evalua oia. Maamasinaane ateva etaghi karika ghe nim peisaanel, poli auungu aanasaili ta ila akapa disaepolo atoa, me karika va aghi, ta maamasinaane ateva God etokatoka aitauua teeieighi. ¹¹ Liuna avalua o me, marova aghi o mene katoa apostolo laghe ppooala etaimim, ami ekapaaili ami ghe poppooaa isaa o masi kiukiu, me am ghe aikaiaala etana.

Aue ita totu tale nimate

¹² Me marova ami poppooaa va Karisto ghe totula tale nimate, vaalua me katoa etaimim la ue va taumattu matena karika aue la totu?

14:34: 1 Ko 11:3; 1 Tim 2:12. **14:37:** 1 Jon 4:6. **15:3:** Ais 53:5-12. **15:4:** Mat 12:40;

Apos 2:24-32. **15:5:** Luk 24:34; Mat 28:16-17. * **15:5:** Pita Tale inangari nge Griek, Kepas.

15:7: Apos 1:3-4. **15:8:** Apos 9:3-6. **15:9:** Ips 3:8; 1 Tim 1:15. **15:10:** 2 Ko 11:23.

¹³ Marova taumattu ngatoa matena ila la tam totu, Karisto ghe tam totula. ¹⁴ Marova Karisto ghe tam totula, unemami nippooaa nim peisaane, tee me uneimim niaikaiaa. ¹⁵ Marova koronna va matena atoa la tam totu, God karika ghe totula Karisto. Me ami apostolo atoa ngami aikamea tee God, poli ami ue va God ghe totula Karisto tale nimate. ¹⁶ Poli marova matena atoa la tam totu, Karisto karika ghe totula. ¹⁷ Me marova Karisto ghe tam totula, uneimim niaikaiaa nim peisaane, me tee kaluimim ssavoto karika ghe kapa. ¹⁸ Me lo atoa la ghe aikaiaa ta Karisto me laghe matela, ang ghe rau laalaa liulala. ¹⁹ Marova ita aatoka tuutuliita ta Karisto tale ie nonga oia maulue ateva, aalousiusiaaita namungaili ta mene katoa taumattu.

²⁰ Me koronna va Karisto ghe totula tale nimate, mata ngemue ia tale lo atoa laghe matela. ²¹ Poli kateva taumattu ghe gheleila me nimate ateva ghe mae sio, nitotu eteae tale nimate tee ghe mae sio tale kateva taumattu. ²² Poli mausi Adam ita akapaaili aue ita mate, me mausi Karisto aue ita maulue. ²³ Tale nauira taumattu ngatoa tani totu, ila akapaaili aue la totu me la maulue. Karisto ghe aitiutiula, me nau emene mae, lo atoa kapuna ila aue la mene totu. ²⁴ Vara me eturungi ekapaaili tau ngai toitoi etoa me lo atoa matuutuliena ila me sarasarakana atoa, me airuuruu aue emae, me aue eta lao ararimangalina ateva ta Tamane ta God. ²⁵ Poli God ghe nnaala va Karisto aue eaitoiaa voto akapa nongina kingi eteva, lomosina ta nau God eta sio ila akapaaili tau ngai ssateena atoa euu. ²⁶ Me airuuruu eteva tau ngai ssateeta aue eturungia, nimate ateva. ²⁷ Poli Uru ngai Manga ateva eue va, God “ghe tau lao sio sarasarakana tale Natuna ateva Taumattu ngateva tani aitaraa voto akapaaili.” Nau eue va “isaa akapaaili voto,” karika va God tee epona liu, ia o ghe taula voto akapaaili ta Karisto tani aitoiaa. ²⁸ Nau isaa akapaaili o voto ange tokala tale sarasarakaniaane Natuna God, ia aue emene toka euu tale sarasarakaniaane Tamane, poli ia ghe taula isaa akapaaili voto etana tani aitoiaa. Me God aue eaitara ngakapaaili isaa akapa voto.

²⁹ Marova karika teva nitotu tale nimate, taumattu ngatoa laghe ghaala niasuu poli la taatara lao emua ta nau eteva matena atoa aue la totu, sa ateva aue la gheleia? Vaalua me la ghe ghaala niasuu marova matena atoa karika aue la totu? ³⁰ Me ta ngetaimami, vaalua me ami aatokaiemami tale nivakovako nau ekapaaili? ³¹ Kapughu etoa, asousou nimate nau ekapaaili! Am rooroo tani kila va isaa o inangari koronna, nongina koronna va atautau sae nannaaghi tale sa ateva Vauita ateva Iesu Karisto ghe gheleiela etaimim. ³² Marova aghe aiuvii teela sesa taumattu ngatoa ila nongina ueli ghaata kkena atoa eIpises me karika aghe taatara lao tale nitotu tale nimate, sa ateva aue aghaaia? Marova taumattu etam totu,

“Ita roo tani namanama me ita ropi,
poli nimanaa aue ita mate.”

³³ Am rau mene aikameainam: “Am rau mene aipatolaa tee sesa taumattu ngatoa, poli aue la ghelei saasakiaa masi gheleiaaimim.”

³⁴ Am mene mae tale masi ninannaa, me am ruu tani ghelei ssavoto.

Aghaaaulia ngavalua o poli katoa etaimim karika am kilakila God. Aghaaaulia ngavalua o tani apalataiem.

Nau ita totu vilikiita aue isaa ppae

³⁵ Me katoa aue la kolomi va, “Vaalua aue taumattu ngatoa matena ila la totu? Me vilikiira aue vaalua?” ³⁶ Am rau mene alokapakapa. Sa ateva am pasapasaia karika erooroo tani maulue, ta etani mate me auena epinosa. ³⁷ Me nau upasapasaia, karika upasapasa namu ngateae ai, ta upasapasa katu ue ngai nongina katu kone me mene kasina voto. ³⁸ Me God etautaula vilikina ange annala va etauela etana, me kateva kateva tana katu ue ngai epiipinosa tale katuna ateva. ³⁹ Isaa akapaaili viliki karika va isaa aitauaa. Taumattu ngatoa uneira kateva ase viliki, me kko atoa uneira kateva, me ghaata kkena atoa uneira kateva, me ghila atoa uneira ateva ppae. ⁴⁰ Viliki ngelomarase kasina, me kasina, viliki tale kosa ateva oia. Viliki ngelomarase ateva, masi aimolumoluna isaa ppae tale masi aimolumoluna viliki tale kosa ateva. ⁴¹ Sinaka ateva unna kateva ase aimolumolu, me ulana ateva unna kateva, me katto atoa uneira ppae tani aimolumolu, me elome tale kateva kateva katto, aimolumoluira isaa ppae tale mene kasina katto.

⁴² Aue nim nongina avalua o nongina matena atoa nau la totu. Viliki eteva laghe kaieiniela tale kosa nongina la pasapasa katu ue ngai eteva, aue emauu, me nau etotu tale nimate, karika aue emene mate. ⁴³ Ia o vilikiita ateva karika masina ia, me karika sarasarakania ia, aue emasina me esasarakania nau etotu. ⁴⁴ Ia o vilikiita ateva laghe kaieiniela, viliki tale kosa ateva oia, me nau ita totu aue ita totu eitauaa tee viliki ngepona liu eteva. Vilikiita ateva masina ia ita tokatoka teeia ghaine tale kosa ateva oia aue ekapa, me lo ateva vilikiita aue ita totu teeia, aue emasina tani toka epona liu.

⁴⁵ Laghe pitila tale Uru ngai Manga va, “Aitiutiu eteva taumattu ta Adam God ghe gheleiela me ghe mauluela,” me Karisto, la kolokoloa va airuuruu eteva Adam, ia spiriti ia etautau maulue. ⁴⁶ Lo ateva ghe mae akasina sio, viliki tale kosa ateva ia, vara me mina viliki ngepona liu eteva, Karisto etana, maulue ia. ⁴⁷ Ta aitiutiu eteva taumattu ghe mae sio tale au tale kosa ateva oia, me aiaaghalua ateva taumattu, Karisto etana, taumattu ngepona liu ia. ⁴⁸ Taumattu tale kosa ateva oia, vilikiita ateva nongina taumattu ngateva God ghe gheleiela tale au tale kosa ateva oia, me taumattu ngepona liu etoa, vilikiira nongina taumattu ngepona liu eteva. ⁴⁹ Nongina ghaine ita nongina taumattu tale kosa ateva, liuna avalua o me auena aue ita nongina taumattu ngepona liu eteva.

⁵⁰ Kapughu etoa, aghaauliaa etaimim va malatauita ateva me raeita ateva karika lalu rooroo tani kupi sso epona liu. Karika ita rooroo tani toka epona liu tee vilikiita ateva erooroo tani mate, poli karika righi nimate epona liu. ⁵¹ Am nongo, aghaauliaa etaimim voto aisuliaane: Karika va ita akapa aue ita asekanua, ta ita akapaaili aue ita aikolikoliaa nau Karisto emae. ⁵² Aue elutu arovaeangaili nonga, nonginaaili va mata ateva eaapeepere, nau airuuruu eteva tauue eaangari. Poli tauue ateva aue eaangari me matena atoa aue la totu, karika aue la mene mate, me aue ita aikolikoliaa. ⁵³ Poli vilikiita ateva matena ia me

mauuna ia, aue aikolikoliaa me ita ghaa lo ateva viliki karika aue eroo tani mate me emauu. ⁵⁴ Nau isaa o voto elutu, me inangari laghe pitila tale Uru ngai Manga ateva aue ekoronna va, “God ghe apalala me ghe turungila nimate ateva.”

⁵⁵ “Nimate ateva, eaa aloi sarasarakaniaam,
me eaa aloi mammarikana utautau lao ta taumattu ngatoa?”

⁵⁶ Mammarikanaane nimate ateva ssavoto ia, me sarasarakaniaa ssavoto ateva inangari nipaopao. ⁵⁷ Liuna avalua o me ita kaili emasinaaili ta God ta ghe tau mae sio etaita niapala tale uunguaa nimate me ssavoto, ta kapuita namu ngateva ta Iesu Karisto.

⁵⁸ Liuna avalua o, kapughu etoa, am tingina akorokorongana. Am rau mene tau velu righi voto va eakatungiem. Am tau lao maamaulu-aaimim tale uunguaane Vau ngepona ateva, poli am kilakila va isaa o niuungu am gheelei ta Vau ngepona ateva karika nim peisaane.

16

Tani ghaa viliki veu uneira kapuna atoa God eJerusalem

¹ Me tale viliki veu am ghaaghaa aitauaa uneira kapuna taumattu ngatoa God eJerusalem, am aimuli tee sa ateva aghe aulieinie lao sio tale ale manga atoa tale provinsi eteva eGalaisia va la gheleia. ² Tale aitiutiu eteva nau, tale uiki ekapaaili, kateva kateva etaimim ealokoi ppae righi viliki veu tale sa ateva egħaagħħaaia, me ealokoi eitauua. Me nau amae, karika aue am mene toka paepae viliki veu. ³ Me nau arekata, am suitoongaa righi taumattu la sau kaluimim viliki veu me la saea eJerusalem. Me aue asungi taula lao tee me uru ngai etikirighi tani apasunga va am, am ghe sungilala. ⁴ Marova emaamasina va aghi tee alao eJerusalem, aue la kasu eitauua teeieghi.

Nannaane Pol tani kasu

⁵ Aue alao mua tale provinsi eteva eMersedonia, me auena amae taraiem, poli aghanna tani lao mua eMersedonia. ⁶ Nau akasu eMersedonia me amae taraiem, koti aue atoka teeiem mua lomosi ta eghaa nau kuukuu eteva* ekapa, ta aue eaa aghanna tani lao aue am roo tani sausieghi tale viliki veu me ghinna. ⁷ Arova amae taraiem me auena alao eMersedonia, aue nau tani toka teeiem etukunaaili, me karika aghanna tani toka teeiem tale tukuna nau. Aghanna tani mae toka teeiem tale oroi nau, marova Vau ngepona ateva ealoanna. ⁸ Me aue atoka oia eIpises lomosina ta nau Pentikos eruu, ⁹ poli salana tani uunguaa masi niuungu ang ghe otla etagħi, arongona ta oroeili taumattu ngatoa la tootoonga tani ghelei rungaineħgi.

¹⁰ Me marova Timoti emae, am aitarainia me erau mene matauta righi voto nau etokatoka teeiem, poli egħeeli uunguaane Vau ngepona ateva, nongina aghi. ¹¹ Liuna avalua o me karika toa la mene ratia. Am sausia va ekasu tale luei me emene mae taraiegħi. Atoitoia va emae tee mene katoa tau ngaisesoaa.

15:54: Ais 25:8. **15:55:** Osea 13:14. **15:56:** Rom 7:13. **16:1:** Rom 15:25-26; 2 Ko 8:1-9. **16:5:** Apos 19:21. **16:6:** Rom 15:24. * **16:6:** nau kuukuu eteva Nau kuukuu eteva egħaagħhaa kotolu ulana, taumattu ngatoa karika laghe aikasuaa tale paamanu eteva, poli ttasi kuukuu eteva ghe naanamu. **16:9:** Apos 19:8-10; 2 Ko 2:12. **16:10:** 1 Ko 4:17. **16:11:** 1 Tim 4:12.

¹² Me kapuita ta Apolos, aghe aippooaa teeia tani asarasarakanaia va emae taraiem me mene katoa kapuita la mae aitauaa teeia. Me ghe tam aloannala tani mae tale isaa oia nau. Aue emae tale nau eannaa va masi nau tani mae.

¹³ Am paniem me am tingina akorokorongana tale niaiesoaa. Am rau mene matautu me am korokorongana. ¹⁴ Am ghelei voto akapaaili tale niaielousi.

¹⁵ Am kilakila va Stepanas me kapuna atoa tanganuena, ila akasina laghe aitiutiula tani aiesoaa tale provinsi eteva eAkaia me laghe taula maamauluaaira tani sausi kapuna taumattu ngatoa God. Aghaaulia ngakorokorongana etaimim, kapughu etoa, ¹⁶ tani nongo usilaa isaa o ase taumattu nongina ila me am ghelei evalua o ta mene katoa la uungu aanasa teeila. ¹⁷ Aghe masimasila nau Stepanas me Potunatus me Akaiakus laghe kasula ona eKorint me laghe rekatala oia eIpises, poli karika iem me ila laghe ghaala liuimim tani sausieghi. ¹⁸ Poli laghe akorokoronganala maamauluaaghi nongina laghe gheleila etaimim. Ia o ase taumattu ngateva am rooroo tani oneoneainia.

¹⁹ Ale manga atoa elome tale provinsi eteva eEisia, laghe suula masimasiaaira etaimim. Akuila me vauseenna ta Prisila tee me taumattu ngatoa tale ale manga atoa la veluvelu etauaa tanganueirarua, laghe suula masimasiaaira tale ararina atea Vau ngepona ateva. ²⁰ Ila akapaaili kapuita atoa oia, laghe suula masimasiaaira etaimim. Am sou kateva kateva etaimim tale niaielousi.†

²¹ Airuuruu tale uru ngai etikirighi oia, aghi Pol, tale nimaghi tuunga atelange aghe pitila isaa oia masimasiaaghi.

²² Marova teva etam ailousiaa Vau ngepona ateva, nikasikiena aue etoka etana. Mae sio o, Vau ngepona ateva!‡

²³ Aloofoo sae va maamasinaane Vau ngepona ateva ta Iesu aue etoka aitauaa teeiem.

²⁴ Asuusuu aatu aielousiaaghi ta lo atoa etaimim am elome ta Iesu Karisto. Koronna.

16:12: 1 Ko 3:6. **16:15:** 1 Ko 1:16. **16:19:** Apos 18:2, 18, 26. † **16:20:** Tale inangari nge Grik, tale niaingusu eteva manga ia. **16:22:** Gal 1:8-9; Aotu 22:20. ‡ **16:22:** Pol ghe pitila tale inangari nge Aramaik, *Marana tha*, malloeana va “Mae sio o, Vau ngepona ateva.”

Aiaaghaluene atikirighi uru ngai Pol ghe pitiela ta aKorint atoa Inangari emuemua

Pol ghe pitila 1 Korint, me avirina ghe kasu tani laa tara ale manga ateva eKorint. Karika masau, katoa tau ngai aapasunga laghe mae sio eKorint, me laghe uela va ila apostolo tuungi ila, me Pol karika. Tau ngaisesoa ngatoa eKorint laghe aipolaii etokala tale isaa o voto. Pol ghe piti emuemuela mene katikirighi uru ngai, me avirina ghe suula Taetas tani lao eKorint tani tara va ale manga ateva ang ghe aikolikoliaala o karika. Emulina, ghe pitila uru ngai etikirighi ia oia, ta 2 Korint, vara me ghe lao sio eKorint, me ghe saela eJerusalem. Ia o airuuruu eteva nau ta Pol tani asa eKorint.

Ta 2 Korint, Pol ghe aulia ngakorokorongana va ia matuutuliena ia poli ia apostolo tuungi ia. Ghe pitila inangari niloeloe tale viliki veu laghe ghaaghaa aitauaa tani sausi tau ngaisesoa ngatoa la tuutukuna tale voto eJerusalem, me ghe auliaala vaalua ghe aielousiaa tau ngaisesoa ngatoa eKorint.

Tani kila amuemua

Aitiutiu tale inangari *1:1-11*

Pol me nannaane tani lao eKorint *1:12-2:13*

Uunguaane Pol va apostolo tuungi ia *2:14-7:16*

Viliki veu laghe ghaaghaa tani sausi aJerusalem atoa *8:1-9:15*

Pol me apostolo atoa la ue va ilaaili ila apostolo ila *10:1-13:10*

Airuuruu tale inangari *13:11-13*

¹ Aghi, Pol, kapuna apostolo ieghi Iesu Karisto, me tale aloannaane God, me kapuita ta Timoti,

Angalu pitipiti mae ona tale alena ale manga ateva God eKorint me tale ila akapa taumattu ngatoa la aikaaiaa ta God la tokatoka akapa see tale provinsi eteva eAkaia.

² Alooloo sae va maamasinaane me luei ekasukasuu ta God Tamaita ia me Vau ngepona ateva Iesu Karisto aue etoka teeiem.

Pol ghe kaili emasinala ta God

³ Ita tau sae God, kapuna Goto ia me Tamane ia Vauita ateva ta Iesu Karisto. God ia Tamaita ia, pasueili ia tale nialousiusi me etautau mae sarasarakana tale sesa nau etoa. ⁴ Ia etautau mae sarasarakana etaimami tale nau ekapa atoa nau ami tokatoka tale maate, liuna avalua o me ami rooroq tani mene sausi katoa la tokatoka tale sesa nau tee. Ami aisausieinila tale isaa o sarasarakana God ghe tau mae sio etaimami. ⁵ Poli mausi nimmarikana Karisto ghe ghaala, ami tee ami ghaaghaa, me tale ia o salana atikirighi, Karisto etautau atu sarasarakana etaimami. ⁶ Poli nau etoa ami aateateaa maate tale maamauluaaimami, isaa o voto aue etau aatu sarasarakana etaimim lomosina ta eghaa nau easaangiem. Me nau ami ghaa sarasarakana, isaa o sarasarakana aue esausi teeiem me aue etau aatu nitingina akorokorongana tale voto maate nongina ami, ami ghe ateateaala. ⁷ Ami kilakila va am ghaaghaa nimmarikana nongina ami me aue

am ghaa tee niaisausi nongina ami, liuna avalua o me nannaaimami etaimim sarasarakanaili.

⁸ Me tani kila amasina isaa o voto, tueghi me nengaghi etoa, ami aaloanna va am kila maate me mmarikana ami ghe ghaala tale provinsi eteva eEisia. Namungaili me maateaili voto laghe saoaala tale maamauluaaimami me karika ami ghe roola tani sau, me ami ghe annangaili teela va aue ami ghe mate. ⁹ Me tee, ami ghe ateateaala va laghe uela va aue ami mate. Poli va llo ghe lutula, ami ghe tara kilala va ami rou mene atoka tuutuliihami etaimami, ta ami atoka sae nonga ta God, ia etottotu taumattu matena. ¹⁰ Ta elome tale salana nimate, ia nonga ghe asaangiemamilia me aue emene asaangiemami nau ekapa atoa. Isaa avalua o me ami aatoka tuutuliihami etana va ia aue emene asaangiemami, ¹¹ nongina am saasausiemami tale kaluimim nilooloo sae. Oroi ila lo atoa aue la kaili emasina poli niarangise aue ami ghaa tale ailiuli tale kaluira nilooloo sae.

¹² Tale nannaaimami ami kilakila va voto akapa ami ghe gheelei tale kosa ateva oia, ami ghe gheelei voto koronnaaili me masalikeaili ghe maemae ta God. Isaa o voto ami ghe gheleila etaimim tee, me ami saasaeaa nannaaimami. Ami ghe gheelei isaa o voto tale maamasinaane God me karika va tale aalomasaanganiaane kosa ateva. ¹³ Poli karika ami pitipiti voto aisulianna am tam rooroo tani riti me kila malloeana. Me aghaaiesoaa va aue am kila amasina ¹⁴ saa llo voto karika am ghe kila amasinala, me tale nau eteva Vau ngepona ateva Iesu aue emae etana, aue am saeaa nannaaimim nongina ami, mausimim me ami saasaeaa nannaaimami.

Pol ghe aikolikoliaala nannaane tani lao eKorint

¹⁵ Poli aghe kilakilaaili isaa o voto, liuna avalua o me aghe nnaala tani mae taraiem mua me aue am roo tani ghaa niarangise ghaluaata. ¹⁶ Aghe nnaala tani mae taraiem me auena alao tale provinsi eteva eMesedonia me nau akiriaa, aue am sausieghi me alao tale provinsi eteva ejidua, me karika aghe mae sio. ¹⁷ Liuna avalua o me, nau aghe nanna llo oia me karika aghe gheleila, am annaa va karika aghe nanna ngamasinala? Karika! Nau agheelei nannaaghi, karika agheelei nongina taumattu tale kosa ateva, va eue ta paane va, “Ue, ue,” me nannaane va, “Karika, karika,” ta agheelei tale aloannaane God.

¹⁸ Me nongina God egheelei voto eue va aue eghelei, inangari ami poppoaa etaimim, karika ami ue va “Koti”. ¹⁹ Ta Iesu Karisto Natuna ia God, aghi, Saelas me Timoti angotolu ghe ppooainiela me karika va ami aakotikotia, me ta ngetana isaa akapaili voto eaauliaa eue va “Ue” nonga. ²⁰ Ta ngetana isaa akapa inangari nialokoi egheelei “Ue” nonga, me ta ngetana ita ue va, “Aloannaam aue elutu,” tani tau sae God mausi voto ita gheelei. ²¹ Am tani nnaa va God nonga ghe gheleitala tani tingina akorokoronganata Karisto. Me ia God ghe suoongainitala ²² me ghe aimatoongainitala va kapuna ita God, me ghe atokala kapuna Spiriti eteva tale urunguitanita tani apasunga va auena emene ghelei roroaa voto ange tiuaala.

²³ God erooroo tani ue va inangarighi aghauliaa koronna: karika aghe oghi lao sio eKorint ta poli karika aghe aloannala va aghauliaa inangari sarasarakanaaaili va ghe maate tale maamauluuaaimim. ²⁴Karika ami aaloanna va ami, ami sulungiem tale uneimim niaikaaiia. Ta sarasarakanaa iem tale niaiesoaa me nim tau ngai uungu iemami tani uungu eitauua teeiem tale masimasiaaimim.

2

¹ Poli aghe nnaala va arau mene oghi mae ta ita rau alousiusi. ² Ta marova aghi agheleiem va am alousiusi, see aue egheleieghii amasimasi? Ta am nonga o taumattu ngatoa aghe ghelei alousiusiemi, am gheelei emasimasieghi. ³ Liuna avalua o me aghe pitila uru ngai etikirighi etaimim. Karika aghanna va amae etaimim va am gheleieghii va aghalousiusi, ta am nonga am gheelei emasimasieghi. Aghe atokala tuutulighi etaimim akapaaili va nau eteva amasimasi, am tee am masimasi. ⁴ Arongona ta aghe pitipitila etaimim tee kinatama nialousiusi me ninannaa maate, me oroi rarum mata, karika aghe pitipitila tani gheleiem va am alousiusi, ta aghe anna va am kila vaalua aghailousia ngakapaailem.

Am apasunga niaielousi ta lo ateva ghe ghelei saasakiaala

⁵ Arova teva ghe gheleieghila va aghe alousiusila, karika va ghe ghelei nongala etaghi ta ghe ghelei ekapala etaimim. (Karika aghanna va aghauliaa oroi inangari sarasarakanaaaili etana.) ⁶ Ang ghe roola maate oroi iem lo atoa am ghe taula ta ia o taumattu ngateva. ⁷ Isaa oia nau, am kkaluaa voto ghe gheleila me am ppooa ngaisausia tale masi nitoka tani tingina akorokorongana poli erau alousiusieili me erau oghi vulu masi niaikaaiia. ⁸ Liuna avalua o me aghakorokoronganaiem va am mene apasunga etana va am aailousiangailia. ⁹ Koronna, aghe pitila uru ngai etikirighi poli aghe anna tani kila va am aimuli tee inangarighi ekapa, o karika. ¹⁰ Me nau am kkaluaa voto kateva egheelei, aghi tee akkaluaa voto egheelei etaimim. Me nau aghe kkaluaala, marova righi voto tani kkaluaa, agheelei lao ta matane Karisto mausimim. ¹¹ Agheelei llo poli aghanna va am akekkeliem ta Satana, poli ita kilakila voto eanna tani ghelei etaimami.

Pol ghe anna tani tara Taetas

¹² Nau aghe rekatala tale masaliki taatara ateae eTroas tani ppooaa masi kiukiuna Karisto, arongona ta aghe tarala va Vau ngepona ateva ghe otira salana tani uungu tee kapuna atoa okae, ¹³ me aghe alousiusieiliila poli karika aghe tarala kapughu ta Taetas. Liuna avalua o me aghe akorovailala me aghe lao sio eMesedonia.

Tau ngai uungu etoa tale ouna ateva inangari niaippooa ngaitauua

¹⁴ Me akaakaili emasina ta God, poli nau ekapa atoa God emuemueiniemami nongina va kapuna karavusu iemami tani apasunga va Karisto ghe apalala tau ngai ssateena atoa. God euungu etaimami tani ghelei masi kiukiuna Iesu Karisto elao akapa see nongina voto ateva masi ngusungusuaane. ¹⁵ Poli ami nongina voto ateva masi ngusungusuaane Karisto egheelei esae ta God me elaoelao akapa see ta

lo atoa etaita ita ghe saangala me lo atoa ngila raaraua. ¹⁶ Ta lo atoa la raaraua, lo ateva o nei, nongina nei nimate ateva aue eamatela. Me ta lo atoa laghe saangala, lo ateva o nei nongina maulue ateva aue etau lao maulue ateva. Me karika teva taumattu erooroo tani ghelei isaa o niuungu. ¹⁷ Poli ami karika nongina mene katoa la poppoaa inangarina ateva God tani ghaa viliki veu. Ta Karisto ami poppoaa ngakoronna inangarina ateva God nongina va lo atoa taumattu God ghe sungilala, me tale ninannaa raarangisana, me ami kilakila va God etaataraimami.

3

¹ Am annaa va ami mene tiitiuaa tani asaesae arariimami? Karika. Katoa la annaa va la ghaa mae uru ngai etaimim tani apasunga va Karisto ghe sungilala, o la annaa va am piti uru ngai ta mene katoa. Me ami karika. ² Am uneimami uru ngai iem laghe pitiemla tale urunguitaniiimami va taumattu ngakapa atoa la riti me la tara kila. ³ Me am nongina uru ngai etikirighi Karisto ghe pitiela me ghe pitiela tale niuungu ami gheelei. Karika ghe pitila tale ingki ta tale Spiriti eteva kanna ia God ateva tokatoka liu ia, me karika ghe pitiela tale atu nongina inangari nipaopao ta tale urunguitani taumattu.

⁴ Ami auliaa llo poli, ta matane God, ami kilakila va tale niuungu ami ghe gheleila etaimim, Karisto ghe gheleila. ⁵ Karika ami rooroo tani ue va muenna iemami tani ghelei isaa oia niuungu, ta nimuenna ekasukasu ta God. ⁶ Poli God nonga ghe gheleiemamila ami ghe muennala tani tau ngai uungu tale ouna ateva inangari niaippooa ngaitauaa, karika pitipiti ia tale inangari nipaopao ta tale Spiriti, poli inangari nipaopao eaamate taumattu, me Spiriti eteva etautau mae maulue.

Mallangina ouna ateva inangari niaippooa ngaitauaa

⁷ Nau eteva God ghe tau lao sio inangari nipaopao laghe pitila tale atu, ghe asaesaela ararina atae me mallangina etana. Arongona ta mallanga ateva ta matane Moses karika ghe toka liula, me taumattu nge Israeli etoa karika laghe rooroo tani pasiaa mataira ta matane Moses. Inangari nipaopao etautau mae nimate ghe mae aitauaa tee sio namungaili sarasarakana me mallanga. ⁸ Me koronnaaili va maamallanganiaane niuungu kanna Spiriti eteva erooroo tani lau isaa o voto. ⁹ Poli arova ia o salana atikirighi tale uunguaa niaisakei namuu ia, niuungu tani asaangi elaulau ekapa isaa o voto. ¹⁰ Ita rooroo tani ue va maamallangiaa isaa oia niuungu ghaine, elaulau maamallangiaa isaa o niuungu ang ghe lao sio. ¹¹ Inangari nipaopao ghe mae sio emua arau tee mallanga ateva karika ghe toka liula. Me ouna ateva inangari niaippooa ngaitauaa ghe mae tee sio mallanga namungaili, poli karika aue ekapa.

¹² Liuna avalua o me poli ami aatoka tuutuliiimami tale isaa o inangari me karika ami maamatautu tani ppooaa. ¹³ Karika va ami nongina Moses ghe akou rungaala matane poli taumattu nge Israeli etoa laghe rau tara ia o mallanga ateva karika ghe toka liula. ¹⁴ Nannaaira karika masalike. Emaemae tee tale isaa oia nau, nau eteva la ritiriti

pokane ateva inangari niaippooa ngaitauaa, arova tuku kalio ateva eaakou runga mataira me karika la alomasaanga. Ia o tuku kalio ateva, ta Karisto nonga ekapakapa. ¹⁵ Nongina isaa tee oia, nau la ritiriti kanna inangari nipaopao Moses, o me tuku kalio ateva eaakou runga urunguitaniira. ¹⁶ Me marova lo ateva elao ta Vau ngepona ateva, Vau ngepona ateva aue eghaa velu tuku kalio ateva eaakou runga matane. ¹⁷ Isaa avalua toko va, Vau ngepona ateva Spiriti ia, me eaa Spiriti eteva kanna ia Vau ngepona ateva etokatoka, karika righi voto erooroo tani ghelei rungaininga. ¹⁸ Ita akapa, karika righi kalio eaakou runga mataita, ita aapasunga maamallanganiaane Vau ngepona ateva nongina ghalasi eteva me ita aaikolikoliaa tale taataraane egheeleita ita laa saesae tale llo mallanga namuu ekasukasu ta Vau ngepona ateva, ia Spiriti ia.

4

Masi ghinna elome tale sospena atoa laghe gheleilala tale kosa

¹ Tale alousiusiaane ateva, God ghe tau mae sio lo ateva oia niuungu etaimami. Liuna avalua o me karika aue ami sio asoasoaa tee ia oia lo ateva niuungu. ² Karika poi ami gheelei eisulia voto etautau mae nipalata me karika ami gheelei voto kamena. Me karika poi ami aikolikoliaa inangarina ateva God. Ami auliao llo voto koronna ta matane God, me taumattu ngakapa atoa la rooroo tani aimasokoiaa me la atoka tuutuliira etaimami. ³ Me marova masi kiukiu ami poppooa eaaisulia, eaaisulia ta lo atoa ngila raaraua, ⁴ karika la ghaaiesoaa, ta vau tapaa kosa ateva egheelei runga nannaaira, me karika la rooroo tani tara mallangina masi kiukiu eaauliaa naanamungaane Karisto, ia tootoona ia God. ⁵ Poli karika ami poppooa gheeleiaaimami ta ami poppooa Iesu Karisto va ia Vau palepale ia, me ami nim kapuimim tau ngai uungu iemami Iesu. ⁶ Ta God ghe uela va, "Mallanga ateva ellaa tale saurrom ateva," me ia ghe gheleila mallanga ateva ghe llaala tale urunguitaniimami tani tau mae mallangina alomasaanga tale naanamungaane God ta matane Karisto.*

⁷ Ami nongina sospena atoa laghe gheleilala tale kosa la kaakaai isaa o masi ghinna, tani aphasunga va ia o sarasarakanan ateva elaulau isaa akapaili voto, kanna ia God me karika va kaluimami ia. ⁸ Arongona ta ami ghaaghaa voto maate tale pai ekapa aluevilau, karika etuuturungi maamauluaaimami. Arongona ta kasina nau nannaaimami ekaakatuu, karika ami sio asoasoaa. ⁹ Arongona ta la gheelei voto sesa etaimami, karika ami nanna va God ekasukasu vuliemami. Me arongona ta la tautauemami sio euu, karika la tuuturungiemami. ¹⁰ Nau etoa ami sousou nimate nongina va ami sausau matemateaane Iesu. Isaa avalua o me vilikiimami aue eapasunga maamauluaane Iesu. ¹¹ Poli ami maulue iemami, nau etoa taumattu ngatoa la aloanna tani uvi emateamami poli ami aaimuli usi tee Iesu, liuna avalua o me vilikiimami, arongona ta karika tokatoka liunna, aue eapasunga maamauluaane

3:16: Eks 34:34. **3:17:** Jon 8:36; Rom 8:2. **4:2:** 2 Ko 2:17; 1 Tes 2:5. **4:4:** Ips 2:2; Kol 1:15; Hib 1:3. **4:6:** Aitiutiui 1:3; Ais 9:2; 2 Ko 3:18. * **4:6:** Kasina uru ngai laghe pitila, laghe uela va Iesu Karisto. **4:7:** 2 Ko 5:1. **4:8:** 2 Ko 1:8; 7:5. **4:10:** 1 Ko 15:31. **4:11:** Rom 8:36.

Iesu. ¹² Isaa o voto eaaimatoonga va nimate ateva euungu elome etaimami, me eaalutu maulue ateva elome etaimim.

¹³ Laghe pitila tale Uru ngai Manga va, "Aghe aiesoala, liuna avalua o me aghe ppooaala." Tale ie nonga o spiriti niaikaia ngateva, ami aaiesoaa, liuna avalua o me ami poppooa ngaotu, ¹⁴ poli ami kilakila va lo ateva ghe totula Vau ngepona ateva Iesu tale nimate, aue etotu teeiemami tale nimate tee Iesu, me aue ami me am aue ita laa toka tee God. ¹⁵ Isaa akapaaili o voto ami gheelei aisausiimim poli ami aloanna va maamasinaane God ekasukasu ekapa see tale taumattu aue eghelei me oroieili lo atoa aue la kaili emasina sae tani tau sae God.

Tani toka tale niaikaiaa

¹⁶ Mausina avalua o me karika ami sio asoasoaa, arongona ta vilikiimami ange sessa, me kapumami spiriti eteva ta God elutululu eouna ta kateva kateva nau. ¹⁷ Poli maate ami ghaaghaa nau ghaine, nim saeokana me karika aue etoka liu, ta la nim gheelei tau mae voto oroieili me masinaaili aue etoka nau ekapa atoa, me nioneoneaane etokatoka epona liu elaulau voto maate tale kosa ateva. ¹⁸ Liuna avalua o me karika ami paapasiaa mataimami tale voto ami taatara, ta ami paapasiaa mataimami tale voto karika ami taatara. Poli voto ita taatara, enim tokatoka tau, me voto karika ita taatara, etokatoka liu.

5

¹ Isaa oia ita kilakila va arova ale kandisi eteva eaaimatoonga vilikiita tale kosa ateva oia ita tokatoka etana etarurrtti, mene kateva aleita God ghe gheleielo, lo ateva ale tokatoka liu ia epona liu, taumattu ngatoa karika laghe gheleielo. ² Isaa oia ita alousiusi me ita nannaa poi vaalua arova ita ghele asae ale ngepona liu eteva. ³ Poli nau eteva ita aitiitii, karika aue la tara vilikiita. ⁴ Nau ita tokatoka tale lo ateva ale kandisi tale kosa ateva oia, ita ghaaghaa maate me ita alousiusi poli karika ita anna va ita velu ale kandisi eteva, ta ita anna va ita aitiitii tale ale ngepona liu, me aue vilikiita pei nimate aue eaikolikoliaa me aue emaulue. ⁵ God ghe aimanomanosieinitala mausi isaa oia voto me ghe atokala unna Spiriti eteva tale urunguitaniita tani apasunga va aue ita ghaa lo ateva ale tokatoka liu ia.

⁶ Liuna avalua o me ita aatoka asarasarakana nannaaaita, arongona ta ita kilakila va nau ita tokatoka tale lo ateva oia vilikiita, karika ita tokatoka tee Vau ngepona ateva. ⁷ Malloeana avalua o me ita tokatoka tale voto ita aikaiaia etana, me karika va tale voto ita taatara. ⁸ Ita aatoka asarasarakana nannaaaita me ita masimasi tani ghaa velu ia oia vilikiita ateva, me tani laa toka aitauaa tee Vau ngepona ateva. ⁹ Liuna avalua o me kinatama nannaaaita ateva tani amasimasia nau etoa, nau ita tokatoka tale kosa ateva oia o auena tee Vau ngepona ateva. ¹⁰ Poli ita akapaaili aue ita tingina emua ta Karisto nongina liu niaisakei eteva me eghelei niaisakei etaita. Ita akapa aue ita ghaa aipolipoli erooaa niuungu ita gheelei nau oio, masina o sesa, ita uunguaa tale kosa ateva oia.

Uunguaa tani gheleita tani kateva nonga

¹¹ Liuna avalua o me poli ami kilakila vaalua malloeana tani oneoneaa Vau ngepona ateva, me ami tootoonga tani pasali taumattu ngatoa tani aiesoaa God ghe sungiemamila. God ekilakilaailiemami me tale urunguita etaimim, aghaiesoaa va am tee am kilakilailemami. ¹² Karika va ami nim aasaesae arariimami etaimim, karika! Ta ami tautau aatu inangari niaisausi, me aue am rooroo tani liu inangari-ira taumattu ngatoa la tautau sae nannaaimami masina tale taataramim, ami gheelei evalua o mausimim. ¹³ Arova ami gheelei voto tale taataramim alokapakapanna, ta taataraane Vau ngepona ateva masina; arova nannaaimami masina tale taataramim, ami gheelei evalua o mausimim. ¹⁴ Poli aielousiaane ateva Kari^{sto} ia emuemueina-mami, poli ami kilakila va kateva nonga ghe matela mausi tani sausi ekapaailiita, liuna avalua o me ita akapa ita ghe matela. ¹⁵ Me ghe matela mausi tani sausi ekapaailiita, liuna avalua o me lo atoa maulue ita ghaine, karika ita tokatoka tani amasimasita, ta ita toka tale lo ateva ghe matela etaita me ghe mene totula tale maulue mausiita.

¹⁶ Isaa oia me nau too, ita tani anna ngamasina me karika ita mene gheelei niaiskei tale taumattu nongina taumattu tale kosa ateva oia. Arongona ta emua arau ita ghe anna ngavalua o ta Karisto, me isaa oia karika. ¹⁷ Isaa avalua o me arova lo ateva etokatoka ta Karisto, ia emene oouna. Me voto pokane ang ghe kapala, me ouna ang ghe mene lutula etana! ¹⁸ Isaa akapa voto oia kanna God. Ia ghe atokala luei ta ngetaita me God tale uunguaane Karisto me ghe tau mae sio niuungu etaimami tani mene atoka luei ta taumattu ngatoa me God. ¹⁹ Inangariimami va God ghe atokala luei ta taumattu ngatoa tale kosa ateva oia me ta God tale uunguaane Karisto. God karika emene annaa kaluira ssavoto atoa. Me ghe tau mae sio etaimami isaa oia niuungu tani ppooaa inangari luei.

²⁰ Isaa avalua o me Karisto ghe sungiemamila tani aippooaa poli mausina, poli nau ami aippooaa etaimim, nonginaaili va God ekolokoloam. Ami mene aippooa ngasarakanaiili etaimim tale ararina atae Karisto: Am tani toka tale luei tee God. ²¹ Karisto karika righi kanna ssavoto me God ghe gheleieluva ie tee etoka elome tale uunguaa ssavoto ateva. Ghe gheelei evaluela o poli ghe aloanna va tale uunguaane Karisto, aue ita ghulughuluena ta God.

6

¹ Poli ami uungu tee God,* liuna avalua o me ami aloannaailiim tee va maamasinaane ateva am ghe ghaaiela, erau nim peisaane. ² Nongola saa llo God eauliaa,

“Naughu tani apasunga maamasinaaghi etam aghe nongoola,

me nau ghe ghaala naughu tani asaangio aghe sausiola.”

Am nongo! Ia oia tuku nau erighi, nauimim tani ghaa maamasinaane ateva God. Ghaine nau eteva tani ghaa niasaangi.

Pol ghe soula maate

³ Karika ami aaloanna va teva etara sesa niuungu tale uunguaaimami. Liuna avalua o, me ami tee ami tootoonga va karika ami mene gheelei runga sala taumattu. ⁴ Tale voto akapa ami tootoonga

5:15: Rom 14:7-8. **5:17:** Rom 8:1; Gal 6:15. **5:18:** Rom 5:10. **5:19:** Rom 3:23-25.

5:21: Hib 4:15. * **6:1:** ami uungu tee God o, ami uungu teeiem. **6:2:** Ais 49:8.

tani apasunga va ami kapuna tau ngai uungu iemami God. Nau ekapa atoa ami ghe tiitingina akorokorongana nau ami ghe sousou maamatana, mmarikana me sesa nau;⁵ me nau laghe paruparuemami, me laghe aatokaiemami sso tale ale mata voovoo me laghe aiaoreaa me aikkalui; me nau niuungu maate ami ghe ghaaghaa, me karika ami ghe rooroo tani asekanue eleivoo me karika ami ghe namanama.⁶ Ami apasunga va ami kapuna tau ngai uungu iemami God tale gheeleiaa niraarangisana, me tale alomasaanga, me tani tam sessai parasi, me tani ghelei masi voto, tee Spirit Manga ateva me koronna ateva ni-aielousi,⁷ tale poppoaaamami koronna, me tale sarasarakaniaane God. Ghulughuluena iemami nongina ghinna niaiuvi tani aiuvii me tani ghelei rungainamami.⁸ Katoa taumattu la oneoneainamami me katoa karika la oneoneainamami, me katoa la auliaa teeiemami voto sesa, me katoa la auliaa masi voto. Arongona ta ami aulia ngakoronna, katoa la ue va tau nikamekame iemami.⁹ Katoa, karika la kilakilaiemami, me God ekilakilaailiemami. Ami nongina taumattu ngateva ange aloanna tani mate me karika, ta ami maamaulue. Laghe uviuviemami me karika ami ghe matela.¹⁰ Arongo ta ami ghaaghaa nialousiusi me ami masimasi nau etoa. Karika tue peipeina iemami me ami saasausi oroi taumattu tani ghaa oroi voto tale niaikaiaia. Taumattu ngatoa la ghannaa va karika peimami, me karika, ta roroona iemami tale niarangise kanna God.

¹¹ Masi kapumami etoa tale masaliki taatara atae eKorint, ami ghe ppooaala voto koronna etaimim tani apasunga va aielousiaaimami etaimim namungaili.¹² Karika ami ghe kavatila urunguitaniimami etaimim, ta am, am ghe kavatila urunguitaniimim etaimami.¹³ Apoppoaa etaimim nongina va natughu iem: Am ghelei nongina ami gheelei etaimim me am tee am oti urunguitaniimim etaimami.

Urau mene toka tee lo atoa karika la aikaiaia

¹⁴ Am rau mene toka tee lo atoa karika la aaimuli tee Karisto, poli vaalua, ghulughuluena me sesa lalu rooroo tani lao aitauaa? Me am annaa va mallanga me saurrom lalu kasukasu eitauaa?¹⁵ Vaalua, am annaa va Karisto me raroai eteva[†] lalu rooroo tani mae aitauaa tale ninannaa? Me lo ateva karika eaikaiaia me lo ateva eaikaiaia, lalu roo tani mae aitauaa nonga tale kateva nonga ninannaa?¹⁶ Vaalua, alena ale manga ateva God me tootoo goto atoa la rooroo tani mae aitauaa tale righi ninannaa? Karika poi! Aghauliaa llo, poli ita alena ale manga ita God ateva tokatoka liu ia, nongina God ghe uela va, “Aue atoka aitauaa teeila, me akasu teeila, me aghi aue kapuira Goto ieghi, me ila aue la kapughu taumattu ila.”

¹⁷ Liuna avalua o me, “Vau ngepona ateva eue va: Am kasu vulila,
me am toka apolapola,
Am rau mene poso voto karika raarangisana
me aue aghaiei.”

¹⁸ “Vau ngepona ateva sarasarakanaili ia eue va: Aue aghi tamaimim
etagi
me am aue enatughu iem.”

6:5: 2 Ko 11:23-27. **6:6:** 1 Tim 4:12. **6:9:** 2 Ko 4:10. **6:13:** 1 Ko 4:14. **6:14:** Ips

5:11. **† 6:15:** Tale inangari nge Griek, Belial. **6:16:** 1 Ko 3:16; Lev 26:12. **6:17:** Ais
52:11; Autu 18:4. **6:18:** 2 Sam 7:14; Jer 31:9.

¹ Masi kapughu etoa, isaa akapa masi inangari nialokoi ghe mae sio ta God. Liuna avalua o me ita ghelei eraarangisanaita me ita ghaa velu voto elome tale vilikiita me maamauluuaaita kulukulutana, me tokatokaaita etani manga akapa tani oneoneaa God.

Masimasiaa Pol

² Am annaailiemami tale urunguitaniimim, poli karika ami ghe ghelei saasakiaala ta teva, me karika ami ghe ghelei saasakiaala aikaaiaaimim, me karika ami ghe kamela teva tani ghaa peina. ³ Karika aghauliaa llo tani aulia ngaotu va am ghe gheleila righi voto sesa etaghi. Nongina ngaghe aulia ngakasinala va, am tokatoka elome tale urunguitaniimami, liuna avalua o me arova am mate, ami tee aue ami mate, me arova am sakesake, aue ami tee ami sakesake. ⁴ Karika aghe aisuliaala righi voto etaimim, me atautau sae nannaaghi mausium. Aisausiaaimim etaghi egheleieghi amasimasi me eaasarasarakanaieghi me amasimasi nau ami tokatoka tale sesa nau.

⁵ Nau ami ghe lao sio eMesedonia, karika ami ghe ainoana amasinala poli ami ghe toka saoaala tale oroeili voto sesa, katoa laghe aissakeana teeiemami, me matautu eteva elome tale rangoimami namungaili ia. ⁶ Me poli God nonga etautau lao sarasarakana ta lo atoa la tokatoka tale nau sesa, ghe tau mae sio sarasarakana etaimami, tee tale reerekataane Taetas. ⁷ Karika va ami ghe masimasiaala nonga reerekataane, ta kiukiu tee nongina vaalua am ghe asarasarakanaielia. Ghe auliaa teela etaimami va am annaili tani taraieghi, me vaalua aalousiusiaaimim etaghi, me nannaaimim ta ngetaghi namungaili. Liuna avalua o me masimasiaaghi ghe namungailili.

⁸ Arova uneghi uru ngai etikirighi aghe pitiela ghe gheleiemla va am ghe aalousiusila, karika aghalousiusi tee llo, arongona ta aghe alousiusi nau aghe pitiela. Uneghi uru ngai etikirighi ghe gheleiemla, am ghe alousiusila tale nau karika aluse. ⁹ Me isaa oia amasimasi, karika va poli aghe ghelei alousiusiemla, ta poli alousiusiaaimim ghe gheleiemla, am ghe nna ngaioghioghiaala. Ia o ase nialousiusi eteva kannia ia God, liuna avalua o me karika ami ghe gheleila righi voto sesa etaimim. ¹⁰ Ta llo nialousiusi kannia God, etautau mae ninna ngaioghioghiaa me eaasaokita lao tale nisaanga. Liuna avalua o me karika am rooroo tani alousiusi, ta lo ateva nialousiusi lo atoa la tam aiesoaa la ghaateateainia, karika etautau mae ninna ngaioghioghiaa, ta etautau mae nimate. ¹¹ Poli am tara vaalua nialousiusi God ghe tau aatu etaimim me ghe gheleila etaimim: am ghe annangailiemamila, me am ghe aloannala tani apasunga va am karika va sesa am, me am ghe ateateaala va aghe nim aliu teeiemla. Me am ghe matautula me am ghe annangailili, me am aimonomonosiaa tani taula sesa aipolipoli ta lo atoa la gheelei sesa. Tale isaa akapa o voto, am ghe apasungaala va am karika righi gheeleiaaimim sesa. ¹² Isaa avalua o, me karika aghe pitila uru ngai etikirighi mausi lo ateva ghe gheleila voto sesa, me mausi lo ateva ghe ghaala maate ta lo ateva ghe ghelei teeielia, ta aghe pitila uru ngai etikirighi etaimim tani apasunga ta matane God vaalua maamasinaaimim etaimami. ¹³ Tale isaa o voto me easasararakana maamauluuaaimami.

Epona tale isaa o niasarasarakana, tale maamauluuaaimami ami ghe masimasieiliila tani tara vaalua Taetas ghe masimasila. Poli am ghe gheleila me ghe akorokoronganala maamauluuaane.¹⁴ Aghe arueinamla ta Taetas me karika poi am ghe gheleila nannaaghi va ghe siola euu. Nongina voto akapa ami ghe auliaala etaimim koronna, tale isaa o salana niaruaa, ami ghe gheleila ta Taetas ghe koronnala.¹⁵ Liuna avalua o me ailousiaane etaimim sarasarakanaili nau eaannaa va am ghe aimonomonosiaala tani nongo usilaa, me am ghe ghaaiela tale nioneoneaa.¹⁶ Amasimasi ta arooroo tani atoka akapa tuutulighi etaimim.

8

Laghe sausila tau nikkaua ngatoa

¹ Kapughu etoa, ami anna va am kila maamasinaane ateva God, ghe tauve lao sio tale ale manga atoa tale provinsi eteva eMesedonia. ² Nau laghe tokatoka tale nau sesaaili, laghe masimasieili, me karikaaili righi peiira, me laghe aloannaaili tani aiparuu. ³ Poli aghi aghe tarala me aghauliaa va laghe taula voto laghe roola tani taula me laghe saoa ngaoroi teela mene kasina voto tani taula. Karika teva ghe sungilala va la ghelei. ⁴ Laghe aakorokorongana tani kolomiemami va ami tau vella tani sausi tee tau ngai kkaua ngatoa ejerusalem. ⁵ Ami ghe soghiaala voto laghe tau mae sio. Laghe taula lao sio mua ta Vau ngepona ateva, vara me etaimami, nongina aloannaane God. ⁶ Liuna avalua o me ami ghe aulia ngasarasarakanala ta Taetas va emene oghi mae etaimim me emae ruu masi niuungu poli ia ghe tiuaala. ⁷ Ngam ghe tue peipeinala tale isaa o voto nongina uneimim niaikaaiia namuu, me tale poppooaaimim, me tale nialomasaanga, me aloaloannaaimim namungaili tani sausiemami me tale ailousiaaimim etaimami.* Tale ia o salana atikirighi am tani sarasarakanana tale masi uunguaaimim tani sausi.

⁸ Karika va asungisungi ererrekanaaiei tani taula, ta aghauliaa nongina aMesedonia ngatoa la paaparuu, poli anim anna tani pae aotu va ailousiaaimim ta mene katoa tau ngaisesoa koronna o karika. ⁹ Poli ngam ghe kilala maamasinaane Vauita ateva Iesu Karisto va ia tue peipeina ia me mausiiimim ghe gheleielia me ghe karikala peina, poli ghe aloannala va am ae am tue peipeina poli ia ghe karikala peina.

¹⁰ Tale nannaaghi aghanna va am ghelei evalua toko tale isaa o voto, poli aghaaiesoaa va isaa o llo masi voto tani ghelei. Poli tale lo ateae too ninamanama ang ghe lao sio, am, am ghe aitiutiula tani tau lao, me tee am ghe aitiutiula tani aloanna tani tau lao viliki veu. ¹¹ Aghanna va am tani ruu niuungu am ghe tiuaa ngakasinala. Am ghe aaloannaaili tani tiuaa, me am tani aloanna tee tani ruu. Liuna avalua o me am taula llo voto isaa etaimim. ¹² Marova am annaaili tani tau lao, God ae eghaa kaluimim nitau lao tale voto etaimim, me karika va tale voto karika etaimim.

¹³ Karika ami anna va am ghelei tokatoka katoa emasina me am tokatokaaimim emaate. Ami anna va voto emasina akapa etaimim.

¹⁴ Tale ia oia nau etiulu, nau oroi voto etaimim, isaa o voto am mene

8:1: Rom 15:26; 2 Ko 9:1-2. **8:7:** 1 Ko 16:1-2. * **8:7:** ailousiaaimim etaimami Katoa uru ngai laghe pitila, laghe ue va, ailousiaaimami etaimim. **8:9:** Mat 8:20; Plp 2:6-7. **8:12:** Mak 12:43-44.

sausi katoa, me auena, voto emene oroi etaira aue la mene sausiem nau ngam tukunala tale voto, me voto aue emasina akapa etaimim. ¹⁵ Aue nongina Uru ngai Manga ateva eaauliaa va, “Lo ateva ghe ghaala oroi karika righi ghe tokala, me lo ateva ghe ghaala malaki ghe ghaa rooroaaala.”

Taetas ghe oghi lao sio eKorint

¹⁶ Ami kaakaili emasinaaili ta God poli ghe atokala niaielousi tale urunguitanina ateva Taetas nongina aghi aghannangaili tani sausiem. ¹⁷ Poli Taetas ghe nongo usilaala, voto ami ghe annaaili va ghe ghelei, ghe annaailila va emene mae etaimim me ie tee nannaane tani mae sausiem namungaili. ¹⁸ Ngami suusuu tee kateva tau ngaisesoaa ange maemae aitauua tee Taetas, ale manga akapa atoa la aarueinia poli masi uunguaane tale masi kiukiu. ¹⁹ Me karika va isaa nonga o, ta ale manga atoa laghe suitoongainiela va ekasu teeiemami nau ami ghe sausau viliki veu tani kkaua ararina atuae Vau ngepona ateva, me tani apasunga vaalua ami annaaili tani sausi. ²⁰ Karika ami anna va teva ealiu teeiemami tale righi voto sesa nau ami aitaraa isaa o viliki veu oroi. ²¹ Ami aainanganangaaili tani ghelei voto ghulughuluena, karika va ta matane Vau ngepona nonga ateva, ta tale matane taumattu tee.

²² Liuna avalua o me ngami mene suusuu tee kateva tani mae aitauua tee taita alua, oroi nau ngami ghe toongainiela, me ngami ghe tarala va eannaaili tani aisausiaa, me eaatoka tuutulina etaimim me eannaaili tani sausiemami tani ghelei niuungu. ²³ Me ta Taetas, ia kapughu ia angalu uungu eitauua elome etaimim tani sausiem, me mene ghalua kapuita tau ngaisesoaa, lalu aaimatoonga ale manga atoa, me nioneoneaa elao ta Karisto. ²⁴ Liuna avalua o me am apasunga ailousiaaimim tale isaa o taumattu, me ila akapa ale manga atoa aue la tara, me la kila va llo ami ghe aarueinam etana, koronna.

9

¹ Karika righi uunguaaghi tani pitipiti eatu etaimim me auliaa voto tani sausi tau ngai kkaua ngatoa eJerusalem. ² Poli akilakila aloaloannaaimim tani sausi, me aghe aarueinam ta aMesedonia ngatoa. Aghe uela etaira va tale ie too ninamanama atuae ang ghe lao sio, am ona tale provinsi eteva eAkaia am ghe aimonomonosiaala tani tau lao. Me aloannaaimim tani taula ghe gheleilala me oroi ila tee lo atoa laghe annala tani sausi tee. ³ Ngasungsungi tau mae kapuita atoa etaimim me llo aghe aarueinam etaira erau nim peisaane, me am tee am aimanomanosiaa nongina aghe auliaala etaira. ⁴ Karika aue masi taataraane arova toa aMesedonia la usieghi me la atu tara va karika am ghe aimanomanosiaala. Isaa o voto aue egheleita, ita palata. Karika aue va ami nonga ta ita akapa. Anim auliaa runga llo ta isaa o voto erou lutu. ⁵ Liuna avalua o me aghe nnaala va masina arova asungi esarasarakana kapuita atoa mua la muemue eatu me la ghatu aimanomanosia ngakapa isaa o viliki veu am nim anna tani tau lao, me am, am ghe auliaala inangari nialokoi va aue am tau lao. Tale isaa o salana me aue eapasunga va am tautau lao poli am annaaili tani tau lao, me karika va ami suusulungiem.

Lo ateva emasimasi tani nim taula

⁶ Am nnaa: Lo ateva epasapasa llo karika oroi emukemuke llo karika oroi, me lo ateva epasapasa oroi emukemuke oroi. ⁷ Kateva kateva taumattu etaula nongina vaalua urunguitana ateva eanna tani taula. Karika umene taula arova karika ualoanna tani tau, me karika umene taula poli la suusulungio tani taula, poli God eaaielousiaa lo ateva taumattu emasimasi tani nim tau lao. ⁸ Me God erooroo tani tau aatu niarangise aue elau aloaloannaaimim, me nau etoa aue am ghaa oroieili voto karika isaa etaimim, me aue am rooroo tani ghelei oroieili masi niuungu etana. ⁹ Gheegheleiaaimim aue enongina Uru ngai Manga ateva eaauliaa va,

“God etautaula ta lo atoa karika peiira
kanna nighulughuluena aue etoka liu.”

¹⁰ God etautau lao katu ue ngai ta tau ngai pasa ngutana atoa, me etautau lao inana ta taumattu ngakapa atoa. Tale isaa o salana, aue eghelei aoroi peiimim me aue am mene tau lao ta lo atoa la ghanna niaisausi. ¹¹ Me God aue egheleiem aue am tue peipeina tale isaa akapa ase salana, me aue am roo tani nim taula. Oroi taumattu aue la kaili emasina sae ta God nau ami taula viliki veu am ghe tau mae sio etaimami.

¹² Isaa avalua o me niuungu am gheelei karika va aue esausi nonga tau ngai kkaua ngatoa eJerusalem, ta oroi ila mene katoa aue la masimasieili tani kaili emasina sae tee ta God. ¹³ Tale llo niuungu ngam ghe gheleila, eaapasunga ngakoronna va am gheelei voto am ghe uela va am ghelei. Me aue eghelei oroieili taumattu etau sae God tale masi uuunguaaimim eaapasunga va am nonganongo usilaa masi kiukiuna Karisto, am ue va am aikaaiia etana. Me eaapasunga tee masi aloannaaimim tani sausila me tani sausi mene katoa. ¹⁴ Me tale uneira nikokkolomi sae ta God mausiimim, aue urunguitaniira elao aitauaa teeiem mausi kinatama maamasinaane ateva God ghe tau aatu etaimim. ¹⁵ Ita kaili emasina ta God poli voto ghe nim tau mae sio, karika ita rooroo tani kila amasina!

10

Pol ghe vativatia tale uunguaane ta Karisto

¹ Aghi Pol, tale ararina ateeae Karisto, ia saghuighuiena ia, me karika esessai parasia, akookolomiem tani nongoaghi. Kasina tani taumattu la ue va atautaueghi sio nau atokatoka teeiem, me nau karika atokatoka teeiem, atautau aatu inangari sarasarakanaaaili etaimim. ² Akookolomi esarasarakanaaaili emaeteeae, aue am ghe aikolikoliaala, karika aue amene sorriena tani aulia ngasarasarakanaaaili inangari etaimim nongina aghannaa tani auliaa tee isaa o taumattu la nannaa va ami tokatoka tale uunguaa kosa ateva oia. ³ Arongona ta ami tokatoka tale kosa ateva oia, me karika ami aaiuvii nongina taumattu ngatoa tale kosa ateva oia la aiuvii. ⁴ Poli ghinna niaiuvii ami aaiuvii etana, karika va nongina pei tale kosa ateva oio, karika. Ta ami aaiuvii tale ghinna, sarasarakaniaane emaemae ta God, me erooroo tani rruti ekattuu uneira valavalala ateeae sarasarakaniaane ia tau ngai ssateeimami etoa, ⁵ me isaa akapaaili ninannaa me voto la nannaa tani saeaa nonga

epona me egheeghelei saasakiaa alomasaanga kanna God. Me ami gheelei nannaaira tau ngai ssateena atoa Karisto tani oghi vulu isaa o salana me la nongo usilaa nonga Karisto.⁶ Me nau ngam nongo usilangaili Karisto, aue ami aimanomanosiaa tani atoka ghoa eleka tale ale manga llo taumattu etam aaloanna tani nongo usilaa.

⁷ Am tara amasina voto am roroo tani tara.* Arova teva etaimim enannangaili va ia kapuna ia Karisto, eroo tani mene nnaa va ami tee kapuna amami Karisto, nongina ia.⁸ Arova aghe saasaeaa nannaaghi tale isaa o matuutuliena Vau ngepona ateva ghe tau mae sio etaimami tani atingina akorokoronganaiem me karika tani gheleiem va am katuu, karika aue apalata.⁹ Poli karika aghaaloanna va aghamatautuem tale uru ngai apitipiti atu etaimim.¹⁰ Poli katoa la ue va, "Am rau mene annangaili Pol, poli uru ngai epitipiti pasu tale inangari matuutuliena me sarasarakananaili, me tani tara tuungia nau eaippooaa, karika muenna ia tani aippooaa, me inangari eaauliaa karika righi malloeanina."¹¹ Isaa o taumattu eaauliaa isaa o ase inangari, la tani anna ngamasina me la kila va, nau ami mae toka teeiem, aue ami toka nongina sa ateva am ghe taraiela tale uru ngai etikirighi aghe piti ekasinaie mae sio etaimim.

¹² Ami gheelei tani apasunga va saa taumattu iemami, me karika ami aasarasarakanaiemami tani apasunga va ami eitauaa me lo atoa la saasaeaa nannaaira. La ghaitoongieinila elome ta ngetaira tale ninannaa. Isaa o ase ninannaa eaapasunga va alokapakapa ila.¹³ Me karika aue ami aasakeea llo niuungu karika isaa etaimami tani lau aioghioghi etaimami nongina ami uungu. Kinatama nannaaimami va ami toka tale aioghioghi nongina God ghe aloannala va ami gheelei, me am tee elome tale isaa o niuungu.¹⁴ Poli karika masina va karika ami ghe mae sio tani taraiem, me ami asaesae nannaaimami. Ta ami, ami ghe aitiutiula tani maeaa masi kiukiuna Karisto etaimim.¹⁵ Karika ami aasaesae nannaaimami tani lau aioghioghi etaimami, tale niuungu katoa taumattu laghe gheleila. Ta nannaaimami va nau aiesoaaaimim epinosa akorokorongan me elao ta mene kasina taumattu laghe tam kila masi kiukiuna Iesu, elome nongina ami, ami uungu,¹⁶ me aue ami roo tani mene ppooaa masi kiukiu tale mene kasina patunganua namuu masau tanganueimim. Me karika ami roroo tani aasakeea niuungu katoa laghe gheleila elome nongina ila la uungu.¹⁷ Me nongina Uru ngai Manga ateva eue va, "Arova teva ealoanna tani aasake, eaasakeea saa llo voto Vau ngepona ateva ghe gheleila etana."¹⁸ Poli ita kilakila va lo ateva taumattu esaasaeaa nannaane, ia o taumattu ngateva karika God eue va masina ia. Ta arova Vau ngepona ateva etau sae ararina atae ia o taumattu ngateva, ie nonga o ase taumattu ngateva masina ia ta matane Vau ngepona ateva.

11

Pol me kamena atoa apostolo

¹ Aghanna va aue am roroo tani nongo niaippooaa aue aghelei, arongona ta aghi nongina alokapakapa ateva, me am tani nongoaghi.

² Poli anannangaili em tee ninannaa manga. Aghe auliaala inangari

* **10:7:** Katoa la ue va malloeanaa va Voto ateva am taataraia nonga eleka. **10:8:** 2 Ko 13:10.

10:13: Rom 12:3. **10:17:** Jer 9:24; 1 Ko 1:31. **10:18:** 1 Ko 4:4. **11:2:** Ips 5:26-27.

nialokoi tani tauem lao ta kateva nonga taitaniimim, ta Karisto, me aghi aue arooroo tani tauem lao etana nongina vause ateva raarangisana ia, karika ghe kila taita.³ Me amaamatautu, poli nongina Ivi katu ngateva muennaaili ia tani kamekame ghe kameala, nannaaimim erou tiu ppae me karika am aielousiaa Karisto tale urunguitaniimim akapa.⁴ Poli nau eteva kateva emae etaimim me eppooaa Iesu, me karika va lo ateva Iesu ami ghe ppooainiela etaimim, o arova am ghaa kateva ppae spiriti tale lo ateva am ghe ghaa akasinaiela, o kasina ppae masi kiukiu tale llo akasina am ghe ghaala, emaamaluminaaili etaimim me arovaea ta am ghaaghhaa.⁵ Poli karika atani nannaa va aghieili euu tale ila o apostolo atoa la ue va ilaili epona.⁶ Arongo ta karika aghe lao sio tani ghaa alomasaanga tale uunguaa niaippooaa, me karika koronna va atam kilakila amasina isaa o masi kiukiu. Tale isaa akapa salana ami ghe ghelei emasalikangailila isaa o voto etaimim.

⁷ Am annaa va aghe gheleila ssavoto nau aghe sioainaghila euu tani gheleiem va am, am sae epona nau aghe poppoaa masi kiukiuna God me karika aghe ghaaghhaa aipolipoli?⁸ Aghe aainao viliki veu katoa ale manga laghe nim tautau mae tani sausieghi, tani uungu etaimim.⁹ Me nau aghe tokatoka teeiem, me aghe anna voto, karika aghe tautaula maate ta teva taumattu, poli kapughu etoa laghe kasula eMesedonia, laghe tau mae sio voto aghe anna. Aghe aitarainaghi tani ghelei va erau mene maate etaimim tale asease salana, me aue atoka gheelei evalua o.¹⁰ Me nongina voto koronna ta Karisto etokatoka etaghi, aghaaulia ngakoronna va karika teva tale provinsi eteva ona eAkaia aue eghelei rungainaghi tale aasakeaaghi va karika aghaaghhaa viliki veu tale uunguaa tani ppooaa masi kiukiu.¹¹ Poli saa? Poli karika aghaailousieinam? God ekilakilaaili va agheelei evalua o poli aghaailousieinam.

¹² Me karika aue aruu tani ghelei voto agheelei, poli aghaloanna va lo atoa la paepae salana va la ghairooaa teeiemami tale llo la ghaasakeaa etana, karika aue la roo tani aasake.¹³ Ta isaa o taumattu apostolo kamekame ila. La ghaikameaa tale uunguaaira, la gheelei vara mene kapuna apostolo koronna ila Karisto.¹⁴ Karika ita rooroo tani soghiaa poli Satana egheelei tee vara mene ensolo tale mallanga ia.¹⁵ Liuna evalua o me karika ita rooroo tani soghiaa arova kapuna tau ngai uungu etoa la gheeleila arova tau ngai uungu tale ghulughuluena ila. Me airuuruu etaira, aue la ghaa aipoliira tale voto la gheelei.

Pol ghe aasakeaa nimmarikana ghe ghaala

¹⁶ Amene aulia ngaghanuene va karika teva emene taraieghi va alokapakapa aghi. Me arova am taatara avalueieghi o, am ghaaieghi va alokapakapa aghi me aue amala aasake.¹⁷ Tale isaa o voto, aghaasake tani aulieinaghi. Karika aghaippooaa nongina teva kapuna Vau ngepona ateva, ta nga samasama arova alokapakapa ateva.¹⁸ Oroi ila lo atoa la ghaasake nongina aasakeaa sala kosa ateva, liuna evalua o me aghi tee aghaasake.¹⁹ Me aue aghaasake poli alomasaangaaili iem me am ghe masimasieiliila tani lao aitauuaa tee nannaaira alokapakapa atoa,²⁰ me am ghe masimasila tani tau veluem ta lo ateva taumattu

11:3: Aitiutiu 3:4, 13. **11:4:** Gal 1:8-9. **11:5:** 1 Ko 15:10; 2 Ko 12:11. **11:6:** 1 Ko 2:1, 13. **11:7:** 1 Ko 9:18. **11:8:** Plp 4:15-16; 2 Ko 12:13.

ghe annala tani gheleiem am ghe nim tau ngai uungula me karika am tokatoka tale aloannaaimim, me enim ghaagħhaa peiimim me karika emene nannaainam, me ekamekameam tani muemueinam, me eaasaesae ararina ateeae, me nonginaaili lo ateva eanna tani posala pasipasi mataimim. ²¹ Tale paapalataagħi nga għaulia ngaotu va, sagħuighuinaaili emami tani ghelei isaa o voto.

Arova teva taumattu eaasarasarakana tani asaesae nannaane, aghi tee arooroo. (Nga għaippooa nongina alokapakapa ateva). ²² Vara ila nonga va aHibru ila? Ta aghi tee. Me vara ila nonga va al-Israeli ila? Ta aghi tee. Me vara ila nonga va tuvuna ila Abraham? Ta aghi tee. ²³ Vara ila nonga va kapuna tau ngai uungu ila Karisto? (Nga għaippooa arova veeveena iegħi.) Alaulaula tale niuungu. Aghe uungu esarasarakanaaili, me oroiaata aghe ssola tale ale mata voovoo, me lagħe paruparuegħi oroiaata me karika arooroo tani nnaa va ghaisaata, me oroiaata aghe oħġiogħi lao tale nimate. ²⁴ Għalimaata aghe għala niparuparu ta ajiu etoa, kateae niparuparu għe saesae ta kotolungaulu għas-sa (39).* ²⁵ Kotoluata lagħe parueghila tale ai, me katengaata lagħe osaiegħila tale atu. Me kotoluata anua aghe aikaaila etana, għe tarrrutila elamana. Kateva voo me llaa ngateva aghe vukalala elo malionge. ²⁶ Oroieili nau aghe kasukasu ekapa see, aghe sousou sesa nau tani kasu longoti tale ateo atoa, me ta tau ngai sari ghinna atoa tapaa salana, me ta lo atoa tħanġueim mami eitħau, me ta taumattu ngeleka atoa, me tale masaliki taatara, me tale voto karika righi taumattu etana, me elamana, me agħe tokala tale sesa nau tee lo atoa lagħe kamekame vara mene kapugħu ila. ²⁷ Agħe uungu aanasa tee nimmarikana, me oroiaata karika agħe asesekanua eleivoo. Agħe maamaloo me agħe kaakangngata tee manu, me karika righi anegħi, me karika oroi kaliogħu nau agħe kakkaili. ²⁸ Tani mene saoaa sae tale isaa o voto, nau ekapa atoa anannangaili isaa akpaaili ale manga. ²⁹ Nau kateva tale ale manga atoa esaasagħuighuina, aghi tee asaasagħuighuina. Nau kateva ange għeleila kateva ange katuula tale ssavoto, am annaa va karika esessaiegħi?

³⁰ Poli arova atani aasake, aue aghħaasakeaa llo voto eaapasunga saasagħuighuiaagħi. ³¹ God, ia kapuna Goto ia me Tamane ia Vau ngepona ateva Iesu, me ie nonga ita taue sae nau ekapa atoa, ekilakila va karika akamekame. ³² Tale masaliki taatara atee e-Damaskas namu ngateva għe uungu ta King Aretas għe atinginala soldia ngatoxa tani toi runga masaliki taatara atee tħalli għe kuneiegħi. ³³ Me lagħe tauuegħi siola euu tale kinatama aikaai eteva arova keru eteva tale uindoa tale keavalavalha ateva me agħe saangala.

12

Unna nitaatara atee Pol

¹ Atani toka aasake. Arongona ta karika aue aghħa righi voto masina, me isaa oio apopppooa tee nitaatara me llo Vau ngepona ateva għe aotula etagħi. ² Akilakila kateva taumattu eaimuli tee Karisto,

11:21: Plp 3:5. **11:23:** Apos 16:23. **11:24:** Diut 25:3. * **11:24:** Ta Diutronomi 25:1-3 God għe uela va niparuparu erau mene lau għaatingauli (40), me ajiu etoa lagħe uela va karika emene lau kotolungaulu għas-sa (39), poli la rau tam ioie amasina va la lau aħġiogħi eteva ta għaħħaqgħi. **11:25:** Apos 16:22; 14:19. **11:26:** Apos 9:23; 14:5. **11:32:** Apos 9:23-25.

kasangaulu ghaatiae (14) ninamanama ang ghe lao sio God ghe ghaiae saela epona liu* (karika akilakila va ghe saela nongina va taumattu ngateva o tale ninannaa — God nonga ekilakila). ³⁻⁴ Amene auliaa, akilakila va taumattu ngateva oio God ghe ghaiae saela tale masi umana utana atingiu God (karika akilakila va ghe saela nongina va taumattu ngateva o tale ninannaa — God nonga ekilakila), me isaa okae ghe nongola voto karika ghe rooroo tani kila mata nginangari tani aulia ngamasina, voto taumattu erou mene auliaa. ⁵ Aghaasakeaa ia o ase taumattu ngateva — karika amene aasakeainaghi nonga, ta voto nonga eaapasunga va karika sarasarakanan ieghi. ⁶ Poli marova aghaloanna tani aasake, karika va alokapakapa aghi, ta aue aghaulia ngakoronna, ta karika aghaloanna va teva etingina tale llo oia me etaueghi sae tale nannaane, ta marova eghelei evalua o, etingina tale voto llo ghe tarala aghe gheleila me ghe nongola ta aghe ppooala.

⁷ Me tani ghelei rungainaghi va arou mene saeaa nganamuun nannaaghi tale masi voto atoa aghe tarailala, aghe ghaala mmarikana tale vilikighi nonginaaili va kateva voto ghe rorrooaghi, eaaimatoonga uunguaane Satana tani tingina rungainaghi me tani ghelei va asioaa nannaaghi. ⁸ Kotoluaata aghe kolomi esasarakanan saela Vau eteva tani ghaa velu ia o voto ateva. ⁹ Me karika ta ghe uela etaghi va, “Alousiusiaaghi eteva erooro etam, poli sarasarakaniaaghi etani sarasarakanaili tale taumattu karika righi sarasarakaniaaira.” Liuna avalua o me amasimasieili tani aasake tani ue va aghi karika sarasarakanan ieghi me aue sarasarakanian Karisto aue etoka ta ngetaghi. ¹⁰ Liuna avalua o me amasimas tani tam sarasarakanan, tale sesa inangari la poppooaa teeieghi, me tale nau asousou mmarikana, tale nau etoa la gheelei saasakiaa etaghi, me tale asease nau karika masina tale maamauluaaghi, mausi Karisto. Poli nau eteva atam sarasarakanan, isaa o nau asasarakanan.

Pol ghe nannangaili aKorint atoa

¹¹ Isaa oia inangari agheelei marova alokapakapa ateva, poli mausimim me agheelei isaa oia voto. Ghe roola va am, am ghe auliaa masi uunguaaghi, me karika, am ghe gheleila me aghi ngaghaaulia ngaotu. Arongona ta aghi nim lao ieghi, me aghi alaulau ila o apostolo atoa la ue va ilaaili epona. ¹² Aghe gheleila oroieili aimatootoongana me mirikolo, eaapasunga va aghi apostolo ieghi, nau aghe tam sio asoasoaa tani uungu teeiem nau voto karika masina ghe lutulutu teeieghi. ¹³ Karika va aghe gheleiemla va amaili euu tale mene katoa ale manga. Voto nonga ateva karika aghe gheleielta etaimim, karika aghe looloo righi viliki veu va emaate etaimim. Aghaloanna va am kkaluaa!

¹⁴ Am nongo, aiaakotonna oio ngamene aaimonomonosiaa tani mene mae taraiem, me nongina arau, karika aghaloanna tani loo righi voto etaimim. Ta anim aloannaiem, karika va peiimim. Ta karika va aliki etoa la aitaraa tamaira me kinaira, ta tamaira me kinaira la aitaraa natuira atoa. ¹⁵ Aue amasimas tani tau peighi, me aue amasimas tee arova God etaueghi atu etaimim, tani sausiem. Vaalua, ailousiaaimim etaghi ange ghaaghauna nau eteva ailousiaaghi etaimim

* **12:2:** epona liu Tale inangari nge Griek, aiaakotolu eteva epona liu. **12:7:** Job 2:6. **12:9:** Plp 4:11-13. **12:11:** 2 Ko 11:5. **12:12:** Rom 15:19. **12:13:** 2 Ko 11:9.

namuu? ¹⁶ Am rooroo tani asokoi va karika aghe saoaala maamatana etaimim. Me ktoa aue la ue va alomasaanga aghi me aghe kameamla. ¹⁷ Vaalua? Saa nannaaghi nau aghe sungi mae sio taumattu tani ppooa etaimim? Tani kameam me tani ghaa viliki veu? Karika poi! ¹⁸ Aghe kookolomi esarasarakanaaili Taetas tani mae, me aghe sungila mene kateva kapuita tau ngai kkaua va eusia. Am annaa va Taetas tee ghe kameamla? Am rooroo tani kila va gheleiaaimami me nannaaimami, kateva nonga ia.

¹⁹ Koti am nanna va isaa o nau ami ghe nim tootoonga tani vatiemami etaimim. Karika poi! Ami poppooaa nongina kapuna atoa Karisto ta matane God, me voto akapa ami ghe gheleila, masi kapughu etoa, ami ghe gheleila tani akorokoronganaiem. ²⁰ Poli amaamatautu va nau amae rekataa ona, arau tara va karika am tokatoka nongina aghanna va am ghe toka, me koti am tee aue am tara va aghi tee karika atokatoka nongina am anna va atoka. Amaamatautu va aue atara va am aaikiso, am nanna saasakiaa, am aaisessaii, am tokatoka apolapola, am auliaa inangari tani ghelei kateva nannaane esio euu, am auliulia see, am saesaea nannaaimim me am tam aimulisi tee masi salana. ²¹ Amaamatautu va ia o nau eteva aue amae, kapughu God ateva aue eghelei nannaaghi esio euu mausi voto am gheelei, me aue aghalousiusi tee lo atoa taumattu angila ghe katuula tale ssavoto me karika laghe nna ngaioghioghiuala tale voto karika raarangisana, me nialai salosalooa see, me tani nim anna tani ghelei sesa voto.

13

Airuuruu tale inangari tani auliaa kieira

¹ Kotonna oia ngamaemae tani taraiem. Aue nongina Uru ngai Manga ateva eue va, “Nau niaiskei, erooro va ghalua o kotolu la ghasokoi voto laghe tarala.” ² Ngaghe auliaala kieimim nau aghe toka teeiemla tale aiaaghaluene ateae uneghi niatu etaimim, me ghaine, nau karika ieghi, nga ghaauliaa ta lo atoa laghe ghelei ekasinala ssavoto, me ta ngetaim akapa, nau amene mae rekataa karika aue agharrasaiem, ³ poli am anna tani kila va koronna va inangari apoppooaa ekasukasu ta Karisto, o karika. Karisto, ia karika saghuighuina ia tani uungu teeiem, ta ia sarasarakanaili ia elome etaimim. ⁴ Me koronna va laghe avukalaie saela tale aikotoo tale nisaghuighuina, me karika ta emaamaulue tale sarasarakaniaane God. Isaa avalua o me arongona ta ami saghuighuiena iemami etana, me tale sarasarakaniaane God aue ami toka teeia tani uungu etaimim.

⁵ Am taraiem mua tani tara va am tale niaikaaiaa o karika; am tootoongainam mua. Karika am kilakila va Iesu Karisto ia etaimim? Me arova karika ia etaimim, karika am ghe tani aikaaia ngakoronna. ⁶ Me aghaaisesoa va, aue am pae me kila va ami apostolo tuungi iemami. ⁷ Isaa oia ami kokkolomi sae ta God va karika am mene ghelei voto sesa. Karika va poli taumattu ngatoa la tara va ami apostolo tuungi iemami, ta poli am aue am ghelei voto ghulughuluena, arongona ta ktoa la nanna va karika va apostolo tuungi iemami. ⁸ Poli karika ami rooroo tani ghelei righi voto tani ghelei runga llo voto koronna,

ta ami ghelei nonga llo voto masina elao lao aitauaa tee koronna.
⁹ Aghaa uliaa isaa o voto poli ami masimasi nau ami saasaghuighuina me am sarasarakana am, me kaluimami nikokkolomi etaimim va am rooroo tani mene tingina asarasarakana. ¹⁰ Liuna avalua o me apitipiti isaa oia voto nau karika aghi ona, me nau amae, karika aue amene sorriena tani aulia ngasarasarakanaili nau aghelei llo matuutulieni. Isaa o niuungu matuutulieni Vau ngepona ateva ghe tau mae sio etaghi tani asarasarakanaiem, karika va tani ghelei ekatungiem.

Airuuruu tale inangarina Pol

¹¹ Airuuruu, kapughu etoa, am masimasi, me am tootoonga tani toka tale masi nitoka, me am ppooa ngaisausia tani asarasarakana kateva kateva etaimim, me ekateva nonga iem tale ninannaa, me am toka tale luei, me Goto ateva etautau niaielousi me luei aue etoka teeiem.

¹² Am sou kateva kateva etaimim tale niaielousi.* ¹³ Ila akapa kapuna taumattu ngatoa God la sungi atu sio masimasiaaira etaimim.

¹⁴ Alooloo sae va aue maamasinaane Vau ngepona ateva Iesu Karisto me aielousiaane ateva God me niaighui eitauaa ta Spirit Manga aue etoka aitauaa tee akapaiem.

13:10: 2 Ko 10:8. * **13:12:** tale niaielousi Tale inangari nge Grik, eue va, tale niaingusu eteva manga ia.

Uru ngai etikirighi Pol ghe pitiela ta aGalaisia ngatoa Inangari emuemua

Uru ngai etikirighi Pol ghe pitiela ta aGalaisia ngatoa, tau ngalo-masaanga atoa la nannaa va aitiutiu ia tale uru ngai Pol ghe pitila. Galaisia kateva provins tale patunganua ateva namuu ia ghaine ita aseasea va Teki, me Pol ghe kasu seela tani atoka ale manga tale aitiutiu eteae unna nikasu. Pol ghe lao sio okae eGalaisia tani tara isaa o ale manga tale aiaaghaluene me aiaakotonna ateae nikasu.

Aitiutiu etoa taumattu laghe aiesoaala ta Iesu, ajiu ila, me kinatama niaissa ghe lutula va tau ngeleka atoa la tani ajiu, me auena la rooroo tani saanga. Pol ghe pitila ia oia uru ngai etikirighi tani aulia ngaotu nannaane tale isaa o voto. Ghe apasungaala va ta niaikaiaa ta Iesu nonga ita saanga, me karika va ita aaimuli usi tee inangari nipaopao kanna Moses. Me tee, ghe apasungaala va, nau ita aiesoaa ta Iesu, malloeana karika va ita rooroo tani ghelei voto akapa ita aloanna, ta ita ghelei voto masina, ita sausi kateva kateva etaita tale niaielousi, tee niaisausi kanna Spirit Manga.

Tani kila amuemua

Aitiutiu tale inangari 1:1-5

Pol ghe apasungaala va ia apostolo ia 1:6-2:21

God easaangita mausि kaluita niaiesoaa, me karika poli ita aimuli usi tee inangari nipaopao 3:1-4:31

Karisto egheeleita ita rooroo tani ghelei masina me tee niaisausi kanna ia Spirit Manga 5:1-6:10

Airuuruu tale inangari 6:11-18

¹ Aghi Pol, apostolo ieghi karika toa taumattu laghe sungieghila, me karika tee nim teva taumattu ghe suimatoongainaghila, ta Iesu Karisto me God Tamaita ia, ia ghe totula Iesu tale nimate. ² Aghi me kapughu tau ngai kkaua ngakapa atoa la tokatoka teeiegħi ami pitipiti aatu etaimim tale ale manga atoa tale provinsi eteva eGalaisia.

³ Alooloo sae va maamasinaane me luei ekasukasu ta God Tamaita ja me Vau ngepona ateva Iesu Karisto aue etoka teeiem. ⁴ Ghe tau mae sio maamauluaane tale kaluita ssavoto tani għha oghita tale nau etiulu oia sesaaili ia, nongina aloaloannaane Tamaita ateva ta God. ⁵ Ta ngetana nikkauua aue etoka nau ekapa atoa, koronnaaili.

Karika mene teva masi kiukiu

⁶ Aghe sogħieinamla va arovaea ta am ghe kasu vulila God ghe koloamlu tale maamasinaane Karisto me ngam aaimuli tee kasina ppae masi kiukiu, ⁷ llo karikaaili va masi kiukiu. Taataraane va katoa taumattu la ghe għeileha nannāaimim ang ghe aisavisavilaala me la tootoonga tani aikolikoliaa masi kiukiuna Karisto. ⁸ Me arova ami o teva ensolo ngepona liu għeppooa masi kiukiu me karika elaelao aitaua tee llo ami għe ppooaala etaimim, nikasikien kanna God aue etoka etana. ⁹ Nongina ngami auliaala me ngamene aauliaa va, arova

teva epoppooaa masi kiukiu me karika elaoalo aitauua tee llo ngam ghe ghaala, nikasikieno kanna God aue etoka etana.

¹⁰ Ia oia see aue eue va masi taumattu ieghi, taumattu ngatoa o God? Arova anim anna tani amasimasi taumattu ngatoa, karika arooroo tani kapuna tau ngai nonganongo anna Karisto.

Kiukiu vaalua God ghe kolola Pol

¹¹ Aghanna, kapughu etoa, va am kila va masi kiukiu apoppooaa karika va nim kiukiu taumattu ngatoa laghe gheleila, ¹² me karika aghe ghaala ta nim teva taumattu, me karika toa laghe apasungaala etaghi, ta Iesu Karisto ghe apasungaala isaa o voto etaghi. ¹³ Ngam ghe nongola gheeleiaaghi tale nau too ang ghe lao sio tani usilaa gheeleiaaira ajiu etoa. Aghe uviuvi saasakiaa alena ale manga ateva God me aghe anna tani turungia. ¹⁴ Ngaghe muumuennaaili me kilakilaaili vaalua tani aimuli tee kakkauaaimami ajiu etoa. Gheeleiaaghi ghe laulau lo atoa aneimami ninamanama isaa aitauua me aghe sarasarakananaili tani aimuli tee gheeleiaaira tuvuumami etoa. ¹⁵ Me nau Goto ateva, ghe suit-oongainaghila nau aghe lutula me ghe koloaghila poli maamasinaane, ghe masimasila ¹⁶ tani apasunga Natuna etaghi me aue appoainia ta lo atoa karika ajiu ila. Isaa o voto karika aghe kolomila teva taumattu, ¹⁷ me karika aghe sae teela eJerusalem tani kolomi lo atoa tee taumattu laghe apostolo akasinala etaghi. Karika, ta gharovaeaa nonga ta aghe ssola eArabia vara me aghe mene lao sio eDamaskas.

¹⁸ Vara kotoluae ninamanama ghe ruula me aghe saela eJerusalem tani kila amasina Pita* me aghe toka teeielaa kasangaulu ghalima (15) nau. ¹⁹ Karika aghe mene tarala teva apostolo nim Jeimis nonga, tue me nenga ilalua me Vau eteva. ²⁰ Aghaaulia ngakoronna etaimim tale taataraane God va voto apitipiti aatu etaimim karika va kamen. ²¹ Emulina aghe lao sio tale provinsi elua eSiria me eSilia. ²² Oroieili ale manga ejidua laghe aaimuli tee Karisto karika laghe tara poila mataghi. ²³ Laghe nim nonganongo kiukiu va, “Taumattu ngateva ghe tuuturungita, nau ghaine ange poppooaa niaikaaia ngateva emua arau ghe anna tani turungia.” ²⁴ Me laghe tau saela God poli mausighi.

2

Mene katoa apostolo laghe masimasiaala Pol

¹ Kasangaulu ghaatiae (14) ninamanama ghe ruula me angalua me Banabas angalu ghe mene saela eJerusalem, me aghe kolo teela Taetas tani kasu teeengalua. ² Aghe saela poli aghe aaimuli tee voto aghe tarala. Aghe sou eisuliaala lo atoa marova namuu ila, me aghe auliaala etaira masi kiukiu aghe poppooaa ta taumattu ngeleka atoa. Aghe gheelei llo va voto aghe gheleila me voto ghaine agheelei oia ghe rau nim peisaane. ³ Arongo ta Taetas aGriki ia ghe usieghila, me karika poi laghe asarasarakanala tani ue va la isoia. ⁴ Voto ateva o ghe lutula poli katoa taumattu tau nikamekame ila laghe soso ainao tani tara rungainamami tale masi nitoka ngami ghe ghaala ta Karisto Iesu. Me

1:10: 1 Tes 2:4. **1:11:** Mat 16:17. **1:13:** Apos 8:3. **1:14:** Apos 22:3. **1:15:** Ais 49:1; Gal 2:7. **1:18:** Apos 9:26-27. * **1:18:** Pita Pol ghe pitila va Kepas. Tale inangari nge Aramaik, Kepas malloeana va atu. Tale inangari nge Griki, Pita tee malloeana va atu. **1:21:** Apos 9:30. **2:1:** Apos 15:2. **2:4:** Gal 1:7; 5:1, 13.

laghe anna tani gheleiemami va ami, ami nongina tau ngai uungu eteva euungu me karika etokatoka tale aloaloannaane.⁵ Karika poi ami ghe annala tani nongo usilainila, poli ami anna va koronna voto tale masi kiukiu etani toka etaimim.

⁶ Me lo atoa namuu ila me matarane ila, karika laghe auliaa saoaala righi inangariira tale voto aghe auliaala. (Saa taumattu ila, karika aghannainila; God karika egheelei niaisakei tale voto eleka tale taumattu.)⁷ Tale isaa o voto, laghe tara kilala va aghi God ghe tau mae sio ia oia niuungu eteva tani ppooaa tale taumattu ngeleka atoa nongina Pita ta ajiu etoa.⁸ Nongina God euungu ta Pita tale uunguaane va apostolo ia ta ajiu etoa, God tee euungu etaghi tale uunguaaghi va apostolo ieghi ta taumattu ngeleka atoa.⁹ Jeimis, Pita* me Jon, nau laghe tara kilala maamasinaane God ghe tau mae sio etaghi, la taatara sae etaira va namuu ila, laghe ssuuaala nimaira muenna tani sighaa etaingalua me Banabas. Laghe mae sio nonga tale kateva nonga ninannaa va ami lao ta taumattu ngeleka atoa me ila ta ajiu etoa.¹⁰ Kateva nonga voto laghe kolomiemamila etana, va ami rau mene ruu tani sausi lo atoa karika tue peipeina ila. Lo ateva o voto aghe annaaili tani gheleia, poli emua arau aghe gheeleia.

Pol ghe tam masimasiaala Pita

¹¹ Nau Pita ghe sio mae eAntiok aghe sama anamuu teeielta ta mataira taumattu ngatoa poli llo ghe gheelei karika masina.¹² Auena Jeimis ghe suu katoa taumattu tani sio, Pita ghe namanama akasina tee taumattu ngeleka atoa me nau laghe rekatala, ghe kasu vulilala me ghe ruula tani usi taumattu ngeleka atoa poli ghe maamatauta lo atoa taumattu ila elome ta lo atoa isoiso ila.¹³ Ajiu ekapa atoa laghe usila nannaane kamena, liuna avalua o me Banabas tee ghe usila voto kamena laghe gheelei.

¹⁴ Nau eteva aghe tarala va karika laghe kasukasu eghulughuluena nongina koronna voto tale masi kiukiu, aghe uela ta Pita emua ta mataira akapa va, “Io ajiu io me utokatoka nongina taumattu ngeleka ateva, karika va nongina ajiu eteva. Vaalua me uasarasarakana va taumattu ngeleka atoa la ajiu?

¹⁵ “Italua italu ghe lutula va ajiu italu karika nongina lo atoa la ue va taumattu ngeleka atoa tau ssavoto ila.¹⁶ Ita kilakila va taumattu karika eghulughuluena nau eaaimuli tee inangari nipaopao ta tale niaakaiaa nonga ateva ta Iesu Karisto. Liuna avalua o me ita tee ita atoka aikaiaaita ta Karisto ateva Iesu, tani ghulughuluena tale niaiesoaa ta Karisto, karika va tani aimuli tee inangari nipaopao. Poli tani aimuli tee inangari nipaopao, karika teva erooroo tani ghulughuluena.

¹⁷ “Nau ita paepae salana tani ghulughuluena ta God tale niaakaiaa ta Karisto, aue ita pae aotu va sesa gheegheleiaaita. Vaalua, ia o Karisto egheegheleita va ita gheleia ssavoto? Karika poi!¹⁸ Arova amene atulu voto aghe rrutila, voto o eaapasunga va karika aghaaimuli tee inangari nipaopao.¹⁹ Me mausi inangari nipaopao me aghe matela tale inangari nipaopao me aue amaulue ta God.²⁰ Aghi aghe mate teela Karisto tale aikotoo, karika va aghi va atokatoka nau ghaine ta Karisto

2:7: Apos 22:21. * 2:9: Pita Tale inangari nge Grik, Kepas. Me tee tale ves 11 me 14. 2:10: Apos 11:29-30. 2:12: Apos 11:3. 2:16: Apos 15:10-11; Rom 3:20-28; Gal 3:11. 2:20: Gal 1:4.

etokatoka etaghi. Maulue ateva ghaine atokatoka etana, atokatoka tale niaikaiaia tale Natuna ateva God, ghe ailousieinaghila me ghe tau mae sio maamauluaane etaghi.²¹ Karika aghanna tani velu maamasinaane God me arova ita rooroo tani ghaa nighulughuluena mausi inangari nipaopao, karika righi malloeane matemateaane Karisto.”

3

Niaikaiaia o tani aimuli tee inangari nipaopao

¹ Alokapakapa am aGalaisia ngatoa! See ghe ghelei esavisavilaala nannaaimim? Tale nongonongoaaimim nonginaaili va am ghe tara amasinaailila matemateaane Iesu Karisto tale aikotoo. ² Aghanna tani kolomiem tale kateva nonga voto: Vaalua am ghe ghaala Spiriti eteva, nau am ghe aimuli teela inangari nipaopao, o poli am ghe aiesoaala tale voto am ghe nongola?³ Ngam alokapakapaaili va? Am ghe tiuaala tani kasu tale Spiriti eteva me ngam anna tani ruu tale aloaloannaa taumattu ngatoa tale kosa ateva, va?⁴ Voto maateaili am ghe ghaala tale maamauluaaimim, ang ghe nim peisaanela? Karika aghanna va ghe nim peisaane.⁵ Am anna va God ghe tau aatu sio Spiriti eteva me ghe gheleila mirikol elome etaimim nau am ghe aimuli teela inangari nipaopao o poli am ghe aiesoaala voto am ghe nongola?

⁶ Am annaa Abraham: “Ghe atokala tuutulina ta God, liuna avalua o me ghe aseala va ia ghulughuluena ia.” ⁷ Am tani kila amasina va lo atoa la ghaisesoaa, natuna ila Abraham. ⁸ Uru ngai Manga ateva ghe tara amuemua alokoila va God aue eghelei eghulughuluena taumattu ngeleka atoa tale uneira niaikaiaia. Me ghe aulia ngakasinala masi kiukiu ta Abraham va, “Aue ararimangali ekapaaili etoa aue la ghaa niarangise ta ngetam.” ⁹ Liuna avalua o me lo atoa la ghaisesoaa, la ghaaghhaa niarangise ateva tee Abraham, ia tau niaikaiaia ia.

¹⁰ Lo atoa la ghannahaa va la ghaimuli tee inangari nipaopao tani ghulughuluena ta matane God, la tokatoka tale nikasikiena, poli laghe pitila va, “Nikasikiena ta lo akapa atoa karika la gheelei voto akapa pitipiti tale vuku nipaopao ateva.” ¹¹ Masalikeaili tani tara va karika teva erooroo tani ghulughuluena ta taataraane God mausi inangari nipaopao, poli, “Lo atoa la ghaisesoaa, God aue easela va ghulughuluena ila, me aue la maulue.” ¹² Tani aimuli tee inangari nipaopao karika elaoelao aitauaa tee uunguua niaikaiaia. Tale mene kasina salana, “Lo ateva taumattu eghelei isaa o voto, aue etoka tale llo egheeeli.” ¹³ Karisto ghe ghaa oghitala tale nikasikiena tale inangari nipaopao nau ia ghe ghaala liuita tale nikasikiena, poli laghe pitila tale Uru ngai Manga va, “Nikasikiena ta lo ateva esae vukala tale ai eteae.” ¹⁴ Ghe ghaa oghitala liuna avalua o me tale uunguuae Karisto ateva Iesu, niarangise ateva ta Abraham aue elao tee ta taumattu ngeleka atoa. Mausina avalua o me tale niaikaiaia aue ita ghaa Spirit Manga ateva God ghe aulieiniela tale inangari nialokoi.

Inangari nipaopao me inangari nialokoi

¹⁵ Kapughu etoa, aghaimatoonga kateva inangari niaimatoonga tale maamauluaaita. Karika teva erooroo tani ue va vulla o emene saoaa

sae righi nannaane tale inangari niaippooa ngaitauaa taumattu ngatoa laghe nim gheleila. Mausina avalua o me,¹⁶ inangari nialokoi God ghe auliaala ta Abraham me tuvuna, Uru ngai Manga ateva etam ue va “ta tuvuna atoa” (malloeana va oroi taumattu) ta eue va, “ta tuvuna ateva.” Malloeana va kateva nonga taumattu, Karisto ta ngetana.¹⁷ Malloeana voto aghanna tani auliaa isaa avalua toko, va God ghe gheleila inangari niaippooa ngaitauaa tee Abraham, me isaa o inangari nipaopao, vara ghaata ai me kotolungauluae (430) ninamanama ghe lange sio me God ghe mene tau lao sio, karika eghaaghaa velu isaa o inangari niaippooa ngaitauaa, me inangari nialokoi.¹⁸ Poli arova ita ghaaghaa niarangise kannna God, poli ita aimuli tee inangari nipaopao, tale isaa o salana karika ita ghaaghaa isaa o voto mausi inangari nialokoi. Poli nim maamasinaane God me ghe tau lao sio ta Abraham tale inangari nialokoi.

¹⁹ O saa uunguaane inangari nipaopao? God ghe nim alokoi saoaala mausi ssavoto, me laghe toitoi tuvuna ateva elutu inangari nialokoi ghe auliaala va ae emae. Inangari nipaopao ghe tiuaala nau ensolo atoa laghe tau lao sio ta taumattu ngateva etiitingina elome etaita me God.²⁰ Taumattu ngateva elome karika eaimatoonga nonga kativilau pai, me God nim ie nonga kateva nonga ia.

²¹ Vaalua? Inangari nipaopao karika elaoao aitauaa tee inangari nialokoi kannna God? Karika me karika! Poli arova isaa o inangari nipaopao ita ghe ghaala erooroo tani tau mae maulue, tani ghulughuluena tee ae ghele mae tale inangari nipaopao.²² Me poli Uru ngai Manga ateva eue va kosa akapa ateva etokatoka tale voto sesa nonginaaili ale mata voovoo ateva, liuna avalua o me voto God ghe auliaala tale inangari nialokoi, God etautau lao ta lo atoa la ghaaiesoaa ta Iesu Karisto.

²³ Auena niaikaaiaa ghe mae, ami ghe tokatoka tale ale mata voovoo tale uunguaan inangari nipaopao ghe kavati rungainamamil lomosina ta niaikaaiaa ghe kauerekatila.²⁴ Mausina avalua o me inangari nipaopao God ghe atokala tani aitarainamami lomosina ta Karisto emae tani ghelei eghulughuluuenaiemami poli niaikaaiaa.²⁵ Niaikaaiaa ang ghe mae sio isaa oia nau karika inangari nipaopao emene aaitaraina-mami.

Natuna atoa God

²⁶ Am akapaailei natuna iem God poli aikaaiaaimim ta Karisto Iesu.²⁷ Poli am akapaailei am ghe ghaala niaasuu ta Karisto, ngam ghe asae atokaiela etaimim nongina ita aasae ghinna.²⁸ Am akapaailei ang ghe kateva nonga iemla ta Iesu Karisto: karika teva ajiu o aGrik, me karika toa tau ngai uungu me lo atoa la tokatoka tale aloannaairaa, me karika toa vause me taita.²⁹ Poli am ta Karisto, am natuna am Abraham, me voto inangari nialokoi eaauliaa kaluimim.

4

¹ Llo aghaauliaa isaa avalua toko va, aliki eteva ae eghaa peina tamane me nau aliki taita ia, enim tokatoka nongina tau ngai uungu etoa kapuna ila tamane, arongona ta voto akapa peina.² Nau aliki

3:16: Aitiuti 12:7. **3:17:** Eks 12:40. **3:18:** Rom 4:14. **3:19:** Rom 5:20; Apes 7:38.
3:21: Rom 8:2-4. **3:23:** Gal 4:3. **3:24:** Rom 10:4. **3:26:** Jon 1:12. **3:27:** Rom 6:3.
3:28: Rom 10:12. **3:29:** Rom 4:13.

ia etokatoka ta nimaira lo atoa la ghaitarainia me lo atoa la loeloea lomosina ta elaa ghaa nau tamane esuisuitoongaa.³ Ita tee ita avalua o nau aliki ita, raroai etoa la aitaraa kosa ateva oia la gheegheleita va ita nim tau ngai uungu ita.⁴ Me vara nau God ghe suila ghe rekatala, me ghe suula Natuna ateva, ghe lutula tale vause ateva, me ghe usilaala inangari nipaopao,⁵ tani ghaa oghi lo atoa inangari nipaopao ghe aitoeinilala me ae natuna ita God.⁶ Poli natuna am God, ia esuusuu kapuna Spiriti eteva Natuna, tani mae tale urunguitaniita me Spiriti eteva ekolokolo tani ue va, "Abba, Tamaghi."⁷ Liuna avalua o me io karika va nim tau ngai uungu io ta natuna io. Me poli natuna io, ghe gheleiola va ae ughaa niarangise God ghe auliaala tale inangari nialokoi.

Pol ghe nannangaili aGalaisia ngatoa

⁸ Emua arau nau am ghe tam kila God, tau ngai uungu iem tale goto atoa karika koronna ila.⁹ Me ia oia ngam ghe kilala God, o aroo tani ue va God ang ghe kilaiemla. Vaalua me ngam mene oghioghi tani lao ta raroai etoa karika sarasarakana ila me karika masina ila, me am aloanna tani mene nim tau ngai uungu?¹⁰ Am aimuli tee asease nau etoa me ulana atoa me mene kasina ase nivelu eitauaa me ninamanama.¹¹ Amaamatautu tani nnaa va niuungu aghe gheleila etaimim, erau nim peisaane nonga.

¹² Akolokolo tauem, kapughu etoa, va am ghelei nongina aghi, poli aghi aghe nonginala am. Karika am ghe gheleila righi voto sesa ta ngetaghi.¹³ Am kilakila va poli mausi isiki eteva me aghe ppooa ngakasinala masi kiukiu etaimim.¹⁴ Arongo ta isikinna aghi, me aneghi isiki ghe gheelei nitootoonga me maate etaimim me karika am ghe maamango me uessainaghi. Am ghe ghahaieghila nongina va kapuna ensolo ieghi God, me nonginaaili va aghi va Karisto Iesu ta ngetaghi.¹⁵ Aghaaiesoaa va arova nongina va am ghe rooroo tani valiki velu mataimim me am ghe tau mae ae am ghe rooroo tani ghelei. Isaa o nimasimasi eaa ang ghe lao sio?¹⁶ Vaalua me isaa oia poli ngaghaauliaa voto koronna etaimim me ngam sessa teeieghi?

¹⁷ Ila o taumattu ngatoa la ghannaaili tani ghaaiem va am lao aitauaa teeila me karika righi masi voto ae elutu. Llo la nim anna va am masau etaimami me ae am aloannaailiila.¹⁸ Masina tani nnangaili tani ghelei masi voto ta mene katoa. Am elei evalua o nau ekapa atoa, karika va nau atokatoka teeiem nonga.¹⁹ Masi natughu etoa, poli am me amene mammarikana nonginaaili vause ateva ange moomolenaalili eteva lomosina ta am nongina Karisto.²⁰ Aghannaaili va arova ghaine nonga aghele toka teeiem me aghele aikolikoliaa samasamaaghi poli aghannangaili.

Eiga me Seraa

²¹ Am auliaa etaghi, lo atoa am anna tani usilaa inangari nipaopao, va vaalua me karika am kilakila voto inangari nipaopao eaauliaa.²² Laghe piti elokoila va Abraham natuna taita alua. Kateva natuna ia vause ateva tau ngai uungu ia, me kateva ta vausenna tunga ateva.²³ Lo ateva taita ghe lutula tale vause ateva tau ngai uungu ia, karika etokatoka tale

aloannaane, ghe lutula poli nannaaira taumattu nonga, me vausenna tunga ateva, natuna taita ateva ghe lutula poli inangari nialokoi.

²⁴ Isaa o voto eaapasunga etaita va vause alua lalu aimatoonga ghalua nimae aitauua. Tale inangari niaippooa ngaitauua kateva tale motouru eteva eSaenae, me ghe alutula aliki aue la nim tau ngai uungu, Eiga etana. ²⁵ Eiga eaaimatoonga motouru eteva eSaenae isaa eArabia me eaaimatoonga tee eJerusalem nau ghaine, poli ia me natuna atoa nim tau ngai uungu ila. ²⁶ Me lo ateva eJerusalem ia epona liu me etokatoka tale aloaloannaane, ia kinaita ia. ²⁷ Poli Uru ngai Manga ateva eue va, “Umasimasi, vause ateva kina ngere io,

me utam kakkaai aliki;
uaore tale nimasimasi,
io lo ateva ughe tam aateateaa mammarikanaane nimolena
ngateae;

poli ase vause ateva o kina ngere ia aue oroi natuna
elau lo ateva vause taitanna ateva.”

²⁸ Am, kapughu etoa, am nongina Aisiki, aliki tale inangari nialokoi iem. ²⁹ Tale isaa o nau, lo ateva aliki taita ghe lutula poli nannaaira taumattu ngatoa ghe gheelei voto sesa tale lo ateva aliki ghe lutula tale sarasarakaniaane Spiriti eteva. Nim nongina ghaine. ³⁰ Me sa ateva Uru ngai Manga ateva eaaulieinia? Eue va, “Suu vella lo ateva vause tau ngai uungu ia karika etokatoka tale aloannaane me natuna ateva. Poli natuna ateva karika poi aue eghaa peina aliki eteva natuna ia lo ateva vausenna tuungi ia.” ³¹ Liuna avalua o me, kapughu etoa, ita karika va natuna ita vause ateva tau ngai uungu ia karika etokatoka tale aloannaane, ta natuna ita lo ateva vausenna tuungia.

5

Tani toka tale aloannaane Karisto

¹ Poli ita rau mene tau ngai uungu, poli Karisto ghe gheleitala va ita toka tale aloaloannaaita. Am tingina akorokorongana me am rau mene tau veluem va am mene nim tau ngai uungu.

² Am nongo inangarighi! Aghi Pol aghaaauliaa etaimim va arova am tau veluem me la isoiem, karika aue righi uunguaane Karisto etaimim. ³ Amene aaulia ngamasalikaa ta lo atoa am anna tani tau veluem va la isoiem, va am tani aimuli tee isaa akapaaaili inangari nipaopao. ⁴ Am lo atoa am anna tani aimuli tee inangari nipaopao me am ghulughuluena, tale isaa o salana eaapasunga va Karisto karika ia etaimim me ngam ghe kasu vulila maamasinaane. ⁵ Me tale Spiriti eteva, tale niaikaiaia ita toitoi rerrekana nighulughuluena ita atoka tuutuliiita etana. ⁶ Ta Karisto Iesu ni-isoiso atae me nitam isoiso atae karika righi uunguaairarua, ta niaikaiaia nonga ateva eaapasungainia tale uunguaa niaielousi.

⁷ Am ghe ilou emasina tale niaikarati eteae, me see ghe ilou rungainamla me ghe ghelei emla va am rau mene nongo usilaal llo koronna?

⁸ Ia o ase ninanna ngateva etam kasukasu ta lo ateva ekolokoloam.

⁹ Pisike ia tuku isti erighi erooroo tani ghelei verete akapa ateva erranga. ¹⁰ Aghaatoka tuutulighi ta Vau ngepona ateva va karika aue am mene tiu ppae. See ia lo ateva egheelei esavisavilaa nannaaimim

aue eghaa aipolipoli sesa. ¹¹ Kapughu etoa, arova ngamene poppooaa unguaa ni-isoiso, vaalua me la mene gheelei teeieghi voto karika masina? Tale ia o salana atikirighi, inangari aikotoo ateva karika aue emene sesa nongonongoaane. ¹² Me ila o lo atoa la gheelei saasakiaa nannaaimim, aghanna va karika va laghele mene isoila nonga ta la ghele kaati teeila.

Maulue ateva tale Spirit

¹³ Am, kapughu etoa, God ghe koloamla va am toka tale aloan-naaimim. Am rau mene nncaa va poli am tokatoka tale aaloaloan-naaimim va am ghelei voto tale nannaaira taumattu tale kosa ateva oia. Am aisausiaa kateva kateva tale niaelousi. ¹⁴ Isaa akapaaili inangari nipaopao egheelei roorooaa nonga tale kateva ninannaa eue va, “Uaielousiaa taumattu ngateva kalakalangina ia etam, nongina uaaielousieinio.” ¹⁵ Am paniem! Arova am toka aikiso me am aaiuvieinam, aue am aiturungia ngakapaiem.

¹⁶ Liuna avalua o me aue va, am toka tale unguaa Spiriti me karika aue am usilaa nannaaimim tani ghelei sesa niuungu. ¹⁷ Poli nannaaita ateva, eanna voto Spiriti eteva etam aaloanna, me Spiriti eteva, eanna voto nannaaita ateva etam aaloanna. Karika lalu rororo tani mae aitauaa, liuna avalua o me karika am rororo tani ghelei voto am anna tani ghelei. ¹⁸ Arova Spiriti eteva ekaakatulainiem, karika am uusilaa inangari nipaopao.

¹⁹ Unguaa sesa ninannaa masalike avalua toko va: nialai salosalooa see, me voto karika raarangisana, me tani nim anna tani ghelei sesa voto, ²⁰ me tani kkauaa tootoo goto, me unguaa nialala, me tani sessai, me nitam niaighui, ninannaa saasakiaa, me tau nitoka sessai, me tani nnainio nonga, me niaitiuii poli ase ninannaa, ²¹ me nissaii, me tani toka nannaas saasakiaa tee kateva, me tani ropi sesa manu, me nivelu eitaauaa tani ropi me ghelei ssavoto, me mene kasina asease voto sesa. Aghaauliaa kieimim nongina aghe aulia ngakasinala etaimim, va lo atoa la tokatoka avalua o, karika aue la kupi sso tale ararimangalina ateva God.

²² Me uene Spiriti eteva tale niaelousi, nimasimasi, me luei, me karika nisessai parasi, me nighelei masi voto ta mene kateva, me niparruu, me tani kaarasi tani ghelei emasina niuungu, ²³ me unguaa tani siuua ninannaa, me tani ghelei nannaam enna ngamasina. Karika righi inangari nipaopao egheelei runga isaa o ase voto. ²⁴ Lo atoa kapuna ila Iesu Karisto, ngeila ghe uvi ematela ninannaa sesa me gheeleiaira me aloaloannaaira tale aikotoo. ²⁵ Poli ita tokatoka tale Spiriti, ita kasu tee Spiriti eteva. ²⁶ Ita rau mene saeaa nannaaita me tani ghelei esessai kateva me tani nannaas saasakiaa tee mene kateva.

6

Tani sausi mene kateva

¹ Kapughu etoa, arova lo ateva ange kupi ssola tale ssavoto, lo atoa am aimuli tee Spiriti eteva am sama amasinaaili teeia tani ghaa ogchia me emene oghi mae. Me utani taatara ta io tee urau sso tale nitootoonga

va ukatuu. ² Am sausi tani sau voto maateaili tale mene kateva maamauluaane me tale isaa o voto, am rooroo tani ghelei ekapa voto tale inangari nimae aitauua kannna Karisto. ³ Poli arova teva eannaa va ia iaaili, nau eteva ia nim lao ia, ia enim kamekamea. ⁴ Kateva kateva etoongi voto egheelei me emasimasieinia. Erau mene tootoonga tani toongi gheeleiaane ta mene kateva taumattu. ⁵ Poli kateva kateva esau voto maate tale gheegheleiaane.

⁶ Lo ateva eghaaghaa masi voto tale inangarina ateva God, eparruu lo ateva eapasunga voto etana tale righi masi peina.

⁷ Am rau mene aikameainam poli karika am rooroo tani kame tee God. Taumattu emukemuke voto epasapasa. ⁸ Lo ateva epasapasa voto sesa tale maamauluaane tani amasimasi nannaane sesa, tale isaa o voto sesa ae emuke voto sesaaili. Lo ateva epasapasa voto masina tani amasimasi Spiriti eteva, ae emuke maulue ateva tokatoka liu ia tale Spiriti eteva. ⁹ Karika ita mene sio asoasoaa tani ghelei voto masina, poli ae kateva masi nau ae ita muke masi voto, arova ita tam mangoo. ¹⁰ Liuna avalua o me nau ita roo tani ghelei voto masina tale taumattu ngakapa atoa, ita ghelei tee lao ta lo atoa ila elome ta llo taumattu eaiesoaa.

Airuuruu tale inangarina Pol

¹¹ Am tara mata nginangari aghe piti enamuula!

¹² Lo atoa la nim annaa va taumattu ngatoa la tara eeleiaaira la tani aakorokoronganaiem va la isoiem. La gheelei voto o poli karika la aloanna va taumattu ngatoa la ghelei saasakiaa etaira mausi aikotoo ateva ta Karisto. ¹³ Lo tee atoa isoiso ila, karika la aimuli tee inangari nipaopao, me la nim anna va la isoiem me la ghaasake tani ghelei arariira mausi voto la gheelei tale vilikiimim. ¹⁴ Me ta ngetaghi, karika poi arooroo tani aasakeainaghi, aghaasakeaa nonga aikotoo ateva ta Vau eteva Iesu Karisto. Poli ta ngetana me kosa ateva ang ghe matela tale maamauluaaghi me aghi tale kosa ateva. ¹⁵ Karika righi uunguua ni-isoiso ateeae me nitam iso ateeae. Tani lutu aouna nonga koronna ia. ¹⁶ Lo akapa atoa la aimuli tee llo aghe auliaala ae la ghaa luei me masi nialousiusi, tee me lo atoa Israeli kapuna ila God.

¹⁷ Karika teva emene tau mae maate etaghi, poli asausau tau-ramoramo eaapasunga va aghi tau ngai uungu ieghi ta Iesu. ¹⁸ Alooloo sae va maamasinaane ateva Vau eteva Iesu Karisto ae etoka tee lo ateva spiriti etaimim, kapughu etoa. Koronnaaili.

Uru ngai etikirighi Pol ghe pitiela ta alIipeses atoa Inangari emuemua

Iipeses kinatama masaliki taatara ia tale provinsi eteva eEisia, tale patunganue namu ngateva ghaine ita aseasea va Teki. Pol ghe tokala eIipeses kotoluae ninamanama (Apostolo 19) tale unna aiaakotonna ateae nikasu, me masi kiukiu ghe kasu ekapa seela tale provinsi eteva eEisia. Katoa tau ngaisesoa elIipeses ajiu ila, me oroi ila lo atoa karika ajiu ila. Tale ia o uru ngai etikirighi, Pol ghe apasungaala va ajiu etoa me tau ngeleka atoa kateva nonga ila, poli ita akapaaili vaulanina ita Karisto. Karika mene righi niaipolapolaaii ta ajiu etoa me tau ngeleka atoa, poli matemateaane Karisto ghe apalala ia o niaipolapolaaii eteae. Tau ngaisesoa ngakapa atoa la tani toka tee katoa tale masi nitoka, tale femili, ale manga, me niuungu. Pol ghe pitila inangari ita akapa ita kilakila, tale ghinna niaiuvii kanna God.

Tani kila amuemua

Aitiutiu tale inangari 1:1-2

God ghe ghelei ekatevaitala ta Karisto 1:3-3:21

Vaaluua tani toka nongina ouna ateva taumattu 4:1-6:20

Airuuruu tale inangari 6:21-24

¹ Aghi, Pol, kapuna apostolo ieghi Iesu Karisto, tale aloannaane God.

Apitipiti etaimim kapuna taumattu ngatoa God, am tokatoka eIipeses,* am aiesoaa ta Iesu Karisto.

² Aloodoo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Niarangise manga, isaa ta Karisto

³ Ita tau sae God, kapuna Goto ia kapuita Vau eteva Iesu Karisto, me tee Tamane ia, ghe arangiseitala tale masi voto akapa tani sausi kapuita spirit. Isaa o masi voto ghe mae sio epona liu ta Karisto. ⁴ God ghe suimatoongainitala ta Karisto me auena aitiutiu tale kosa ateva va ita manga me ita raarangisana ta matane elome tale niaielousi.

⁵ Emua arau ghe suimatoongainitala va aue eghaaita me enatuna ita mausi Iesu Karisto, poli ghe masimasieiniela me ghe aloannala tani ghelei evalua o. ⁶ Liuna avalua o me ita tau sae God tale kinatama maamasinaane, ghe nim tau mae sio etaita tale Natuna eaielousieinia.

⁷ God ghe poli aaoghitala tale matemateaane Iesu, me ghe kkaluaala kaluita ssavoto, poli God pasu ia tale maamasinaane etaita, ⁸ me ghe tau mae sio oroieili maamasinaa me ghe gheleitala va ita alomasaanga, me ita rooroo tani kila voto koronna kanna God. ⁹ God ghe apasungaala etaita voto aisulianna eanna tani ghelei, poli ghe masimasieiniela, me ghe aloannala tani ghelei isaa o voto ta Karisto. ¹⁰ Ghe aloannala va nau eteva ghe suimatoongainiela, aue eatoka aitauaa isaa akapaaili voto epona liu me tale kosa ateva oia, va Iesu aue emuemueaa.

1:1: Apos 18:19-21; 19:1. * **1:1:** Kasina uru ngai laghe pitila, karika laghe pitila va am tokatoka eIipeses. **1:3:** Ips 2:6. **1:4:** Jon 15:16. **1:5:** Jon 1:12. **1:7:** Ips 2:7; Kol 1:14. **1:9:** Rom 16:25. **1:10:** Kol 1:16, 20.

11 Ta ngetana God ghe suimatoongainiemamila va ami kapuna tau-mattu iemami, poli ang ghe nncaa vella emua arau tani ghelei isaa o voto, me God egheelei isaa akapa voto nongina aloannaane. ¹² Ghe suimatoongainiemamila poli ghe aloannala va ami lo atoa ami ghe aitiutiula tani aiesoaa ta Karisto, ami tau sae inasanina God. ¹³ Me am tee ange kapuna iemla God, nau ngam ghe aiesoala kiukiu koronna, ia o masi kiukiu eteae eaauliaa vaalua God ghe asaangiemla. Nau am ghe aikaiaala ta Karisto, God ghe aimatoongainiemla va kapuna am: ghe tau aatu sio Spirit Manga ateva tale inangari nialokoi. ¹⁴ Spirit Manga ateva ia aitiutiu eteva aipolipoli, tani apasunga va ue ita ghaa sa ateva God ghe aulia ngalokoela tale inangari nialokoi, va ue etauela ta kapuna taumattu ngatoa. Isaa avalua o me God ue eghaa oghi lo atoa kapuna ila, me ue ita tau sae inasanina God.

Nikaili emasina tale nilooloo sae

¹⁵ Mausina avalua o me nau aghe nongola uneimim niaakaiaa ta Vau eteva Iesu me ailousiaaimim ta kapuna taumattu ngakapa atoa God, ¹⁶ karika aghe kakkalueinam tale nilooloo sae, tani kaili emasina ta God mausiimim. ¹⁷ Me aloonloo sae ta kapuna God ateva Vauita ateva ta Iesu Karisto, ia Tamaita ia etokatoka tale mallanga ateva. Akookolomi va etau aatu Spiriti eteva tani gheleiem me am alomasaanga me Spiriti eteva ue eapasunga ngaotu God etaimim me ue am roo tani kila amasinaia. ¹⁸ Me akookolomi tee va eoti nannaaimim me ue am atoka amuemue nannaaimim tale voto ghe koloamla etana me vaalua ooroi ia kanna niarangise ghe auliaala tale inangari nialokoi va ue etauela ta kapuna taumattu manga. ¹⁹ Me akookolomi va am kila vaalua kinatama sarasarakaniaane ateva euungu elome etaita lo atoa ita aikaiaa. Ia o sarasarakaniaane ateva euungu elome etaita korokoronganaiila ia, ²⁰ ghe uungula etana nau ghe totula Karisto tale nimate, me ghe atokaiela tale pai muenna atelange epona liu. ²¹ Karisto ia namuu ia ta ensolo akapa atoa me spiriti ekapa atoa, me ia emuemuea ngakapa tau ngaitoittoi etoa nau ghaine me auena. ²² God ghe tau ekapa lao sio ninamu ngateae ta Karisto me ghe suitoongainielva va emuemuea ngakapa voto tale ale manga. ²³ Ale manga ateva vaulanina ia Karisto, me ia ghe apasula ale manga ateva tale sarasarakaniaane, me ghe tau lao sio maulue ateva tale isaa akapaaili voto tale isaa akapaaili salana.

2

Ita ghe mene mauluelta Karisto

¹ Emua arau am ghe tokatoka tale nimate tale kaluimim nitam nongo usilaa me ssavoto. ² Tale isaa o nau am ghe aaimuli tee uunguaa kosa ateva oia karika masina. Am ghe aaimuli tee uunguaane lo ateva emuemueaa uunguaaira sesa spiriti etoa epona elomarase. Isaa o sesa spiriti ghaine ekaakatulaa isaa o taumattu karika enonganongo usilaa God. ³ Nau ang ghe lao sio ita ghe tokatoka nongina ila. Ita ghe aaloanna tani amasimasi sesa aaloanna vilikiita me nannaaita. Me ita ghe roola tani ghaa sessaiaane God. ⁴ Me karika, ta God ghe aielousiangailiita, me

1:11: Rom 8:28-29. **1:14:** 2 Ko 1:22. **1:17:** Kol 1:9. **1:19:** Kol 1:11. **1:20:** Sams 110:1; 2 Ko 13:4; Kol 2:12. **1:21:** Kol 1:16; 2:10. **1:22:** Sams 8:6. **1:23:** Ips 4:10, 15; Rom 12:5; Kol 1:18. **2:1:** Kol 1:21; 2:13. **2:2:** Kol 3:7; Tts 3:3. **2:3:** Kol 3:6. **2:4:** Rom 6:11-13.

pasueili ia tale aalousiusiaane. Liuna avalua o⁵ me nau ita ghe tokatoka tale nimate tale kaluita nitam nongo usilaa, ghe ghelei emaulueitala ta Karisto. Tale maamasinaane God am ghe saangala.⁶ Ghe totutala tani maulue tee Karisto, me ghe atoka aitaueinala me Karisto Iesu epona liu.⁷ Ghe apasungaala etaita aalousiusiaane tale isaa o salana ta Karisto Iesu, me tale isaa to nau emaemae, taumattu ngatoa aue la tara maamasinaane namungaili, elaulau ekapa voto atoa.⁸ Poli tale maamasinaane, am ghe saangala tale niaikaiaa, me karika va tale sarasarakaniaaimim, ta God ghe nim tau mae sio.⁹ Karika va am ghe uunguaala va am roo tani aasake.¹⁰ Poli ita, God ghe gheleitala. Ghe tau mae sio maulue etaita ta Iesu Karisto tani ghelei masi niuungu God ghe aimonomonosiaa ngalokoila etaita tani ghelei.

Kateva nonga ita ta Karisto

¹¹ Liuna avalua o, am annaa parasi va nau ang ghe lao sio, nau am ghe lutula, karika va ajiu iem, ta am tau ngeleka am, me lo atoa la aseasela va “isoiso ila” laghe kolokoloam va “karika isoiso iem”. (Isaa o voto la gheelei ta vilikiira, nim taumattu ngatoa la gheelei me karika va God.)¹² Isaa akasina am ghe maamasau ta Karisto. Am karika taumattu nge Israeli em, ta ativuu iem tale kanna inangari niaippooa ngaitauaa tale inangari nialokoi, ta am ghe tokatoka tale kosa ateva oia me karika am ghe kilakila God, me karika righi masi voto am ghe toitoi.¹³ Me ghaine ta Karisto Iesu am lo atoa am ghe maamasaeili ta God, ngam ghe mae akalakalaa sio poli raena ateva Karisto.

¹⁴ Poli ia luei ia etaita, ghe gheleila ajiu etoa me taumattu ngeleka atoa laghe kateva nongala. Niaissa ghe tokatoka arova aivativati eteva, me Karisto ghe ghaa veluela,¹⁵ tale matemateaane, ghe atoka lange sio mua kaluira inangari nipaopao ajiu etoa, poli nannaane tani ghelei eouna taumattu ngalua, ajiu etoa me taumattu ngeleka atoa, tani kateva nonga, me tale ia o salana atikirighi aue eghelei luei.¹⁶ Ghe matela tale aikotoo tani atoka aitauaa pai eluevilau va lalu kateva nonga me ekapuna ilalua God, me tale aikotoo ghe ghelei ematela uunguaa niaissessaii ghe tokala emua arau.¹⁷ Ghe mae sio tani aulia ngaotu luei etaimim lo atoa masaueili em ta God, me luei ta lo atoa kalakalangina ila.¹⁸ Poli tale matemateaane ita akapa ita rooroo tani mae ta Tamaita ateva God tale kateva nonga Spiriti.

¹⁹ Liuna avalua o me lo atoa karika ajiu iem, ghaine karika ativuu iem, ta ita tokatoka tale kateva nonga ararimangali, ararimangalina ia God. Am elome tale natuna atoa God.²⁰ Am nongina ale ateva, God ghe atuluela epona ta apostolo atoa me propete atoa nongina suena atoa, me Iesu Karisto ia aitiutiu eteva suena la aipatolaa lao etana.²¹ Ta Iesu ia akapa ale ateva eaaipatolaa me esaesae aitauaa me manga ia ta Vau ngepona ateva.²² Me ta ngetana am tee am aipatolaa tee ajiu etoa, me am tokatoka aitauaa tee Iesu, me God aue etoka aitauaa teeiem tale kanna Spirit Manga ateva.

2:6: Kol 2:12. **2:9:** 1 Ko 1:29-31; 2 Tim 1:9. **2:10:** Tts 2:14. **2:12:** Kol 1:21; Rom 9:4. **2:13:** Kol 1:20. **2:14:** 1 Ko 12:13. **2:15:** Kol 2:14. **2:16:** Kol 1:20, 22. **2:17:** Ais 57:19. **2:19:** Ips 3:6. **2:20:** 1 Ko 3:11. **2:21:** 1 Ko 3:16. **2:22:** 1 Pita 2:5.

3

Pol ghe uungu ta taumattu ngeleka atoa

¹ Liuna avalua o aghi, Pol, tau karavusu ieghi mausi Iesu Karisto, me poli mausiiimim taumattu ngeleka atoa, alooloo sae ta God.

² Aghaaraisoaa va ngam ghe nongola va tale maamasinaane God ghe tau mae sio etaghi uunguua nippooaa mausiiimim. ³ Nongina ngapiti ekasinala tale ia oio uru ngai etikirighi, karika apiti aaoroila vaalua voto aisulianna God ghe apasungaala etaghi. ⁴ Nau am riti isaa o voto aghe pitila, aue am kila vaalua kilakilaaghi tale voto aisuliaane eauliaa Karisto. ⁵ God karika ghe apasungaala ta llo akasina atoa vituu emua arau, me ghaine tale kapuna Spirit Manga ateva ange aapasunga ta kapuna apostolo atoa manga ila me tee propete atoa. ⁶ Voto ateva aisulianna ia, ia avalua toko: va poli taumattu ngeleka atoa la aikaiaia tale masi kiukiu eteae, la rooroo tani ghaa aitauua masi voto kannia God tee Israeli etoa, me tee ekateva nonga ita tale vaulaniita me ita akapa aue ita ghaa llo voto ghe auliaala tale inangari nialokoi ta Iesu Karisto.

⁷ Tale maamasinaane, God ghe tau mae sio ia oia niuungu eteva tani ppooaa masi kiukiu eteae. Ghe ghelei evalua o tale uunguane sarasarakanaili. ⁸ Arongona ta aghieili euu ta kapuna taumattu ngakapa atoa God, ia oia maamasinaane ateva God ghe nim taue mae sio etaghi: tani aulia ngaotu ta taumattu ngeleka atoa isaa o masi voto ta Karisto karika ita rooroo tani kila akapa. ⁹ God, ia o ghe ghelei ekapailila voto, ghe suimatoongainaghila tani aulia ngamasalikangaili ta ila akapa taumattu ngatoa ia oia voto ateva aisuliaane ia. God karika ghe apasungaala voto aisuliaane lomosina ta ghaine. ¹⁰ God ghe nnaala va tale isaa oia nau ensolo akapa atoa me spiriti etoa elomarase aue la tara kinatama aalomasaanganiaane God tale kapuna taumattu ngatoa. ¹¹ God ghe nnaala va aue eghelei evalua o ta Karisto Iesu kapuita Vau ia me avirina ghe vira gheleila kosa ateva. ¹² Ita rooroo tani lao ta God me ita rau mene matautu tani lao etana, poli ita aairesoaa ta Karisto me ita tokatoka aitauua teeia. ¹³ Liuna avalua o, akokolomiem va am rau mene sio asoasoaa tale voto maate aghaaghhaa mausiiimim, poli isaa o nonga voto me aue am roo tani aasake.

¹⁴ Mausina avalua o me asusuuiaa sio ta Tamaita ateva, ¹⁵ ia ghe gheleila pamili ekapa atoa epona liu me tale kosa ateva. Liuna avalua o me la ghaagħhaa maulue ta God. ¹⁶ Alooloo sae va tale aarangiseaane namungaili, ia aue eakorokorongana urunguitaniimim tale sarasarakaniaane kapuna Spiriti eteva. ¹⁷ Me alooloo sae va aue Karisto erooroo tani toka tale urunguitaniimim tale niaikaiaia. Me aue am tingina akorokorongana tale niaielousi nongina ai eteae oane eaakorokorongana, ¹⁸ me am me kapuna taumattu ngakapa atoa God aue am għaa sarasarakan tani kila nongina vaalua naanamungaane, aaluseaane, maamasauaane sae me siosi liuaane, aielousiaane ateva Karisto. ¹⁹ Me alooloo sae va aue am kila ia o aielousiaane ateva Karisto elaulau isaa akapa alomasaanga, me gheeleiaiāimim aue elao aitauua tee gheeleiaane God.

²⁰ Ita tau sae God tale sarasarakaniaane, erooroo tani ghelei orioieili asease voto elaulau voto ita rooroo tani kolomi me nnaa. Ia o

sarasarakana ateva euungu elome etaita. ²¹ Liuna avalua o me ita tau sae God elome tale ale manga me tee Karisto Iesu tale ila akapaaili vituu etoa tale nau ekapaaili etoa. Koronna.

4

Ita uungu eitauaa tee Karisto

¹ Me aghi Pol, tau karavusu ieghi mausi Iesu Karisto, aghaulia ngakorokorongana etaimim va am toka amasina tani apasunga va God ghe koloamla. ² Am kaarasi tani sioaa nannaimim, aippooaaimim esaghuighuiena, me erau mene sessai parasiem, me arova kateva eghelei saasakiaa etaimim, am kkaluaa gheeleiaane me am nim aielousieinia. ³ Am tootoonga tani poso parasi uunguaa nitoka aitauaa kanna Spirit Manga ateva eghelei tale luei. ⁴ Ita kateva nonga ita nongina vaulaniita ateva, me kateva nonga ia Spiriti eteva. Tale ie nonga o salana atikirighi God ghe koloamla tale kateva nonga ia nitaatara lao emua. ⁵ Kateva nonga ia Vau eteva, me kateva nonga ia niaikaia ngateva, me kateva nonga ia niasuu eteva. ⁶ Kateva nonga ia God ateva Tamaita akapa ia, me ia emuemuaa taumattu ngakapa atoa, me euungu etaita akapa, me etokatoka elome etaita akapa.

⁷ Me Karisto ghe tau mae sio ta kateva kateva etaita maamasinaane me tale aloaloannaane etautau mae voto ealona tani tau mae. ⁸ Liuna avalua o me Uru ngai Manga ateva eue va,

“Nau eteva ghe laa saesae

ghe muamuaala tau karavusu etoa

me ghe tau lao sio masi voto atoa ta taumattu ngatoa.”

⁹ Vaalua malloeana va ghe saela epona liu? Malloeana va ghe sio mae akasina mua tale kosa ateva. ¹⁰ Ia ghe sio mae epona liu, ia ghe laa sae kasu elomarase, me erooroo tani toka tale voto akapaaili. ¹¹ Ia ghe taula sarasarakana va katoa la roo tani apostolo, me katoa la propete, me katoa la tau ngai ppoaa, me katoa la pasta me la tau ngai aapasunga. ¹² Ghe gheleila llo tani aipanipaniaa kapuna taumattu God, tani uunguaa uunguaane, liuna avalua o me vaulanina ateva Karisto* ekorokorongana me etoka amasina, ¹³ lomosi ta ita akapa ita mae aitauaa tale kateva nonga niaikaiaa, me tale alomasaanganiaane Natuna ateva God, me ita matuenna me ita nongina Karisto.

¹⁴ Me karika ita mene nongina natu ngaliki etoa, va ila o lo atoa muenna ila tani aikameaa la toka kamekameta see nongina kotoo ateva me kuukuu eteva evebbeita see, me la gheelei asease inangari etoa tani apasunga me tani kame mene katoa taumattu. ¹⁵ Liuna avalua o me ami aaaulia ngakoronna tale niaielousi, va tale isaa akapa voto ita gheelei, ita gheelei etana, ta ia Karisto uruita ia. ¹⁶ Eposoposo aitauaa vaulanina ateva Karisto me epiipinosa amasina, arova kateva kateva etaita egheelei uunguaane. God eaaloanna isaa akapaaili voto tale vaulanina ateva Karisto va la aipatola ngaitauaa tale niaielousi.

Am toka nongina taumattu tale mallanga atoa

4:1: Kol 1:10. **4:2:** Kol 3:12-13. **4:3:** Kol 3:14-15. **4:6:** 1 Ko 12:6. **4:7:** Rom 12:3, 6.

4:8: Sams 68:18. **4:9:** Jon 3:13. **4:11:** 1 Ko 12:28. * **4:12:** vaulanina ateva Karisto Utara Ipires 1:23. **4:13:** Kol 1:28. **4:15:** Kol 1:18; 2:19.

¹⁷ Liuna avalua o me aghaloannaaili va tale ararina ateae Vau palepale am rau mene kasu nongina taumattu ngatoa karika la aiesoaa, me nannaairia nim lao. ¹⁸ Nannaairia saurorromiena, la maamasauceili ta maamauluane God, poli urunguitaniira korokorongananaaili, liuna avalua o me karika la kilakila God. ¹⁹ Karika la paapalata, liuna avalua o la nim anna tani ghelei sesa voto, me la ghannaaili tani toka gheelei asease voto karika raarangisana.

²⁰ Am karika va am ghe kilala Karisto tale isaa o ase salana. ²¹ Koronnaaili, am ghe nongola etana, me laghe aaulieinia etaimim va voto koronna isaa ta Iesu. ²² Laghe apasungaala ta ngetaimim va am ghaa velu poka gheeleiaaimim ang ghe lao sio, me am ghaa velu pokane ateva taumattu ang ghe sesala tale aloannaane kamen. ²³ Me am tau velu God egheli eouna gheeleiaaimim me nannaaimim. ²⁴ Me am mene atoka ouna ateva taumattu God ghe gheleielia va enongina God. Me gheeleiaaimim aue eghulughuluena me emanga poli am tokatoka tale llo koronna.

²⁵ Liuna avalua o me kateva kateva etaimim egħaa velu nikamekame, me eaippooa ngakoronna tee lo atoa ita aiesoa ngaitauaa ta Karisto, poli ita akapaaili kateva nonga ita. ²⁶ “Nau ange sessaiola, urau mene tau velu sessaiaam va egheli me ukupi sso tale ssavoto,” me erau mene toka sessaio ta kateva nau lomose ta sinaka ateva esuu, ²⁷ ta Satana erau tingina akorokoronganana tani akatungio. ²⁸ Lo ateva eaainao nonga eruu tani ainao, me etiuua tani uungu tani ghelei masi voto esausi lo atoa la ghaloanna niaisausi.

²⁹ Am rau mene auliaa righi voto tani ghelei saasakiaa kateva taumattu, ta am auliaa nonga masi voto aue esausi lo atoa la anna nisausi, me am akorokoronganaila. ³⁰ Karika am mene ghelei alousiusi kapuna Spirit Manga ateva God, poli ia eaaimatoonga va am kapuna am God me aue egħaa oghiem. ³¹ Am għaa velu sesa niateateaa, me nisessaia etiitħuaa elome me eghħooa eleka, me niaiuvii, me niauliaa saasakiaa, me tee isaa akapaaili sesa gheeleiaaimim. ³² Am ghelei masi voto ta mene katoa, me am apasunga niaielousi, me am kkaluaa sesa gheeleiaairia katoa, nongina God ghe kkaluaala kaluimim sesa voto ta Karisto.

5

¹ Liuna avalua o, me am usilaa gheeleiaane God, poli am natuna am God, me eaaielousiangaili. ² Me am tokatoka tale maulue ateva pasu ia tale niaielousi, nongina Karisto ghe aielousieinitiala me ghe tau mae sio maamauluane ta ngetaita nongina lo ateva o aiaavusuvusuena egħeelei emasimasi God.

³ Me elome ta ngetaimim karika am mene toka tale uunguua nialai salosalooa see, va taumattu ngatoa la toka aulieinam, o righi ase niuungu karika raarangisana, o nikruetu, poli isaa oia voto karika masina ta kapuna taumattu God manga. ⁴ Karika mene righi niamakatakata, o niaippooaa alokapakapanna, o ase inangari niaikusi. Karika, ta am kaili emasina tale voto masina. ⁵ Me tale isaa oia voto am rooroo

4:17: 1 Pita 1:14; Rom 1:21. **4:22:** Rom 8:13; Kol 3:9. **4:23:** Rom 12:2. **4:24:** Aitiutiui 1:26; Kol 3:10. **4:25:** Kol 3:8-9; Sek 8:16. **4:26:** Sams 4:4; Jms 1:19-20. **4:29:** Kol 4:6.

4:30: Ais 63:10; 1 Tes 5:19; Ips 1:13-14. **4:31:** Kol 3:8. **4:32:** Mat 6:14; 18:22-35; Kol 3:12-13. **5:1:** Mat 5:48. **5:2:** Hib 10:10; Eks 29:18. **5:5:** 1 Ko 6:9-10; Kol 3:5.

tani kila amasina va: lo ateva eailai salosalooa, me lo ateva etam raarangisana, me lo ateva esassaii voto (nim aikkauua tootoo goto ia), isaa o taumattu karika aue la ghaa righi masi voto tale ararimangalina ateva Karisto me God. ⁶ Karika am mene tau veluem va la kameam tale inangari karika koronna, poli sessaiaane God ange maemae ta lo atoa karika la nongonongo usilaa. ⁷ Liuna avalua o me karika am mene aighui teeila tale sesa gheeleiaira.

⁸ Poli isaa akasina am ghe tokatoka tale saurrom, me ghaine am, mallanga iem ta Vau ngepona. Am toka nongina aliki tale mallanga iem. ⁹ (Poli mallanga ateva eaalutu voto masinaaili, ghulughuluena me koronna.) ¹⁰ Me am tani ghaa alomasaanga va sa ateva egheelei emasimasi Vau ngepona ateva. ¹¹ Karika am mene kupi sso tale uunguua saurrom ateva karika righi uenenna, ta am mae aulia ngaotu ia o ase niuungu tale tummatavanga. ¹² Poli pei palata tani auliaa voto la gheelei eisulia tale tummatavanga. ¹³ Ta voto akapa tale saurrom, mallanga ateva aue egheelei eotu, ¹⁴ poli mallanga ateva egheelei isaa akapaaili voto eotuotu. Liuna avalua o me laghe uela ta lo atoa taumattu karika la ghaaiesoaa va,

“Am anguu taatarala, tau niasekanue atoa,
am totula tale nimate,

me Karisto aue emallanga ta getaimim.”

¹⁵ Am tani aitaraa vaalua am tokatoka — karika va nongina lo atoa karika alomasaanga ila, ta nongina alomasaanga atoa. ¹⁶ Nau urooroo tani ghelei voto masina, ughelei voto masina urooroo tani ghelei, poli nau oia sesa nau. ¹⁷ Liuna avalua o, me karika am mene alokapakapa, ta aloimim emasaanga aloaloannaane Vau ngepona ateva. ¹⁸ Karika am mene ropi oroieili uaeni va egheelei esavisavilaa nannaaimim, me aue ekatulainiem lao tale voto sesaaili. Karika, ta am pasu tale Spirit Manga ateva. ¹⁹ Am aippooaa tee kateva kateva tale nikkinari, me masi kkinari tani kkinari tau sae, am kkinari me am ghelei miusik tale urunguitaniimim esae ta Vau ngepona ateva. ²⁰ Nau ekapa am kaili emasina sae ta God Tamaita ia tale isaa akapaaili voto, tale ararina atae Iesu Karisto Vauita ia.

²¹ Am tau veluem tani ghelei voto katoa la ghaaloanna me karika va aloannaaimim, tani oneoneaa Karisto.

Vause atoa me taita atoa lailai ila

²² Vause atoa lailai iem, am tau veluem tani ghelei voto taitaniimim atoa la ghaloanna me karika va aloannaaimim, nongina am gheelei ta Vau ngepona ateva. ²³ Poli taita ateva uruna ia vausenna ateva nongina Karisto uruna ia ale manga ateva, me ale manga ateva vaulanina ia. Ta Karisto ghe asaangitala. ²⁴ Nongina ale manga ateva eaatoka nannaane ta Karisto, vause atoa lailai iem tee am aatoka nannaaimim ta taitaniimim atoa tale isaa akapaaili voto.

²⁵ Taita atoa lailai iem, am aielousiaa vauseniim atoa, nongina Karisto eaaielousiaa ale manga ateva, me mausina me ghe tau lao sio maamauluaane ²⁶ tani gheleie manga ia me raarangisana ia, eghe

5:6: Kol 2:4, 8; Rom 1:18. **5:8:** Ips 2:13; Kol 1:13; 1 Pita 2:9; Jon 12:36. **5:13:** Jon 3:20-21.

5:14: Ais 26:19; Rom 13:11. **5:15:** Kol 4:5. **5:18:** Luk 21:34. **5:19:** Kol 3:16. **5:20:**

Kol 3:17. **5:21:** 1 Pita 5:5. **5:22:** Kol 3:18; 1 Pita 3:1. **5:23:** 1 Ko 11:3; Ips 1:22. **5:25:**

Kol 3:19; 1 Pita 3:7. **5:26:** Tts 3:5.

poraiela tale inangari eteva me tale manu eteva. ²⁷ Ghe ghelei evaluela o tani ghaa lo ateva o ale manga masinaaili taataraane, me karika righi tungitungieni, o kolukoluena, o righi voto egheelei saasakiaa taataraane, ta manga ia me karika righi voto sesa etana. ²⁸ Tale ia o ase salana atikirighi, taita atoa am tani aielousiaa vauseniim atoa, nonginaaili va am aaielousiaa vilikiimim. See eaielousiaa vausenna ateva, eaaielousieinia. ²⁹ Karika teva esessaia tale vilikina ateva, ta eangiinginia me eaaitaraa vilikina, nongina Karisto egheelei tale ale manga ateva. ³⁰ Ta ita, vilikina ita Karisto. ³¹ “Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva, me ilalua aue lalu kateva nonga tale vilikiirarua.” ³² Isaa oia llo karika ita rooroo tani kila akapa malloeanina, me aghi aghaauliaa Karisto me ale manga ateva. ³³ Liuna avalua o, kateva kateva ta ngetaimim etani aielousiaa vausenna ateva, nongina etani aielousieinia, me vausenna ateva etani oneoneaa taitanna ateva.

6

Aliko etoa me tamaira me kinaira atoa

¹ Aliko etoa, am nongo usilaa tamaim me kinaim atoa, poli am kapuna iem Vau ngepona ateva, me isaa o voto ghulughuluena. ² “Uoneoneaa tamam me kinam,” — ia oia inangari nipaopao ateva, aitiutiu ia tale llo inangari nipaopao elao lao aitauaa tee inangari nialokoi — ³ “me isaa akapaaili voto aue emasina etam, me tee tokatokaam aue aluse tale kosa ateva oia.”

⁴ Lo atoa taita natuena am, am rau mene ghelei natuim atoa va esessaila, ta am apinosaila tale masi salana, me tale alomasaanga me tale niapasunga Vau ngepona ateva eaaloanna.

Tau ngai uungu etoa karika la tokatoka tale aloannaaira, me vauira atoa

⁵ Tau ngai uungu etoa karika am tokatoka tale aloannaimim, am nongo usilaa lo atoa la aitoieiniem tale kosa ateva oia, me am oneoneainila tale urunguitaniimim akapa ateva nongina va am non-gonongo usilaa Karisto. ⁶ Me karika am mene nnaa va nau la taataraiem nonga, karika. Poli am tau ngai uungu iem ta Karisto me karika am tokatoka tale aloannaimim. Liuna avalua o, tale urunguitaniimim akapaaili, am uungu aanasa tani ghelei saa voto God ealoanna va am ghelei. ⁷ Am annaaili tani uungu tee nimasimasi, nongina va am uungu ta Vau ngepona ateva me karika va taumattu ngatoa. ⁸ Arova tau ngai uungu io utokatoka tale aloannaam o karika, ukilakilaaili va Vau ngepona aue etau aatu aipolipolim tale masi niuungu ugheelei.

⁹ Me vau etoa, karika emene aloimim nonga ta katoa tana kapuimim tau ngai uungu karika la tokatoka tale aloannaaira, me am rau mene amatautula, poli am kilakila va lo ateva Vauira ia me Vauimi ia tee, ia epona liu. Ia karika egheelei tani anna katoa me katoa karika.

Ghinna niaiuvii kanna God

¹⁰ Airuuruu tale inangarighi, isaa avalua toko va, am toka akoroko-rongana ta Vau eteva me tale kinatama sarasarakanianae. ¹¹ Am asae

5:27: 2 Ko 11:2; Kol 1:22. 5:31: Aitiutiu 2:24; Mat 19:5. 5:32: Aotu 19:7. 6:1: Kol 3:20. 6:2: Diut 5:16. 6:4: Kol 3:21; Sams 78:4; Nitoka 22:6. 6:5: Kol 3:22-23; Tts 2:9-10; 1 Pita 2:18. 6:8: 2 Ko 5:10; Kol 3:24-25. 6:9: Kol 4:1; Rom 2:11. 6:11: Rom 13:12; 2 Ko 10:4.

akapaaili ghinna niauvii kann God, me aue am roo tani tingina akorokorongana tale sesa uunguaane namu ngateva ta raroai etoa.¹² Karika va ita aaiuvii tee taumattu, ta ita aaiuvii tee asease spiriti etoa epona me euu, me asease sarasarakanita tam taatara, me asease voto atoa sarasarakanaila pei saurrom, ghaine la aitoiaa kosa ateva oia.¹³ Liuna avalua o me am asae akapaaili ghinna niauvii kann God me tale nau sesa, aue am roo tani tingina akorokorongana. Me nau ta ngam aipanipania ngakapaailila am roo tani tingina.¹⁴ Liuna avalua o me am tingina akorokorongana me am iriem tale ai-iri eteae tale voto koronna nonga etaliaa usueimim, me am asae tee tuku kapa ateva eaakou runga kassauimim, eaaimatoonga niuungu ghulughuluena.¹⁵ Me tale kkeimim, am asae aikasukasu tani aimonomonosieinam tani ppoaa masi kiukiu luei etana.¹⁶ Me tee am ghaa aighelei runga vaalau eteva eaimatoonga niaikaiaa, poli ta ngetana aue am roo tani apala isaa akapa unna vaalau sesa taumattu ngateva ataatana esoasoaa mae etaimim.¹⁷ Am ghaa kou nguru eteva egheelei runga uruim ateva, eaimatoonga niasaangi, me am ghaa baenata ateva unna ia Spiriti, ia o inangarina ia God.¹⁸ Am rau mene ainoana tani looloo sae mausi mene kasina taumattu. Nau ekapaaili am looloo sae tale asease nilooloo sae akapa, nongina Spirit Manga ekatulainiem. Am atae nau ekapaaili me am looloo sae mausi kapuna taumattu ngatoa God.

¹⁹ Me am kookolomi tee ta God mausighi tani tau mae inangari etaghi nau aue appoaa, me arau mene matautu tani ppoaa ngaotu voto aisulianna tale masi kiukiu.²⁰ Aghi aghaaghah liuna ateva God tani ppoaa, me aghi tale ale mata voovoo, liuna avalua o am kokkolomi sae va arau mene matautu tani ppoaa, nongina God eaaloanna.

Airuuruu tale inangarina Pol

²¹ Tikikus aue eaulia ngakapa voto ghe ailutuaala etaghi me voto agheelei. Ia nengahi tuungia ta Karisto, me aghailousieinia. Ia kapuna tau ngai uungu ia Vau ngepona ateva, me egheelei emasinaaili uunguaane.²² Aghe sungiela tani mae taraiem poli aghanna va am kilia etana va sa ateva elutulutu etaimami, me aue eakorokorongana urunguitaniim.

²³ Alooloo sae va God Tamaita ia me Vauita ateva ta Iesu Karisto, aue etau lao luei, niaielousi, me niaiesoaa tale tau ngaisesoa ngakapa atoa.²⁴ Me alooloo sae tee va maamasinaane ateva God aue etoka tale lo atoa la aaielousiaa Vauita ateva Iesu Karisto, tale lo ateva o niaielousi karika ekapakapa.

Uru ngai etikirighi Pol ghe pitiela ta aPilipae atoa Inangari emuemua

Pilipae masaliki taatara namuu ia tale provinsi eteva eMesedonia, tale pai not tale namuu patunganua ateva ghaine ita aseasea va Gris. Pol ghe lao sio ePilipae tale aiaaghaluene ateva nikasu, me ghe atokala ale manga ateva etana (Apostolo 16). Masi niaikapukapuaa ghe tokatoka elome Pol me tau ngaisesoa ngatoa ePilipae. Laghe tau lao sio niaisausi etana oroiaata nau ghe kasu ekapa seela tani ppooaa masi kiukiu.

Nau Pol ghe pitila ia oia uru ngai etikirighi, arongona ta ghe tokatoka tale ale mata voovoo, ghe masimasi, poli ghe tarala va masi kiukiu kanna ia God ghe mene laolao ta mene katoa taumattu. Pol ghe aloannala va tau ngaisesoa ngatoa la aimuli tee isaa o voto laghe tarala ta Iesu, me la rati lo atoa laghe ue va tau ngeleka atoa la tani aJiu mua, me auena la rooroo tani saanga. Ghe auliaala va aPilipae atoa la rooroo tani masimasi, me la rau mene nnangaili tale voto.

Tani kila amuemua

Aitiutiu tale inangari me nikaili emasina *1:1-11*

Masi kiukiu elaulau maamauluaane Pol *1:12-26*

Am toka me am kasu nonga tale masi kiukiu kanna Karisto *1:27-2:18*

Taita alua laghe uungu eitauaa tee Pol, Timoti me Epaproditus *2:19-30*

Lo atoa la apasunga voto kamena *3:1-21*

Inangari niloeloe *4:1-9*

Pol ghe kaili emasinala tale niaisausi kaluira aPilipae atoa *4:10-20*

Airuuruu tale inangari *4:21-23*

¹ Angalua Pol me Timoti, kapuna tau ngai uungu iengalua Iesu Karisto,

Angalu pitipiti atu etaimim akapa lo atoa taumattu manga am ta Iesu Karisto ePilipae tee elda me rikina atoa.

² Angalu looloo sae va maamasinaane me luei ekasukasu ta God Tamaita ia me Vau negepona ateva Iesu Karisto aue etoka teeiem.

Nikaili emasinaaili me nilooloo sae

³ Akaakaili emasina ta kapughu Goto ateva nau ekapa atoa nau aghannainam. ⁴ Tale isaa akapa uneghi nilooloo sae mausiiim akapa, aloo sae tee nimasimasi ⁵ poli niaighui me niuungu am gheelei tale masi kiukiu ghe tiuala tale aitiutiu eteva nau me ange mae ghaa sio nau oia. ⁶ Aghaatoka tuutulighi va, lo ateva ghe tiuala masi niuungu etaimim aue eghelei isaa o niuungu lomosina ta elaa ruu ta nauna ateva Iesu Karisto.

⁷ Karika sesa etaghi tani ateateaa ia o salana atikirighi mausiiim akapa, poli aghaielousieinam tale urunguitanighi eteva. Arova la iriiri etokaieghi tale sene o agheelei kotokotoo me aghaauliaa va koronna masi kiukiu, am akapaaili me aghi, ita ghaagħaa niparruu

tale maamasinaane God. ⁸ God erooroo tani aulia ngaotu vaalua aghannaaili ekapaiem tee ailousiaane ateva Iesu Karisto.

⁹ Me uneghi nilooloo sae mausimim isaa avalua toko, va aielousi-aaimim aue epinosa me eoroi tale nialomasaanga, me tale ninannaa masalike tale niaielousi etaimim, ¹⁰ va am tara kila saa llo voto masina me raarangisana me karika mene righi voto sesa etaimim lomosina ta nauna ateva Karisto, ¹¹ me aue am pasu tale uene voto ghulughuluena ekasukasu ta Iesu Karisto, tale niasaesae me nikkauaa ta God.

Unna sene Pol ghe akasukasula masi kiukiu

¹² Isaa oia aghanna, kapughu etoa, va am kila va saa llo ghe lutula etaghi ghe aisausiaala tani akasukasu masi kiukiu. ¹³ Tale isaa o voto me soldia ngakapa atoa la aitoiaa tanganue Siisa me mene katoa taumattu la kilakila va atokatoka tee sene mausi Karisto. ¹⁴ Me poli isaa o sene etaghi, me oroi ila lo atoa kapuita laghe asarasarakanailala ta Vau ngepona ateva laghe tam matautula tani ppooaa inangari.

¹⁵ Koronna va katoa la poppoaa Karisto tale nisessaia tani tau sio ararighi eteae me uunguua niaittaraaii. Mene katoa la gheelei tale masi ninannaa. ¹⁶ Kateva uta taumattu laghe gheelei tale niaielousi poli la kilakila va atokatoka oia mausi tani aippooaa kotokotoo tee masi kiukiu. ¹⁷ Mene kateva uta taumattu la poppoaa Karisto ta la nnainila nonga, karika va tale masi ninannaa. La nim anna tani gheelei teeieghi voto sesa nau atokatoka tale sene.* ¹⁸ Me isaa o voto vaalua malloeane? Tani voto ateva masinaaili ia, ia avalua toko: va tale saa ase salana arova kamena o koronna me la poppoaa Karisto. Tale isaa o voto me amasimasi.

Ue, anim toka masimasi ¹⁹ poli akilakila va tale kaluimim nilooloo sae, me tale nisausi kanna kapuna Spiriti eteva Iesu Karisto, saa llo voto ghe lutula etaghi, aue egheleieghi me asaanga. ²⁰ Tale nannaaghi aghaloannaaili va tale saa ase salana, erau mene gheelei epalataieghi, me anim sarasarakana tani apasunga Karisto tale vilikighi, arova amaulue o amate. ²¹ Ta ngetaghi, tani toka aue atoka ta Karisto, me tani mate aue aghaa masi voto. ²² Arova maamauluaaghi emene toka tee lao, malloeanina va aue uunguaaghi etue uene manee, me ta ngetaghi tani ue va ea alao karika akilakila. ²³ Aghainanga teeilalua ilalua o salana aluekiri. Aghanna tani kasu, me alaa toka tee Karisto, poli emaamasi-naaili evalua o. ²⁴ Me mausimim me emaamasina va atoka. ²⁵ Liuna avalua o me aghaiesoa ngasarasarakanailili va aue amene toka aitaua ngakapa teeiem me aikaaiiaimim me masimasiaaimim aue enamuu. ²⁶ Liuna avalua o me nau amene toka teeiem, masimasiaaimim ta Iesu Karisto aue esasu sangga mausighi.

²⁷ Marova sa ateva elutu, am toka me am kasu nonga tale masi kiukiu kanna Karisto. Arova amae taraiem o anim nongoam, aue akila va am tiitingina akorokorongana tale kateva nonga spiriti, me ekaakateva iem tale ninannaa me niuungu va mene katoa la aikaaiiaa tale masi kiukiu. ²⁸ Me karika aue am matauta lo atoa la sessa teeiem tale voto la gheelei. Eaimatootoongana etaira va aue la turungila me am, aue am saanga. Isaa o voto God aue eghelei. ²⁹ Poli God ghe nim tau aatu sio etaimim mausi Karisto, karika va tani aiesoaa nonga etana, ta tani sau

1:10: 1 Tes 5:23. **1:13:** Apes 28:30. * **1:17:** Katoa uru ngai laghe pitila, laghe piti emuemuela ves 17, me emulina ves 16. **1:19:** 2 Ko 1:11. **1:21:** Gal 2:20. **1:23:** 2 Ko 5:8. **1:27:** Ips 4:1; 1 Tes 2:12. **1:29:** Apes 16:19-40.

maate aitauaa teeia. ³⁰ Am tee ngam laolao tale isaa o ase maamatana me am ghe taraieghila ta aghe ghaala, me isaa oia am nongonongo va aghaaghaa.

2

Tani usilaa vaalua Karisto esio siuua nannaane

¹ Arova righi niasarasarakana poli am tokatoka tee Karisto, me arova righi inangari nisausi tale ailousiaane ateva, me arova righi niaighui tale Spiriti eteva, me arova righi niamararama me nialousiusi, ² am ghelei erooroaa masimasiaaghi nau ekateva nonga nannaaimim, me eisaa aitauaa niaielousi, me ekateva nonga iem tale spiriti me tani uungu eitauaa. ³ Am rau mene ghelei righi voto tale nikuruetu me tani saeaa nannaaimim. Me karika, ta tale nisiuua ninannaa am tara katoa va masinaaili ila etaimim. ⁴ Kateva kateva etaimim erau mene atoka nonga nannaam tale llo nonga voto ia eaalonaa ta etara tee saa llo mene katoa la ghaloanna.

⁵ Nannaaimim enonginaaili tee nannaane Iesu Karisto.

⁶ Koronnaaili Karisto ia Goto ia
me karika ghe nnaala va easarasarakanaia tani toka nongina God
me tani poso parasi va Goto ia.

⁷ Ghe ghaa vella mallangina ateva
me ghe ghaala uunguaaira tau ngai uungu etoa,
me ghe gheleielia va arova nim
taumattu ia nongina ita.

⁸ Me laghe tarala taataraane va taumattu ia
ghe sio siuua nannaane
me ghe nongo usilaala tani lao tale nimate
me tani mate tee tale aikotoo.

⁹ Liuna avalua o me God ghe taeue liue saela epona
me ghe taula arari eteae elaulau isaa akapa arari,

¹⁰ va tale ararina ateae Iesu ila akapa la suuiaa sio patu kkeira etana,
epona liu me kosa ateva me lo atoa euu tale kosa ateva,

¹¹ me ila akapa aue la ghaulia ngaotu va Iesu Karisto Vau ngepona ia
tale nitau sae ta God Tamaita ia.

Ita mallanga nongina katto atoa

¹²⁻¹³ Mausina avalua o, masi kapughu etoa, me nongina am ghe nongonongo usilaa, karika va nau atokatoka teeiem nonga, ta nau karika aghi, am ghelei isaa o voto nau ekapa atoa, poli God euungu etaimim tani asarasarakanaiem tale aloannaaimim me uunguaaimim. Am uungu tee nioneoneaa tani apasunga va God ghe asaangiema, tale masi aloaloannaane.

¹⁴ Me nau am ghelei voto am rau mene ghelei tale niauliulia me niaitamamarasii, ¹⁵ va karika aue righi kaluimim ssavoto me aue am raarangisana, me enatuna am God, karika gheeleiaaimim sesa tale uunguaa karika ghulughuluena me sesa voto tale lo ateva oia vituu. Me am mallanga nongina katto atoa tale kosa ateva, ¹⁶ nau am posoposo atingina sae inangari maulue ateva. Me tale nauna ateva Karisto, aue aghaasake va karika aghe iloula tale niaikarati eteae o aghe uungula

2:3: Gal 5:26. **2:4:** 1 Ko 10:24. **2:6:** Jon 1:1-2; 17:5. **2:7:** 2 Ko 8:9; Jon 1:14. **2:8:** Hib 5:8; 12:2. **2:9:** Apos 2:33; Ips 1:20-21; Hib 1:3-4. **2:10:** Rom 14:11. **2:11:** Rom 10:9. **2:15:** Den 12:3; Plp 1:10; 1 Tes 2:19.

tale nim lao. ¹⁷ Me arongona ta la ghele kaoaghi sae tale liu nighelei aiaavusuvsuena nongina manu oppring, me am ghele ghelei llo tale uneimim niaikaiaia, amasimasi me amasimasi eitauangaili teeiem. ¹⁸ Liuna avalua o me am tee am masimasi, me am masimasi eitauaa teeieghi.

Timoti me Epaproditus

¹⁹ Aghaiesoaa ta Vau ngepona ateva Iesu va ghaisa ngarighi asungi atuu Timoti etaimim me aghi tee aue amasimasi nau emae auliaa kiukiuiim etaghi. ²⁰ Karika amene annaa teva nongina ia, eannangailiim tani aitarainam. ²¹ Mene katoa la annainila nonga me karika va llo voto isaa ta Iesu Karisto. ²² Me am kilakila va Timoti ang ghe gheleila voto eaapasunga va erooroo, poli nongina kateva me tamane, ang ghe uungu eitauaa teeieghila tale masi kiukiu. ²³ Liuna avalua o me aghaiesoaa va aue asungia tani mae taraiem ghaisa ngarighieili me atara mua va sa ateva aue la gheleia mua etaghi. ²⁴ Me aghaatoka tuutulighi ta Vau ngepona ateva va gharighi tau amae taraiem.

²⁵ Me aghanna va emamasina tani sungi aatu kapughu ta Epaproditus euungu eitauaa teeieghi me tee tau ngaiuvii ia, me kapuimim tau ngai kasuua inangari teeia me am ghe sungiela tani mae sausieghi. ²⁶ Ta poli eannangailiim me ghe alousiusieiliila poli ghe kilala va am ghe nongola va ghe isikila. ²⁷ Koronna va ghe isikila me ghaisa ngarighi ghe mate, me God ghe alousiusi teeielia, me karika va ie nonga ta aghi tee, tani akekkelieghi tale mene kasina nialousiusi. ²⁸ Liuna avalua o me asungi parasia atu etaimim me nau am taraiia aue am masimasi me karika aue atani alousiusi. ²⁹ Am ghaaia va nongina kapuna ia Vau ngepona ateva tee kinatama nimasimasi, me am oneoneaa ase taumattu nongina ia. ³⁰ Poli ghaisa ngarighi ghe mate tee uunguaane Karisto, me karika ghe annaa maamauluaane tani ghelei erooroaa nisausi am karika am ghe rooroo tani ghelei etaghi poli masaueili iem.

3

Am rau mene atoka tuutuliimim tale uunguaa vilikiimim

¹ Liuna avalua o, kapughu etoa, me am masimasi ta Vau ngepona ateva. Karika egheelei righi sesa etaghi tani mene piti aatu etaimim llo ngaghe auliaa muela etaimim, ta isaa o voto erooroo tani sausiem.

² Am paniem tale ila o paua atoa isaa o taumattu la gheelei voto karika masina, tau ngai ghelei saasakiaa viliki etoa. ³ Poli ita isoiso ita. Ita lo atoa ita kakkauaa tale Spiriti eteva kanna ia God, ita asaesae Iesu Karisto me karika ita atoka tuutuliita tale uunguaa vilikiita. ⁴ Arongona ta aghi arooroo va aghatoka tuutulighi tale isaa o voto.

Arova teva eannaava eatoka tuutulina tale uunguaa vilikina, aghi alaulaula. ⁵ Tale aiaaghaoaluna ateva nau, laghe isoieghila. Aghi atala nge Israeli ieghi, tale ararimangali eteva ta Benjamin, aHibru ieghi me asamasama nge Hibru.* Me tale uunguaa inangari nipaopao, aghi Paresi ieghi. ⁶ Aghe annaaili isaa o voto, liuna avalua o me aghe uviuvi

2:18: Plp 3:1; 4:4. **2:21:** 2 Tim 4:10. **2:25:** Plp 4:18. **3:3:** Rom 2:29. **3:4:** Apos 22:3; 2 Ko 11:18. **3:5:** Luk 1:59; 2 Ko 11:22; Apos 23:6. * **3:5:** o aHibru ieghi me tuvughu ekapa atoa aHibru ila. **3:6:** Apos 8:3.

kapuna taumattu God, me karika teva erooroo tani auliaa teeieghi, poli aghe nonganongo usila ngakapa inangari nipaopao.

⁷ Me tale isaa akapa o salana tani ghelei va aghe ghaa oroi voto, nau ghaine ataataraila va peisaane ila mausi Karisto. ⁸ Liuna avalua o me ataatarala isaa akapa voto peisaane nau aghe toongi teela kinatama voto atoa tani kila Iesu Karisto Vaughu ia. Mausina me aghe velu ekapala voto o, ataatarala va nim lao me aue aghaa nonga Iesu. ⁹ Me aue atoka ta ngetana, me karika aue aghulughuluena tale uunguaa inangari nipaopao, ta aghulughuluena tale niaikaiaa kannia Karisto, me isaa o nighulughuluena ghe kasula ta God tale niaikaiaa. ¹⁰ Aghanna tani kila Karisto, me sarasarakaniaane tale unna nitotu tale nimate, me tani lao nongina vaalua ghe mmarikanala me tani nongina ia tale matemateaane. ¹¹ Me tale isaa o ase salana, aue arooroo tani totu tale nimate.

Ni-iilou esarasarakana tani laa rekata

¹² Karika va ngaghe ghaala isaa o voto va ngaghe ghulughuluenalala. Iesu Karisto eposoposoaghi, me akasukasu kkai tani laa ghaa isaa o voto. ¹³ Kapughu etoa, karika ataataraiieghi va ngaghe ghaala isaa o voto. Me kateva nonga voto agheeleia, akakkaluua llo emuli etaghi me aghameemeti tani laa ghattau aipolipoli emua etaghi. ¹⁴ Aiilou parasi nonga tani laa rekata tale airuuruu me tani ghaa aipolipoli nongina God ghe koloaghila tani sae epona liu ta Iesu Karisto.

¹⁵ Ita akapa lo atoa ngita ghe matuennala ita nna ngamasina isaa o voto. Me arova karika am maemae aitauaa tale kasina ninannaa, isaa tee o llo God aue eghelei emasalika etaimim. ¹⁶ Me arova vaalua, ita toka nonga tale llo voto ngita ghe kilala.

¹⁷ Kapughu etoa, am mae aitauaa me am usilaa gheeleiaaghi, me am tani tara amasina lo atoa la kasukasu nongina vaalua ami, ami ghe kasukasu. ¹⁸ Poli nongina aghe auliaa nonga etaimim oroiaata, me ngamene auliaa tee nialousiusi, va oroi lo atoa la tokatoka tani ssatee aikotoo ateva ta Karisto. ¹⁹ Airuuruu tale kasukusuaaira nitturuu eteae. Kovaira ateva kapuira goto ia me llo tani palata, la aasakeea. Me nannaairaa etokatoka nonga tale voto tale kosa ateva. ²⁰ Me ita tanganueita epona liu, me earieri ita tani toi teva tau ngai asaangi ekasu okae, Vau ngepona ateva Iesu Karisto etana. ²¹ Aue eaikolikoliaa ia oia vilikiita ateva sesa ia ghele nongina vilikina masinaaili, tale sarasarakaniaane erooroo tani ghaa aitaua ngakapa voto me eghelei tale aloaloannaane.

4

¹ Liuna avalua o, kapughu etoa, me aghailousieinam me aghan-nangailiim, am arova aipolipolighi iem tale uunguaaghi me tale masimasiaaghi, liuna avalua o me am tingina akorokorongana ta Vau ngepona ateva, masi kapughu etoa.

Inangari niloeloe me niakorokorongana

² Alooloo luei ta Iuodia me Sintike tani mae aitauaa tale ninannaa ta Vau ngepona ateva. ³ Me tee akookolomio, lo ateva ughe uungu teeieghi,

3:7: Mat 13:44-46. **3:9:** Rom 3:21-22. **3:10:** Rom 6:3-5; 8:17. **3:12:** 1 Tim 6:12, 19. **3:14:** 1 Ko 9:24. **3:15:** 1 Ko 2:6. **3:17:** 1 Ko 4:16. **3:19:** Rom 16:18. **3:20:** Ips 2:6, 19. **3:21:** 1 Ko 15:28, 42-53. **4:1:** 1 Tes 2:19-20. **4:3:** Luk 10:20.

tani sausi ilalua o vause alua laghe uungu aanasa teeieghi mausi masi kiukiu, tee me Klemen me ila akapa lo atoa la uungu teeieghi, me arariira isaa tale vuku maulue ateva.

⁴ Nau ekapa atoa am masimasi ta Vau ngepona ateva, me amene ue va am masimasi. ⁵ Am tau velu va taumattu ngakapa atoa la tara va karika am saasavalaa inangari, poli Vau ngepona ateva ange aakalakalaa. ⁶ Am rau mene annangaili asease voto atoa. Tale voto akapa, am kokkolomi sae ta God tani auliaa sae aloaloannaaimim tee nikaili emasina. ⁷ Me luei eteva kanna ia God elaulau ekapaaili ninannaa, aue eaitaraa urunguitaniimim me nannaaimim ta Iesu Karisto.

⁸ Liuna avalua o, kapughu etoa, me saa voto koronna, me llo voto pei nioneoneaa, me llo ghulughuluena, me saa llo raarangisana, me saa llo eaalutu nimasimasi, me saa llo voto taataraane masikkanaaili, me arova righi voto masinaaili o am aruua etana, am annaa isaa o voto. ⁹ Saa llo voto ngam ghe kilala o ngam ghe ghaala, o am ghe nongola o tarala etaghi, am tootoonga tani ghelei me God, etautau luei, aue etoka aitauaa teeiem.

Nikaili emasina tale uneira nitaula

¹⁰ Namungaili masimasiaaghi ta Vau ngepona ateva poli ngam ghe mene nnainaghila. Akilakila va am ghe nannainaghi erau me poli karika righi salana va am ghe apasunga. ¹¹ Karika aghauliaa llo poli aghanan righi niaisausi, poli ngaghe kilala tani toka tale nimasimasi tale asease nitoka. ¹² Ngaghe kilala vaalua tani toka arova karika righi voto etaghi o arova oroi voto etaghi. Ngaghe kilala vaalua tani toka tale isaa o ase nau, arova pasu kovaghi o maloona aghi o oroi peighi o karika oroi. ¹³ Arooroo tani ghelei voto akapa ta lo ateva eaasarasarakanaiieghi.

¹⁴ Me masinaaili etaimim ta am ghe sausieghila tani sau maate tale maamauluaaggi. ¹⁵ Am aPilipae atoa am kilakila va nau masi kiukiu ghe tiuaala etaimim, me ngaghe anna tani kasu eMesedonia, am nonga am ghe tau mae sio, me ita ghe ailiuaala voto. Karika mene teva ale manga ghe gheleila isaa o voto. ¹⁶ Me nau aghe tokatoka eTesononika am ghe aasaoki mae voto tani sausieghi, karika va katengaata nonga. ¹⁷ Karika va poli aghe annaa va am ghe tau mae voto, ta aghe annaa va am ghe ghaa aipolipoli ta poli masi gheeleiaaimim. ¹⁸ Ngaghe ghaala voto aghanan me oroieili. Aghe pasueilila poli am ghe tau lao sio ta Epaproditus va emaeaa voto am ghe aasaoki mae sio, nonginaaili nitau lao tale aiaavusuvusuena masi ngusungusuane, me God eghaaghahaa me emasimasia. ¹⁹ Me aue kapughu Goto ateva aue etau aatu isaa akapaaili aloaloannaaimim tale oroiaa ngepona liu ta Iesu Karisto.

²⁰ Ta God Tamaita ia aue ita tauue sae tale nau oia, me nau ekapa atoa. Koronna.

Airuuruu tale inangarina Pol

²¹ Am auliaa masimasiaaghi ta isaa akapa taumattu manga ta Iesu Karisto. Kapughu tee atoa la tokatoka teeieghi laghe suula masimasiaairaa etaimim. ²² Ila akapa taumattu ngatoa manga ila, la suu teela masimasiaairaa ta lo atoa la uungu ta Siisa.

23 Alooloo sae va maamasinaane Vau ngepona ateva Iesu Karisto aue etoka tee lo ateva spiriti etaimim. Koronna.

Uru ngai etikirighi Pol ghe pitiela ta aKolosae atoa Inangari emuemua

Ia oia uru ngai etikirighi Pol ghe pitiela nau ghe tokatoka tale ale mata voovoo, nongina Ipises, Pilipae me Pilimon. Pol karika ghe lao sio eKolosae, ta Epapras aKolosae ia ghe nongola masi kiukiu eIpises, ghe aiesoala, me ghe oghi saela eKolosae tani ppooaa okae, me ale manga ateva eKolosae ghe lutula.

Tau ngalomasaanga ngatoa la nannaa va katoa laghe mae sio eKolosae me laghe apasungaala voto kamena okae, me Pol ghe aloan-nala tani auliaa kieira aKolosae atoa tale voto kamena laghe apasunga. Ghe aulia ngakorokoronganana va Iesu mata ngemua tale masi kiukiu, me marova teva voto elaulau Iesu, kamena ia. Ita rau mene aimuli usi tee voto taumattu ngatoa la ghaauliaa va masina, me ita rau mene kkauua ensolo atoa, ta ita aimuli usi tee Iesu, me gheeleiaaita etani masina. Pol ghe auliaa teela vaalua tani toka amasina tale ale manga ateva me tanganueita.

Tani kila amuemua

Aitiutiu tale inangari 1:1-2

Iesu mata ngemua ia tale masi kiukiu 1:3-2:5

Aimuli usi tee Iesu, me karika niaapasunga kamena 2:6-23

Am tokatoka nongina kapuna atoa God 3:1-4:6

Airuuruu tale inangari 4:7-18

Pol ghe amasimasila tau ngaisesoa ngatoa eKolosae

¹ Aghi Pol, kapuna apostolo ieghi Karisto Iesu me tale aloaloannaane God, me Timoti kapuita ia.

² Angalu pitipiti atu etaimim akapa lo atoa taumattu manga am me am aaiesoaa ta Karisto eKolosae. Alooloo sae va maamasinaane me luei ekasukasu ta God aue etoka etaimim.

Nikaili emasina me nilooloo sae

³ Angalu kaakaili emasina ta God Tamana ia Vau eteva Iesu Karisto tale kalumami nilooloo sae,⁴ poli angalu ghe nongola uneimim niaikaa-iaa ta Karisto Iesu me aielousiaaimim ta kapuna taumattu ngakapa atoa God manga ila.⁵ Am aikaaiiaa poli God eaaitaraa aipolipoli eteva epona liu am kilakila va aue etauiatu. Ngam ghe nongo vella arau tale inangari koronna, tale masi kiukiu,⁶ ghe mae sio etaimim. Me tale kosa akapa ateva inangarina ateva God ekuukuneaa uene me epiipinosa nongina ghe gheleila etaimim nau am ghe kilala inangari koronna tale maamasinaane God.⁷ Am ghe nongoala ta masi kapumami eteva ta Epapras, kapuna tau ngai uungu eteva ia Karisto, me egheelei emasinaaili uunguaane, eghaaghhaa liumami.⁸ Me ange auliaa tau mae sio etaimami kaluimim niaielousi kanna Spirit Manga.

⁹ Liuna avalua o me nau eteva ami ghe nongola karika ami ghe ainoanalala tani looloo sae tani kolomi God tani tau aatu alomasaanga tale Spirit Manga ateva me aue am kila aloannaane God.¹⁰ Me

aye am kasu tale masi salana eoneoneaa Vau ngepona ateva, me aue am amasimasia nau am ghelei masi niuungu me aue am tani kila amasinaaili God. ¹¹ God aue easarasarakanaiem tale kinatama sarasarakaniaane tani gheleiem va am rau mene sio asoasoaa tale nau sesa arova emae, ta aue am nim matua ngatoka, me am masimasi ¹² tani kaili emasina sae ta Tamaita ateva, ia ghe gheleiemla va am tee am rooroo tani ghaa saa llo ghe suitoongaala va ekaluimim epona liu tee kapuna taumattu ngatoa God manga tale mallanga ateva.

¹³ God ghe ghaa oghitala tale sarasarakaniaa saurrom ateva, me ghe atokaita lao sio tale ararimangalina ateva Natuna ateva eaaielousieinia. ¹⁴ Le nonga aighaa oghiita ia, me ekakkaluuaa kaluita ssavoto.

Iesu Karisto ia nonga tale voto akapa

¹⁵ Karisto tootoona ia God ateva, karika ita rooroo tani taraia, ghe tokala arau me ia mue ia tale voto akapa God ghe gheleila. ¹⁶ Poli ta ngetana voto akapa God ghe gheleila, voto epona liu me tale kosa ateva, voto ita taatara me voto karika ita rooroo tani tara, me ila akapaaili ensolo atoa, kuturu etoa, raroai etoa me asease tau ngai totoi etoa. God ghe gheleila isaa akapaaili voto ta Karisto, me kanna Karisto. ¹⁷ Ghe tokala emua arau, me ta ngetana isaa akapaaili voto etokatoka amasina. ¹⁸ Me ia emuemua ale manga ateva nongina uruita ateva emuemueaa vaulaniita ateva. Ia ghe toka akasinala me aitutiu ia tani totu tale nimate. Ia avalua o me ie nonga eitara ngakapanaaaili voto atoa. ¹⁹ Poli God emasimasi va isaa akapaaili voto kanna God etoka ta Karisto. ²⁰ Ta ngetana God ghe mene atoka aitauaala isaa akapa voto teeia, voto tale kosa ateva me epona liu, me ghe gheleila luei tale raena ateva Natuna ateva tale aikotoo ateva.

²¹ Me am, isaa too nau am ghe masuaeiliila me tale nannaaimim am ghe sessa tee God, me gheegheleiaaimim sesa, ²² me isaa oia ia ghe atoka aitaueniemla teeia tale matemateaane tale aikotoo ateva, tani maeainiem nongina etokatoka, manga, me raarangisana, me karika righi sesa gheegheleiaaimim, ²³ arova am aloanna tani mene lao tee tale kaluimim niaikaiaa, karika am mene tau velu uneimim niaikaiaa tale masi kiukiu am ghe nongola, laghe ppooaala tale isaa akapaaili taumattu tale kosa ateva, me aghi tee, Pol, tau ngai uungu ieghi tani ppooaa ia o masi kiukiu.

Unguaane Pol tale ale manga

²⁴ Ghaine amasimasi tani ghaa maamatana tani aisausieinam, me aghelei erooaa maate Karisto ghe suitoongainaghila va aghaa tale vilikighi, tani sausi ale manga ateva. ²⁵ God ghe tau mae sio niuungu etaghi tani uungu mausi ale manga ateva, ghe sungieghila tani ppooa ngakapa masi kiukiu etaimim. ²⁶ Ia o inangari eteva ang ghe aisuliaa vella arau, me tale isaa oia nau ang ghele kaurekatila tale taumattu manga. ²⁷ God ghe suitoongainilala tani apasunga voto aisulianna etaira, va tau ngeleka atoa aue la ghaa kinatama niarangise ateva, me Karisto aue etoka teeiem tau ngeleka atoa, me am atoka tuutuliimim tale voto emae epona liu. ²⁸ Ami aaulia ngaotu Karisto, ami aauliaa

1:11: Ips 1:19; 3:16. **1:12:** Ips 1:11, 18. **1:13:** Luk 22:53; Ips 2:2. **1:14:** Ips 1:7.

1:15: 2 Ko 4:4; Jon 1:18. **1:17:** Jon 1:1; 8:58. **1:18:** Ips 1:22-23; Apos 26:23; Aotu 1:5.

1:19: Kol 2:9. **1:20:** Ips 1:10. **1:21:** Rom 5:10; Ips 2:12. **1:22:** Ips 5:27; Rom 5:10.

1:25: Ips 3:2, 7-8. **1:26:** Rom 16:25-26; Ips 3:5, 9.

kieira taumattu ngakapa atoa me ami aapasunga ta taumattu ngakapa atoa tale alomasaanganiaane Karisto, tani ghelei taumattu ngakapa atoa va la matuenna ta Karisto nau la tingina emua ta God.²⁹ Liuna avalua o me auungu ekorokorongana tale isaa akapaaili sarasarakani-aane etautau mae etaghi.

2

¹ Aghaloanna tani auliaa kieimim vaalua aghe saula maamatana mausiiimim me tau ngai kkaua ngatoa eLaodesia, me tee lo atoa la aikaiaia karika poi laghe taraieghi. ² Aghanna tani aisausieinila me tani gheleila va la toka aitauaa tani korokorongana tale niaielousi. Aue la kaarasi tani ghaa niarangise me alomasaanga, me aue la kila voto aisulianna kanna God, isaa ta Karisto. ³ Karisto nonga erooroo tani ghelei taumattu ngatoa la alomasaanga me tani apasunga llo voto God eaipanipaniaa ta taumattu ngatoa. ⁴ Aghaauliaa etaimim llo oia voto, ta toa taumattu la rau kameam nonga tale kamena niapasunga am nonganongo arova masinaaili. ⁵ Arongona ta masaeili ieghi etaimim, me urunguitanighi eteva etokatoka teeiem, me amasimasi tani tara va tokatokaaimim masina me uneimim niaikaiaia ta Karisto korokoronganaaili.

Ouna ateva maulue ta Karisto me karika tale inangari niloeloe

⁶ Me isaa oia, nongina ngam ghe ghaala Karisto Iesu va ang ghe Vauimmi iela, am kasu teeia nau etoa. ⁷ Am atoka maamauluaaimim epona etana nongina ai eteae oane eposoposo asarasarakana ia, me am tingina akorokorongana tale niaikaiaia am ghe ghaala, me aue am kaili emasina etana nau etoa.

⁸ Am aipanipaniaa! Toa taumattu la rau kameam nonga tale nim nannaairaa pei tale kosa ateva oia korokoronganaaili me kamena, emaemae ta raroai etoa me karika emaemae ta Karisto. ⁹ Poli isaa akapaaili voto kanna God etoka ta Karisto,¹⁰ me ngam ghe pasula nau am tokatoka ta Karisto, ia emuemue ngakapa tau ngai toitoi etoa me namu ngatoa tee. ¹¹ Nau eteva am ghe mae sio ta Karisto am ghe ghaala ni-isoiso, karika tale ni-isoiso tuunga ateva, ta am ghe ghaala ni-isoiso ateva kanna ia Karisto, ghe iso vella vilikina tale matemateaane,¹² poli am ghe mate teela Karisto nau eteva laghe asuuemla tale manu me am ghe totu teeelia tale ouna ateva maulue, poli am aatoka tuutuliiimim tale kaluimim niaikaiaia elome tale sarasarakaniaana God, ghe totula Karisto tale nimate. ¹³ Am nongina va matena am poli kaluimim ssavoto me poli sesa gheeleiaaimim karika ghe kapa, vara me God ghe ghelei esakesakeamla ta Karisto, ta ghe kkaluaala isaa akapaaili kaluimim ssavoto. ¹⁴ Ghe sei vella kaluita ssavoto tale uru ngai laghe pitila me kaluita dinao nau ghe matela tale aikotoo. ¹⁵ Tale isaa o salana, ghe apalala sarasarakaniaa sesa spiriti etoa me tau ngai toitoi etoa me ghe apalatailala ta mataira taumattu ngatoa nau eteva ghe apalailala tale aikotoo.

¹⁶ Ia avalua o me am rau mene tau veluem va la auliaa teeiem tale inana am namanama me manu am ropiropi me karika am laolao tale kasina tana uneira nivelu eitauaa tale nau manga tale kateva kateva

1:29: Ips 3:7, 20; Plp 4:13. **2:3:** 1 Ko 1:24, 30. **2:4:** Rom 16:18. **2:5:** 1 Ko 5:3. **2:7:** Ips 3:17. **2:9:** Jon 1:14, 16. **2:10:** Ips 1:21-22. **2:11:** Rom 2:29. **2:12:** Rom 6:4. **2:13:** Ips 2:1, 4-5. **2:14:** Ips 2:14-16; 1 Pita 2:24. **2:16:** Rom 14:1-13.

ninamanama me kateva kateva ulana me tale nau sambati. ¹⁷ Isaa o inangari niloeloe me kastam nim tootoo voto auena emae, me ia o Karisto, ia koronna ia, ang ghe mae sio. ¹⁸ Am rau mene tau velu taumattu ngatoa va la ghelei kaluimim nikkauaa tani ue va am siuua nannaaimim me am kkauaa ensolo atoa me la annaa va muennaaili ila poli laghe tarala nitaatara, sesa nannaaira egheeleila me la tautau sae nannaaira. ¹⁹ Karika la tokatoka tee Karisto, ia nongina uruita eposoposo aitauaa vaulaniita me riuita me ita piipinosa nau eteva God eapinosaita.

²⁰ Am ghe mate teela Karisto, me ghe akekkeliemla tale raroai etoa, me vaalua am mene usiusi inangari niloeloe tale kosa ateva oia: ²¹ Am rau mene poso, am rau mene namunamua, am rau mene tuli! ²² Isaa o ase inangari niloeloe pei tale kosa ateva oia aue ekapa, nim kaluira taumattu ngatoa la apasunga. ²³ Isaa o inangari niloeloe enim gheeleila va la kkauaa me la ghelei voto tale vilikiira va enim usilaa nannaaira. Isaa o inangari niloeloe arova tani alomasaanga, karika, me karika etautau mae righi niaisausi tani apala sesa gheeleiaa kateva kateva taumattu.

3

Am toka tale ouna ateva maulue

¹ Nau am ghe totula tale ouna ateva maulue, am ghe totu eitauaa teela Karisto, me am tani pae voto ngepona liu, nongina Karisto etokatoka tale pai muenna atelange ta God ² me am atoka nannaaimim tale voto ngepona liu me karika va voto tale kosa ateva. ³ Tale lo ateva oia maulue angam ghe matela etana, me maamauluuaaimim tuunga ateva eaaisuliaa ta Karisto elome ta God. ⁴ Karisto etautau aatu maulue ateva. Me nau eteva ekaurekati tale kosa akapa ateva, aue eapasunga sarasarakaniaane me mallangina, am tee aue am lao aitauaa teeia me aue la tara akapaiem me maamauluuaaimim aue etoka tee Iesu, karika aue am aisuliaa me aue am toka tale mallangina ateva.

⁵ Liuna avalua o me am ghelei emate sesa ninannaa me sesa voto tale kosa ateva oia: unguaa nialai salosalooa see, karika am mene kune taita me vause, me am rau mene ghelei llo voto sesa taumattu ngatoa la paapalata, me aloaloannaaimim korokoronganaili tani kune vause me taita tani ghelei ssavoto, me nikuruetu, nim nongina va am kakkauaa tootoo. ⁶ Poli isaa o ase voto, sessaiaane God aue emae sio.* ⁷ Me am, am ghe kasukasu tale llo akasina maulue sesa am ghe tokatoka etana. ⁸ Me isaa oia, am ghaa velu etaimim isaa o asease voto nongina nisessai, me niaulaa saasakiaa ta kateva, me nitam aloanna kateva, me niaasake, me inangari nilakolako ta paaimim. ⁹ Karika am mene aikameaa, nau eteva am ghe ghaa vella unguaaimim pei ngarau am ghe gheeghelei ¹⁰ me am ghe mene tiuua ngaounala nau God ghe mene ghelei eounaiemla tale tootoona ateva lo ateva ghe gheleitala, tani ghelei va am tani kila aalomasaanganiaane. ¹¹ Tale ouna ateva maulue karika toa ajiu me karika toa aGrik, me karika toa isoiso me lo atoa karika isoiso ila, me lo atoa karika va ajiu ila me aGrik ila, me lo atoa

2:17: Hib 8:5. **2:19:** Ips 2:21; 4:16. **2:20:** Gal 4:3, 9; 1 Tim 4:3. **2:22:** Mat 15:9.

3:1: Mak 12:36; 16:19; Ips 1:20. **3:2:** Mat 6:33. **3:5:** Rom 6:6, 11; Ips 4:19; 5:3-6. * **3:6:** aue emae sio Kasina uru ngai laghe pitila, laghe pitila aue emae sio ta lo atoa la sassakieinia. **3:8:** Ips 4:25-29; 5:4. **3:9:** Ips 4:22, 25. **3:10:** Ips 4:24. **3:11:** Gal 3:28.

karika alomasaanga ila, me lo atoa karika la rooroo tani ghelei voto tale nim nannaaira, me lo atoa la rooroo tani ghelei nongina la aloanna tani ghelei, ta Karisto ie nonga akapa etaira.

¹² Nongina God ange suoiongainamla va am manga am, me eaailou-siangailiem, am amolumoluem tale isaa o niuungu: am alousiusi tee lo atoa la tokatoka tale maamatana, me niaisausi etani mae tale urunguitaniimim, me am sioaa nannaaimim ta katoa, me am nnaa mene kateva, me karika emene sessai parasiem ta mene kateva. ¹³ Arova ange gheleila voto ateva karika masina ia me karika ange mae sio ta nannaam, unim sioaa nannaam me lao aitauaa teeia, me arova kateva eghelei saasakiaa, am kkalueinia, nongina Vau eteva ghe kkaluaala kaluimim maamatana. ¹⁴ Me tale llo voto matuutuliena, am ailousia ngakoronna me aue am toka amasina tee mene kateva. ¹⁵ Am tau velu kanna luei eteva Karisto emuemue tale urunguitaniimim, nongina ghe koloamla tani kateva nonga, me am kaili emasina. ¹⁶ Am tau velu inangarina ateva Karisto etoka elome etaimim me eapasunga ta kateva kateva alomasaanga tani kkinari tau sae emaema ta Spiriti eteva, me kkinari tee nimasimasi tani tau sae God tale urunguitaniimim. ¹⁷ Me saa llo am gheelei tale inangari me niuungu, am gheelei llo voto tale ararina atae Vau eteva Iesu, tani kaili emasina ta God Tamaita ia.

Inangari niloeloe tale kateva kateva tau ngaisesoaa

¹⁸ Vause atoa lailai iem, am atoka nannaaimim ta taitaniim atoa ta isaa o voto ghulughuluena ta Vau eteva. ¹⁹ Taita atoa lailai iem, am aielousiaa vauseniiim atoa karika am mene sorriena teeila. ²⁰ Aliki etoa am nongo usilaa tamaimim me kinaimim atoa tale isaa akapa voto, poli isaa o voto eaamasimasi Vau eteva. ²¹ Tamatama atoa am rau mene savalaa natuimim atoa va esessaila, ta erau ghelei nannaaira va esioaili euu. ²² Lo atoa am uungu me karika am tokatoka tale aloaloannaaimim, am nongo usilaa vauim atoa tale kosa ateva oia tale voto akapa. Karika am mene uungu nonga ta nau eteva la taataraiem va am ghelei emasimasil, ta am uungu tale masi ninannaa emaema tale urunguitaniimim, me tani oneoneaa God. ²³ Saa niuungu am gheelei, am ghelei tale masi ninannaa emaema tale urunguitaniimim ateva, nongina va am uungu ta Vau ngepona ateva, me karika va ta taumattu ngatoa. ²⁴ Am uungu emasina poli am kilakila va ta Vau eteva aue am ghaa voto masina ghe aulia ngalokoila, nongina aipolipoli. Am uungu ta Vau eteva Karisto. ²⁵ Tau ngai ghelei ssavoto atoa aue la ghaa aipolipoli tale llo voto sesa laghe gheleila. Karika aue righi niaimassiaa.

4

¹ Vau etoa am aitoiaa tau ngai uungu etoa karika la tokatoka tale aloannaaira, me am ghelei emasina me ghulughuluena lao ta kapuimim tau ngai uungu etoa, ta am kilakila va am tee kapuimim Vau eteva ia epona liu.

Niailoe tale nikokkolomi sae

3:12: 1 Pita 2:9. **3:13:** Ips 4:2, 32. **3:14:** Rom 13:8-10. **3:15:** Plp 4:7; 1 Ko 12:27; Ips 4:4. **3:16:** Ips 5:19. **3:17:** 1 Ko 10:31; Ips 5:20. **3:18:** Ips 5:22. **3:19:** Ips 5:25. **3:20:** Ips 6:1. **3:21:** Ips 6:4. **3:22:** Ips 6:5-8. **3:25:** Rom 2:11. **4:1:** Ips 6:9.

² Am rau mene amaomao tani kokkolomi sae, me nau am kokkolomi sae, nannaaimim eoti, me am kaili emasina sae ta God. ³ Me am kokkolomi sae mausiumami tee va God aue etau mae salana tani laa ppooaa masi kiukiu, me aue ami aulia ngaotu voto aisulianna isaa ta Karisto, poli aghe poppooaa masi kiukiu eteva, laghe atokiaegehi ssola tale ale mata voovoo. ⁴ Atani mene ppooa ngaotu masi kiukiu ta taumattu ngatoa. Ia avalua o me am kokkolomi sae ta God me aue esausieghi tani kila tani ppooa ngamasinaaili.

⁵ Nau am tokatoka tee taumattu karika la aikaaiaa ta Iesu, am tani aitoka tee llo voto am gheelei me am rau mene tau velu kasina voto va enim peisaane. ⁶ Nau etoa am sama amasina etaira, nongina uela ateva eaamasikkana anem inana, ia avalua o me aue am kila tani asokoi kaluira nikokkolomi.

Airuuruu tale inangari niloeloe me nimasimasi

⁷ Tikikus aue eaulia ngakapa voto ghe ailutuaala etaghi. Ia nengaghi tuungia aghailousieinia. Ia kapuna tau ngai uungu ia Vau ngepona ateva nongina aghi, me egheelei emasinaaili uunguaane. ⁸ Aghe sungiela tani mae taraiem tale masi voto am kila etana va sa ateva elutululu etaimami, me ia aue eakorokorongana urunguitaniimim. ⁹ Aue emae aitauaa tee Onesimas, am kilakilaia ghe kasula ona tale masalikiimim atae, egheelei emasinaaili uunguaane me ami aaielou-siangailia. Ilalua aue lalu auliaa etaimim isaa akapaili voto elutululu oia.

¹⁰ Aristakus esuula masimasiaane etaimim. Etokatoka teeieghi tale ale mata voovoo. Me Mak, aloana ta Banabas ia tee esuula masimasiaane etaimim. Am nnaa inangari aghe auliaala tale uunguaane Mak; arova emae etaimim, am aikoloainia. ¹¹ Me Iesu, la kolokoloa va Jastas, ie tee esuula masimasiaane tee etaimim. Ilotolu o taita kotolu ilotolu nonga ajiu ilotolu. Ilotolu lotolu kakkauaa, me lotolu uungu teeieghi tale ararimangalina ateva God. Lotolu kaakaarasi tani aisausieinaghi. ¹² Epapras tee ghe kasula ona tanganueimim ie tee etautau aatu masimasiaane etaimim. Ia kapuna tau ngai uungu ia Karisto Iesu. Karika enim aitoka ta ekokkolomi sae nau ekapa atoa poli am, va am tingina akorokorongana me am matuenna me aue am kilaaili saa voto God ealona va am ghelei. ¹³ Aghaloanna tani aulia ngakorokorongana etaimim va ia euungu ekorokoronganaaili tani sausiem, me lo atoa tee eLaodesia me Ierapolis. ¹⁴ Luk dokta ia ami ailousiangailia etautau aatu masimasiaane etaimim me tee Diimas.

¹⁵ Me am auliaa tee masimasiaaghi ta tuemami me nengamami etoa eLaodesia, me ta vause ateva la kolokoloa va Nimpa me tee ta lo atoa la kakkauaa tale alena ateva. ¹⁶ Nau eteva lo atoa am tokatoka eKolosae am ruu tani nongo uru ngai etikirighi oia am mene laoainia me la ritia tale ale manga ateva eLaodesia. Me am tani ritia ia oia uru ngai etikirighi aghe pitiela ta aLaodesia ngatoa. ¹⁷ Me am auliaa ta Akippus va, “Utani ghelei ekapa llo voto Vau eteva ghe tau aatu sio va ughelei.”

¹⁸ Aghi Pol, aghe pitila isaa oia masimasiaaghi. Am annaa tokatokaaghi tale ale mata voovoo. Alooloo sae va maamasinaane God aue etoka teeiem.

4:2: Ips 6:18; Plp 4:6. **4:3:** Rom 15:30; Ips 6:19. **4:5:** Ips 5:15-16. **4:6:** Ips 4:29; 1 Pita 3:15. **4:7:** Ips 6:21. **4:8:** Ips 6:22. **4:9:** Plm 10-12. **4:10:** Apos 12:12; 15:37-39; 13:13; 2 Tim 4:11. **4:12:** Kol 1:7; Plm 23-24. **4:17:** Plm 2. **4:18:** 1 Ko 16:21.

Aitiutiu etikirighi uru ngai Pol ghe pitiela ta aTesalonika ngatoa Inangari emuemua

Pol ghe atokala ale manga ateva eTesalonika tale unna aiaaghaluene ateva nikasu (Apostolo 17:1-9), me ajiu etoa laghe aloannala tani turungi uunguaane Pol. Pol ghe tokatoka eAten nau ghe pitila ia oia uru ngai etikirighi, me ghe aloannala tani apasunga va ia apostolo tuungi ia, me tee tani auliaa vaalua ghe suula Timoti tani akorokoronganaila tale uneira niaiesoaa. Ghe pitila voto tani akorokoronganaila va la toka tale uunguaa nimanga, me tee tani liu nikkolomi va sa ateva elutu ta tau ngaiesoaa ngatoa nau la mate, me tee vaalua Iesu aue emene mae.

Tani kila amuemua

Aitiutiu tale inangari 1:1-10

Pol me aTesalonika atoa 2:1-3:13

Nitoka manga 4:1-12

Vaalua Iesu aue emene mae 4:13-5:11

Inangari niloeloe 5:12-28

¹ Aghi Pol, Saelas me Timoti,

Ami pitipiti atu etaimim taumattu ngatoa tale ale manga ateva ona eTesalonika ta God Tamaita ia, me Vau ngepona ateva Iesu Karisto.

Ami looloo sae va maamasinaane God me luei aue etoka etaimim.

Nikaili emasina tale uneira niaikaiaa aTesalonika ngatoa

² Nau ekapa atoa, ami kaakaili emasina ta God ta poli mausiiimim, me ami aaseainam tale kaluimami nilooloo sae. ³ Nau ekapa atoa ami looloo sae ta matane God Tamaita ia, ami nannaa uunguaaimim elutulutu tale aikaiaaimim, me niuungu am gheelei tale niaielousi, me karika am maamangoo nau am toitoi voto ita aatoka tuutuliita etana ta kapuita Vau ngepona ateva Iesu Karisto.

⁴ Poli ami kilakila va God ghe suitoongainamla va natuna am, masi kapuimami etoa, God eaaielousieinam, ⁵ ta poli, nau eteva ami ghe poppoaa etaimim, kaluimami masi kiukiu karika ghe mae sio etaimim tale mata nginangari nonga, ta tee sarasarakanan me Spirit Manga ateva, me nannaaimami sarasarakananaili tale masi kiukiu, nongina am ghe tarala vaalua ami ghe toka teeimla mausiiimim. ⁶ Am ghe usilaa gheeleiaaimami me Vau ngepona ateva. Arongona ta am ghe ghaala oroieili asease voto sesa laghe gheelei teeiem, Spirit Manga ateva ghe tau aatu nimasimasi nau eteva am ghe ghaala inangari eteva. ⁷ Liuna avalua o me tau ngaiesoaa ngakapa atoa eMesedonia me Akaia la taatara atu etaimim va uneira niaimatoongana iem. ⁸ Kurruna ateva inangarina ateva Vau ngepona ghe kasula etaimim. Karika laghe nongoala nonga eMesedonia me Akaia. Aikaiaaimim ta God ngila ghe kila akapa seela. Liuna avalua o me karika ami rooroo tani mene auliaa righi voto. ⁹ Poli ila la kiukiuvaalua am ghe ghaaiemamila, me la ghauliaa vaalua am ghe liula vilimim tale tootoo goto, me am ghe lao sio ta God tani uungu ta God ateva sakesake ia me koronna ia, ¹⁰ me tani

toi Natuna ekasu epona liu, ia God ghe totuela tale nimate, me ia Iesu eaasaangita tale sessaiaane God auena emae.

2

Uunguaane Pol eTosalonika

¹ Am kilakila, kapuimami etoa, va maemaeaimami etaimim karika ghe nim peisaanel. ² Me auena ami ghe mae etaimim ami ghe ghā akasinala maate tale maamauluaimami, me laghe ghelei epalataiemamila ePilipae, nongina ngam ghe kilala. Me poli va aisausiaane God, ami ghe ghaala sarasarakanā tani auliaa etaimim masi kiukiu kanna God, arongona ta tau ngai ssateiemami etoa la gheelei teeiemami voto sarasarakanāaili. ³ Poli inangari nissausi ami aauliaa, karika ekasukasu tale voto kamena me kulukulutana, me karika va ami anna tani kameam. ⁴ Me karika, ta ami aippooaa nongina taumattu God ang ghe atokala tuutulina ta ngetaira, me ghe tarala va ami rooroo, me ghe tau mae sio niuungu tani auliaa masi kiukiu. Karika ami anna tani amasimasi taumattu, ta ami anna tani amasimasi God poli ia etootoonga urunguitaniihami. ⁵ Am kilakila va karika ami ghe gheelei inangari tani nim ghāiem, me karika ami ghe tara ssaila righi peiimim me ami ghe aaisulia va am rau kila. God etaatara me erooroo tani aulia ngaotu isaa oia voto. ⁶ Karika ami ghe paepae niaruaa ta ngetaimim o ta mene katoa.

Poli kapuna apostolo iemami Karisto, ami ghe roola va ami ghe tau aatu maate etaimim tale uunguaa viliki veu. ⁷ Me karika, ta ami ghe kaarasila tani toka teeiem nonginaaili va ami kinaim iemami. ⁸ Ami ailousiangailiem, liuna avalua o me ami masimasieili, karika va tani auliaa nonga masi kiukiuna God, ta ami tautau aatu tee maamauluaimami, poli ami maamasiangailiem. ⁹ Koronnaaili, kapuimami etoa, am roo tani nnaa niuungu me aanasa ami ghe ghaaghāa. Ami ghe uungu eleivoo me ellaa tani ghā aneimami inana ta poli ami ghe anna va ami rau mene taula maate ta teva taumattu nau ami ghe poppoaa masi kiukiuna God etaimim.

¹⁰ Am, am rooroo tani aulia ngaotu, me God tee, vaalua ami ghe mangala me ghulughuluenalā, me karika am ghe aliu teeiemami tale righi voto, nau ami ghe tokatoka teeiem lo atoa am ghe aaiesoaa. ¹¹ Nongina am kilakila va ami ghe gheelei kateva kateva etaimim nongina va ami tamaimi iemami. ¹² Ami ghe aasarasarakanaiem me poppoaa inangari nissausi, me ami ghe aulia ngasarasarakanā etaimim va, tani kasu tale masi salane God, ia ghe koloamla tani toka tale ararimangalina ateva me tale mallangina ateva.

¹³ Me nau ekapa atoa ami kaakaili emasina ta God poli nau am ghe ghaala inangarina ateva God, am ghe nongoala etaimami, karika am ghe ghāielā va arova inangariira taumattu ngatoa, ta am ghe ghāielā va inangarina ia God, me koronnaaili va inangarina ia God. Nau ghaine euungu ta lo atoa etaimim am aaiesoaa. ¹⁴ Poli am, kapuimami etoa, ngam uusilaa nongina vaalua taumattu ngatoa tale alena ale manga God ejudia ila ta Karisto Iesu: ngam ghe ghaala mmaprikana ta kapuimim atoa tanganueimim eitauua, nim nongina isaa o ale manga

eJiudia laghe ghaala mmarikana ta ajiu etoa,¹⁵ laghe uvi ematela Vau ngepona ateva ta Iesu me propete atoa, me laghe ameti veluemamila, me laghe ssatee akapa teela taumattu. Laghe gheleila God ghe tam masimasila.¹⁶ Ami aloanna tani aippooaa tee lo atoa karika va ajiu ila va la saanga, me laghe tootoonga tani ghelei rungainamami. Tale isaa o salana, laghe apasulala tale ssavoto me ghe laula aioghioghi, me tale airuuruu sessaiaane God ghe tokala etaira.

Pol ghe annaaili tani laa tara aTesononika ngatoa

¹⁷ Me, kapuimami etoa, ami ghe masaula etaimim tale nau karika aluse (karika va tale ninanna, ta tale vilikiimami ekapa), liuna avalua o me ami ghe paepaeaili salana poli kinatama nannaaimami tani mae taraiem.¹⁸ Ami annaaili tani mae taraiem, me koronnaaili aghi Pol aghe tootoongaala oroaata, me Satana egheelei rungainamami.¹⁹ Poli isaa o voto ami nannangaili va ami ghaa auena, me isaa o uneita nimasimasi me kou nguru aue ami ghaa nau ami tingina ta matane Vau ngepona ateva Iesu nau emae. Karika am kilakila va mausiiimim ami masimasi?²⁰ Mausiiimim me aue ami ghaa nioneoneaa me nimasimasi.

3

¹ Poli karika ami ghe roola tani ghaa velu ia o ninanna ngateva tale nannaaimami, ami ghe nnaala va masina va aghi nonga atoka eAten.² Ami ghe suu aatu sio Timoti, ia kapuimami ia, me kapuna tau ngai ungu ia God tani kasuua masi kiukiuna Karisto, tani akorokoronganaiem, me tani auliaa inangari nissausi tale aikaiaaimim³ va karika teva etaimim emene katuu tale isaa o nitootoonga. Am kilakila amasina va ita aue ita lao tale isaa o ase nitootoonga.⁴ Nau ami ghe tokatoka teeiem, ami ghe aauliaa etaimim nau ekapa atoa va aue ita ghaa mmarikana, me am kilakilaaili va isaa o voto ange lutulutu ekoronna.⁵ Mausina avalua o me poli anannangaili isaa o voto, me ngasuusuu atu Timoti tani mae kila va vaalua aikaiaaimim. Amaamatautu va tale righi ase salana, saikame ateva erau tootoongainiem, me uunguaaimami etaimim erau nim peisaane.

Masi kiukiu Timoti ghe oghiaa mae sio

⁶ Me ghaine, Timoti ang ghele mae rekataa sio etaimami, ghe kasula etaimim me ghe rekataala masi kiukiu tale aikaiaaimim me niaielousi. Ghe auliaala vaalua am nannainamami tee nimasimasi me am annaaili tani taraiemami, nongina ami tee ami annaaili tani taraiem.⁷ Liuna avalua o, kapuimami etoa, me tale isaa akapa uneimami maate me niuvuvi, ami ghe ghaala airuui ngalo nau ami ghe nongola aikaiaaimim.⁸ Ia oia ami rooroo tani toka, poli am tiitingina akorokorongan ta Vau ngepona ateva.⁹ Ami kaakaili emasina ta God poli am, me mausiiimim ami ghaaghaa kinatama nimasimasi eteva ta God.¹⁰ Eleivoo me ellaa ami looloo sae asarasarakanaaili va ami ghele mene taraiem, me tani mene auliaa tau aatu llo karika tale aikaiaaimim.

¹¹ Ami looloo sae va aue kapuita God ateva, Tamaita ia, me Vau ngepona ateva Iesu aue eghelei emasalika salana me ami mene mae taraiem.¹² Aue Vau ngepona ateva eghelei ailousiaaimim enamuu, me

epasu esassanga, me ekao vellao ta kateva kateva etaimim me ta mene katoa taumattu ngeleka nongina ami, ami ghe gheleila etaimim. ¹³ Ia aue easarasarakana urunguitaniimim, me karika aue righi kaluimim ssavoto me aue am manga ta matane kapuita God ateva Tamaita ia, nau kapuita Vau ngepona ateva Iesu emae tee ila akapa kapuna atoa manga ila.

4

Ita toka tani amasimasi God

¹ Liuna avalua o, kapuimami etoa, me ami ghe loeamla vaalua tani toka tani amasimasi God, me tokatokaaimim nau ghaine am usilaa. Me isaa oia ami kookolomiem me ami aulia ngasarasarakaneta etaimim ta Vau ngepona ateva Iesu tani gheleiem va am toka tale ia o ase nitoka ateva nau ekapa atoa. ² Poli am kilakila saa inangari niloeloe ami ghe tau aatu sio etaimim, me isaa o inangari, matuutulienaa ghe mae sio ta Vau ngepona ateva Iesu.

³ Aloaloannaane God etaimim va am manga, me am akekkeliem tale uunguua niallai salosalooa see. ⁴ Kateva kateva etaimim etani kila vaalua tani ainanganangaa vilikina tale salana manga me niioneoneaa, ⁵ karika va sesa ninannaa emene muemueiniem va am ghelei voto sesa, nongina taumattu ngeleka atoa karika la kilakila God. ⁶ Me tale isaa o voto karika teva emene ghelei saasakiaa ta teva kapuna, o ekamea me eghaa peina. Vau ngepona ateva aue eliu aipolipoli sesa tale ia o ase taumattu ngateva, poli isaa o ase ssavoto, nongina ngami ghe auliaa muela, me ngami mene auliaa kieimim. ⁷ Poli God karika va ghe kolotala tani tam raarangisana ta ita toka va manga maamauluuaaita. ⁸ Liuna avalua o me lo ateva erati isaa o inangari niloeloe, karika va eratirati taumattu, ta eratirati God, ia etautau aatu kapuna Spirit Manga ateva.

⁹ Me tani ailousiaa mene katoa tau ngaisoaa, karika righi uunguaimami tani mene pitipiti me auliaa etaimim, poli God ang ghe apasungaala etaimim vaalua tani aielousiaa mene kateva. ¹⁰ Me koronnaaili, am, am aielousiaa kapuita akapa atoa eMesedonia, me, kapuimami etoa, ami mene aulia ngasarasarakaneta tani gheleiem va am toka tale ia o ase nitoka ateva nau ekapa atoa.

¹¹ Am gheleia va ekateva voto namuu ia tale maamauluuaaimim tani toka tale luei, me am annaa nonga uunguaimim, me am ungu aanasa nongina ami ghe auliala etaimim. ¹² Me aue tokatokaaimim tale nau ekapa aue lo atoa eleka la oneoneainam, me am rau mene nim toka, me am anna va katoa la ghelei tau aatu voto am aaloanna.

Maemaeaane Vau ngepona ateva

¹³ Kapuimami etoa, ami anna va am kila sa ateva aue elutu ta lo atoa la nim aseasekanua tale nimate, me aue am tam alousiusi nongina taumattu ngakapa atoa poli karika la kilakila va mene teva maulue auena. ¹⁴ Ita aiesoaa va Iesu ghe matela me ghe mene totula, me ita aiesoaa tee va God aue emaeaa Iesu tee lo atoa laghe asekanuela tale aikaaiaira ta Iesu. ¹⁵ Nongina inangarina Vau ngepona ateva, ami aauliaa etaimim va lo atoa ita tokatoka, karika ita ghe mate me Vau

4:3: 1 Tes 5:23; 1 Pita 1:16. **4:4:** 1 Ko 6:13. **4:7:** 1 Pita 1:15-16; Hib 12:14. **4:8:** Luk 10:16; 2 Ko 1:22. **4:9:** Jon 13:34. **4:11:** Ips 4:28. **4:14:** Rom 14:9; 1 Ko 15:3-4, 12. **4:15:** 1 Ko 15:51-52.

ngepona ateva aue emae, karika aue ita kasu ekasina ta lo atoa la aseasekanua. ¹⁶ Ta ia Vau ngepona ateva Iesu aue ekasu epona liu me aue ekolokolo atingina, me tee lingi ngalona ateva kapuira namu ngateva ensolo atoa, me nikolokolo ateva tale unna taue ateva God, me lo atoa laghe aikaaiaala ta Iesu me laghe matela aue la totu ekasina. ¹⁷ Vara me lo atoa ita tokatoka, karika ita ghe mate, aue ita sae aitauaa teeila tale urukookoo tani sou Vau ngepona ateva elomarase, me aue ita toka tee Vau ngepona ateva nau ekapa atoa. ¹⁸ Liuna avalua o me am aippooaa tale inangari niaisausi tale kateva kateva etaimim tale isaa oia inangari tale maemaeaane Vau ngepona ateva.

5

¹ Me, kapuimami etoa, tale nau eteva isaa o voto aue elutu, karika righi uunguaaimami tani mene pitipiti. ² Poli am kilakilaaili va nauna ateva Vau ngepona ateva aue emae nongina tau niainao ateva eleivoo. ³ Nau eteva taumattu ngatoa la ue va, “Ami tokatoka tale luei me aue ami saanga,” me aue la nim soghi, ta nitturu sesa aue elutu etaira, nongina vause ateva emoomolena eghaaghaa nimmarikana, me karika poi aue la saanga.

⁴ Me am, kapuimami etoa, karika va am tokatoka tale saurrom, va ia o nau eteva aue eghelei esoghisoghiem nongina tau niainao ateva. ⁵ Am akapaaaili natuirarua am mallanga ateva me llaa ngateva, karika va ita tale voo ngateva me saurrom ateva. ⁶ Liuna avalua o me karika ita mene ghelei nongina katoa la aseasekanua. Ita, ita anguu taatara, me nannaaita emasalike. ⁷ Lo atoa la aseasekanua, la aseasekanua eleivoo. Me lo atoa la ropiropi sesa manu, la ropiropi me la veevee eleivoo. ⁸ Me poli ita tau ngellaa ita, nannaaita emasalike. Nongina ita aasae sioto ateva, ita atoka niaakaiaa me niaielousi, nongina kapa aisou vaalau eteva eaakou kassauita ateva, me nitaatara lao emua tale nisaanga enongina kou nguru eteva, gheeleia tale kapa. ⁹ Ta karika God ghe suitoongaintala va ita ghaa sessaiaane, ta nisaanga ta kapuita Vau ngepona ateva Iesu Karisto, ¹⁰ ghe matela etaita, liuna avalua o me arova maulue ita o matena ita, aue ita toka aitauaa teeia. ¹¹ Liuna avalua o me am asarasarakana kateva kateva etaimim, me am aisueieinam, nongina am gheelei.

Airuuruu tale inangari niloeloe

¹² Me ami loeloeam, kapuimami etoa, tani oneoneaa lo atoa la unguru aanasa elome etaimim, me la ghaaitoieinam ta Vau ngepona ateva, me la ghaauliaa kieimim tale voto. ¹³ Am oneoneainila me am aielousieinila poli uunguaaira. Am toka tee kateva kateva tale luei. ¹⁴ Ami aasarasarakanaiem, kapuimami etoa, tani auliaa kieira lo atoa ngila tokatoka me karika la unguru emasina, me am ppooaa inangari nissausi ta lo atoa ngila laa siosio euu tale ninannaa, me am sausi lo atoa ngila saasaghuihuina, me erau mene sessai parasiem tale taumattu ngakapa atoa. ¹⁵ Am tara va karika teva emene liu sesa tale sesa. Nau ekapa atoa am tootoonga tani masina tee mene kateva etaimim, me ta ila akapaaaili taumattu ngatoa.

5:2: Mat 24:42-43; 2 Pita 3:10; Aotu 3:3. **5:3:** Mat 24:39; Luk 21:34-35. **5:5:** Rom 13:12.

5:8: Ais 59:17; Ips 6:14, 17. **5:10:** Rom 14:8-9; 1 Tes 4:14. **5:14:** 2 Tes 3:6, 11. **5:15:** Rom 12:17; 1 Pita 3:9.

¹⁶ Nau ekapa atoa am masimasi, ¹⁷ am looloo sae nau ekapa atoa, ¹⁸ am kaili emasina tale isaa akapa ase voto, ta aloaloannaane God etaimim isaa avalua o ta Karisto Iesu.

¹⁹ Am rau mene ghelei epala Spiriti eteva. ²⁰ Am rau mene rati inangarina ateva God propete atoa la ghaaulieinia etaimim. ²¹ Am tootoonga isaa akapa inangari o, me am poso parasi llo masina. ²² Am akekkeliem tale isaa akapaaili asease voto sesa.

²³ Aue ia God, God ia tale luei, eamanga akapa maamauluuaimim. Me aue spiriti eteva etaimim, me maamauluuaimim, me vilikiimim, lotolu ekapa lotolu ghulughuluena, nau Vau ngepona ateva Iesu Karisto emae. ²⁴ Lo ateva ekolokoloam, am rooroo tani atoka tuutuliihim etana, me ia aue eghelei isaa o voto.

²⁵ Kapuimami etoa, am looloo sae mausuumami. ²⁶ Am sou kapuita akapa atoa tale niaielousi eteva manga ia.* ²⁷ Aghaulia ngasarasarakana etaimim ta matane Vau ngepona ateva tani riti ia oia uru ngai etikirighi ta kapuita akapa atoa.

²⁸ Ami looloo sae va aue maamasinaane Vau ngepona ateva Iesu Karisto etoka teeiem.

5:16: Plp 4:4. **5:18:** Ips 5:20. **5:19:** Ips 4:30. **5:21:** 1 Jon 4:1. **5:23:** 2 Tes 3:3.

5:25: Kol 4:3; 2 Tes 3:1. * **5:26:** tale niaielousi eteva manga ia Tale inangari nge Grik, tale niaingusu manga ia.

Aiaaghaluene atikirighi uru ngai Pol ghe pitiela ta aTesalonika ngatoa Inangari emuemua

Pol ghe pitila aiaaghaluene atikirighi uru ngai ghe lao sio tale ale manga ateva eTesalonika tani ghelei emasalika kasina voto tale nau eteva Iesu aue emene mae. Katoa karika laghe kila amasina isaa o voto koronna ia, poli katoa tau ngai aapasunga laghe auliaala va Iesu ang ghe mene mae sio. Mene katoa laghe nnaala va karika la mene uungu, poli ghaisa ngarighi Iesu aue emene mae.

Tani kila amuemua

Aitiutiu tale inangari 1:1-2

Tani toka akorokorongana tale nau sesa 1:3-12

Tau ngai ghelei saasakiaa inangari nipaopao ateva me maemaeaane Iesu 2:1-17

Vaalua tani toka nau am toitoi maemaeaane Iesu 3:1-15

Airuuruu tale inangari 3:16-18

¹ Aghi Pol, Saelas me Timoti,

Ami pitipiti aatu ta taumattu ngatoa tale ale manga ateva ona eTesalonika tale ararina ataeae God Tamaita ia me Vau ngepona ateva Iesu Karisto.

² Ami looloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Iesu aue esio me etaula aipolipoli ta kapuna atoa

³ Uunguaaimami tani kaili emasina ta God nau ekapa atoa mausimim, kapuimami etoa, me emaamasina tani ghelei isaa o llo voto, poli aikaaiamim epiipinosa anamuu nau ekapa atoa, me niaielousi eteva ta kateva kateva etaimim egheelei elao ta mene kateva ange ooroi. ⁴ Liuna avalua o me elome tale alena ale manga akapa God, ami aasakeea vaalua karika am maamangoo tani ghelei voto masina, me aikaaiamim tale isaa akapa nitootoonga me nimmarikana am ghaaghhaa me am tiitingina akorokorongana.

⁵ Isaa o voto eaapasunga va unna niaiskei God ghulughuluena tale isaa o voto, me God aue iraiem va masina am tale ararimangalina ateva, am mammarikana mausi ia o ararimagalina ateva. ⁶ Nongina nighulughuluena ta matane God va eliu voto sesa ta lo atoa la gheelei voto sesa etaimim, ⁷ me aue etau aatu niainoana etaimim lo atoa am ghaaghhaa voto sesa, me etaimami tee. Isaa o voto aue elutu nau Vau ngepona ateva Iesu ekauerekati epona liu, tale kura ataeae eramerame, tee kapuna ensolo atoa sarasarakananaili ila. ⁸ Aue eliu voto sesa ta lo atoa karika la kilakila God me karika la nonganongo usilaa masi kiukiuna kapuita Vau ngepona ateva Iesu. ⁹ Aue la ghaa aipolipoli tale voto sesa etaira, tale nitturu eteae tokatoka liu ia, me Vau ngepona ateva aue tiu vella tale taataraane me tale kinatama mallangina ateva ¹⁰ tale ia o nau eteva aue emae, ita kapuna taumattu ngatoa manga ita,

ita asaesae ararina atae, me lo atoa la aiesoaa etana la gharueinia. Am tee aue am toka tee lo atoa la aiesoaa ta Iesu, poli am aiesoaa inangariimami etaimim.

¹¹ Poli isaa o voto etokatoka tale nannaaimami, me nau ekapa atoa ami looloo sae mausiiimim, va aue God esausiem tani ghelei voto ghe koloamla tani ghelei, me tale sarasarakaniaane aue am ghelei ekapa isaa o masi voto am aloanna tani ghelei, me isaa akapa gheeleiaaimim am gheelei mausi tale aikaiaaimim. ¹² Ami looloo sae va isaa o voto elutu me aue ararina atae kapuita Vau ngepona ateva Iesu am aamuemueia etaimim, me am etana, tale maamasinaane kapuita God ateva me Vau ngepona ateva Iesu Karisto.

2

Tau ngai ghelei saasakiaa inangari nipaopao ateva

¹ Me tale maemaeaane kapuita Vau ngepona ateva Iesu Karisto, me nivelu eitauua ita gheelei etana, ami kookolomiem, kapuimami etoa, ² tani rau mene nnangaili me emoiem tale taumattu la ue va nauna ateva Vau ngepona ateva ang ghe mae sio. La ghele ue va laghe nongoala tale inangari niaulia ngamuemua, o inangari laghe nongola, o inangari tale uru ngai taataraane va ghe kasula etaimami. ³ Am rau mene tau velu teva taumattu va ekameam tale teva ase salana, poli ia o nau eteva karika aue emae lomose ta nioghi vulu masi voto emae mua, me tau ngai ghelei saasakiaa inangari nipaopao ateva* aue eotua, lo ateva elao lao tale salana nitturuu. ⁴ Aue eghelei runga salane God, me aue easaesaea tale voto akapaili manga, me aue etoka tale alena ale manga ateva God, me aue eue va ia Goto ia.

⁵ Koti am ghe kkaluaala va nau aghe tokatoka teeiem aghe aauliaa isaa o voto etaimim. ⁶ Me ia oia am rooroo tani kila va sa ateva egheelei rungainia, me aue vira otua tale nau eteva ang ghe suuela. ⁷ Ta ia o tau ngai ghelei saasakiaa inangari nipaopao ateva ange tiuaala tani apasunga uunguua sarasarakaniaane ghe aaisuliah, me lo ateva egheelei rungainia aue etoka gheelei rungainia, lomose ta God aue eghaa velua. ⁸ Vara me aue eotu tau ngai ghelei saasakiaa inangari nipaopao ateva, Vau ngepona ateva Iesu aue uvi ematea tale aulao paane ateva, me eturungia tale mallangi maemaeaane ateva. ⁹ Maemaeaia ia o tau ngai ghelei saasakiaa inangari nipaopao ateva aue elao aitauua tee sarasarakaniaane Satana, me aue eapasunga tale asease sarasarakania, niaimatoonga me mirikolo kamena, ¹⁰ me isaa akapa ase voto sesa tani kame lo atoa aue eraula. Aue eraula, poli laghe ratila tani aielousiaa koronna kiukiu kannia God me aue la ghele saanga. ¹¹ Liuna avalua o me God aue eghelei savisavilaa nannaairaa, me aue la aikaiaiaa tale llo kamena. ¹² Liuna avalua o me God aue eghelei niaisakei etaira, poli karika laghe aaiesoaa tale llo koronna, ta laghe masimasiaa llo sesa.

Inangari niaisausiaa tani tingina akorokorongana

1:11: Kol 1:9; 1 Tes 1:2-3. **2:3:** 1 Tim 4:1; 1 Jon 2:18; 4:3. * **2:3:** tau ngai ghelei saasakiaa inangari nipaopao ateva Katoa uru ngai laghe pitila, la ghe pitila va tau ssavoto ateva. **2:4:** Den 11:36; Esik 28:2. **2:8:** Ais 11:4; Aotu 19:15. **2:9:** Aotu 13:11-13.

¹³ Uunguaaimami tani kaili emasina ta God nau ekapa atoa poli mausiiimim, kapuimami etoa, Vau ngepona ateva eaailousieinam. Ami kaakaili emasina ta God ta poli aitiutiu God ghe suoongainamla va am saanga tale uunguaane Spiriti eteva, tani manga poli am ghe aiesoaala tale koronna kiukiu kannna God. ¹⁴ Ghe koloamla tani saanga tale masi kiukiu ami ghe poppooaa, liuna avalua o me am tee aue am ghaa mallangina ateva kapuita Vau ngepona ateva Iesu Karisto. ¹⁵ Liuna avalua o, kapuimami etoa, me am tingina akorokorongan, me am poso parasi voto ami ghe apasungaala etaimim, tale inangari am ghe nongola ta paaimami me tale uru ngai ami ghe pitila.

¹⁶ Aue ia kapuita Vau ngepona ateva Iesu Karisto, me God Tamaitia ia, ghe aielousieinala, me tale maamasinaane ghe tau mae sio inangari niasarasarakana tokatoka liu me masi voto emua etaita, ¹⁷ easarasarakana urunguitaniimim, me eaisausieinam tani ghelei isaa akapa masi niuungu me inangari.

3

Pol ghe kolomila tau ngaisesoa ngatoa tani looloo sae mausiira

¹ Liuna avalua o, kapuimami etoa, me am looloo sae mausiiimami, me aue inangarina Vau ngepona ateva ekasu parasi ekapa see, me la oneoneainia nongina am, am ghe oneoneainia. ² Me am looloo sae va God eghaa oghiemami tale sesa taumattu ngatoa la gheelei voto karika masina, ta poli karika va taumattu ngakapa atoa la ghaaikaiaia ta God. ³ Me Vau ngepona ateva egheelei voto ghe uela va egheelei, me aue easarasarakanaiem, me egheelei rungainam ta sesa taumattu ngateva. ⁴ Ami aatoka tuutuliiimami ta Vau ngepona ateva va am toka gheelei voto ami ghe aulia ngasarasarakanala etaimim, me aue am toka gheelei isaa o voto. ⁵ Aue Vau ngepona ateva ekatula ngaghulughuluena urunguitaniimim tani lao tale ailousiaane ateva God me nitingga asarasarakana ta Karisto.

Niaulia ngaotu tale uungua tani nim toka

⁶ Tale ararina ateae Vau ngepona Iesu Karisto, ami aaulia ngasarasarakaneta etaimim, kapuimami etoa, va am kasu emasalika ta lo atoa kapuita la nim tokatoka me karika la uusilaa inangari am ghe ghaala etaimami. ⁷ Poli am kilakila vaalua tani uusilaa gheeleiaaimami, karika ami ghe nim tokatoka nau ami ghe tokatoka teeiem. ⁸ Karika ami ghe nim namanama inana ta teva taumattu, ta ami ghe polipoli, me ami ghe uungu aanasa eleivoo me ellaa tani gheelei va ami rau mene taula maate ta teva etaimim. ⁹ Ami ghe gheelei llo, karika va poli karika masina etaimami tani gheelei, ta ami ghe anna va ami ghe apasunga voto am aimuli tee. ¹⁰ Nau ami ghe tokatoka teeiem, ami ghe aulia ngasarasarakanala etaimim va, “Lo ateva taumattu etam aloanna tani uungu, erau mene namanama.”

¹¹ Ami nongonongo va katoa elome etaimim la nim tokatoka, karika la uungu me la nim toka aauliaa uunguaaira katoa. ¹² Isaa o ase taumattu ami aulia ngasarasarakan, me aaloannaaimami tani auliaa etaira tale ararina ateae Vau ngepona ateva Iesu Karisto, va la toka rarieinila me

la nama inana la uunguaa. ¹³ Me ta ngetaimim, kapuimami etoa, am rau mene mangoo vulu tani ghelei voto masina.

¹⁴ Arova teva etam nongo usilaa inangari niloeloe ami aauliaa tale uru ngai etikirighi oia, am tani tara tootoongainia me am rau mene ghuia, tani attara mataneia me epalata. ¹⁵ Me am rau mene taraia va tau ngai ssateeimi ia, ta poli kapuita ia, am auliaa kienia.

Pol ghe arangiseilala

¹⁶ Isaa oia, aue Vau ngepona ateva luei ia, ia aue tau aatu luei nau ekapa atoa me tale isaa akapa salana. Vau ngepona ateva aue etoka aitaua ngakapa teeiem.

¹⁷ Aghi Pol apitipiti isaa oia inangari niarangise tale nimaghi etelange, me ia oia niaimatootoongana ateva etokatoka tale isaa akapa uneghi uru ngai apitipiti, tani apasunga va aghi aghe pitila.

¹⁸ Alooloo sae va aue maamasinaane kapuita Vau ngepona ateva Iesu Karisto etoka teeiem akapaaili.

Aitiutiu etikirighi uru ngai Pol ghe pitiela ta Timoti Inangari emuemua

Pol ghe soula Timoti tale unna aiaaghaluene ateva nikasu, me ghe koloala tani mae aitauaa me euungu eitauaa teeia (Apostolo 16:1-3). Timoti ghe usila Pol, me lalu ghe uungu eitauaala oroi ninamanama. Tale nau eteva Pol ghe pitila ia oia uru ngai etikirighi, Timoti ghe tokatoka eIpises, me ghe muemueaa ale manga ateva okae.

Pol ghe aloannala tani akorokorongana Timoti me tee tani tau lao kasina niloeloe tale voto atoa laghe lutula tale ale manga eIpises. Ghe pitila voto tale nilooloo sae, vaalua tani aimatoonga elda ngatoa me rikina atoa, nisausi ta vause raue vulu etoa, vaalua tani nnaa ta lo atoa karika la tokatoka tale aloannaaira, me vaalua tani nnaa tale viliki veu.

Tani kila amuemua

Aitiutiu tale inangari 1:1-2

Pol me Timoti 1:3-20

Vaalua tani kkaua ngakoronna tale ale manga 2:1-4:16

Vaalua taumattu ngatoa la tani toka 5:1-6:2

Inangari niloeloe ta Timoti 6:3-20

¹ Aghi Pol, kapuna apostolo ieghi Karisto Iesu ta niaulia ngasarasarakanana ta God tau ngai asaangiita ia me Karisto Iesu ita aatoka tuutuliita etana.

² Ta Timoti natughu koronna io, ta poli unem niaikaiaia.

Alooloo sae va God Tamaita ia me Karisto Iesu kapuita Vau ngepona ia lalu tau aatu maamasinaane God me alousiusiaane me luei.

Upanio tale lo atoa la aapasunga kamena inangari

³ Nongina aghe auliaala etam nau aghe anna tani lao eMesedonia, va utoka eIpises me uaulia ngasarasarakanana ta kasina taumattu va la rau mene apasunga kamena inangari, karika va inangarina God.

⁴ La rau mene tau vella va la lao tale uunguua kiukiu marripana me tani kila lao tuvuira atoa emua arau. Isaa o voto eaalakuti uunguua niaikiso me karika egheelei uunguaane God tale niaikaiaia.

⁵ Malloeana isaa o niaulia ngasarasarakanana va niaealousi ekasukusu tale lo ateva urunguita raarangisana ia, me ninannaa masalike me niaikaiaia koronna. ⁶ Katoa taumattu ngila ghe kasu vulila isaa o voto me ngila ghe kirila tani laa usilaa inangari karika righi malloeane. ⁷ La ghanna tani tau ngai aapasunga tale inangari nipaopao, me karikaaili la kilakila sa ateva la ghaulieinia.

⁸ Ita kilakila va inangari nipaopao masina arova teva taumattu eapasinga ngamasina voto etana. ⁹ Ita kilakila tee va, karika God ghe tau mae sio inangari nipaopao mausi ghulughuluena atoa taumattu. Ghe tau mae sio mausi lo atoa la gheelei saasakiaa inangari nipaopao me lo atoa la ghaamakatakata, me lo atoa karika la oneoneaa God me tau ssavoto ila, me karika manga ila, me karika la kakkauaa, me uneira lo atoa la uviuvi emate tamaira me kinaira atoa, me lo atoa la ghaiuuvi emate, ¹⁰ me lo atoa la ailai salosalooaa, me lo atoa taita la asoaso tee

mene katoa taita, me lo atoa la ainao taumattu, me tau nikamekame atoa me lo atoa la kamekame tale niaisakei, me mene saa righi llo etam laolao aitauaa tee inangari koronna. ¹¹ Isaa o voto eaasokoi tale masi kiukiuna God ghe tau mae sio etaghi. Ia o masi kiukiun ghe mae sio ta masi God ateva taumattu ngatoa la tautaue sae.

Maamasinaane Vau ngepona ateva ta Pol

¹² Akaakaili emasina ta Karisto ateva Iesu, kapuita Vau ngepona ia, ghe tau mae sio sarasarakan me ghe taraiaghila va arooroo tani ghelei emasina uunguaane, me ghe suitoongainaghila va aghelei. ¹³ Arongona ta emua arau aghi aghe poppoaa saasakiaa tee God, me aghe uvivi tau ngaisesoa ngatoa, me ssa taumattu ngaghi, Karisto ghe apasungaala alousiusiaane etaghi poli aghe gheelei voto karika aghe kilakila va sesa, me karika aghe aiesoaa. ¹⁴ Maamasinaane kapuita Vau ngepona ateva ghe arangise amasinaailieghila, oroieili tee niaikaaiaa me niaielousi isaa ta Karisto Iesu.

¹⁵ Kateva inangari koronnaaili ia, erooroo va ita ghaaia, eue va, Karisto Iesu ghe mae sio tale kosa ateva oia tani asaangi tau ssavoto atoa, me ta ila o sesa taumattu ngatoa aghi tani sesaaili ieghi etaira akapa. ¹⁶ Poli aghi sesaaili ieghi, liuna avalua o me God ghe apasungaala alousiusiaane etaghi, me ta ngetaghi ssa taumattu ngaghi, Karisto Iesu ghe apasungaala vaalua toitoiaane aluse karika airuuruu etana, tani aimatoonga ta lo atoa aue la ghaisoaa etana, me la ghaa maulue ateva tokatoka liu ia. ¹⁷ Tale kingi eteva tokatoka liu ia, karika ematemate me karika ita taataraia, ie nongaaili Goto ia, ita oneoneainia me ita taue sae nau ekapa atoa. Koronna.

¹⁸ Timoti, natughu, aloeloeo tale isaa oia inangari elaoalo aitauaa tee niaulia ngamuemue laghe gheleila etam. Me nau uaimuli tee aue uaiuvii emasina tale unna niaiuvi eteae Vau ngepona ateva. ¹⁹ Uposo parasi tale niaikaaiaa me tale masalike ninannaa. Katoa laghe ratila isaa o voto me aikaaiaairang ghe sesala. ²⁰ Tale ia o ase taumattu ngateva, Aemenaeas me Aleksanda elome etaira. Ngaghe taulalue lao sio ta Satana tani apasunga etairarua va lalu rau mene ppooaa saasakiaa ta Vau ngepona ateva.

2

Uunguua nikkauaa

¹ Agahaaulia ngasarasarakan va aitiutiui tale isaa akapa voto, isaa akapa nilooloo sae me nikaili emasina ita gheelei ta taumattu ngakapa, ² ta kingi etoa me ta lo atoa la uungu tale niuungu matuutuliena, va aue ita toka tale luei me karika nimatautu, tale salane God me tale nimanga. ³ Isaa o voto masina me eaamasimasi God tau ngai asaangiita ia. ⁴ Eaanna va taumattu ngakapa esaanga me la ghaa alomasaanga tale voto koronna. ⁵ Poli kateva nonga ia God ateva, me kateva nonga ia tau ngai sausia ngateva elome ta God me taumattu. Ia o taumattu ngateva Karisto ia, Iesu etana. ⁶ Ghe tau lao sio maamauluane tani poli aaoghi isaa akapa taumattu. Isaa o inangari koronna ghe tau mae sio tale nauna tuunga ateva. ⁷ Tale mausi llo me God ghe suitoongainaghila va

1:12: Apos 9:15; Gal 1:15-16; 1 Ko 15:9-10. **1:13:** Apos 8:3; 9:1-5. **1:15:** Luk 19:10.

1:20: 2 Tim 4:14-15; 1 Ko 5:5. **2:6:** Rom 3:29-30; Gal 1:4. **2:7:** Apos 9:15; Gal 2:7-8; 2 Tim 1:11.

tau ngai ppooaa ieghi me aghapostolo me tau ngai aapasunga ieghi tale koronna niaikaaiaa ta lo atoa karika ajiu ila. Aghaaulia ngakoronna, karika akamekame.

⁸ Liuna avalua o me aghanna va taita akapa atoa tale isaa akapa voto la ssuuaa sae nimaira manga tale nikokkolomi me karika emene sessaila o la ghaikiso.

⁹ Tale isaa o salana, aghanna va vause atoa la molu tale ase nimolu emasina tale tummatavanga me taatara taumattu. Karika va tani rungiaa viliki veu tani poli asease voto tani ghelei emasina taatara uu nguruira o tani asae gol o pels o ghinna aipolina isaa arau epona. ¹⁰ Me tani molu tale niuungu masina, isaa o voto masinaaili ta lo atoa vause la ue va la kakkauaa God.

¹¹ Vause ateva ekila voto tale uunguaa nimatua ngatoka me tani nongo inangari me tani oneoneaa lo ateva eaapasunga. ¹² Karika aghanna va vause atoa la ghapsunga, o la ghelei niuungu sarasarakanan tani lau taita atoa. Ila la nim matua atoka. ¹³ Poli God ghe ghelei ekasinala Adam me avirina Ivi. ¹⁴ Me karika va Satana ghe kamela Adam ta ghe kamela vause ateva me ghe tau ssavotola. ¹⁵ Me vause atoa aue la saanga poli la kaakaai aliki, arova la tam mangoo vulu niaikaaiaa, niaielousi me nimanga tee tale taatara taumattu.

3

¹ Kateva inangari koronnaaili ia, lo ateva ange annaala tale urunguitanina ateva va e-elda, ange nnaala niuungu eteva nioneoneaa etana. ² Ia o elda ngateva karika mene sesa gheeleiaane, me ekateva nonga vausenna ateva, me aue eapasinga va eaitaraa tokatokaane, taumattu ngatoa la oneoneainia, me eaaitaraa taumattu nau la laolao tangantuena, me tau ngai aapasunga ia, ³ karika tau niropi ia, me karika tau nisessai ia, ta ennaa mene kateva, me karika eaaikiso me karika eaielousiaa viliki veu. ⁴ Etani aaitara ngamasina vausenna ateva me natuna atoa, me etara va natuna atoa la nongonongo usilainia me la gheelei masi nioneoneaa etana. ⁵ Arova teva taumattu karika ekilakila vaalua tani aitaraa vausenna ateva me natuna atoa, vaalua aue eaitaraa alena ale manga ateva God? ⁶ Karika va evira mene aikolikoliaa, ta erau tau sae nannaane, va ekatuu va eghaa niaiskei nongina raroai eteva. ⁷ Tau ngeleka atoa la tani oneoneainia me erau mene katuu lao tale voto karika masina me tale unna airrekatii eteae raroai eteva.

⁸ Rikina atoa ila tee taumattu ngatoa la oneoneainila, me karika tau nikamekame ila, me karika la ropiropi sesa manu, me la rau mene kuruetu tale viliki veu. ⁹ La poso parasi voto eaaisulia tale niaikaaiaa, tee tale ninannaa masalike. ¹⁰ La toongila mua me arova karika righi voto sesa la tara etaira, erooroo va la rikina. ¹¹ Tale isaa o salana, vauseniira* tee atoa, taumattu ngatoa la oneoneainila. Karika va tau nighalei saasakiaa taumattu ila tale inangariira, ta la aitaraa tokatokaairia me tale isaa akapa voto ita rooroo tani atoka tuutuliita etaira. ¹² Rikina ateva evausenna nonga kateva me etani aitara ngamasina natuna atoa me lo atoa la tokatoka tangantuena. ¹³ Lo

2:9: 1 Pita 3:3-5. **2:10:** 1 Tim 5:10. **2:12:** 1 Ko 14:34. **2:13:** Aitiutiu 2:7, 21-22; 1 Ko 11:8-9. **2:14:** 2 Ko 11:3; Gal 3:1-6. **3:1:** Apos 20:28. **3:2:** Tts 1:6-9. **3:7:** 2 Ko 8:21.

3:11: Tts 2:3. * **3:11:** vauseniira o rikinesi etoa.

atoa la uungu emasina, la ghaaghhaa nioneoneaa me la sarasarakanaili tani auliaa aikaiaaira ta Karisto ateva Iesu.

¹⁴ Arongona ta aghaairesoaa va ghaisa ngarighi amae taraiem, apitipiti isaa oia inangari niloeloe ¹⁵ me arova atam mae parasi, aue ukila vaalua taumattu ekasu me euungu tale tau ngaisesoa ngatoa, kapuna ila Goto ateva etokatoka liu. Ale manga ateva suena ia me voto koronna etokatoka saoaa etana. ¹⁶ Koronnaaili, voto aisuliaane emua arau tale salane God namungaili:

Ghe rekataala taumattu ia

me Spiriti eteva ghe apasunga ngamasalikala va ia Natuna ia God.

Ensolo atoa laghe taraiela

me apostolo atoa laghe ppooainiela tale anue namu ngatoa.

Taumattu tale kosa ateva laghe aikaiaala etana,

me God ghe ghaiae saela epona liu.

4

Inangari niloeloe Pol ghe auliaala ta Timoti

¹ Spiriti eteva ghe aulia ngamasalikangailila va tale isaa oia nau me nau too emaemae, katoa aue la kasu vuli niaikaiaia me la usi raroai etoa tau nikamekame ila me voto raroai etoa la ghaapasunga. ² Isaa o ase niapasunga emaemae ta usimagalua atoa tau nikamekame ila. Nannaaira karika eroo tani kila voto masina me sesa. ³ La gheelei runga taumattu ngatoa va la rau mene lai, la ue va la rau mene nama kasina ase nginana, God ghe gheleila me pei ninama tee nikaili emasina ta lo atoa la ghairesoaa me la kilakila llo koronna. ⁴ Isaa akapa voto God ghe gheleila, masina, me karika ita mene rati righi ase nginana arova ita ghaa tee nikaili emasina. ⁵ Poli God eaamangaia tale inangarina ateva me tale uneita nilooloo sae.

⁶ Nau uauliaa isaa o voto ta kapuita atoa, io aue umasi tau ngai uungu ta Karisto Iesu, nau uanginio tale voto kanna God tale inangari niaikaiaia me tale niapasunga koronna uaimuli tee. ⁷ Urau mene aimuli tee kiukiu marripana me kiukiu kaluira vause namu ngatoa, karika la oneoneaa God. Ta ugheleio nonga tani ghaa gheeleiaane God. ⁸ Poli niaimatoonga tale nianamisi masina, ta egheelei emasina vilikiita, me gheeleiaane God esausio tale isaa akapa voto me egheelei inangari nialokoi tale maulue ateva ghaine me auena.

⁹ Kateva inangari koronnaaili ia, erooroo va ita ghaaia. ¹⁰ Mausi isaa o voto me ita uungu tale niaanasa me niasaraka me ngita ghe atokala tuutuliita ta Goto ateva etokatoka liu. Ia tau ngai asaangi ia ta taumattu ngakapa atoa, me tani lo atoa la ghairesoaa.

¹¹ Uapasunga isaa o voto me uaulia ngasarasarakanetaira va la nongo usilaa. ¹² Utingina asarasarakana tale voto koronna. Urau mene gheleli va taumattu ngatoa la tara aloio sio euu poli aliki taita io. Utau niaimatoonga ta tau ngaisesoa ngatoa tale inangari, tale gheeleiaam, tale niaielousi, tale niaikaiaia me tale niraarangisana. ¹³ Uatoka maamauluuaam tani ritu Uru ngai Manga ateva tale tummatavanga, tani ppooaa me tani apasunga, me auena amae. ¹⁴ Urau mene rati voto God

ghe nim tau aatu sio, ughe ghaala tale inangari kanna God nau elda ngatoa laghe saoaala nimaira etam.

¹⁵ Utani uungu esasarakanana tale isaa o voto. Utauo lao akapa tale isaa o voto me ila akapa aue la tara uunguaam ugheelei. ¹⁶ Utani aitokaa tee maamauluaam me tale voto uapasunga. Arova utam oghi vulu isaa o voto, aue easaango me lo atoa tee la nongonongoio.

5

Uunguaane Timoti tale tau ngaisesoa ngatoa

¹ Urau mene sama anamuun tee taita namu ngateva me esessaio etana, ta uloea tani asarasarakanaia nongina va tamam ia. Ughelei aliki taita atoa va tue me nenga iem, ² vause namu ngatoa va kinam ila, me aliki vause atoa va kapum vause ila. Ughelei isaa o llo voto tale niraarangisana.

³ Utani aitara ngamasina lo atoa vause raue vulu ila karika poi righi aisausiira. ⁴ Me arova vause raue vulu eteva righi natuna o tuvuna, ila la kila akasina tani apasunga aikaaiaairaa tale uunguaa nikkauua tani aitaraa lo atoa kalakalangina ila etaira, tani liu aitaraa kinaira me tamaira me tuvuira atoa etaira, poli isaa o voto God emasimasia. ⁵ Lo ateva vause rae vulu ia etuutukuna tale voto ealoannaaili me karika toa tani aitarainia, eaatoka tuutulina ta God me eloooloo sae voo me llaa tani kolomi niaisausi ta God. ⁶ Me lo ateva vause rae vulu etokatoka tani amasimasia, ang ghe matela arongona ta sakesake ia. ⁷ Utaula ta taumattu ngatoa isaa oia inangari niloeloe me karika teva taumattu aue eroo tani auliaa saasakiaa teeila. ⁸ Arova teva taumattu karika eitaraa mangalina atoa me tee tamane me kinna me tuena me nengane atoa me natuna atoa, ang ghe ratila niaikaiaia me sesaane elaulau lo atoa karika la ghaiesoaa.

⁹ La piti sio arariira lo atoa vause raue vulu ila aneira ninamanama ang ghe laula ghaonomongauluae (60), me laghe tokatoka amasina tee taitaniira atoa, ¹⁰ me laghe kilakila akapaila tale masi gheeleiaaira, nongina aitaraaира tale aliki, me masinaaili ila tani aitaraa taumattu ghe laolao tanganueira, me laghe porapora kkeira kapuna taumattu ngatoa God, me laghe saasausi lo atoa laghe tokatoka tale sesa nau, me laghe tautau lao maamauluaaira tani ghelei isaa akapa asease masi niuungu.

¹¹ Lo atoa raue vulu aliki vause ila, urau mene piti sio arariira va raue vulu ila, poli aaloannaaira tani lai namungaili me elaulau inangari nialokoi laghe gheleila ta Karisto. ¹² Isaa avalua o me aue la aisakei poli karika la ghelei llo laghe auliaala tale inangari nialokoi va la ghelei. ¹³ Me tee la nim toka ghelei kateva ase voto tani nim toka me la paapaangale me karika nonga va la nim tokatoka ta la ghaikusia me la nim toka auliaa uunguaairaa katoa. La ghaauliaa voto karika masina va la ghauliaa. ¹⁴ Liuna avalua o me atautaula masi ninannaa ta aliki vause atoa raue vulu ila va la mene lai, me la ssu aliki, me la ghaitaraa tanganueira, me karika aue la taula righi nauna tau ngai ssateeita atoa tani auliaa saasakiaa teeila. ¹⁵ Katoa ngila ghe kirila tani aimuli tee Satana.

¹⁶ Arova teva vause tau ngaisesoaa ia, me toa raue vulu la tokatoka teeia, eitaraainila me esausila tani ghelei me ale manga ateva erau

mene maate. Me ale manga ateva ae esausi nonga lo atoa vause raue vulu ila la tuutukuna tani ghaa aaloannaaira.

¹⁷ Lo atoa elda la gheelei emasina uunguaa ale manga ateva, la taula namuu nioneoneaa, tani lo atoa uunguaaira tani ppooaa me apasunga.

¹⁸ Poli Uru ngai Manga ateva eue va, "Nau vulumakao ateva euungu tani ghaa velu viliki raisi, am rau mene ghelei runga paane ateva va karika emene nama isaa o raisi," me, "Emaamasina va tau ngai uungu eteva eghaa aipolipoli tale uunguaane egheelei." ¹⁹ Urau mene nongo teva taumattu eauliaa tee teva elda. Arova evira ghalua o kotolu taumattu la vira auliaa teeia ta ie nonga o voto ateva. ²⁰ Lo atoa la gheelei sesa voto, usama anamuu teeila tale tummatavanga, me mene katoa elda ae la matautu tani ghelei sesa voto.

²¹ Ngatautau aatu isaa o voto tani aitaraa isaa oia inangari niloeloe, ta matana God me Karisto Iesu me ensolo atoa suisuitoongainila. Urau mene aimassiaa.

²² Urau mene ailuilui tani saoaa nimam me urau mene usi katoa tani ghelei ssavoto. Uaitarainio tani raarangisana.

²³ Urau mene ropi nonga manu ta ukaai tee uaeni enim pisikeaili tani sausi kovam ateva poli unim toka iisiki.

²⁴ Katoa taumattu eotuotu kaluira ssavoto tale ia arau o nau eteva, me auena eghaa nau niaiskei. Me mene katoa kaluira ssavoto karika eotuotu, ta auena etani otu tale nau niaiskei. ²⁵ Tale isaa o nonga ase salana masi niuungu eotuotu, arongona ta llo karika eotuotu, isaa o voto karika ae eaisuliaa.

6

¹ Lo atoa la uungu me karika la tokatoka tale aloannaaira, la nnaa va vauira atoa la rooroo va la ghaa nioneoneaa namuu, me karika aue la ppooaa saasakiaa tee ararina atae God me voto ita aapasunga. ² Lo atoa vauira atoa la ghairesoaa, la rau mene ghelei va oneoneaaira etaira episike poli la kakkaua ngaitauua. La tani uungu emasinaaili etaira, poli lo atoa la ghaaghaa voto etaira nau la uungu, tau ngaisesoaa ila me masinaaili ila etaira.

Uapasunga isaa o voto etaira me uaulia ngasarasarakanava la ghelei.

Niaielousiaa viliki veu

³ Arova teva eapasunga kamena niaiesoaa, me karika elao aitauuaa tee masi inangari niloeloe kanna kapuita Vau eteva Iesu Karisto, me tale niapasunga eoneoneaa God, ⁴ ia etautaue sae nonga me karika ekilakila righi voto. Eanna nonga tani toka aikiso me aissakeana tee inangari, eaalutu nisessaia ta katoa peiira me ia karika, me niaikiso elome ta ghalua taumattu, niauliaa saasakiaa ta kateva, me sesa voto la nim nannaa tee mene kateva, ⁵ karika niruu tale niaitamamarasi elome tale taumattu nannaaira karika masina. Karika la roo tani alomasaanga tee voto koronna, me la ghanna va salane God la ghaaghaa viliki veu etana.

⁶ Emaamasina etaita tani ghelei llo voto eamasimasi God me ita masimasiaa saa llo etautau mae. ⁷ Poli karika ita ghe mae aitauuaa tee sio righi voto tale kosa ateva oia me karika aue ita kasu eitauuaa tee righi voto tale kosa ateva oia. ⁸ Arova righi inana me aiaasae etaita, ita

5:18: Diut 25:4; 1 Ko 9:9; Mat 10:10. **5:19:** 2 Ko 13:1. **5:20:** Ips 5:11. **6:1:** Ips 6:5.

6:2: Plm 16. **6:3:** Gal 1:6-9. **6:5:** 2 Tim 3:8; 4:4; Tts 1:14. **6:6:** 1 Tim 4:8; Plp 4:11-12; Hib 13:5. **6:7:** Job 1:21.

masimasiaa isaa o voto. ⁹Lo atoa taumattu la ghanna tani tue peipeiena la kaakatuu lao tale nitootoonga me airrekati eteae, me tale ase voto alokapakapanna me sesa nialoanna, me ekaakatulainila lao tale voto sesa me aue la ghaa nitturuu. ¹⁰Poli uunguuaa niaielousiaa viliki veu liuena ia tale isaa akapa ase voto sesa. Kasina taumattu eannaaili tani ghaa viliki veu me ngila ghe kasu vulila niaikaiaa, me ngila ghe ghaala nimmarikana tale asease nialousiusi.

Airuuruu tale inangrina niloeloe Pol

¹¹ Me io, kapuna taumattu ngateva God, uilou vulu isaa o voto, me uaimuli parasi tani ghaa voto ghulughuluena, aloannaane God, niaikaiaa, niaielousi, nitoka akorokorongana ta God, me uunguua tani siuua ninannaa. ¹²Uaiuvvii tale masi niaiuuvvii tale niaikaiaa, me uposo parasi maulue ateva tokatoka liu ia nongina God ghe koloola nau ughe gheleila masi niaulia ngaotu ta mata ngoroi etoa. ¹³Tale taataraane God, ia etautaula maulue tale isaa akapa voto, me ta Karisto Iesu, ghe auliaala inangari koronna nau Pontius Paelat ghe kolomila nikokkolomi, aghaulia ngasarasarakanan etam va ¹⁴utani aitaraa niaulia ngasarasarakanan akapa me karika teva aue etara righi sesa gheeleiaam me karika aue la aliu teeio righi voto, lamosina ta kapuita Vau eteva Iesu Karisto esio, ¹⁵me God aue emaeaa tale nauna ia ghe suitoongaala. God ateva taumattu ngatoa la tautaue sae me ie nonga tau ngaitoitia ia, kingi ia ta kingi ekapa atoa me vau ia ta vau ekapa atoa, ¹⁶ia nonga karika aue emate, me etokatoka tale mallanga karika ita rooroo tani lao etana, ia karika teva ghe taraia o erooroo tani taraia. Ta netetana taumattu ngatoa la tau lao nioneoneaa me sarasarakanan nau ekapa atoa. Koronna.

¹⁷Uaulia ngasarasarakanan ta lo atoa tue peipeiena ila tale kosa ateva oia tale isaa oia nau tani rau mene aasake me la rau mene atoka tuutuliira tale peiira, poli isaa o voto eroo tani kapa parasi. Me la atoka tuutuliira ta God poli ia etautau mae oroieili voto etaita me isaa akapa voto tani amasimasita. ¹⁸Uaulia ngasarasarakanan etaira tani ghelei oroieili masi niuungu, me la aitauaa peiira me la masimasi tani aiparruui. ¹⁹Tale ia o salana atikirighi, aue la atoka oroieili masi voto atoa tani sueila nau ngemuli epona liu, me aue la ghaa maulue ateva koronnaaili ia.

²⁰Timoti! Uaitara ngamasina saa llo voto laghe tau aatu sio etam va uaitaraa. Uliu vilim tale nisama kamena me karika eauliaa God, me uakekkeliu tale lo atoa la apasunga inangari kamena la ue va alomasaanga. ²¹Katoa taumattu laghe usilaala ia o salana atikirighi, me laghe tiu ppaela tale uunguua niaikaiaa.

Alooloo sae va maamasinaane ateva God aue etoka teeio.

Aiaaghaluene atikirighi uru ngai Pol ghe pitiela ta **Timoti** **Inangari emuemua**

Pol ghe pitila ia oia uru ngai etikirighi tale airuuruu nau tale maa-maulueaane, me eaauliaa niaikapukapuaa elome ta Pol me Timoti. Pol ghe auliaala kiena va niapasunga kamena enaanamuu, me taumattu ngatoa aue la aikaaiiaa tale ia o nikamekame. Ghe auliaala ta Timoti va etani tingina akorokorongana tale voto koronna, me aue eghaa masi aipolipoli ta God.

Tani kila amuemua

Aitiutiu tale inangari 1:1-2

Niaulia ngakorokorongana tale maamaulueaane Pol 1:3-18

Inangari niloeloe ta Timoti 2:1-26

Airuuruu etoa nau 3:1-9

Mene katoa niloeloe 3:10-4:8

Airuuruu inangarina Pol 4:9-18

Nimasimasi me airuuruu 4:19-22

¹ Aghi Pol, kapuna apostolo ieghi Karisto Iesu me tale aloannaane God, ghe sungieghila tani ppooaa inangari nialokoi maulue tokatoka liu, isaa ta Karisto Iesu.

² Ta Timoti, masi natughu eteva:

Alooloo sae va God Tamaita ia me Karisto Iesu kapuita Vau ngepona ia lalu tau aatu maamasinaane God me alousiusiaane me luei.

Niasarasarakana tani tingina akorokorongana

³ Akaakaili emasinaaili ta Goto ateva ia o akaakaueinia, tale nannaaghi masalikeaili, nongina tuvughu etoa laghe gheelei. Nau ekapaaaili, tale llaa me voo, akaakaili emasina ta God me anannainio tale kalughu nilooloo sae. ⁴ Aghaloannaaili tani mene tarao, poli aghananararum matam nau italu ghe aituaala, me aue amasimasi marova italu mene aitara. ⁵ Akilakila va kalum niaikaaiia koronna ghe tokatoka ta kinam ta Iunis me tuvum ta Lois, me aghaiessoa va ia o niaikaaii ngateva ia tee etam. ⁶ Liuna avalua o me aghanan tani mene arava etam va, nongina ita palepale va kura ateae erame, ughelei evalua o uunguaam tale sarasarakana God ghe nim tau aatu sio nau aghe saoaala nimaggi etam. ⁷ Poli God karika eaaloannaita va ita matautu, ta ghe tau mae sio spiriti eteva va ita pasu tale sarasarakana, niaielousi, me masi ninanna.

⁸ Liuna avalua o, urau mene palata tani aulia ngaotu masi kiukiuna kapuita Vau eteva, me urau mene palatainaghi ta karavusu ieghi poli aghe poppooaa Karisto. Me uaimonomonosiaa tani ghha maamatana nongina aghi mausi masi kiukiu, tale sarasarakaniaane God. ⁹ God ghe asaangitala me ghe kolotala va ita toka tale maulue ateva manga ia tani amasimasi God. Karika ghe kolotala poli righi masi gheegheleiaaita. Karika, ta poli tale aloannaane me maamasinaane ateva, ia oia maamasinaane ateva ghe tau mae sio etaita ia ta Iesu Karisto, me auena

ghe ghelei kosa ateva. ¹⁰ Me isaa oia ang ghe apasunga ngaotula nau eteva Karisto Iesu ghe mae sio, tau ngai asaangiita ia, ghe apalala nimate, me tale masi kiukiu, ghe apasunga ngaotula etaita maulue ateva tokatoka liu ia. ¹¹ God ghe suoongainaghila va atau ngai ppooaa me aghapostolo, me atau ngai aapasunga tale ia oia masi inangarina ateva. ¹² Me liuna avalua o, aghaaghaa maamatana ghaine me karika apaapalata, poli akilakila see aghe aatoka tuutulighi etana, me akilakilaaili va ia erooroo tani aitaraa voto aghe taula etana* lomosi ta nau eteva eoghi mae.

¹³ Uposo parasi niapasunga tale salana koronna ughe nongola etaghi, tale niaikaiaa me niaielousi isaa ta Karisto Iesu. ¹⁴ Tale saasausiaane Spirit Manga ateva etokatoka elome etaita, utani aitara ngamasinaaili masi kiukiu God ghe tau sio mae etam.

¹⁵ Ukilakila va isaa akapaaili taumattu tale provinsi eteva eEisia angila ghe ratieghila tani aisausieinaghi, tee me kapughu elua ta Pigelus me Emogenis.

¹⁶ Aloodoo sae va aue Vau ngepona ateva eapasunga alousiusiaane ta lo atoa la tokatoka tee Onesiporus, poli nau ekapa atoa ghe mae taataraieghi tani asarasarakanaeghi, me karika ghe paapalatinieghi nau iriirina ieghi tale sene. ¹⁷ Karika, ta nau ghe mae sio eRom, ghe pae akapaieghi seela lomosi ta ghe taraieghila. ¹⁸ Aloodoo sae va aue Vau ngepona ateva eapasunga nialousiusi etana tale ia o nau niaisakei eteva. Me ukilakilaaili vaalua ghe saasausieeghi eIpises tale asease salana atoa.

2

Masi tau ngai uvii eteva kapuna ia Karisto Iesu

¹ Masi natughu eteva Timoti, ukorokorongan tale maamasinaane ateva Karisto Iesu etautaua etam. ² Me voto ughe nongola aghe apasungaala tale tummatavanga, isaa o voto utau lao ta lo atoa taumattu urooroo tani atoka tuutulim etaira, me aue la roo tani mene apasunga tale mene katoa taumattu. ³ Ughusi tani ghaa maamatana, nonginaaili masi tau ngai uvii eteva kapuna ia Karisto Iesu. ⁴ Karika teva taumattu tau ngai uvii ia erooroo tani ghelei mene kasina ase niuungu me etam ghelei emasina uunguaane, karika. Egheelei emasina uunguaane tani amasimasi kapuna namu ngateva. ⁵ Nonginaaili arova teva ealoanna tani aikarati tale niaikarati eteae, arova karika eusila ngakapaaili asease salana tani usilaa tale ia o niaikarati eteae, arongona ta eilou vuli ekapaila, karika aue eghaa aipolipoli. ⁶ Tau ngai pasa utana ateva karika mangoona ia, ia etani mata ngemua tani ghaa inana emaamatue akasina eutana. ⁷ Uannaa parasi sa ateva aghaaulieinia, poli Vau ngepona ateva aue etau aatu alomasaanga tani kila isaa akapaaili voto.

⁸ Utani annaa Iesu Karisto, ia tuvuna ia Deivit, God ghe totuela tale nimate. Tani iaaili o masi kiukiu apoppooa ngaotu. ⁹ Me poli apoppooaa masi kiukiu eteva oia, sesa nitoka eghaaghaaieghi, me laghe irieghila tale sene nonginaaili ssa taumattu ngateva. Me karika teva taumattu erooroo tani akaravusu inangarina ateva God. ¹⁰ Liuna avalua o me

1:10: Hib 2:14. **1:11:** 1 Tim 2:7. * **1:12:** voto aghe taula etana o isaa oia niuunguua ghe tau mae sio etaghi tani ghelei. **1:14:** 1 Tim 6:20. **2:3:** 2 Tim 1:8. **2:5:** 2 Tim 4:8. **2:6:** 1 Ko 9:7. **2:8:** 1 Ko 15:4; Rom 1:3. **2:9:** Ips 3:1, 13; Plp 1:12-14.

arooroo tani ghaa isaa akapa o maamatana tani sausi lo atoa God ghe suoongainilala, arova erooroo va la saanga, me aue etau mae nioneoneaa tokatoka liu isaa ta Karisto Iesu.

¹¹ Kateva inangari koronnaaili ia,

Arova ita mate teeia,
 aue ita maulue teeia.

¹² Arova ita tam oghi vulu maamatana,
 aue ita toka teeia me aue ita aitara ngakapa voto.

Arova ita ue va ita tam kilakilaia,
 ie tee aue eue va etam kilakilaita.

¹³ Arova ita tam ghelei voto ita ue va ita ghelei,
 ia aue eghelei voto eue va aue eghelei,
 poli karika erooroo tani aikolikoliaa saa voto ghe uela va aue eghelei.

Kapuna tau ngai uungu eteva Vau eteva

¹⁴ Nau etoa, uauliaa va la rau mene kkaluaa isaa oia voto. Uaulia ngakorokorongana etaira, poli God* etaatara sa ateva la gheeleia, va la rau mene aissakeana tee malloeana inangari, poli isaa o ase niaissakeana karika erooroo tani sausi teva taumattu. Ta enim gheelei saasakiaa lo atoa taumattu la nonganongo. ¹⁵ Ughelei emasina akapa voto, nongina taumattu ngateva karika epaapalataa masi uunguaane, tani apasunga ta God va ia erooroo tani masieinio, me eapasunga inangari koronna tale salana ghulughuluena. ¹⁶ Uamasalikainio tale nisama kamena me karika eaulia ngamasalikaa God, poli isaa o inangari aue ekatulaa taumattu ngatoa me aue la masauaileti ta God. ¹⁷ Inangariira la ghauliaa me la ghaapasunga, karika masina, nonginaaili sesa usai eteva ange uusai enamu. Elome etaira Aemeneaes me Piletus ilalua avaluaaili o, ¹⁸ lalu ghe kasu vulila voto koronna. Lalu ghe uela va, “Angita ghe totula tale nimate nau ita ghe ghaala niasuu, me auena karika mene teae nitotu.” Lalu gheelei saasakiaa uneira niaikaaiaa kasina tana tau ngaisoaa. ¹⁹ Inangarina ateva God koronna ia, etiitingina nonginaaili suena atiulu karika erooroo tani aisiisia me la gheelei ale ateva epona etana. Me laghe piti elokoila kasina mata nginangari tale ia o suena atiulu laghe uela va, “Vau palepale ekilakila llo taumattu kapuna,” me, “Lo atoa la ue va kapuna ila God, la tani kiri vulu isaa akapaaili voto karika masina.”

²⁰ Elome tale alena ateva tau peipeiena ateva, kasina tana aikaai inana laghe gheleila tale gol me silva me kasina laghe gheleila tale kosa me tale tuku ngai, kasina la namanamaa tale nau namu ngatoa la veluvelu eitauaa, me kasina la namanamaa tale nau ekapa atoa. ²¹ Lo atoa la gheelei eraarangisanaila, aue la nongina aikaai inana ateva la namanamaa nau namu ngatoa la veluvelu eitauaa. Aue la manga, me la tau ngai uungu ta Vau eteva, me aue la aimonomonosiaa tani ghelei isaa akapa ase masi niuungu.

²² Me uakekkeliu tale sesa niuungu aliki taita me vause atoa la aloanna tani ghelei, me ukasu tee voto ghulughuluena me niaikaaiaa, niaeelousi, luei, tee lo atoa la ghaatoka tuutuliiira ta Vau ngepona

2:11: 2 Ko 4:11. **2:12:** Mat 10:33. **2:13:** Rom 3:3-4; Tts 1:2. **2:14:** 1 Tim 6:4; Tts

3:9. * **2:14:** God Katoa uru ngai laghe pitila, laghe uela va Vau ngepona ateva. **2:15:** 1 Tim 4:6. **2:16:** 1 Tim 4:7. **2:17:** 1 Tim 1:20. **2:19:** Nam 16:5; Jon 10:14; 1 Ko 8:3; Ais 52:11. **2:22:** 1 Tim 6:11.

ateva, me tee urunguitaniira raarangisana. ²³ Uamasalikaa tee ase niaissakeana kaluira alokapakapa atoa taumattu, poli ukilakila va isaa o voto, aue ealakuti niaikiso. ²⁴ Kapuna tau ngai uungu eteva Vau ngepona ateva, karika emene aikiso ta samasamaane esaghuighuina tee isaa akapaaili taumattu. Etani roo tani apasunga, me erau mene sessai parasia. ²⁵ Esioaa nannaane nau eloeloe taumattu ngatoa la ghaapasunga llo voto etam lao aitauua tee Uru ngai Manga ateva, me koti God aue ekatulainila tani nna ngaioghioghi me la kila voto koronna, ²⁶ me aue nannaaira emasalike me la kasu vuli unna airrekatti eteva Satana, poli ia ghe gheleilala laghe karavusula tani ghelei ssavoto, ealoanna va la ghelei.

3

Gheegheleiaaira sesa taumattu ngatoa tale airuuruu

¹ Ukila llo oia va: Airuuruu tale nau, taumattu ngatoa aue la ghaa mmarikana. ² Taumattu ngatoa aue la ghailousieinila nonga, me aue la ghailousiaa viliki veu me la ghaasakeainila me aue la saeaa nannaaira, me aue la ghauliaa saasakiaa ta mene katoa, la tam nongo usilaa tamaira me kinaira, karika aue la kaili emasina, me karika aue la oneoneaa God, ³ karika aue la ghailousiaa mene katoa, karika aue la ghanna tani aikkaluuaa tee mene katoa, aue la ghelei saasakiaa taumattu tale inangariira, karika aue la roroo tani apala sesa aloannaaira, karika aue la nna ngaitootoonga tee mene katoa, aue la ratirati voto ghulughuluena, ⁴ aue la tau kapuira atoa ta tau ngaissaniira atoa, aue la ailuilui tani ghelei voto sesa, aue la saeaa nannaaira, aue la ghailousiaa gheeleiaa kosa ateva me karika aue la ghailousiaa God. ⁵ La aapasunga vara la mene aaimuli usi tee God, me karika ta la ratirati sarasarakaniaane God tani gheleila la ghulughuluena. Uakekkeliu tale isaa o taumattu.

⁶ Katoa etaira la aikamea tani sso aleira katoa, me la kamekame lo atoa vause karika marekate nannaaira me maate ila tale ninannaa tale sesa gheegheleiaaira, me la kaakatulainila lao tale voto sesaaili. ⁷ Ila o vause atoa la aaloanna tani kila ouna voto, me karika la roroo tani kila amasina voto koronna. ⁸ Emua arau Jannes me Jambres karika lalu ghe tiitingina aitauua tee nannaane Moses,* me tale ia o salana atikirighi, ila o taumattu ngatoa karika la tiitingina aitauua tee inangari koronna. Sesaili nannaaira me peisaane ila tale niaikaiaa. ⁹ Nauira karika aue aluse poli taumattu ngakapa atoa aue la tara kila alokapakapaairia, nongina taita alua o.

Inangari niloeloe ta Timoti

¹⁰ Me io, ukilakilaaili voto aghe apasungaala, tokatokaaghi, voto aghanna tani ghelei, aikaiaaghi, nongina karika esessai parasieghi, ailousiaaghi, karika aghe sio asoasoaa tale uunguaaghi, ¹¹ maamatana me nimmarikana, voto laghe gheelei teeieeghi tale masaliki taatara eAntio, eIkoniam me eListra. Ukilakila va aghe ghaala oroi nimmarikana oia, me Vau ngepona ateva ghe asaangieghila tale isaa o nimmarikana

2:23: 1 Tim 4:7. **3:1:** 1 Tim 4:1. **3:5:** Mat 7:15, 21; Tts 1:16. **3:8:** Eks 7:11. * **3:8:** Ajiu etoa la ghe uee va taita alua oia tau nialala ilalua, kapuna ilalua Peroo ta nau Moses. Utara Eksodis 7:11-22. **3:11:** Apos 13:14-52; 14:5, 8-20.

aghe ghaaghaa. ¹² Koronna, lo akapa atoa la aikaaiaa ta Karisto Iesu me la aloanna tani toka nongina God, aue la ghaa nimmarikana, ¹³ me sesa taumattu ngatoa me tau nikamekame atoa karika aue la ruu poi tani ghelei ssavoto me kaluira ssavoto aue oroieili. Aue la kame taumattu ngatoa, me Satana aue ekamela tee. ¹⁴ Me io, unnaa parasi voto koronna ami ghe apasungaala etam, me ukilakila va koronna, poli uatoka tuutulim ta lo atoa laghe apasungaala etam, ¹⁵ me ta nau aliki io, ughe kilala Uru ngai Manga ateva. Uru ngai Manga ateva egheelei alomasaangaita tani kila va God ghe asaangitala nau ita ghe aiesoaaala ta Karisto Iesu. ¹⁶ Ia akapa Uru ngai Manga ateva ghe mae sio ta paane ateva God, eaaisausieinita tani apasunga, tani pao voto karika masina, tani loeta tale voto karika masina, me tani apasunga salana tani ghelei voto ghulughuluena. ¹⁷ Tale ia o salana atikirighi, kapuna tau ngai uungu eteva God aue eaimonomonosiaa me erooroo tani ghelei asease masi niuungu etoa.

4

¹ Ta matane God, me Karisto Iesu, aue eghelei niaiskei ta taumattu ngakapa atoa, maulue ila me matena atoa, me poli emaemae tani aitaraa kosa akapa ateva, aghaulia ngakorokoronganeta etam: ² Tani ppooaa masi kiukiu; unim aimonomonosiaa nau ekapaaili tani ppooainia tale nau la aloanna tani nongo, me nau la tam aloanna tani nongo, urau mene sio asoasoaa tani loe taumattu tani gheleila va la oghi vulu kaluira ssavoto, me uapasunga tani asarasarakanaila. ³ Poli nau too emaemae, taumattu ngatoa karika aue la aloanna tani nongo koronna niapasunga. Ta aue la usilaa aloannaaira, me aue la kolo oroieili tau ngai aapasunga ngatoa tani auliaa etaira sa ateva talingaira ealoannaaili tani nongoa. ⁴ Aue la tam aloanna tani nongo inangari koronna, me aue la anna tani nongo asease kiukiu uunguua kosa ateva. ⁵ Me io, uitarainio tale isaa akapaaili o asease voto. Usau llo voto maate me mmarike, me ughelei uunguua tau ngai ppooa ngateva tale masi kiukiu eteva, me ughelei ekapa ia o niuungu eteva God ghe tau aatu sio tani gheleia.

⁶ Me nau amate, raeghi eteva aue nongina uaeni opringi eteva la kaokaoa sae tale liu nighelei aiaavusuvusuena. Naughu oia tani kasu vuli ia oia maulue ateva. ⁷ Ngaghe kaarasila tani aiuvii tale masi niaiuvi eteae, ngaghe rekatala tale airuuruu tale niaikarati eteae. Me ngaghe poso asarasarakanala niaikaaiaa. ⁸ Me ghaine aipolipoli eteva, kou nguru ia, etoitoieghi, uneira ia lo atoa ghulughuluena ila. Vau palepale ateva ia ghulughuluena ia tani ghelei niaiskei, ia aue atokaie sae ta urughu tale ia o nau eteva emae. Me karika va aghi nonga, ta lo atoa tee la toitoia me la ailousieinia tani taraiava emae.

Airuuruu inangarina Pol

⁹ Utotoonga tani mae tara parasieghi, ¹⁰ poli Diimas ghe ailousian-gailiila gheeleiaa kosa ateva, me ghe kasu vulieghila, me ia eTesononika. Me Kreskens ghe lao sio tale provinsi eteva eGalasia, me Taetas ia tale provinsi eteva eDalmatia. ¹¹ Angalua nonga oia me Luk. Ukol Mak me amalu mae, poli ia eroo tani sausieghi tani uungu. ¹² Aghe sungi tau

lao sio Tikikus eIpises. ¹³ Nau umaemae ughaa mae tee uneghi aiaasae ngeleka ateva aghe velu elokoiela eTroas, tanganue Kapus. Ughaa tee mae uneghi vuku, llo vuku aghaloannaaili laghe gheleila tale viliki ghaata kkena.*

¹⁴ Aleksanda, ia o egheelei voto tale brasi me aeana, ghe ghelei teeieghila orioeili voto karika masina. Me Vau ngepona ateva aue etaula aipolipoli tale sa ateva eghe gheleila. ¹⁵ Io tee uaimonomonosiaa tee ia o taumattu ngateva poli etam aloanna poi inangariimami.

¹⁶ Karika teva ghe tiitingina tani sausieghи, tale aitiutiu eteva nau aghe tinginala tale niaisakei. Taumattu ngakapa atoa laghe kasu vulieghila. Alooloo sae va God ekkaluua isaa o voto. ¹⁷ Me Vau eteva ghe tokatoka aitauua teeieghi me ghe tautau mae sarasarakana etaghi. Liuna avalua o me aghe ppooa ngakapaailila masi kiukiu ta taumattu karika ajiu ila tani nongoa. Me Vau eteva ghe asaangieghila nau laghe annaala va amate.† ¹⁸ Me Vau ngepona ateva aue easaangieghi tale voto akapaaili sesa la aloanna tani ghelei etaghi. Me aue eghaa amasinaailieghi lao tale ararimangalina ateva epona liu. Ta netetana ita tau sae ararina ateae nau ekapa atoa. Koronna.

¹⁹ Utan lao masimasiaaghi ta Prisila me Akuila me ta kapuna atoa Onesiporus. ²⁰ Erastus etokatoka eKorint, me aghe kasu vulila Tropimus eMiletus poli isikinna ia. ²¹ Utootoonga tani mae, me auena nau ttasi. Iubulus, Pudens, Linus me Klaudia la tau aatu sio masimasiaaira tee me ila akapa tau ngaikaaia ngatoa oia.

²² Alooloo sae va Vau ngepona ateva aue etoka aitauua teeio. Me masimasiaane God aue etoka aitauua teeiem akapaaili.

* **4:13:** Apos 20:6. * **4:13:** laghe gheleila tale viliki ghaata kkena Llo vuku laghe gheleila tale viliki ghaata kkena, aipolina namungaili, poli karika erororo tani sesa parasi. **4:14:** Ais 59:18; Rom 2:6. † **4:17:** Tale inangari nge Grik, aghe saangala tale paa laeoni eteva. **4:19:** Apos 18:2; 2 Tim 1:16-17. **4:20:** Apos 19:22; 20:4; Rom 16:23.

Uru ngai etikirighi Pol ghe pitiela ta Taetas Inangari emuemua

Taetas kateva namuu tale ale manga atoa tale patunganua ateva eKrit. Nongina Pol ghe pitipitila ta Timoti, ghe mene piti teela inangari niloeloe ta Taetas tale voto tale ale manga, nongina elda ngatoa me rikina atoa. Me tee, ghe auliaala va Taetas epaso parasi inangari koronna, me ghe aakorokorongan Taetas tale niaiesoaa ghulughuluena tale ale manga, niuungu, me taumattu tale kosa ateva oia.

Tani kila amuemua

Aitiutiu tale inangari 1:1-4

Namu ngatoa tale ale manga 1:5-9

Lo atoa la apasunga voto kamena eKrit 1:10-16

Nitoka manga 2:1-10

Liue nitoka tani manga 2:11-15

Vaalua tani toka tee mene katoa taumattu 3:1-11

Nimasimasi me airuuruu 3:12-15

¹ Aghi, Pol, kapuna tau ngai uungu ieghi God, me kapuna apostolo ieghi Iesu Karisto:

Ghe sungieghila tani laa ghasarasarakana uneira niaikaaiaa kapuna taumattu ngatoa God ghe suoongainilala, tani apasunga salana koronna, eaapasunga vaalua tani toka tale aaloannaane God. ² Ia oia inangari eteva koronna ia, egheeleita ita aatoka tuutuliita tale maulue ateva tokatoka liu ia. God ghe aulia ngalokoielta etaira tale inangari nialokoi emua arau, me auena kosa ateva ghe lutula. Ia karika erooroo tani kamekame. ³ God, ia tau ngai asaangiita ia, ghe apasunga ngaotula ia oia inangari eteva koronna ia tale nauna tuunga ateva ghe suoongainiela, me ghe taue mae sio etaghi me ghe aulia ngasarasarakanala etaghi tani ppooinia.

⁴ Apitipiti atu etam Taetas, io natughu tuungi io elome tale niaikaaiaa italu uunusi. Alooloo sae va maamasinaane me luei kannna God Tamaita ia, me Karisto Iesu, tau ngai asaangiita ia, aue etoka etam.

Uunguua Taetas eKrit

⁵ Aghe kasu vuliola eKrit va ughelei kasina voto karika ita ghe ruula, me usui elda ngatoa tale ale manga, tale kateva kateva masaliki taatara, nongina aghe auliaa tau aatu sio. ⁶ Elida ngatoa gheeleiaaira etani masinaaili, karika mene righi sesa gheeleiaaira, me vausenira ekateva nonga, me natuira atoa la nongo usilainila, la rau mene amakatakata me la tau nissakeaa ila. ⁷ Ta lo ateva eitarraa uunguane God tale ale manga karika mene righi sesa gheeleiaane. Erau mene ue va ia nonga namuu ia, me etaui nisessa ia. Erau mene tau niropi sesa manu, me ealona tani aiuvii, erau mene kuruetu tale viliki veu. ⁸ Me ia o taumattu ngateva eaikoloa taumattu me eitarainila nau la lao tangantuena. Me eailousiaa saa voto masina, me enanna ngamasina, me eghulughuluena, me eraarangisana, me eitarraa nannaane me gheeleiaane. ⁹ Eposo parasi inangari koronna, nongina ami ghe apasungaala me erooroo tani

aisausiaa mene katoa tale koronna niapasunga, me erooroo tani kiso lo atoa la sessa tee inangari koronna.

¹⁰ Poli aue ecorieili taumattu ngatoa aue la tau nissakeaa me tau ni-nim sama ila me tau nikamekame ila, tani ila o lo atoa la aasarasarakana uunguua ni-isoiso. ¹¹ Uauliaa etaira va karika la mene apasunga, poli ngila ghe gheleila katoa taumattu me tee natuira atoa tale kateva kateva ale, ngila ghe oghi vulula inangari koronna, laghe nim gheelei isaa o niapasunga tani ghaa uneira viliki veu. ¹² Kateva taumattu eKrit la ghe kolokoloa va propete ia ghe uela va, “Taumattu nge Krit atoa, tau nikamekame ila. Ila nongina sesa ghaata kkena atoa, mangoona ila, me tau ninamanama ila.” ¹³ Isaa o inangari koronna. Liuna avalua o me uppooaa inangari sarasarakana etaira, me aue la roo tani sarasarakana tale uneira niaikaaiaa. ¹⁴ Me la rau mene tau lao nannaairaa tale kaluira kiukiu marripana ajiu etoa, me inangari lo atoa la liuliu viliira tale inangari koronna la poppoaa ngasarasarakana. ¹⁵ Lo atoa urunguitaniira raarangisana, voto akapa etaira raarangisana, me ta lo atoa urunguitaniira karika raarangisana me karika la aikaaiaa, karika righi voto etaira raarangisana, tale isaa akapa ninannaa karika la kilakila eaa sesa me eaa masina. ¹⁶ La ue va la kilakila God, me gheeleiaira eaapasunga va karika la kilakilaia, ila mauuna ila, karika la roo tani nongo usilaa, me karika muenna ila tani ghelei niuungu masina.

2

Inangari tani apasunga tale asease taumattu

¹ Me io uapasunga voto koronna elaoalao aitauaa tee koronna nia-pasunga. ² Uauliaa ta taita namu ngatoa va la aitaraa tokatokaaira, me uunguuaaira, me aippooaaira, me la nanna ngamasina. La tani ghulughuluena tale uneira niaikaaiaa, me niaielousi, me la tingina akorokorongana eghaa nau eruu.

³ Me tale ia nonga o salana atikirighi, uapasunga ta vause namu ngatoa, tani apasunga va la oneoneaa God. La rau mene kasu see tani ghelei saasakiaa ta mene katoa tale inangariira, me la rau mene toka aloanna tani toka ropiropi sesa manu, ta la apasunga ta katoa saa voto masina. ⁴ Liuna avalua o me ila o vause namu ngatoa la apasunga ta llo vause aviri laghe laila, tani ailousia taitaniira atoa me natuira atoa, ⁵ me la nanna ngamasina, me la raarangisana, me tani masi vause tani aitaraa paa ngale, me tani aisausiaa, me tani oneoneaa taitaniira atoa, me aue karika teva eppooaa saasakiaa tale inangarina ateva God.

⁶ Me tale ia nonga o salana atikirighi, uapasunga tee tale llo taita aviri laghe laila, tani nanna ngamasina ⁷ tale voto akapa. Me io uapasunga nonga masi voto. Urau mene usimaghluua nau uaapasunga, me uapasunga tale masi ninannaa me nioneoneaa, ⁸ me utani apasunga nonga koronna tana inangari, me karika teva aue eauliulieinio. Arova ughelei evalua o, tau ngai ssateem atoa karika aue la ghauliaa teeio righi voto, me aue la palata.

⁹ Uapasunga ta tau ngai uungu etoa karika la tokatoka tale aloan-naaira va la nongo usilaa kapuira namu ngatoa tale isaa akapa voto. Me

1:10: 1 Tim 4:7. **1:11:** 1 Pita 5:2; 2 Tim 3:5-6. **1:13:** 2 Tim 4:2. **1:14:** 1 Tim 4:7.

1:16: 1 Jon 1:6; 2:4. **2:3:** 1 Tim 3:11. **2:5:** Ips 5:22. **2:7:** 1 Tim 4:12. **2:8:** 1 Pita

2:15. **2:9:** 1 Tim 6:1.

la tau lao nannaaira me sarasarakaniaira tani ghelei voto erooroo tani ghelei emasimasi kapuira namu ngatoa, me la rau mene ssakeainila.
¹⁰ La tani apasunga va la rooroo tani atoka tuutuliira etaira tale isaa akapaaili voto la ghelei me karika la ainao peiira, me aue la oneoneaa inangarina God tau ngai asaangita ia.

*God eaalona akapa
taumattu ngatoa
tani saanga*

¹¹ Poli maamasinaane God ang ghe kauerekatila, eaasaangi taumattu ngakapa atoa. ¹² Eaapasunga etaita tani ue va “karika” tale voto karika ita oneoneaa God etana me sesa voto kosa ateva ealoanna, me ita nanna ngamasina, ita ghulughuluena, me ita oneoneaa God tale tokatokaaita tale nau etiulu oia, ¹³ nau ita toitoi esarasarakanaaili masi nau eteva nau kapuita Goto ateva me tau ngai asaangiita ateva Iesu Karisto emae tale sarasarakaniaane me mallangina ateva. ¹⁴ Ghe taue mae sio etaita tani ghaa oghita tale isaa akapa sesa voto me tani ghelei eraarangisana taumattu va etani kapunaaili ila me la ghannaaili tani ghelei masi niuungu.

¹⁵ Me isaa toko voto utani apasunga. Uaippooaa teeila tani asarasarakanaila me ukisoila tale inangari matuutuliena. Urau mene tau velu teva va etara aloio sio euu.

3

Tani ghelei voto masina

¹ Umene auliaa ta tau ngaisesoa ngatoa va la oneoneaa lo atoa la muemueinila me matuutuliena ila me la tani nongo usilainila me la ghaimonomonosiaa tani ghelei masi niuungu, ² me tani rau mene ppooaa saasakiaa tee kateva, me tani rau mene aikiso, me tani nnaa mene kateva, me tani siuaa nannaaira tale isaa akapa taumattu.

³ Poli ita tee tale nau too ang ghe lao sio, alokapakapa ita me karika ita ghe nongonongo usilaa me laghe kametala me ita ghe nim uungu tale ase niateateaa sarasarakanaili me ase nimasimasi. Ita ghe tokatoka tale ninannaa tani ghelei saasakiaa kateva me tani sessaita ta lo atoa peiira me uunguaaira me ita karika. Laghe sessa teeita me ita, ita ghe sessa tee mene katoa. ⁴ Me nau masi aisausiaane me aielousiaane God tau ngai asaangiita ia ghe kauerekatila, ⁵ ghe asaangitala. Karika va tale voto ghulughuluena ita ghe gheelei ta poli aalousiusiaane, ghe asaangitala tale nisuusuu tale nilutu aouna me nighelei aouna kanna Spirit Manga ateva. ⁶ Poli Iesu Karisto ghe matela etaita tani asaangita, God ghe tau sio mae Spirit Manga ateva etaita, me karika ghe ghaa oghielo. ⁷ Me nau God ghe ghelei eghulughuluenaitala poli maamasinaane, ita, ita rooroo va ita ghaa voto ita taatara lao etana tale maulue ateva tokatoka liu ia. ⁸ Ita aatoka tuutuliita tale isaa oia inangari. Me aghanna va utani aulia ngakorokorongana isaa oia voto me lo atoa la ghaaiesoaa ta God, la ainanganangaa tani taula lao tani ghelei masi niuungu. Isaa o voto masinaaili me esausi taumattu ngakapa atoa.

2:12: 1 Jon 2:16. **2:14:** Gal 1:4; Eks 19:5; Diut 7:6; Esik 37:23; 1 Pita 2:9. **2:15:** 1 Tim 4:12. **3:1:** Rom 13:1-7; 1 Pita 2:13-14. **3:3:** 1 Ko 6:9-11; Ips 2:1-2; 5:8. **3:5:** 2 Tim 1:9; Ips 5:26; Hib 10:22. **3:6:** Apos 2:17-18.

⁹ Me uakekkeliu tale nisama alokapakapanna me kiukiura me tuvura atoa me niaisoa me niaikiso tale inangari tale uunguaa inangari nipaopao. Poli isaa o voto karika aue esausi taumattu, me nim kamena. ¹⁰ Uauliaa kieno lo ateva taumattu eaatoka apolapola taumattu. Uauliaa katengaata etana, vara me umene auliaa ghaluene etana. Nau uruu, urau mene ghelei mene righi llo etana. ¹¹ Aue ukilaaili va ia o ase taumattu ngateva sesa ia me tau ssavoto ia me gheeleiaane eaapasunga aotu va sesa taumattu ia.

Airuuruu tale inangari

¹² Nau eteva asuu aatu Atemas o Tikikus etam, utootoonga ngakapa ase salana tani mae taraiieghi eNikopolis, poli aghanna tani toka oia eNikopolis nau nikaili me kuukuu eteva. ¹³ Ughelei saa llo voto urooroo tani ghelei tani sausi Senas loeaa ia me Apolos tale kasukasuaairarua me karika lalu mene tukuna tale voto lalu aanna. ¹⁴ Me tee, kapuita taumattu ngatoa la tani ghaa alomasaanga tani taula lao tani ghelei masi niuungu, me aue la rooroo tani tau lao voto ta lo atoa la aloanna niaisausi, me la rau nim mene toka me karika la ghelei righi voto.

¹⁵ Ila akapa lo atoa la tokatoka teeieghi la suu atu sio masimasiaaira etam. Am amasimasi lo atoa la ghailousieinamami tale niaikaaiaa.

Alooloo sae va maamasinaane etoka akapa etaimim.

Uru ngai etikirighi Pol ghe pitiela ta Pilimon Inangari emuemua

Pol ghe pitila ia oia uru ngai etikirighi nau ghe tokatoka tale ale mata voovoo. Pilimon taita ateva ghe tokatoka eKolosae, me ghe aiesoala masi kiukiu nau ghe nongola ta Pol, me tale isaa o nau, ia kateva namuu tale ale manga ateva okae. Kateva tau ngai uungu karika ghe tokatoka tale aloannaane, ta tale aloannaane Pilimon, ararina ataeae ta Onesimas, ghe ilou vulila vauna ateva. Ghe soula Pol, me ghe aiesoala ta Iesu. Pol ghe pitipitila ta Pilimon tani ue va esungiaa oghi Onesimas tani mene oghi lao etana, me ghe kolomila Pilimon tani kkaluaa Onesimas me tani mene aikoloainia, arongona ta karika va gheeleiaaira avalua o taumattu ngatoa tale isaa o nau. Emulina tale isaa o voto, katoa la aaiesoaa va Onesimas ghe katevala ta namu ngatoa tale ale manga ateva eIpises.

Tani kila amuemua

Aitiutiu tale inangari me nikaili emasina 1-7

Pol ghe kolomila Pilimon tani ghaa oghi Onesimas 8-20

Nimasimasi me airuuruu 21-25

¹ Aghi Pol, tau karavusu ieghi mausi Iesu Karisto, me Timoti kapuita ia.

Apitipiti aatu etam Pilimon, masi kapuimami eteva, me tau ngai uungu eitauua teeiemami io. ² Me angalu suusuu masimasiaangalua ta kapuingalua vause ateva Apfia me ta Akippus tau ngai uvii eitauua teeengalua tale masi kiukiu eteva, me ta tau ngaisesoa ngatoa la mae velovelu eitauua tanganuem.

³ Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Nikaili emasina me nilooloo sae

⁴ Nau etoa aghannainio tale kalughu nilooloo sae, akaakaili emasina ta kapughu Goto ateva, ⁵ poli anonganongo aikaaiam ta Vau ngepona Iesu me ailousiaam ta lo atoa manga ila. ⁶ Alooloo sae va ughele livalivasanaaili tani auliaa ta mene katoa aikaaiam me aue ughele kila amasinaaili isaa akapa masi voto ita ghaagħha ta Karisto. ⁷ Aielousiaam ghe tau mae sio kinatama nimasimasi me eaasarasarakanaiieghi poli io, masi kapughu eteva, ugheelei urunguitaniira lo atoa manga ila tani mene ateatea ngamasina.

Pol ghe looloo luei mausi Onesimas

⁸ Liuna avalua o me arongona ta, ta Karisto karika amaamatautu tani ppoa ngasarasarakanā sa ateva erooroo tani gheleia, ⁹ me karika, ta akolokolo tauo tale uunguua niaielousi eteva. Aghi Pol, tau ngaimatoonga ieghi me karavusu ieghi ta Iesu Karisto, ¹⁰ akolokolo tauo mausi natughu ta Onesimas, ghe natughuiela nau atokatoka tale ale mata voovoo. ¹¹ Nau too ang ghe lao sio, karika righi uunguaane ta

ngetam me isaa oia nau ang ghe uunguaanel manee etam me etaghi namungaili.*

¹² Ngamene sungisungie aatu etam tee me urunguitanighi eteva. ¹³ Aghe annala va ghe toka teeieeghi tani ghaa lium ateva tani sausieeghi nau atokatoka tale ale mata vooyoo mausi masi kiukiu. ¹⁴ Me karika aghanna tani auliaa voto va ughelei ta saa llo voto ughelei, ughelei tale aloaloannaam, me karika va la sulungio tani ghelei. ¹⁵ Koti aghanna ngavalua toko va Onesimas ghe kasu vuliola tale nau karika aluse, va nau ekiriaa mae etam, aue etoka laalaa liu teeio. ¹⁶ Karika va nongina tau ngai uungu ia karika etokatoka tale aloannaane, ta elaulau tau ngai uungu eteva karika etokatoka tale aloannaane, ia masi kapumaili ia. Masinaaili ia etaghi me maamasinaane etam aue enamungaili va kapum tau ngai uungu ia, me kapumi ia mausi Vau ngepona ateva.

¹⁷ Liuna avalua o me poli utaataraiieghi va kapum ieghi, ughaaia nongina va ughaaghahaieghi. ¹⁸ Arova ghe gheleila righi voto sesa o ghe tam liula voto ghe ghaala, uatoka sae maate ateva etaghi. ¹⁹ Aghi Pol apitipiti isaa oia inangari ta nimaghi va aue aliu isaa o voto. Me karika aghanna tani auliaa va io tee karika ughe liu voto aghe gheleila tale maamauluaam. ²⁰ Aghannaaili, kapughu, va arova aghele ghaa righi nimasimasi etam ta Vau ngepona tani mene ateatea ngamasina tale urunguitanighi eteva ta Karisto. ²¹ Poli aghaiesoangaili tale nonganongo usilaam, liuna avalua o me apitipiti etam. Akilakila va aue ughelei oroi voto epona tale llo voto aghe kolomiola va ughelei.

²² Me mene kateva voto: uaimonomonosiaa tiulu rum nau aghatu aue atoka etana, poli aghaiesoaa va aue amae taraiem mausi niliu tale kaluimim nilooloo sae.

²³ Epapras angalu kaakaravusu eitauua ta Iesu Karisto, esuula masimasiaane etam. ²⁴ Me Mak tee me Aristakus, Diimas me Luk ila o lo atoa la uungu teeieeghi, la suula masimasiaaira.

²⁵ Alooloo sae va maamasinaane Vau ngepona ateva Iesu Karisto aue etoka tee kapuimim spiriti eteva.

* **1:11:** Tale inangari nge Grik, Onesimas malloeana va “ghelei masi niuungu eooroi”. **1:16:** 1 Tim 6:2. **1:22:** Plp 1:25; 2:24. **1:23:** Kol 1:7. **1:24:** Kol 4:10-14.

Uru ngai etikirighi ghe lao sio ta aHibru etoa Inangari emuemua

Karika ita kilakila va see ghe pitila ia oia uru ngai etikirighi, me karika ita kilakila va see ila lo atoa laghe ghaaiela, me tee karika ita kilakila va poli saa me ghe pitiela. Oroi inangari etana eauliaa aleira ale manga ajiu etoa me niaiaavusuvusuena atoa, liuna avalua o me oroi ila lo atoa la aikaiaa va lo atoa laghe ghaaiela ajiu ila.

Lo ateva ghe pitiela ghe auliaala vaalua Iesu me ouna ateva niaulia ngaitauaa elaulau pokane ateva niaulia ngaitauaa, Moses, me ensolo atoa. Ghe aauliaa kieira va la rau mene oghi vulu aaiesoaaира tale maamasinaane God. Tale airuuruu etoa sapta, ghe aaulia ngakorokorongana etaira va la tingina asarasarakana arongona ta mene katoa la tau lao nimmarikana, me ghe auliaala lo atoa uneira niaiesoaa namungaili, me tani aimuli tee Iesu me tani poso parasi tale niaiesoaa.

Tani kila amuemua

Aitiutiui tale inangari: Airuuruu eteva inangarina God, Natuna ia 1:1-4

Natuna God elaulau ensolo atoa 1:5-2:18

Niaulia ngatootoonga tale uunguuaa nitam aiesoaa 3:1-4:13

Natuna God namuu ia tale pristi ekapa atoa 4:14-7:28

Niaiaavusuvusuena kanna ia Iesu 8:1-10:18

Am mae akalakalangina ta God 10:19-25

Am tingina akorokorongana tale nimmarikana 10:26-12:29

Nilooloo sae, nimasimasi me airuuruu 13:1-25

Natuna ateva God, emuemuaaa ensolo atoa

¹ Emua arau, God ghe aaippooaa tee kateva kateva tale propete atoa tale oroi ase salana,* me ghe gheleilala va la ghauliaa inangarina ta tuvuita atoa. ² Me isaa oia tale airuuruu tale nau, God ghe aaippooaa teeitala ta Natuna. Ta getana God ghe gheleila kosa ateva, me ia God ghe suielaa va aue eghaa voto akapaaili. ³ Eaapasunga naanamungaane ateva God, me ia nim nonginaaili Tamane. Me tale inangarina ateva sarasarakanaaili ia, esuusuei voto akapaaili tale kosa ateva tani toka. Nau ghe ruula uunguuaa tani ghelei salana atikirighi tani ghelei eraarangisanaila tale kaluira ssavoto, ghe toka siola epona liu, tale pai muenna ativilau ta lo ateva sarakanaaili ia me iaaili epona, eaaimatoonga va matuutulienia ia. ⁴ Me ia God ghe anamunamunganeielaa ta ensolo atoa, nim nongina ararina atae God ghe taue lao sio etana namungaili ia ta ensolo atoa.

⁵ Poli God karika ghe ue ta teva ta kapuna ensolo atoa va,
“Io natughi io,

ghaine nge tamami ieghila.”

Me tee, karika God ghe uela ta teva ensolo va,
“Aue tamana etaghi,

* **1:1:** Katoa tau ngalomasaanga la annaa va malloeania isaa avalua toko va God ghe aaippooaa tale propete atoa tale oroi ase salana tale oroi nau. **1:2:** Jon 1:3. **1:3:** Jon 14:9; Kol 1:20; Hib 8:1. **1:4:** Plp 2:9. **1:5:** Sams 2:7; Apos 13:33; 2 Sam 7:14; 1 Kro 17:13.

me ia aue natughu ia.”

⁶ Ta nau God ghe maeaa sio natuna mua ateva tale kosa ateva, ghe uela va,

“Ila akapa kapuna ensolo atoa God la tani kkaueinia.”

⁷ Me tani auliaa ensolo atoa, God ghe uela va,

“Egheelei kapuna ensolo atoa va ila kuukuu ila

me kapuna tau ngai nongonongo anna atoa la kura ramerame.”

⁸ Me tani auliaa Natuna ateva, ghe uela va,

“God, aitokatokam ateva aue etoka liu.

Uaaitoiaa kapum taumattu ngatoa tale nighulughuluena.

⁹ Uuaailousiaa saa voto ghulughuluena, me usessa tee voto sesa,

liuna avalua o me God, kapum Goto ateva ghe suitoongainiola,

me ghe gheleei emasimasieilioli, me masimasiaam elaulau mene katoa kapum.”

¹⁰ Ghe mene uela va,

“Vau palepale, io ughe gheleila kosa ateva tale aitiutiu,

me ughe gheleila epona liu ta nimam.

¹¹ Aue la kapa, me io aue utoka.

Aue la poka nongina koloso aiaasae.

¹² Aue ughoula nongina koloso aiaasae pokane,

la aaikolikoliaa tani ghaa velu pokane aiaasae me tani asae ouna,

me io karika aue uaikolikoliaa,

me maamauluaam, karika airuuruu etana.”

¹³ Me God karika ghe ue ta teva ta ensolo atoa va,

“Toka siola tale pai muenna ativilau,

lomosina ta aghatoka sio lo atoa la sessa teeio euu

me uatingina saoaa kkem etaira.”

¹⁴ Me ensolo atoa saa ila? Ila spiriti ila la uungu ta God me esungisungila tani sausi lo atoa aue la ghaa niasaangi.

2

Salana atikirighi tani saanga

¹ Isaa avalua o me ita tani ailokoia ngamasina sa ateva ngita ghe nongoala, me karika aue ita mene tiu ppae tale inangari koronna. ² Poli marova inangari ensolo atoa laghe auliaala eaapasunga va koronna, me see etam nongo usilaa me etam aimuli tee aue eghaa sesa aipolipoli,

³ vaalua aue ita ttiuua sesa aipolipoli, marova ita rati ia o paka niasaangi eteva? Ia oia niasaangi eteva, Vau eteva ghe aitiutiula tani aulia

ngaotua, me lo atoa laghe nongola Vau eteva, laghe auliaala etaita va koronna ia. ⁴ God tee ghe apasunga ngaotula tale niaimatootoongana, asease mirikol, me voto Spirit Manga kanna ghe nim koitaala, tale aaloannaane.

Iesu ghe taumattula tani sausita

⁵ God karika ghe suila ensolo atoa va la toi ouna ateva kosa tani mae, ia oia ami aaulieinlia. ⁶ Me tale kateva voto, kateva ghe pitila tani ue va, “Saa taumattu ila me unannangailiila?

Vaalua me uitaraa nim taumattu ngatoa?

1:6: Diut 32:43; Rom 8:29. **1:7:** Sams 104:4. **1:8:** Sams 45:6-7. **1:10:** Sams 102:25-27.

1:13: Sams 110:1. **1:14:** Sams 34:7; 91:11. **2:2:** Gal 3:19. **2:3:** Hib 10:29; 12:25.

2:4: Mak 16:20; 1 Ko 12:4, 11. **2:6:** Sams 8:4-6.

⁷ Ugue gheleilala, tale tukuna nau, ila euu* ta ensolo atoa

me ughe anamunamungainilala tale nioneoneaa.

⁸ Me ughe atoka akapala voto va la aitaraa."

God ghe tau ekapa lao sio voto, karika ghe ghaa oghila righi, me tale isaa oia nau karika ita taatara va voto akapa etokatoka tale aitaraaира. ⁹ Ta ita tara lo ateva ghe gheleielala ghe siola euu ta ensolo atoa, Iesu etana. Me nau ghaine, God ghe anamungainiela tale nioneoneaa, poli ghe ghaala nimmarikana tale nimate mausiita, liuna avalua o me tale maamasinaane ateva God ghe lao sio tale nimate mausi taumattu ngakapa atoa.

¹⁰ God ghe gheleila voto akapaaili, me isaa akapa o voto ghe gheleila tani asaesae ararina ataeae, poli emaamasina va emaeaa oroi natuna epona liu tani toka teeia, liuna avalua o me ghe gheleila Iesu va eruu uunguaane tale nimmarikana, tani muemuua taumattu ngatoa tani saanga. ¹¹ Iesu me taumattu ngatoa egheelei emangaila, kateva nonga tamaira, liuna avalua o me Iesu karika epaapalata tani kolola va nengane ila. ¹² Eue va,

"Aue aghaulia ngaotu uunguaane ta kapughu etoa.

Me emua ta mataira, aue akkinari tani tau sae ararim ataeae."

¹³ Me emene ue va,

"Aue aghatoka tuutulighi ta God."

Me emene ue va,

"Aghi toko, tee me natughu etoa, God ghe taula mae sio etaghi."

¹⁴ Poli aliki etoa nim taumattu ila tale malatau me rae, Iesu ghe ia avaluela o. Liuna avalua o me tale matemateaane ia aue eroo tani turungi raroai eteva, ia euunusi sarasarakaniaa nimate. ¹⁵ Me aue easaangi lo atoa la maamatauta nimate ataeae tale maamauluaaira, nonginaaili va lo atoa la tokatoka tale karavusu. ¹⁶ Poli koronnaaili Iesu karika ghe sausila ensolo atoa ta tuvuna atoa Abraham. ¹⁷ Malloeane avalua o me Iesu, God ghe gheleielala nongina kapuna atoa tale isaa akapa salana, me aue eroo tani nongina pristi eteva namuu ia, me aue ealousiusi tee taumattu me aue eruu niuungu God ghe tau lao sio etana, tani ghelei salana va God aue eroo tani kkaluaa kaluira ssavoto taumattu ngatoa. ¹⁸ Poli ghe ghaala nitootoonga, me nimmarikana ghe mae sio etana, isaa avalua o me ia eroo tani sausi lo atoa nitootoonga emaemae etaira.

3

Iesu namuu ia ta Moses

¹ Liuna avalua o me, kapughu etoa am manga am, me am tee elome tale nikolokolo ngepona liu eteae, aghaloanna va am atoka nannaaimim ta Iesu, Apostolo ia me namuu ia ta pristi etoa, ia o ita aaulia ngaotua. ² Ghe gheelei emasinaaili uunguaane lo ateva ghe suiematoongainiela, nongina Moses ghe gheelei emasina uunguaane elome ta kapuna taumattu ngatoa God. ³ Nioneoneaa ta Iesu isaa epona ta Moses nongina lo ateva eatuutulu ale ateva eghaaghaa nioneoneaa isaa epona tale ale ateva eatuutulua. ⁴ Ta ale akapa tau ngai atuluna manee, me God ghe gheleila isaa akapa voto. ⁵ Moses ghe gheelei

* **2:7:** Ugue gheleilala, tale tukuna nau, ila euu o Ugue gheleilala mala euu. **2:9:** Plp 2:8-9.

2:11: Mat 25:40. **2:12:** Sams 22:22. **2:13:** Ais 8:17-18. **2:14:** 1 Jon 3:8; Aotu 12:10.

3:1: Hib 4:14; 7:26; Nam 12:7. **3:5:** Nam 12:7; Diut 18:15-19.

emasinaaili uunguaane nau ghe tau ngai uungula ta kapuna taumattu ngatoa God, ghe aaulia ngaotu sa ateva God aue eaulieinia tale nau too emaema. ⁶ Me Karisto Natuna ia God, me ghe aaitara ngamasina alena ateva God. Me ita alena ita God, arova ita sarasarakana tani tingina akorokorongana, me ita poso parasi tale uneita niaruaa tale voto ita taatara lao emua me karika ita ghe ghaa.

Niaulia ngatootoonga tale uunguaa nitam aaiesoaa

⁷ Liuna avalua o me, nongina Spirit Manga ateva eue va,
“Ghaine, arova am nongo lingi ngalona ateva,
⁸ am rou mene akorokorongana urunguitaniimim
nongina am ghe sassakeaa
nau nitootoonga tale voto ateva karika righi taumattu etana,
⁹ tale ia o voto ateva tuvuim atoa laghe tootoonganaghila tale ni-
tootoonga,
me ghaatingauluae (40) ninamanama laghe tarala sa ateva aghe
gheleielaa.
¹⁰ Liuna avalua o me ghe sessaieghila tale ia o vituu eteva,
me aghe uela va, ‘Urunguitanira etiutiu ppae nonga,
me karika la kilakila salaghi.’
¹¹ Liuna avalua o me tale sessaiaaghi aghe aulia ngaotula tale inangari
nialokoi va
karika poi aue la kupi sso tale uneghi niainoana.”

¹² Am tani taatara amasina, kapughu etoa, va karika teva etaimim
emene tau velu urunguitanina ateva va esesa me karika eaiesoaa me
eliuli vilina ta God ateva tokatoka liu ia. ¹³ Ta am asarasarakana
kateva kateva etaimim nau ekapa atoa, tale nau etiulu oia ita aseasea
va “Ghaine,” poli aghaaloanna va kamekameaa ssavoto ateva karika
emene akorokorongana urunguitaniimim. ¹⁴ Poli angita ghe aikapuka-
puua teela Karisto arova ita poso parasi tale kaluita niaikaaiaa, tale voto
ita ghe ghaa akasinala, lomosina ta elaa ghaa airuuruu tale voto akapa.
¹⁵ Nongina eauliaa va,

“Ghaine, arova am nongo lingi ngalona ateva,
am rou mene akorokorongana urunguitaniimim
nongina am ghe sassakeaa.”

¹⁶ See ila lo atoa laghe nongola me laghe sassakeaa? Am roo tani kila
va ila o lo atoa Moses ghe katulaa vellala eiIijip. ¹⁷ Me ghe sessaiela ta see
atoa ta ghaatingauluae (40) ninamanama? Am roo tani kila va ta lo atoa
laghe gheleila ssavoto me laghe matela me vilikiira ghe asola tale voto
ateva karika righi taumattu etana. ¹⁸ Me ta see atoa God ghe gheleila
inangari nialokoi va karika la mene kupi sso tale unna niainoana? Lo
atoa karika laghe nongo usilaala. ¹⁹ Liuna avalua o me ita taatara va
karika laghe roola tani kupi sso poli karika laghe aaiesoaa.

4

Niainoana nongina nau manga ateva ta kapuna taumattu ngatoa God

¹ Liuna avalua o me God ghe auliaala inangari nialokoi tale nau
niainoana ateva, me ia o inangari nialokoi eteva karika ghe ruu, ita tani
anna ngamasina va teva etaita erau tam kupi sso. ² Poli ngita ghe ghaala

3:7: Sams 95:7-11. 3:8: Eks 17:7; Nam 20:2-5. 3:11: Nam 14:21-23. 3:15: Hib 3:7-8.
3:16: Nam 14:1-35. 3:17: 1 Ko 10:10.

masi kiukiu laghe ppooaala etaita nongina aIsraeli etoa tee laghe ghaala ta Moses. Me inangari laghe nongola, karika ghe alutula righi masi voto etaira. Poli lo atoa laghe nongola karika laghe aikaaia ngaitauua teela lo atoa la ghe nongo usilaala.³ Isaa oia lo atoa ita aaiesoaa ita kupikupi sso tale ia o niainoana ateeae, nongina God ghe uela va,
“Liuna avalua o me tale sessaiaaghi aghe aulia ngaotula tale inangari nialokoi va

karika poi aue la kupi sso tale uneghi niainoana,”

arongo ta uunguaane ghe ruula nau ghe gheleila kosa ateva.⁴ Elome tale Uru ngai Manga ateva ghe auliaala nau ghaituna ateva, tale inangari isaa avalua toko va, “Tale nau ghaituna ateva God ghe ainoanala tale uunguaane akapa.”⁵ Me nongina ghe aulia ngakasinala mua va, “Karika poi aue la kupi sso tale uneghi niainoana.”

⁶ Liuna avalua o me ekookoronna va katoa aue la kupi sso tale ia o niainoana ateeae, me ta lo atoa laghe aulia ngakasinala masi kiukiu etaira, karika laghe kupi ssola poli laghe tam nonganongo usilaa.⁷ Liuna avalua o me God ghe mene suimatoongaala kateva nau, “ghaine,” nau ghe aulieiniela ta Deivit tale oroieili ninamanama atoa ngila ghe lao sio, nongina ghe auliaala emua arau va,
“Ghaine, arova am nonganongo lingi ngalona ateva,
am rou mene akorokorongana urunguitaniimim.”

⁸ Poli arova Josua ghe tau lao sio niainoana etaira, God karika aue ghe auliaa mene kateva nau.⁹ Liuna avalua o me niainoana nongina nau manga ateva etoitoi kapuna taumattu ngatoa God.¹⁰ Poli arova lo ateva ekupi sso tale niainoana kanna God, eaainoana tee tale uunguaane nongina God ghe ainoanala tale uunguaane.¹¹ Liuna avalua o me ita ghelei isaa akapa ase salana tani kupi sso tale ia o niainoana ateeae, me karika teva aue eaimuli tee ia o ase nitam nongo usila ngateva.

¹² Poli inangarina ateva God maulue ia, sarasarakana uunguaane me maamatarrokeane elaulau baenata ateva matarroke pai ekapa aluevilau. Erooro tanu uvi liuna tanu sso nongina nannaa me voto nongina nialousiusi lalu aaitiuaa, me aighoughou me llo etokatoka elome tale riu. Egheelei niaiskei tale ninannaa me gheeleiaa urunguitaniita ateva.¹³ Karika teva llo God ghe gheleila erooro tanu aisulia ta matane. Isaa akapaili voto karika aakou runga, ta matane etaatara akapa me ekilakila voto akapaili, me ta ngetana aue ita tanu auliaa sa ateva ita gheleielia.

Iesu namuu ia ta pristi ekapa atoa

¹⁴ Liuna avalua o me poli pristi eteva namuu ia, elaulau pristi ekapa atoa, ghe saela epona liu tanu aimatoongainita, Iesu etana, Natuna ia God, ita poso parasi tale kaluita niaikaaiaa ita aulia ngaotu.¹⁵ Poli karika va kapuita pristi eteva namuu ia etam rooroo tanu alousiusi tee kaluita saghuighuina, ta ia ghe ghaala nitootoonga tale isaa akapa salana nongina ita, me karika righi kanna ssavoto.¹⁶ Isaa avalua o me ita rou mene matautu tanu lao nongina God etokatoka, ia eaapasunga maamasinaane ta kapuna taumattu ngatoa, me aue ealousiusi teeita, me ita ghaa maamasinaane tanu sausita tale nau ita aaloanna niaisausi.

4:3: Sams 95:11; Hib 3:11. **4:4:** Aitiuti 2:2. **4:5:** Sams 95:11. **4:7:** Sams 95:7-8.

4:8: Diut 31:7; Jos 22:4. **4:10:** Hib 4:4. **4:12:** Ips 6:17; Aotu 1:16; 19:13-15. **4:14:** Hib 3:1; 10:23. **4:16:** Hib 10:19.

5

¹ Poli ila akapa namuu ta pristi etoa, nau God ange anna tani ghaa kateva elome ta taumattu ngatoa, esuisuitoongainia tani aimatoonga taumattu ngatoa tale niuungu kanna God, tani taula voto ta God me tani ghelei aiaavusuvusuena tani ghaa velu ssavoto. ² Ia karika aue esessai parasia tee lo atoa karika la kilakila amasina kasina tani voto me la tiutiu ppae, poli ie tee nim taumattu ia me saghuighuina ia. ³ Poli ie tee saghuighuina ia, liuna avalua o me etani ghelei sae aiaavusuvusuena tale kanna tani ssavoto me kaluira ssavoto tee taumattu ngatoa. ⁴ Karika teva erooroo tani nim ghaa nioneoneaa tale nim aaloannaane. God etani koloa nongina ghe kolola Eron.

⁵ Karisto tee karika va nim ia ghe asaesaela ararina ateae va namuu ia ta pristi etoa, ta God ghe uela etana va,

“Io natughu io,

ghaine nge tamam ieghila.”

⁶ Me ghe auliaala tale mene kasina inangari nipitipiti manga va,

“Io pristi io nau ekapa atoa

nongina Melkisedek.”

⁷ Tale nauna Iesu me maamauluaane tale kosa ateva oia, ghe gheleila nilooloo sae me nikkolomi sae tale nisausi tale ningala anamuun tee rarum mata ta lo ateva ghe roola tani asaangia tale nimate, me God ghe nongoala poli unna nioneoneaa ta lo ateva namuu ia etana.

⁸ Arongona ta Iesu natuna ia God, ghe ghaaghhaa alomasaanga tale uunguua ninongo usilaa, tale nimmarikana ghe ghaala. ⁹ Me nau God ghe ghelei emasina akapailiela, ghe liue salanala tale niasaangi eteae tokatoka liu ia ta lo akapa atoa la nonganongo usilainia. ¹⁰ Me God ghe suoitoongainiela va enamuu ta pristi etoa, nongina Melkisedek.

Niauliaa kieita tale uunguua nioghi vulu masi salana

¹¹ Oroieili voto ami anna tani auliaa tale isaa oia voto, me aanasa tani aulia ngamasalika poli karika ailuiluina am tani ghaa alomasaanga.

¹² Ang ghe alusela nau ngam ghe tau ngaiesoala, me isaa oia nau am ghele tau ngai aapasunga, me karika, ta etani maamasina va teva emene apasunga tau aatu voto eaitiutiu tale uunguua koronna tale inangarina ateva God tani mene laa tiuua. Karika am ghe roo tani nama inana korokorongana, ta am nongina aliki etoa la sussu. ¹³ Lo ateva esussu aliki ia, karika ekilakila llo masina me llo sesa. ¹⁴ Me inana korokorongana aneira matuenna atoa taumattu, ngila ghe tukatukaala tani ghelei masi voto. La rorooroo tani tara kila llo masina me llo sesa.

6

¹ Liuna avalua o me ita kasu vuli llo voto ngita ghe kila akasinala ta Karisto, me ita toka tau sae tale voto aue egheleita ita matuenna, me karika ita mene atingina ghaluene suena tale uunguua ninna ngaioghioghiaa tale voto ekaakatulainita lao tale nimate, me tale niaikaiaia ta God, ² niloeloe tale niaasuu, me tani saoaa nima, me nitotu tale nimate, me niaisakei eteae tokatoka liu ia. ³ Me aue ita ghelei isaa o voto, marova aloaloannaane God.

⁴ Lo atoa ngila ghe kilala aloannaane God, ngila ghe tootoongaala masi voto epona liu, me ila tee laghe aitauaala Spirit Manga ateva, ⁵ me laghe namunamuaala masi inangarina ateva God me sarasarakaniaane tale nau too emaemae, ⁶ marova la katuu vulu, karika mene tikirighi salana tani mene oghi mae tale uunguaa ninna oghioghiaa. Tale isaa o llo la gheelei, la mene aavukala sae Natuna ateva God tale aikotoo, tani mene apalataia ghaluene tale tummatavanga. ⁷ Poli llo kosa vaoo ateva ekaakatuu etana oroi nau, eaapinosa amasina inana umana lo ateva ghe pasala. Ia o ase kosa ateva eghaaghhaa niarangise ta God. ⁸ Me llo kosa eapinosa uasa karasa me llo uasa rorroana aue epeisaane, karika masau me aue eghaa nikasikienaa, me aue airuuruu ia o ase kosa ateva aue eataia.

⁹ Masi kapuimami etoa, arongona ta ami aaippooa ngavalua o, ami aaikaaiangaili va masi voto aue elutu etaimim, voto elaoalo aitauua tee nisaanga. ¹⁰ God karika va sesa taumattu ia, karika erooroo tani kkaluua uunguaaimim me aailousiaaimim am ghe apasungaala etana, nau am ghe sausila kapuna taumattu ngatoa tale nau too me isaa tee oia. ¹¹ Ami aaloanna va kateva kateva etaimim eapasinga ia o ase niuungu eteva, me karika am mene mangoo vulua lomosi ta airuuruu, me saa voto am toitoi tani ghaa, aue am vira mene ghaa. ¹² Karika ami anna va am mangoona ta am ghelel nongina lo atoa uneira niaikaaiaa karika ekaakatuu tani toitoi, tani ghaa voto aue ekaluira God ghe auliaala tale inangari nialokoi.

Kinatama inangari nialokoi kanna God

¹³ Nau God ghe gheleila kanna inangari nialokoi ta Abraham, ta poli karika teva mene namuu ia etana tani auliaa inangari koronna, eghe nim auliaala tale ararina ateeae. ¹⁴ Ghe uela va, “Aghaaulia ngakoronna va aue agharangiseio me atau aatu oroeilei tuvum atoa.” ¹⁵ Me nau eteva Abraham ghe tam mangoola tani toitoi, Abraham ghe ghaala voto God ghe auliaala ta ngetana tale inangari nialokoi.

¹⁶ Taumattu ngatoa la ghaauliaa inangari niaulia ngakoronna sae* ta lo ateva taumattu ararina ateeae namuu ia etaira, me isaa o inangari niaulia ngakoronna sae egheelei ekoronna sa ateva la ghaaulieinia, me eruuruu ekapa niaissakeana. ¹⁷ God ghe gheleila inangari nialokoi ta Abraham, me ghe aaloanna va lo atoa aue la ghaa isaa o voto la kila amasina va karika aue eaikolikoliaa nannaane, liuna avalua o me ghe auliaala inangari niaulia ngakoronna sae. ¹⁸ God ghe gheleila ilalua o voto alua, inangari nialokoi me inangari niaulia ngakoronna sae ta God, me ilalua o voto alua karika lalu aaikolikoliaa, me God karika erooroo tani kamekame. Ita lo atoa ita ghe iloula tani laa poso tale nitaatara lao emua, aue ita ghaa namuu niaisiausi. ¹⁹ Nitaatara lao emua isaa etaita nongina angga ngateva tale maamauluaaita, korokorongana ia me karika aue eaisiisia. Ghe kупи ssola elome tale rum mangaaili etiulu, emuli tale kalio atiulu. ²⁰ Tale ia o voto ateva Iesu ghe muemueinitala tani sso etana, ghe kупи ssola mausiita. Ia kapuita pristi ia namuu ia tokatoka liu ia, nongina Melkisedek.

6:6: Mat 10:22; Hib 10:26-27; 1 Jon 5:16. **6:8:** Aitiuti 3:17-18; Mat 13:7, 22. **6:10:** Hib 10:32-34. **6:13:** Aitiuti 22:16-17. * **6:16:** auliaa inangari niaulia ngakoronna sae Taumattu ngatoa la ghaulia ngakoronna sae tale ararina ateeae God. **6:18:** Nam 23:19. **6:19:** Lev 16:2-3.

Melkisedek pristi ia

¹ Ia oia Melkisedek, kingi ia eSalem me pristi ia ta God iaaili epona, ghe soula Abraham nau ghe kiriaala tale niaiuvi eteae nau ghe apalala kingi etoa, me Melkisedek ghe arangiseiela. ² Me Abraham ghe tau lao sio ta Melkisedek aiaasokolo tale isaa akapa voto. Aitiuti, ararina ataeae, malloeana va “kingi ia tale nighulughuluena”, me tee, “kingi ia eSalem,” malloeana va “kingi ia tale luei.” ³ Karika righi kiukiuna va ia see ia, karika teva tamane me karika teva kinna, me karika toa tuvuna, me karika righi aitiuti tale nauna, o airuuruu tale maamauluaane, nongina Natuna ateva God, ia pristi laalaa liu ia.

⁴ Am nim nnaa va ararina ataeae namuu ia, poli Abraham, tuvuira ia ajiu etoa, ghe taula aiaasokolo tale voto ghe sarila ta tau ngai ssateena atoa. ⁵ Tale inangari nipaopao, kateva inangari niaulia ngakorokorongana eue va mangalina atoa Livae ila pristi ila la ghaa aiaasokolo ta kapuira atoa alsraeli ila, arongona ta ila tee kapuira me mangalina ila Abraham. ⁶ Me ia oia taumattu ngateva, arongona ta karika mangalina ta Livae, me ghe nim ghaala aiaasokolo ta Abraham, me ghe arangisela lo ateva ghe ghaala inangari nialokoi. ⁷ Me karika teva erooroo tani ue va kamena va, lo ateva taumattu ararina ataeae epona, eaarangise lo ateva taumattu ararina ataeae euu. ⁸ Ila akapa pristi etoa laghe ghaala aiaasokolo, angila ghe matela, me Melkisedek, ghe ghaala aiaasokolo ta Abraham, Uru ngai Manga ateva karika eue va ghe matela. ⁹ Kateva aue eroo tani ue va Livae, ghe ghaagħha aiaasokolo, ghe taula aiaasokolo nau Abraham ghe tau lao sio ta Melkisedek, ¹⁰ poli nau Melkisedek ghe soula Abraham, Livae elome ta vilikina Abraham, poli tuvuna ia.

Iesu nongina Melkisedek

¹¹ Arongona ta inangari nipaopao kanna Moses eue va pristi etoa la tani mae tale ararimangalina ateva Livae, uunguaaira pristi etoa karika erooroo tani ghelei eghulughuluena teva. Liuna avalua o me mene kateva pristi etani mae nongina Melkisedek, me karika va nongina Eron. ¹² Poli arova righi niaikolikolaa ta pristi etoa me uunguaaira, inangari nipaopao tee aue etani aikolikolaa. ¹³ Ia oia lo ateva eaaulieinia ararimangalina ppae ateva, me karika teva tale ia oia ararimangali eteva ghe uungu tale liu nighelei aiaavusuvusuena. ¹⁴ Poli masalikeaili va Vauita ateva ghe lutula tale ararimangali eteva ta Jiuda, me tale ia o ararimangali eteva Moses karika ghe auliaala righi voto va pristi ila. ¹⁵ Me sa ateva ami ghe aulieiniela masalikeaili ia va arova mene kateva pristi nongina Melkisedek ekauerekati, ¹⁶ ia lo ateva ghe pristila karika esuisui kkai tale inangari nipaopao nongina tuvuna atoa. Ta esuisui kkai tale sarasarakaniaa lo ateva maulue karika aue ekapa. ¹⁷ Poli laghe aulia ngaotula va,

“Io pristi io nau ekapa atoa
nongina Melkisedek.”

¹⁸ Llo voto tani aimuli tee emua arau ang ghe vullala poli maomaona me sesa ¹⁹ (poli inangari nipaopao karika erooroo tani ghelei eghulughuluena teva voto), me masi voto ghe kauerekatila, ita taatara lao emua etana, eaaulia ngaotu isaa o voto egheeleita va ita rooroo tani lao akalakalaa ta God.

²⁰ Me karika va karika righi inangari niaulia ngakoronna sae ta God. Katoa laghe pristila me karika righi inangari niaulia ngakoronna sae laghe gheleila, ²¹ me ia ghe pristila tee inangari niaulia ngakoronna sae nau eteva God ghe uela etana va,

“Vau ngepona ang ghe aulia ngakoronnala

me karika aue eaikolikoliaa nannaane:

‘Io pristi io nau ekapa atoa.’”

²² Mausi ia o inangari niaulia ngakoronna sae ta God, me Iesu ghe tau mae sio masina ateva inangari niaippooa ngaitauaa.

²³ Ghe ooroieili pristi etoa, poli karika laghe rooroo tani ghelei uunguairia pristi etoa nau ekapa atoa poli uunguua nimate ateva. ²⁴ Me poli Iesu etokatoka nau ekapa atoa, ia lo ateva pristi karika aue eruu.

²⁵ Liuna avalua o me nau ekapa atoa ia erooroo tani asaangi lo atoa la mae ta God tale ararina ateae, poli ia etokatoka nau ekapa atoa tani kolomi niaisausi ta God mausiira.

²⁶ Poli emaamasina va aue ita ghaa ia oia ase namu ngateva tani pristi, ta ia etautau rooroaa aloaloannaaita. Ia manga ia, karika la ghaaliu teeia tale righi voto sesa, raarangisana ia, karika etokatoka aitauaa tee ssavoto, me God ghe atokiae saela eponaaili. ²⁷ Karika nongina mene katoa namuu ta pristi etoa, karika erooroo va ghe toka gheelei aiaavusuvusuena nau ekapa atoa, etiuua mua tale kanna ssavoto, vara me tale kaluira ssavoto taumattu ngatoa. Me ia, ghe gheleila aiaavusuvusuena tale kaluira ssavoto taumattu ngatoa katengaata nonga, nau ghe tauve lao sio arova voto la gheelei sae aiaavusuvusuena etana. ²⁸ Poli inangari nipaopao esuisuitoongaa namu ngatoa ta pristi etoa nim taumattu ila, arongona ta maomaona ila, me inangari niaulia ngakoronna sae ta God, ghe mae sio emuli tale inangari nipaopao, ghe suoitongala Natuna ateva, God ghe ghelei eghulughuluena laalaa liuela.

8

Namu ngateva pristi tale ouna inangari niaippooa ngaitauaa

¹ Liuena voto ami aauliaa isaa avalua toko, va ia o pristi eteva namuu ia etokatoka, me ghe toka siola tale pai muenna ativilau ta God epona liu. ² Me euungu tale voto ateva manga ia, lo ateva ale kandisi manga ia koronna ia Vau ngepona ghe atinginaie saela, karika va taumattu.

³ Ila akapa namuu tale pristi etoa la suisuitoongainila tani taula voto ta God me tani ghelei aiaavusuvusuena. Liuna avalua o me ghe masinala va lo ateva tee oia ie tee ghe tau sae teva voto tani tau lao ta God. ⁴ Arova ia tale kosa ateva oia, karika aue ghe pristi, poli taumattu ang ghe tokala laghe tautau sae voto ta God, nongina inangari nipaopao ghe auliaala. ⁵ Laghe uungu tale voto ateva manga ia taataraane me tootoona llo voto epona liu. Liuna avalua o me God ghe auliaala kienaa

7:19: Hib 10:22; Jms 4:8. **7:21:** Hib 5:6. **7:22:** Hib 8:6; 12:24. **7:25:** Rom 8:34.

7:27: Hib 5:3. **8:5:** Kol 2:17; Hib 9:23; Eks 25:40.

Moses nau ang ghe anna tani ghelei ale manga ateva kandisi ia, ghe uela etana va, "Utani tara amasina va ughelei isaa akapa voto nongina taataraa lo ateva ughe taraiela tale motouru." ⁶ Ta poli niuungu Iesu ghe ghaala elaulau uneira pristi etoa, me inangari niaippooa ngaitaua ngateva Iesu ghe gheleiela elaulau pokane ateva, poli etokatoka tale masi inangari nialokoi.

⁷ Poli arova karika righi sesa tale aitiutiu eteva inangari niaippooa ngaitauua, karika righi uunguaane aiaaghaluene ateva tani koliaa aitiutiu eteva. ⁸ Poli God ghe tarala kaluira sesa voto taumattu ngatoa me ghe uela va,

"Vau ngepona ghe auliaala va: Nau too emaemae
aue aghelei ouna ateva inangari niaippooa ngaitauua
tee taumattu nge Israeli etoa me ajiuda ngatoa.

⁹ Karika aue enongina lo ateva inangari niaippooa ngaitauua
aghe gheleiela ta tuvuira atoa
nau aghe kunela nimaira
me aghe katulaa vellala tani kasu vuli eIjip,
poli karika laghe aaimuli emasina tee kalughu inangari niaippooa
ngaitauua,
aghe liula vilighi etaira,

Vau ngepona ghe aulia ngaotula.

¹⁰ Vau ngepona ghe mene aulia ngaotula va, vara isaa o nau elange,
inangari niaippooa ngaitaua ngateva aue agheleia ta taumattu
nge Israeli etoa,
ia avalua toko va:

Aue aghatoka kalughu inangari nipaopao tale nannaaira
me aue apitia tale urunguitaniira
me aghi aue kapuira Goto ieghi,
me ila aue la kapughu taumattu.

¹¹ Karika teva taumattu aue emene apasunga ta lo ateva etokatoka
akalakalangina teeia
o ta teva tuena o nengane tani ue va, 'Ukila Vau ngepona ateva.'

Poli ila akapa aue la kilaieghi,
lo atoa matuutulienaa ila me lo atoa karika matuutulienaa ila.

¹² Ta aue akkaluaa sesa gheeleiaairaa,
me karika aue atoka nannaakaaluira ssavoto."

¹³ Nau ghe aauliaa ia oia inangari niaippooa ngaitaua ngateva va ouna ia,
ghe gheleiela aitiutiu eteva ghe vullaiela poli ang ghe pokala me aue ekapa.

9

Nikkauua tale ale kandisi eteva

¹ Tale aitiutiu eteva inangari niaippooa ngaitauua, God ghe alokoila kasina salana tani usilaa tale uunguaan nikkaauaa, me tee ale nikkaaua ngateva ghe tokatoka tale kosa ateva oia. ² Ale kandisi eteva oia laghe gheleiela, ghalulu rum elome ta getana. Tale aitiutiu etiulu rum, aitiitinginane ateva lam ateaetee me tevoo ateva aiatoka verete laghe amangala, ia o rum atiulu, la kolokoloa va rum atiulu manga ia. ³ Emuli tale aiaaghala atiulu kalio, rum atiulu laghe aseasea va

rum atiulu mangaaili ia. ⁴ Elome ta ngetana olta ngateva gheelei ia tale gol, me vokisi eteva eaaimatoonga inangari niaippooa ngaitauua gheelei ia tee tale gol. Elome ta ngetana aikaai mena ngateva gheelei ia tale gol, me aikkatuluna atiulu Eron ghe kuneaala pusi ngai, me tee inangari nipaopao laghe pitila tale atu elua. ⁵ Epona tale vokisi eteva keruvim alua, lalu aaimatoonga va God etokatoka tale ia o voto ateva, kaekaeirarua ghe aakou aikou vokisi eteva, voto ateva God ekakkaluua ssavoto etana. Me ghaine karika righi nau tani aulia ngamasina akapa isaa oia voto.

⁶ Nau isaa akapaaili voto laghe atoka avaluela o, nau ekapa atoa pristi etoa laghe soso tale aitiutiu etiulu rum tani ghelei uunguaaira. ⁷ Me namu ngateva ta pristi etoa ia nonga ghe soso tale aiaaghaluene atiulu rum, katengaata nonga tale kateae ninamanama, me karika va nim ia, ta ghe sosoaa tee rae, tani ghelei aiaavusuvusuena ta ngetana me tee tale ssavoto kaluira taumattu ngatoa laghe gheelei me karika laghe kilakila va sesa. ⁸ Tale isaa oia voto, Spirit Manga ateva eaapasunga va ia o salana atikirighi tani sso tale rum atiulu mangaaili ia, karika ghe otia va taumattu ekupi sso poli aitiutiu etiulu rum, ia etokatoka. ⁹ Isaa akapaaili o voto eaaimatoonga ia oia nau etiulu, me eaaimatoonga va voto ita tautau lao me aiaavusuvusuena ita gheelei sae, karika erooroo tani ghelei emasalika nannaaira tau ngai kkaua ngatoa la tautau lao isaa o voto. ¹⁰ Isaa oia voto la nim gheelei tale inana me manu, me asease niuungu tani pora sesa gheeleiaaira taumattu ngatoa. Isaa oia voto nim salana ila tani ghelei eleka tale vilikiira, aue la toka lamosina ta nau eteva God aue eatoka ouna voto tani usilaa.

Raena ateva Karisto

¹¹ Nau Karisto ghe mae sio nongina teva namuu ta pristi etoa, tale masi voto ang ghe atoka akasinala oia* tale ouna ateva inangari niaippooa ngaitauua, eghe lao sio tale masinaaili me koronna ateva ale kandisi, karika va taumattu ngatoa laghe gheleielia, me ita roo tani ue va, karika va laghe gheleielia tale kosa ateva. ¹² Karika ghe kupi ssola tale mangaaili etiulu rum tee rae meemee me natu vulumakao, ta ghe kupi ssola katengaata mausiita akapaaili tale raena ateva, tani ghaa nisaangi eteva tokatoka liu ia. ¹³ Inangari nipaopao ghe uela va la kaokao sae rae meemee me vulumakao me aunna aliki vase ateva vulumakao laghe tungitungia ta lo atoa karika raarangisana ila tani ghelei eraarangisanaila me tani amangaila, arongona ta laghe ghelei eraarangisana nonga vilikiira. ¹⁴ Arova ia avalua o, raena ateva Karisto korokoronganainaili ia tani ghelei eraarangisanaita. Tale sarasarakaniaane Spiriti eteva tokatoka liu ia, Karisto ghe tauve mae sio nongina lo ateva aiaavusuvusuena sae ta God karika righi voto sesa etana. Ghe ghelei eraarangisanala nannaaita tale ase niuungu elaolaoainita tale nimate, me tani uungu ta God ateva tokatoka liu ia.

¹⁵ Liuna avalua o me Karisto ghe alokoila lo ateva o ouna inangari niaippooa ngaitauua. Ghe ghelei evaluela o poli ghe aaloanna va lo atoa ghe suitoongainilala la rooroo tani ghaa masi voto ghe aulia ngalokoila tale inangari nialokoi eteva tokatoka liu ia — ia ghe matela

9:4: Eks 16:33; 25:10-16; 30:1-6; Nam 17:8-11; Diut 10:3-5. **9:5:** Eks 25:18-22. **9:6:** Nam 18:2-6. **9:7:** Lev 16:2-34. **9:9:** Hib 10:1-2. * **9:11:** masi voto ang ghe atoka akasinala oia Kasina uru ngai laghe pitila, laghe uela va, masi voto aue emae. **9:13:** Lev 16:15-16; Hib 10:4; Nam 19:9, 17-19. **9:14:** 1 Pita 1:18-19.

tani poli aoghi me tani gheleila me la saanga tale ssavoto laghe gheleila tale pokane ateva inangari niaippooa ngaitauua. ¹⁶ Nim nongina tale inangari niaippooa ngaitauua ngateva, kateva etani mate. ¹⁷ Poli ia o inangari niaippooa ngaitauua ngateva esarasarakana nau lo ateva ghe aulia ngalokoielo ange matela. Karika righi sarasarakaniaane inangarina nau taumattu ngateva maulue ia. ¹⁸ Liuna avalua o me aitiutiu eteva inangari niaippooa ngaitauua laghe gheelei tee rae. ¹⁹ Nau Moses ghe aulia ngaotula isaa akapaaili inangari nipaopao ta ila akapa taumattu ngatoa, ghe ghaala raeira natu vulumakao atoa me meemee atoa, me tee manu, me uu sipsipi raeraeanaaili me laangi isopi me ghe aakaokao sae tale vuku eteva me ila akapa taumattu ngatoa, ²⁰ me ghe ue va, “Ia oia raena ateva inangari niaippooa ngaitauua ngateva, ia God ghe tani aulieiniela va am aitarainia.” ²¹ Tale ia nonga o salana atikirighi ghe aakaokao sae rae tale ale kandisi eteva me tale isaa akapaaili voto laghe uunguua tale asease uunguua nikkaua. ²² Koronnaaili, tale inangari nipaopao gharighi tau isaa akapaaili voto laghe ue va la ghelei eraarangisana tale rae ateva, me marova karika rae ghe akaakala, karika righi nikkaluaa.

²³ Isaa oia voto nim tootoo tale voto koronna epona liu, emaamasina va isaa akapaaili o voto tale kosa ateva la tani ghelei eraarangisana tale aiaavusuvusuena, me voto ngepona liu, ghe ghelei eraarangisanala tale masi aiaavusuvusuena elaulau voto tale kosa ateva. ²⁴ Poli Karisto karika ghe kupi ssola tale lo ateva o ale nikkaua taumattu ngatoa laghe gheleielo, nim tootoona ia lo ateva koronna ia; eghe kupi ssola epona liu, tani tingina emua ta matane God mausiita. ²⁵ Karika ghe kupi ssola epona liu tani mene taue mae ta ngetaita oroiaata, nongina salana atikirighi namuu ta pristi etoa ghe kupikupi sso tale rum atiulu mangaaili ia tale isaa akapaaili ninamanama tee rae, karika va raena. ²⁶ Arova isaa avalua o, ghe tiuala tale aitiutiu tale kosa ateva, aue oroiaata Karisto aue ghele nim toka matemate. Me isaa oia ghe mae sio katengaata nonga mausiita tale airuuruu tale nau, tani ghaa velu ssavoto nau ia ghe gheleila niaiaavusuvusuena tale vilikina. ²⁷ Nim nongina taumattu ngatoa aue la mate katengaata, me emulina aue la tingina tale niaisakei, ²⁸ Karisto ghe gheleila aiaavusuvusuena ta ngetaita katengaata, tani ghaa velu kaluita ssavoto; me ia aue emae aghaluene, karika va tani mene ghaa velu kaluita ssavoto, ta emae tani tau mae niasaanga ta lo atoa la toitoia.

10

Karisto ghe aiaavusuvusuena katengaata ta ngetaita akapa

¹ Inangari nipaopao nim tootoo tale voto masina aue emae, karika va tani koronna isaa o voto. Liuna avalua o, me aiaavusuvusuena la nim toka gheelei tale ninamanama atoa, karika erooroo tani ghelei eghulughuluena lo atoa la laolao akalakalaa tani kkauua. ² Aiaavusuvusuena karika erooroo tani ghelei eraarangisanaila, liuna avalua o me karika laghe ruuruu tani toka gheelei sae aiaavusuvusuena. Arova tau ngai kkauua ngatoa laghe raarangisanala, karika aue la ghe ateateaa maamatana tale kaluira ssavoto. ³ Me isaa o aiaavusuvusuena la gheelei

katengaata tale kateae ninamanama emene gheeleita ita mene nannaa kaluita ssavoto. ⁴ Poli raeira vulumakao atoa me meemee atoa karika erooroo tani ghaa velu ssavoto.

⁵ Liuna avalua o me nau Karisto ghe sio mae tale kosa ateva, ghe uela va,

“Aiaavusuvusuena me opring karika ughe aanna,
ta viliki eteva ughe aimonomonosieiniela etaghi.

⁶ Tee, aiaavusuvusuena eataata akapa me aiaavusuvusuena tale ssavoto karika ughe masimasiaala.

⁷ Vara me aghe uela va, ‘Aghi toko — laghe pitila me laghe aulieinaghila tale Uru ngai Manga ateva —
aghe sio mae tani ghelei aloaloannaam, God.’ ”

⁸ Aitiuti ghe uela va, “Aiaavusuvusuena me opring, me aiaavusuvusuena eataata akapa me aiaavusuvusuena tale ssavoto, karika ughe aloannala, me karika ughe masimasiaala” (arongona ta inangari ni paopao eue va la ghelei). ⁹ Vara me ghe uela va, “Aghi toko, aghe sio mae tani ghelei aloaloannaam.” Ghe ghaa vella aitiuti eteva tani atoka aiaaghluene ateva. ¹⁰ Me tale ia o aloaloannaane ateva, ang ghe ghelei emangaitala tale aiaavusuvusuena tale vilikina Iesu Karisto katengaata ta ngetaita akapa.

¹¹ Nau ekapa atoa pristi etoa la tiitingina tani ghelei uunguaaira tale ale nikkaua ngateva; nim isaa aitauaa nonga aiaavusuvusuena atoa la nim toka gheeleia, karika erooroo tani ghaa velu ssavoto. ¹² Me nau eteva Karisto ghe gheleila ia o aiaavusuvusuena ateva mausi ssavoto ateva, katengaata nonga, ghe toka siola tale pai muenna ativilau ta God. ¹³ Tale isaa o nau etoittoi tau ngai ssateena atoa va God eatokaila sio euu me eatingina sae kkena etaira. ¹⁴ Poli tale kateva nonga aiaavusuvusuena me Karisto ghe ghelei eghulughuluena lo atoa God eaamangaila.

¹⁵ Spirit Manga ateva tee ghe asokoila etaita isaa oia voto. Aitiuti ghe uela va,

¹⁶ “Inangari niaippooa ngaitaua ngateva aue agheleia ta ngetaira, va vara isaa o nau elange,

Vau ngepona ghe aulia ngaotula va aue ia avalua toko.

Aue aghatoka kalughu inangarighi nipaopao tale urunguitaniira,
me aue apitia tale nannaairaa.”

¹⁷ Vara me ghe mene uela va,

“Kaluira ssavoto me gheeleiaaira karika elaoalao aitauaa tee inangari
nipaopao,

karika poi va aue amene annaa.”

¹⁸ Me nau isaa oia voto ang ghe kkaluaala, karika mene righi uunguaa nighelei sae aiaavusuvusuena.

Nikolokolo atae tani tingina asarasarakana

¹⁹ Liuna avalua o, kapughu etoa, karika ita roo tani mene matautu tani kupi sso tale rum atiulu mangaaili ia mausi raena ateva Iesu.

²⁰ Ghe otile ouna atikirighi salana etautau mae maulue ateva, tani kupi sso tale kalio atiulu, ia o vilikina ia. ²¹ Me poli ia kapuita pristi

eteva iaaili epona tale alena ateva God,²² ita lao akalakalaa ta God tee koronna urunguita pasu tale niaikaaiaa. Poli tale raena ateva Iesu ghe pora araarrangisanaitala tale sesa ninannaa, me ghe porala vilikiita tale manu raarangisanaaili.²³ Ita poso parasi tale nitaatara lao emua ita ghe aulia ngaotula me ita rau mene amaramara, ta lo ateva ghe auliaala isaa o voto, aue eghelei eroorooaa.²⁴ Me ita tee, ita mene annaa righi ase salana vaalua tani aisausiaa mene katoa tale niaielousi me tale masi niuungu.²⁵ Karika ita mene mangoo tani mae kkaua ngaitauua, nongina katoa la gheelei. Me nau ekapa atoa am asarasarakana mene kateva kateva, poli am taatara va nauna ateva Karisto tani sio ange aakalakalaa.

²⁶ Marova ita nim tok a gheelei ssavoto, me arongona ta ngita ghe ghaala alomasaanga tale voto koronna, karika mene teva aiaavusu-vusuena tani mene kkaluua kaluita ssavoto.²⁷ Me karika, aue ita matautu nau ita totoi nau niaiskei kanna God, me kura ataeatataaaili ia aue emae tani ata tau ngai ssateena atoa God.²⁸ See ghe ratila inangari nipaopao kanna Moses, me marova ghalua o kotolu taumattu laghe aasokoi voto sesa ghe gheelei, karika righi nialousiusi etana, laghe tani uviivi ematea.²⁹ Me vaalua ta lo ateva taumattu easaasa tau sio Natuna ateva God? Egheelei raena ateva Natuna ateva God ghe amangaiela va karika manga ia, me tee eaauliaa saasakiaa ta Spirit eteva eaapasunga maamasinaane God.³⁰ Poli ita kilakila lo ateva ghe uela va, “Aghi aue aliu me aghelei saasakieinila.” Me ghe uela tee va, “Vau ngepona ateva aue eghelei niaiskei tale kapuna taumattu ngatoa.”³¹ Matautunaaili tani lau tale nimana God ateva tokatoka liu ia.

³² Am nnaa isaa too nau ang ghe lao sio, nau eteva am ghe ghaala mallanga ateva, am ghe ghaala orioeili voto sesa, me isaa o voto karika ghe gheleiemla va am ghe katuula.³³ Kasina nau laghe aauliaa saasakiaa teeiem me laghe gheelei voto etaimim karika poi masina ta mata ngoroi etoa, me kasina nau am ghe aaimonomonosiaa tani lao aitauua tee tau ngaisesoa ngatoa laghe gheelei saasakieinila.³⁴ Am ghe aalousiusi tee tau karavusu etoa me am ghe saasausila, me nau peiimim laghe sarasarakana tani nim ghaa tale aloannaaira, karika am ghe aalousiusi tee peiimim, ta am ghe masimasi, poli am ghe kilakila va voto masinaaili etokatoka, me aue etoka nau etoa, isaa epona liu.³⁵ Liuna avalua o me am rou mene velu kaluimim nimatuutulienaa ta God, poli aue am ghaa aipolipoli eteva namungaili ia.³⁶ Am tani tingina akoronna tani gheelei aloaloannaane God, me aue am ghaa saa llo ghe auliaala tale inangari nialokoi.³⁷ Poli,

“Karika masauna arighi

me lo ateva taumattu ange maemae aue emae me karika aue aippetana,

³⁸ me tale niaikaaiaa kapughu tau ghulughuluena ateva aue etoka maamaulue

me arova eoghi vulu isaa o voto,
karika aue amasimasieinia.”

39 Poli ita karika nongina lo atoa la oghioghi me nitturuu eghaaghaila, ta nongina lo atoa la ghaisoaa me la saasaanga.

11

Tale niaikaaiaa

¹ Niaikaaia ngateva ia avalua toko va ita aiesoaa va ae ita ghaa llo emua etaita, me eaapasunga va ita rooroo tani kila va ae ita ghaa voto ita tam taatara. ² Tale isaa o ase voto, me lo atoa emua arau laghe ghaala niaruua ta God.

³ Tale niaikaaiaa ita kilakila va tale niaulia ngasarasarakanan tale inangarina God, me kosa ateva ghe lutula. Liuna avalua o me voto ita taatara ghaine, karika God ghe gheleilala tale voto ita rooroo tani tara.

⁴ Tale niaikaaiaa, Eibol ghe ghelei saela lo ateva aiaavusuvusuena masina ia ta God me ta lo ateva Kein ghe gheleielia, me tale unna niaikaaiaa, God ghe arueiniela va ghulughuluena ia nau ghe ppooaala masimasiaane tale unna aiaavusuvusuena. Arongona ta ghe matela, esamasama ta ngetaita tale unna niaikaaiaa.

⁵ Tale niaikaaiaa me God ghe ghaa saela Inok epona liu me karika ghe ateateaala nimate. Karika laghe roola tani mene tarai, poli God ghe ghaaiela. Auena God ghe ghaaia, laghe aaulieinia va God ghe masimasiaenia. ⁶ Me karika ita rooroo tani amasimasi God arova karika righi niaikaaiaa. Polilo ateva elao etana etani aiesoaa va God etokatoka, me etautaula aipolipoli ta lo atoa la tani paepaea.

⁷ Tale unna niaikaaiaa Noa, nau God ghe auliaala kienan tale llo karika ghe tara, tale nioneoneaa tale inangarina God ghe atulula aka ateva tani asaangi vausenna ateva me natuna atoa. Tale niaikaaiaa ghe aulia ngaotula ta taumattu ngatoa tale kosa ateva oia va sesa ila me ghe ghaala nighulughuluena tale uunguaa niaikaaiaa.

⁸ Tale niaikaaiaa, Abraham ghe nongo usilaala nau God ghe koloala tani lao tale voto ateva auena ae ghe ghaaia va ghe kannia ia, arongona ta ghe tam kilakila va eaa ghe laolao. ⁹ Tale niaikaaiaa, ghe tanganuenala tale masaliki eteae God ghe aulia ngalokoiela, nongina ativuu eteva tale anua karika anuena. Ghe tokatoka tale ale kandisi, nongina Aisiki me Jekop ila tee elome tale ia o inangari nialokoi eteva. ¹⁰ Poli ghe taatara lao emua tale lo atea masaliki taatara tokatoka liu ia, me lo ateva ie nonga ghe nnainiela me ghe atuluela, God ta ngetana. ¹¹ Tale niaikaaiaa, arongona ta Abraham ang ghe taita namuula, me Sera kina ngere ia, karika ghe roola tani alakuti aliki, me ghe tamaneiela aliki eteva ghe lutula. Poli ghe tarala va lo ateva ghe auliaala inangari nialokoi, ae eghelei llo ghe auliaala. ¹² Liuna avalua o me ta kateva nonga ia taita, nongina va matena ia, ghe alutula kolenganina atoa, ooroiaira nongina katto atoa elomarase me rira atoa elosamarra, karika ita rooroo tani ira.

¹³ Ila akapa o taumattu ngatoa laghe tokatoka tale niaikaaiaa nau laghe matela. Karika laghe ghaala voto God ghe auliaala tale inangari nialokoi. Laghe tara amasau lao sio, me laghe masimasila, me laghe aulia ngaotula va ila ativuu ila me karika tanganueira tale ia oia kosa

11:1: 2 Ko 5:7. **11:3:** Aitiutiu 1:1; Sams 33:6; Jon 1:3. **11:4:** Aitiutiu 4:3-10. **11:5:** Aitiutiu 5:21-24. **11:7:** Aitiutiu 6:13-7:1. **11:8:** Aitiutiu 12:1-5. **11:9:** Aitiutiu 35:12. **11:11:** Aitiutiu 18:11-14; 21:2; Rom 4:19. **11:12:** Aitiutiu 15:5; 22:17. **11:13:** Aitiutiu 23:4; 1 Kro 29:15; Sams 39:12; 1 Pita 2:11.

ateva. ¹⁴ Lo atoa taumattu la ghaauliaa isaa o ase voto la ghaapasunga va la paepae masaliki aue tanganueira. ¹⁵ Arova laghe aannaa masaliki laghe kasu vulila, aue laghe nnaa righi salana tani kiriaa lao. ¹⁶ Me karika ta laghe nannangaili masina atae masaliki pei ngepona liu ia. Liuna avalua o me God karika epaapalata nau la kolokoloa va kapuira Goto ia, poli ia ang ghe aimonomonosiaala masaliki taatara atae va masalikiira ia.

¹⁷ Tale niaikaaiaa Abraham, nau God ghe tootoongainiela, ghe gheleila aiaavusuvusuena ta Aisiki. Lo ateva ghe ghaala inangari nialokoi ghe ainasiaala tani ghelei aiaavusuvusuena ta kateva nonga ia natuna taita ateva, ¹⁸ arongona ta God ghe uela etana va, “Ta Aisiki tuvum atoa aue la lutu.” ¹⁹ Abraham ghe nnaala va God erooroo tani totu matena atoa, me ita rooroo tani ue va nonginaaili va ghe ghaa oghila Aisiki tale nimate.

²⁰ Tale niaikaaiaa, Aisiki ghe arangisela Jekop me Iso tale voto auena ghe lutu tale maamauluairaru.

²¹ Tale niaikaaiaa, Jekop ghe arangisela natuna alua Josep, nau ghe saoainiela epona tale unna aikkatulu etiulu me ghe kakkauaa God emulina ghe matela.

²² Tale niaikaaiaa Josep, nau eteva ang ghe aainasiaa tani mate, ghe auliaala nau aIsraeli etoa aue la kasu vuli eIjip, me ghe aulia ngalokoila inangari tani usilaa va sa ateva aue la gheleia tale riuna.

²³ Tale niaikaaiaa tamane me kinna Moses lalu ghe aisulieiniela kotolu ulana nau eteva ghe lutula. Poli lalu ghe tarala va aliki eteva oia masinaaili taataraane, karika lalu ghe matautula tani tam nongo usilaa inangarina kingi eteva.

²⁴ Tale niaikaaiaa Moses, nau eteva ghe namuula, ghe ratila va la koloa ya natuna ia natuna vause ateva Peroo. ²⁵ Ghe aloannala tani ghaa nimmarikana tee kapuna taumattu ngatoa God, me ghe rau mene amasimasia tani ghelei ssavoto tale nau karika aluse. ²⁶ Eghe nnaala va marova eghaa nimmarikana, me etam ghaa nioneoneaa, tale ararina atae Karisto, aue elau ekapa asease ghinna atoa eljip, poli ghe aatoka matane tale aipolipoli eteva auena. ²⁷ Tale niaikaaiaa Moses ghe kasu vulila eIjip, poli karika ghe matautaala sessaiaane kingi eteva, nongina va arova ghe tarala lo ateva karika ita rooroo tani taraia, me ghe ratila tani mene oghiaa lao. ²⁸ Tale niaikaaiaa ghe gheleila uunguaa Pasova ngateva, me ghe auliaala laghe atoka saela rae tapaa ngatamaniira, me ensolo tale nimate ateva ghe tam uvi ematela natuira mua atoa taita aIsraeli etoa.

²⁹ Tale niaikaaiaa aIsraeli etoa laghe kasu longotila paa manu eteva la ghaseasea va eRet Sii etana, nongina va elae. Nau aljipi etoa vara laghe toonga tani kasu tee, manu eteva ghe arropilala.

³⁰ Tale niaikaaiaa aivativati etoa eJeriko laghe katuula nau aIsraeli etoa laghe kasu taliaala erooroo ghaitu nau.

³¹ Tale niaikaaiaa Reiab aipae taita ia karika ghe matela tee lo atoa laghe tam nonganongo usilaa God, poli ghe aitaraala kapuira tau llosi atoa aIsraeli etoa.

32 Vaalua, sa ateva amene aulieinia? Karika oroi naughu tani mene auliaa Gidion, Barak, Samson, Jepta, Deivit, Samuel me propete atoa. 33 Tale niaikaaiaa laghe uviubi patunganue namu ngatoa me laghe ghaaghaaila, laghe gheelei niaisakei tale uunguaa nighulughuluena, me laghe ghaaghaa saa voto God ghe aauliaa ta ngetaira tale inangari nialokoi. Laghe gheelei runga paaira laeoni etoa, ³⁴ laghe aapala kura atoa ataataailila, laghe saasaanga tale baenata. Arongona ta saghuighuina ila, me laghe mene sarasarakana, me laghe tiitingina asarasarakana tale niaiuvi, me laghe uviubi tau ngai ssateeira atoa ativuu ila. ³⁵ Tale niaikaaiaa, vause atoa kapuira atoa matena ila laghe mene totu saela tale nimate. Katoa laghe tam aaloanna va la nim karavusu, laghe matemate tale nimate mmarikanaaili, poli laghe aloannaaili va la mene totu tale lo ateva nitotu masinaaili ia. ³⁶ Mene katoa laghe aauliaa teeila asease inangari etoa me laghe uuetaila. Katoa laghe aatoka sene ta ngetaira me laghe laolaoainila tale ale mata voovoo. ³⁷ Laghe osaosa amatela tale atu, laghe soosoo eghaluevilauila, laghe uviubi ematela tale baenata. Laghe kasukasu see, laghe aasae viliki sipsipi me meemee, karika righi peiira, taumattu ngatoa karika laghe gheelei righi masi voto ta ngetaira, laghe gheelei saasakieinila. ³⁸ Kosa ateva karika ghe maamasina ta ngetaira. Laghe aso kasukasu see nongina va lo atoa karika va righi liuira, laghe tokatoka tale voto karika righi taumattu ta ngetana me tale motouru etoa, me tale lienga atoa me liu etoa tale kosa.

39 Ila oia lo atoa laghe ghaala niaruaa ta God poli tale uneira niaikaaiaa, arongona ta karika teva ta ngetaira ghe ghaala voto laghe aulia ngamuermue alokoila tale inangari nialokoi. ⁴⁰ God ang ghe loela kasina voto masinaaili ta ngetaita, me karika va lo atoa akasina nonga, ta ita akapa aitauuaue ita ghaa.

12

Iesu, aitiutiu ia me aighelei eghulughuluena niaikaaiaa ia

¹ Ita taatara oroieili taumattu ngatoa maamauluaaira eaapasunga vaalua malloeana niaikaaiaa. Liuna avalua o ita ilou tale ia o njaikarati eteae emua ta ngetaita me ita rau mene mangoo vulua. Ita ghaa velu righi asease voto maamatana, me ssavoto tee erau kavili rungainta. ² Nau etoa ita tani taatara lao ta Iesu, poli ia aitiutiu ia me aighelei eghulughuluena niaikaaiaa ia. Karika ghe nnaala niplata tale ia o ase nimate ateva tale aikotoo, ta ghe nnaala nimasimasi eteva aue eghaaia me etoka etana nau ekapa atoa. Me ghaine etokatoka tale pai muenna ativilau tale aitokatokane ateva God.

God eparuparu natuna atoa

³ Am nim nnaa voto sesaaili tau ssavoto atoa laghe gheleila etana, me ghe tingina akorokoronganala etana. Karika laghe maamasieinia me laghe gheelei va eghaa voto maate. Liuna avalua o me am rau mene mangoo me am sio asoasoaa. ⁴ Tale uneimim niaissarakaa tee ssavoto ateva, karika toa laghe ubi emateam. ⁵ Me koti ngam ghe kkaluaala isaa o inangari niaisausiaa eaauliaa etaimim va am natuna am.

11:32: Aitoi 6:11-8:32; 4:6-5:31; 13:2-16:31; 11:1-12:7. **11:33:** Den 6:1-2. **11:34:** Den 3:23-27. **11:35:** 1 Ki 17:17-24; 2 Ki 4:25-37. **11:36:** 1 Ki 22:26-27; Jer 20:2; 37:15; 38:6. **11:37:** 2 Kro 24:21. **12:1:** 1 Ko 9:24-25. **12:5:** Nitoka 3:11-12; Job 5:17; Aotu 3:19.

“Natughu, urau mene nnaa va neparuparu eteae kanna ia Vau ngepona
peisaane ia,
me urau mene sio asoasoaa nau eloeloeo.

⁶ Poli Vau ngepona ateva eparuparu lo atoa eaaielousiangailiila
me eattara matane lo ateva taumattu egahaaghaia nongina va
natuna ia.”

⁷ Liuna avalua o me am tingina asarasarakana tale neparuparu aanasa,
poli God egheeleiem nongina va natuna am. Poli sa ateva aliki tamane
etam paruparua? ⁸ God eparuparu ekapa natuna atoa. Arova etam
parula, karika va tani natuna ila, ta nim aliki tale kosa ateva oia.
⁹ Nim nongina tamaita tuunga atoa la paruparuta, me ita oneoneainila.
Vaalu me karika ita roo tani tau velu Tamaira ateva kapuita spiriti etoa
eparuparuta me etau mae maulue ateva me aue ita toka? ¹⁰ Tamaita atoa tale
kosa ateva oia la paruparuta tale nau karika aluse, tale aaloannaaira;
me God eparuparuta tani sausita tale masi nitoka nau etoa egheeleita
va ita manga nongina ia manga ia. ¹¹ Karika ita masimasi nau la tautau
mae neparuparuta mmariikanaaili tani ghaa ogitha tale sesa salana. Me
marova ita kila tani nongo usilaa nau la paruparuta, aue ita ghelei voto
ghulughuluena me aue ita toka tale luei.

¹² Poli ngam ghe maomaonala tale niaikarati eteae, liuna avalua
o me am gheleiem me am mene sarasarakana. ¹³ Am toka tale
ghulughuluena atikirighi salana me aue am roo tani saanga, me voto
atoa la gheelei emaomaoanaiem, karika la roroo tani gheleiem va
erauem.

¹⁴ Am tootoonga tani toka tee taumattu ngakapa atoa tale luei, me am
toka tale maulue manga. Arova teva maamaulueaane karika manga,
karika aue etara Vau ngepona ateva. ¹⁵ Am aipanipanlia nonga ta
am rau katuu vulu nonga maamasinaane ateva God. Karika teva
etaimim emene nongina natu ngai erighi kaaleaili ia epiipinosa sae me
egheelei oroieili voto sesa, me oroi taumattu la tam raarangisana ta
matane God. ¹⁶ Karika teva taumattu emene aimuli tee uunguaa nialai
salosalooa me karika eoneoneaa voto atoa manga ila, nongina Iso, ghe
nim aikolikoliaala saa voto ia ghe roroo tani ghaa poli ia mue ia, tale
nim tuku nginana arighi. ¹⁷ Am nim nnaa va nau Iso ang ghe gheleila
isaa o voto, me emulina ang ghe mene aaloanna niarangise me God ghe
ratila. Iso karika ghe roola tani aikolikoliaa isaa o voto poli karika ghe
nna ngaioghioghia ngakoronnala arongona ta ghe ngangngala poi.

Ita ghe mae sio ta Jerusalem ngepona liu eteva

¹⁸ Karika am ghe mae tale motouru eteva eSaenae ita roroo tani
posoa, karika teae kura eramerame, o righi saurrom me urukookoo, o
teva ttasi vaoo, ¹⁹ o lingi taue ateva me lingi ngalo ateva esamasama,
me lo atoa laghe nongoala, laghe tam aloannala tani mene nongo
righi inangari. ²⁰ Poli karika angila ghe roroo tani nongo me tingina
akorokorongana tale saa llo God ghe auliaala va, tee marova teva
ghaata kkena enim tuli motouru eteva, la tani uvi ematea. ²¹ Saa voto
laghe tarala ghe ghelei ematautulala me Moses ghe uela va, “Ngaghi
reterete tee nimatautu.” ²² Me, ngam ghe mae sio tale motouru eteva la

aseasea va Saeon, ia o masaliki taatara atea masalikina ia God ateva tokatoka liu ia, ia o Jerusalem ngepona liu eteva, me ta kapuna ensolo atoa oroiannaaili ila laghe mae sio tani masimasi eitauaa. ²³ Ngam ghe mae sio tale kinatama nivelu eitaua ngateae ta lo atoa nongina va natuna mata ngemue ila God, me ila la masimasieili poli ila arariira isaa epona liu, me ngam ghe mae sio ta God, ia tau ngai ghelei niaiskei ia ta ila akapaaili taumattu ngatoa, me ta ghulughuluena tee atoa laghe matela me God ghe amangailala. ²⁴ Me Iesu etiitingina elome etaita me God tale ouna ateva inangari niaippooa ngaitauaa, poli raena ateva elaulau raena ateva Eibol me eaaulia ngaotu oroieili masi voto.

²⁵ Am nna ngamasina, me am rau mene rati tani nongo usilaa God nau eaippooaa. Katoa laghe nongo vuluela nau ghe aauliaa voto etaira tale kosa ateva oia, me karika laghe rooroo tani ilou eisulia. Liuna avalua o me karika poi aue ita rooroo tani ilou eisulia marova ita tam nongo usilaa inangarina God epona liu. ²⁶ Lingi ngalona ateva God ghe gheleila kosa ateva ghe rukeiela, me tale isaa oia nau ang ghe aulia ngalokoila tale inangari nialokoi va, “Aue amene ruke kosa ateva ghaluene me epona liu tee.” ²⁷ Isaa o mata nginangari va “ghaluene” eaaulia ngamasalikangaili va aue eghaa velu voto erooroo tani ruke, malloeana va llo voto ghe gheleila, poli ghe aloannala va llo voto karika la rooroo tani ruke, isaa nonga o voto aue etoka.

²⁸ Liuna avalua o me ita kaili emasina ta God, poli ita ghaaghaa ararimangali eteva karika erooroo tani rukeia, aue ita kkauaa God tale ase salana erooroo tani apasunga nioneoneaa me nimatautu ta God. ²⁹ Poli kapuita God ateva koronnaaili va ia nongina “kura atea etuuturungi ekapaaili voto atoa.”

13

Niuungu tani amasimasi God

¹ Am rau mene ruu tani aielousi nongina va tue me nenga am. ² Am rau mene kkaluaa tani aikoloa ativuu etoa, poli katoa laghe gheelei evalua o me karika laghe kilakila va laghe aikoloaala ensolo atoa. ³ Am nnaa lo atoa tale ale mata voovoo, arova nongina va am tee am tokatoka tale ale mata voovoo teeila, me tee lo atoa karika la gheelei masina etaira, nongina va am tee am ghaaghaa nimmarikana.

⁴ Am akapaaili am oneoneaa nilai eteae, me lailai elua komo tellaai ekomoirarua nonga ia. Ta poli God aue eghelei niaiskei ta lo ateva taumattu lailai ia me emene laa ghaailai see, me lo atoa la lailai sari maneira atoa mene katoa. ⁵ Am alekalekaiem tale uunguaa niaielousiaa viliki veu, me am masimasiaa saa voto ngam ghe ghaala isaa etaimim. Poli God ghe uela va,

“Karika aue akasu vulio;

me karika aue akkaluaa poio.”

⁶ Mausina avalua o me ita atoka tuutuliita ta God me ita ue ta taumattu ngatoa va,

“Vau ngepona ateva tau ngai sausighi ia,

karika aue amatauta

saa righi voto teva taumattu eanna tani ghelei etaghi.”

⁷ Am rau mene kkaluaa lo atoa laghe muemueinam, ila laghe aaulia ngaotu inangarina ateva God etaimim. Am nnaa tee vaalua tokatokaairaa me matemateaairaa, me am tootoonga tani ghaa ia o ase niaikaaia ngateva nongina ila. ⁸ Iesu Karisto karika ghe aikolikoliaa poi nau too ang ghe lao sio, nau ghaine, me nau too emaemae.

⁹ Am rau mene tau velu asease niapasunga ngatoa kamena ila va la katulaa veluem tale masi salana atikirighi. Emaamasina tale urunguita ateva tani ghaa sarasarakana tale maamasinaane God, me karika va tani usilaa inangari tale uunguaa inana la gheelei aiaavusuvusuena etana, ta poli lo atoa la usilaa isaa o inangari karika esaasausila.

¹⁰ Ouna ase liu nighelei aiaavusuvusuena etokatoka etaita, me pristi etoa la uungu tale ale kandisi eteva manga ia karika la rooroo tani ghaa inana tale ia o voto ateva. ¹¹ Nau namu ngateva ta pristi etoa eghaaghaa raeira ghaata kkena atoa me esossoa elome tale rum atiulu mangaaili ia tani ghelei aiaavusuvusuena tani ghaa velu kaluira ssavoto taumattu ngatoa, me ghaata kkena akapa ateva laghe ghooainia eleka, me laghe ghoa tungitungia. ¹² Mausina avalua o me Iesu tee ghe matela eleka tale masaliki taatara ateae, tani ghelei eraarangisana kaluira ssavoto taumattu ngatoa tale raena ateva. ¹³ Liuna avalua o me ita tee ita ghoa tee Iesu eleka me ita ghaa nipalata nongina laghe ghelei teeielaa. ¹⁴ Poli tale kosa ateva oia karika teae masaliki taatara erooroo tani toka nau ekapa atoa, ita toitoi ia o ouna ateae masaliki taatara va emae.

¹⁵ Liuna avalua o tale uunguaane Iesu ita toka kaakaueinia nau ekapa atoa tani ghelei arova uneita aiaavusuvusuena nitau sae ta God. Me nilooloo sae me nitau sae ita auliaa ta paaita nongina va kaluita aiaavusuvusuena ta God nau ita auliaa ararina ateae. ¹⁶ Am rau mene kkaluaa tani ghelei masi voto me tani parruu mene kateva kateva, poli God emasimasiaa ia o ase aiaavusuvusuena.

¹⁷ Am nongo usilaa lo atoa la muemueinam me am ghelei saa voto la auliaa. Poli ila la aaitarainiem, me aue la ghauliaa ta God vaalua aaitaraairaa etaimim. Am nongo usilainila, me aue nimasimasi elutu tale uunguaaira. Arova karika, aue la ghelei uunguaaira tale nialousiusi me karika aue la roo tani sausiem.

¹⁸ Am rau mene ruu tani looloo sae poli mausiihami, poli ami kilakila va nannaaimami masalikeaili va karika ami ghe gheelei righi sesa voto, poli nau ekapa atoa ami aloanna tani ghelei voto masina. ¹⁹ Tale urunguitanighi ekapaaili eteva akookolomiem tani looloo sae va God aue esungi parasideghi atu etaimim.

Airuuruu eteva nilooloo sae

²⁰⁻²¹ Alooloo sae va God, ia etautau luei, aue etau aatu isaa akapaaili masi voto atoa me am rooroo tani ghelei voto eaaloanna. God ghe totula Vauita ateva Iesu Karisto tale nimate, ia kinatama aitoitoi ia ta sipsipi etoa, poli tale raena ateva tale matemateaane. Raena ateva ghe tiuala niaippooa ngaitaua ngateva aue etoka nau ekapa atoa. Alooloo sae va aue God eghelei etaita saa voto emaamasina etana, tale uunguaa Iesu Karisto, me ta ngetana nitau sae nau ekapa atoa. Koronna.

Airuuna inangari tale uru ngai etikirighi

13:7: 1 Ko 4:16. **13:9:** Rom 14:17. **13:11:** Lev 16:27. **13:12:** Jon 19:17. **13:13:** Hib 12:2. **13:14:** Hib 11:10, 16; 12:22. **13:15:** Sams 50:14, 23. **13:16:** Plp 4:18. **13:17:** 1 Tes 5:12. **13:18:** Apos 24:16; 2 Ko 1:12. **13:20-21:** Jer 32:40; Esik 37:26; 1 Pita 2:25.

22 Akookolomiem, masi kapughu etoa, tani nna ngamasina isaa o inangari niaisausiaa aghe pitila tale uru ngai etikirighi oia karika aluse ia.

23 Aghaaloannaiem tani kila va kapuita ateva ta Timoti ang ghe kipi ghoa mae tale ale mata voovoo. Arova emae parasi, aue aghaaia me angalu mae taraiem.

24 Am taula masimasiaaimami ta lo atoa la muemqueinam me tee ta kapuna taumattu ngatoa God. Kapuita atoa eltali la suu aatu sio masimasiaaira etaimim.

25 Alooloo sae va aue maamasinaane God etoka etaimim akapa.

Uru ngai etikirighi Jeimis ghe pitiela Inangari emuemua

Oroi ila tau ngalomasaanga atoa la nannaa va Jeimis kateva tana nengane Iesu. Ia namuu ia elome ta tau ngaisesoa ngatoa eJerusalem (Apostolo 15; Galaisia 2:9). Uru ngai etikirighi oia ghe pitiela eaauliaa oroi voto tale tokatokaaita nau ita aimuli tee Karisto.

Tani kila amuemua

Aitiutiu tale inangari, me niapasunga tale nitootoonga 1:1-27

Lo atoa karika righi peiira, me niparruu 2:1-26

Nisama raarangisana 3:1-4:12

Nitootoonga tale viliki veu 4:13-5:6

Nitingina akorokorongana, nilooloo sae, me airuuruu tale uru ngai etikirighi 5:7-20

¹ Aghi Jeimis, kapuna tau ngai nonganongo anna ieghi God me Vau ngepona ateva Iesu Karisto.

Apitipiti atu etaimim kasangaulu ghalua (12) ararimangali nge Israeli am tokatoka reerekataa see tale mene kasina patunganua.

Masi nau eteva etaimim.

Nitootoonga eaasarasarakanaita

² Kapughu etoa, nimasimasi eteva namungaili ia epasu etaimim nau am ghaa ase nitootoonga, ³ poli am kilakila va nau ita apala nitootoonga tale aikaaiiaita egheelei nitingina akorokorongana ateva. ⁴ Tani tam ruu tani tingina akorokorongana etani ruu uunguaane etaimim me aue am matuenna me am ghulughuluena me karika aue am tukuna tale righi ase voto. ⁵ Arova teva etaimim etuutukuna tale masi alomasaanga kanna God, ekolomi God. God emasimasieili tani tau lao me karika etautau mae tale nisessaia me tani ului gheeleiaaita sesa, me aue etau lao masi alomasaanga etana. ⁶ Me nau eteva ukolomi, uaiesoaa me karika emene ghalua nannaam, poli lo ateva egħaagħalua nannaane nonginaaili kotoo ateva elamana kuukuu eteva ekuukueinie see. ⁷ Ia o ase taumattu ngateva karika emene nnaa va aue eghaa righi voto ta Vau ngepona ateva, ⁸ poli nannaane ase taumattu ngateva o egħaagħalua me karika eaatoka tuu nannaane tale voto egheelei.

⁹ Lo atoa kapuna iem God me karika peiimim, am masimasi poli tale taataraane God, ararim ataei iaaili epona. ¹⁰ Me lo atoa tue peipeiena iem, am masimasi poli am tokatoka euu, poli aue am kapa nongina ueli palaoa ngateva emammate. ¹¹ Nau sinaka ateva esaesae, mallangina ateva elallangia me palaoa ngateva ekaakatuu me masi taataraane esessa. Tue peipeiena ateva aue ekapa avalua o nau eteva egheelei uunguaane.

¹² Aue emasinaaili ta taumattu ngateva etiitingina akorokorongana tale nitootoonga, poli nau nitootoonga eruu, aue eghaa kou nguru

maulue ateva tokatoka liu ia, God ghe auliaala inangari nialokoi ta lo atoa la aielousieinia.

¹³ Arova nitootoonga eghaaiem, karika teva emene ue va, “God etootoongainieghi.” Ta voto sesa karika etootoonga God, me ia karika egheelei nitootoonga ta teva. ¹⁴ Ta ninannaa sesa etaita egheelei nitootoonga me eghaaghaita lao tale voto sesa arova ivia ateva. ¹⁵ Nau eteva sesa ninannaa ange tokala, eaalutu sesa voto, me nau sesa voto epiipinosa anamuu, eluulutuaa nimate ataeae.

¹⁶ Kapughu etoa, isaa o voto erau kameam. ¹⁷ Isaa akapaaili masi voto me voto ghulughuluena ekasukasu epona liu. Ekasukasu me esiosio etaita ta Tamaita ngepona liu eteva ghe gheleila mallanga atoa me karika eaikolikolia nongina tootoo ateva. ¹⁸ Tale aloaloannaane ghe alututala tale inangari koronna me ave ita rooroo tani taumattu niaitiutiu tale isaa akapaaili voto ghe gheleila.

Tani nongo me ghelei

¹⁹ Masi kapughu etoa, am nnaa parasi inangari toko va, am akapaaili am kila tani oti parasi talingaimim tani nonganongo me am rau mene ailuilui tani sama me tani sessai. ²⁰ Ta sessaiaa taumattu karika ave ghelei righi voto va eghulughuluena ta matane God. ²¹ Liuna avalua o me am ruu tani ghelei sesa me tani annaa saasakiaa ta mene kateva, me am siuua nannaaimim me am ghaa inangari laghe auliaala etaimim erooroo tani asaangiem.

²² Am rau nim mene nongo inangari me karika am ghelei voto eaauliaa. Arova am ghelei evalua o, am nim kamekameam. ²³ Lo ateva enonganongo inangari me etam gheelei, nonginaaili taumattu ngateva etaatara taataraane tale ghalasi eteva, ²⁴ me nau eruuruu tani taatara, me ekasukasu, arovaea ta eaikkaluua taataraane. ²⁵ Me lo ateva etam ghaaghaa velu matane tale isaa o inangari nipaopao ghulughuluena egheeelia karika ekaakaravusu tale ssavoto me nimate, me karika eoghioghi vulu isaa o voto, me karika eaikkaluua voto ghe nongola me ghe tarala, ta egheelei, niarangise ave etoka tale voto egheelei.

²⁶ Arova teva eue va tau nikkauala ia me karika eaitara ngamasina ramuramuti paana ateva, enim kamekamea me unna nikkauala egheelei nim peisaane. ²⁷ Llo nikkauala God Tamaita ia ealoanna me eghaaghaha va raarangisana me masina isaa avalua toko: tani sausi aliki raue vulu etoa me vause raue vulu etoa nau nialousiusi eghaaghaila, me am rau mene tau velu gheeleiaa kosa ateva va egheelei saasakieinam.

2

Karika masina tani aimassiaa

¹ Masi kapughu etoa, poli ita aiesoaa ta Vau ngepona ateva Iesu Karisto iaaili epona, liuna avalua o me am rau mene aimassiaa. ² Arova teva taumattu emae nongina am veluvelu eitauua me eaasae ringi gheelei tale gol me eaasae tee masi ghinna, me teva llo tee karika righi peina me ghinnanina sesa ghele kupi tee sso, ³ me arova utara kkai nonga lo ateva emolumolu emasina me ughele ue etana va, “Masi aitokatokam ateva toko,” me ughele ue ta lo ateva karika peina va,

1:18: Jon 1:13. **1:20:** Alomasaanga 7:9. **1:21:** Kol 3:8; 1 Pita 2:1. **1:22:** Mat 7:26; Rom 2:13. **1:25:** Rom 8:2; Jms 2:12. **1:26:** Sams 141:3. **2:1:** Apos 10:34; Jms 2:9.

“Utingina lao too,” o “Utoka sio tapaa kosa,”⁴ karika ukilakila va angu aaimuli tee tani ghelei niaiskei tani pola taumattu tale ale manga ateva tale ninanna karika masina?

⁵ Am nongo, masi kapughu etoa, God ghe suietoongaala lo atoa karika peiira tale kosa ateva oia va la tue peipeiena tale niaikaaia me la ghaa niarangise tale ararimangalina ateva God, ghe auliaala inangari nialokoi ta lo atoa la aielousieinia. ⁶ Me karika, ta am taatara lo atoa karika peiira va peisaane ila. Karika am kilakila va tue peipeiena atoa la tautauem sio euu tani ghelei voto maate etaimim? Me karika am kilakila va la ghaaghaaiem tani laoainam tale liu niaiskei?⁷ Karika am kilakila va ila la tani aattara tani auliaa saasakiaa teeiem lo atoa masi ararina ateeae Iesu etaimim?

⁸ Arova am tani aitaraa kannia inangari nipaopao Iesu kingi ia tale Uru ngai Manga ateva eue va, “Uaielousiaa lo ateva etokatoka akalakalangina etam nongina uaialeousieinio,” am gheelei masi voto. ⁹ Me arova am aimassiaa, am gheelei voto sesa, me inangari nipaopao eghelei niaiskei etaimim va karika am aaimuli tee voto masina. ¹⁰ Poli arova lo ateva eaimuli tee isaa akapaaili inangari nipaopao me kateva nonga ia ange tam aimuli teeielia, ange ghelei saasakia ngakapaailiila inangari nipaopao. ¹¹ Poli God ghe uela va, “Karika umene lai sari kateva vausenna ateva,” ghe ue teela va, “Karika umene aiuvi emate.” Me arova utam lai sari kateva vausenna ateva me uaaiuvi emate nonga, angu ghelei saasakiaala inangari nipaopao.

¹² Am ppooaa me am ghelei nongina lo atoa aue la aisakei tale inangari nipaopao poli isaa o llo, aue egheleiem me karika aue am karavusu. ¹³ Poli llo niaiskei karika righi nialousiusi etana, aue eghaa lo ateva taumattu karika eaalousiusi, me nialousiusi aue eapala niaiskei.

Niaikaaiaa me niuungu

¹⁴ Kapughu etoa, arova teva taumattu eue va eaikaaiaa, me karika righi masi niuungu egheelei, karika aue esausia. Am annaa va ase niaikaaia ngateva o aue easaangia? ¹⁵ Arova teva tuem me nengam etuutukuna tale ghinna eaaloanna me inana tani nama ta kateva kateva nau, ¹⁶ me teva etaimim ghele ue etana va, “Kasula tale luei me laa ghasae ghinna me uaanasa, me unamanama me essoio,” me karika eghelei righi voto tani sausia, am annaa va saa righi masi voto aue elutu? ¹⁷ Tale isaa o ase salana me arova niaikaaiaa karika elaoao tee niuungu, isaa o niaikaaiaa nim matena.

¹⁸ Me kateva aue eue va, “Unem niaikaaiaa?” Me aghi aue aue va, “Auungu. Uapasunga unem niaikaaiaa karika niuungu etana me aue aghapasunga aikaaiaghi tale voto auungu etana.” ¹⁹ Uaaisesoaa va kateva nonga ia God ateva? Masi ninanna ia! Me raroai tee atoa la ghaaiesoaa me la reterete.

²⁰ Alokapakapa ateva, uanna va aghapasunga va niaikaaiaa karika elaoao tee niuungu, nim peisaane?²¹ Vaalua tuvuita ateva ta Abraham ghe ghulughuluenalaa ta matane God? Poli voto ghe gheleila nau ghe alokoi saela natuna ta Aisiki tale liu nighelei aiaavusuvusuena ateva

2:5: 1 Ko 1:26-28. **2:8:** Mat 19:19; Gal 5:14. **2:9:** Diut 1:17. **2:10:** Lev 19:37; Nam 20:7-12, 24; Mat 5:19. **2:11:** Eks 20:13-14; Rom 13:9. **2:12:** Gal 6:2; Jms 1:25; 1 Pita 2:16. **2:13:** Mat 5:7; 18:32-35. **2:15:** 1 Jon 3:17. **2:18:** Gal 5:6. **2:21:** Aitiuti 22:9-12.

tani tauela ta God. ²² Utara va, unna niaikaaiia me voto ghe gheelei ghe kasukasu eitauua. Me unna niaikaaiia ghe masinala tale voto ghe gheleila. ²³ Me inangari tale Uru ngai Manga ateva ghe koronnala nau ghe uela va, "Abraham ghe atokala tuutulina ta God, liuna avalua o me God ghe aseala va ia ghulughuluena ia," me laghe kolokoloa va kapuna ia God. ²⁴ Am tara va taumattu ngateva eghulughuluena poli voto egheelei, karika va eaikaaiia nonga.

²⁵ Nim nongina Reiab aipae taita ia me God ghe aseala va ghulughuluena ia tale voto ghe gheleila nau ghe aitaraala tau lloua akilakila atoa me ghe apasungaala katikirighi ppae salana me laghe usilainiela. ²⁶ Nongina taumattu ngateva karika eaainoana, matena ia, liuna avalua o me arova niaikaaiia nonga me karika righi niuungu, isaa tee o voto matena.

3

Tani aitara ngamasina ramuramuti paa ateva

¹ Kapughu etoa, erau mene oroi iem lo atoa am anna va am tau ngai apasunga, poli am kilakila va lo atoa ita apasunga, aaisakeiaaita aue la tani kutumi emasina. ² Ita akapa ita gheelei aisease voto sesa. Me arova teva taumattu etam gheelei voto sesa tale poppooaane, ia ghulughuluena ia me egheelei runga ngamasina akapa vilikina.

³ Nau eteva ita aasae tau lao biti eteva tale paa ooso ateva tani alooia kona eaa ita anna va elao, ita gheeleiia va ia akapa ekirie see nongina ita aloanna. ⁴ Ita mene tara kateva aimatoongana tale anua ateva. Arongona ta namuu ia me kinatama kuukuu eteva ekuukuueinia, kapteni eteva enim aloalooa tale aialoaloo atiulu ghaunaaili ia. ⁵ Nonginaaili ramuramuti paa ateva ghauna ia tale vilikiita me eaasake va erooroo tani ghelei kinatama voto. Gharighi kuraa erooroo tani ata teva kinatama tuvui. ⁶ Ramuramuti paa ateva tee kuraa ia, tanganueira ia sesa voto atoa. Etokatoka elome tale mene kasina voto tale vilikiita tani ghelei saasakiaa taumattu ngateva me eaatoka maamauluuaane akapa tale kuraa ateae me eGehenna eaarokoti kuraa ateae etana.

⁷ Taumattu ngatoa la roro tani ghelei isaa akapa ase ghaata kkena me ghila me llo erarraa me voto elamana la roro tani gheleila la matukkale me la ghatrainila ⁸ me karika teva taumattu erooroo tani ghelei ematukkale ramuramuti paa ateva poli sesa ia, me karika erooroo tani matua atoka, me ia pasu ia tale voto kaale erooroo tani kaali emate taumattu.

⁹ Tale ramuramuti paa ateva ita tautau sae Vau ngepona ateva Tamaita ia, me ie nonga o ramuramuti paa ateva ita kaakasiiena taumattu etana, ila tee lo atoa tootoona ila God. ¹⁰ Tale ie nonga o paa ateva nitau sae me nikasikieni ekupikupi ghoa. Kapughu etoa, karika emene isaa avalua o. ¹¹ Am annaa va manu maraange me manu uelane lalu roro tani akala nonga tale kateae mata ngateo? ¹² Kapughu etoa, am annaa va fig ateae ai ia erooroo tani kuneaa oliv, o uasa uaeni erooroo tani kuneaa righi ue fig? Mata ngateo ateae uelanna ia karika erooroo tani ghelei righi manu va emaraange.

Alomasaanga ekasukasu epona liu

¹³ See alomasaanga nannaane etaimim? Eapasunga tale masi niungu egheelei tale nisiuua ninannaa. ¹⁴ Me arova nissa tee kateva poli ia ange apalaiola me nikuruuetuna etokatoka tale urunguitaniimim, am rau mene aasakeaa isaa o voto ta am rau mene ghelei nikamekame tale voto koronna. ¹⁵ Isaa o ase ninannaa karika ekasukasu epona liu, ta pei tale kosa ateva me karika emaema ta Spiriti eteva, ta kanna Satana. ¹⁶ Nau usessa tee kateva poli ia ange apalaiola me ukuukuruetuna, aue utara va voto eaaikasakasaliaa me asease voto sesa aue elutu.

¹⁷ Me alomasaanga ekasukasu epona liu, mata ngemua ateva voto etana, raarangisana, me ealoanna luei eteva, me enannaa mene kateva, me tani nongo mene katoa, me pasu ia tale nialousiusi me masi ue-nenna, me karika niaimassiaa etana me karika ekamekame. ¹⁸ Tau ngai ghelei luei etoa la pasapasa luei, me la mukemuke voto ghulughuluena.

4

Am tau ekapaiem lao ta God

¹ Sa ateva egheeghelei niaitunna me niaikiso elome etaimim? Karika am kilakila va ekasukasu tale aloannaaimim eaaiuvii tee masi niannaa tale urunguitaniimim? ² Am aaloanna voto me karika am ghaaghaha, liuna avalua o me am aaiuvii emate. Am sassaii me karika am rooroo tani ghaa voto am aloanna tani ghaa. Am aikiso me am aiuvi. Karika am ghaaghaha poli karika am kookolomi God. ³ Me nau am kokkolomi, karika am ghaaghaha, poli am kokkolomi tale sesa ninannaa, poli nau aue am ghaa aue am uunguua tale aloaloannaaimim.

⁴ Am tau ngai lai sari etoa! Karika am kilakila va tani aikapukapuaa tee kosa ateva nitau ngai ssateena ia God? See io ualoanna va kapuna io kosa ateva, io aue utau ngai ssateena io God. ⁵ Am annaa va voto Uru ngai Manga ateva ghe auliaala va karika righi malloeanina? Eue va, “God eannangaili arova ita aimulusi teeia, me enannaa saasakiaa tee spiriti eteva ghe atokaiela ta ngetaita arova eusilaa uunguua kosa ateva.” ⁶ Me God etautau mae oroieili maamasinaane etaita. Liuna avalua o me Uru ngai Manga ateva eue va,

“God karika poi ealoanna lo atoa la tautau sae nannaaira

me etautau lao maamasinaane ta lo atoa la siosioaa nannaaira.”

⁷ Liuna avalua o me am tau ekapaiem lao ta God. Am rati namu ngateva ta raroai etoa me aue eroo tani ilou vuliem. ⁸ Am lao akalakalaat ta God me aue emae akalakalaat ta ngetaimim. Am tau ngai ghelei ssavoto atoa, am ghelei eraarangisana maamauluaaimim, me lo atoa eghaaghala nannaaimim, am ghelei eraarangisana urunguitaniimim. ⁹ Am alousiusi me am ngala. Me am lo atoa am kangkanga nau ghaine, am ruu tani kanga me am ngala me am ruu tani masimasi, me am alousiusi. ¹⁰ Am siuua nannaaimim ta matane Vau ngepona ateva, me aue easaesae arariimim.

¹¹ Kapughu etoa, am rau mene auliaa saasakiaa tee mene kateva. Lo ateva eauliaa saasakiaa tee teva tuena o nengane nonginaaili va egheelei niaiskei etana, me arova egheelei evalua o eauliaa saasakiaa tee tale inangari nipaopao me egheelei niaiskei etana. Me arova ughelei niaiskei tee tale uunguua inangari nipaopao, me karika

uaimuli tee, nonginaaili va io tau ngai ghelei niaiskei io. ¹² Kateva nonga etautau mae inangari nipaopao me egheelei niaiskei. Ie nonga erooroo tani asaangi me tturuu. Me io see etam me vara ugheler niaiskei ta lo atoa la tokatoka akalakalangina etam?

Tani aasakeaa nimanaa

¹³ Am nongo, lo atoa am ue va, “Ghaine o nimanaa ita lao tale teva masaliki taatara me ita laa toka kateae ninamanama, me ita ghelei niungu tani ghaa viliki veu.” ¹⁴ Me karika am kilakila sa ateva aue elutu nimanaa. Vaalua tale maamauluaaimim? Nim nonginaaili asu emaemae karika masau me ekapakapa. ¹⁵ Me masina arova am nim ue va, “Arova aloaloannaane Vau ngepona ateva aue ita toka me ita ghelei llo voto.” ¹⁶ Am tautau sae nannaaimim me am aasake. Isaa akapa o ase niaasake sesaaili. ¹⁷ Liuna avalua o, lo ateva ekilakila voto masina tani ghelei me etam gheelei, egheelei voto sesa.

5

Tue peipeiena atoa aue la ghaa aipoliira sesa

¹ Tue peipeiena atoa am nongo! Am alousiusi me am ngala, poli voto sesaaili ange maemae etaimim. ² Peiimim oroi ange maamarokase me ane ateva enamanama ghinnaniimim. ³ Uneimim gol me silva ange rorroso, me rorrosoaaira aue aulia ngaotuem tale nau niaiskei, me aue enama vilikiimim arova kuraa ateeae. Am ghe atoka aitauaala peiimim tale llo nau airuuruu. ⁴ Am tara! Aipoliira taumattu ngatoa am ghe tam polilala nau laghe uungula etaimim ange kolokolo anamuu sae ta Vau ngepona ateva, me kolokoloaaira lo atoa la mukemuke Vau ngepona ateva sarasarakanaili ia ang ghe nongola. ⁵ Am ghe tokatoka tale kosa ateva tale masi nitoka, me am ghe kuukuruetuna tee masi tokatokaaimim, me am ghe mmoro teela ninamanama nonginaaili ghaata kkena ange ghaala nau eteva la uvi ematela. ⁶ Lo atoa taumattu ghulughuluena ila, am ghe aaliu teeila va laghe gheelei sesa, me am ghe uvi ematela llo taumattu karika ghe gheleila isaa o voto. Me karika toa laghe liula voto am ghelel teeilala.

Ita rau mene mangoo nau ita ghaaghaa mmaprikana

⁷ Liuna avalua o, kapughu etoa, me am rau mene mangoo tani toitoi lomosina ta Vau ngepona aue emae. Am tara vaalua tau ngai ghelei utana ateva etotoi va kosa ateva esausi tani ghelei me umana voto ekuneaa masi voto me vaalua etam maamangoo tani toi vaao ateva. ⁸ Am tee am rau mene mangoo me am tingina akorokorongana, poli maemaeaane Vau ngepona ateva ange aakalakalaa. ⁹ Kapughu etoa, am rau mene ainguunguaa tee mene kateva ta am rau aisakei, poli tau ngai ghelei niaiskei eteva etiitingina ta paa ngatamana.

¹⁰ Kapughu etoa, am anna ngamasina uunguaane nitam mangoo tale nimmarikana, me am annaa propete atoa laghe aippooa tale ararina ateeae Vau ngepona. ¹¹ Am kilakila va ita taatara va niarangise tale lo atoa la tiitingina akorokorongana tani toitoi. Ngam ghe nongola vaalua Job ghe tam oghi vulula tani aiesoaa ta God, me ghe tarala sa ateva Vau

4:12: Rom 2:1; 14:4. **4:13:** Luk 12:18-20. **4:14:** Nitoka 27:1; Sams 39:5, 11. **4:17:** Luk 12:47. **5:2:** Mat 6:19. **5:4:** Diut 24:14-15. **5:5:** Luk 16:25. **5:7:** Jer 5:24; Diut 11:14. **5:8:** Rom 13:11-12; 1 Pita 4:7. **5:11:** Eks 34:6; Job 1:21-22; 2:10; Sams 103:8.

ngepona ateva ghe tauue lao sio tale airuuruu. Vau ngepona ateva pasu ia tale nialousiusi me eaaloanna tani aisausiaa.

¹² Me tale voto akapaaili, kapughu etoa, am rau mene ue va, “Arova akamekame, lo ateva epona liu eattara mataneaghi,” o, “Arova akamekame, lo ateva eaaitaraa kosa ateva eattara mataneaghi,” o mene righi ase voto. Llo erooroo va, am ue va “ue” etana, am ue va “ue” etana. Me llo karika, am ue va “karika” etana, God erau ghelei niaiskei etam.

Nilooloo sae tale niaikaaiaa

¹³ Lo ateva etaimim etokatoka tale nau sesa, erooroo tani looloo sae. Me lo ateva emasimasi euei righi kkinari tani kkauua God. ¹⁴ Lo ateva etaimim elisiki, ekolo elda ngatoa tale ale manga, me la looloo sae etana me la kao oeli tale ararina ataeae Vau ngepona ateva. ¹⁵ Me nilooloo sae tale niaikaaiaa aue eghelei emasina tau ngisiki eteva, me aue Vau ngepona ateva etotua, me arova ghe gheleila righi sesa voto, God aue ekkaluua. ¹⁶ Liuna avalua o me am aulia ngaotu sesa gheeleiaaimim ta mene katoa me am looloo sae ta God mausi mene katoa, me aue am masina. Unna nilooloo sae ghulughuluena ateva taumattu sarasarakananaili me erooroo tani ghelei voto.

¹⁷ Elaija nim taumattu ia nongina ita me ghe nim looloo saela va erau mene vaoo, liuna avalua o me ghe tam vaoola ghe roola kotoluae ninamanama me ghaonomo ulana. ¹⁸ Ghe mene looloo saela me epona liu ghe tau sio mae vaoo ateva me kosa ateva ghe apinosala voto laghe pasapasa.

¹⁹ Kapughu etoa, arova teva etaimim eoghi vulu voto koronna me lo ateva emene ghaa ogie mae, ²⁰ etani kila va, see ia lo ateva emene ghaa ogi lo ateva sesa gheeleiaane, me eoghi vulu salana sesa, eaasaangia tale nimate me eaakou oroianaaili sesa voto.

Aitiutiu etikirighi uru ngai Pita ghe pitiela Inangari emuemua

Apostolo ateva Pita ghe pitila ia oia uru ngai etikirighi ta tau ngaisesoa ngatoa laghe tokatoka tale pai not me pai nge sinaka esuu tale patunganua namu ngateva ghaine ita aseasea va Teki. Laghe ghaagħhaa nimmarikana mausi inangarina ateva God. Pita ghe auliaala etaira va la rau mene soghiaa nau eteva la għaagħhaa nimmarikana, poli Iesu tee għe għala nimmarikana, me lo atoa la aimuli teeia aue la tani għaa nimmarikana tee. Pita għe auliaala va la tani masimasi me toi Iesu nau la għaa nimmarikana, me la rooroo tani ppooaa masi kiukiu ta mene katoa. Me tee, għe auliaala oroi inangari niloeloe tale maamauluaaira lo atoa la aiesoaa.

Tani kila amuemua

Aitiutiu tale inangari 1:1-2

Kapuna atoa God: la saanga, manga, me la uungu nongina pristi etoa 1:3-2:10

Tokatokaairā kapuna atoa God tale kosa ateva oia 2:11-4:11

Ale manga ateva me elda ngatoa 4:12-5:11

Nimasimasi me airuuruu 5:12-14

¹ Agħi Pita, kapuna apostolo iegħi Iesu Karisto, apitipiti uru ngai etikirighi oia etaimim kapuna taumattu ngatoa God, għe suimatoon-gainamla, me ngam tokatoka see nongina va ativu etoa tale provinsi etoa ePontus, eGalaisia, eKapadosia, eEisia me eBitinia. ² God Tamaita ia emua arau għe kilaiemla me għe suimatoongainamla, me kapuna Spiriti eteva għe għeleiemla am għe mangala. Liuna avalua o me am għe nongo usilainiela me raena ateva Iesu Karisto għe għelei eraarangisanaiemla.

Alooloo sae va God aue etaū aatu maamasinaane me luei eoroi etaimim nau ekapaaili.

Kinatama niasaangi eteva

³ Ita kaili emasina ta God Tamana ia kapuita Vau ngepona ateva Iesu Karisto. God għe totula Iesu Karisto tale nimate. Tale ia o nitotu eteva, me mausi kinatama alousiusiaane ateva, għe tau mae sio nilutu ppae me ita rooroo tani taatara lao emua ⁴ tale masi voto pasu tale niarangise God għe aimonomonosiaala etaita. Isaa o voto isaa epona liu, karika erooroo tani mauu, karika erooroo tani poka, me karika erooroo tani kapa. ⁵ Poli tale kaluimim niaiesoaa, God eaħħitarinam tale sarasarakaaniaane lomosina ta am għaa ia o niasaangi eteva, eaħħimonomonosiaa tani apasungainia tale airuuruu tale nau. ⁶ Tale isaa oia voto masimasiaaimim enamungaili, arongona ta karika tani aluse nau am għe soula nimmarikana tale asease nitootoonga. ⁷ Għol ateva la tootoongia tale kura tani tara va għol nonga ia. Tale isaa o salana nitootoonga etootoonga uneimim niaikaia, maamasinaane

1:2: Rom 8:29; 2 Tes 2:13. **1:4:** Kol 1:12. **1:5:** Jon 10:28; 17:11. **1:6:** 1 Pita 5:10; Jms 1:2. **1:7:** Nitoka 17:3; Sek 13:9; Mal 3:3; Jms 1:3.

elaulau maamasinaane golo, ta poli golo ateva ue ekapa. Liuna avalua o me poli am aaiesoaa ta God, ue God etau aatu nitau sae, ninamuu me nioneoneaa nau Iesu Karisto ue ekauerekati.⁸ Arongona ta karika am ghe taraiela, am aaielousieinia, me arongona ta karika am taataraia nau oia, am aiesoaa ta ngetana me pasu iem tale lo ateva o kinatama nimasimasi mata nginangari karika erooroo tani aulieinia.⁹ Poli God ave easaangiem, liuna avalua o me am ghe aiesoaala ta Karisto.

10-11 Propete atoa laghe aulia ngamuemuela maamasinaane God tani asaangiem. Spiriti eteva ta Karisto elome etaira ghe poppoaa ngaotu ase nimmarikana Mesaea ue eghaa, me kinatama voto evira mene lutu, me propete atoa laghe paepae aanasailili tani kila va eaauliaa see me lovisa.¹² God ghe apasungaala ta propete atoa va isaa o voto laghe ppooaala karika mausiiira ta mausiiim. Me God ghe tau sio mae Spirit Manga ateva epona liu, me tale sarasarakaniaane Spirit Manga ateva, tau ngai ppooa ngatoa tale masi kiukiu ngila ghe auliaala etaimim isaa oia voto God ghe gheleila. Ensolo tee atoa la aloannaaili tani ghaa alomasaanga tale masi voto God ghe gheleila etaita.

Am manga

13 Isaa avalua o me am aipanipaniaa nannaaimim me am aikinikinitaa tee poppoaaaimim me tokatokaaimim. Am aiesoa ngasarasarakanaili tale isaa o voto God ealoanna tani tau aatu nau eteva Iesu Karisto emae.¹⁴ Am tani nongo usilaa God. Emua arau nau ta am ghe tam kila amasina salane God, am ghe uusilaa sesa ninanna. Karika am mene aimuli tee isaa o sesa voto.¹⁵ God ghe koloamla, ia manga ia. Liuna avalua o me am manga. Am ghulughuluena tale gheleiaaimim me tokatokaaimim.¹⁶ Ta Uru ngai Manga ateva eauliaa va, "Am manga, poli aghi manga aghi."

17 Ta poli am koloa va Tamaaimmi ia me egheelei niaisakei ghulughuluena ta kateva kateva taumattu tale uunguaaira, am oneoneaa tee God tale tokatokaaimim, nau am toka tale tokatokaaimim va am nongina lo atoa ativuu ila tale kosa ateva oia.¹⁸ Am ghe kasukasu tale salana karika righi malloeana ghe tiuala ta tuvuimim atoa, me God ghe asaangiemla tale isaa o salana. Me am kilakila va karika ghe poliemla tale isaa tee o voto esesa nongina silva o golo,¹⁹ ta ghe poliemla tale raena ateva Karisto, aipolina namungaili, nongina sipsipi erighi karika vereverena ia me karika righi kulukulutana etana.²⁰ God ghe suimatoongainiela mua, me auena aitiutiu tale kosa ateva, me tale airuuruu oia nau God ghe apasunga ngaotuela mausiiim.²¹ Ta ngetana am ghe aiesoaala ta God, ia ghe totuela tale nimate me ghe asaesaela ararina atae, liuna avalua o kaluimim niaikaaiaa me tuutuliiim am ghe atokala ta God.

22 Nau am ghe nongo usilaala voto koronna, am ghe ghelei er-aarangisanaiemla tale kaluimim ssavoto ta matana God, me am apasunga koronna niaielousi ta mene katoa kapuimim nonginaaili va tue me nenga am. Liuna avalua o me am aielousi ekoronna tale urunguitaniimim nau ekapaaili etoa.²³ Poli tale inangarina ateva God maulue ia me tokatoka liu ia, am ghe lutu ppaela, karika va nongina

1:8: Jon 20:29; 2 Ko 5:7. **1:10-11:** Mat 13:16-17; Sams 22:1-31; Ais 53:1-12; Luk 24:26-27.

1:14: Rom 12:2; Ips 2:3; 4:17-18. **1:16:** Lev 11:44-45; Mat 5:48. **1:17:** Rom 2:11; Aotu 2:23. **1:19:** Apos 20:28; Hib 9:12-14. **1:20:** 2 Tim 1:9-10; Ips 1:4. **1:21:** Jon 14:6; Rom 5:1-2. **1:22:** Jon 13:34; Rom 12:10.

katu ue ngai eteva emammate, ta nongina lo ateva katu ue ngai karika emammate. ²⁴ Nongina Uru ngai Manga ateva eue va,
“Taumattu ngakapa atoa nim nonginaaili rarrasa ateva,
masi taataraairia nongina pusi ngai eteva;
rarrasa ateva emaamalle me pusi ngai eteva ekaakatuu,
²⁵ me inangarina ateva Vau ngepona ateva etokatoka nau ekapaaili etoa.”
Isaa o inangari, masi kiukiu laghe auliaala etaimim.

2

¹ Liuna avalua o me am sau velu ekapaaili sesa ninannaa tani ghelei saasakiaa tee mene kateva, me karika am mene kamekame me tani usimaghluu me tani annaa saasakiaa tale taumattu oroi peiira me tani auliuliaa. ² Nonginaaili lutu ngaliki etoa la vira lutulutu, la aloannaaili tani ssu, am tee am aloannaaili tani ssu rarumi ssu eteva raarangisanaaili ia kanna ia God, nau am ssu etana, aue am pinosa me aue aikaaiiaaimim ematuenna lomosi ta nau God easaangiem. ³ Isaa oia ngam ghe namunamuaala va Vau eteva masina ia.

Atu eteva maulue ia me taumattu God ghe suitoongaala

⁴ Am mae ta Vau eteva, ia atu eteva etaatau aatu maulue — taumattu ngatoa laghe ratiela me God ghe suimatoongainiela poli ia masinaaili gheegheleiaane ta matane God — ⁵ am tee nonginaaili va atu etoa maulue ila, God eatuutuluem va am nongina ale manga ateva, me am nongina pristi etoa manga ila, la gheelei aiaavusuvusuena tani amasimasi God, tale ararina ateae Iesu Karisto. ⁶ Ta poli Uru ngai Manga ateva eue va,

“Aghe atokala atu eteva eSaeon,

ia aghe suimatoongainiela me masinaaili ia, me aitiutiia tani atu ekapa atoa tani suei ale ateva,

me lo ateva taumattu eatoka tuutulina etana karika aue etoka tani nipalata.”

⁷ Ta lo atoa am aiesoaa, ia oia atu eteva masinaaili ia, me ta lo atoa karika la aiesoaa, Uru ngai Manga ateva eue va,

“Ia o atu eteva tau ngai atulu ale atoa laghe ratiela
ie nonga o atu eteva esuusuei ale ateva.”

⁸ Me emene ue va,

“Ia o atu eteva egheelei taumattu etuttukainila,
me egheelei ekatungila.”

La kaakatuu poli la tam nonganongo usilaa inangari, poli God ghe tau vellala va la lao avalua o tale aloannaaira.

⁹ Me am, karika va am avalua o, am taumattu ngatoa God, ghe suimatoongainamla va pristi iem tani uungu ta kingi eteva, God etana. Anue manga am, me taumattu ngatoa kapuna am God va aue am aulia ngaotu nitau sae ta lo ateva ghe kolo veluemla tale saurrom tani mae tale masi mallangina ateva. ¹⁰ Isaa to nau karika va kapuna taumattu iem God, me isaa oia nau ang ghe kapuna iemla. Isaa to nau karika am ghe ghaala alousiusiaane God, me isaa oia nau ngam ghe ghaala alousiusiaane.

1:24: Ais 40:6-8. **2:1:** Ips 4:22; Jms 1:21. **2:3:** Sams 34:8. **2:5:** Ips 2:21-22; Aotu 1:6.
2:6: Ais 28:16; Ips 2:20. **2:7:** Sams 118:22. **2:8:** Ais 8:14. **2:9:** Diut 7:6; 14:2; Ais 9:2;
Tts 2:14; Apos 26:18; Ips 5:8. **2:10:** Osea 2:23.

Tau ngai uungu etoa ta God

¹¹ Masi kapughu etoa, poli am ativuu iem tale kosa ateva oia, aghaaulia ngasarasarakanava am alekalekaiem tale uunguaaninnaa ssavoto, isaa o voto eaaiuvii tee nannaaimim. ¹² Nau am toka tee taumattu ngeleka atoa, am toka tale masi nitoka, me nau la ghaauliaa teeiem va am gheelei voto sesa, aue la tara masi uunguaaimim me la tau sae God, nau eteva emae taraiem.

¹³ Mausi Vau ngepona ateva, am nongo usilaa lo akapa atoa taumattu matuutulienila, nongina kingi eteva poli matuutulienanaane isaaili epona, ¹⁴ me ta gavana ngatoa, poli king ghe suoongainilala tani laa gheelei saasakiaa lo atoa la gheelei sesa voto, me tani oneoneaa lo atoa la gheelei voto masina. ¹⁵ Poli aaloannaane God va, poli am gheelei voto masina, am roo tani gheelei runga sesa inangariira alokapakapa atoa. ¹⁶ Am toka nongina va lo atoa taumattu la tokatoka tale aaloannaaira me la gheelei masi voto. Me karika am mene gheelei ia o ase nitoka ateva tani akou runga voto sesa, ta am toka ta aloannaane God. ¹⁷ Am apasunga masi nioneoneaa ta taumattu ngakapa atoa. Am aielousiaa lo atoa am aaiesoa ngaitauua me ila, am matauta God me am oneoneaa kingi eteva.

Niaimatoonga tale nimmarikana Iesu ghe ghaala

¹⁸ Tau ngai uungu etoa karika am tokatoka tale aloaloannaaimim, am tauem lao ta vauimim atoa tale isaa akapa ase nioneoneaa, karika va lo atoa nonga masina ila me gheeleiaaira saghuighuina, ta lo atoa tee karika masina ila. ¹⁹ Nau katoa la gheelei voto karika masina etam arongona ta ugheelei masi voto ukilakila va God eaaloanna, God aue emasieinio. ²⁰ God karika aue earangiseiem arova am ghaaghaa nimmarikana mausi am gheelei voto sesa. Ta aue earangiseiem arova am ghaaghaa nimmarikana mausi am gheelei voto masina. ²¹ Tale isaa oia voto God ghe koloamla poli Karisto ghe ghaala voto mmarikanaili mausiiimim, ghe alokoila niaimatoonga ngateva, va am tani aimuli usi tee liu kasukasuaane.

²² “Karika ghe gheelei poila righi ssavoto,

me karika righi inangari nikamekame ghe kupi ghoa mae ta paane.”

²³ Nau eteva laghe auliaa teeia asease inangari etoa, karika poi ghe liiliu; nau ghe ghaaghaa nimmarikana, karika poi ghe apasunga va eliu. Ghe tau lao sio isaa o voto ta God, poli God egheelei niaisakei ghulughuluena. ²⁴ Nim ia nonga ghe saula gheeleiaaita sesa tale vilikina tale ai eteae; mausina avalua o ita rooroo tani kasu vuli sesa voto me ita lao tale niuungu ghulughuluena; poli tale usai ghe ghaala, am ghe masinala. ²⁵ Poli am ghe nonginala sipsipi etoa karika la kilakila va eaa la laolao, me isaa oia angam ghe oghi mae sio ta kapuimim Tau ngai toitoi eteva ia eaitarainiem.

3

Lailai etoa

¹ Tale ia o salana atikirighi, am vause atoa lailai iem, am tani nongo

2:11: Gal 5:17, 24. **2:12:** Mat 5:16. **2:13:** Tts 3:1. **2:15:** 1 Pita 3:16. **2:17:** Rom 12:10. **2:18:** Ips 6:5. **2:20:** 1 Pita 3:14, 17. **2:21:** Mat 16:24; Jon 13:15. **2:22:** Ais 53:9. **2:23:** Ais 53:7; 1 Pita 3:9. **2:24:** Rom 6:11; Ais 53:5-6. **2:25:** Esik 34:5-6; Mat 9:36; Jon 10:14; Hib 13:20-21. **3:1:** Ips 5:22.

usilaa taitaniim atoa. Me arova katoa tale ila o taita atoa karika la aikaaiaa tale inangarina God, karika va tale inangariimim, ta tale masi gheegheleiaaimim aue egheleila me la aikaaiaa,² poli aue la tara vaalua masi uunguaaimim raarangisana me nioneoneaa tale tokatokaaimim.³ Am rau mene nnangaili tani amolumolu vilikiimim va emasinaaili taatarane, nongina am gheelei tale uu nguruuim, me nongina asease vurra atoa am aamolumolu vilikiimim, me tale masi ghinna atoa am aasaela,⁴ ta am anna tani amolumolue, ghele masina arova am ghele amolumolu elome etaimim tale uunguaa niaimasiaa me nisioaa nanna, poli isaa o ase niuungu masinaaili ta matane God me karika aue ekapa.⁵ Tale isaa o salana, emua arau vause atoa manga ila laghe gheelei emasinaaili taataraira. Laghe aatoka tuutuliira ta God, me laghe aaimuli usi tee saa voto taitaniira atoa laghe aauliaa.⁶ Nim nongina Sera ghe nongo usilaala taitanna ateva ta Abraham, me ghe kolokoloa va vauna ia. Am tee aue natuna vause iem arova am gheelei voto masina, me karika aue am matauta saa voto pei nimatauta.

⁷ Tale ia o salana atikirighi, am taita atoa lailai iem, am tani oneoneaa vauseniim atoa. Am gheelei emasina ta ngetaira nau am tokatoka aitauua, poli sarasarakaniaaimim elaulau sarasarakaniaaira, me poli amalua aitauua, amalu ghaaghaa maulue ta God, arova ughelei emasina etana, karika teva voto aue eghelel runga kalum nilooloo sae.

Nimmarikana mausi masi niuungu

⁸ Tani ruu, am akapaaili gheegheleiaaimim me ateateaaimim ekateva nonga ia. Am aielousi nongina va tue me nenga atoa, me am annaa mene katoa me am sioaa nannaaimim tee kateva kateva etaimim.⁹ Am rau mene liu sesa tale sesa voto o inangari nilakolako tale inangari nilakolako; ta am liu tale niarangise, poli God ghe koloamla tani ghelel isaa o voto, me aue am ghaa niarangise.¹⁰ Poli Uru ngai Manga ateva eue va,

“Marova lo ateva taumattu ealoanna va maamauluaane emasina
me etoka liu,
etani aitaraa ramuramuti paana ateva tale sesa voto
me tee musiki paane tale inangari kamena.

¹¹ Me etani oghi vulu sesa voto me eghelel masina;
euungu aanasa tani atoka luei me esarasarakana tani toka tale luei.

¹² Poli matane Vau eteva eaatoka ta ghulughuluena atoa taumattu
me talingane enonganongola nau la looloo sae,
me eliuliu vilina ta lo atoa la gheelei sesa voto.”

¹³ See aue ealoanna tani avakovakoam marova am annaaili tani ghelel masi voto? ¹⁴ Me marova am ghaaghaa nimmarikana tale voto masina, aue am ghaa niarangise. Nongina Uru ngai Manga ateva eue va, “Am rau mene matauta saa llo la maamatauta; am rau mene matautu.” ¹⁵ Ta elome tale urunguitaniimim am atoka Karisto va ia Vau palepale ia. Arova teva taumattu ekookolomio tani tau lao saa malloeane unem niaikaiaa uaatoka tuutulim etana, uaimonomonosiaa tani liu etana nau ekapa atoa. ¹⁶ Ta am ghelel tale nisama saghuighuiena me nioneoneaa. Nau ekapa atoa, am ghelel voto am kilakila va masina, poli am aloanna va lo atoa la poppoaa saasakiaa tale masi uunguaaimim ta Karisto aue la palata mausi inangariira la

poppooaa teeiem. ¹⁷ Emaamasina, marova aloannaane God, va ita ghaa nimmarikana tale voto ita gheelei masina me karika va ita ghaa nimmarikana tale voto ita gheelei sesa. ¹⁸ Poli Karisto ghe matela tale isaa akapaaili ssavoto katengaata nonga, Iesu ghulughuluena ia ghe matela ta lo atoa karika ghulughuluena ila, tani taula lao ta God. Ghe matela, me Spiriti eteva ghe mene taula maulue etana. ¹⁹ Ta Spiriti eteva ghe lao tee sio tale ale mata voovoo me ghe ppooaala tale spiriti etoa ²⁰ laghe tam nongo usilaala emua arau nau God ghe kaarasila tani toitoi me karika ghe turungilala lomosina ta Noa ghe atulula aka ateva, me manu ghagga ateva ghe ghaailala. Tale aka ateva karika oroi taumattu ghe saangala tale manu ghagga ateva, nim ghaocalu (8) nonga. ²¹ Me ia oia manu eteva eaaimatoonga niaasuu eteva, ghaine am tee am ghaaghhaa niasaangi etana — karika va tale nighaa velu kulukulutana tale vilikiita, ta niaasuu eaimatoonga inangari nialokoi ita gheelei ta God ekasukasu tale urunguitaniita. Ghe asaangitala tale nitotu eteae ta Iesu Karisto, ²² ang ghe saela epona liu me etokatoka tale pai muenna ativilau ta God, ia ghe gheleila Karisto va eaitoiaa ensolo atoa me spiriti etoa elomarase.

4

Tani toka ta God

¹ Liuna avalua o, poli Karisto ghe ghaala nimmarikana tale vilikina, am tee am tani poso parasi ia o ase ninanna ngateva nongina ia ghe gheleila, poli lo ateva ang ghe ghaala nimmarikana tale vilikina, karika emene tokatoka tale uunguua ssavoto ateva. ² Nau ekapa atoa, am tau ekapa lao tokatokaaaimim tale aloaloannaane God me karika va tale sesa aloaloannaaimim. ³ Isaa to nau ang ghe lao sio ang ghe ssoiemla tani uunguua asease voto atoa taumattu ngeleka atoa la aaloannaaili tani ghelei. Maamauluaaimim am ghe nim anna tani ghelei sesa voto, me tani nnaa nonga uunguua nialai salosalooa, me tani ropi sesa manu, me tani ghelei kinatama ninamanama atoa la ghaalutu ssavoto, me kinatama nivelu eitauaa tani ropi sesa manu, me tani kkaua goto atoa kamena ila me karika poi masina ila. ⁴ Me ghaine taumattu ngeleka atoa angila ghe soghiaala tani tara nau karika am mene laolao aitauaa teeila tale isaa o ase voto karika masina, liuna avalua o me la auliaa teeiem. ⁵ Me am tani nnaa parasi va aue la tingina emua ta matane God, me ia aue eghelei niaisakei ta taumattu ngakapaaili etoa, maulue atoa me matena tee atoa. ⁶ Liuna avalua o me lo atoa ngila ghe matela ila tee ngila ghe nongola masi kiukiuna, arongona ta vilikiira ang ghe matela, nongina taumattu ngakapa atoa la tani mate, me kapuira spiriti etokatoka tee God.

⁷ Airuuruu tale voto akapa ange kalakalangina. Liuna avalua o me nannaaimim emasalike, am aaitarainam tani ghelei ghulughuluena voto me aue am roo tani looloo sae amasina. ⁸ Tale isaa akapaaili voto am kaarasi tani aielousiaa kateva kateva etaimim, poli niaielousi eteva eaakou oroieili ssavoto. ⁹ Am aikoloaa taumattu tani mae tanganueimim, me am rau mene uessa. ¹⁰ God ghe tau aatu sio ta kateva kateva etaimim voto kanna Spiriti eteva, tani uungu ta mene

katoa taumattu tani aisausia tale asease salana, tani apasunga ngaotu maamasinaane God ta mene katoa.¹¹ Arova teva taumattu uunguaam tani ppooaa, uppooaa nongina va lo ateva eaauliaa inangarina ateva God. Me arova see ughuungu ta katoa, ughuungu tale sarasarakana God etautau aatu, poli ita aloanna va tale isaa akapaaili voto, taumattu ngatoa aue la tau sae God mausi Iesu Karisto. Ita rooroo tani oneoneaa Iesu poli sarasarakaniaane etokatoka liu, koronna.

Nimmarikana tale tau niaiesoaa ngatoa

¹² Masi kapughu etoa, karika am mene soghiaa isaa o nitootoonga mmarikanaaili am mammarikana tee, nonginaaili va isaa o voto ouna. ¹³ Karika, ta am masimasi ta am tee am usiusi tani ghaa nimmarikana ta Karisto, liuna avalua o me aue am pasu tale nimasimasi nau eteva emae tale sarasarakaniaane.¹⁴ Arova la avakovakoam mausi ararina atae Karisto, niarangise etaimim, poli kapuna Spiriti eteva God sarasarakana ia etokatoka ta getaimim.¹⁵ Arova ummarikana, karika ughaaghhaa mmarikana poli uaaivi emate, o tau niainao io, o mene righi ase talo nissangaliki, o nongina ase niaikkisiaa.¹⁶ Isaa avalua o me marova ughaaghhaa nimmarikana poli uaaiesoaa, urau mene palata, ta utau sae God poli la kilakila va io kapuna io Karisto.¹⁷ Poli nau niaisakei ang ghe tiuala, aue etiuaa ta natuna atoa God; me marova etiuaa etaita, aue esesaaili ta lo atoa la tam nonganongo usilaa masi kiukiuna God.¹⁸ Me, nongina Uru ngai Manga ateva eue va,

“Marova aanasa ta tau ghulughuluena atoa tani saanga,

aue vaalua ta lo atoa la tam oneoneaa poi God, me tee ta tau ngai ghelei ssavoto atoa, ila tee, vaalua aue la saanga?”

¹⁹ Lo atoa la ghaaghhaa nimmarikana poli la aaimuli tee aaloannaane God, la tani tau vella lao ta lo ateva ghe gheleilala, poli egheelei voto ghe uela va aue eghelei, me la toka gheelei nonga masina.

5

Tani aitaraa kieni sipsipi etoa God

¹ Me isaa oia, inangari niaisausi eatuetu etaimim namu ngatoa am muemueaa ale manga atoa, aghi tee namu ngaghi. Aghe tarala ta mataghi vaalua Karisto ghe ghaala mmarikana, me am me aghi aue ita ghaaitauua sarasarakana me nioneoneaa tee Karisto nau ekauerekati.² Am aitara ngamasina sipsipi etoa God ghe tau aatu sio etaimim tani aitaraa. Am aitarainila poli aloaloannaaimim tani aitarainila me tale nimasimasi, nongina aloannaane God, me karika va la suusulungiem. Me karika va mausi viliki veu, ta poli am aloannaaili tani sausi.³ Am rau mene ghelei nongina va lo atoa arariira, ta am tau ngaimatootoonga etaira.⁴ Me nau namuu tale tau ngaitoi sipsipi etoa ekauerekati, aue am ghaa kou nguru eteva mallangina karika aue ekapa.

⁵ Aliki taita atoa, tale ia nonga o salana atikirighi, am nongo usilaa kapuimim taita namu ngatoa. Me am akapanaaili am ghaa uunguaa nisioaa ninannaa tee mene kateva kateva, poli Uru ngai Manga ateva eue va,

“God karika poi ealoanna lo atoa la tautau sae nannaairaa,

me eaapasunga maamasinaane ta lo atoa la siosioaa nannaairia.”

⁶ Liuna avalua o me am sioaa nannaaimim ta God sarasarakananaili ia tani sausiem, me God aue easaesaeam tale ia o nau eteva ealoannaia.

⁷ Isaa akapaaili uneimim nimoia me maate am taula ta ngetana poli ia eaaitarainam.

⁸ Am nanna ngamasina me am taatara amasina poli Satana aisseeteeimim ia ekasukasu ekapa see arova laeoni eteva engoongoo atingina me epaepae teva tani nama. ⁹ Am tiu velua me am tingina akorokorongana tale uneimim niaikaiaia, poli am kilakila va lo akapa atoa tale kosa ateva la ghaiesoaa ta Iesu la ghaaghaa ie nonga o ase nimmarikana ateva.

¹⁰ Tale kinatama maamasinaane God, ghe koloamla va am ghaa aitauaa nioneonea ngateva tokatoka liu ia ta Karisto. Me nau am ghaa nimmarikana tale nau karika aluse, aue emene ghelei rooroaa me aue egeleei emasinaaili uunguaane etaimim tani atingina akorokoronganaiem, me easarasarakanaiem. ¹¹ Aloodoo sae va ta ngetana sarasarakananaiem, me easarasarakanaiem.

Tale isaa akapaaili nau. Koronna.

Airuuruu tale inangarina Pita

¹² Tale saasausiaane Saelas,* akolokoloa va kapuita ia, me arooroo tani atoka tuutulighi etana, aghi aghe piti atu sio etaimim ia oia uru ngai etikirighi karika aluse ia, tani asarasarakanaiem me tani aulia ngaotu va ia oia maamasinaane ateva God koronna ia. Am tani tingina akorokorongana etana.

¹³ Tau ngainesoa ngatoa tale ale manga atoa eBabilon,† God ghe suimatoongainilala teeiem, laghe suula masimasiaaira etaimim, me tee natughu eteva ta Mak ghe suula masimasiaane etaimim. ¹⁴ Am sou kateva kateva tale niaielousi.‡

Aloodoo sae va luei aue etoka ta ngetaimim akapa, lo atoa am ta Karisto.

5:6: Mat 23:12; Luk 14:11; Jms 4:10. **5:7:** Mat 6:25-30. **5:8:** 1 Tes 5:6. **5:9:** Ips 6:11-13; Jms 4:7. **5:12:** Apos 15:22, 37-40; 12:2, 25; 13:13. * **5:12:** Tale inangari nge Grik, Silvanus.

5:13: 2 Tim 4:11; Apos 12:2. † **5:13:** eBabilon Malloeana va Rom, ta Rom ghe aitoiaa kosa ateva tale isaa o nau. ‡ **5:14:** tale niaielousi Tale inangari nge Grik, tale niaingusu eteva tale niaielousi.

Aiaaghaluene atikirighi uru ngai Pita ghe pitiela Inangari emuemua

Aiaaghaluene atikirighi uru ngai Pita ghe pitiela eaauliaa tee gheeleiaaita tau ngaiesoa ngatoa tale kosa ateva oia. Ghe aulia ngakorokorongana ta tau ngai aapasunga ngatoa kamena ila, va aue God eturungila. Ghe auliaala tee maemaeaane Iesu.

Tani kila amuemua

Aitiutiu tale inangari 1:1-2

Tokatokaairia kapuna atoa God 1:3-21

Niaulia ngatootoonga tale tau ngai aapasunga ngatoa kamena ila 2:1-
22

Maemaeaane Iesu 3:1-16

¹ Aghi Saemon* Pita, tau ngai uungu me apostolo ieghi ta Iesu Karisto, Apitipiti atu etaimim lo atoa aikaiaaimim nonginaaili aikaiaaimami. Am ghe ghaala ia o niaikaaia ngateva tale ghulughuluueni-aane Iesu Karisto, kapuita Goto ia me tau ngai asaangiita ia.

² Alooloo sae va God aue etau aatu maamasinaane me luei epasu etaimim poli ngam ghe kila amasinaailila God me Iesu kapuita Vau eteva.

Tani pinosa tale aalomasaanganiaane God

³ God ghe kolotala tale kinatama sarasarakaniaane ateva me maamasinaane, me ita kilakilaia. Tale sarasarakaniaane ghe tau mae sio isaa akapaaili voto ita tuutukuna etana tani asarasarakana maamauluaaita me ita rooroo tani usilaa salane God. ⁴ Tale ia o salana atikirighi ghe tau mae sio kinatama inangari nialokoi etoa tani nim tau mae masi voto etaita. Isaa oia inangari nialokoi erooroo tani gheleiem me am toka tale gheeleiaane God me am apala sesa voto emaemaе tale nannaa taumattu tale kosa ateva oia me egheelei saasakiaa urunguitaniira.

⁵ Mausina avalua o aghaauliaa etaimim va, poli ngam ghe aiesoaala ta Karisto, am uungu esarasarakana tani masi taumattu, me tee am uungu esarasarakana tani kila God me sa ateva ealoanna va am gheleia,

⁶ me tani apala sesa aloannaaimim, me am toka akorokorongana tale sesa nau, me tani usilaa salane God, ⁷ me am aielousi nongina tue me nenga atoa, me tani aielousiaa tee taumattu ngakapa atoa. ⁸ Me arova am ghaa isaa o masi voto me la pinosa aoroi etaimim, aue la gheleiem va alomasaanganiaaimim ta Vauita ateva Iesu Karisto karika aue nim peisaane, ta aue ealutu masi uene. ⁹ Me arova isaa o voto karika ta teva taumattu, ia o taumattu ngateva nongina llo taumattu taataraane tukuna, o nongina mata salusalu eteva ang ghe aikkaluuala va God ang ghelei eraarangisanaiela tale kannaa ssavoto. ¹⁰ Liuna avalua o me, kapughu etoa, am tani aitokaa tani kilaaili va God ghe koloamla me ghe suimatoongainamla. Poli arova am ghelei isaa o voto, karika aue am katuu. ¹¹ Me aue la masimasi tani souem tani kupi sso tale

* **1:1:** Tale inangari nge Grik, Simion. **1:6:** Gal 5:22-23.

ararimangalina ateva Iesu Karisto, Vauita ia me tau ngai asaangiita ia, ia aue kingi nau ekapa atoa.

Inangari niaulia ngamuemue tale Uru ngai Manga ateva

¹² Mausina avalua o me, arongona ta am kilakila isaa o voto me am tiitingina akorokoronganana tale voto koronna ghaine isaa etaimim, aue amene toka auliaa kieimim tale isaa o voto. ¹³ Aghannaa va masina tani mene aravaiem nau maulue ieghi, ¹⁴ poli akilakila va ghaisa ngarighi amate, nongina Vauita ateva Iesu Karisto ghe aulia ngamasalikaala etaghi. ¹⁵ Me aue atootoonga tani uungu esarasarakana tani tara va nau eteva karika ieghi, aue am roo tani nnaa isaa oia voto.

¹⁶ Nau ami ghe auliaala etaimim sarasarakaniaane Vauita ateva ta Iesu Karisto aue emene oghi mae, karika ami ghe aimulisi teela isaa o kiukiu laghe nim gheleila. Ta ami, ami ghe tarala ta mataimami isaa o naanamungaane me sarasarakaniaane Karisto. ¹⁷ Ta ia ghe ghaala nioneoneaa me nianamunamungaane ta God Tamane nau eteva lingi ngalo ateva ghe mae sio tale maamallangiaane urukookoo ateva, me ghe uela va, “Ia o natughu eteva, aghaailousiangailiia, ta netana amasimasiangailiia.” ¹⁸ Ami, ami ghe nongoala ia o lingi ngalo ateva ghe mae sio epona liu, nau ami ghe tokatoka aitauaa tee Karisto tale motouru eteva manga ia.

¹⁹ Me ita kilakila va inangariira propete atoa koronnaaili, me am tani aimuli teeila, poli nongina mallanga ateva emaamallanga tale voto saurrom, isaa o inangariira aue eapasunga voto koronna ta Karisto, lomasina ta Iesu ekiri sio, nongina ange paipai me katto pai eteva[†] esaesae tale urunguitaniiimim. ²⁰ Tale voto akapaaili, am rou mene kkaluaa va karika righi inangari niaulia ngamuemue tale Uru ngai Manga ateva ghe nim mae sio tale nim nannaaira propete atoa. ²¹ Ta inangari niaulia ngamuemue karika ghe nim tiuaala tale nim aloaloanna taumattu, ta taumattu ghe aippooaa tale inangari ghe maemae ta God nau eteva Spirit Manga ateva ghe kaakatulainila.

2

Tau ngai aapasunga ngatoa kamena ila

¹ Emua arau propete kamekame atoa laghe tingina saela elome ta kapuna taumattu ngatoa God. Me tale ia o salana atikirighi tau ngai aapasunga ngatoa kamena ila aue la tingina sae elome etaimim me la auliaa illo kamena me la ue va koronna, me isaa o voto kamena aue eghelei saasakiaa taumattu ngatoa. Ila o tau ngai aapasunga ngatoa aue la liu viliira ta Vau eteva, lo ateva ghe ghaa oghilala. Aue la ghelei evalua o me gharovaea nonga ta God aue eturungila. ² Oroieili taumattu aue la usilaa asease uunguaaira atoa sesa ila; me isaa o voto aue eghelei taumattu ngatoa la auliaa saasakiaa tale salana koronna. ³ Ila o tau ngai aapasunga ngatoa la kamekameam tale oroi kiukiu kamena tani ghaa uneimim viliki veu. God ang ghe aimonomonosiaala uneira niaisakei eteae, me aue eturungila.

⁴ Am kilakila va emua arau, God karika ghe amaramara teela ensolo atoa nau laghe gheleila sesa voto, ta ghe sau vella siola tale voto ateva

1:14: 2 Ko 5:1; Jon 21:18-19. **1:16:** Mat 17:1-5. **1:17:** Mat 17:5. **1:19:** katto pai eteva Utara Nambas 24:17; Niaulia ngaotu 22:16. **1:21:** 2 Tim 3:16; 1 Pita 1:11-12. **2:1:** Mat 24:11; Jiud 1:4. **2:4:** Jiud 6.

siosionaaili ia me saurorromienaaaili tee ia, va la toitoi nau niaiskei eteva.⁵ God karika ghe amaramara teela taumattu tale kosa ateva oia nau laghe liula viliira etana, karika, ta ghe tau sio mae manu ghagga ateva etaira me laghe matela; ghe asaangi nongala Noa, poli ia nongaaili ghe aauliaa me ghe aapasunga voto ghulughuluena, tee mene ghaitu (7) taumattu.⁶ God ghe auliaa teela masaliki taatara aluae eSodom me eGomorra va ave lalu ghaa sesa aipolipoli. Ghe turungilaluela tale kura atae me au nonga ghe tokala. God ghe ghelei evaluelu o tani eapasunga etaita saa voto ave elutu tale llo taumattu la liuliu viliira ta ngetana.⁷ Ghe asaangila Lot, ghulughuluena ia, poli karika ghe masimasiaa sesa gheegheleiaaira tau ngai ghelei ssavoto nge Sodom atoa.⁸ Koronna, ia o ghulughuluena ateva taumattu ghe tokatoka elome etaira, me isaa akapa nau ghe ghaaghhaa nimmarikana me nialousiusi tale nannaane nau ghe taatara me nonganongo sesa gheegheleiaaira.⁹ Isaa avalua o me Vau ngepona ateva ekilakila vaalua tani asaangi lo atoa la nonganongo usilainia nau nitootoonga eghaaghaila, me ekilakila vaalua tani akaravusu lo atoa karika ghulughuluena ila me ave la ghaa kinatama sessaiaane ateva God tale maamauluaaira me la toitoi nau niaiskei eteva.¹⁰ Isaa o voto tani koronnaaili ta ila o tau ngai aapasunga ngatoa kamena ila la ghaimuli tee aaloannaaira sesa emaemaе tale vilikiira, me tee llo matuutuliena la tam aloanna.

La sarasarakana tani nnaainila nonga me karika la maamatautu tani auliaa saasakiaa tee kapuna ensolo atoa la ghaaghhaa nioneoneaa.¹¹ Arongona ta ensolo atoa sarasarakanaaaili ila me ila karika la ghaauliaa saasakiaa tee isaa o taumattu la gheelei niaiskei etaira ta matane Vau eteva.¹² Me ila o taumattu ngatoa, la ghaauliaa saasakiaa tale voto ila la tam kilakila amasina. Ila nongina ghaata kkena atoa, me la ghaaimuli tee aloanna vilikiira, laghe nim lutula va la ghaaila, me la turungila. Me nongina ghaata kkena atoa, ila tee ave la raua.¹³ Ave la ghaa aipoliira sesa tale voto sesa laghe gheleila. Ila masimacieili tani ghelei kinatama ninamanama me niropi tale tummatavanga. Me nau la namanama teeiem tale ale manga ateva, la nannainila nonga, me la gheelei saasakiaa arariira ale manga atoa.¹⁴ Mataira epasupasu tani lai sari lo atoa vause karika va maneira ila. Karika la ruuruu poi tani ghelei ssavoto. La kamekame lo atoa karika la aikaiai ngasarasarakana ta Karisto me la kaakatulainila lao tale ssavoto. Me muennaaili ila tani raungaa me kuruetu. Ang ghe ssuua vellala.¹⁵ Ngila ghe laula salana ghulughuluena me ngila ghe kasula tani laa ghaimuli tee salane Baelam natuna ia Beo, ia ghe aielousiaa aipolipoli tale uunguaa sesa salana.¹⁶ Donki eteva ghe auliaala etana va voto egheelei karika masina, ia o donki eteva karika esamasama, ghe samala nongina taumattu ngateva, ghe ghelei rungaala propete ateva tani ghelei voto alokapakapanna.

¹⁷ Isaa oia taumattu nongina ateo mata vubbu karika righi manu ta ngetana, me urukookoo ateva, ttasi eteva ekuukueinia see. Saurrom ateva aavoonaaili ia etoitoila.¹⁸ La auliaa inangari karika righi malloeana tani tau sae nannaaira, me la auliaa ta taumattu ngatoa va la rooroo tani usilaa sesa nannaaira, me la kaakatulainila lao tale salana ngila ghe oghi vulula.¹⁹ La ghaauliaa inangari nialokoi ta

2:5: Aitiutiu 6-8; 2 Pita 3:6. **2:6:** Aitiutiu 19:24; Jiud 7. **2:7:** Aitiutiu 19:1-16. **2:10:** Jiud 7-8, 16. **2:11:** Jiud 9. **2:12:** Jiud 10. **2:15:** Nam 22:7; Jiud 11; Aotu 2:14. **2:16:** Nam 22:28-35. **2:17:** Jiud 12-13.

taumattu ngatoa va karika aue la tokatoka tale aloannaane mene kateva; me karika ta ila tee, karika la tokatoka tale aloannaaira, karika righi sarasarakaniaaira tani ghelei rungainila tale voto sesa — poli arova teva etau velu teva voto emuemueinia, ia nongina taumattu ngateva karika etokatoka tale aloannaane. ²⁰ Nau laghe kilala kapuita Vau eteva me tau ngai asaangita ngateva Iesu Karisto, laghe kasu vulila voto sesaaili tale kosa ateva. Me nau oia ngila ghe mene oghi lao sio tani mene ghelei isaa o voto sesaaili, me isaa oia nau esesaaili ta ngetaira. ²¹ Aue ghele masina marova karika la ghele mene kila salana tani ghulughuluena, ta nau eteva laghe kilala, me la mene oghioghi vulu, aue esesaaili ta matane God. ²² Tale isaa o voto, kateva tuku inangari koronna ia, eue va: “Paua ateva eoghioghi lao tale luekina ateva,” me, “Mosu eteva nau ange raarangisanala, emene oghioghi lao tale suesuena ateva.”

3

Nauna ateva Vau eteva

¹ Masi kapughu etoa, aiaaghalua atikirighi oia uneghi uru ngai apitipi-tie atu etaimim, tale ilalua o uru ngai eluekirighi agheelei nannaaimim va emasalike tani mene nnnaa isaa o masi voto. ² Aghaalonaiem tani nnnaa parasi isaa o inangari propete atoa manga ila laghe auliaala emua arau, me tee saa voto kapuita Vau ngepona ateva me tau ngai asaangiita ia ghe aulieiniela ta apostolo atoa, me apostolo atoa laghe auliaala etaimim.

³ Aitiutiutu eteva voto aghanna tani aulieinia etaimim ia avalua toko, va tale airuuruu tale nau kasina taumattu aue la mae tale sesa nannaaira me la auliaa saasakiaa me la kaili ekamena voto koronna me aue la pilosiem ⁴tani ue va, “Ghe uela tale inangari nialokoi va aue emene sio, va? Eaa ange reerekata? Tamaita me tuvuita atoa angila ghe matela, me ila akapaaili voto atoa ila tokatoka nongina arau aitiutiutu tale kosa ateva me nau ghaine tee.” ⁵ Laghe ghaa vella tale nannaaira va God ghe nim aippooaala me epona liu ghe lutula, me kosa ateva oia ghe kaurekatila tale manu, me tale manu ghe gheleila kosa ateva. ⁶ Me tale manu eteva, ghe tturuula kosa ateva oia tale kinatama manu ghagga ateva. ⁷ Tale ie nonga o inangarina ateva God eunaakookoo me elomarase me kosa ateva oia ghaine am taataraira, God ghe aimonomonesieinilala tani ghaa kura atea, tale nau niaisakei eteae, ia o nau eteva taumattu ngatoa karika la uusilaa masi salana kanna God, God aue eturungila.

⁸ Me am rau mene kkaluaa ie toko voto ateva, masi kapughu etoa, va, ta Vau ngepona ateva, kateva nau nim nongina va kateva airari (1,000) ninamanama, me kateva airari (1,000) ninamanama nim nongina va kateva nau. ⁹ Vau ngepona ateva karika eaimaomaoaa tale kanna inangari nialokoi ghe gheleila, nongina kasina taumattu la annaa va eaimaomaoaa. Karika, ta eakaakaarasi tani toitoi mausiiimim, me karika ealoanna va teva etaimim eraua, ta ealoanna akapaiem va am nna ngaioghiogphia.

¹⁰ Me nauna ateva Vau ngepona ateva aue emae nongina tau niainao ateva, karika ita kilakila maemaeaane. Eunaakookoo aue ekapa tale

kinatama mangalia ateva, me ila akapaaili voto atoa God ghe gheleilala aue kura atae eata akapaailiila, me tale ia o nau eteva, voto akapaaili tale kosa ateva aue eotu.

¹¹ Am nim nnaa marova voto atoa aue God eturungi evaluateila o, me am aue vaalua etaimim? Am tani toka tale ase nitoka manga me tale aloaloannaane God. ¹² Nau am toitoi nauna ateva God va emae am tee am ailuiluieinia. Ia o nau eteva aue kura atae eata eunaakookoo me elomarase, me ila akapaaili voto atoa aue la nim manu tale lallangina ateva. ¹³ Me tani nnaa inangarina inangarina nialokoi ita taatara lao emua tale ouna ateva epona liu me ouna ateva kosa, voto ghulughuluena etokatoka etana.

¹⁴ Liuna avalua o masi kapughu etoa, poli am taatara lao emua tale isaa o voto, am tani toka va God aue etaraiem va raarangisana iem me aue erau mene aliu teeiem tale voto sesa, me am toka ta ngetana tee luei.

¹⁵ Am tani nnaa va Vauita ateva karika emaamangoo tani toitoi, poli eaaloanna va mene katoa la mene saanga, nongina masi kapuita ateva ta Pol ia tee ghe pitipitila ta ngetaimim tale nialomasaanga God ghe tau lao sio etana. ¹⁶ Tale unna uru ngai ekapa ghe pitipiti tale ia nonga o salana atikirighi, ghe aauliaa ta ngetaira isaa oia voto. Tale unna uru ngai ghe aauliaa kasina tana voto aanasa tani alomasaanga tee, liuna avalua o me llo taumattu karika masi gheeleiaaira me aikaaiaairaa karika korokoronganana, la kirikiri saasakiaa inangarina Pol, me la gheelei evalua tee o tale mene kasina inangarina tale Uru ngai Manga ateva. Liuna avalua o me la gheelei va God aue eturungila.

¹⁷ Mausina avalua o, masi kapughu etoa, nongina ngam ghe kilala isaa o voto, am tani taatara amasina me inangariira lo atoa taumattu karika la ghaaimuli tee masi salana, la rau mene mae ghelei saasakiaa nannaaimim tani tiuaa kalipiem va am katuu vulu aikaaiaaimim ngam ghe korokoronganala etana. ¹⁸ Me, tale maamasinaane, am pinosa tale alomasaanganiaaimim ta Vauita ateva me tau ngai asaangita ateva Iesu Karisto. Ta ngetana ita tau sae ghaine me nau ekapa atoa! Koronna!

Aitiutiu etikirighi uru ngai Jon ghe pitiela Inangari emuemua

Oroi tau ngalomasaanga la nannaa va lo ateva ghe pitila 1 Jon, 2 Jon me 3 Jon, Jon apostolo ia, me tee ghe pitila Masi kiukiu me Aulia ngaotu.

Tale ia oia uru ngai etikirighi, Jon ghe pitila voto tani sausi ale manga ateva tani kila va see ila tau ngai aapasunga ngatoa kamena ila. Katoa laghe ue va Iesu karika taumattu tuungi ia, me mene katoa laghe ue va la kilakilaaili voto tale spirit, me karika poi la gheelei ssavoto. Jon ghe aulia ngasarasarakanala voto ita kilakila, me tee vaalua ita roroo tani kila va taumattu eaiesoa ngakoronna arova eaielousiaa mene katoa tau ngaisesoaa. Ghe piti teela mene ghalua nitoonga tani kila va see ia tau ngaisesoaa tuungi: la nongonongo usilaa God, me la aiesoaa voto koronna. Jon ghe aielousiaa lo atoa ghe pitipitila etaira, me ghe aselala va natuna ila.

Tani kila amuemua

Aitiutiu tale inangari 1:1-4

Tani toka tale mallanga ateva 1:5-2:29

Tani toka nongina natuna atoa God 3:1-5:12

Voto ita atoka tuutuliita etana 5:13-21

Inangari maulue

¹ Inangari eteva maulue ia ghe tokatoka tale aitiutiu, me ami ghe nongoala, me ami ghe taraiela ta mataimami, me ami ghe posoala ta nimaimami, ia o inangari eteva ami aulia ngaotua. ² Lo ateva etautau maulue ateva ghe kaurekatila, ami ghe taraiela me ami aaulieinia me ami poppoainia etaimim. Ia o maulue ateva tokatoka liu ia me ghe tokatoka tee Tamana, me ang ghe kaurekatila etaimami. ³ Ami poppooa ngaotu sa ateva ami ghe taraiela me ami ghe nongoala, mausina avalua o me am roroo tani mae aitauaa teeiemami me ita aighui eitauaa, me kaluimami niaighui eitauaa ta Tamaita me Natuna ta Iesu Karisto. ⁴ Ami pitipiti voto tani ghelei va masimasiaaita enamungaili.

Tani kasu tale mallanga

⁵ Inangari eteva oia ami ghe nongoala etana me ami aulia ngaotua etaimim va God mallanga ia, me ta ngetana karika poi righi saurrom.

⁶ Arova ita ue va ita aighui eitauaa teeia me karika, ta ita kasukasu tale gheeleiaa saurrom, ita nim kamekame me karika ita uusilaa voto koronna. ⁷ Me arova ita kasukasu tale mallanga nongina ia elome tale mallanga, aue ita aighui eitauaa tee mene kateva kateva etaita, me raena ateva Iesu Natuna ia egheeghelei eraarangisanaita tale kaluita ssavoto akapa.

⁸ Arova ita ue va ita karika righi kaluita ssavoto, ita nim kamekameta, me voto koronna karika isaa elome etaita. ⁹ Arova ita aulia ngaotu kaluita ssavoto, ia egheelei voto ghe uela va eghelei, me ia aue etani

kkalua ngakapaaili sesa gheeleiaaita me eghelei eraarangisanaita tale isaa akapaaili gheegheleiaaita karika ghulughuluena. ¹⁰ Arova ita ue va ami karika ami ghe gheleila righi ssavoto, ita gheleia va ia tau nikamekame ia, me inangarina ateva karika ia tale urunguitaniita.

2

Iesu aisausiita ia

¹ Masi natughu etoa, apitipiti etaimim va karika am mene ghelei ssavoto. Me arova teva eghelei ssavoto, kateva taumattu aisausiita ia eaioppoaa tee Tamane ta poli ita, Iesu Karisto etana ghulughuluena ia. ² Ia ghe matela tani ghaa aipolipoli tale kaluita ssavoto, karika va kaluita ssavoto nonga, ta kaluira tee taumattu ngatoa tale kosa akapaaili eteva oia.

³ Ita kilakila va, arova ita nongo usilaa llo eaauliaa, angita ghe kilaiela. ⁴ Lo ateva taumattu eue va, “Aghi akilakilaia,” me karika enonganongo usilaa tee llo eaauliaa, tau nikamekame ia, me voto koronna karika isaa etana. ⁵ Me arova kateva etaita enongo usilaa inangarina, ailousiaane ateva God etokatoka akoronna etana me ghulughuluena ia. Tale isaa o salana, aue ita kila va ita etana: ⁶ lo ateva eue va etokatoka tee Iesu, etani kasu nongina Iesu ekasukasu.

⁷ Masi kapughu etoa, karika amene pitipiti righi ouna voto tani usilaa, ta pokane, llo oia ngam ghe ghaala tale aitiutiu. Isaa oia voto pokane ngam ghe nongola. ⁸ Arongona ta pokane, amene pitipiti tani auliaa ouna voto tani usilaa, me am roo tani tara kannu voto koronna ta Iesu me ta ngetaimim, poli saurrom ateva ange kapakapa, me koronna ateva mallanga ang ghe llaala.

⁹ Arova teva eue va ia tale mallanga ateva, me esessa tee tuena o nengane ateva, ia karika ghe kasu vuli saurrom ateva. ¹⁰ Lo ateva eaielousiaa tuena o nengane ateva, etokatoka tale mallanga, me karika righi voto erooroo tani gheleia va ekatu. ¹¹ Me lo ateva esessa tee tuena o nengane ateva, ia tale saurrom, me ekasukasu elome tale saurrom, me karika ekilakila va eaa elaolao, poli saurrom ateva eaakou runga matana me karika etaatara.

¹² Apitipiti etaimim masi aliki etoa,

poli God ang ghe kkaluaala kaluimim ssavoto poli uunguaane ateva Iesu.

¹³ Apitipiti etaimim tamatama atoa,

poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa,

poli ngam ghe apalala sesa taumattu ngateva.

Apitipiti etaimim masi aliki etoa,

poli ngam ghe kilala Tamaita ateva.

¹⁴ Apitipiti etaimim tamatama atoa,

poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa,

poli am sarasarakana iem,

me inangarina ateva God, ia etaimim,

me ngam ghe apalala sesa taumattu ngateva.

2:1: Hib 7:25-26; 9:24. **2:2:** Jon 1:29; Kol 1:20; 1 Jon 4:10. **2:5:** Jon 14:21, 23. **2:7:** Jon 13:34; 2 Jon 5-6. **2:8:** Rom 13:12; Jon 1:9. **2:9:** 1 Jon 4:20. **2:10:** Rom 14:13. **2:11:** Jon 12:35.

Am rau mene aielousiaa kosa ateva

¹⁵ Am rau mene aielousiaa kosa ateva oia me voto etokatoka etana. Arova teva eaielousiaa kosa ateva, karika erooroo tani aielousiaa Tamaita. ¹⁶ Ta isaa akapaaili voto tale kosa ateva oia: aaloanna vilikiira taumattu ngatoa, sesa voto mataira etaatara la aloannaaili, me nitau sae nannaaira tale peiira; isaa o voto karika emaemae ta Tamaita, ta emaemae tale kosa ateva oia. ¹⁷ Kosa ateva me aaloannaane aue ekapa, me lo ateva taumattu eaimuli tee aaloannaane God, aue etoka liu.

Tau ngai ssateena atoa Karisto aue la mae

¹⁸ Masi aliki etoa, airuuruu oia nau, me ngam ghe nongola va tau ngai ssateena ateva Karisto aue emae, me tale isaa oia nau oroi tau ngai ssateena atoa Karisto angila ghe mae sio. Liuna avalua o me ita kilakila va airuuruu oia tale nau. ¹⁹ Kasina taumattu oia ghe tokatoka teeita, me isaa oia angila ghele kasu vulitala. Karika va koronna va kapuita ila, ta arova kapuita ila aue la ghele toka teeita. Kasukasuaaira eaapasunga va ila karika va ita aitauaa.

²⁰ Me am, lo ateva manga ia ghe amangaiemla me am akapaaili ngam ghe kilala llo koronna. ²¹ Karika va apitipiti etaimim poli karika am kilakila inangari koronna. Karika, ta am kilakila. Me poli am kilakila va nikamekame karika emaemae tale voto koronna. ²² See tau nikamekame ia? Lo ateva taumattu eue va Iesu karika va Mesaea ia. Ia o ase taumattu ngateva, tau ngai ssateena ia Karisto, me eliuliu vilina ta Tamaita me Natuna. ²³ Lo ateva eliuliu vilina ta Natuna ateva God, Tamana karika ia etana. Me lo ateva eaulia ngaotu Natuna ateva God, Tamana ia etana.

²⁴ Llo inangari am ghe nongola tale aitiutiu, am poso parasi. Arova am poso parasi, Natuna ateva God me Tamane aue lalu toka teeiem tale nau ekapa atoa. ²⁵ Inangari nialokoi ia ghe auliaala, va maulue ateva tokatoka liu ia.

²⁶ Apitipiti atu inangari toko tani aulia ngaotu kieimim tale taumattu ekamekame. ²⁷ Karisto ghe amangaiemla, liuna avalua o me karika am tuutukuna tale alomasaanga, ta poli Spirit Manga ateva, ia etaimim, eaapasunga ngakapaaili voto etaimim me inangarina akapaaili koronna, karika righi kamena. Liuna avalua o me am tokatoka aitauaa tee Karisto, nongina Spirit Manga ateva ghe apasungaala etaimim.

Natuna atoa God

²⁸ Me liuna avalua o, masi natughu etoa, am toka aitauaa teeia, ta nau eteva ekaurekati, aue ita tingina akorokorongana me karika aue ita palata nau eteva emae. ²⁹ Arova am kilakilaia va ia ghulughuluena ia, ngam nim kilala va lo atoa la gheeghelei voto ghulughuluena laghe lutula etana.

3

¹ Karika pisike ia niaielousi eteva God Tamaita ghe gheleiela etaita, ta ghe kolotala va ita natuna ita, me koronna ia. Taumattu tale kosa ateva karika la kilakila God, liuna avalua o me karika la kilakilaita. ² Kapughu etoa, ang ghe natuna itala God me auena vaalua ita toka, karika ghe auliaala etaita. Me ita kilakila va nau eteva ekaurekati, aue ita nongina

2:15: Rom 8:7. **2:16:** Rom 13:14. **2:17:** Mat 7:21. **2:18:** Mat 24:5, 24; 2 Jon 7. **2:19:** Apos 20:30. **2:20:** 1 Ko 2:15; 2 Ko 1:21; 2 Jon 2. **2:22:** 1 Jon 4:3; 2 Jon 7. **2:23:** Jon 5:23; 1 Jon 4:15; 5:1. **2:27:** Jon 16:13. **2:29:** 1 Jon 3:10. **3:1:** Jon 1:12-13; 16:3. **3:2:** 2 Ko 3:18.

ia, poli aue ita taraia va ia vaalue ia. ³ Lo atoa la aatoka tuutuliira etana, la gheeghelei eraarangisanaila nongina ia raarangisana ia.

⁴ Lo atoa la gheeghelei ssavoto, la gheeghelei saasakiaa inangari nipaopao, poli ssavoto egheeghelei saasakiaa inangari nipaopao kanna God. ⁵ Am kilakila va ia ghe kaurekatila tani ghaa velu ssavoto, me ia karika righi ssavoto etana. ⁶ Lo ateva etokatoka etana, karika egheelei ssavoto, me lo ateva egheelei ssavoto, karika ghe taraia me karika ghe kilaila.

⁷ Natughu etoa, am rau mene tau veluem va katoa ppae la ttuua kalipiem. Ta lo ateva egheeghelei voto ghulughuluena, ghulughuluena ia nongina Karisto ghulughuluena ia. ⁸ Lo ateva egheeghelei ssavoto kapuna ia Satana, poli Satana ghe tiua ngakasinala tani ghelei ssavoto emua arau. Liuna avalua o me Natuna ateva God ghe sio mae tani tturu uunguaane Satana. ⁹ Lo ateva taumattu ghe lutula ta God karika erooroo tani ghelei ssavoto, poli inangarina ateva God etokatoka etana. Ia avalua o me karika erooroo tani ghelei ssavoto, poli ang ghe lutula ta God. ¹⁰ Ia avalua o me aue ita tara kila va see ila natuna atoa God me see ila natuna atoa Satana: lo atoa gheegheleiaira karika masina karika va natuna ila God, tee me lo ateva karika eailousiaa tuena o nengane.

Tani aielousiaa kateva kateva

¹¹ Inangari eteva ngam ghe nongoala tale aitiutiu va ita aielousiaa kateva kateva. ¹² Ita rau mene nongina Kein kapuna ia sesa taumattu ngateva me ghe uvi ematela nengane. Mausi saa me ghe uvi emateala? Poli gheegheleiaane sesa me gheegheleiaane nengane ghulughuluena. ¹³ Liuna avalua o me am rau mene soghi, kapughu etoa, arova taumattu ngatoa tale kosa ateva oia la ssa teeiem. ¹⁴ Ita kilakila va angita ghe kasu vulila nimate me ita tale pai maulue ativilau, poli ita, ita aielousiaa tueita me nengaita atoa. Lo atoa la tam aaielousi, ila la tokatoka tale nimate. ¹⁵ Lo atoa la sessa tee tueira o nengaira atoa ila nongina tau niaiuvi emate atoa, me am kilakila va tau niaiuvi emate atoa, maulue ateva tokatoka liu ia, karika ia etaira.

¹⁶ Ia avalua o me ita kilakila va vaalue ia niaielousi eteva: Iesu ghe tau vella maamauluaane etaita, me ita, ita mene tau yelu maamauluaaita tale tueita me nengaita atoa. ¹⁷ Arova see righi peina, me etam kila tuena o nengane ateva karika righi peina va aue esausia, vaalua ailousiaane ateva God aue etoka etana? ¹⁸ Masi natughu etoa, karika ita mene aielousiaa tale paaita, ta tale niuungu me tale voto koronna. ¹⁹ Ia o eaapasunga va ita kilakila va ita elome tale inangari koronna, me urunguitaniita ateva tee etokatoka amasina ta matane God ²⁰ nau urunguitaniita ateva eue va angita sesala, poli God enaanamuu tale urunguitaniita ateva, me ekilakila akapa voto.

²¹ Kapughu etoa, arova urunguitaniita ateva karika eue va angita sesala, ita atoka tuutuliita ta God, ²² me aue ita ghaa voto ita kookolomi etana, poli ita nongonongo usilaa voto eauliaa me ita gheeghelei voto eaamasimasia. ²³ Me inangarina ghe auliaala toko, va tani aikaaiaa tale ararina atae Natuna ateva ta Iesu Karisto, me tani aielousiaa kateva kateva, nongina ghe auliaala etaita. ²⁴ Lo atoa la nongonongo usilaa

3:5: Jon 1:29; 1 Pita 2:22-24; 1 Jon 2:2. **3:8:** Jon 8:44. **3:9:** 1 Jon 5:18. **3:11:** Jon 13:34.

3:12: Aitiutiu 4:8. **3:13:** Jon 5:18-19. **3:14:** Jon 5:24. **3:15:** Aotu 21:8. **3:16:** Jon 13:1; Gal 1:4. **3:17:** Diut 15:7. **3:18:** Jms 2:15-16. **3:21:** Hib 4:16. **3:23:** Jon 6:29; 13:34. **3:24:** 1 Jon 4:13.

llo eaauliaa, la tokatoka etana me ia etaira. Ghe tau mae Spiriti eteva etaita, mausina avalua o me ita kilakila va ia etokatoka etaita.

4

Am tootoonga ase spiriti etoa

¹ Kapughu etoa, am rau mene aikaia ngakapa tale ase spiriti etoa. Poli oroi ila propete kamekame atoa angila ghe kasu ekapa seela tale kosa ateva oia, am tootoonga spiriti ekapa atoa tani tara va laghe kasula ta God o karika. ² Aue utara kila kapuna ateva spiriti God ia avalua toko: va lo ateva spiriti eaaulia ngaotu va Iesu Karisto ghe taumattuula. ³ Me lo ateva spiriti karika eaaulia ngaotu Iesu, karika ghe kasula ta God. Ia o ase spiriti eteva, tau ngai ssateena ia Karisto, am ghe nongoala va aue emae, me ia oia ang ghele rekatala.

⁴ Am, aliki etoa, am kapuna iem God, me ngam ghe apalala propete kamekame atoa, poli lo ateva etokatoka etaimim sarasarakanaili ia me elaulau lo ateva tale kosa ateva. ⁵ Ila tale kosa ateva oia, me la aauliaa voto tale kosa ateva oia, me taumattu ngatoa tale kosa ateva la nongonongo usilainila. ⁶ Ita kapuna ita God, me lo atoa la kilakila God, la nongonongo usilainita. See karika ia ta God karika enonganongo usilainita. Tale isaa o salana, ita roroo tani kila koronna ateva spiriti me kamena ateva spiriti.

Kanna God niaielousi me kaluita

⁷ Masi kapughu etoa, ita aielousiaa kateva kateva, poli niaielousi eteva ghe mae sio ta God. Lo ateva eaaielousiaa ghe lutula ta God, me ekilakila God. ⁸ Lo ateva etam aaielousiaa karika ekilakila God, poli God tau ngaielousi ia. ⁹ God ghe apasungaala aielousiaane ateva etaita avalua toko: va ghe suula kateva nonga ia Natuna ateva ghe mae sio tale kosa ateva, me mausina avalua o me ita maamaulue. ¹⁰ Ia o niaielousi eteva: karika va ita, va ita ghe aielousiaala God, ta God ghe aielousieinitala, me ghe suula Natuna tani ghaa aipolipoli tale kaluita ssavoto. ¹¹ Kapughu etoa, poli God eaielousieinita, ita tee ita tani mene aielousiaa kateva kateva. ¹² Karika teva ghe tara God, me arova ita aielousiaa kateva kateva, God etokatoka etaita, me ia o niaielousi eteva egheelei niuungu ghe uela va ita ghelei.

¹³ Ita kilakila va ita, ita tokatoka etana, me ia etaita, poli ghe tau mae sio kapuna Spirit Manga ateva etaita. ¹⁴ Me angita ghe tarala me angita ghe aulia ngaotula va Tamane ghe suula Natuna tani sio asaangi taumattu tale kosa ateva. ¹⁵ Lo ateva eaaulia ngaotu va Iesu Natuna ia God, God etokatoka etana, me ia ta God. ¹⁶ Me mausina avalua o me ita kilakila me ita aatoka tuutuliita tale aielousiaane ateva God etaita.

God tau ngaielousi ia, me lo ateva etokatoka tale niaielousi, etokatoka ta God, me God etokatoka etana. ¹⁷ Tale isaa o salana, niaielousi eteva egheelei niuungu ghe uela va ita ghelei, me aue ita roroo tani tingina akorokorongana tale nau niaisakei eteva, poli ita nongina Iesu tale kosa ateva oia. ¹⁸ Karika righi nimatautu tale niaielousi eteva, ta ghulughuluena ateva niaielousi eghaagħhaa velu nimatautu eteva, poli

4:1: Mat 7:15; 1 Jon 2:18; 2 Jon 1:7; 1 Tes 5:21. **4:2:** 1 Ko 12:3. **4:3:** 1 Jon 2:18. **4:4:** Mat 12:29; 1 Jon 5:4-5. **4:5:** Jon 8:47; 15:19. **4:9:** Jon 3:16. **4:10:** Rom 5:8-10; 1 Jon 2:2. **4:12:** Jon 1:18. **4:13:** 2 Ko 1:22; 1 Jon 3:24.

matautu eteva aipolina sesa. Lo ateva emaamatautu, ghulughuluena ateva niaielousi karika ia etana.

¹⁹ Ita aielousiaa God poli ia ghe aielousia ngakasinaitala. ²⁰ Arova teva eue va, “Aghi aghaielousiaa God,” me esessa tee nengane o tuena ateva, tau nikamekame ia, ta lo ateva karika eaielousiaa nengane o tuena ateva etaataraila, karika erooroo tani aielousiaa God karika etaataraia. ²¹ God ghe tau mae sio niuungu tani ghelei, va lo ateva eaielousiaa God etani aielousiaa tee nengane o tuena ateva.

5

Niaikaaiaa ta Natuna ateva God

¹ Lo atoa la ghaikaaiaa va Iesu Mesaea ia, natuna ila God, me lo atoa la ghaielousiaa Tamana, la ghaielousiaa tee natuna atoa. ² Arova ita aielousiaa me nongonongo usilaa God, ita kilakila va aue ita aielousiaa natuna atoa. ³ Tani aielousiaa God, mallooeana va ita aimuli tee voto eaauliaa va ita ghelei, me inangarina God karika aue aanasa tani ghelei. ⁴ Ta lo akapa atoa ita ghe lutula ta God, ita ghaapala sesa tale kosa ateva. Ia o lo ateva niapala: ita aikaiaiaa ta God. ⁵ See ia lo ateva eaapala kosa ateva? Lo ateva nonga eaikaaiaa va Iesu Natuna ia God.

⁶ Ia o lo ateva ghe mae sio tale manu ghe ghaala niasuu me tale rae ghe akalala tale aikotoo, Iesu Karisto etana, karika ghe mae sio nonga tale manu, ta ghe mae sio tale manu me rae. Isaa o voto Spirit Manga ateva ghe auliaala, ita kilakila va koronna ia, poli Spirit Manga ateva koronna ia. ⁷ Kotolu voto lotolu aaulia ngaotua: ⁸ Spiriti eteva, manu eteva me rae ateva.* Lotolu ghe asokoi eitauaala. ⁹ Taumattu ngatoa la aakoronna llo voto taumattu ghe tarala me eaauliaa. Tale ia o salana atikirighi taumattu etani akoronna llo voto God eaaulia ngaotu Natuna, ta poli God koronna ia. ¹⁰ Lo ateva eaaiesoaa tale Natuna ateva God, ia ghe aiesoaaala inangarina ateva God ghe aulia ngaotuela, me lo ateva etam aaiesoaa ta God egheelei va God tau nikamekame ia, poli karika eaikaiaiaa llo voto God eaaulia ngaotu Natuna. ¹¹ Me inangari koronna isaa avalua toko, va God ang ghe tau mae sio etaita maulue ateva tokatoka liu ia, me ia o maulue ateva, ie ta Natuna. ¹² Lo ateva eaghui tee Natuna, eghaaghaa maulue ateva. Me lo ateva karika eaghui tee Natuna ateva God, karika aue eghaa maulue ateva.

Airuuruu tale inangari

¹³ Apitipiti voto toko etaimim lo atoa am aaikaiaiaa tale ararina atuae Natuna ateva God tani gheleiem va am rooroo tani kila va maulue ateva tokatoka liu ia, ia etaimim. ¹⁴ Ita atoka tuutuliita ta God va arova ita kolomi righi voto tale aloaloannaane, aue enongota. ¹⁵ Me arova ita kila va enonganongota, saa llo ita kolomi, angita kilala va angita ghaala.

¹⁶ Arova teva etaimim etara teva nengana o tuena va egheelei ssavoto ateva karika aue ekatulainia lao tale nimate, elooloo sae mausina,

4:21: Mak 12:29-31. **5:1:** 1 Jon 4:15. **5:3:** Jon 14:15, 23-24. **5:6:** Jon 1:29-34. **5:8:**

Jon 15:26. * **5:8:** Kasina uru ngai laghe pitila tale inangari nge Latin me mene ghaata tale inangari nge Grik laghe pitila auena ta ninamanama 1300, la ghe pitila 7 Kotolu voto lotolu aulia ngaotua epona liu: Tamana, Inangari eteva me Spirit Manga ateva, me lotolu ghe asokoi eitauaala. 8 Me kotolu voto lotolu aulia ngaotua tale kosa ateva: Spiriti eteva, manu eteva me rae eteva. **5:9:** Jon 5:32-37. **5:10:** Jon 5:36-40; Gal 4:6. **5:12:** Jon 3:36. **5:13:** Jon 20:31. **5:14:** Jon 14:13-14; 1 Jon 3:21-22. **5:16:** Mat 12:31.

me God aue etaup lao maulue etana. Amene aauliaa lo atoa kaluira ssavoto karika ekaakatulainila lao tale nimate. Ta kateva ssavoto ekaakatulainila lao tale nimate. Karika aue va am looloo sae tale ia o ase ssavoto ateva.¹⁷ Isaa akapaaili sesa gheegheleiaaita, ssavoto ia, me kasina ssavoto karika ekaakatulainita lao tale nimate.

¹⁸ Ita kilakila va lo akapa atoa laghe lutula ta God karika la gheeghelei ssavoto. Natuna ateva God, Iesu etana, eaitarainila, me sesa taumattu ngateva karika erooroo tani ghelei saasakieinila. ¹⁹ Ita kilakila va ita kapuna ita God, me taumattu ngakapaaili tale kosa ateva la tokatoka tale sarasarakaniaa sesa taumattu ngateva. ²⁰ Me ita kilakila va Natuna ateva God ghe mae sio me ghe tau mae sio alomasaanga etaita va aue ita kila God koronna ia, me ita etana, me Natuna ta Iesu Karisto. Ia koronna ateva God me etautau maulue ateva tokatoka liu ia.

²¹ Masi natughu etoa, am alekalekaiem tale tootoo goto atoa.

Aiaaghaluene atikirighi uru ngai Jon ghe pitiela Inangari emuemua

Jon ghe pitila ia oia uru ngai etikirighi tale kateva ale manga, me easeasea va “masi kapughu vause ateva, God ghe suiematoongainiola, me natum atoa.” Ghe auliaala va la aielousiaa God, me mallooeana va la aimuli usi etana me la aielousiaa mene katoa. Ghe auliaala kieira tale tau ngai aapasunga ngatoa kamena ila.

Tani kila amuemua

Aitiutiu tale inangari 1-3

Tani usilaa God me aielousiaa mene katoa 4-6

Niaulia ngatootoonga ta tau ngai aapasunga ngatoa kamena ila 7-11
Airuuruu 12-13

¹ Aghi Jon, namu ngateva,

Apitipiti uru ngai etikirighi eatuetu etam, masi kapughu vause ateva, God ghe suiematoongainiola, me natum atoa. Aghaielousieinam tale voto akapa koronna, me karika va aghi nonga ta lo atoa tee la kilakila voto koronna. ² Aghaielousieinam poli voto koronna etokatoka etaita me aue etoka etaita nau ekapa atoa.

³ Alooloo sae va maamasinaane, alousiusiaane, me luei kanna God Tamaita ia me Iesu Karisto Natuna ia God, aue etoka aitauaa teeita poli am ghe aiesoala me am aielousiaa voto koronna ghe auliaala.

⁴ Etautau mae kinatama nimasimasi etaghi tani kila va katoa natum la kasukasu tale salana koronna nongina Tamaita ateva ghe auliaala va ita ghelei. ⁵ Me ia oia, masi kapughu vause ateva, karika apitipiti etam tani auliaa righi ouna voto tani ghelei, ta anim auliaa voto ita ghe ghaala tale aitiutiu, va God ekookolomi va ita aielousiaa kateva kateva. ⁶ Me niaielousi eteva ia avalua toko, va ita kasu tale ninongo usilaa tale voto ghe auliaala va ita ghelei, nongina am ghe nongola tale aitiutiu. Voto ghe auliaala isaa avalua toko va am kasu tale niaielousi.

Tau ngai aapasunga ngatoa kamena ila

⁷ Oroieili tau nikamekame atoa, karika la aulia ngaotu va Iesu Karisto ghe taumattula. Ngila ghe kasu ekapa seela tale kosa ateva, me isaa o ase taumattu, tau nikamekame ila, me tau ngai ssateena ila Karisto.

⁸ Am paniem ta tau nikamekame atoa ta am rau velu voto ita ghe uunguaala, ta aue am ghaa akapaaili aipolipoli. ⁹ Lo ateva elou emuemue me eruu tani kasu tale niapasunga kanna Karisto, God karika ia etana, me lo ateva ekorokorongana tani kasu tale isaa o niapasunga, Iesu me Tamane lalu tokatoka etana. ¹⁰ Arova teva emae etaimim me karika eatuaa isaa oia niapasunga, am rau mene ghaaia va esso tanganueimim me am rau mene aikoloainia. ¹¹ Lo ateva eaikoloainia, ie tee egheelei isaa o uunguaane sesa.

Airuuruu

¹² Oroieili voto aghanna tani piti tau aatu etaimim, me karika aghalona tani piti tale uru ngai me aipitipiti etiulu, poli aghaiesoaa tale ninannaa va aue amae taraiem, me ita aippooaa. Nau ita aitara, aue masimasiaaita enamungaili.

¹³ Natuna atoa nengam vause ateva God ghe suimatoongainiela la suula masimasiaaira etam.

Aiaakotonna atikirighi uru ngai Jon ghe pitiela Inangari emuemua

Jon ghe pitila ia oia uru ngai etikirighi ta kateva taita, ararina ataeae ta Gaeas. Ghe auliaala masimasiaane tani nongo va Gaeas etiitingina akorokorongana tale voto koronna. Ghe auliaala kienaa tale kateva namuu tale ale manga, ararina ataeae ta Diotreps, ghe gheelei erunga tau ngai aapasunga ngatoa koronna ila tani mae apasunga tale ale manga.

Tani kila amuemua

Aitiutiui tale inangari, me inangari nimasimasi 1-8

Niaulia ngatootoonga ta Diotreps 9-10

Niaulia ngamasina ta Demetrius 11-12

Airuuruu 12-14

¹ Aghi Jon, namu ngateva,

Apitipiti etam, masi kapughu eteva Gaeas, aghailousieinio tale voto koronna.

² Masi kapughu eteva, alooloo sae va umasimasi tale masi nitoka me isaa akapa voto aue emasina etam, nongina akilakila va maamauluuaam ta Vau ngepona masina. ³ Nimasimasi eteva namungaili ia ghe ghaaiegħila nau katoa kapuita ita aikaaia ngaitauua laghe mae sio me laghe auliaala vaalua karika ugħe kasu vulila voto koronna. ⁴ Nau eteva anongonongo va natugħu etoa la kasukasu tale salana koronna, masimasiaagħi namungaili.

⁵ Masi kapughu eteva, ugħeelei emasina uunguaam ta tau ngai kasuua inangari etoa arongona ta utam kilakila katoa etaira. ⁶ Ailousiaam laghe auliaala tale ale manga. Urau mene ruu tani sausila tale aloanna aira, poli ia o ase salana atikirighi eaamasimasi God. ⁷ Ta poli ararina ataeae Iesu me laghe kasula, karika laghe annala tani għa righi niaisaus ta lo atoa karika la kilakila God. ⁸ Liuna avalua o me ita tani sausi isaa o ase taumattu tani uungu eitauua teeila tale voto koronna.

⁹ Agħe pitipiti lao sio ta taumattu ngatoa tale ale manga ateva, me Diotreps, eaanna nonga tani muemueinila, karika aue eanna tani nongo usilaa voto aghħaauliaa. ¹⁰ Liuna avalua o me marova amae, aue aghpasunga ngamasina voto egħeelei me voto eauliaa teeiegħi karika masina. Me karika va egħeelei nonga llo, ta etam aikoloaa tee lo atoa la għaaika aiaa me epaopao lo atoa vara la għeħlei isaa o voto, me etiuti vella tale ale manga.

¹¹ Masi kapughu eteva, urau mene aimuli tee taumattu sesa, ta uaimuli tee taumattu masina. Lo ateva egħeelei voto masina kapuna ia God, me lo ateva egħħeelei voto sesa, karika għe kila God. ¹² Ila akpa taumattu ngatoa la għaauliaa masi għeħħeħlaan Demetrius, me għeħħeħlaan eləolao aitauua tee inangarina God koronna. Aghi

tee aghauliaa masi gheeleiaane me am kilakila va kiukiu aghauliaa koronna.

¹³ Oroi voto aghanna tani auliaa etam, me karika aghanna tani piti tale uru ngai, ¹⁴ poli aghaiesoaa tale ninanna va ghaisa ngarighi amae me italu aitara me italu aippooaa.

¹⁵ Alooloo sae va luei aue etoka etam, me kapum atoa oia la suula masimasiaaira ta ngetam, me uauliaa masimasiaaghi ta kateva kateva ta kapuitalua atoa ona.

Uru ngai etikirighi Jiud ghe pitiela Inangari emuemua

Oroi tau ngalomasaanga atoa la nannaa va Jiud nengane ia Jeimis, ia o nengane ia Iesu. Tale inangari nongina llo Pita ghe pitila (2 Pita 2), eaaulia ngatootoonga ta tau ngai aapasunga ngatoa kamena ila, me aipolipoliira. Ealoanna va lo atoa la ritiritu la tingina akorokorongana tale voto koronna laghe ghaala tale nau laghe aiesoala masi kiukiu eteva.

Tani kila amuemua

Aitiutiu tale inangari 1-2

Niaulia ngatootoonga ta tau ngai aapasunga ngatoa kamena ila 3-16

Am poso parasi tale niaikaaiaa me voto koronna 17-23

Niarangise 24-25

¹ Aghi Jiud, kapuna tau ngai uungu ieghi Iesu Karisto, me nengane ieghi Jeimis,

Apitipiti ta am lo atoa God ghe koloamla, me God Tamaita ia eaailousieiniem me eaitarainiem mausi Iesu Karisto.

² Alooloo sae va God aue earangiseiem tale oroieli alousiusiaane, luei, me nialousi eteva.

Niaiskei tale kamena atoa tau ngai aapasunga

³ Masi kapughu etoa, aghe annaailila va aghe pitipiti aatu etaimim tani auliaa uunguaa nisaanga God eghelei etaita, ta aghe ateateaala va apitipiti me aghaulia ngakorokorongana etaimim tani ppooaa koto kotoo tale voto koronna God ghe taula katengaata ta kapuna atoa manga ila. ⁴ Poli katoa ase taumattu ngila ghe kupi einao ssola elome etaimim, emua arau laghe pitila va aue sesa voto elutu etaira. Karika la oneoneaa God. La aikolikoliaa maamasinaane kapuita God ateva elao lao tale aloannaaira sesa ilii, me la ratirati Iesu Karisto, ie nonga kapuita namuu ia me Vauita ia.

⁵ Ngam ghe kilala kiukiu, me aghanna tani mene auliaa etaimim va Vau ngepona ateva ghe ghāa oghila kapuna taumattu ngatoa eIjjip, me emulina ghe tturuula lo atoa karika la aiesoaa etana. ⁶ Ngam ghe kila teela ensolo atoa karika laghe ghelei emasinala uunguaaira nongina laghe tokatoka me laghe kasu vuli tanganueira, God ghe irilala tale sene atoa karika la rooroo tani tapate me la toitoi tale saurrom ateva tani aisakei tale kinatama nau niaiskei eteae. ⁷ Tale isaa nonga o ase salana, eSodom me eGomorra me llo masaliki taatara kalakalaa etairarua laghe ghaala sesa aipolipoli ta laghe tau vella vilikiira tani ghelei nialai salosalooa me laghe laula salana ghulughuluena tale uunguaa nilai. Liuna avalua o me la aimatoonga va am akekkeliem tale kura atea karika erooroo tani pala.

⁸ Tale isaa o nonga ase salana, isaa o taumattu ila elome etaimim, tau niasoasopoi ila, la ghelei ekulukulutana vilikiira tale uunguaa nialai

salosalooa, me la ratirati voto matuutulienaa, me la auliaa saasakiaa tee kapuna ensolo atoa God mallanga ila.⁹ Me kapuira namu ngateva ensolo atoa ta Maekol karika ghe aimuli tee isaa o salana. Nau ghe aissakeana tee Satana, va see kaiaa Moses, karika ghe auliaa saasakiaala tee God tani ghelei niaiskei ta Satana, ta ghe nim uela etana va, "Aue Vau ngepona ateva egheleri niaiskei etam tale voto sesa ugheelei."¹⁰ Me ila o taumattu ngatoa la auliaa saasakiaa tee llo voto aloira karika emaamasaanga, me llo la ghalomasaanga tani ghelei la gheelei nonginaaili ghaata kkena atoa karika righi nannaairaa, me isaa o voto etani tuuturungila.

¹¹ Alousiusi etaira, ta ngila aimuli tee salane Kein, me la ghe ailuilui nonginaaili sesa gheeleiaane Baelam laghe gheelei tani ghaa viliki veu. Aue la turungila nongina laghe turungila Kora poli ghe aamakatakata.

¹² Isaa o taumattu nongina atu eteva etokatoka runga sao atikirighi tale uneimim niaighui me kinatama ninamanama atoa. La namanama teeiem me karikaaili emoimoila. Tau ngai toi sipsipi ila la angiinginila nonga; ila urukookoo ila karika la ghalakuti vao me enim kuukueinila see. Me ila arova ai eteae nauna tani kune me karika ekunekuneaa uene ta matena ia me la mene mukemukeia.¹³ Paapalataaира tale gheeleiaairaa eotuotu arova viiso kotoo ngelo malionge atoa la ghaasuu, me ila nongina katto atoa la nim ilou ekapa see, me saurrom ateva avoonaaili ia God ghe aimonomonosieiniela etaira tokatoka liu ia.

¹⁴ Inok, aiaaghaituna (7) ia ta Adam, ghe aulia ngamuemua alokoila inangari tale isaa oia ase taumattu, ghe uela va, "Tarala, Vau ngepona ateva ange maemae tee airari me airari kapuna ensolo atoa manga ila¹⁵ tani ghelei niaiskei ta taumattu ngakapa atoa me tani apasunga sesa gheeleiaairaa lo akapa atoa taumattu karika la oneoneaa God, me tale isaa akapaaili sesa voto laghe gheleila tale sesa salana, me tale sesa inangariira ila o tau ssavoto atoa laghe auliaa teeielaa."¹⁶ Ila o taumattu ngatoa tau niauliuliaa ila me la sessa tee mene katoa. La aimuli tee sesa aloaloannaairaa me la tautau sae nannaairaa me la ghaaruaa mene katoa tani nim asaesae arariira.

Nikolokolo tani poso parasi

¹⁷ Me masi kapughu etoa, am nnaa sa ateva kapuna apostolo atoa Vauita ateva Iesu Karisto laghe aulia ngamuemua alokoielaa.¹⁸ Laghe uela etaimim va, "Aue airuuruu tale nau, lo atoa la aanamisaa God aue la aimuli tee aloannaairaa karika masina."¹⁹ Isaa o taumattu aue eatoka apolapolaiem, la aimuli tee nannaairaa, me Spiriti eteva karika ia etaira.

²⁰ Me am, masi kapughu etoa, am asarasarakanaiem tale uneimim niaikaiaa mangaaili, me am looloo sae tee Spirit Manga ateva me esausiem.²¹ Me am toka tale aielousiaane ateva God nau am toitoi Vauita ateva Iesu Karisto tani tau aatu maulue ateva tokatoka liu ia, poli ghe apasungaala alousiusiaane etaimim.

²² Am alousiusi tee lo atoa nannaairaa eghaaghalua.²³ Am asaangi lo atoa la ghanna tani saanga nongina va am ghe asaangilala tale kura ateeae. Am apasunga alousiusiaaimim ta mene katoa tee nimoia, am akekkeliem tale kaluira ssavoto, egheeleila la kulukulutana.

1:9: Den 10:13, 21; 12:1; 2 Pita 2:11; Autu 12:7; Sek 3:2. **1:10:** 2 Pita 2:12. **1:11:** Aitiutiu 4:7-8; 1 Jon 3:12; 2 Pita 2:15; Nam 16:1-35. **1:12:** 2 Pita 2:13, 17. **1:14:** Aitiutiu 5:18, 21-24.

1:18: 2 Pita 3:3. **1:20:** Kol 2:7. **1:23:** Sek 3:2; Autu 3:4.

Niarangise

²⁴ God sarasarakana ia me eroo tani sausiem me karika am rooroo tani katuu. Erooroo tani ghaaiem me elaoainam tale voto ateva mallangina ateva etokatoka etana, nau etaraiem, karika aue etara righi sesa gheeleiaaimim. Me aue eroo tani tau aatu kinatama nimasimasi etaimim. ²⁵ Ia nongaaili kapuita Goto ia, tau ngai asaangita ia, ta ngetana mallanga, namuu ia tale voto akapaaili, sarasarakana, me matuutuliena tale uunguaane Iesu Karisto, kapuita Vau palepale ateva, tale isaa akapa nau emua arau, ghaine me nau ngemuli. Koronna.

Niaulia ngaotu eaauliaa Iesu Karisto Inangari emuemua

Oroi ila lo atoa la nannaa va apostolo ateva Jon ghe pitila ia oia vuku eteva, me katoa la ue va mene kateva ppae Jon. Vuku eteva oia, uru ngai etikirighi ghe lao sio ta ghaitu (7) ale manga tale provinsi eteva eEisia, tale anua ateva ghaine ita aseasea va Teki. Jon ghe auliaala unna nitaatara ateeae ta Iesu, vara me ghe pitila uru ngai tale kateva kateva ale manga. Septa 4-22 eaauliaa unna nitaatara Jon, ghe tarala voto epona liu, me voto atoa aue la lutu epona liu me tale kosa ateva oia. Jon ghe pitila tale oroi niaimatootoongana, me karika malumina tani kila mallooeana. Jon eaauliaa airuuruu eteva niaisakei, me tokatokaairia kapuna atoa God tale ouna ateva anua ejerusalem.

Tani kila amuemua

Aitiutiu tale inangari 1:1-8

Ghaitukirighi uru ngai 1:9-3:22

Ghaitu airarrangasi 4:1-8:6

Ghaitu tauue 8:1-11:19

Ghaitu aimatootoongana 11:15-16:1

Ghaituvilau pelete 15:1-16:21

Ghaitu nippooaa 16:17-19:21

Ouna ateva epona liu me kosa 20:1-22:7

Airuuruu tale inangari 22:8-21

¹ Niaulia ngaotu eaauliaa Iesu Karisto, God ghe taula isaa oia inangari etana, tani apasunga ta kapuna tau ngai nonganongo anna atoa sa ateva ghaisa ngarighi elutu. Ghe suula kapuna ensolo ateva tani sio apasunga ta Jon, kapuna tau ngai nonganongo anna ia. ² Aghi Jon aghe tara akapaailila voto akapaaili me aghaasaoki va inangari oia inangarina God, me inangari inangarina Iesu Karisto, me aghi aue va, inangari oia koronna. ³ Niarangise ta lo ateva eritiriti inangari tale isaa oia inangari propesi. Me niarangise ta lo atoa la nonganongo me la usilaa saa llo aghe pitila, poli nau ange aakalakalaa.

Jon ghe piti lao sio inangari ta ghaitu ale manga

⁴ Uru ngai Jon ghe piti lao sio ta ghaitu (7) ale manga tale provinsi eteva eEisia.

Alooloo sae va maamasinaane me luei aue etoka etaimim, eka-sukasu ta God etokatoka ghaine, me ghe tokala arau me auena emae, me ta ghaitu spiriti la tokatoka emua tale unna aitokatoka ateva God, kingi ia,⁵ me ta Iesu Karisto, ia eaaulia ngakoronna inangarina akapa God, me aitiutiu ia tani totu ta lo atoa matena ila, me eaaitoiaa kingi ekapa atoa tale kosa ateva.

Ta ngetana ghe aielousieinitala, me ghe asaangitala tale kaluita ssavoto tale raena ateva,⁶ ghe suoingainitala va ita kingi me pristi tani uungu ta kapuna God ateva, Tamane ia. Ita tauue sae me aue eaitoiaa voto akapa nau ekapa atoa. Koronna.

7 Tarala, aue emae tale urukookoo,
 me taumattu ngakapa atoa aue la taraia,
 me lo atoa laghe soaiela
 me taumattu ngakapaaili etoa tale kosa ateva aue la alousiusi
 mausina.
 Ue, koronna.

8 Vau ngepona ateva God ghe uela va, “Aghi alpa me omega* ieghi,†
 atokatoka ghaine me aghe tokala arau me auena amae. Aghi God ateva
 sarasarakanaili ieghi.”

Nitaatara ateae tale Natuna ateva Taumattu ngateva

9 Aghi Jon, kapuimim tau ngaisesoaa ieghi, me kapuimmi ieghi tale
 nimmarikana, me ararimangali me nitingina akorokorongana, isaa o
 llo ita ghaagħha mausi Iesu. Laghe atokaiegħila tale patunganua ateva
 ePatmos mausi inangarina ateva God me tee inangarina ateva Iesu.
 10 Tale nauna ateva Vau ngepona ateva kapuna Spiriti eteva God ghe
 tokala etagħi, me emuli etagħi agħe nongola lingi ngalo ateva arova
 taue ateva. 11 Għe uela etagħi va, “Upiti tale vuku eteva saa llo angu
 tarala me utau lao tale ale manga ghaitu, elPisces, Smena, Pegamom,
 Taeataera, Sadis, Piladelpia, me Laodesia.”

12 Vara me agħe kirieghila tani taatara lao tale lingi ngalo ateva
 għe samasama teeieghи, me nau eteva agħe kirieghila, agħe tarala
 ghaituae aitingina lam lagħe għe-leila tale gol. 13 Elome tale ghaituae
 (7) aitingina lam, kateva taumattu arova natuna ia taumattu ngateva,‡
 kaliona atiulu għe aakou llusi sio kkena, me tuku kalio ateva (aro
 ses ateva) għe vaovaoa ta sauna ateva, lagħe għe-leiela tale gol. 14 Uu
 nguruna usousoanaaili nongina uu sipsipi, me usousoanee tee nongina
 urukookoo ateva usousoana ia, me matana alua nongina ramerame
 kura atee. 15 Kkena aluelange ravaravaienaili nongina brasi lagħe
 tungila tale kura atee, me lingi ngalona ateva nonginaaili kotoo ateva
 eaasuu. 16 Nimana muenna atelange għe posoposo katto ghaitu, me
 baenata ateva pai ekapa aluevilau matarroke ilalua għe għoħa ta paana.
 Me matane għe lallaa nonginaaili mallangi sinaka ateva.

17 Nau agħe taraiela, agħe katuula ta liue kkena arova matena aghi.
 Għe saoala nimana muenna atelange etagħi, me għe uela va, “Urau
 mene matautu. Aghi aitħiut u iegħi me airuuruu iegħi. 18 Aghi oia
 maulue iegħi, agħe matela, me tarala, maulue iegħi tale nau ekapaaili
 etoa, me aghi auunusi kii etoa tale nimate me Hades.

19 “Liuna avalua o me upiti elokoi sio saa voto angu tarala, voto ghaine
 me voto auena elutu. 20 Katto ghaitu utarala tale nimagħi muenna
 atelange me ghaituae aitiitinginane lam, malloeane isaa avalua toko.
 Katto ghaitu, eaaimatoonga ensolo atoa§ tale ghaitu ale manga, me
 ghaituae aitingina lam eaaimatoonga ghaitu ale manga.

* 1:7: Den 7:13; Sek 12:10; Mat 24:30; Jon 19:34-37; 1 Tes 4:17. 1:8: Aotu 21:6; 22:13. 1:8:
 alpa me omega Alpa aitiuttiu eteva tale mata nginangari nge Griķ, me omega airuuruu eteva.

† 1:8: Kasina uru ngai lagħe pitila, lagħe mene uela va, me aghi aitiuttiu iegħi me airuuruu
 iegħi. 1:13: Den 7:13; 10:5. ‡ 1:13: kateva taumattu arova natuna ia taumattu ngateva
 Utara Deniol 7:13. 1:14: Esik 43:2; Den 7:9; 10:6; Aotu 2:18; 19:12. 1:16: Hib 4:12; Aotu
 2:12; 19:15. 1:17: Ais 44:6; 48:12; Aotu 2:8; 22:13. § 1:20: ensolo atoa o tau ngai kasuua
 inangari etoa.

2*Inangari tale ale manga ateva eIpises*

¹ “Upiti isaa toko inangari elao ta ensolo ateva* tale ale manga ateva eIpises.

“Inangarina toko lo ateva eposoposo ghaitu katto tale nimane muenna atelange me ekasukasu elome tale ghaituae aitingina lam laghe gheleila tale gol. ² Akilakila gheeleiaam me uunguaam aanasa, me karika ughe sio asoasoaa nau ughe ghaala nimmarikana. Akilakila va karika ughe anna sesa taumattu ngatoo. Ughe tootoongainilala lo atoa la ue va apostolo ila o me karika, me ughe kilala va la nim kamekame. ³ Karika ughe laa sio asoasoaa nau ughe soula maate mausi ararighi eteae me karika ughe mangoola.

⁴ “Me isaa oia karika nga maamasieinio poli ughe kasu vulila aitiutiu eteva niaielousi. ⁵ Umene nnaa eaa ughe tokatoka me angu ghe katuu vulula ia o voto ateva. Unna ngaioghioghiaa me ughelei llo ughe gheelei ekasina. Arova utam nna ngaioghioghiaa aue amae etam me aghaa velu unem aitingina lam atea nongina etiitingina. ⁶ Me kateva masi voto ugheeleia ghulughuluena ia: Utam anna voto lo atoa la usilaa Nikolaos la gheelei, aghi tee atam anna.

⁷ “Lo ateva talingane manee tani nongo, aue enongo llo Spiriti eteva eaaulieinia tale ale manga atoa. Lo ateva eapala aue atau velua me enama uene ai maulue atea etiitingina tale umana paa ngutana atingiu God.’

Inangari tale ale manga ateva eSmena

⁸ “Upiti isaa toko inangari elao ta ensolo ateva tale ale manga ateva eSmena.

“Inangarina toko lo ateva aitiutiu ia me airuuruu ia, ghe matela, me ghe mene sakesakela. ⁹ Akilakila mmariikana uaateateaa me karika tue peipeina io me karika, ta tau peipeiena io. Akilakila va lo atoa la ue va ajiu ila o me karika, ta alena nivelu eitauaa ila Satana, la aauliaa teeio. ¹⁰ Urau mene matauta voto ange anna tani gheleio ummarikana. Aghauliaa kiem va Raroai eteva ange anna tani atoka sso katoa etaimim tale ale mata voovoo tani tootoongainam, me aue ummarikana nau la ghelei voto karika masina aue eroo kasangaulu (10) nau. Uaikaia ngakorokorongana arongona ta arova umate, me aue atau aatu kou nguru maulue ateva.

¹¹ “Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa. Lo ateva eapala karika aue eghaa sesa tale aiaaghluene atea nimate.’

Inangari tale ale manga ateva ePegamom

¹² “Upiti isaa toko inangari elao ta ensolo ateva tale ale manga ateva ePegamom.

“Inangarina toko lo ateva euunusi baenata ateva matarroke pai ekapa aluevilau. ¹³ Akilakila eaa utokatoka, utokatoka tale voto ateva Satana eaitarainia. Me karika, ta uaakoronna tale ararighi eteae, karika ughe oghi vulu aikaiciaam etaghi nau tee ta nau Antipas, ghe

2:1: Aotu 1:16. * **2:1:** ensolo ateva o tau ngai kasuua inangari eteva. **2:2:** 1 Jon 4:1.

2:5: Aotu 3:3. **2:7:** Aitiutiu 2:9; Aotu 22:2, 19. **2:9:** 2 Ko 11:14-15; Aotu 3:9. **2:10:** 2

Tim 4:8; Jms 1:12. **2:11:** Aotu 20:14; 21:8.

aaulia ngakoronna inangarina akapa God, me laghe uvi emateala tale masalikim atae, masaliki taatara ia Satana etokatoka etana.

¹⁴ “Me kasina voto karika amaamasiaa etam. Kasina taumattu elome etam, la posoposo parasi llo voto Baelam ghe apasungaala. Ghe apasungaala ta Balak vaalua tani kame aIsraeli etoa me la ghelei ssavoto nau laghe namala inana laghe gheleila aiaavusuvusuena sae ta tootoo goto atoa etana, me laghe kupi tee ssola tale uunguua niailai salosaloaa. ¹⁵ Tale ia nonga o ase salana atikirighi katoa elome etam la aaimuli tee lo atoa laghe aaimuli tee inangarina Nikolaos. ¹⁶ Liuna avalua o me unna ngaioghioghiaa poli arou mae parasi etam me aghaiuvii tee isaa o taumattu tale baenata ateva matarroke akapa pai eluevilau tale paaghi eteva.

¹⁷ “Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa. Lo ateva eapala aue ataula kasina tani mena aisuliaane. Aue ataula tee atu eteva usousoana ia ouna atae arari pitipiti ia etana, karika teva aue ekila ia o arari eteae ta llo nonga ateva aue ghaaia.”

Inangari tale ale manga ateva eTaeataera

¹⁸ “Upiti isaa toko inangari elao tale ensolo ateva tale ale manga ateva eTaeataera.

“Inangarina toko Natuna ateva God, matane arova kura atae eramerame, me kkena arova brasi ravaravaienaaili. ¹⁹ Akilakila gheeleiaam, aailousiaam, aikaaiaam, me niuungu ugheelei me karika usio asoasoaa nau ughe ghaaghiaa nimmarihana. Me tale isaa oia nau ugheelei oroieili voto elaulau voto ughe gheelei ekasina.

²⁰ “Me kasina llo karika amaamasiaa etam. Isaa avalua toko va, utautau velu ia o vause ateva Jesebel etana, eue va propete ia, tale voto eaapasunga, ekamekame kapughu tau ngai uungu etoa, la kupikupi sso tale uunguua niailai salosaloaa me tani nama inana la gheelei sae aiaavusuvusuena etana tale tootoo goto atoa. ²¹ Aghe taula nauna tani nna ngaioghioghiaa tale uunguaane niailai salosaloaa see me karika eaaloanna. ²² Liuna avalua o me aue aghalokoie sio tale komo nighaa mmarikana, me aue aghelei lo atoa la laolao etana aue la mmarikana saasakiaa, arova la tam nna ngaioghioghiaa tale uunguaane atoa. ²³ Aue auvi emate lo atoa la ghaaimuli teeia tale nimate atae. Me ila akapa ale manga atoa aue la kila va aghi lo ateva etaatara aikoliaa urunguita me nannaa, me aue aliu aipoliimim kateva kateva tale voto am gheelei. ²⁴ Me ta lo atoa ona eTaeataera am ghe tam aimuli teela llo ghe aapasunga, me karika am ghe annala tani kila voto la asease va “kanna voto Satana aisuliaane,” karika aue asaoaa sae mene righi maate etaimim. ²⁵ Isaa o voto etaimim, am poso parasi lomosi ta amae.

²⁶ “Ta lo ateva eapala me egheelei aaloannaaghi lomosi ta elaa ghaa airuuruu, aue ataula matuutulienaa tani aitaraa mene katoa patunganua.

²⁷ ““Me ia aue eaitoieinila tale aikkatulu etiulu aeana ia
me aue eparu reerekatainila nongina sospena ateva gheelei ia tale
kosa maramarakana,”

2:14: Nam 22:1-25:3; 31:16; 2 Pita 2:15. **2:17:** Eks 16:4, 14-15, 33-34; Jon 6:48-50; Ais 62:2.
2:18: Aotu 1:14-15. **2:20:** 1 Ki 16:31; 2 Ki 9:22. **2:23:** Sams 7:9; Jer 17:10; Aotu 20:12-13.
2:25: Aotu 3:11. **2:26:** Sams 2:8-9.

nongina aghi aghe ghaala matuutulienia ta Tamaghi. ²⁸ Me aue atau teela katto pai eteva. ²⁹ Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.'

3

Inangari tale ale manga ateva eSadis

¹ "Upiti isaa toko inangari elao ta ensolo ateva* tale ale manga ateva eSadis.

"Inangarina toko lo ateva eposoposo ghaitu (7) spiriti kannia God me ghaitu katto. Akilakila uunguaam, uunguaam egheelei taumattu la ghaannaa va maulue io, me karika, ta matena io. ² Anguu taatarala! Me uakorokorongana tuku airuuruu erighi niuungu, erau mate akapa. Karika aghe tarala righi voto ughe ghelei erooroaala ta matana kapughu Goto ateva. ³ Annaa lao sio sa ateva ughe ghaaiela me ughe nongoala. Uaimulusi tee, me unna ngaioghioghiaa, me arova utam anguu taatara atoka, aue amae nongina teva tau niainao me karika aue ukila saa nau eteva aue arekata mae etam.

⁴ "Ghaisa pai nonga kapum taumattu eSadis, karika laghe ghelei ekulukulutanala uneira aiaasae. Aue la kasu eitauaa teeieghi, me aue la asae aiaasae ateva usousoana ia, poli masinaaili gheegheleiaaira.

⁵ Lo ateva eapala aue easae aiaasae ateva usousoana ia nongina ila, me karika aue asei velu ararina tale vuku maulue ateva, me aue aghauliaa ta Tamaghi me kapuna ensolo atoa va kapughu ila. ⁶ Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.'

Inangari tale ale manga ateva ePiladelpia

⁷ "Upiti isaa toko inangari elao ta ensolo ateva tale ale manga ateva ePiladelpia.

"Inangarina toko lo ateva manga ia me koronna ia, eposoposo kii eteva ta Deivit, sa ateva eotia, karika teva erooro tani kavatia, me sa ateva ekavatia, karika teva erooro tani otia. ⁸ Akilakila uunguaam. Tarala, ngaotila atamana ateaet tama, karika teva aue ekavatia. Akilakila va sarasarakaniaam ghaunaaili, me ughe aitaraa inangarighi me karika ughe ue va karika ukilakila ararighi eteae.

⁹ Aue aghelei lo atoa tale alena ale nivelu eitaua ngateva Satana, la ue va ila ajiu ila, me karika va ajiu ila, ta tau nikamekame ila, aue agheleila la mae me la tturru sio tale liue kkem, me aue la aulia ngaotu va aghaailousieinio. ¹⁰ Poli ughe tani aimuli usi tee inangari aghe aauliaa tani tingina akorokorongana nau ughaaghia nimmarikana, aue aghaitarainio tale nau nitootoonga emae tale kosa akapa ateva oia tani tootoonga lo atoa la tokatoka etana.

¹¹ "Ghaisa ngarighi amae. Isaa o voto etam, uposo parasi, me karika teva aue eghaa unem kou nguru eteva. ¹² Lo ateva eapala aue aghatinginaia nongina ttulu tale alena ale manga ateva kapughu Goto ateva, me karika aue ekasu vulia. Aue apiti epona etana ararina ateaet kapughu Goto ateva, me arari masalikina ateaet kapughu Goto ateva,

2:28: Aotu 22:16. **3:1:** Aotu 1:4, 16. * **3:1:** ensolo ateva o tau ngai kasuua inangari eteva. **3:3:** Mat 24:43-44; Aotu 2:5; 16:15; 1 Tes 5:2. **3:4:** Jiud 23. **3:5:** Eks 32:32-33; Mat 10:32; Luk 12:8. **3:7:** Ais 22:22. **3:8:** 1 Ko 16:9. **3:9:** Aotu 2:9. **3:10:** Luk 21:19; 2 Tim 2:12. **3:12:** Ais 62:2; 65:15; Aotu 14:1; 21:2.

ouna ateva eJerusalem, ekasu epona liu tale kapughu Goto ateva, me aue apiti tee ararighi eteae ouna ia etana.¹³ Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.'

Inangari tale ale manga ateva eLaodesia

¹⁴ "Upiti isaa toko inangari elao ta ensolo ateva tale ale manga ateva eLaodesia.

"Inangari toko inangarina lo ateva koronna ia, eaaulia ngakoronna inangarina akapa God, eaaitoiaa voto akapaaili God ghe gheleila.¹⁵ Akilakila uunguaam, karika va makarringe io o aanasa io, aghanna va ughele kateva etairarua.¹⁶ Poli mala aanasa io, karika makarringe io me karika aanasa io, ghaisa ngarighi aue akanusu veluo ghoa ta paaghi.¹⁷ Uue va, "Aghi tau peipeina aghi me ngaghele ghaa tokala peighi etoa, karika amene aloanna righi voto," me karika ukilakila va karika umasimasi, la aalousiusi mausim, karika righi peim, mata salusalu io me karika kaliom.¹⁸ Aghaauliaa tootoonga etam va upoli mae etaghi golo ateva laghe tungi eraarangisanaelia tale kura atae, me aue utau peipeina, me upoli ususoana ateva aiaasae tani asae runga tale vilikim, tani akou runga palata ateva etam, me upoli marasina mata ateva tani atokaia tale matam me aue utaatara amasina.

¹⁹ "Lo atoa aghailousieinila aparuparula tale sesa gheegheleiaaira va la masina. Am anna ngamasina me am nna ngaioghioghiaa.²⁰ Aghi toko atiitingina tale atamana atae me amirimiri me akolokolo, arova lo ateva enongo lingi aloghu eteva me eoti atamana atae, aue akupi sso tani namanama teeia, me aue enamanama teeieghi.

²¹ "Ta lo ateva eapala aue aghauliaa etana tani toka sio teeieghi tale uneghi aitokatoka ateva unna ia king, nongina aghi aghe apalala me aghe toka teela Tamaghi tale unna aitokatoka ateva unna ia king.²² Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa."

4

Aitokatokane ateva kingi epona liu

¹ Vara me aghe mene taatarala, me emua etaghi aghe tarala atamana atae ghe otioti etingina ia epona liu, me aghe nongola lingi ngalo ateva ngaghe nongoala amua arova taue ateva ghe uela va, "Sae mae toko, me aghapasunga etam sa ateva aue elutu auena."² Arovaeangaili ta Spiriti eteva ghe tokala etaghi me emua etaghi aghe tarala aitokatokane ateva kingi epona liu me kateva ghe tokatoka etana.³ Me lo ateva ghe tokatoka, taataraane arova masi atu eteva la aseasea va jaspa ia me mene kateva masi ngatu raeraeana ia la aseasea va kanalien. Me renbo ateva eaaimatoonga kala ngateva soanna ia la aseasea va emerol, ghe taataliaa aitokatokane ateva kingi.⁴ Mene ghaluengaulu ghaata (24) aitokatokane kingi uneira ghaluengaulu ghaata (24) namuu laghe taatalia ngatoka aitokatokane ateva kingi. Laghe molumolu tale ghinna

3:15: Rom 12:11. **3:17:** 1 Ko 4:8; Luk 12:21. **3:18:** Ais 55:1. **3:19:** 1 Ko 11:32; Hib 12:6; Aotu 2:5. **3:20:** Jon 14:23. **4:1:** Aotu 1:1, 10. **4:2:** Ais 6:1. **4:3:** Esik 1:28. **4:4:** Aotu 3:18.

usousoana me kou nguru laghe aatoka ta uruira, laghe gheleila tale gol.⁵ Ravaravaia ateva ghe kasukasu tale aitokatokane ateva kingi, me palapalanga ateva ghe aakurrua. Emua tale aitokatokane ateva kingi ghaituae (7) lam ghe ramerame, isaa o ghaiitu (7) spirit kanna God.⁶ Me tee emua tale aitokatokane ateva kingi kateva voto taataraane arova manu eteva laghe gheleila tale ghalasi me masalaangeaili ia arova voto ateva la aseasea va kristol.

Ghaata (4) voto maulue laghe tokatoka elome, taliaa aitokatokane ateva kingi, mataira isaa emua me emuli.⁷ Aitiutiu eteva llo maulue ia arova laeoni eteva, aiaaghalua ateva arova taita ateva vulumakao, me aiaakotolu eteva matane arova taumattu ngateva, me aiaaghaatane ateva arova savaakoroara ateva eloolo.⁸ Kateva kateva ta ilaata o voto maulue ghaonomo (6) kaekaena, me ghe pasupasu tale mata atoa laghe taatalieinia, me laghe tokatoka pakeaa tee tale kaekaeira. Karika laghe ainoana ellaa me eleivoo tani ue va,

“Manga, manga, manga

Vau eteva God, sarasarakananaili ia,

ghe tokala me ie etokatoka me aue etoka tale nau too emaemae.”

⁹ Me nau voto ghaata maulue la tautaula nitau sae inasanina me nikaili emasina ta lo ateva etokatoka tale aitokatokane ateva kingi, me etokatoka nau ekapa atoa,¹⁰ ghaluengaulu ghaata (24) namuu la tuuturru sio tapaa kosa emua ta lo ateva etokatoka tale aitokatokane ateva kingi me la kakkauaa lo ateva aue etoka nau ekapa atoa. Me la atoka sio uneira kou nguru emua tale aitokatokane ateva kingi. Me la ue va,

¹¹ “Vau ngepona ateva me kapuimami Goto ateva,

io urooroo va ughaa nitau sae me nioneoneaa me sarasarakan
poli ughe gheleila voto akapaili,

me tale aloaloannaam laghe lutula

nau ughe gheleilala.”

5

Uru ngai eteva talitali ia me natu sipsipi erighi

¹ Vara me aghe tarala nimane muenna atelange lo ateva ghe tokatoka tale aitokatokane ateva king, ghe posoposo uru ngai eteva pitipiti ekapa pai eluevilau laghe rrangasi runganiela tale ghaiitu airarrangasi.

² Me aghe tarala ensolo ateva sarasarakananaili ia ghe aippooa nganamungailiila me ghe uela va, “See teva taumattu masinaaili urooroo tani ghelei evolovoloki llo laghe ghelei erungaala me uoti uru ngai eteva talitali ia?”³ Karika poi teva taumattu epona liu, me epona tale kosa ateva oia, me elo pakena etana, erooroo tani oti uru ngai eteva talitali ia me etaatara sso etana.⁴ Aghe tiuaala tani ngala anamungaili poli karika poi laghe tarala teva taumattu masina erooroo tani oti uru ngai eteva talitali ia me tani taatara sso etana.⁵ Vara me kateva tana namuu ghe uela etaghi va, “Urau mene ngala! Tarala, laeoni eteva eaaimatoonga ararimangalina ateva Jiuda, tuvuna ia Deivit, ange apalala, erooroo tani oti uru ngai eteva talitali ia laghe rrangasi runganiela tale ghaiitu airarrangasi.”

4:5: Esik 1:13; Sek 4:2; Aotu 1:4; 8:5; 11:19; 16:18. **4:6:** Esik 1:5-10, 22; 10:14. **4:8:** Ais 6:2, 3; Esik 1:18; 10:12. **4:10:** Aotu 7:10; 19:4. **5:1:** Ais 29:11; Esik 2:9-10. **5:5:** Aitiutiu 49:9; Ais 11:1, 10; Aotu 22:16.

⁶ Me aghe tarala sipsipi erighi, taataraane va arova laghe uvi emateala, ghe tiitingina nongina aitokatokane ateva king, ghaata voto maulue me namu ngatoa laghe tokatoka talieinia. Ghaituae unna kom me ghaitu matana, ila o ghaitu Spiriti kapuna ila God ghe sungilala tani lao akapa see tale kosa ateva oia. ⁷ Ghe mae sio me ghe ghaala uru ngai eteva talitali ia tale nimane muenna atelange lo ateva ghe tokatoka tale aitokatokane ateva king. ⁸ Me nau eteva ghe ghaaiela, voto maulue ghaata me ghaluengaulu ghaata (24) namuu laghe tturru siola euu tale natu sipsipi erighi, kateva kateva etaira laghe uunusi aikaukau me laghe uunusi tee pelete atoa gheeghelei tale golo me pasu tale voto tani ghelei asu eteva masi ngusungusuaane, isaa o voto kaluira pure kapuna taumattu ngatoa God. ⁹ Me laghe ueila kkinari eteae ounaaili ia, eue va

“Io nonga masina io tani ghaa uru ngai eteva talitali ia
me ughelei evolovoloki airarrangasi
poli laghe uvi emateola me tale raem ateva ughe polila kapuna
taumattu ngatoa God
tale ararimangali me tale ase nisama
me tale taumattu me tale patunganua akapa atoa.

¹⁰ Ughe gheleilala va la kingi me pristi tani uungu tale kapumami Goto
ateva,
me aue la aitaraa kosa ateva.”

¹¹ Aghe taatarala me aghe nongola lingi aloira ensolo atoa erooroo
airari etoa, kasangaulu airari me mene oroieili kasangaulu airari etoa,
laghe taatalia ngatoka voto maulue me namu ngatoa. ¹² Me laghe
kikkinari enamungaili me laghe ue va,

“Natu sipsipi erighi laghe uvi emateala,
ia nonga erooroo tani tue peipeina me tani ghaa sarasarakana,
nialomasaanga me nikorokorongana,
me nioneoneaa me nikaili emasina me niarangise.”

¹³ Vara me aghe nongola isaa akapaaili voto maulue epona liu me
epona tale kosa ateva me elo pakena tale kosa ateva me elome tale
paamanu eteva me isaa akapaaili voto atoa o laghe kikkinari sae etana,
“Lo ateva etokatoka tale aitokatokane ateva king me natu sipsipi erighi,
aue lalu ghaa niarangise, nioneoneaa me sarasarakana,
nau etoa me nau ekapa atoa.”

¹⁴ Ghaata voto maulue laghe ue va, “Koronna.” Me namu ngatoa laghe
tturru siola euu me laghe kkaueinilaluela.

6

Ghaitu airarrangasi laghe rrangasi rungaala uru ngai eteva talitali ia

¹ Aghe tarala nau eteva natu sipsipi erighi ghe ghelei evolovolokila
mua ateva tana ghaitu airarrangasi laghe rrangasi rungaala uru ngai
eteva talitali ia, vara me aghe nongola kateva tana ghaata voto maulue
ghe samala nongina palapalanga ateva, ghe uela va, “Mae sio.” ² Aghe
taatara me aghe tarala ooso ateva usousoana ia. Lo ateva ghe iilou etana
ghe posoposo bunara ateva, me kateva ghe tau lao sio kou nguru eteva

5:6: Sek 4:10; Jon 1:36; Aotu 13:8. **5:8:** Aotu 8:3-4; Sams 141:2. **5:9:** Sams 96:1; 98:1.
5:10: Eks 19:6; Ais 61:6; Aotu 1:6; 20:6. **5:11:** Den 7:10; Hib 12:22. **6:1:** Aotu 4:6; 5:1.
6:2: Sek 1:8; 6:1-6.

etana, me ghe iilou nongina lo ateva ange apalala niaiuvi me eaaloanna tani mene apala.

³ Nau eteva natu sipsipi erighi ghe ghelei evolovolokila aiaaghaluene ateva airarrangasi laghe rrangasi rungaala uru ngai eteva talitali ia, me aghe nongola ghaluene ateva voto maulue ghe uela va, "Mae sio." ⁴ Vara me mene kateva ooso ghe mae sio, raeraeana ia nongina ramerame kura atuae. Lo ateva ghe iilou etana, kateva ghe tau lao sio sarasarakana tani ghaa velu luei tale kosa ateva, me tani ghelei taumattu ngatoa la toka aiuvieinila, me tee ghe tau lao sio baenata ateva namungaili ia.

⁵ Nau eteva natu sipsipi erighi ghe ghelei evolovolokila kotonna ateva tana airarrangasi laghe rrangasi rungaala uru ngai eteva talitali ia, aghe nongola aiaakotonna ateva voto maulue ghe uela va, "Mae sio." Aghe taatara, me aghe tarala voovongiena ateva ooso. Lo ateva ghe iilou etana ghe posoposo sikeli eteva tani ghaa maamaataniaa voto. ⁶ Vara me aghe nongola lo ateva ghe angarila nonginaaili lingi ngalo ateva elome tale ghaata voto maulue, ghe ue va, "Kateva beke uiti eroor kateva silva koen," me kotolu beke bali erooroo tee kateva silva koen, me karika umene ghelei saasakiaa oeli me uaeni."

⁷ Nau eteva natu sipsipi erighi ghe ghelei evolovolokila aiaaghaatane ateva airarrangasi laghe rrangasi rungaala uru ngai eteva talitali ia, aghe nongola lingi ngalona ateva aiaaghaatane ateva voto maulue ghe uela va, "Mae sio." ⁸ Aghe taatara me aghe tarala ooso ateva taataraane nim mala usousoana ia. Lo ateva ghe iilou etana la kolokoloa va Nimate, me Hades ghe aimuli ekalakala ngatoka etana. Me kateva ghe tau lao sio etairarua matuutulieni tale tuku kateva tale pai ghaata tale kosa ateva, tani aiuvi emate tale baenata, maloo me isiki, me llo ghaata kkena karika la aitaraa tale kosa ateva.

⁹ Nau eteva ghe ghelei evolovolokila ghalimane ateva airarrangasi laghe rrangasi rungaala uru ngai eteva talitali ia, aghe tarala elo pakena tale liu nighelei aiaavusuvusuena ateva, taumattu laghe uvi ematela poli inangarina ateva God me tale kiukiu laghe aaulia ngaotu. ¹⁰ Laghe sama anamungaili, laghe uela va, "Vau palepale eteva, manga io me koronna io, lovisaa eghaa nau umae ghelei niaiskei tale taumattu tale kosa ateva me uliu lao ta lo atoa laghe gheleila raemami ghe akalala?" ¹¹ Me kateva kateva etaira ghe ghaala aiaasae ateva usousoana ia. Me God ghe uela etaira va la toka toitoi mene righi mua nau, lomosina ta la uvi emate kasina aruu tana tau ngai uungu me tau ngaisesoa ngatoa nongina ila tani rooaa isaa o voto.

¹² Nau eteva ghe ghelei evolovolokila aiaaghaonomina ateva airarrangasi laghe rrangasi rungaala uru ngai eteva talitali ia, me kinatama rukeruke ateva, me sinaka ateva ghe voovongienala nongina teva aiaasae la ghaasae tale nau nialousiusi, laghe gheleila tale uu meemee, me ulana akapa ateva ghe raeraeanala nongina rae, ¹³ me katto atoa laghe katuula elomarase me laghe sio mae tale kosa ateva, nonginaaili uene fig atae ghe tam matue me ekaokao nau eteva kinatama kuukuu eteva. ¹⁴ Elomarase ghe aikapakapaila nongina uru ngai talitali eteva la talitalia. Patunganua akapa atoa me motouru ekapa atoa laghe kasu vulila nongina laghe tokatoka.

* **6:6:** silva koen silva koen (denarius) aipolina kateva nau. **6:8:** Esik 14:21; 5:17; Jer 15:1-3.

6:11: Aotu 7:9, 13; 19:14. **6:12:** Mat 24:29; Apos 2:20; Aotu 8:12; 11:13; 16:18. **6:13:** Ais 34:4. **6:14:** Aotu 16:20.

15 Me ila akapa kingi tale kosa ateva, namu ngatoa, tau ngai toitoi tale tau ngai uvii etoa, tau peipeina atoa, sarasarakana atoa, lo atoa la uungu karika la tokatoka tale aloannaaira, me lo atoa la nim tokatoka tale aloannaaira, ila akapa laghe aaisulia tale lienga me tale kinatama atu etoa tale motouru, ¹⁶ me laghe kolokolo lao tale motouru etoa me tale atu etoa va, “Am katuu saoaa etaimami me am aisulieinamami tale lo ateva etokatoka tale aitokatokane ateva kingi me tale sessaiaane natu sipsipi erighi, ¹⁷ ta poli kinatama nau eteva sessaiaairarua ange mae sio, me see ae eroo tani tingina akorokorongana?”

7

144,000 gheeghelei runga

¹ Vara me aghe tarala ensolo ghaata laata ghe tiitingina tale aighoughou ghaata tale kosa ateva. Laata ghe posoposo parasi etoka kuukuu ghaata tale kosa ateva tani ghelei erunga ase kuukuu etoa va la rau mene kuu saasakiaa elae me tale paamanu me epona tale ai etoa. ² Vara me aghe tarala mene kateva ensolo ghe kasula tale pai sinaka esae ativilau, ghe posoposo aimatootoongana ateva unna ia God. Ghe kolokolo anamuu lao sio tale ensolo ghaata laata ghe posoposo sarasarakana tani ghelei saasakiaa kosa ateva me paamanu eteva. ³ Ghe ue va, “Karika am mene ghelei saasakiaa kosa ateva me paamanu eteva me ai etoa, lomosina ta ami atoka aimatootoongana tale patilakaira kapuna tau ngai uungu etoa kapuita Goto ateva.” ⁴ Vara me aghe nongola kateva ghe asela lo atoa laghe ghaala aimatootoongana ateva kanna ia God: kateva ai me ghaatingaulu ghaata airari (144,000) taumattu tale ila akapa ararimangali etoa Israeli.

⁵ Tale ararimangalina ateva Jiuda, 12,000 taumattu laghe ghaala aimatootoongana ateva kanna ia God,

me tale ararimangalina ateva Ruben, 12,000,
me tale ararimangalina ateva Gad, 12,000,
⁶ me tale ararimangalina ateva Asa, 12,000,
me tale ararimangalina ateva Naptalae, 12,000,
me tale ararimangalina ateva Manasa, 12,000,
⁷ me tale ararimangalina ateva Simion, 12,000,
me tale ararimangalina ateva Livae, 12,000,
me tale ararimangalina ateva Isika, 12,000,
⁸ me tale ararimangalina ateva Sebulon, 12,000,
me tale ararimangalina ateva Josep, 12,000,
me tale ararimangalina ateva Benjamin, 12,000.

Oroieili taumattu ngatoa laghe molumolu tale usouusoana aiaasae

⁹ Vara me aghe tarala taumattu ngatoa oroiennaaili ila, karika teva erooro tani ioila, tale anua atoa, me tale ararimangali etoa, me tale taumattu ngatoa, me tale asease nisama atoa, laghe tiitingina emua tale aitokatokane ateva kingi me emua tale natu sipsipi erighi. Laghe aasae aiaasae usouusoana me laghe posoposo laa ootou ta nimaira. ¹⁰ Me laghe tautau sae ararina atae God me laghe ue va, “Salana tani saanga kanna kapuita Goto ateva,

ia etokatoka tale aitokatokane ateva kingi,
me tee natu sipsipi erighi.”

¹¹ Ensolo atoa laghe tiitingina talia aitokatokane ateva kingi me laghe tiitingina talia namu ngatoa me ghaata voto maulue. Ila akapa laghe tuuturru siola euu tani kkaua God. ¹² Laghe ue va,
“Koronna!

Nitau sae, me inasanina
me nialomasaanga me nikaili emasina me nioneoneaa
me nisarasarakana
elao ta kapuita Goto ateva aue etoka nau ekapa atoa.
Koronna!”

¹³ Vara me kateva tana namuu ghe kolomieghila va, “Lo atoa la molumolu tale usousoana — see ila, me eaa laghe kasula?”

¹⁴ Aghe liula me aghe uela va, “Vau eteva, ukilakila.”

Me ghe uela va, “Lo atoa ona laghe kupi ghoha mae tale kinatama nau sesaaili. Laghe porala ghinnanniira me laghe ghelei eusousoanala tale raena ateva natu sipsipi erighi. ¹⁵ Liuna avalua o me,
“la tiitingina emua tale aitokatokane ateva God,

me la uungu ta netgetana llaa me voo elome tale alena ale manga
ateva;
me lo ateva etokatoka tale aitokatokane ateva king aue epule me
eakoula tale unna kandisi eteva.

¹⁶ Karika aue la mene maloo,

karika aue la mene kangngata,
sinaka ateva karika aue epalangila,
me karika aue esinaki ekulukulukila.

¹⁷ Ta natu sipsipi erighi elome tale aitokatokane ateva king aue kapuira
tau ngai toitoi ia,

aue ekasueinila lao tale ateo akaakala atoa tokatoka liu ila,
me God aue esei velu rarum mata tale mataira.”

8

Ghaituna ateva airarrangasi gheeghelei runga ia me aikaai niaiaavusuvusuena ateva

¹ Nau eteva ghe ghelei evolovolokila gaituna ateva airarrangasi laghe rrangasi rungaala uru ngai eteva talitali ia, me epona liu karika righi niaimasamasaanga ghaisa ngarighi ghe roo pai kativilau tale kateva aoa.

² Me aghe tarala gaitu (7) ensolo nau ekapa atoa la tiitingina emua ta God, me laghe tau lao sio gaitu tau etaira.

³ Kateva tana ensolo ghe uunusi aikaai niaiaavusuvusuena gheeghelei tale gol, ghe mae sio me ghe tingina valaala tale liu nighelei aiaavusuvusuena ateva. Laghe tau lao sio oroienaaili voto tani ghelei masi ngusungusuaane tani ghelei aiaavusuvusuena, me tee kaluira nilooloo sae kapuna taumattu ngatoa God epona tale olta ngateva gheelei ia tale gol emua tale aitokatokane ateva king. ⁴ Asu niaiaavusuvusuena ateva me kaluira nilooloo sae kapuna taumattu ngatoa God laghe saela ta God tale aikaai niaiaavusuvusuena ateva ensolo ateva ghe uunusia. ⁵ Vara me ensolo ateva ghe ghaala aikaai niaiaavusuvusuena ateva me ghe kaaila kura ateae tale liu nighelei

aiaavusuvusuena ateva me ghe kao velue siola tale kosa ateva, me palapalanga ateva ghe akurruela, me ravaravaia ateva ghe ravaiela me ghe rukela kosa ateva.

Ghaitu taue

6 Vara me ghaitu ensolo laghe posoposo ghaitu taue laghe aipanipa-niala tani vuu.

7 Aitiutiu eteva ensolo ghe vuula unna ateva tani taue, me vaoo ateva korokoronganiaane nongina atu, me kura atae, me rae ateva, lotolu ghe mae aitauaa sio tale kosa ateva, nau laghe sau velu sio mae tale kosa ateva. Me ghe atala aiaakotolu etivilau pai tale kosa ateva me tee ghe atala aiaakotolu etivilau pai tale ai etoa me rarrasa akapa atoa maulue ila.

8 Aiaaghaliene ateva ensolo ghe vuula unna ateva taue, me kinatama voto ateva arova motouru eteva ghe rameaala me ghe velue ghoala elamana, me aiaakotolu etivilau pai tale manu eteva ghe raela, **9** me aiaakotolu etivilau pai tale voto atoa maulue ila tale paamanu eteva laghe matela, me aiaakotolu etivilau pai tale paanaka atoa me anua atoa tale ia o paamanu eteva laghe turungilala.

10 Aiaakotonna ateva ensolo ghe vuula unna ateva tani taue, me kinatama katto ateva ghe katuu sio mae eunaakookoo, mallangina ateva nonginaaili teae usulu ghe ramerame, ghe sio mae tale aiaakotolu etivilau pai tale kinatama ateo akaakala atoa, me tale lutu ateo atoa. **11** Katto ateva ararina atae ta Kaakaalina. Aiaakotolu etivilau pai tale ateo atoa ghe kaakaalinala, me oroeili taumattu ngatoa laghe matela tale manu kaakaalina.

12 Aiaaghaatane ateva ensolo ghe vuula unna ateva taue, me aiaakotolu etivilau pai tale sinaka ateva, me ulena ateva me katto atoa, laghe saurromla, me aiaakotolu etivilau pai tale llaa karika ghe mallangala, me tee aiaakotolu etivilau pai tale voo ngateva karika ghe mallangala.

13 Vara aghe toka taatara me aghe nongola savaakoroara ateva ghe looloo elomarase me ghe ovaova ghe ue va, “Alousiusi, alousiusi, alousiusi ta lo atoa am tokatoka tale kosa ateva oia, poli sa ateva aue elutu etaimim nau eteva ensolo kotolu airuuruu lotolu vuu uneirotolu taue.”

9

1 Aiaaghaliema ateva ensolo ghe vuula unna ateva taue, me aghe tarala katto ateva ghe katuu sio mae eunaakookoo me ghe sio mae tale kosa ateva, laghe tau lao sio kii eteva pei tale liu eteva karika righi aioghioghi etana. **2** Nau eteva ghe otira liu eteva, asu eteva ghe sae mae nongina va asu kinatama nginei eteva. Sinaka ateva me elomarase ghe saurromla tale asuna ateva liu eteva. **3** Me tale asu eteva toto atoa laghe sio mae tale kosa ateva me laghe tau lao sio sarasarakaniaa onioni tale kosa ateva. **4** Laghe uela etaira va la rau mene tturuu rarrasa me voto epiipinosa me ai etoa tale kosa ateva. La tturuu nonga taumattu ensolo ateva karika ghe atokala unna aimatootongana ateva God tale patilakaira. **5** Karika laghe tau lao sio sarasarakaniaa tani ubi ematela, ta la nim toka gheelei emmarikanaila

tale ghalima ulana, me nimmarikana la ghaa ue nongina onioni eteva eonioni. ⁶ Tale isaa o nau, taumattu ue la pae nimate me karika ue eghaaila, me ue la alonaaili tani mate, me nimate ateva ue eilou vulila.

⁷ Toto atoa taataraira nongina ooso atoa la aimanomanosiaa tani laa aiuvii. Epona tale uruira la aatoka voto nongina kou nguru etoa gheeghelei tale gol, me mataira akapa atoa nongina mataira taumattu ngatoa. ⁸ Uu nguruira nongina uu nguruira vause atoa, me ngalungaluira nongina ngalungalu laeoni. ⁹ Aighelei runga kassauira nongina llo aighelei runga kassauira taumattu ngatoa gheeghelei tale aeana, me lingi kaekaeira ghe aangari nongina oroieili ooso atoa la aeae ai-ilou la iilou tani laa aiuvii. ¹⁰ Uiiira nongina onioni eteva eonioni, me sarasarakaniaaira etokatoka tale uiira tani ghelei saasakiaa taumattu ngatoa erooroo ghalima ulana. ¹¹ Kapuira kingi eteva eaaitara ngakapaila, ia o ensolo ateva tale liu, ararina ateaetale inangari nge Hibrus la ue va Abaddon, me ta Grik la ue va Apolion.*

¹² Aitiutiu eteva sesa nau ang ghe lange sio, me kasi ghalua sesa nau karika lalu ghe mae.

¹³ Aiaaghaonomina ateva ensolo ghe vuula unna ateva tauue, me aghe nongola lingi ngalo ateva ghe mae sio tale ghaata aissopiaa tale olta ngateva gheelei ia tale gol nongina God etokatoka. ¹⁴ Ghe ue tale aiaaghaonomina ateva ensolo ghe uunusi tauue ateva va, “Tau vella ensolo ghaata la ghe iri etokailaatala tale kinatama ateo akaakala atea elupreitis.” ¹⁵ Me ilaata o ensolo ghaata laata ghe nim toka aimanomanosiaa tale ia o aoa ngateva, nau eteva, ulana ateva me ninamanama ateaet, laghe tau vellaata tani uvi emate taumattu tale aiaakotolu etivilau pai tale kosa ateva. ¹⁶ Isaa akapaaili tau ngai uvii laghe iilou tale ooso aghe nongola erooroo 200,000,000.

¹⁷ Tale uneghi nitaatara ateaet aghe tarala avalue toko va: ooso atoa me lo atoa la ghe iilou etaira, uneira aighelei runga kassauira raeraeana nongina kura ateaet me savuluvulungana me talakiena nongina salpa ngateva, uruira ooso atoa taataraira nongina uruira laeoni etoa, me kura me asu me salpa ghe ghooa ta paaira. ¹⁸ Aiaakotolu etivilau pai tale taumattu tale kosa ateva laghe uvi ematelala tale kotolu voto sesa: kura me asu me salpa ghe ghooa ta paaira. ¹⁹ Sarasarakaniaa ooso atoa isaa ta paaira me ta uiira, poli uiira nongina katu ngatoa, uruira atoa ghe aavakovako taumattu ngatoa.

²⁰ Me llo taumattu karika ghe matela tale maate ooso atoa laghe gheleila etaira, laghe ratirati tani nna ngaioghioghiaa tale kaluira sesa niuungu laghe gheelei ta nimaira; karika laghe ruu tani kkauaa raroai etoa, me tootoo atoa gheelei tale golo me silva me brasi me ai, tootoo atoa karika la rooro tara me karika la nongonongo me karika la aaikasuaa. ²¹ Me tee karika laghe nna ngaioghioghiaala tale kaluira niaiuvi emate, me nialala, me uunguua nialai salosaloa see, me niainao.

9:6: Job 3:21; Jer 8:3. **9:7:** Joel 2:4. **9:8:** Joel 1:6. **9:9:** Joel 2:5. * **9:11:** Malloeana Abaddon me Apolion va “tau ngai tturuu”. **9:15:** Aotu 8:7-12. **9:20:** Aotu 16:9, 11; Sams 115:4-7; 135:15-18; Den 5:23.

10

Ensolo ateva me ghauna arighi skrol

¹ Vara me aghe tarala mene kateva ensolo sarasarakanaili ia ghe sio mae epona liu. Ghe molumolu tale urukookoo, me renbo ateva epona tale uruna ateva, me matane ghe maamallanga nongina mallangi sinaka ateva, me kkena aluelange nongina ttulu eluulu lalu ghe ramerame nongina kura ataata ateeae. ²Ghe posoposo atingina ta nimane natu uru ngai erighi la aseaseva skrol, otioti ia. Ghe atingina ghoala kkena muenna atelange elamana me kkena uaise atelange ghe atinginaiela elae, ³me ghe aore anamungailila nongina teva laeoni. Nau eteva ghe aorela, lingi ngaloira ghaitu palapalanga laghe samala. ⁴Nau ghaitu palapalanga laghe samala me ngaghe ainasiaa tani pitipiti, me aghe nongola lingi ngalo ateva epona liu ghe uela va, “Ghelei rungaala vuku eteva, karika umene piti llo ghaitu palapalanga laghe auliaala.”

⁵ Vara me aghe tarala ensolo ateva ghe tiitingina elamana me elae ghe ssua saela nimane muenna atelange epona liu. ⁶ Me ghe aulia ngakoronna saela ta lo ateva tokatoka liu ia, ghe gheleila epona liu me isaa akapaaili voto etana, me kosa ateva me voto akapa etana, me paamanu eteva me voto akapa etana, me ghe uela va, “Karika aue mene righi niaiolateaa! ⁷Ghaituna ateva ensolo aue evuu unna ateva tana taue, me isaa o nau, voto aisulianna kanna God aue elutu ekapa, nongina ghe aulia ngaotula tale kapuna tau ngai nonganongo anna atoa, propete ila.”

⁸ Vara me aghe nongola lingi ngalo ateva aghe nongo amuela epona liu ghe mene aippooaa teeieghila, ghe uela va, “Kasula me ulaa ghaa skrol ateva otioti ia ta nimane atelange ensolo ateva etiitingina elamana me elae.”

⁹ Me aghe lao sio tani kolomi ensolo ateva va etau mae natu skrol ateva. Ghe uela etaghi va, “Ghaaiela me unamaia. Aue egelei kovam ateva esesa, me tale paam ateva aue onose nongina iruena ateva.” ¹⁰ Aghe ghaala natu skrol arighi ta ensolo ateva me aghe namaielia, namina onoseaili ta paaghgi nongina iruena ateva, me ta kovaghi eteva ghe sesala. ¹¹ Vara me ghe mene uela etaghi va, “Umene ppooa ngaotu inangarina God ta taumattu ngatoa, me patunganua atoa, me asease nisama atoa me kingi etoa.”

11

Uitnesi elua

¹ Me kateva ghe tau mae sio aitootoongi eteae arova aikkatulu etiulu. Me God ghe uela etaghi va, “Laa toongi alena ale manga ateva God me liu nighelei aiaavusuvusuena ateva, me uira tau ngai kkaua ngatoa.

² Me urau mene toongi ale ngeleka atiulu tale ale manga ateva, poli aghe tauela ta tau ngeleka atoa. Aue la sapeleaa masaliki taatara ateeae manga ia ta ghaatingaulu ghalua (42) ulana. ³ Me aue ataula sarasarakanata kapughu uitnesi elua, aue lalu asae ghinna nialousiusi, me aue lalu aulia ngaotu inangarighi eroo kateva airari ghalua ai me ghaonomongaulu (1,260) nau.” ⁴ Ilalua oliv ai ilalua, me aitingina lam

ilalua lalu tiitingina emua ta Vau eteva eaaitaraa kosa ateva. ⁵ Arova teva eaanna tani ghelei saasakiaa etairarua, kura ataeue ekupi ghoa ta paairarua, me eata akapa tau ngai ssateeirarua atoa. Lo ateva eaanna tani ghelei saasakiaa etairarua, aue emate evalua o. ⁶ Ilalua o taumattu ngalua sarasarakania ilalua tani ghelei runga eunaakookoo me karika emene vaoo tale nau lalu aulia ngaotu inangarina God. Me sarasarakaniaairarua erooro tani ghelei manu ekoli lao tale rae, me tani ghelei asease sesa tale kosa ateva tale aaloaloannaairarua.

⁷ Nau lalu ruu ekapaaile tani auliaa voto God ghe taula va lalu auliaa, kinatama ghaata kkena ateva aue ekasu tale liu eteva karika righi aioghioghi etana, aue euvi ematelalua. ⁸ Aue euvi emate alokoilaluelu tapaa salana tale masaliki taatara ataeae matuutulienia ia, eaaimatoonga eSodom me eljip. Tale ia o voto ateva, Vauriarua ateva laghe avukalaie saela tale aikotoo. ⁹ Aue eroo kotolu nau me pai kativilau tale mene kateva nau, isaa akapa taumattu tale anua atoa, me tale ararimangali etoa, me tale taumattu ngatoa, me tale asease nisama atoa aue la tara vilikiirarua, me karika aue la ghanna tani kaieinilalua. ¹⁰ Me taumattu etokatoka tale kosa ateva oia aue la masimasi me la ghelei maakiikii mausiirarua. Aue la ghaitauaa masi voto atoa elome etaira, poli ilalua o propete alua lalu ghe taula nimmarikana ta taumattu tale kosa ateva oia.

¹¹ Vara kotolu nau me pai kativilau tale mene kateva nau ghe lange sio, me God ghe mene tau lao sio ainoa maulue etairarua, me lalu ghe tingina saela, me nimoia ghe ghaala lo atoa laghe tarailaluelu. ¹² Me lalu ghe nongola kinatama lingi ngalo ateva ghe kaurekatila epona liu me ghe uela etairarua va, "Amalu sae mae toko." Me lalu ghe saela epona liu tale urukookoo ateva nau tau ngai ssateeirarua atoa laghe taatara.

¹³ Me tale ia nonga o nau eteva, kinatama rukeruke ateva ghe tturuula aiaakasangaulu etivilau pai tale masaliki taatara ataeae. Ghaitu airari (7,000) taumattu rukeruke ateva ghe uvi ematela. Me lo atoa laghe saangala laghe matautula me laghe tau saela God epona liu.

¹⁴ Aiaaghaliene ateva sesa nau ghe lange sio, me aiaakotonna ateva ghaisa ngarighi emae.

Aiaaghaitu eteva taue

¹⁵ Aiaaghaitu eteva (7) ensolo ghe vuula unna taue ateva me kinatama lingi ngalo atoa epona liu laghe uela va,

"Sarasarakania tani aitaraa kosa akapa ateva ange tokala tale aitaraane kapuita Vau ngepona me kapuna Mesaea ngateva,
me aue eaitoiaa nau ekapa atoa."

¹⁶ Me ghaluengaulu ghaata (24) namuu laghe tokatoka tale uneira aitokatoka atoa king, emua ta matane God laghe tturru siola eeu me laghe kkauaala God. ¹⁷ Laghe ue va,

"Ami kaakaili emasina etam, Vau ngepona God sarasarakaniaaili io,
lo ateva utokatoka me ughe tokala arau,
poli angu ghe ghaala kinatama sarasarakaniaam
me angu ghe tiuaala tani aitoiaa kosa ateva.

11:5: 2 Sam 22:9; Sams 97:3. **11:6:** 1 Ki 17:1; Eks 7:17-20; 1 Sam 4:8. **11:7:** Den 7:21; Aotu 12:17; 13:7; 17:8. **11:8:** Luk 13:34. **11:11:** Esik 37:5, 10. **11:12:** 2 Ki 2:11. **11:13:** Aotu 6:12; 16:18. **11:14:** Aotu 9:12. **11:15:** Eks 15:18; Sams 10:16; Den 2:44; 7:14.

18 Patunganua atoa ghe sessailala,
me sessaiaam ange rekatala.
Ange naua tani ghelei niaisakei ta matena atoa
me kapum tau ngai nonganongo anna atoa propete ila, la ghaa
aipoliira,
me lo atoa kapum manga ila me lo atoa la oneoneaa ararim atae,
me tee lo atoa tue peipeina ila me lo atoa karika.
Me ange naua tani tturuu lo atoa la tutturuu kosa ateva.”

19 Me alena ale manga ateva God epona liu ghe otiela me elome tale
ale manga ateva aghe tarala vokisi eteva aikaii inangari niaippooa
ngaitauaa. Ravaravaia ateva, kurruna palapalanga ateva, rukeruke
ateva, me kinatama ttasi vaao ateva korokorongana ia nongina atu ghe
sio mae.

12

Vause ateva me otuena ateva

¹ Kinatama niaimatootoongana ateva ghe kauerekatila elomarase. Vause ateva ghe aitiitii tale sinaka ateva, me ulana ateva ghe tokatoka tale pake lapalapa kkena, me kou nguru eteva ta uruna erooroo kasangaulu ghalua (12) katto etana. ² Vause ateva ghe kakkaai natuna ateva. Nauna tani molenaa me ghe piipii etingina poli ghe anoonongi etingina ia. ³ Mene kateva niaimatootoongana ghe kauerekatila elomarase. Kinatama otuena ateva raeraeana ia, ghaitu uruna me unna kom kasangaulu me ghaitu kou nguru tale ghaitu uruna. ⁴ Ghe leeaala uina atiulu me ghe paru velu sio mae aiaakotolu etivilau pai tale katto atoa, me laghe katuu sio mae tale kosa ateva. Otuena ateva ghe tinginala emua ta vause ateva nau ange aloanna tani molenaa, poli ghe aaloanna tani olomi aliki eteva nau eteva elutu. ⁵ Vause ateva ghe molenaala aliki erighi taita ia, ia aue emuemua ngakapa anua atoa, me aue eposo aikkatuluira atiulu kingi etoa aeana ia. Me gharavaeataaili ta aliki eteva ensolo ateva ghe ghaiae saela epona liu tani toka tee God tale unna aitokatoka ateva king. ⁶ Vause ateva ghe iloula ghe ssola tale voto ateva karika righi taumattu etana. God ghe aimanomanosieiniela va elaa toka etana, me aue eaitarinia erooroo kateva airari, ghalua ai me ghaonomongaulu (1,260) nau.

⁷ Me niaiuvii eteae ghe tiuaala epona liu, Maekol me kapuna ensolo atoa laghe aiuvii teela otuena ateva me kapuna atoa tani ensolo. ⁸ Poli otuena ateva karika sarasarakania ia, ia me kapuna atoa ensolo, laghe sau vella sio mae epona liu. ⁹ Kinatama otuena ateva laghe sau velue sio mae la kolokoloa va Raroai eteva me Satana, ghe kamela kosa akapa ateva, ia me kapuna ensolo atoa laghe sau velu eitaueinila sio mae tale kosa ateva.

¹⁰ Me aghe nongola lingi ngalo ateva namungaili ia epona liu, ghe uela va,
“Isaa oia nisaanga, me sarasarakaniaane ararimangalina ateva God
ange mae sio,
me aaitoiaane kapuna Mesaea ngateva.

11:18: Sams 110:5; Rom 2:5; Aotu 20:11-13; Sams 115:13. **11:19:** Hib 9:4; Aotu 8:5; 15:5;
16:21. **12:2:** Maeka 4:10. **12:3:** Den 7:7. **12:4:** Den 8:10. **12:5:** Sams 2:9; Aotu
19:15. **12:7:** Jjud 9. **12:9:** Aitiuti 3:1, 14; Luk 10:18; 22:31; Aotu 20:2. **12:10:** Job
1:9-11; Sek 3:1.

Lo ateva eaatingina kapumami etoa tale niaiskei,
 eaatinginaila tale niaiskei ta matane God, llaa me voo,
 ia o laghe sau velue sio mae.

¹¹ Laghe apalaiela
 tale raena ateva natu sipsipi eteva,
 me tale inangari eteva laghe aulia ngaotu.

Poli karika laghe annaala maamauluaaira,
 karika laghe matautula tani mate.

¹² Liuna avalua o am masimasi lo atoa am tokatoka epona liu,
 me nialousiusi aue etoka tale kosa ateva me paamanu eteva,
 ta raroai eteva ang ghe sio mae etaimalu.

Sessaiaane namungaili,
 poli ekilakila va nauna tukunaaili.”

¹³ Nau eteva otuena ateva ghe tarala va angila ghe sau velue sio mae tale kosa ateva, ghe usila vause ateva ghe molenaala aliki eteva taita ia. ¹⁴ Vause ateva laghe tau lao sio kaekaena alua nongina kaekae savaakoroara ateva va eloo elao tale voto ateva angila ghe aimanomanosieiniela va elaa toka etana karika righi taumattu etana. Me aue la aitarainia tale nau, nau etoa me pai kativilau tale nau eteva, me karika otuena ateva eroo tani ghaaia. ¹⁵ Otuena ateva ghe luela manu eteva tale paana ateva nongina ateo atae eakaakalaa tani akalaa velu vause ateva. ¹⁶ Me kosa ateva ghe sausila vause ateva, me ghe otira paane ateva me ghe ropi ematiila ateo atae, otuena ateva ghe lueila tale paane ateva. ¹⁷ Me otuena ateva ghe sessaileiliela ta vause ateva, ghe lao sio tani aiuvii tee natuna atoa vause ateva, lo atoa la aaimuli usi tee inangari nipaopao kanna God me la sarasarakanana tani aimuli tee inangarina ateva Iesu. ¹⁸ Me otuena ateva ghe tinginala* elosamarra.

13

Ghaata kkena ateva ghe kauerekatila etapaa manu

¹ Me aghe tarala ghaata kkena ateva ghe pangusu sae mae etapaa manu erooroo kasangaulu (10) unna kom, ghaitu (7) uruna me kasangaulu kou nguru tale unna kom. Me kateva kateva uruna pitipiti asease inangari etoa tani auliaa va ia Goto ia. ² Ghaata kkena ateva aghe taraiela marova lepod ateva, kkena nongina kkena beaa ngateva, me paane ateva nongina laeoni eteva. Otuena ateva ghe tau vella ia o ghaata kkena ateva tani ghaa sarasarakaniana me matuutulienia. ³ Kateva uruna laghe avakovakoala me ghe mene masinala. Taumattu ngakapa atoa laghe ounala tani taraia me laghe usiela. ⁴ Taumattu ngatoa laghe kakkauaa otuena ateva poli ghe tau lao sio matuutulienia ta ghaata kkena ateva, me laghe kakkauaa tee ghaata kkena ateva me laghe ue va, “See nongina ghaata kkena ateva? Me see erooroo tani aiuvii teeia me eapalaia?”

⁵ God ghe tau vella ghaata kkena ateva tani tau sae nannaane me ghe aauliaa saasakiaa ta God. Ghe gheelei aloannaane ghe antani ghelel ghe roola ghaatingaulu ghalua (42) ulana. ⁶ Me ghe otira paane ateva,

12:12: Ais 44:23; 49:13. **12:14:** Den 7:25; 12:7. **12:17:** Aotu 11:7. * **12:18:** otuena ateva ghe tinginala Kasina uru ngai laghe pitila laghe uela va aghe tinginala. **13:1:** Aotu 12:3; 17:3, 7-12. **13:2:** Den 7:4-6. **13:3:** Aotu 17:8. **13:5:** Den 7:8, 25; 11:36; Aotu 11:2.

tani aulaa saasakiaa ta God, me tale ararina ateeae, masalikina ateeae, me lo atoa la tokatoka etana. ⁷ God ghe taula sarasarakanana etana tani laa aiuuvi tee kapuna taumattu ngatoa God, me tani apalaila. God ghe taula sarasarakanana tani muemua ararimangali ekapa atoa, me taumattu ngatoa me asease nisama atoa me tale anua atoa. ⁸ Lo atoa la tokatoka tale kosa ateva la kakkauaa ghaata kkena ateva, lo atoa karika pitipiti arariira tale vuku maulue ateva unna ia natu sipsipi eteva, ia laghe uvi emateala tale aitiutiu tale kosa ateva.

⁹ Lo ateva talingane manee, aue enongo.

¹⁰ Arova see God ang ghe uela va elao tale ale mata voovoo,
 aue elao tale ale mata voovoo.

Arova see God ang ghe uela va emate tale baenata ateva,
 aue emate tale baenata ateva.

Nau isaa o ase voto ange lutululu, kapuna atoa God aue la tingina akorokorongana ta God me la poso parasi aikaaiaaира.

Ghaata kkena ateva ghe kauerekatila tale kosa ateva

¹¹ Vara me aghe tarala mene kateva tani ghaata kkena ghe kauerekatila tale kosa ateva, ghalua unna kom nongina natu sipsipi eteva, ghe samasama nonginaaili teva otuena. ¹² Ghe aapasunga ngakapala sarasarakaniaane aitiutiu eteva ghaata kkena ta matane, me ghe gheleila taumattu ngatoa tale kosa ateva laghe kkauaala aitiutiu eteva ghaata kkena ia o laghe avakovakoala me ghe mene masinala. ¹³ Me ghe gheelei niaimatoongana atoa namungaili ila. Ghe kolola kura ateeae epona liu ghe sio mae tale kosa ateva ta mata taumattu ngatoa. ¹⁴ God ghe tau lao sio sarasarakanana etana tani ghelei isaa o niaimatootoonga tani aimatoonga sarasarakaniaane aitiutiu eteva ghaata kkena. Poli ghe gheelei isaa o niaimatootoonga, ghe saikamela taumattu ngatoa tale kosa ateva. Ghe sungilala tani atingina sae tootoo ateva tani oneoneaa ghaata kkena ateva ia o laghe avakovakoala tale baenata ateva me ie etokatoka. ¹⁵ God ghe tau vella ghaata kkena ateva tani tau lao sarasarakanana tani tau lao maulue tale aitiutiu eteva tootoo me ia aue eaippooaa me eghelei lo atoa la tam aaloanna tani kkauua tootoo ateva la mate. ¹⁶ Ghe suusulungi ekapaila, ghauna me namuu, tue peipeiena me karika tue peipeiena, lo atoa karika la tokatoka tale aloannaaira me lo atoa la tokatoka tale aloannaaira, tani ghaa aimatootongana tale nimaira muenna atelange o ta patilakaira. ¹⁷ Aue karika teva eppoli me eaitauuaa voto arova etam ghaa aimatootongana ateva, ia o ararina ateeae ghaata kkena ateva o namba ngateva eaaimatoonga ararina ateeae.

¹⁸ Tani kila isaa o voto, utani nanna ngamasina. Lo ateva taumattu masina nannaane erooroo tani nna ngamasina, me ekila tani ira namba ngateva, poli ia o namba ngateva unna ia taumattu ngateva. Unna namba ngateva toko va, ghaonomo ai, ghaonomongaulu me ghaonomo (666).

14

Natu sipsipi eteva me 144,000

¹ Aghe mene taatarala me emua etaghi natu sipsipi eteva ghe tiitingina tale motouru eteva eSaeon. Kateva ai, ghaatingaulu me ghaata airari (144,000) taumattu laghe tiitingina teeia, ararina atea me ararina atea Tamane pitipiti elokoi emua tale patilakaira. ² Me aghe nongola kateva lingi niaangari epona liu nonginaaili ateo atea eakaakalaa atingina me nongina palapalanga ateva. Niaangari eteva aghe nongoala nonginaaili va lo atoa la kaukau uneira aikaukau. ³ Kateva ai, ghaatingaulu me ghaata airari (144,000) taumattu laghe tiitingina emua tale aitokatokane ateva king unna ia God, me emua tale ghaata voto maulue me namu ngatoa. Laghe ueei kkinari etea ouna ia, karika mene toa la kilakilaia ta lo nonga atoa laghe saangala tale kosa ateva la kilakilaia. ⁴ Isaa o taumattu karika righi sesa gheeleiaaira poli karika laghe kila vause, poli laghe akekkelilala tale voto sesa. Laghe aaimuli tee kasukasuaane natu sipsipi eteva nongina eaa ghe laolao. Isaa o taumattu God ghe ghaa oghilala tale taumattu tale kosa ateva. Ila mata ngemua ila ta God me natu sipsipi eteva. ⁵ Karika righi nikamekame ghe mae sio ta paaira me karika righi sesa gheeleiaaira.

Ensolo kotolu

⁶ Vara me aghe tarala kateva ensolo, ghe looloo elomarase me ghe posoposo masi kiukiu eteva tokatoka liu ia tani ppooainia ta lo atoa la tokatoka tale kosa ateva, tale anua akapa atoa, tale ararimangali etoa, me tale asease nisama atoa me tale taumattu ngatoa. ⁷ Me ghe sama anamuula me ghe uela va, “Am oneoneaa God, me am kkaueinia, poli nauna tani ghelei niaisakei tale taumattu ange rekatala. Am kkaueinia ta ia ghe gheleila epona liu, kosa ateva, paamanu, me ateo vubbuaa.”

⁸ Aiaaghala ateva ensolo ghe aimulila me ghe uela va, “Masaliki taatara atea namuu ia eBabilon angila ghe tturungiela! Laghe tturungiela! Ghe gheleila anua akapa atoa laghe ropila sesa manu eteva, me laghe lailai sari maneira atoa katoa tani taita me vause.”

⁹ Aiaakotonna ateva ensolo ghe aimulila etairarua, ghe sama ana-mungailila me ghe uela va, “Lo ateva ukakkaua ghaata kkena ateva me tootoona ateva, me ughe ghaala aimatootongana ateva ta patilakam o ta nimam, ¹⁰ io aue ughaa sessaiaane ateva God namungaili ia nongina kapa uaeni eteva, me aue ummarikana tale kura atea me atu etoa ramerame ila emua ta mataira ensolo atoa manga ila me natu sipsipi eteva. ¹¹ Asu tale uneira nimmarikana aue esae, me esae aue karika righi niaioghioghi etana. Aue karika righi niainoane llaa me voo, ta lo atoa ila kakkauaa ta ghaata kkena ateva me tootoona ateva, o laghe ghaala aimatootongana ateva eaimatoonga ararina atea.” ¹² Nau isaa o ase voto ange lutulutu, kapuna atoa God aue la tingina akorokorongana ta God, me la nongo usilaa inangari nipaopao kanna God, me la poso parasi aikaaiiaaira ta Iesu.

¹³ Vara me aghe nongola lingi nisama ateva epona liu ghe uela va, “Pitila llo toko. Ghaine ange tiauala me nau emaemae lo atoa la aikaaiia ta Vau eteva me la mate, niarangise aue etoka etaira.”

Spiriti eteva eue va, “Ue. Aue la ainoana tale uunguaaira poli uunguaaira aue eusila.”

14:2: Aotu 1:15; 19:6. **14:3:** Ais 42:10; Aotu 5:9; 7:4. **14:8:** Ais 21:9; Jer 51:7-8; Aotu 17:2; 18:2, 3. **14:9:** Aotu 13:12-17. **14:10:** Ais 51:17, 22; Jer 25:15-16; Sams 75:8; Esik 38:22; Atiutiui 19:24; Aotu 16:19; 20:10; 21:8. **14:11:** Ais 34:10. **14:12:** Aotu 13:10.

Nau nimukemuke tale kosa ateva

¹⁴ Vara aghe taatara me emua etaghi aghe tarala urukookoo ateva usousoana ia, me taumattu ngateva ghe tokatoka etana nonginaaili va Natuna ateva Taumattu ngateva. Unna kou nguru eteva ta uruna gheeleia tale golo, me ta nimane iema ateva matakerenganaaili ia. ¹⁵ Mene kateva ensolo ghe kipi ghoa mae tale ale manga ateva, ghe kolokolo anamungaili lao sio ta lo ateva ghe tokatoka tale urukookoo ateva. Ghe uela va, “Ghaala iemam ateva me usai inana tale utana atingiu, poli nauna ange mae sio tani ghaaia ta ange matuela.” ¹⁶ Lo ateva ghe tokatoka tale urukookoo ateva ghe leea sio mae iemane ateva tale kosa ateva me ghe saila inana tale kosa ateva.

¹⁷ Mene kateva ensolo ghe kipi ghoa mae tale ale manga ateva epona liu, ia tee ghe posoposo iema ateva matakerenganaaili ia. ¹⁸ Me mene lo ateva ensolo ghe aaitaraa kura aiaavusuvusuena atae ghe ghoa mae tale liu nighelei aiaavusuvusuena me ghe kolokolo anamungailila ta lo ateva ghe posoposo iema ateva. Ghe uela va, “Ghaala iemam ateva me ughaaitauaa ue ngai tale uaeni eteae tale kosa ateva, poli ue ngai ange masso akapala.” ¹⁹ Ensolo ateva ghe leeaala iemane ateva tale kosa ateva. Ghe sai ekapala ue ngai tale uaeni me ghe velu kaaila ta aiposoa uaeni eteva, eaaimatoonga sessaiaane God. ²⁰ Me laghe pooposoa uaeni eleka tale masaliki taatara atae. Rae ateva ghe kipi ghoa mae tale aiposoa uaeni eteva eairooaa tee sae oasa atikirighi tale paa ooso ateva, me aaluseaane erooroo kotolu ai (300) kilomita.*

15

Ghaitu ensolo ghe posoposo ghaitu voto sesa

¹ Aghe taatara ssola epona liu me aghe mene tarala kateva kinatama masi niaimatootoongana. Ghaitu ensolo laghe posoposo ghaitu airuu-ruu tana voto sesa — airuuruu tale isaa oia voto sesa, poli sessaiaane God aue eruu tale isaa oia voto sesa. ² Aghe tarala voto ateva taataraane arova manu eteva laghe gheleielu tale ghalasi, eaaisavisavila tee kura atae. Me epona etana, taumattu ngatoa laghe apalala ghaata kkena ateva me tootoona ateva, me namba tale ararina atae, laghe tiitingina etana. Laghe posoposo aikaukau kannia God ghe tau lao sio etaira. ³ Laghe ueei unna kkinari eteae Moses, kapuna tau ngai nonganongo anna ateva God, me kkinarina atae natu sipsipi eteva. Laghe ue va, “Namuu me masinaaili uunguaam,

Vau eteva God sarasarakania io.
Ghulughuluena me koronna salam,

kingi io tale nau ekapa atoa.

⁴ Taumattu ngakapa atoa aue la oneoneainio, Vau eteva,
me la tau sae ararim atae.

Poli io nonga manga io.

Anua akapa atoa aue la mae kkaueinio,
ta uunguaam ghulughuluena ang ghele kaurekatila.”

⁵ Vara me aghe taatara ssola epona liu me aghe tarala ale manga ateva, ia o ale kandisi ia eaapasunga va God etokatoka, ghe otiola.

14:14: Den 7:13. **14:18:** Joel 3:13. **14:20:** Ais 63:3; Aotu 19:15. * **14:20:** kotolu ai (300) kilomita Tale inangari nge Griek, kateva airari me ghaonomo ai (1,600) stadia. **15:3:** Eks 15:1; Sams 139:14; 145:17. **15:4:** Jer 10:6-7; Sams 86:9. **15:5:** Eks 38:21.

6 Ghaitu ensolo laghe kupi ghoa mae tale ale manga ateva laghe unusi ghaitu sesa voto. Laghe molumolu tale raarangisana kalio ravaravaiena, me laghe vaovao tuku kalio ateva tale sauria, gheelei ia tale golo. ⁷ Vara me kateva tale ghaata voto maulue ghe tau lao sio ta ghaitu ensolo ghaitu pelete gheelei tale golo, me pasu tale sessaiaane God, etokatoka nau ekapa atoa. ⁸ Me ale manga ateva ghe pasula tale asu tale maamallangiaane God me tale sarasarakaniaane. Karika poi teva ghe rororo tani kupi sso tale ale manga ateva lamosina ta ghaitu sesa voto tale ghaitu ensolo laghe ruula uunguaaira.

16

Ghaituvilau pelete ekaakaai sessaiaane God

¹ Vara me aghe nongola kinatama lingi ngalo ateva ghe mae sio tale ale manga ateva, ghe ue ta ghaitu (7) ensolo va, "Am kasula me am laa kao see tale kosa ateva sessaiaane God tale isaa o ghaituvilau pelete." ² Aitiuti eteva ensolo ghe kasula me ghe kaola unna ativilau tana pelete epona tale kosa ateva, me usai etoa sesaaili taataraira me mmarikanaili ila laghe tokala ta taumattu ngatoa laghe ghaala unna aimatootongana ghaata kkena ateva me laghe kakkauaa tootoona ateva.

³ Aiaaghaliene ateva ensolo ghe kaola unna ativilau tana pelete epona tale paamanu eteva, me paamanu eteva ghe raeraeanala tani nonginaaili raeira taumattu ngatoa matena ila. Me isaa akapaili voto maulue etokatoka tale paamanu eteva ghe mate akapala.

⁴ Kotonna ateva ensolo ghe kaola unna ativilau tana pelete epona tale ateo akaakala atoa me ateo vubbu etoa, me laghe raeraeana voroila.

⁵ Me aghe nongola ensolo ateva eaitaraa ateo atoa ghe ue va,

"Io ghulughuluena io tale niaiskei etoa,

utokatoka ghaine me angu ghe toka vella arau, me manga io
poli angu tau rorooaala aipoliira tale gheegheleiaaira.

⁶ Ta laghe ubi ematela kapum taumattu me propete atoa,

me angu tau lao sio rae me ngila ropila poli mausi gheegheleiaaira."

⁷ Me aghe nongola liu nighelei aiaavusuvusuena ateva ghe asokoila va,

"Ue, Vau eteva God sarasarakanaili io,
koronna me ghulughuluena kalum niaiskei."

⁸ Ghaatane ateva ensolo ghe kaola unna ativilau tana pelete epona tale sinaka ateva, me ghe tau lao sio sarasarakanai tale sinaka ateva tani sinaki ekulukuluki taumattu ngatoa tale aanasaane ateva. ⁹ Vilikiira ghe sinaki ekulukulukila tale kinatama aanasaane ateva me laghe aauliaa saasakiaa sae tale ararina atae God, ia ghe aitaraa isaa oia sesa voto, me karika poi laghe anna tani nna ngaioghiogbiaa me la anamunamunganeia.

¹⁰ Aiaaghali mane ateva tana ensolo ghe kaola unna ativilau tana pelete tale aitokatokane ateva king unna ia ghaata kkena ateva, me isaa akapaili masaliki ghe aitaraa ghe saurromla. Taumattu ngatoa laghe katakata ramuramuti paaira poli kinatama mmarikanai ateva, ¹¹ me laghe aauliaa saasakiaa ta God epona liu poli tale kinatama mmarikanai

tale usaiira atoa. Me karika poi laghe alona tani nna ngaioghioghiaa tale voto laghe gheleila.

¹² Ghaonomina ateva ensolo ghe kaola unna ativilau tana pelete epona tale kinatama ateo ateeae elupreitis me ghe matila tani aipanipaiaa salaira kingi etoa tale pai sinaka esae. ¹³ Vara me aghe tarala kotolu sesa spiriti taatarailotolu arova roparopa atoa; kateva ghe kupi ghoa mae tale paane ateva otuena ateva, me kateva tale paane ateva ghaata kkena ateva, me kateva tale paane ateva kamena ateva propete. ¹⁴ Ila spirit tale raroai ila la gheeghelei niaimatootoongana atoa, me la kasukasu ekapa see tale kingi etoa tale kosa akapa ateva oia, tani ghelei eitauuinila tale niaiuvi eteae tale kinatama nauna ateva God sarasarakanaili ia.

¹⁵ “Tarala, aue amae nongina tau niainao ateva! Aue emasinaaili ta lo ateva karika easeasekanue, me eaimonomonosiaa unna aiaasae, me karika aue evelu kalio va aue epalata.”

¹⁶ Me kingi etoa laghe velu eitauuala tale voto ateva tale inangari nge Hibru la kolokoloa va Amagedon.

¹⁷ Ghaituna ateva ensolo ghe kaola unna ativilau tana pelete elomarase, me elome tale ale manga ateva kinatama lingi ngalo ateva ghe mae sio tale unna aitokatoka ateva king ghe uela va, “Ange kapala!” ¹⁸ Vara me ravaravaia ateva ghe ravaielo, me palapalanga ateva ghe akurruela, me kinatama rukeruke ateva ghe rukela. Karika teva rukeruke ghe lutu poi nongina lo ateva oia rukeruke nau eteva taumattu ghe tiuaala tani toka tale kosa ateva oia. ¹⁹ Kinatama masaliki eteae eBabilon ghe tarurrutila me ghe kotoluvilaula pai, me kinatama masaliki etoa tale patunganua atoa laghe turrungilala. God ghe annaala kinatama masaliki eteae eBabilon me ghe tau lao sio kapa uaeni eteva pasu ia tale sessaiaane. ²⁰ Patunganua atoa laghe kapala me karika laghe rooroo tani tara motouru etoa. ²¹ Paka vaoo ateva korokorongan ia nongina atu ghe katuula maamaataniaane erooroo ghaatingaulu ghalima (45) kilo ghe kaakatuu saoaa ta taumattu ngatoa, me laghe auliaa saasakiaa ta God ta poli laghe aateateaa saasakiaa nau eteva vaoo ateva ghe kumkumla.

17

Vause ateva epona tale ghaata kkena ateva

¹ Kateva tale ghatu (7) ensolo ghe posoposo ghatuvilau pelete ghe mae sio, me ghe uela etaghi va, “Mae sio, me aghapasunga etam aipolipolina lo ateva vause emuemueaa niaivae ateeae, etokatoka tale oroi ateo atoa. ² Ta ngetana ia oia vause ateva kingi tale kosa akapa ateva la asoaso teeia me lo atoa la tokatoka tale kosa ateva angila ghe ropi saasakiaa voroila, tale kanna sesa manu eteva eaaimatoonga ssavoto.”

³ Vara me ensolo ateva ghe kasueinaghila tale spiriti eteva, ghe laoainaghi sio tale voto ateva karika righi taumattu ghe tokatoka etana, me aghe tarala ghaata kkena ateva raeraeana ia, ghe koukouua inangari niauliaa saasakia ngatoa, ghatu uruna me kasangaulu unna kom, me

16:12: Ais 11:15. **16:14:** Aotu 19:19. **16:15:** Mat 24:43-44; Aotu 3:3. **16:16:** Sek 12:11.

16:18: Aotu 4:5; 8:5. **16:19:** Aotu 14:10. **16:20:** Aotu 6:14. **16:21:** Eks 9:23-24; Aotu 11:19. **17:1:** Jer 51:12-13. **17:2:** Ais 23:17; Jer 51:7; Aotu 14:8. **17:3:** Aotu 13:1.

vause ateva ghe tokatoka epona etana. ⁴ Vause ateva ghe molumoluaa aiaasae ateva ghueghuenna ia me raeraeana ia, me ghe molumoluaa voto atoa gheelei ila tale golo laghe ravaravaiela, me masi atu etoa, me pel atoa, ghe posoposo kapa ateva airopiropi ia laghe gheleielia tale golo, pasu ia tale voto atoa mauuna ila ta mata God me mauuna gheegheleliaane vause ateva tani aivae. ⁵ Arari eteae laghe pitiela tale patilakane, eue va,

Voto aisulianna
Babilon namuu ia
Kinaira ia lo atoa la vaevaea
me voto mauuna tale kosa ateva.

⁶ Aghe tarala vause ateva ang ghe ropi saasakiaala tale raeira kapuna taumattu ngatoa God, raeira taumattu ngatoa la auliaa inangarina ateva Iesu.

Nau eteva aghe taraiela, namuu ta aghe soghiaala isaa oia voto. ⁷ Vara me ensolo ateva ghe uela etaghi va, “Vaalua me angu soghiaala? Aue akiri tau atu malloeana isaa o voto aisulianna tale vause ateva me ghaata kkena ateva eii lou etana. Ia o ghaata kkena ateva uruna ghaitu (7) me kasangaulu (10) unna kom. ⁸ Ghaata kkena ateva utaraiela, ang ghe toka muela, me ghaine karika ia, me aue ekaurekati sae tale liu eteva karika aioghioghi etana, tani lao tale unna nimate ateva. Lo atoa taumattu la tokatoka tale kosa ateva, me karika laghe pitila arariira tale vuku maulue ateva tale aitiutiu tale kosa ateva, aue la soghi nau la tara ghaata kkena ateva, poli ang ghe toka muela, me ghaine karika ia, me aue emene mae.

⁹ “Taumattu nannaane alomasaanga erooroo tani kila isaa o voto. Ghaitu uru eaaimatoonga gaitu motouru vause ateva etokatoka etana, ¹⁰ me tee gaitu kingi. Ghalima (5) ang ghe matela, me kateva ie etokatoka, me mene kateva aue emae. Nau eteva emae, tokatokaane karika aue ealuse. ¹¹ Ghaata kkena ateva ghe toka akasinala, me ia oia karika ia, aiaaghaoalu (8) eteva kingi ia, ie tee elome tale gaitu kingi, ie tee elao lao tale nimate.

¹² “Kasangaulu kom utarala eaaimatoonga kasangaulu kingi, karika laghe ghaa matuutuliena tani kingi, me aue la ghaa sarasarakanana tani kingi tee ghaata kkena ateva tale kateva nonga ia aoa ngateva. ¹³ Kateva nonga ia nannaairaa tani tau lao sarasarakanana me matuutuliena tale ghaata kkena ateva. ¹⁴ Aue la aiuvii tee natu sipsipi eteva, me natu sipsipi eteva aue eapalaila, poli ia Vau ia tale vau ekapa atoa, me kingi ia tale kingi ekapa atoa. Me lo atoa la aimuli teeia, God ghe kololala me ghe suimatoongainilala va kapuna ila me la ghaaiesoangaila etana.”

¹⁵ Vara me ensolo ateva ghe uela etaghi va, “Oroi ateo utarala vause ateva emuemueaa niaivae ateae etokatoka etana, eaaimatoonga taumattu ngatoa me mene oroieili taumattu, patunganua atoa, me ase nisama atoa. ¹⁶ Ghaata kkena ateva me kasangaulu unna kom utarala aue la aisesaii tee vause ateva emuemueaa niaivae ateae. Aue la ghelelia epeisaane me aue la ghaa velu kaliona, aue la nama malatauna me la tauue sae tale kura. ¹⁷ Poli God ang ghe atoka velu ssola ta urunguitaniira sa ateva aue la ghelelia tani ghelei roorooaa voto ghe uela va aue elutu, aue la nim asokoi va ue tani tau lao matuutuliena tale ghaata kkena ateva, lomasina ta inangarina God aue eghelei roorooaa.

18 Me ia o vause ateva utaraiela, eaaimatoonga kinatama masaliki taatara ateae eaaitoia ngakapaaili kingi etoa tale kosa ateva.”

18

Laghe tturungila eBabilon

¹ Emuli tale isaa o voto aghe mene tarala mene kateva ensolo ghe sio mae epona liu, matuutulienaaane namungaili, me mallangina ateva ghe mallangi ekapala kosa ateva. ² Ghe sama anamungailiila, ghe ue va, “Ang ghele tarurrutila! Ang ghele tarurrutila, kinatama masaliki taatara ateae eBabilon!

Ang ghele tanganueira iela raroai etoa,
me sesa spiriti etoa

me ghila atoa karika raarangisana ila, me tee sesa ghaata kkena atoa karika raarangisana ila.*

³ Poli anua akapa atoa angila ghe ropila
kanna uaeni korokorongana, eaaimatoonga uunguaa nialai salos-
aloaa see,
me kingi ekapaaili tale kosa ateva angila ghe lailai ssola etana,
me lo atoa tau bisnis ila tee laghe ghaala oroieili viliki veu tale niuungu karika ghe paapalata tani ghelei.”

⁴ Vara me aghe nongola mene kateva lingi ngalo epona liu ghe ue va,
“Am kipi velue ghoa mae, kapughu etoa,
am tee am rau kipi sso tale gheeleiaane
va am ghaa sesa aipolipoli eteva ae egħħaaia.

⁵ Poli sesa gheeleiaane ange namungailiila me ange saela arau epona liu,
me God eannaa isaa o sesa gheeleiaane.

⁶ Am mene liu lao etana ase salana ghe gheelei lao ta katoa,
am tani liu għaluata eaikkonoria tee gheeleiaane,
me tale unna kapa ateva ghe kaokao apasua,
am kao apasua me am ghelei għaluata nongina ghe gheelei.

⁷ Nau etoa ghe saasaeeaa nannaane me ghe għaqgħha oroi masi voto,
tale isaa oia nau utau lao nimmarikana tale vilikina me nialousiusi tani airooaa,
poli ia ghe ue va, ‘Aghi kuiini iegħi,
me aghi karika va vause raue vulu iegħi,
me karika aue aghateateaa nialousiusi.’

⁸ Ia avalua o me aue eateateaa sesa voto atoa tale kateva nonga nau;
nimate, nialousiusi me kinatama maloo,
me aue kura ateae eata voroia,
poli Vau ngepona ateva God sarasarakanaili ia aue egħelei ni-
aisakei eteae etana.

⁹ “Vara me lo atoa kingi tale kosa ateva laghe asoaso teeia tani ghelei ssavoto, me laghe masimasi eitaua teeia, aue la ngala me la alousiusi nau eteva la tara asuna ateva elaa saesae, nau kura ateae eataataia.
¹⁰ Aue la tingina amasau tani taatara lao poli la maamatautu tani tara nimmarikana ateva, me aue la ue va,

18:2: Aotu 14:8; Ais 13:21; 34:11-14; Jer 50:39. * **18:2:** Kasina uru ngai laghe pitila, karika laghe pitila va me tee sesa għaata kkena atoa karika raarangisana ila. **18:4:** Ais 48:20; Jer 50:8; 51:6, 45; 2 Ko 6:17. **18:5:** Aitiuti 18:20-21; Jer 51:9. **18:6:** Sams 137:8; Jer 50:15, 29; 2 Tes 1:6. **18:7:** Ais 47:7-9. **18:8:** Aotu 17:16. **18:9:** Esik 26:17; 27:30-35.

“ ‘Alousiusi, alousiusi etam, masaliki nitaatara atae,
Babilon, sarasarakananaili io!

Tale kateva nonga aoa ngateva me niaiskei ange ghaaiola!’

¹¹ “Tau bisnisi etoa tale kosa ateva aue la ngala me la alousiusi teeia, poli karika toa aue la mene poli peiira. ¹² Peiira nongina golo, silva, masi ngatu etoa, pel atoa, kalio malallake, kalio ghueghuenna, kalio silk, kalio raeraeana, asease voto atoa gheeghelei tale ai masi ngusungusuaane, me asease voto atoa gheeghelei tale ngisi elepen, me asease voto atoa gheeghelei tale ai aipolina namuu, brons, aeana, me atu eteva mabolo ia, ¹³ sinamon me mene katoa spais, aiaavusuvusuena, murr, frankinsens, uaeni, oliv oeli, palaoa, uiti, vulumakao, sipsipi, ooso, ailou, me lo atoa la uungu me karika la tokatoka tale aloannaaira.

¹⁴ “Tau bisnisi etoa laghe ue etana va, ‘Masi voto atoa ughe aloanna tani tue peipeiena tee ang ghele aikapakapaiila, peim atoa me masi taataram atoa ang ghele kapala, karika aue umene tara poi.’ ¹⁵ Tau bisnisi etoa laghe aaippoliaa me laghe aaitauaa isaa o voto etam me laghe tau peipeienala, aue la nim tingina amasau mae poli la maamatauta nimmarikana ateva etam, me aue la ngala me la ghalousiusi, ¹⁶ me aue la ue va,

“ ‘Alousiusi, alousiusi, masaliki taatara atae,
ughe molumoluua masi kalio atoa, ghueghuenna me raeraeana
kalio,
me ughe molumulo tale golo me tale asease atu etoa masi
taataraira atoa, me pel atoa.

¹⁷ Poli tale kateva nonga ia aoa ngateva isaa akapa kinatama masi voto atoa ngila tturungilala.’

“Me ila akapaaili kapteni etoa tale anua atoa me lo atoa la aikaai etaira me mene katoa la uungu elamana tani ghaa viliki veu aue la tingina amasau. ¹⁸ Me aue la sama anamuu nau eteva la tara asu kura atae nau eteva eataataia, me la ue va, ‘Karika mene teae masaliki taatara nongina lo atae oia.’ ¹⁹ Me aue la velu sae au ta uruira me la aore atingina me la ngala me la alousiusi me la ue va,

“ ‘Alousiusi, alousiusi etana, masaliki taatara atae,
isaa o anua evuuvukala elamana
la ghaaghaa peiira etam!

Poli kateva nonga ia aoa ngateva me angu ghele peisaanelia.’

²⁰ Am masimasieiniela, lo atoa epona liu,
me am kapuna taumattu ngatoa God, me apostolo atoa me propete
atoa,
ta God ang ghele gheleila niaiskei me sesa akapaaili ang ghele lao
sio etana tale ase voto ghe gheelei etaimim.”

²¹ Vara me kateva ensolo korokoronganaili ia ghe saula kinatama atu eteva, naanamungaane nongina lo ateva atu la gheelei eputuputu uiti etana me ghe sau velue siola ta paamanu, me ghe uela va,

“Tale ia o ase kinatama sarasarakananaili

Babilon, kinatama masaliki taatara atae, aue la tturungia,
me karika aue la mene taraia.

²² Me karika aue la mene nongo etam

18:11: Esik 27:36. **18:12:** Esik 27:12-13, 22. **18:15:** Esik 27:31, 36. **18:16:** Aotu 17:4.

18:17: Ais 23:14; Esik 27:27-29. **18:18:** Esik 27:32. **18:20:** Ais 44:23; Diut 32:43; Jer 51:48. **18:21:** Jer 51:63-64; Esik 26:21. **18:22:** Ais 24:8; Esik 26:13.

righi lingi aikaukau, me tau kkinari, me lo atoa la vuuvuu flut me tauue.

Karika aue la tara

righi asease tau ngai uungu etam.

Lingi ngalo tale liu ngai ghelei eputuputu uiti
karika aue la mene nongo.

²³ Me tee karika aue la tara
righi mallangi lam etam.

Karika aue la nongo righi lingi ngaloira lo atoa la aaloanna tani lai.

Kapum tau bisnisi etoa sarasarakanaaili ila tale kosa ateva
me tee ughe alaala me ughe kamekame patunganua akapa atoa tale
kosa ateva, me ughe tiuua ppaelala.

²⁴ Raeira propete atoa me kapuna taumattu ngatoa God, ghe akalala tale
salam,
me tee raeira lo akapa atoa laghe uvi ematelala tale kosa ateva.”

19

Kkinari nimasimasi epona liu

¹ Nau eteva namu ngateva ensolo ghe ruula tani aippooaa, aghe nongola paka mangalia ateva nonginaaili taumattu ngatoa oroieili ila laghe kikkinari epona liu. Laghe ue va,

“Ita tau sae inasanina God!

God tau ngai asaangiita ia! Nioneoneaa me sarasarakana kanna God.

² Poli kanna niaisakei egheelei koronna me ghulughuluena.

God ang ghe gheleila niaisakei ta ia o vause ateva laghe aaivaeainia
ghe ghelei saasakiaala kosa ateva oia tale kanna nivaevae ateae.

Me ghe uvi ematela kapuna tau ngai uungu etoa God, me God ange liuliu
kanna ssavoto ghe gheleila.”

³ Mene ghaluene, taumattu ngatoa laghe mene kkinari enamungailiila
laghe ue va,

“Ita tau sae inasanina God!

Asuna ateva eBabilon ange saela me karika aue ekapa.”

⁴ Ghaluengaulu ghaata (24) namuu me ghaata ase voto maulue ila,
laghe tturru siola tani kkauaa God, ghe tokatoka epona tale aitokatokane
ateva king, me laghe ue va,

“Ue, koronna, ita tau sae inasanina God!”

⁵ Vara me lingi ngalo ateva ghe mae sio tale aitokatokane ateva king
ghe uela va,

“Am kkauaa saela kapuita Goto ateva.

Am akapaaili kapuna tau ngai uungu etoa,
lo atoa am oneoneainia,

am akapaaili ghauna me namuu!”

Nilai eteae tale natu sipsipi eteva

⁶ Vara me aghe nongola lo ateva ghe aangari nongina lingi ngaloira
taumattu ngatoa, me nongina ateo eakaakalaa me tee nongina palapalanga
ateva eaakurrua. Ghe uela va,

“Ita tau sae inasanina God!

Poli Vau palepale kapuita Goto ia, sarasarakanaaili ia eaaitoia
ngakapa voto.

7 Ita masimasieinia

me ita taula nianamunamungaane!

Poli nilai tale natu sipsipi eteva ange mae sio

me vause ateva natu sipsipi eteva elai etana ang ghele
aimanomanosiaala.

8 God ghe tau lao sio masi aiaasae pei tale nilai,

gheeghelei tale masi kalio, raarangisanaaili.”

(Eaaimatoonga masi gheegheleiaaira kapuna taumattu ngatoa God.)

9 Vara me ensolo ateva ghe uela etaghi va, “Pitila llo toko: ‘Aue emasinaaili ta lo atoa laghe kololala va la mae tale unna nilai eteae natu sipsipi eteva.’” Me ensolo ateva ghe mene uela va, “Isaa oia inangari koronna kanna God.”

10 Nau eteva aghe nongola aghe tturru siola tale liue kkena tani kkaueinia, me ghe uela etaghi va, “Urau mene ghelei evalua o! Aghi nim tau ngai uungu ieghi nongina io me nengam me tuem atoa, ila o lo atoa la posoposo parasi tale inangari inangarina Iesu. Ukkauaa nonga God! Poli inangari inangarina Iesu spiriti ia tale propesi.”

Lo ateva ghe iilou tale ooso ateva usousoana ia

11 Vara me aghe tarala epona liu ghe otiela, me usousoana ateva ooso ghe tiitingina, lo ateva ghe iilou etana la kolokoloa va “Lo ateva egheelei emasinaaili uunguaane” me “Koronna ia”. Me egheelei niaisakei tale salana ghulughuluena ia me egheelei niaiuvi. **12** Matana alua nonginaaili kinatama kura ataeae ghe ramerame, me oroieili kou nguru etoa ta uruna, me arari eteae pitipiti ia etana, karika teva ekilakilaia ta ie nonga. **13** Ia ghe molumolu tale aiaasae ateva laghe asuuela tale rae, me ararina ataeae la kolokoloa va Inangarina ateva God. **14** Tau ngai uuvii ngepona liu etoa laghe molumolu tale aiaasae usousoana me raarangisana laghe gheleila tale masi kalio laghe iilou tale ooso atoa usousoana ila, me laghe aaimuli tee lo ateva ghe iilou tale usousoana ateva ooso. **15** Tale paane ateva baenata ateva matakerengana ia ghe kupi ghoa mae tani apala anua atoa. Aue eaitoieinila tale aikkatulu etiulu aeana ia, me easa uaeni tale aiasa uaeni eteva, eaaimatoonga sessaiae God sarasarakanaili. **16** Tale unna aiaasae ateva ghe aakou au kkena muenna atelange, arari eteae pitipiti ia eue va,

Kingi tale kingi ekapa atoa me

Vau tale vau ekapa atoa.

17 Me aghe tarala ensolo ateva ghe tiitingina epona tale sinaka ateva. Namungaili ta ghe kolokoloala ghila atoa laghe looloo elomarase, ghe ue va, “Am mae aitauaa sio tale kinatama ninamanama ataeae kanna ia God. **18** Ta am mae nama malatauira kingi etoa me lo atoa la muemueaa tau ngai uvii etoa, me tau ngai uvii etoa sarasarakanaili ila, me tee am nama malatauira ooso atoa me lo atoa la iilou etaira, me malatauira taumattu ngakapa atoa, la tokatoka tale aloannaaira me lo atoa la uungu me karika la tokatoka tale aloannaaira, me tee lo atoa arariira me lo atoa karika arariira.”

19 Vara me aghe tarala ghaata kkena ateva me kingi etoa tale kosa ateva oia me kapuira tau ngai uvii etoa laghe velu eitauaala tani aiuvii

19:7: Ais 61:10; Aotu 21:2. **19:9:** Mat 22:2-3. **19:10:** Apos 10:25-26; Aotu 22:8-9. **19:11:**

Aotu 1:5; 6:2; Sams 96:13; Ais 11:4. **19:12:** Den 10:6; Aotu 1:14; 2:17. **19:13:** Ais 63:1-3; Jon 1:1, 14. **19:15:** Sams 2:9; Aotu 1:16; 14:20. **19:16:** Aotu 17:14. **19:17:** Esik 39:17-20.

tee lo ateva ghe iilou tale ooso ateva me kapuna tau ngai uvii etoa.
²⁰ Laghe velu eitauaa tani aiuvii me lo ateva ghe iilou tale ooso ateva ghe akaravusula ghaata kkena ateva me tee propete kamekame ateva ghe gheelei mirikol me aimatootongana atoa tale sarasarakaniaane ghaata kkena ateva. Ghe gheleilala tani kame lo atoa laghe ghaala unna aimatootongana ateva ghaata kkena ateva me tee lo atoa la kakkauaa tootoona ateva. Laghe sau esakesakeluelua me laghe sau vellalue saela tale kura atea. ²¹ Me ghe pasa amatela kapuirarua etoa airuuruu ila tale baenata ateva ghe kupi ghoa mae tale paane ateva lo ateva ghe iilou epona tale ooso ateva, me ghila atoa laghe namala malatauira atoa, me ghe ssoilala.

20

Kateva airari (1,000) ninamanama

¹ Aghe tarala ensolo ateva ghe kupi ghoa mae epona liu ghe uunusi kii tale paka liu eteva karika aioghioghi etana me kinatama sene ateva. ² Ghe kune atokala otuena ateva, ia o katu ngateva pei ngemua arau ia, ia Raroai ia me Satana etana, me ghe iri etokaiela va etoka ta kateva airari (1,000) ninamanama. ³ Ensolo ateva ghe sau velue siola tale liu eteva karika righi aioghioghi etana me ghe kavati rungainiela me ghe llokimi ekorokoronganaiela, va karika emene kame anua atoa ta etani ruu kateae airari ninamanama. Me nau isaa o voto eruu me ensolo ateva evira tau velua tani ghelei voto tale aloannaane tale tukunaaili tuku nau erighi.

⁴ Vara me aghe tarala uneira aitokatoka kingi etoa, me tau ngai toitoi etoa laghe tokatoka etaira. Isaa o taumattu God ghe taula sarasarakanetaira tani ghelei niaisakei. Me aghe tarala lo atoa laghe sai pulela aloira ta poli inangariira ta Iesu me inangarina ateva God. Karika laghe kakkauaa ghaata kkena ateva me tootoona ateva me karika laghe ghaala unna namba ngateva tale patilakaira me ta nimaira. Laghe sakesakela me laghe toka teela Karisto tani namuu me aitoiaa teeia tale kateva airari ninamanama. ⁵ Ia o lo atea nitotu tale nimate, aitiutiu ia. Matena akapa atoa, lo atoa karika laghe totula tale aitiutiu eteae nitotu, karika aue la sakesake lamosina ta kateva airari ninamanama eruu. ⁶ Niarangise aue etoka ta lo atoa ila tale aitiutiu eteae nitotu, me manga ila. Ta niaiaaghalaue atea nimate karika righi sarasarakaniaane ta ngetaira, ta aue la pristi ta God me ta Karisto me aue la toka tani aitoiaa teeia ta kateva airari ninamanama.

Airuuruu eteva niaiuvii

⁷ Nau eteva kateva airari ninamanama eruu, Satana aue ekupi ghoa tale karavusu, ⁸ me aue elaa kasu see tani kame anua atoa tale aighoughou ghaata tale kosa ateva oia, la aseasela va Gog me Megog, aue la mae aitauaa tale kinatama niaiuvii eteae, oroieili ila nongina rira ateva elosamarra. ⁹ Me aue la lao aitauaa tale voto ateva namuu ia me mmaiaina ia tani tingina talia masalikiira atea kapuna taumattu ngatoa God, masaliki taatara atea God eaielousieinia. Vara me kura atea aue esio epona liu me aue eata akapaailila. ¹⁰ Me ia o Satana ateva, tau nikamekame ia, aue la sau velue sso tale kinatama kura atea me atu

etoa ramerame ila, nongina laghe sau velu ssola ghaata kkena ateva me propete kamekame ateva, aue la mmarikana llaa me voo nau ekapa atoa.

Niaiskei eteae ta matena atoa

¹¹ Vara me aghe tarala kinatama aitokatokane ateva king usousoanaaili ia, me lo ateva ghe tokatoka epona etana; kosa ateva me epona liu lalu ghe ilou emasaula ta ngetana, karika lalu ghe tarala righi liuirarua tani toka. ¹² Me aghe tarala taumattu ngatoa matena ila, ktoa arariira manee me ktoa karika, laghe tiitingina emua tale aitokatokane ateva king, vara me vuku etoa ghe otilala, me mene kateva vuku ghe mene otiela, vuku maulue ia. Vara me laghe tiuaala tani ghelei niaiskei ta lo atoa matena ila tale gheeleiaaira laghe piti ssola tale isaa o vuku. ¹³ Elamana me Nimate me Hades laghe tau vella matena atoa tani lao tale niaiskei eteae, me kateva kateva taumattu ghe aisakei tale gheegheleiaane. ¹⁴ Vara me Nimate ateva me Hades laghe velulalue ssola tale kinatama kura atea. Ia o kura atea, aiaaghaluene atea o nimate. ¹⁵ Me arova teva taumattu karika teae ararina tale vuku maulue ateva, ia o taumattu ngateva laghe velue ssola tale kinatama kura atea.

21

Ouna ateva epona liu me ouna ateva kosa

¹ Vara me aghe tarala ouna ateva epona liu me ouna ateva kosa, poli lo ateva akasina epona liu me lo ateva akasina kosa ghe kapala, me paamanu eteva tee ghe kapala. ² Me aghe tarala masaliki taatara atea manga ia, ouna ateva ejerusalem, ghe sio mae ta God epona liu, masinaaili taataraane nonginaaili teva vause emolumolu tani laa sou taitanna ateva. ³ Me aghe nongola kinatama lingi ngalo ateva ghe mae sio tale aitokatokane ateva king, ghe ue va, “Tarala! God ange gheleila tanganuena elome tale taumattu ngatoa, aue etoka teeila, me ila aue ekapuna taumattu ila, me ia God aue etoka teeila.* ⁴ Ia aue esei velu rarum mataira me karika aue mene righi nimate me niale amate me ningala me nimmarikana, poli isaa o voto tale pokane ateva kosa ekapa.”

⁵ Me ia o lo ateva ghe tokatoka tale aitokatokane ateva king ghe uela va, “Tarala! Ngagheelei eouna isaa akapaaili voto!” Vara me ghe ue etaghi va, “Piti siola isaa o inangari, poli urooroo tani atoka tuutulim tale isaa o inangari koronna.”

⁶ Me ghe mene uela etaghi va, “Nga ghele ghelei ekapala isaa o voto! Aghi alpa me omega ieghi, aghi aitiuti ieghi me airuuruu ieghi. Ta lo ateva ekaakangngata tani ropi aue atau lao manu karika pei nipoli tale ateo vubbu eteae maulue ia. ⁷ Lo ateva eapala aue eghaa isaa akapaaili o voto, me aue ekapuna Goto ieghi me ia aue enatughu ia. ⁸ Lo atoa la maamataatu me karika korokoronganila, lo atoa karika la aikaaiia,

20:12: Den 7:9-10; Mat 25:31-46; Apos 17:31; 2 Ko 5:10; Aotu 13:8. **20:13:** Rom 2:6; 1 Pita 1:17; Aotu 2:23; 22:12. **21:1:** Ais 65:17; 2 Pita 3:13. **21:2:** Ais 52:1; 61:10; Hib 11:16; 12:22; Aotu 3:12. **21:3:** Lev 26:11-12; Esik 37:27; Sek 2:10; 2 Ko 6:16. **21:3:** Kasina uru ngai laghe pitila, laghe mene uela va, me aue ekapuira Goto ia. **21:4:** Ais 35:10; 65:19; Aotu 7:17.

21:5: 2 Ko 5:17. **21:6:** Ais 55:1; Jer 2:13; Jon 7:37; Aotu 1:8, 17; 22:17. **21:7:** 2 Sam 7:14;

1 Kro 17:13; Sams 89:26-27. **21:8:** Mat 25:41; Aotu 20:15; 22:15.

lo atoa sesaaili gheegheleiaaira, lo atoa la aiuvi emate, lo atoa la ailai salosalooa, lo atoa la alaala, lo atoa la kakkauaa tootoo goto me lo akapa atoa tau nikamekame ila, aue asau vella sso tale kinatama kura atae. Ia o aiaaghluene atae nimate.”

⁹ Me kateva ta ghaitu (7) ensolo, laghe uunusi ghaituvilau pelete pasu tale ghaitu airuuruu voto sesa, ghe mae sio etaghi me ghe uela va, “Mae sio me aghapasunga vause ateva aue vausenna ia natu sipsipi eteva.” ¹⁰ Vara me ensolo ateva ghe kasueinaghila tale Spiriti eteva me ghe saueghi saela tale kinatama motouru eteva me ghe apasungaala Jerusalem, masaliki taatara atae manga ia, ghe sio mae epona liu nongina God etokatoka. ¹¹ Masaliki taatara atae pasu ia tale mallangina ateva God; ghe maamallanga nonginaaili masi atu eteva la aseasea va jaspa ia, masalaangeaili ia arova voto ateva la aseasea va kristol. ¹² Me aivativatina masau sae me korokoronganaaili, kasangaulu ghalua (12) atamana etana, me kasangaulu ghalua ensolo la tiitingina etaira, me arari kasangaulu ghalua ararimangali nge Israeli laghe piti saela tale atamana. ¹³ Kotoluae atamana tale pai nge sinaka esae ativilau, me kotoluae tale pai not ativilau, me kotoluae atamana tale pai saot ativilau, me kotoluae atamana tale pai nge sinaka esuu. ¹⁴ Aivativatina masaliki taatara atae ghe toka saoaala tale kasangaulu ghalua atu tani asarasarakania, me epona etaira laghe pitila kasangaulu ghaluae arariira kapuna apostolo atoa natu sipsipi eteva.

¹⁵ Ensolo ateva ghe aippooaa teeieghila ghe uunusi aikkatulu etiulu golo ia tanu toongi masaliki taatara atae me atamanina me aivativati etana. ¹⁶ Ensolo ateva ghe toongila masaliki taatara atae tale aikkatulu etiulu, ghe toongiela ghe roola ghalua airari ghalua ai (2,200) kilomita,[†] aaluseaane me naanamungiane me saesaeaane epona. ¹⁷ Ghe toongila naanamunga aivativati eteva nongina taumattu ngatoa la tootoongi, me tee nongina ensolo atoa la tootoongi, ghe roola ghaonomongaulu ghalima (65) mita.[‡] ¹⁸ God ghe gheleila aivativati tale atu eteva la kolokoloa va jaspa, me masaliki taatara atae ghe gheleie nongala tale golo, soalannaaili ia nongina ghalasi. ¹⁹ Aivativati eteva tale masaliki taatara atae ghe toka saoaala tale kasangaulu ghalua asease masi atu etoa, aitiutu eteva tale jaspa, aiaaghluene ateva ta sapae, aiaakotonna ateva kalkedoni, aiaaghaata ateva emrol, ²⁰ aiaaghaliema ateva sadonix, ghaonomina ateva kanalien, aiaaghaituna ateva krisolit, aiaaghaoalu eteva beril, aiaaghasio ateva topaz, aiaakasangaulu eteva krisopreis, aiaakasangaulu kateva jasint, me aiaakasangaulu ghalua ateva ametist. ²¹ Kasangaulu ghaluae atamana gheeghelei tale pel, me tale kateae kateae atamana laghe atulula tale kateva nonga ia pel, me kinatama salana atoa laghe gheleilala tale gol, soalannaaili ila nongina ghalasi.

²² Karika aghe tarala teva ale manga tale masaliki taatara atae, poli Vau eteva God sarasarakanaaili ia me natu sipsipi eteva ale manga ilalua. ²³ Tale masaliki taatara atae karika aue la taatara tale mallangi sinaka ateva me tee ulana ateva, ta God aue emallanga etaira me natu

21:10: Esik 40:2. **21:11:** Ais 60:1-2, 19. **21:12:** Esik 48:30-35. **21:15:** Esik 40:3; Aotu 11:1. [†] **21:16:** ghalua airari ghalua ai (2,200) kilomita Tale inangari nge Grik, kasangaulu ghalua airari (12,000) stadia. [‡] **21:17:** ghaonomongaulu ghalima (65) mita Tale inangari nge Grik, kateva ai ghaatingaulu ghaata (144) kiubit. **21:18:** Ais 54:11-12. **21:23:** Ais 60:19-20; Aotu 22:5.

sipsipi eteva aue ekuraira lam ia. ²⁴ Me aue anua atoa aue la kasu tale mallangina ateva, me kingi ekapa atoa tale kosa ateva aue la taula uneira masi voto etana. ²⁵ Atamanina masaliki taatara atae karika aue la kavati elo alai, poli aue karika teva voo. ²⁶ Aue la maeaa masi voto akapa atoa me masi peiira taumattu ngatoa tale kosa ateva tale masaliki taatara atae. ²⁷ Karika righi voto karika ghulughuluena aue esso etana, me llo taumattu egheeghelei voto mauuna me ekamekame karika poi aue la kupi sso, ta lo atoa nonga arariira pitipiti elokoi tale vuku maulue ateva unna ia natu sipsipi eteva.

22

Ateo maulue atae

¹ Vara me ensolo ateva ghe mene apasungaala ateo maulue atae, soalannaaili ia nongina ghalasi, eakaakalaa ghoa elo pakena tale aitokatokane ateva king uneirarue ia God me natu sipsipi eteva, ² elome tale kinatama salana atikirighi tale masaliki taatara atae. Me tale pai eluevilau tale ateo maulue atae, ai maulue atae etiitingina, ekuukuneaa uene kasangaulu ghaluaata (12) tale kateae ninamanama, katengaata ta kateva kateva ulana, me uruna ai eteae oia aue eghelei emasina anua atoa. ³ Me karika aue mene righi nikasikiena, me aitokatokane ateva king uneirarua God me natu sipsipi eteva aue etoka tale masaliki taatara atae, me kapuna tau ngai uungu etoa aue la kkaueinia. ⁴ Aue la tara matane, me ararina atae aue la pitia tale patilakaira. ⁵ Aue karika teva voo, me karika aue la taatara tale righi lam me mallangi sinaka ateva, poli Vau ngepona ateva God aue emallangila, me aue la toka nongina king tani aitoiaa nau ekapa atoa.

⁶ Me ensolo ateva ghe uela etaghi va, “Urooroo tani atoka tuutulim tale isaa toko inangari koronna. Vau eteva God, esuusuu kapuna Spiriti eteva ta kapuna propete atoa, ia ghe sungila ensolo ateva tani apasunga tale kapuna tau ngai uungu etoa, saa voto ghaisa ngarighi aue elutu.”

Iesu ange maemae

⁷ (“Nongola! Ghaisa ngarighi amae! Aue emasinaaili ta lo atoa la nongo usilaa inangari tale propesi laghe pitila tale lo ateva oia vuku.”)

⁸ Aghi Jon aghe nongola isaa oia voto me aghe tarala, me aghe tturru siola tale liue kkena ensolo ateva ghe apasungaala isaa o voto etaghi, me aghe aloanna tani kkaueinia. ⁹ Me ghe uela etaghi va, “Karika umene ghelei evalua o! Aghi tau ngai uungu ieghi ta God tee me io me kapum atoa propete ila, me tee lo atoa la nonganongo usilaa inangari tale lo ateva oia vuku. Ukkauaa God.”

¹⁰ Vara me ghe uela etaghi va, “Karika umene ghelei runga inangari propesi easoaso elome tale lo ateva oia vuku, poli nau ange aakalakalaa. ¹¹ Ta lo atoa la gheelei saasakiaa, la roro roo tani toka gheelei saasakiaa, me lo atoa sesaaili gheeleiaaira, la roro roo tani toka gheelei evalua o ssavoto. Me lo atoa ghulughuluena gheeleiaaira, la roro roo tani toka gheelei ghulughuluena tana voto, me lo atoa manga ila, la roro roo tani toka mangamanga.”

21:24: Ais 60:3, 5. **21:25:** Ais 60:11. **21:27:** Ais 52:1; Esik 44:9; 1 Ko 6:9-10. **22:1:**

Esik 47:1. **22:2:** Esik 47:12; Aitiuti 2:9; Sek 14:8; Joel 3:18. **22:4:** Mat 5:8; Aotu 3:12.

22:5: Den 7:18, 27; Aotu 5:10; 20:6; 21:23, 25. **22:6:** Aotu 1:1. **22:7:** Aotu 1:3. **22:8:**

Aotu 19:10. **22:11:** Den 12:10.

¹² “Nongola! Ghaisa ngarighi amae, me amaemaea tee aipolipoli tani poli kateva kateva tale niuungu laghe gheleila. ¹³ Aghi alpa me omega ieghi, aghe toka akasinala me aghaairuuruu. Aghi aitiutiu ieghi me airuuruu ieghi.

¹⁴ “Aue emasinaaili ta lo atoa la porapora kalioira, ta aue la usikatae ai maulue ateeae, me aue la kupi sso tale atamana ateeae tale masaliki taatara ateeae. ¹⁵ Eleka tale ia o masaliki taatara ateeae tana paua atoa me tau nialaala atoa me lo atoa la aivaeainila me lo atoa la aiuvi emate, me lo atoa la kakauua tootoo goto me isaa akapaaili taumattu la tani aloannaaili tani toka kamekame.

¹⁶ “Aghi Iesu, asuula ensolo ateva tani mae auliaa etaimim isaa akapaaili voto tale ale manga atoa. Aghi oaira ieghi me natuira ieghi mangalina atoa Deivit, me aghi katto pai eteva eramerame elue talaua.”

¹⁷ Me Spirit Manga ateva me vausenna ateva natu sipsipi eteva lalu ue va, “Mae sio!” Me lo ateva unonganongo, umene ue va, “Mae sio!” Lo ateva ekaakangngata tani ropi, erooroo tani mae. Me lo ateva eaaloanna tani ropi, erooroo tani ropi ateo maulue ateeae, karika aipolipoli etana.

¹⁸ Aghaaulia ngaotu ta lo atoa la nongonongo inangari propesi tale lo ateva oia vuku: arova teva taumattu emene piti saoaa righi nim kanna, God aue emene saoaa sae etana llo sesa lo ateva oia vuku eaauliaa. ¹⁹ Me arova teva taumattu eghaa velu kasina inangari tale lo ateva oia vuku, God aue eghaa velu uelane ateeae tale ue ngai eteae etautau maulue, elome tale manga ateeae masaliki taatara, ia oia vuku eteva eaaulia ngatootoongainia.

²⁰ Lo ateva eaaulia ngaotu isaa oia voto, eue va, “Ue, aghi ghaisa ngarighi amae!”

Koronna! Mae sio, Vau eteva Iesu!

²¹ Alooloo sae va maamasinaane ateva Vau eteva Iesu aue etoka aitauua teeiem akapaaili.* Koronna.†

22:12: Ais 40:10; Jer 17:10; Aotu 2:23. **22:13:** Ais 44:6; Aotu 1:8, 17; 21:6. **22:14:** Aitiutiu 2:9; 3:22. **22:16:** Nam 24:17; Ais 11:1, 10; Rom 1:3; Aotu 2:28; 5:5. **22:17:** Ais 55:1; Aotu 21:6. **22:18:** Diut 4:2; 12:32. **22:20:** Mat 24:30-31; 1 Ko 16:22. * **22:21:** teeiem akapaaili Kasina uru ngai laghe pitila, laghe uela va, aue etoka tee kapuna atoa God. † **22:21:** Kasina uru ngai laghe pitila, karika laghe uela va, Koronna.